



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>



A propos de ce livre

Ceci est une copie numérique d'un ouvrage conservé depuis des générations dans les rayonnages d'une bibliothèque avant d'être numérisé avec précaution par Google dans le cadre d'un projet visant à permettre aux internautes de découvrir l'ensemble du patrimoine littéraire mondial en ligne.

Ce livre étant relativement ancien, il n'est plus protégé par la loi sur les droits d'auteur et appartient à présent au domaine public. L'expression "appartenir au domaine public" signifie que le livre en question n'a jamais été soumis aux droits d'auteur ou que ses droits légaux sont arrivés à expiration. Les conditions requises pour qu'un livre tombe dans le domaine public peuvent varier d'un pays à l'autre. Les livres libres de droit sont autant de liens avec le passé. Ils sont les témoins de la richesse de notre histoire, de notre patrimoine culturel et de la connaissance humaine et sont trop souvent difficilement accessibles au public.

Les notes de bas de page et autres annotations en marge du texte présentes dans le volume original sont reprises dans ce fichier, comme un souvenir du long chemin parcouru par l'ouvrage depuis la maison d'édition en passant par la bibliothèque pour finalement se retrouver entre vos mains.

Consignes d'utilisation


Google est fier de travailler en partenariat avec des bibliothèques à la numérisation des ouvrages appartenant au domaine public et de les rendre ainsi accessibles à tous. Ces livres sont en effet la propriété de tous et de toutes et nous sommes tout simplement les gardiens de ce patrimoine. Il s'agit toutefois d'un projet coûteux. Par conséquent et en vue de poursuivre la diffusion de ces ressources inépuisables, nous avons pris les dispositions nécessaires afin de prévenir les éventuels abus auxquels pourraient se livrer des sites marchands tiers, notamment en instaurant des contraintes techniques relatives aux requêtes automatisées.

Nous vous demandons également de:

- + *Ne pas utiliser les fichiers à des fins commerciales* Nous avons conçu le programme Google Recherche de Livres à l'usage des particuliers. Nous vous demandons donc d'utiliser uniquement ces fichiers à des fins personnelles. Ils ne sauraient en effet être employés dans un quelconque but commercial.
- + *Ne pas procéder à des requêtes automatisées* N'envoyez aucune requête automatisée quelle qu'elle soit au système Google. Si vous effectuez des recherches concernant les logiciels de traduction, la reconnaissance optique de caractères ou tout autre domaine nécessitant de disposer d'importantes quantités de texte, n'hésitez pas à nous contacter. Nous encourageons pour la réalisation de ce type de travaux l'utilisation des ouvrages et documents appartenant au domaine public et serions heureux de vous être utile.
- + *Ne pas supprimer l'attribution* Le filigrane Google contenu dans chaque fichier est indispensable pour informer les internautes de notre projet et leur permettre d'accéder à davantage de documents par l'intermédiaire du Programme Google Recherche de Livres. Ne le supprimez en aucun cas.
- + *Rester dans la légalité* Quelle que soit l'utilisation que vous comptez faire des fichiers, n'oubliez pas qu'il est de votre responsabilité de veiller à respecter la loi. Si un ouvrage appartient au domaine public américain, n'en déduisez pas pour autant qu'il en va de même dans les autres pays. La durée légale des droits d'auteur d'un livre varie d'un pays à l'autre. Nous ne sommes donc pas en mesure de répertorier les ouvrages dont l'utilisation est autorisée et ceux dont elle ne l'est pas. Ne croyez pas que le simple fait d'afficher un livre sur Google Recherche de Livres signifie que celui-ci peut être utilisé de quelque façon que ce soit dans le monde entier. La condamnation à laquelle vous vous exposeriez en cas de violation des droits d'auteur peut être sévère.

À propos du service Google Recherche de Livres

En favorisant la recherche et l'accès à un nombre croissant de livres disponibles dans de nombreuses langues, dont le français, Google souhaite contribuer à promouvoir la diversité culturelle grâce à Google Recherche de Livres. En effet, le Programme Google Recherche de Livres permet aux internautes de découvrir le patrimoine littéraire mondial, tout en aidant les auteurs et les éditeurs à élargir leur public. Vous pouvez effectuer des recherches en ligne dans le texte intégral de cet ouvrage à l'adresse <http://books.google.com>



MENTEM ALIT ET EXCOLIT



K.K. HOFBIBLIOTHEK
ÖSTERR. NATIONALBIBLIOTHEK

58.V.20

LIV. 100

HISTOIRE DE
CHARLES VI.
ROY DE FRANCE,
ET DES CHOSES MEMORABLES

aduenües de son Regne,

DES L'AN M CCC LXXX, IVSQVES
EN L'AN M CCCC XXII.

*Par Tres-reuerend Pere en Dieu, Messire IEAN IUVENAL
DES VRSINS, Archeuesque de Rheims.*

Mise en lumiere par THEODORE GODEFROY, Aduocat
au Parlement de Paris.



A PARIS,
Chez ABRAHAM PACARD, rue S. Iacques,
à l'Estoille d'or.

M. DC. XIV.

AVEC PRIVILEGE DV ROT.



AV LECTEUR.

Ceste Histoire, qui iusques à present n'ha esté mise en lumiere, est alleguée de plusieurs, & entre autres par Monsieur Pasquier, en ses Recherches de la France. Vignier aussi en faict mention en sa Bibliothecque Historiale l'an MCCCCXXII. en ces mots;

Maistre Alain Chartier, Poete, & Historiographe François, qui viuoit soubz le Roy Charles VII. ha escript vne Chronicque des faicts & gestes d'iceluy, & des affaires de la France. Son contemporain ha esté Maistre Iean Iuuenal des Vrsins, Archeuesque & Duc de Rheims, ensemble aussi Euesque de Laon, qui ha semblablement escript l'Histoire de son temps, avec vn Traicté de la Querelle de France contre les Angloïs.

En fin i'en ai faict recherche curieuse, & par bonheur en ai recouuré deux Exemplaires. L'un desquels, avec l'Extraict d'une Chronicque, qui commence l'an mille quatre cents deux, & cōtinüe iusques en l'an mille quatre cents cinquante huit, est de la Bibliothecque de Monsieur le President de Thou. Et l'autre, de celle de Monsieur Marescot, Conseiller du Roy en son Conseil d'Estat, & Maistre des Requestes de son Hostel. Je les ai conseré diligemment ensemble, & ai trouué que où l'un estoit

manque, quasi par tout on le pouuoit suppleer par le moyen de l'autre. I'ai outre cela eu recours à une *Chronicque Latine*, composée du commandement de *Guy de Monceaux*, & *Philippes de Villette*, *Abbez de Sainct Denys*, qui m'a autresfois esté communicquée par *Monsieur le Feure*, *Precepteur du Roy*. Pareillement, où il en ha esté besoin, ie me suis aidé des grandes *Chronicques de France*, imprimées l'an 1476. 1493. & 1514. Car elles se trouuent extraictes presques mot pour mot de ceste *Histoire*, des l'an mille trois cets quatre vingts, iusques en l'an mille quatre cents trois, que nostre *Auteur* poursuit beaucoup plus amplement, & avec plusieurs particularitez, iusques à la mort du Roy *Charles VI.*

Or ce qui m'a faict resouldre de la donner au public, c'est qu'elle est escripte par un grand *Prelat*, lequel l'an mille quatre cents seiz e feut faict *Conseiller*, & *Maistre des Requestes de l'Hostel de Charles Daulphin*, depuis septiesme du nom Roy de France, apres ha esté son *Aduocat au Parlement de Paris* transferé à *Poictiers*, & en suite *Euesque de Beauuais*, puis de *Laon*, & finalement *Archeuesque de Rheims*, l'espace de vingt & quatre ans. Et par ainsi vraisemblablement ne dict rien sans bons *Memoires*, & qu'il n'ait veu, ou peu apprendre de ceux qui estoient presens és affaires qui se passoient. Et nommément en ha peu scauoir une bonne partie de son pere, (duquel il parle souuent,) qui feut

un long temps Garde de la Preuosté des marchands de Paris, & depuis Aduocat du Roy au Parlement, & Chancellier du Daulphin.

Auec cela la verité y est exactement obseruée, & ce qui cōcerne la Dignité, & Majesté, & les droictz de nos Roys en diuers poincts, y est non moins fidellemēt recité. Et comme Froissart, & Monstrelet, enclinent du costé des Bourguignons, taisans ce qui cōdamne leur faction, ceste Histoire monstre au contraire ce qui faict pour la defense & iuste querelle de ceux qu'on appelloit Orleānois, ou Armagnacs. Sans neantmoins qu'elle oublie les iugemens de Dieu notables sur ceux (de quelque parti, & quelques grands qu'ils ayent este,) dont les actiōs ont esté tournées au mal, & qui meus d'ambition, auarice, vengeance, & semblables passions, ont esté cause des malheurs qui s'en sont ensuiuis. Qui est la raison pourquoy l'Authheur ne se nomme point, mesmes en un endroiēt, pour n'estre congneu, veut faire croire qu'il estoit natif du diocese de Chaalons, & auoir esté seruiteur & commensal des Ducs de Bourgogne.

Au reste, pour ce qui est du langage, on la verra en celuy que l'Authheur l'ha escript, à sçauoir sans fard, & sans artifice. N'y ayant osé n'y voulu rien changer, faisant plus d'estat de sa naïfueté, que tout ce que l'on pourroit apporter à la polir, qui ne seruiroit qu'à gaster l'ouuraige, & en alterer le sens.

à ij

Michael Hospitalius, Franciæ Can-
cellarius, Epist. ad Franc. Tur-
nonium Cardinalem.

*Nec minus oblector Francorum annalia Regum
Scripta legens, villo sine fūco prorsus, & arte,
Quam qua magnificè Græcis conscripta leguntur
Historijs, agrè speciem retinentia veri.*

Privilege du Roy.

L O V Y S par la grace de Dieu Roy de France & de Navarre, A nos
amez & feaux Conseillers les gens tenans nos Courts de Parlemets,
Prenost de Paris, Baillif de Rouen, Seneschaux de Thoulouze,
Bordeaux, Lyon, & Poictou, ou leurs Lieutenans, & à tous nos autres
Iusticiers, & Officiers qu'il appartiendra, Salut: Nostre cher & bien a-
mé Maître Theodore Godefroy, Aduocat en nostre Cour de Parle-
ment de Paris, & l'un de nos Historiographes, Nous ha treshumble-
ment fait remonstrier, qu'il auroit recouuré vn manuscrit, nō iamais
imprimé, intitulé Histoire du Roy Charles sixiesme, composée par
Iean Iuuenal des Vrains, Archeuesque de Rheims, lequel il desireroit
mettre en lumiere, & faire veoir au public, comme estant pour l'hon-
neur & decoration de nostre Couronne, Nous à ces causes desirans
qu'il serue au public, & tire vtilité d'iceluy, & que aussi le dict suppliant
ne soit frustré de ses diligēces & traualx, Auons permis au dict suppliant
de choisir, & faire imprimer par tel Libraire ou Imprimeur que bon
luy semblera, le susdict liure, pendant le temps, & espace de dix ans
consecutifs, à compter du iour & dattē que le dict liure sera paracheué
d'imprimer, Faisans pour cet effect tresexpresses inhibitions & defen-
ses à tous Libraires, Imprimeurs, & autres personnes de quelque qua-
lité & condition qu'ils soient, d'imprimer, ou faire imprimer, vendre,
ne distribuer le dict liure dedans le dict temps, sans le congé du sup-
pliant, sur peine aux contreuenans de mille liures d'amende, dont
moitié nous appartiendra, & l'autre moitié au dict suppliant, & de
tous les despens, dommāges, & interests, & confiscation des exem-
plaires, qui se trouueront imprimez, & mis en vente au preiudice des
presentes. Si vous mandons, ordonnons, & enioignons que du pre-
sent privilege, vous faires iouyr & vser le dict suppliant plainement,
& paisiblement, cessans, & faisans cesser tous troubles & empeschemens
au contraire, en faisant proceder contre les contreuenans par toutes
voies deues & acoustumées, nonobstant oppositions ou appellatiōs
quelsconques, clameur de Haro, Chartre Normande, & toutes autres
lectres à ce contraires, faites ou à faire, ausquelles nous auons dero-
gé, & derogeons par ces presentes. Et pource que d'icelles on pourra
auoir à faire en diuers lieux, nous voulons qu'au vidimus d'icelles fait
soubz nostre seal Royal, ou deüement collationnées par l'un de nos
amez & feaux Conseillers, & Secretaires, soy soit adioustée comme
au present Original. Voulons en outre qu'en mettant ou faisant me-
tre, au commencement ou à la fin du dict liure copie d'iceluy, qu'il

soit tenu pour bien & deüement signifié, & venu à la congnoissance de tous. Car tel est nostre plaisir. Donné à Paris le vingt sixiesme iour de Feburier, l'an de grace mille six cents quatorze, & de nostre Regne le quatriesme.

Par le Roy en son Conseil,

MARESCOT.

Actuë d'imprimer le dixiesme Mars, mille six cents quatorze.

Le dict Sieur Godefroy ha cedé & transporté le Priuilege que dessus à Abraham Pacard, marchand Libraire de Paris, pour en iouyr par le dict Pacard, suivant le contenu d'iceluy. Fait à Paris le seiziesme Mars, mille six cents quatorze.

T A B L E.

- A**BBAYE de Saint Denys 320. 303.
 exempt de la iurisdic^{ti}o
 de l'Euesque de Paris p. 166.
 Lettres d'Abolition 382. 404.
 Jean de Vienne, Admiral de
 France 58.
 Admiraux de France, Regnaud
 de Trie, Clignet de Bre-
 bant, 221. 520. Guillaume
 de Chastillon, 237. Louys
 de Cullant 556. 557. 567.
 Alençon erigé en Duché 360.
 Alexandre Pape, meurt 251.
 Alliance des Roys de France
 & d'Espagne 112. 104.
 Alliance des Ducs d'Orleans,
 de Berry, & autres, contre
 Jean Duc de Bourgogne
 252.
 Amaury de Seuerac obtient
 victoire sur les nobles du
 Daulphiné 145.
 Ambroise de Lore 439. 453.
 454. 455. 476. 497.
 André de Laual 564.
 Anglois desfaits 11. Anglois
 en Bretagne, 10. en Nor-
 mandie, 31. pres de la Ro-
 chelle 31.
 Appannage de Louys frere du
 Roy Charles v. r. 105. 167.
 Comte d'Armaignac 211.
 Armoiries du Roy Charles
 vi. 89.
- Arnauld de Corbie, to. 20. 25.
 320. 303.
 Arnauld de Marle 331.
 Assemblée des trois Estats de
 France, à Compiègne, 25.
 à Paris, 311. 486.
 Assemblée des trois Estats en
 Angleterre 119.
 Assemblée des Prelats de Frâ-
 ce à Paris, 133. 165. 166. 173.
 224. 225.
 Assemblée des Princes de Frâ-
 ce & d'Angleterre, à Le-
 linguehan, 120. 121. à Bou-
 longne 129.
 Aumont 575.
 Aydes mises au neant, 9. mi-
 ses sus, 11. 22. demandées
 aux trois Estats de Fran-
 ce, 25.
- B.
- B**aptiste de Grimalde 423.
 432.
 Basas rendu aux Anglois 554.
 Baraille d'Azincourt 396. 532.
 533. 534.
 Le Camus de Beaulieu 563.
 Benedic^t Pape d'Auignô 132.
 fait semblant de vouloir
 entendre à vnion 132. le
 Roy Charles. vi. enuoye
 deucts luy 134. ne veut en-

T A B L E.

- rendre à la voye de cession
136. octroie au Roy Char-
les vi. vn dixiesme 141. est
assiégé 167. 168. sort d'A-
uignon 189. est recogneu
pour Pape en France 191.
est à Gennes 212. enuoie
vn Cardinal en Frâce 222.
Bernard d'Armaignac 553.
Bertold des Vrsins, Grand
Comte de Hongrie 418.
Bertrand du Glesquin. Con-
nestable de France, ses vail-
lans faits d'armes 6. le Roy
Charles vi. luy fait faire
vn seruice de morts 91.
Bertrand de Montauban 534.
Bertrand de la Tour 434. 538.
Blanche, Duchesse d'Orleans
meurt 218.
Boniface tenu pour Pape en
Angleterre 121.
Bourges assiégé 303. 304. 306.
523.
Brabant donné à Antoine, fils
de Philippes le Hardy, Duc
de Bourgongne 159.
Brest rendu 142.
Serment & hommaige fait au
Roy Charles vi. par le
Duc de Bretagne 10. 21.
Burgos ha la prerogatiue
d'honneur sur Toled. 585.
586. 587.
C.
Cabochiens de Paris 313.
314. 334. 525. 528.
Cardinaux, le Cardinal d'A-
miens 5. le Cardinal de Laon
85. le Cardinal de la Lune
121.
Catherine, sœur du Roy
Charles vi. mariée au fils
du Duc de Berry 71.
Catherine fille du Roy Char-
les vi. 496. 530.
Serment du Chancellier de
France 594.
Chancelliers de France, des
Dormans, Euesque de
Beauuais 9. Pierre d'Or-
gemont, 42.
Chancelier de Isabeau Roy-
ne de France, 435.
Châcelliers du Daulphin, Ieā
de Neelle, 311. 312. Iean de
Vailly 312. Robert le Mas-
son, 425. 460.
Chancelier du Duc de Berry
307.
Chancelier du Duc de Bre-
tagne, 451.
Charles v. Roy de France, 1. 2.
Charles vi. Roy de France,
est sacré, 7. fait son en-
tree à Paris, 7. sa deuise, 12.
fait faire vn seruice pour
l'ame de son pere 20. sa vi-
ctoire contre les Flamends
38. chastie les Parisiens,
pour leur sedition, 41. 42.
43. en pelerinaige à Char-
tres 45. chastie ceux d'Or-
leans, pour leur sedition,
45. fait la guerre en Flan-
dres aux Anglois, 48. 49.
reçoit le Roy d'Armenie,

T A B L E.

54. il iouste contre vn nommé Colart d'Espinay, 57. il se marie, 65. ha vn fils nommé Charles, 72. ha vne fille nommée Jeanne, 82. il range à son débutoir le Duc de Gueldres qui l'auoit desfié, 84. se met hors du gouuernement de ses Oncles, 85. choisit pres de sa personne le Seigneur de la Riviere, & le Seigneur de Noujant, 86. il fait Cheualiers Charles depuis Roy de Sicile, & son frere, 90. fait faire vn seruice de morts pour Bertrand du Glesquin, jadis Connestable de France, 91. est trop liberal, 92. il iouste 93. son entrée à Lyon, 94. visite le Pape, 94. vient à Thoulouze, 95. puis deuers le Comte de Foix, 96. donne secours aux Geneuois contre les Turcs, 99. il donne le Comté de Foix, au bastart du Comte de Foix, 106. ha vn fils nommé Charles, 108. baille au Duc d'Orleans, son frere, Pierre-sons & la Ferré Milon, 110. entre en frenesie, 113. se trouue habillé en fauuaige, en vne feste à Saint Marcel pres Paris, où il y en ha de bruslez, 115. 116. retombe en frenesie, 121. il se descognoist, 124. il est

malade depuis le mois de Iuin iusques en Ianuier 125. ha vne fille nommée Marie 125. enuoie secours au Roy de Hongrie contre les Turcs 128. ha vne fille, nommée Michelle, 134. deuiet malade, 146. enuoie secours au Comte de Hainault, 147. se veoid avec le Roy d'Angleterre, 149. s'assied en sa tete en vne chaire à dextre du Roy d'Angleterre, 149. 573. s'assied à table à dextre du Roy d'Angleterre, 153. 574. enuoie secours au Roy de Hongrie, contre les Turcs 154. ha vn fils nommé Louys, 160. deux Augustins le veulent guairir 162. il reuiet en santé, 163. 164. se veoid avec Vuenceslaus Roy de Boheme, 164. 165. retourne en santé, 172. reçoit le saint Sacrement de Confirmation, 172. ceux de Venise luy demandent aide contre les Turcs, 173. donne secours à l'Empereur de Constantinople contre les Turcs, 174. reçoit l'Empereur de Constantinople, 178. deuiet malade, 183. ha vn fils, nommé Charles, 188. est en bon point, 191. reuiet à conualescence, 208. est en necessité, 215. 225. est plain de poux, & de vermine, 220. ses paroles

T A B L E.

- à Jean Iuuenal des Vrfins, 220. il reuiet en fanté, 220. est empesché de maladie, 237. malade à Tours 245. entre à Paris, 247. arrive deuant Bourges, 302. reuiet en bõne fanté, 323. entre à Paris, 407. meurt, 492. est mené parmy la ville de Paris, 541. entre à Paris au dextre costé de Henry v. Roy d'Angleterre, & si avec cela baise les reliques le premier, 574.
- Charles, fils du Roy Charles VI. 72. 188. Daulphin de Viennois, 425. est saulué à la prinse de Paris, 443. s'appelle Regent du Royaume de France, 496. ha en son obeïssance le Poictou, le Berry, & le pais d'Aulnis, 457. se veoid à Monstreau où fault yonne avec Jean, Duc de Bourgongne, 469. reduict en son obeïssance le Languedoc, 476. 547. sentence contre luy donnée par ses ennemis, 487. sa naissance, 503. est à Melun, 542.
- Charles VII. sacré à Rheims, 570.
- Charles, fils du Duc d'Orléas, 134.
- Charles I. Roy de Nauarre, veut faire empoisonner les Ducs de Berry, & de Bourgongne, 57. sa mort, 73. persuade au fils du Comte de Foix, d'empoisonner son pere, 97.
- Charles I. Roy de Nauarre, 161. 162. renonce au Comté de Champaigne. 200.
- Charles, Prince de Tarente, 20. 28. veut faire empoisonner Louys Roy de Sicile, 28.
- Charles de Bourbon, Comte de Clermont, 548.
- Charles IX. Duc de Lorraine, 230.
- Charles d'Albrer, Connestable de France, 369. 396. 503. 504.
- Charles de Sauoisi, 198. 199. 200. 201. 216. 223. 225. 506. 528.
- Charles Labbé, 449. 543.
- Cherbourg rendu, 142.
- Claude de Chastellus, 541.
- Clement Pape d'Auignon, 13. 15. 20. 27. 131.
- Combat de Pierre de Courtenai, Anglois, & du Seigneur de Clari, 66. de Jean Carrouget, & de Jacques le Gris, 73. de Robert de Beaumanoir, & de Pierre de Tournemine, 74. de deux Cheualiers François, contre deux Anglois, 103. de sept François, cõtre sept Anglois, 185. 186. 504. de François contre Anglois, 247. de quatre François cõtre quatre Portugais, 362. 363.

TABLE.

Commotion à Paris, 447.

Compiengne rendu au Roy

350.

Comté de Foix, donné au Car-
ptal de Buch, 180.

Comte de Sallebery tué, 566.

Concile à Pise, 246.

Connestables de France, Ber-

trand de Glesquin, 6. Oli-

uier de Clisson, 6. 34. 48. le

Comte d'Eu, 114. 128. le

Mareschal de Sancerre. 163.

188. le Seigneur d'Albret,

le Comte de Saint Paul,

300. le Comte d'Armai-

gnac, 427. 438. 443. 534.

le Comte de Richemont,

560. 563. le Comte de Bou-

quam, 552. 554. 557.

Connestable d'Escoffe, 557.

Augustins pour crime de lese

Maiesté baillez à la Justice

seculiere, 169.

Cry des François en bataille,

38.

Croix droiëte blanche, enfei-

seigne du Roy de France,

297.

D

David de Brimeu, 356.

David de Rambures, 519.

Deuise du Roy Charles vi.

12.

Dixiesme leué sur les gens

d'Eglise, 15. 173. 211.

Domaine de France non alie-

nable, 465.

E

Edouard Duc de Bar, 525.

Emanuel Empereur de

Constantinople, à Paris,

178. 184.

Enguerrand de Bournonvil-

le, 528. 529.

Entrée du Roy Charles vi. à

Paris, 7. à Lyon, 94.

Entrée de la Royne à Paris,

88.

Louys Duc d'Orléans, fait son

entrée à Orleans, 193.

Entreueüe du Roy Charles

vr. & de Richard II. Roy

d'Angleterre, 148. & 149.

150. 151. 152. 153. 154.

Entreueüe du Roy Charles

vi. & de Vuencelaus Roy

de Boheme, 164.

Entreueüe de Henry v. Roy

d'Angleterre, & d'Isabeau,

Royne de France, 461.

Estienne de Vignolles, 493.

544.

Ceux la font excommunien

qui sans le congé & licence

des Roys de France, font

assemblées de gens d'armes

435.

Exemptio de l'Abbaye Saint

Denys, 166.

F

Le Cardinal d'Amiens ha le

gouuernement des finan-

ces de France, 5.

TABLE.

Florent d'Illiers,	568.	Guillaume de Rochefort,	565.
Foix Comté donnée au Roy		Guillaume Fillastre,	226. 227.
Charles vi.	96.	Guy de Roze, Archeuesque	
Comte de Foix meurt,	106.	de Rheims,	248.
Foix Comté, donnée au ba-		Guy de la Trimouille,	154.
stard de Foix,	106.	Guy, Seigneur de la Roche-	
		guyon,	452.
		Guy le Bouteiller,	452.
G Aige de bataille, 172. 201.			
248.			
Gantois, en guerre avec le			
Comte de Flandres, leur			
Seigneur, 18. 19. 32. 33.			
vaincus,	38.		
Ceux de Gennes, demandent			
secours au Roy Charles vi.			
contre les Turcs, 99. en			
l'obeissance du Roy Char-			
les vi. 143. 146. 159. 247.			
516. en diuision,	189.		
Sire de Giac,	562.		
Gilles des Champs, 130. 134.			
132. 140. 166.			
Grauille,	211.		
Gresse,	221. 222. 241.		
Guillaume de Bauiere,	512.		
Guillaume Iuuenal des Ve-			
lins, Chancellier de Fran-			
ce,	592.		
Guillaume de Champeaux,			
Euesque de Laon,	556.		
Guillaume de Gamaches,	490.		
Guillaume de Tignonuille,			
515.			
Guillaume de Martel, 347.			
560.			
Guillaume du Chastel, 197.			

H Arfleu, 530. assiegé, 368.
369.

Henry de Lancastre, 195. 170.
171. 175. 195. est esleu Roy
d'Angleterre, 176. meurt,
312.

Henry v. Roy d'Angleterre,
demande en mariage Ca-
therine de France, 355. 361.
conquiert la plus part de la
Normendie, 428. 429. 437.
439. 440. se veoid avec
Isabeau, Roine de France,
461. 462. 463. est declaré
Regent. du Royaume de
France, 477. espouse Ca-
therine de France, 477.
478. va en Angleterre 550.
meurt, 497. 553. 554.

Henry de Marle Chancellier
de France, 332. 592. 442.
444. 593.

Henry de Sauoisi, Arche-
uesque de Sens, 477.
478.

Hector de Saucuse, 436.

TABLE.

Hugues Aubriot, condamné 17.	Iean de Montaigu, grand Maistre d'Hostel du Roy 269. 270. respond aux le- stres de deffiance des en- fans de Louys Duc d'Or- leans 278. est allié des An- glois 365. 424. 426. 430. 596. ses lestres au Roy 376. ne tiét ce qu'il promet 468. 469. se veoid avec le Daul- phin, à Monstreau où fault Yonne 469. est à Troyes 442. entre à Paris 446. est cause que la paix ne se fait 458. est en Brie & en Fran- ce 535. en l'Abbaye de Me- remonstier 539. est tué à Monstreau, où fault Yon- ne 470. 471. 546.
I.	Iean de Bourbon 537.
I Jacques de Bourbon, grand Chambellan 162.	Iean V. Duc de Bretaigne fait mettre en prison Oliuier de Clifson, Connestable de Frâce 76. adiourné à com- paroir en personne par de- uât le Roy Charles VI. 79. viens à Paris 81. 108.
I Jacques Iuuenal des Vrsins, Archeuesque de Rheims 593.	Iean de Bauiere 512.
I Jacques de Harecourt 565.	Iean Bigot 467.
I Jacques de la Riuere 525. 526.	Iean le Clerc 487.
Iean. I. Duc d'Alençon 396.	Iean, Roy d'Espaigne 31.
Iean d'Angennes 425. 533	Iean de la Haye 497.
Iean, Duc de Berry, ha le gou- uernement du Languedoc 15. 16. deffait les commu- nes d'Auuetgne, & autres pays, qui s'estoient soule- uées 52. espouse la fille du Comte de Boulongne 92. fait des exactions sur le peuple du Languedoc 88. 93. 94. 98. est Capitaine de Paris 208. entre à Paris 309. meurt 425. 535.	Iean Iarson 219. 320. 332. 359.
Iean, Duc de Bourgongne ra- meine à Paris Louys Daul- phin de Viennois 207. fait mandemēt de gēs de guer- re 209. fait tuer Louys Duc d'Orleans 235. vient à Paris 236. se trouue à l'en- terrement de Lonys Duc d'Orleans 263. fait mourir	Iean Iuuenal des Vrsins, ex- trait des Vrsins de deuers Naples, & de Rome, du mont Iourdain 87. son pe- re Pierre Iuuenal des Vr- sins 87. Aduocat en Parle-

T A B L E.

ment 87. Garde de la Preuosté des marchands de Paris, pour le Roy 87. fait ostler sur la riuere de Marne, ce qui empeschoit le nauigage 87. espouse la niepce du Seigneur de Noujant 114. ha l'amour du Roy & de tout le peuple 114. est parent du Seigneur de la Riuere 115. sollicite la deliurance des Seigneurs de Noujant, & de la Riuere 115. 122. retenu du conseil du Duc d'Orleans 119. l'aduertrit de ses fautes 119. est accusé faulxement 122. 123. se iustifie contre ses accusateurs 123. est declaré absous par le Roy 124. pardonne à ceux qui auoient deposté faulxement contre luy 130. accorde Louys Duc d'Orleans, & Philippes le hardy, Duc de Bourgogne 168. est Adnocat du Roy au Parlement de Paris 179. 220. 228. appaise les discords entre les Seigneurs 179. prend conclusions contre l'Vniuersité de Thoulouze 222. soustiét en l'assemblée des Prelats de France, que le Roy peut assembler les personnes Ecclesiastiques de son Royaume, touchant le fait de l'Eglise, pour auoir conseil, & en iceluy presider cōme chef, & con-

clurre, & faire exēcuter ce qui aura esté conclu 228. conclud à ce que la Roync, le Roy estant malade, preside en Conseil, & aye le gouuernemēt du Royaume 241. requiert le Roy Charles VI. qu'il face iustice de Charles II. Duc de Lorraine, 310. remonstre à Iean Duc de Bourgogne, les fautes qu'il faisoit 313. ha des parens au Duché & au Comté de Bourgogne 313. monstre de son pouuoir auoir amour au Roy 316. son aduis touchant la paix entre les Seigneurs 317. mis en prison au petit Chastellet 320. on exige de luy deux mille escus 320. gouuerne la ville de Paris douze ou treize ans 324. ha onze enfans 324. parle pour la paix, & à ce que les offenses faictes d'un costé & d'autre soient oubliées 327. remonstre au Roy, que la paix est necessaire 327. Ce qu'il dist au Duc de Berry 329. est d'aduis qu'on laisse les portes de Paris ouuertes aux Bourguignons qui s'en voudroient aller 330. assure le Duc de Bourgogne qu'on ne luy fera aucun desplaisir de sa personne 330. parle en l'Hotel de ville de Paris au nom du Dauphin 330. ramene

TABLE.

meine le Roy Charles vi.	† President de Languedoc,
à Paris, 331. Chancelier du	595.
Dauphin, 332. est d'adults	Jean Juvenal des Ursins, fils
qu'on entêde à accord avec	de Jean Juvenal des Ursins
le Duc de Bourgongne, 357.	Aduocat du Roy, 329. E-
359. fait faire le serment à	uesque de Beauuais, puis de
ceux d'Arras, 358. est desap-	Laon, & en fin Archeues-
poincté de l'estat de Chan-	que de Rheims, 592.
cellier du Duc de Guyenne	Jean de Luis, 540.
360. est d'un mesme nom	Jean Louuet, President de
& armes que Bertold des	Prouence, 539. 561.
Ursins, grand Comte de	Jean de Luxembourg, 544. 555.
Hongrie, 418. ha vne mai-	Jean le Maingre, dict Bouci-
son à Rueil, 431. parent de	cault, Marechal de France
Jean de Neufchastel, Sei-	154. 163. 189. 190. 247. 516.
gneur de Montaigu, 432.	Jean des Mares, Aduocat du
saue la vie au beau de Bar,	Roy en Parlement, 4. 8. 9.
442. ha des places & mai-	21. 24. 25. 26. 42. 248.
sons en France, Brie, &	Jean de Martel, 217.
Champaigne, 455. ha onze	Jean le Mercier, 86.
enfants, 455. est grandemēt	Jean de Montaigu, 208. 249.
enlignaigé, & auctorifé en	309.
la ville de Paris, 527. es-	Jean de Montefono, 77. 82.
pouse la miepce du Sei-	Jean, Comte de Neuers, 154.
gneur de Noujant, grand	158.
Maistre d'Hostel du Roy,	Jean de Neufchastel, 432. 443.
572. ha la garde de la Pre-	Jean, bastard d'Orleans, 244.
uosté des marchands de Pa-	561. 567. 568.
ris, 572. on depose faulse-	Jean xxiii. Pape, 252.
ment contre luy, 572. l'in-	Jean Petir, 222. 226. 228. 236.
formation luy est miracu-	239. 236.
leusement reuelée, 572. est	Jean Rapiour, 464.
adiourné à comparoir de-	Jean de Tholangeon, 555. 556.
uant le Roy, 572. est decla-	Jean de Torlay, 450. 456.
ré absous, 572. On le veut	Jean, Dauphin de Viennois,
faire mourir aux halles, 573.	425. 537.
est mis en prison, 592. ses	Jean de Vienne, Admiral de
enfants, 593. est Chancelier	France, 58. 154.
du Duc de Guyenne, &	Jean de Villiers, Seigneur de

b.

T A B L E.

Lisle-adam, 141.	366. Responce aux di-
Jean de Viuonne, 149.	des loix, 147.
Jeanne, Roynede Sicile, 149.	Lettres au Roy Charles vi.
pre Louys Duc d'Anjou, 19.	des nobles du Duché de
Jeanne de Navarre, Duchesse	Bourgongne, 390. des no-
de Bretagne, 186.	bles du Comté de Bour-
Jeanne la pucelle, 166, 167.	gongne, 392.
1598. 1599.	Le Lendit, 181.
Imbert de Grolee, 155.	Libertez & franchises de l'E-
Innocent, Pape de Rome, 104.	glise de France, 166. 229.
Inondation d'eaux, 114.	Liégeois deslois, 1513.
Isabeau, Roynede France,	Louys Duc d'Anjou Regent
faict son entrée à Paris, 93.	du Royaume de France, 4.
est couronnée, 93. ha le	prend le thesor du Roy, 8.
gouvernement du Royau-	respond aux Ambassadeurs
me, 241. est à Blois, 446. se	d'Espagne, & de Hongrie,
veold avec Henry v. Roy	143. & 13. faict prendre vn
d'Angleterre, 461. 462. 463.	Docteur en Theologie, 14.
Isabeau, fille du Roy Charles	veut faire prendre le Re-
vi. demandée en mariage,	teur de l'Vniuersité de Pa-
142. est liurée à Richard ii.	ris, 84. le gouvernement
Roy d'Angleterre, 152. est	du Languedoc luy est osté,
mise en vn chasteau, 175.	15. adopté par Jeanne Roy-
mariée à Charles, fils du	ne de Sicile, & Comtesse de
Duc d'Orleans, 222. meurt,	Prouence, 112. est couron-
248.	né en Roy de Sicile, par le
Jubilé à Rome, 177.	Pape, 16. se saisit de la Pro-
Iuifs à Paris, 9. 128.	uence, 27. meurt. 55.
Iuuenal des Vrsins, 171.	Louys ii. couronné Roy de
	Sicile, 95. espouse la fille du
	Roy d'Arragon, 179. rōpt
	l'alliance avec le Duc de
	Bourgongne, 328. meurt,
	337.
L anguedoc, reduict en l'o-	Louys Duc de Bourgongne,
beïssace du Dauphin, 476.	faict la guerre aux S. rrasins
Laual pris par les Anglois,	en Africque, 31. au siege
564.	de Tunes, 101. se trouue en
Lettres de Héry v. Roy d'An-	
gleterre, au Roy Charles	

une bataille où les Sarasins
font des fautes, 182. et 183.
le Duc de Savoie, 115.

Louys de Chalon, 358. 519.

Louys de Cuffant, 358. 357.
156. 158. et 159.

Louys fils du Roy Charles, vi.
160. son mariage avec la fille
du Comte de Nevers, conclut.
185. épouse Marguerite
fille de Jean Duc de Bour-
gogne. 199. enmené de
Paris, 206. meurt, 411.
335.

Louys, Dauphin depuis on-
zième du nom Roy de
France, sa naissance, 356.

Louys, Comte de Flandres,
s'efforce de tuer les sub-
jects, 17. vaincu par les Ga-
lois, 29. meurt, 150.

Louys Inconnu des Vins, 1
479. 482. 483. 486. 592.

Louys de Loigny, Marechal
de France, 535. 536.

Louys frere du Roy Charles
vi. Comte de Valois, en la
bataille contre les Flamands
37. appanage du Duché
d'Orléans, 105. acquiesce la
Cité de Blois, la Seigneu-
rie de Coucy, la Comté de
Soissons, & autres Seigneu-
ries, 105. ont volontiers gens
superstieux, 109. fait reu-
nesses étranges, 119. fait
faire vne Chappelle aux
Celestins de Paris, 119. sou-

tient Benoit Papel d'A-
bigdon, 168. 182. fait al-
liances avec le Duc de Guel-
dres d'Allemagne, 181. en
distingue avec Philippes le
Hardy, Duc de Bourgon-
gne, 182. fait faire vne
grosse taille sur le peuple,
183. accorde le Duc de Lor-
raine, & ceux de Mets, 184.
le Comte de Perigord luy
est donné en appanage,
187. fait son entrée à Or-
léans, 193. achete la Sei-
gneurie de Coucy, 203.
fait mandement de gens
de guerre, 208. est en dan-
ger d'estre noyé, 215. est tué
235. 310.

Plaintes au Roy Charles vi.
des enfans de Louys, Duc
d'Orléans, sur la mort de
leur pere perpetrée par le
moyen de Jean, Duc de
Bourgogne, 259. 260. 261.
262. 263. 264. 265. 266.
267. 268. 269. 270. 271.
272. 273. 274. 275. 276.
277.

Louys de Sancerre, Mare-
chal de France, 34. Conne-
table de France, 503.

M

Maitres des arbalétriers
de France, le Seigneur de
Plangest, le Seigneur de
Rambures, 310. 519. Jean

TABLE.

de Torſay, 450. 456. 543.	gent, 107.
Grand Maître d'Hoſtel du	Siege de Montargis leué, 563.
Roy, Guichard Dauphin,	Murat, 530.
302.	N
le Mans pris par les Anglois,	
564.	L A Nation Gallicane pre-
Mareſchaux de France, le Ma-	ferée comme la premiere
reſchal de Sancerre, 20. 31.	Chreſtienne aux Nations
34. Bouſſicault, 143. le Sei-	Germanique & Eſpagnol-
gneur de Hely, le Seigneur	le, 588.
de Rieux, 300. de la Faieſe,	La Nation Gallicane eſt la ſe-
554. 557. le Seigneur de Se-	conde Natio entre les qua-
uerac, 555. 556. de Bouſſac,	tre Nations Chreſtiennes
560. de Raiz, 567.	588.
Mareſchal du Duc d'Orleans,	Les Seigneurs de France, tien-
537.	nent le iour de leur natiui-
Mareſchal de Bourgongne,	té Court plainiere, 342.
556.	Nemours erigé en Duché, 162.
Marguerite, Comteſſe de Flá-	200. 518.
dres, 25.	Neuſchaſtel en Lorraine, eſt
Marie de France, religieuſe à	tenu à foy & hommaige du
Poiſſy, 163. 206.	Roy de France, 310. 591.
Martin Gouge, Eueſque de	Nicolé de Clemangis, 126.
Clermont, 450. 534.	Nicolas Raulin, 464.
Meaux aſſiegé, 487. rendu,	
489. 550.	O
Melun, aſſiegé, 478. 479.	O liuier de Clifton, Con-
480. rendu, 484. 549.	neſtable de France, 34.
Michelle, fille du Roy Char-	eſt mis en priſon par l'or-
les vi. 134.	donnance du Duc de Bre-
Michel Iuuenal des Vrlins,	taine, 76. aſſailli des gens
Baillif de Troyes, 593.	de Pierre de Craon, 110.
Milan, 516.	meurt, 234.
Mutation de monnoye, 56.	Oriflambe, baillée à Pierre de
Monnoye du regne du Roy	Villiers, 16. 30. rendüe en
Charles v. du tout annul-	l'Egliſe S. Denys, 40. baillée
lée, 93.	à Guy de la Trimouille, 46.
Le Duc de Bretagne, ne peut	rédiue en l'Egliſe S. Denys,
faire monnoye d'or & d'ar-	

T A B L E.

50. ne se préd quand on veut conquerir autre pays, 71.	31. ba le gouvernement du Royaume de France 181.
baillée à Hutin, Seigneur d'Aumont 301. rendue en l'Abbaye Saint Denys 309.	meurt 196. 197.
baillée à Guillaume Martel, Seigneur de Bacqueuille, 347. se donne de tout temps à vn cheualier loyal, preu- d'homme & vaillant 347.	Philippes le bon, Duc de Bour- gogne, s'allie avec les An- glois 474.
Orléas, assiégé par les Anglois 565. le siege leué 568.	Philippes de Moruillier 443.
	Philippes de Gamaches 490.
	Pierre d'Ailly 130. 132. 133. 191. 227. 359.
	Pierre de Bauffremont, 286.
	Pierre de Cramault 226.
	Pierre de Craon, dresse embu- che à Oliuier de Clifson, Connestable 110.
	Pierre des Essars 239. 249. 286. 308. 314. 322. 518. 519. 521. 524. 526. 527.
	Pierre Iuuenal des Vrsins 87. 521.
	Pierre de Luxembourg 139.
	Pierre de Moruillier 461
	Pierre de Nauarre, Comte de Mortaing 162.
	Pierre d'Orgemont, Chancel- lier de Frâce, meurt de gra- uelle, & de poux 248.
	Pierre d'Orgemont 422.
	Pierre de Rieux, Marechal de France 542. 543.
	Pierre de Xaintrailles 544.
	Ponce de Chastillon 467.
	Pontoise 430.
	Poton de Xaintrailles 558.
	Pragmatique Sanction, iuste & saincte 575.
	Pregét de Coitiuy 493. 554. 565.
	Presidēt du Parlement de Pa- ris, Pierre de Moruillier 461.

b iij

TABLE.

Le droit de Preseance se pre-
script, 579. 580. 581. 582.
Preuost de Paris, Pierre des
Essars, Bureau de Saint
Cler, 258. Guillaume de
Tignonuille, 239. Pierre
des Essars, 239. le borgne
de la Heuse, 314.
Procession de l'Vniuersité de
Paris, 304.
Prodige, 142.

R

R Aymond de Turaine, 132.
Regent du Royaume de
France, 456. 499.
René Pot, 458.
Richard II. Roy d'Angleterre,
en guerre contre ses sub-
jects, 78. demande en ma-
riage Isabelle fille du Roy
Charles VI. 141. se veoid a-
uéc le Roy Charles VI. 149.
s'assied en vne chaire à se-
neestre du Roy Charles VI.
149. sied à table à senestre
du Roy Charles VI. 153.
priné du Royaume, 176.
Robert de Beaumanoir, 10.
Robert Mauger, 408.
Le Sire de Rochebaron, 553.
Les Anglois taschent de sur-
prendre la Rochelle, 198.
Sedition à Rouen pour les
Aydes, 21. Sedition de
ceux de Rouen chastée,
44. Rouen, se rend au Roy
d'Angleterre, 452. 546.
Les Roys de France peuent

estre sacrez auant l'age de
quatorze ans, 4. sont pres-
Chrestiens, & le bras dextre
de l'Eglise, 134. 146. 228.
253. 576. peuent assembler
les personnes Ecclesiasti-
ques de leur Royaume,
touchant le fait de l'Eglise
pour auoir conseil, & en
iceuluy presider come chefs,
& conclurre, & faire exe-
cuter ce qui aura esté con-
clu, 228. 576. sont les plus
grands Roys des Chrestiens
267. sont Empereurs en
leur Royaume, 419. ne sont
pas simplement lais; mais
personnes Ecclesiastiques,
576. ont la preseance, &
preeminence d'honneur sur
les autres Roys, 577. 578.
579. 580. 581. 582. 583. 584.
585. 586. 587. 588. 589. 590.
Roy d'Arragon meurt, 146.
Roy d'Armenie, 127.
Roy d'Almont, 241. 246.
S.

L Es Roys de France, peu-
uent estre sacrez auant l'age
de quatorze ans, 4. 236.
Sedition à Paris pour les Ay-
des; 9. 21. laquelle est cha-
stée, 41. 42. 43.
Sedition à Rouen pour les
Aydes; 21. laquelle est cha-
stée, 44.
Sedition de ceux d'Orleans

T A B L E.


chastité,	45.	Tours assiégé,	543. pris, 544.
Sedition en Angleterre ,	22.	Touraine, Duché, donné au	
	44.	Comte du Glas,	557.
Sigismond Empereur d'Alle-		Traicté de Chartres,	246. 514.
maigne, vient à Paris ,	418.	de Troyes avec Henry v.	
vient à la Cour de Parle-		Royd'Angleterre,	477. 596.
ment, 419. est en Anglater-		de Vicestre,	519.
re , 420. 424.		Tiltre de tres-Chrestien don-	
Simon de Cramault, Patriar-		né au Roy Charles vi. par	
che d'Alexandrie, 133. 141.		le Pape, 95. par les Gene-	
146. 160. 165. 173. 179. 180.		uois,	99.
Soissons pris,	352.	Les Roys de France , tres-	
Substraction d'obeïssance à		Chrestiens,	576.
Benedict Pape d'Auignon,		Sire de la Trimouille,	562. 563.
166.		Turcs defaictz,	144.
Supplice d'une femme ayant			
faict mourir son Mary. 187.			

V

		V	Alentine Duchesse d'Or-
			leans, meurt, 244.
T	Anneguy du Chastel, 197.		Vernueil, rendu aux Anglois,
	202. 330. 435. 436. 443. 450.		559.
	460. 464. 469. 472. 473.		Vicomte de Narbonne, 560.
	540. 560. 542. 543. 554.		Vicestre, maison pres de Paris,
Thibault de Soissons,	388.		brulée, 290.
Thomas de Perfi,	195.		En l'Vniuersité de Paris , ces-
Thresor du Roy Charles v.			sent les leçons, 177.
en gros lingots d'or , 6.			Vrbain Pape, 13. 20.
Thresor du Roy Charles			Vrsins, lignaige de Naples &
vi. en gros lingots d'or, 92.			de Romanie, 251. 258.
Tournay, 229. 230. se reduict			Vualeran de Luxembourg.
au Roy Charles vii. 564.			521.

Fin de la table.

D E
L'ORIGINE DES ROYS
DE PORTVGAL, ISSVS
EN LIGNE MASCVLINE DE
la Maison de France, qui regne
aujourd'huy.



A PARIS,
Chez ABRAHAM PACARD, rue saint Jacques
à l'Estoille d'Or.

M. D. C. XIV.

GENEALOGIE DES ROYS DE PORTUGAL, ISSVS EN LIGNE MASCULINE de la Maison de France, qui regne aujourd'huy.

Hugues Capet, Roy
de FRANCE l'an
987. feut pere de



Robert, Roy de
FRANCE l'an 997.
pere de



Henry 1. Roy de
FRANCE l'an 1032.
Duquel sont descendus les Roys de
FRANCE, lesquels
depuis luy ont regné,
jusques à present.



& de Robert, Duc de
BOVRGONGNE
l'an 1032.

BOVRGONGNE.

a ij

BOVRGONGNE.

Robert, Duc de
BOVRGON-
GNE l'an 1032.
feut pere de

CONSTANCE, & de Henry, pe-
(a) l'an 1074. fem- re de
me d'Alphóse Roy
de CASTILLE,
Desquels veint

(a) Fragmentum Historiæ Francicæ, (cuius Auctor anno 1108. viuebat,) excusum Francofurti anno 1596. cum alijs veteribus Scriptoribus Historiæ Francorum, ex bibliotheca Petri Pithoei.

Obtinuit Monarchiam totius Franciæ Aimericus, qui Ducatum Burgundie fratri suo dedit Rotberto.

Et paulò post, Rotberto Duce Burgundionum obeunte, quam suprà retulimus Aimerici Regis fuisse fratrem, filio quoque ipsius Aimerico, ante obitum patris mortuo, filius ipsius †

PORTVGAL.

Vrraque l'an 1109.
Royne de CAS-
TILLE, femme
en premieres nop-
ces de Raymond,
Côte d'outre Saof-
ne, & de Galice.

Hugues, Duc de
BOVRGON-
GNE l'an 1075.

d'Eude, Duc de
BOVRGON-
GNE l'an 1097.
Duquel sont is-
sus les Ducs de
BOVRGON-
GNE iusques
en l'an 1362. &
André, Guy, &
Iean, Daulphins
de VIENNE.

& de HENRY,
Côte de POR-
TVGAL l'an
1090. (a)

† Aimerici Hugo, Ducatum Burgundie suscepit. Quo facto monacho, post aliquot annos Principatum ipsius frater eius Odo obtinuit.

Et rursus, Rex Andefonsus, qui Toletum, maximam urbem Sarracenorum suo subiungauit imperio, magnam sue habitationis partem eis auferens, filiâ Rotberti Ducis Burgundionum, duxit in uxorem, nomine CONSTANTIAM, de qua suscepit filiam, quam in matrimonio dedit Raimundo Comiti, qui Comitatum trans Ararim tenebat. Alteram filiam, sed non ex coniugali thoro natam, AINRICO, vni filiorum filij eiusdem Ducis Rotberti dedit, hosque ambos in ipsis finibus Hispania contra Agarenorum collocauit impetum.

**HENRY, Comte
de PORTVGAL
l'an 1090. feut pe-
re**

PORTVGAL.

**d'Alphonse, Com-
te de PORTV-
GAL l'an 1112. et
Roy de PORTV-
GAL l'an 1139. (b)
pere de**

(b) Ce Roy Alphôse, reprit sur les Mau-
res Mahometains Leyria, Santarem, Lif-
bonne, Ebora, Eluas, Beja, & plusieurs au-
tres villes, & forteresses, Qui font la plus
grande, & meilleure part du Portugal.
Après auoir herité de sa mere Therasie,
de la Prouince d'Antre Douro, & Min-
ho, de celle de Tras os Montes, & d'une
partie de l'Estremadure, où sont les villes
de Porto, Braga, Lamego, Viseu, Coim-
bre, & autres.

**Sanche I. Roy de
PORTVGAL
l'an 1185. pere de**

**d'Alphôse II. Roy
de PORTVGAL
l'an 1212. pere de**

**Sanche II. Roy de
PORTVGAL
l'an 1224.**

**& d'Alphonse III.
Roy de PORTV-
GAL l'an 1246.**

Alphonse III. Roy
de PORTVGAL
l'an 1246. (c) feut
pere de

(c) Beatrix, fille naturelle d'Alphonse
X. Roy de Castille, apporta en mariage
le Royaume des Algarbes à cest Al-
phonse III.

Denys, Roy de
PORTVGAL l'an
1279. pere

d'Alphonse IV. Roy
de PORTVGAL
l'an 1325. pere de

Pierre, Roy de
PORTVGAL l'an
1357. pere de

Fernand, Roy de
PORTVGAL l'an
1368.

& de Jean I. (fils
naturel,) Roy de
PORTVGAL l'an
1385.

Jean I. Roy de
PORTVGAL l'an
1385. (d) feut pere.

(d) Ce Roy Jean, conquist sur les Maures la ville de Septe, ou Ceyte, en Africque.

(e) Ce Roy Alphonse, conquist sur les Maures la ville de Tingis, ou Tanger, en Africque.

d'Edouard Roy
de PORTVGAL
l'an 1433. pere

(f) Ce Roy Emanuel, & son fils le Roy Jean III. son successeur, ont accreu le Royaume de Portugal de plusieurs villes, forteresses, ports, & Îles de la Mauritanie, Guinée, Ethiopie, Arabie, Perse, & Inde Orientale,

d'Alphonse V.
Roy de PORTVGAL l'an 1438. (c)
pere de

& de Fernâd, Due
de Viseu, Connestable de Portugal,
pere de

Comme aussi de la Prouince de sainte Croix en l'Americque, autrement dicté le Bresil, Comme il se lit dans Lopes de Castagneda, en l'Histoire de l'Inde Orientale, és Commentaires d'Alphonse d'Albuquerque, dans Damian de Goes, en la Chronica del Rey Dom Emmanuel, d'As Oforius, Euesque de Syl-

Jean II. Roy de
PORTVGAL l'an
1491.

Emanuel, Roy
de PORTVGAL
l'an 1495. (f)

ues, au Royaume des Algarbes, de *gestis Emmanuelis Regis Lusitaniae*, dans Jean de Barros, en son Histoire, intitulée *Asia*, comprise en trois Decades, d'As Pierre de Mariz, Dialogo 4. & 5. de varia Historia, & encores en la Historia general de la Yndia Oriental, d'Antoine de San Roman, Religieux de l'Ordre saint Benoist.

Emanuel, Roy de
PORTVGAL l'an
1495. feut pere de

Jean III. Roy de
PORTVGAL l'an
1521. pere de

Jean, pere de

Sebastian, Roy de
PORTVGAL, l'an
1557.

d'Isabelle, femme
de l'Empereur
Charles V. Arche-
duc d'AVSTRI-
CHE, & Roy de
CASTILLE, &
d'ARRAGON, qui
eur d'elle

Philippes II. Roy
de CASTILLE,
& d'Arragon, l'an
1555. & Roy de
PORTVGAL l'an
1580. (g) pere de

Philippes III. Roy
de CASTILLE,
d'Arragon, & de
PORTVGAL l'an
1598.

& de Henry, Roy
de PORTVGAL
l'an 1578.

(g) Ce Roy Philippes,
ha par son Testament de
l'an 1594. vni, & ioin& à
toufiours le Royaume
de Portugal à celuy de
Castille, en ces mots,
*Declaro expreſſamente que
quiero, y es mi voluntad, que el
Reyno de Portugal, y los demas
Reynos, y Eſtados, y Iſlas de a-
quella Corona, ayan ſempre de
andar, y andan iuntos y vnidos
con los Reynos de Caſtilla, ſin*

*que iamas ſe puedan diuidir, ni apartar los vnos de los otros, por nignua coſa
que ſea, o ſer pueda, por ſer eſto lo que mas conuiene, para la ſeguridad, augmen-
to, y buen gouerno de los vnos, y de los otros, y para poder meior enſanchar nue-
ſtra ſanta Fee Catolica, y acudir à la deſenſa de la Ygleſia.*

Portugal

GENEALOGIE DES ROYS DE NAVARRE, CASTILLE, ET ARRAGON, issus d'Innigo Ariste, Seigneur François, du Comté de Bigorre en Gascongne.

BIGORRE.

Innigo Ariste, Seigneur du Côté de BIGORRE, premier Roy de NAVARRE, environ l'an 840. (a) feut pere de

(a) Roderic Ximenez, Archeuefque de Toledé l'á mille deux cents huit, de Reb. Hispania lib. 5. c. 21. *Cum Castella, Legio, & Nauarra, varijs Arabum incursionibus vastarentur, vir aduenit ex Bigorcia Comitatu, bellis, & incursionibus ab infantia assuetus, qui Enecho vocabatur, & quia asper in praelijs, Arista agnomine dicebatur, & in Pyrenais partibus morabatur, & post ad plana Nauarra descendens, ibi plurima bella gessit, vnde & inter incolas Regni meruit principatum. Hic genuit filium Garfiam nomine, cui uxorem Vrracam procurauit.*

Garfias I. Roy de NAVARRE l'an 870. & Côté d'ARRAGON de par sa femme Vrraque, de laquelle il eut

Alphonse de Carthagene, Euefque de Burgos l'á mille quatre cets cinquáte huit, in Regú Hispania Anacephalaxosi, cap. 96. *Nobilis quidá de partibus Bigorcia ad Nauarram veniēs, Arabibus expulsis, Regni titulum in ea assumpsit. Hic autē vocabatur Enechus Arista, & fuit primus Rex Nauarrorum, & post eum filius Garfias, cognomento Enechi.*

Sanche Abarca, Roy de NAVARRE l'an 905. pere de

Roderic Sanches de Areualo, Euefque de Paléce, Histor. Hispanica parte 1. cap. 12. *Regnum Nauarra sic incepisse creditur. Cum Castella, & terra Legionis, ac Nauarra, varijs Arabum incursionibus vastarentur, aduenit ex Comitatu Bigorria, vir bellicosus, & strenuus, ac armis assuetus, vocatus Enechus. Hic in motibus Pyrenais Nauarra cōtiguīs morabatur. Deinde ad planiciem Nauarra descendens, cum plurima bella vtiliter gessisset, tandem à populis Nauarrensis primus Rex. Nauarra assumptus est, post quem regnauit filius eius Garfias.*

Garfias II. Roy de NAVARRE l'an 933. pere de

Surita, Historiographie du Royaume d'Arragó, en la primera parte de los Anales de Aragó, lib. 1. cap. 5. *Et Arzobispo Don Rodrigo, (que fue gran inquiridor de los principios de los Reynos de España,) y Don Iayme el primero, (Rey de Aragon en el anno 1213.) en su Historia, y el Rey Don Pedro el quarto, su rebisnieto, (que reynaua en el anno 1336.) en vna Relacion que embio al Papa Clemente sexto, deduzen el origen del Reyno de Nauarra, del Rey Innigo Arista, que fue natural del Conda-*
do de Bigorra. b.

Sanche II. Roy de NAVARRE l'an 969.

Sanche II. Roy
de NAVARRE l'an
969. feut pere de

Garças III. Roy
de NAVARRE
l'an 990. pere de

Sanche III. Roy
de NAVARRE
l'an 1000. & Com-
te de CASTIL-
LE de par sa fem-
me Nunna, pere de

(b) Qui conquist sur les Sarraſſins la ville de
Tolede, Madrid, & pluſieurs autres villes
& fortereſſes de Caſtille.

(c) de la Royne Vrraque, femme de Ray-
mond, Comte d'outre Saofne, & de Galice,
& de Therafie, (fille naturelle,) femme de
Henry, Comte de Portugal l'an 1090.

(d) pere de Pierre, Roy d'ARRAGON,
& de NAVARRE, l'an 1094. d'Alphonſe,
Roy d'ARRAGON, & de NAVARRE,
l'an 1104. qui cōquit ſur les Sarraſſins la ville
de Sarragoſſe, & pluſieurs autres villes, &
fortereſſes d'Arragon, & de Ramir II. Roy
d'ARRAGON, l'an 1134. pere de Peron-
nelle, Royne d'ARRAGON, l'an 1137.
femme de Raymond Berenger, Comte de
Barcelonne.

CASTILLE.

ARRAGON.

Garças IV. Roy
de NAVARRE
l'an 1035.

de Ferdinand,
premier Roy de
CASTILLE,
l'an 1035. & Roy
de LEON, de par
sa femme Sencie,
de laquelle il eut

& de Ramir, (ſils
naturel,) premier
Roy d'ARRA-
GON, l'an 1035.
pere de

Sanche, Roy de
CASTILLE, &
de LEON, l'an
1060. & Alphonſe
VI. Roy de CAS-
TILLE, & de
LEON, l'an 1066.
(b) pere (c)

Sanche, Roy
d'ARRAGON l'an
1063. & V. du nom
Roy de NAVAR-
RE, l'an 1076. (d)

**Garças IV. Roy
de NAVARRE
l'an 1033, feut pere
de**

**Sanche IV. Roy
de NAVARRE
l'an 1054. pere de**

Ramir, pere de

**Garças V. Roy
de NAVARRE
l'an 1134. pere de**

**Sanche VI. Roy
de NAVARRE
l'an 1150.**

Sanche VI. Roy
de NAVARRE
l'an 1150. feut pere
de

.....

CHAMPAIGNE.

Sanche VII. Roy
de NAVARRE
l'an 1194.

& de Blanche I.
femme de Thie-
bault V. Comte de
CHAMPAIGNE,
pere de par elle de

Thiebault I. Roy
de NAVARRE
l'an 1234. pere de

.....

Thiebault II. Roy
de NAVARRE
l'an 1253.

& de Héry I. Roy
de NAVARRE
l'an 1270.

Henry I. Roy de
NAVARRRE l'an
1270. feut pere de

FRANCE.

Ieanne I. Royme
de NAVARRRE
l'an 1274. femme
de Philippes le Bel
Roy de FRANCE,
pere de par elle de

(e) le Greffier du Tillet, remarque en son
Recueil des Roys de France, chap. des
Comtes de Champagne, Que les Roys
Philippes le long, & Charles le Bel, s'inti-
tulerent Roys de France, & de Nauarre,
non pour s'approprier la Couronne de
Nauarre, mais pour la conseruer à icelle
Royme Ieanne II. leur niepce.

Louys I. du nom
Roy de NAVAR-
RE l'an 1305. & X.
du nom Roy de
FRANCE l'an
1313. pere de

(f) fils de Louys, Comte d'Eureux, qui
feut cinquieme fils de Philippes III. Roy
de FRANCE.

EVREUX.

Iean I. Roy de
FRANCE, & de
NAVARRRE l'an
1315.

& de Ieane II. Roy-
ne de NAVARRRE
aussi l'an 1315. (e) fem-
me de Philippes Cō-
te d'EVREUX, (f)
qui eut d'elle

Charles I. Roy de
NAVARRRE l'an
1349.

b iij

Charles I. Roy
de NAVARRE
l'an 1349. feut pere
de

Charles II. Roy
de NAVARRE
l'an 1386. pere de

ARRAGON.

Blanche I. Roy-
ne de NAVARRE
l'an 1425. femme de
Ican II. Roy d'AR-
RAGON, pere de
par elle de

(g) & Bigorre, & Seigneur
de Bearn, fils de Ieā, qui feut
fils d'Archambauld de Grai-
ly, Captal de Buch, & d'Isa-
belle, heritiere des dicts Cô-
tez de Foix, & Bigorre, &
Seigneurie de Bearn.

Charles III. Roy
de NAVARRE
l'an 1442.

de Blanche II.
Royne de NA-
VARRE l'an 1461.
femme de Henry
IV. Roy de CAS-
TILLE.

& d'Eleonor,
Royne de NA-
VARRE l'an
1464. femme de
Gaston, Comte
de FOIX, (g)
qui eut d'elle

FOIX.

Gaston, Prin-
ce de Viane.

Gaston, Prince
de Viane, feut pere
de

(h) fils d'Alain, Sire d'Albret, Comté de Dreux, de Gaure, de Ponthieure, & de Perigort, Viscomte de Limoges, & de Tartas, qui feut fils de Jean, fils de Charles, lequel feut fils de Charles, Connestable de France, fils d'Arnauld Amaniu, fils de Bernardet, Sire d'Albret, & Viscomte de Tartas, fils d'Amaniu, qui feut fils d'un autre Amaniu, fils d'Amaniu, Sire d'Albret l'an mille deux cents.

ALBRET.

François, surnomé Phœbus, Roy de NAVARRE l'an 1479.

& de Catherine, Royne de NAVARRE l'an 1483. femme de Jean, Sire d'ALBRET, (h) pere de par elle de

Henry II. Roy de NAVARRE l'an 1517. (i)

(i) Auquel la femme Marguerite, sœur du Roy François I. apporta en mariage le Comté d'Armagnac.

Henry II. Roy
de NAVARRE
l'an 1517. feut pere
de

BOVRBON.

Ieanne II. Roy-
ne de NAVARRE
l'an 1555. (k) fem-
me d'Antoine de
BOVRBON, Duc
de Vêdoismois, qui
ha eeu d'elle

Henry le Grand,
III. du nom, Roy
de NAVARRE, l'a
1571. & IV. du nom
Roy de FRANCE
l'an 1589. pere de

Louys XIII. du
n^o Roy de FRAN-
CE, & II. du nom
Roy de NAVAR-
RE l'an 1610.

(K) l'Empereur Charles V. luy donne
ce tesmoignage, que *era Princeza de buena
disposicion, virtudes, cuerda, y bien criada, & con-
seille à son fils Philippes de l'espouser en
default de la fille du Roy de France. Pru-
dencio de Sandoual, Abbé de Saint Isi-
dore, depuis Euesque de Tuy, & Histo-
riographe de Philippes III. Roy d'Espai-
gne, pour le Royaume Castille, segunda
parte de la Vidadel Emperador Carlos
quinto, lib. 30. An. 1548. Tit. Auifos, o In-
struccion del Emperador al Principe su
hijo. art. 58.*



HISTOIRE
DV ROY CHARLES VI.
ET DES CHOSES MEMORABLES

ADVENES DE SON REGNE, DES

l'an M. CCC. LXXX. iusques en l'an

M. CCCC. XXII.



'AN mille trois cents quatre vingts, le seiziesme iour de Septembre alla de vie à trespassement le noble Roy Charles cinquiesme de ce nom, lequel fut nommé Charles le Saige. Car il auoit sens, prudence & discretion de gouverner son Royaume tant en fait de guerre, en resistant à ses ennemis,

1380.

& conquerir & recouurer ce qu'ils auoient gaingné tenoient & occupoient par vaillants cheualiers, chefs de guerre à ce commis & deputez, comme Connestables, Mareschaux & gens de guerre en armes exercez, comme aussi sur le faict de la Iustice. Et feit visiter les Ordonnances anciennes de ses predecesseurs, & les confirma & approuua. En grand honneur & reuerence auoit l'Eglise & les personnes Ecclesiastiques, & grand' esperance auoit en Dieu, & à Monsieur saint Remy Apostre de France, & tres-volontiers il faisoit lire les Histoires. Et en l'Eglise de saint Remy de Rheims où il feut sacré, fait de belles fondations & leur donna de beaux & grands reuenus. Belle feut sa fin, & mourut comme vrai Chrestien. Et feut porté à saint Denys, & mis en sepulture, les solemnitez accoustumees gardees. Et laissa deux enfans, l'un nommé Charles aîné, & le deuxiesme Louys, lesquels estoient en bas

A

1380.

aage. Et si auoit trois freres, Louys Roy de Sicile & Duc d'Anjou, Iean Duc de Berry, & Philippes Duc de Bourgongne. Et auquel temps du trespasement dudit feu Roy Charles cinquiesme l'an mille trois cents quatre vingts, les choses en ce Royaume estoient en bonne disposition, & auoit fait plusieurs notables conquestes. Paix & Iustice regnoient. Ny auoit obstacle sinon l'ancienne haine des Anglois, desplaisans & comme enragez des pertes qu'ils auoient faictes, qui leur sembloient estre irrecuperables, lesquels sans cesser espioient & conspiroient à la destruction totale de ce Royaume, & contemnoient toutes manieres d'ouuerture de paix. Souuent venoient en armes d'Angleterre en France, & aucunesfois descendoient en Guyenne, autresfois en Bretagne, Normandie, Picardie, & specialement vers les riuages de la mer, bou-toient feu és maisons du plat pays, comme és grains, & par tout où ils pouuoient, prenoient prisonniers, & les menoient en Angleterre, & piteusement les traictoient. Et durant sa vie y auoit ordonné pour resister les Ducs d'Anjou, de Berry, de Bourgongne & de Bourbon qui estoient és frontieres, faisans le mieux qu'ils pouuoient. Et quand on veid la maladie du Roy non sanable, on enuoya deuers lefdits Seigneurs hastiement qu'ils s'en vinssent, lesquels le feirent, en laissant provisions à leursdictes frontieres pour resister aux entreprises des ennemis, & s'en vindrent à Paris. Et si deuant ils auoient esté curieux & soigneux du fait du Royaume, encores delibererent de l'estre plus, veu l'aage des deux enfans du Roy, à ce que les affaires du Royaume feussent bien gouuernees.

Et le Roy comme dict est, mis en sepulture à saint Denys bien & honnorablement, lefdits Seigneurs feirent assembler vn grand & notable Conseil, auquel feurent ceux du sang Royal, & plusieurs Barons & gens de grand science & auctorité tant de la Court de Parlement, que des Comptes, Thresoriers & autres. Et feurent mises plusieurs choses en deliberation touchant le gouuernement du Royaume. Et y eut diuerses opinions & imaginations. Car le Roy de Sicile frere aîné du Roy Charles cinquiesme disoit que selon la coustume de France veu que Charles l'aîné fils du Roy n'auoit pas quatorze ans, qu'il deuoit auoir le gouuernement total du Royaume, & de tous les deux enfans iusques à ce que l'aîné

eust quatorze ans. Et ces choses requeroit auoir expressément & tres-instamment. En ceste matiere Messire Pierre d'Orge-
mont qui se tenoit comme principal du Conseil du Roy, parla
bien grandement, & disoit qu'on debuoit attendre qu'il eust
plus grand aage, alleguant plusieurs raisons, & specialement
que le Roy Charles cinquieme pere des enfans, auoit ordon-
né & voulu qu'il ne feust sacré, iusques à ce qu'il eust plus grand
aage, & que les Ducs de Bourgogne & de Bourbon eussent
le gouvernement des enfans. Et entre les Seigneurs y auoit
de grandes diuisions, & mandoit-on gens d'armes de tou-
tes parts, lesquels se meirent sur les champs, & pilloient & ro-
boient & empeschoient que viures ne vinssent à Paris, & desia
 y auoit grand murmure entre le peuple, & taschoient fort à
 eux esmouuoir. Et pource Messire Jean des Mares qui estoit
 Aduocat du Roy en Parlement bien notable Clerc, & de bien
 grand prudence, considerant les choses dessus dictes feit vne
 moult belle & notable proposition, en monstrant qu'on deb-
 uoit mener le Roy à Rheims, pour estre sacré, & allegua plu-
 sieurs grandes raisons, & comme plusieurs Roys en moindre
 aage auoient eu le gouvernement de leurs Royaumes, & mes-
 mement le Roy Saint Louys. Et monstra ledit Maistre Jean
 des Mares que quelconque loy ou Ordonnance qui auroit
 esté faicte au temps passé, elle se pouoit muer ou changer
 pour euitier plus grand inconuenient, lequel estoit taillé d'e-
 stre bien grand pour la diuision des Seigneurs qu'on voyoit
 euidente, & que quand le Roy seroit sacré, toutes telles di-
 uisions cesseroient, & prendroit le gouvernement en son
 nom, & auroit bon conseil. Et quand ledit Duc d'Anjou eut
 ouy parler ledit des Mares, & aussi plusieurs autres, se con-
 descendit à son imagination. Toutesfois le dict Duc touf-
 jours requeroit, qu'il ne feust point defraudé de son droit de
 Regent, non mie pour conuoitise ou ambition, mais pour
 garder son honneur. Et quand la matiere eut fort esté de-
 batue, fut le Conseil fort dissolu, & entre les seruiteurs des
 Princes y auoit plusieurs paroles, & aux champs mesmes
 entre les gens de guerre auoit en paroles telles manieres que
 guerres ne s'en failloit, alloient iusques à la voye de faict. Et par
 l'admonestement d'aucunes gens de bien, les Princes se con-
 descendirent qu'aucunes gens de bien y aduisassent. Lesquels

A ij

iurerent aux saints Euangiles de Dieu , que cessans toute amour, crainte, ou peur, ils discuteroient selon la qualite de la personne du Roy. Et ainsi feut iure & promis, qu'on tiendroit ce qu'ils ordonneroient & tiendroient. Ceux qui estoient esleus s'assemblerent, & apres qu'ils eurent este quatre iours ensemble, desirans dire leur aduis & imagination, selon ce que la matiere hastiuement le requeroit, dirent & prononcerent leur sentence & imagination en la maniere qu'il s'ensuit. C'est à sçauoir que la loy des predecesseurs Roys de France, ne pouuoit pas tellement arrester ou retarder ceux de la lignee Royale, qu'ils ne peussent anticiper le terme prefix de leur Sacre. Et à ce faire fut assigné la fin d'Octobre, & que tous les vassaux & feaulx luy feroient foy & hommaige, & que tout le fait de la guerre & de la Iustice se conduiroit en son nom & sous son seel, & que les enfans du Roy seroient baillez au gouvernement des Ducs de Bourgogne & de Bourbon, lesquels les feroient nourrir doucement, & instruire & endoctriner en bonnes mœurs iusques à ce qu'ils fussent en l'age de puberté. Et que toutes les finances tant du domaine que des aides se mettroient au thresor du Roy. Et au regard des meubles, or, argent & joyaux qui feurent au Roy son pere, le Duc d'Anjou les auroit, en delaisant toutesfois au Roy la prouision competente, & que seulement il vseroit de ce mot Regent, & qu'à parler des negoces & affaires il seroit appelé. Le dict des arbitres feut mis par escript, & les Ducs le accepterent, en remerciant les dicts arbitres de ce que par leur bonne diligence, les questions estoient assopies. Et combien qu'il sembloit au Duc que l'authorité de la Regence estoit fort diminuée, toutesfois en faueur du Roy son nepueu, en la salle du Palais il le feut publier. Les gens de guerre estans sur les champs, pilloient, roboient, prenoient prisonniers, efforçoient femmes, violoient & despuceloient vierges, & faisoient tous les maux que ennemis pourroient faire, excepté bouter feux, & se retirait tout le peuple és forteresses & bonnes villes, marchands estoient destrouffez, & disoient qu'ils se payoient de leurs gaiges. Le Duc Regent enuoya vers plusieurs Capitaines, & aucuns manda, & parla à eux, & fit faire defenses par cris & proclamations sur peine de la hart, que plus ne vsassent de telles manieres de faire. Mais compte n'en tenoient, & pis en

faisoient. En plusieurs lieux le peuple s'esmeut, & pillerent ceux qui se mesloient de Receptes de aides, gabelles, & impositions. Le Duc par douces paroles appaisa ceux de Paris.

Quand on delibera de mener le Roy au Sacre, il voulut aller par Meleun, veoir les armures qui y estoient, & qu'il auoit veuës durant la vie de son feu pere Charles Roy de France cinquiesme de ce nom. Et auoit esté deliberé que à grand compaignee de gens de guerre il iroit à Rheims. Et du temps de son dict feu pere la grand plaissance qu'il auoit, estoit le plus en beaux harnois & armures, que autrement. Et luy monstra on de par son dict pere, & en sa vie les plus grandes parties des thresors, où il y auoit de bien nobles choses, & si luy monstra on du harnois beau & clair & bien fourbi, & luy feut demandé lequel il ayroit le mieux, & il respondit, qu'il ayroit mieux les harnois que les richesses. Et luy fut dit qu'il print ce qu'il voudroit, & en vn coing il veid vne moult belle espee, laquelle il requit luy estre donnée. Et vn autre iour apres, le Roy son pere fit vn grand conui, & moult beau disner, & apres que on feut leué de table, feir apporter vne moult belle & riche couronne, & vn beau bacinet, & les monstra à son fils Charles, & luy demanda lequel il aimoit le mieux, ou estre couronné Roy de la couronne, ou auoir le bacinet, & estre subiect aux perils & fortunes de guerre, lequel respondit plainement que il aimeroit mieux le bacinet que la couronne, Dont apperceurent les presens, qu'il seroit cheualeureux. Et n'eut pas seulement ce qu'il demandoit, mais selon son corps on luy fit faire vn gentil harnois, lequel on feut pendre au cheuet de son liest. Et feut le Roy promestre à tous ses parens & à tous les presens, qu'ils le seruiroient loyaument apres son trespas.

Le principal comme on disoit, qui auoit trouué & conseillé à mettre aides sus, c'estoit le Cardinal d'Amiens, lequel estoit moult hay du peuple, & auoit tout le gouuernement des finances, & l'auoit le Roy en grande indignation. La cause on disoit qu'il le hayoit, pour cause qu'il estoit bien rude au Roy durant la vie de son pere en plusieurs manieres, & vn iour appella Sauois, & luy dict, Sauois à ce coup serons vengez de ce Prestre, laquelle chose vint à la cognoissance du Cardinal, lequel monta tantost à cheual, & s'en alla de tire à Doué en vne place qui estoit à messire Jean des Mares, & de

1380. là le plustost qu'il peut en Auignon, & emporta ou fit emporter bien grand finance comme on disoit.

Auant que le Roy fust à Rheims pour son Sacre, feut ouuerte la matiere de faire vn Connestable. Car depuis la mort de Messire Bertrand du Glisquin n'en auoit point esté esleu ou faict vn. Et disoit le Duc d'Anjou Regent, que c'estoit à luy de le faire. Et assez tost eut response des Ducs de Berry, Bourgongne, & Bourbon que non estoit, & que seulement deuoit vser de nom de Regent, & que le faict de la guerre, se debuoit conduire & faire par le Roy. Et ainsi fut conclu. Et à conseillier le Roy qui seroit Connestable, y eut diuerses opinions & imaginations. Car lors y auoit en France de vaillans Princes, Barons & Cheualiers, & y eut vn Prince lequel en parla à Messire Louys de Sancerre, & luy demanda s'il le vouloit estre. Et il respondit que non. Car il n'y auoit si vaillant au Royaume, qui peust, ne sceust faire de si vaillans faits d'armes, qui ne feussent reputez pour neant entuers ceux dudit Bertrand de Glisquin. Et desdites paroles ne feut nouuelles, & vint-on à conseiller le Roy. Et par deliberation de tous, fut nommé Messire Oliuier de Clifon vn vaillant cheualier de Bretagne, & le feit le Roy Connestable, & luy bailla l'espee, & fit les sermens en tel cas accoustumez. Et luy commanda le Roy d'assembler gens d'armes pour le conduire à Rheims à son Sacre.

Et le vingt-cinquiesme iour d'Octobre partit ledict Connestable de Meleun, & print son chemin à Rheims. Et le Roy apres se partit accompagné des Ducs d'Anjou, de Berry, de Bourgongne, de Bourbon & de Bar, des Comtes de Hainault, de Harcourt, & d'Eu, & de plusieurs Barons, cheualiers & escuyers, & firent ceux de Rheims beau & grand appareil pour receuoir le Roy & sa compaignée. Et soit aduerti, que depuis le partement du Roy de Meleun, le Duc d'Anjou contraignit Sauoisi à reueler le thresor, & luy cuida faire couper la teste, & estoit ledict thresor en gros lingots d'or, & si y auoit plusieurs ioyaux. Le Roy vint à Rheims, où il fut grandement & honnorablement receu à processions, & mené iusques à l'hostel Archiepiscopal, & y auoit foison de peuple tant nobles que autres. Et apres que ledict Duc eut eu ledict thresor, s'en vint hastiuement à Rheims, & feut le

Roy sacré. Tous les Pers de France Ecclesiastiques presens. Le Duc de Bourgongne y estoit, mais le Comte de Flandres n'y feut point. Et fut moult belle chose & notable de veoir le mystere du Sacre, la maniere d'aller querir la sainte ampoule, & de l'apporter, & bailler és mains de l'Archeuesque, les ceremonies de la messe, la belle & douce maniere du Roy, veu l'aage qu'il auoit, & aussi constamment que s'il eust eu vingt ou trente ans. Et qui voudroit veoir le liure du Sacre du Roy, on diroit bien que c'est vne bien pretieuse chose. La messe finie, & le seruice fait, le Roy s'en vint au Palais de l'Archeuesque pour disner, où tout estoit ordonné & appresté ainsi qu'il appartenoit. Et à l'assiete des Seigneurs, y eut aucunes controuerses & dissentions entre le Duc d'Anjou Louys, & Philippes Duc de Bourgongne. Car Louys disoit qu'il estoit aîné, & auant son frere Philippes maisné, il deuoit auoir les honneurs, & estre le premier assis. Philippes disoit que au Sacre du Roy les principaux estoient les Pers de France, & comme Per & Doyen des Pers il debuoit aller deuant, & y eut plusieurs paroles d'un costé & d'autre aucunes arrogantes. Car Louys se tenoit Per, & tenoit en Perrie sa Duché. Philippes respondit qu'il estoit Doyen des Pers, & que son frere ne tenoit que en Perrie. Et par ce le Roy assembla son Conseil, auquel il y eut diuerses opinions. Et finalement feut conclu par le Roy, que Philippes au cas present iroit le premier, dont Louys ne fut pas bien content. Et dient aucuns que ce nonobstant Louys s'en alla seoir assez près du Roy, qui auoit son siege paré sur le banc: mais Philippes saillit par dessus, & se veint mettre entre le Roy & son frere Louys, lequel print en patience, & dissimula le tout. Et lors Philippes fut appelé le hardy. Le Roy fut sacré le Dimanche auant la Toussaincts. Les Connestable & Mareschaux seruirent portans les mets à cheual, le Roy fit des Cheualiers, & receut ses hommaiges, & s'en vint à Paris sans passer par aucunes bonnes villes fermées où on l'attendoit, pour doubte des requestes que on eust peu faire touchant les aides. La maniere de ses predecesseurs estoit qu'il debuoit venir à saint Denys faire ses Oraisons, & l'attendoit l'Abbé. Mais empesché feut par mauuaises gens. Il entra à Paris vestu d'une robe bien riche toute semée de fleurs de lys. Ceux de la ville de Paris

1380. allerent au deuant de luy bien deux mille personnes vestus tout vn, c'est à sçauoir de robes my-parties de verd & de blanc. Et estoient les rues tendues & parees bien & notablement, & y eut diuers personages & Histoires. Et crioit-on Noël, & fut receu à tres-grand ioye. Et tout droit veint à nostre Dame, si feut grandement receu par l'Euesque, & s'en alla au Palais. Et receut les dons que la ville & autres luy faisoient, & par trois iours fit grands conuis & ioustes. Et furent les Dames presentes, & y eut grand ioye demenee.

Le Comte de saint Paul fut fort chargé d'auoir esté en Angleterre, & d'auoir espousé la sœur du Roy Richard sans le consentement du Roy. Il vfa de grandes excusations, & finablement le Roy luy pardonna. Et puis il chargea fort Messire Bureau de la Riuiere, d'auoir fait venir les Anglois, & leur auoir escript lettres. Parquoy fut absent de la Court, & hastiuement rescriuit à Clifson Connestable, lequel tantost le veint excuser iusques à l'exposition de son corps, & à gage. Et auoit ledit de la Riuiere à aduersaires tous les Seigneurs par enuie, & feut la paix faite, si fut rappelé en Court comme parauant.

Grandes diuisions s'esmeurent derechef entre les Seigneurs, & estoient les gens d'armes sur les champs faisans maux innumerables, combien que commandemens leur eussent esté faits qu'ils s'en allassent à leurs maisons & garnisons. Et en donnoit on grand charge au Duc d'Anjou & spécialement Philippes de Bourgogne qui se plaignoit du tresor qu'il auoit pris, & qu'il n'estoit point compris en ce qu'il debuait auoir, & qu'il n'auoit fait aucune prouision au Roy ainsi qu'il debuait. Et estoit le feu de toute diuision fort allumé. Prelats & autres se mesloient fort de tout appaiser, & leur monstroient on que tout ne pouuoit tourner que au dommaige du peuple, & y eut accord. Et feit la proposition Maistre Iean des Mares lequel loia le Duc d'Anjou, & monstra ses vertus & despenfes, peines & trauaux, & teut celles des autres. Aucunes gens de bas estat de Paris s'assemblerent & veindrent vers le Preuost des marchands, & luy contrainct veint à vne assemblee, & requeroient les aydes à cheoir, disans que sur la Requête qu'ils auoient sur ce autresfois faite, n'auoient eu quelque responce, & le contraignirent à aller vers le Duc.

Et beaucoup

Et beaucoup de gens de bien estoient d'opinion qu'on attendist, cuidans rompre le coup, mais vn sauuetier se leua & allegua leurs charges, & les pompes de ceux de la Court, & tourna tout en grand mal & sedition. Et parla le Preuost, & fit la requeste. Le Chancellier des Dormans, Euesque de Beauuais, leur monstra leur folle maniere & entreprise, & fit tant qu'ils attendirent iusques au lendemain, & n'oublierent pas à retourner. Car on leur auoit donné esperance. Et furent mis ius les Aydes, & du commandement du Roy, & par son Ordonnance, & aussi des Seigneurs du sang. Et par le Conseil feut chargé Messire Jean des Mares de parler au peuple, & de leur dire qu'ils s'appaissassent, & que le Roy auoit mis & mettoit au neant les Aides, sans ce qu'elles eussent plus de cours. Ce qu'il fit, & print son theme *nouus Rex, noua Lex, nouum gaudium*, & le deduisit bien & grandement, aussi en estoit il bien aisé. Et la chose qui meut à conseiller qu'on les mist ius, c'estoit que le Roy Charles cinquiesme pere du Roy, ordonna à cause des maux infinis qu'elles causoient, qu'elles cheussent. Et si monstra au peuple le danger où ils se mettoient, de faire telles commotions, & comme ils debuoient obeir au Roy, & le seruir, & fit tellement qu'il sembloit qu'on en feust tres-content, & cuidoit on qu'ils fussent contens, mais ils requierent que les Iuifs & vsuriers feussent mis hors de Paris. Et sur ce respondit qu'il en parleroit au Roy, & qu'il en feroit son deuoir. Nonobstant laquelle response, & sans attendre la publication de par le Roy, s'esmeurent, coururent par la ville, rompirent les boiettes des fermiers, ietterent l'argent par les ruës, jettoient & deschiroient les papiers, allerent enuiron en quarante maisons de Iuifs, pillerent & roberent vaisselle d'argent, ioyaux, robbes & les obligations. Et aucuns nobles & autres à ce les induisoient, aucuns en tuerent, & despleut la chose bien au Roy, & feit crier que tout fust rapporté, mais peu y fut obey.

Les Anglois voyans que les Seigneurs de France estoient partis des marches de Guyenne, se mirent sus, & ensemble coururent les pays de Touraine, d'Anjou, & du Maine, bouterent le feu és villages du plat pays, pillerent & roberent tout ce qu'ils trouuerent, & se retirerent és marches de Bretagne comme avec leurs amis & alliez. Et combien que plusieurs des Barons en feussent desplaisans, toutesfois ils le

B

1380. souffrirent, considerans que c'estoit le plaisir de leur Duc, & frequentoient en marchandise les vns avec les autres, comme si tous eussent esté Anglois. Laquelle chose venue à la cognoissance de Messire Oliuier de Clifson, eschriut à Messire Robert de Beaumanoir que à telles choses il voulust obuiuer. Car telles estincelles pouuoient allumer vn grand feu preiudiciable à tout le Royaume. Ledit de Beaumanoir estoit vn vaillant & gentil cheualier, lequel fit tantost venir vers luy, & parla aux Seigneurs qui auoient fait le serment au Roy Charles cinquieme, & leur monstra les mauuaisez couuertes du Duc de Bretagne & d'aucuns autres, & que le Roy de France estoit leur souuerain Seigneur; deuers lequel ils enuoyerent afin d'y trouuer aucun expedient, & dont se mellerent les Ducs d'Anjou & de Bourgogne, & plusieurs Ambassades enuoyées de costé & d'autre. Et finalement enuoya le Roy vers le Duc & ceux du pays l'Euesque de Chartres, le Seigneur de Cheureuse, & Messire Arnould de Corbie Président en Parlement. Et en la presence du Duc & des Barons, furent leués les alliances anciennes, subiections & sermens faits par les Ducs & Nobles, & les iurerēt garder & obseruer, & les iura solemnellement le Duc mesmement, combien que aucuns disoient que bien enuis, & non de bon courage. Et furent toutes les choses accordées, & consommées & appoinçees au nom du Roy par lesdits Ambassadeurs. Quand les Anglois estans à puissance au pays de Normandie, faisans tous les maux que ennemys peuuent faire, ouyrent & sceurent que le Duc de Bretagne, qu'ils tenoient pour leur amy, estoit tourné & déclaré leur ennemy, tres-impatiemment le porterent, & en Bretagne entrerent, & là firent forte guerre, & furent en Bretagne bretonnant faisans maux innumerables. Mais les nobles du pays à coup s'assemblerent, & par force d'armes les rebouterent. Et lors les Anglois vindrent deuant Nantes auant soubdainement, en laquelle cité assez diligemment & hastiement le peuple du plat pays se retira avec leurs biens, laquelle chose venue à la cognoissance de Messire Amaury de Clifson Capitaine de la ville, il feit grande diligence de pourueoir à la garde, tuition & defense de la ville, & ordonna ses gardes. Et n'estoit pas la ville en aucun lieu forte de murailles. Et pource delibererent les An-

glois de l'assaillir, promettant argent à ceux qui premiers y
carreroient. Mais ceux de dedans vaillamment se defien-
doient, & iour & nuict estoient assaillis, & doutoit fort la
Capitaine que ceux de dedans ne se lassassent. Si enuoya de-
uers le Roy hastiuement, afin qu'il luy enuoyast gens, par les-
quels ils peussent estre secourus. Et feit le Roy grand dili-
gence, & y enuoya de vaillans gens lesquels diligemment
cheuaucherent, & ne se donnoient les Anglois de garde,
quand soudainement frapperent sur eux. Lesquels Anglois
feurent bien esbahis, & perdirent leur principale banniere,
& se retiroient. Mais leur Capitaine les commença à arguer
de la lascheré de leur courage, & leur disoit que les François
n'estoient pas si grand puissance, comme ils estoient, & que
s'ils se vouloient rallier, qu'il ne faisoit doubte qu'ils descon-
firoient les François, & approcherent les vns des autres de-
puis qu'ils eurent delibéré de combattre, archers & arbale-
striers fort tirerent, & y auoit si grand foison de trait, que
l'air ou le iour en estoit obsusqué, & s'assemblerent aux lances,
haches & espées, & combataient durement & aspromont, &
feur long temps qu'on ne scauoit lesquels auoient le meil-
leur. Finalement les Anglois ne peurent soutenir la vaillan-
ce des François, & feurent desconfits, & la plus grand' partie
morts ou pris, & les autres s'enfuirent naurez & blesez, & se
retirerent à Brest, & y laisserent garnison & le demeurant
à toutes leurs playes, se retirerent & allerent en Angleterre.

Cependant les Princes & Ducs cognoissans la pauvreté
du Domaine, & qu'il ne pouuoit suffire aux choses vrgentes
& necessaires, assemblerent vne partie des plus notables de
Paris, Et feurent assez contents qu'on meist douze deniers
pour liure. Et feut ce à Paris & à Rouën crié, & à Amiens.
Mais le peuple tout d'une volonte le contredirent, & ne feut
rien tenu ne exigé.

Le Roy apres s'en alla à Saint Denys visiter les corps
saincts, & feut receu par l'Abbé & Religieux, & venu querir
iusques à la porte, & le conduisirent iusques à l'Eglise chan-
tans respons, & veid les reliques, & feit ses offrandes. Et selon
la puissance de la ville, luy feurent faits presens.

Et de là s'en alla à Senlis pour chasser. Et feut trouué vn cerf
qui auoit au col vne chaisne de cuivre doré, & defendit qu'on

1380.

ne le prit que aulx sans le tuer, & ainsi fut fait. Et trouua-on qu'il auoit au col ladiete chaisne, où auoit escrit *Cesar hoc mihi donauit*. Et dès lors le Roy de son mouuement porta en deuise le cerf volât couronné d'or au col, & par tout où on mettoit ses armes, y auoit deux cerfs tenâs ses armes d'un costé & d'autre.

1381.

Au dict an de l'an mille trois cents quatre vingts & vn, les Ambassadeurs des Roys d'Espagne & de Hongrie estoient venus deuers le Roy, lesquels feurent ouys en la presence du Roy & du Duc d'Anjou. Et firent vne bien notable proposition en Latin touchant le fait de l'Eglise, en monstrant que l'election faicte de Urbain en Pape apres la mort de Gregoire onzieme, fut iuste, sainte & canonicque, & qu'ils auoient assemlé toutes les personnes Ecclesiastiques & clerics de leurs pays & Royaumes, & que telle auoit esté trouuee, & qu'ils auoient delibéré & conclu de luy obeïr comme à vray Pape & vnique, En requerant au Roy qu'ainsi le voulust faire, ou autrement leur intention estoit de eux departir, & se departiroient des alliances qu'ils auoient avec le Roy, & y renonceroient. Car ceux qui n'obeïroient au dict Urbain, ils les reputoient schismatiques. Et avec telles gens ils ne vouloient auoir nulle amour. Apres laquelle proposition faicte, on les feit retirer. Et sembla aux Seigneurs & Conseil du Roy, que les dictes manieres estoient bien estranges. Au regard des Hongres, de eulx departir de l'alliance du Roy de France, sans ce que oncques leur eust esté fait chose, parquoy ils le deussent estre. Et en tant qu'il touche les Espaignols, ils monstroient bien signe de grande ingratitude; veu que par le Roy trespassé & les François il estoit Roy, & fut par eulx desconfit son aduersaire. Et toutesfois feut-il conclu, qu'on leur feroit la plus gratieuse responce que faire se pourroit, & les feit-on venir. Et le Duc mesmes d'Anjou fit la responce; & comme il estoit sage, prudent, & auoit moult beau langage, il recita les alliances faictes par feu de bonne memoire son frere le Roy Charles cinquieme, lesquelles feurent iurees & promises par sermens solempnellement faicts par les Roys, Princes & Barons du pays, lesquelles n'estoient pas seulement personnelles, mais réelles de pays à pays, plus pour auoir honneur, que pour auoir mestier de eulx. Et que l'intention du Roy son fils estoit en volonte, & auoit intention de les entretenir & ac-

complir, & de non icelles enfreindre en aucune maniere, tant que lesdicts Roys garderoient la loyauté, qu'ils auoient iurée & promise aux Roy & Princes de ce Royaume de France. Et puis vint au faict de l'Eglise, en leur monstrant que apres la mort de Gregoire onzième, on proceda à eslire vn saint Pere, & furent les Cardinaux assemblez, mais le peuple de Rome en grand tumulte & impetuosité veindrent en armes dire qu'ils tueroient tout, s'ils n'auoient en Pape vn Romain, & mesmement celuy que ils appelloient Urbain. Et que si election y auoit esté faite, elle auoit esté violente, & les Cardinaux par force ou crainte de la mort, s'absenterent le plus tost que ils peurent, & esleurent Clement, lequel apres son election enuoya vers le Roy son frere trois Cardinaux, pour lesquels ouyr, le Roy fait assembler plusieurs Prelats, Docteurs & Clercs en la presence des dicts Cardinaux, qui proposerent en effect ce que dict est. Et pource le Roy fait assembler tous les Prelats, Chapitres & Conuents, à ce qu'ils enuoyassent vers luy gens clerks & notables, & pareillement aux Vniuersitez. Et feurent à Paris assemblez, & ouys derechef les dicts Cardinaux, Et conclurent que le Roy debuioit adherer à Clement, & que ausdicts Cardinaux on debuioit adiouster foy: Mais que en toutes manieres le Roy & ceux de son sang estoient prests d'entendre à eux exposer à trouuer bonne vnion en l'Eglise, & que ainsi seroit-on response. Ce qui feut fait. Et apres laquelle response, & d'icelle les Ambassadeurs feurent tres-contens. Et par aucun temps demurerent à Paris, & y feurent grandement festoyez, & eurent de beaux-dons du Roy & des Seigneurs, & s'en retournerent.

Le dict schisme fit de grands dommages en l'Eglise, au Royaume de France, & autre part. Auec Clement y auoit bien trente six Cardinaux, lesquels meus de grande auarice, soutiuerent d'auoir tous les bons benefices de ce Royaume par diuers moyens, & enuoyerent leurs seruiteurs parmy le Royaume, enquerans de la valeur des Prelatures, Priorez & autres benefices. Et vñ Clement de réservations, donnoit graces expectatiues aux Cardinaux, & anteferri. Et feut la chose en ce point, que nul homme de bien tant de l'Vniuersité que autres, ne pouuoient auoir benefices. Exactions se fai-

1381. soient tant des vacans, que des dixiesmes, que d'arreraiges des choses qu'on disoit estre deües à la chambre Apostolique, & poursuioit-on les heritiers des gens d'Eglise, & disoit-on que tous leurs biens debuient appartenir au Pape. Et seroit chose trop longue à reciter les maux qui se faisoient, & les inconueniens qui en aduenoient. Et tout souffroit le Duc d'Anjou Regent, & disoit-on qu'il en auoit son butin. Et estoit grand prié de veoir partir les Scholiers de Paris, & Regens, & s'en alloient comme gens elgarez & abandonnez. Lesquelles choses considerant l'Vniuersité de Paris, delibérerent de le remonstrer au Roy, & au dict Regent espesiallement. Et de faict y allerent, & ordonnerent vn notable Docteur en Theologie natif d'Abbeuille, nommé Maistre Iean Rouffe, demeurant au Cardinal le moyne, & monstra au Roy le moings mal quil peut, les inconueniens dessus dicts, en requerant que prouision y feut mise. Dont le dict Duc feut tant mal content que merueilles, & le monstra bien. Car il enuoya de nuit furtiuement au dict lieu du Cardinal le moyne, & furtiuement & par force entrerent dedans, & veindrent iusques à la chambre du dict proposant, rompirent l'huis, & le menerent comme tout nud, & le menerent bien vilainement & scandaleusement en Chastelet, & le menerent en vne tres-estroicte prison. Laquelle chose engendra vn grand scandale en l'Vniuersité, & non sans cause. Et se assemblerent, & allerent deuers le Roy & le Regent, requerans tres-instamment la deliurance de leur subiect, qui estoit si notable homme. Finalement apres plusieurs delais & refus que le Duc faisoit, il feut rendu, pourueu qu'ils obeïroient à Clement. Et avec ce Duc estoient presens presque tous les Princes & nobles du Royaume. Et estoit bien grand crime & capital de non obeïr à Clement, & feut le Docteur deliuré, & tantost apres monta à cheual, & s'en alla le plustost qu'il peut vers le Pape Urbain. Or adueint que le Pape Urbain escriuit vnes lettres à l'Vniuersité de Paris bien gratieuses, en les remerciant & exhortant qu'ils luy voulussent obeïr. Et feurent receües les dictes lettres par le Recteur, lequel feit faire vne grand' assemblée, & les feit lire en plaine congregation. Dont le dict Duc feut tant mal content que merueilles, & ordonna gens pour prendre & aller querir le dict Recteur, & luy amener. Lequel doubtant de

sa vie, s'en partit hastiuerement. Car il en feut aduertit. Et prenoit le Duc la cause, pource que prealablement le dict Reueur, n'auoit au Roy ou à luy premierement presenté les lettres. Et tantost apres quand plusieurs notables gens de Paris de l'Vniuersité, veirent les manieres de proceder, ils delibererent de eulx en aller, & departir. Et de fait plusieurs s'en alerent à Rome, & mesmement vn bien notable homme chancere de Paris, nommé Maistre Iean Gilles, & plusieurs tant avec luy que apres. Et Clement tousiours voulant capter la beneuolence & grace du Duc, voulut & ordonna que le Duc leuast vn dixiesme entier, & le feit leuer non mie par gens Ecclesiastiques, mais par gens purs lais & Officiers de Iustice laye. Plusieurs firent certaines appellations, & oppositions. Mais ce nonobstant feut leuereaulment & de fait, & par force, au grand dommaige des gens d'Eglise, & tels benefices y auoit, qu'on leuoit pour le dixiesme, plus que les benefices ne valoient.

Le Duc de Berry voyant que le Duc d'Anjou estoit Regent, & les Ducs de Bourgogne & de Bourbon auoient la garde du Roy, luy desplaisoit qu'il n'auoit quelque charge, & parla d'auoir le gouuernement de Languedoc & de Guyenne, au Duc d'Anjou son frere, lequel feut content d'en parler au Roy, & de luy ayder à obtenir son intention. Et de fait, luy feir auoir ledict gouuernement, & en feurent les lettres seellées. Et quand ce vint à la cognoissance du Comte de Foix, il assembla à Thoulouze grand foison de gens de tous Estats, pour scauoir qu'il estoit à faire. Et plusieurs feurent d'opinion, qu'on debuoir obeir au Roy & à ses mandemens. Les autres & la plus grand partie, feurent d'opinion, qu'ils ne le debuient point souffrir, & qu'ils viuoient soubz le Comte de Foix en bonne paix & Iustice, & que le Duc de Berry ne demandoit que à exiger argent, & que en la Comté de Poictou, il auoit exigé tous les ans à cause de ce qu'il la tenoit, deux ou trois tailles. Et feurent deliberez de enuoyer deuers le Roy, & de fait y enuoyerent, en luy faisant requérir qu'il se voulut deporter de y mestre autre que le Comte de Foix, lequel le Roy son pere y auoit mis, & en auoit osté le Duc d'Anjou pour les grandes exactions qu'il faisoit. Dont le Roy combien qu'il feust ieune, feut tres-

381.

mal content, & renuoya les messaiges, & dist, que auant iroit il luy mesme, qu'il ne feist que son Oncle eust le gouuernement. Et de fait, s'en alla à saint Denys, & visita les corps, saints, feit ses offrandes, feit benir l'Oriflambe par l'Abbé, & la bailla à Messire Pierre de Villiers, lequel feit le serment accoustumé, & la garda pres d'un an entier. Car le Duc de Bourgogne desineut le Roy d'y aller, & qu'il en auroit à faire en lieux plus prochains, c'est à sçauoir en Flandres, lesquels se rebelloient fort. Toutesfois le Duc de Berry delibera d'aller en Languedoc, & d'en auoir par force le gouuernement, & assemble gens d'armes de toutes parts, & se confioit fort au Comte d'Armaignac, & s'en vint au Languedoc accompagné de gens de guerre qui pilloient & roboient tout le pays, & faisoient tout ce que ennemis pouuoient faire, hors bouter feux & tuer, & prenoient prisonniers & rançonnoient ou mettoient à finance. Le Comte de Foix assemble à Thoulouze presques les trois Estats du pays, gens d'Eglise, nobles & marchands pour sçauoir qu'il estoit à faire. Et y eut diuerses opinions. Et finalement feut deliberé qu'il falloit combattre les gens du Duc de Berry, où luy mesme estoit en personne, & se meit le Comte de Foix aux champs bien accompagné, & auoit plus de gens que le Duc de Berry, mais il sembloit au Duc que ses gens estoient plus vsitez de guerre. Et combien qu'on luy conseillast, qu'il se retrahist, & qu'il ne combattist point, il respondit que ce luy seroit reputé à vne lascheté de couraige. Et de fait se rencontrerent bien asprement & durement, & eut le Comte la victoire. Dont ledict Duc tascha fort à recouurer son honneur. Si teint les champs pres d'un an, & aucunesfois couroit vers Thoulouze, & vers Besiers, & en diuers lieux. Mais tousiours il trouuoit les autres prests à resister, & y eut de ses gens morts bien trois cents, dont il feut bien desplaisant. Toutesfois le dict Comte de Foix considerant la deuastation & destruction du pays, qui se faisoit soubz ombre de ceste guerre, voulut preferer le bien de la chose publique à son fait particulier, feut content de ce qu'il auoit combatu & vaincu le Duc notablement, & enuoya vers luy, & feirent paix & alliance, & luy laissa tout le gouuernement du pays paisiblement, soy offrant au seruice du Roy & de luy. Et feut tout bien apaisé au dict pays.

Hugues

Hugues Aubriot natif de Bourgogne, lequel par le moyen du Duc d'Anjou feut fait Preuost de Paris, riche & puissant estoit, & si auoit eu grand gouuernement des finances. Et feut plusieurs notables edifices à Paris, le pont Saint Michel, les murs de deuers la bastille Saint Antoine, le petit Chastelet, & plusieurs autres choses dignes de grand memoire. Mais sur toutes choses auoit en grande irreuerence les gens d'Eglise, & principalement l'Vniuersité de Paris. Et tellement, que secretement on feut enqueste de son gouuernement, & de sa vie, qui estoit tres-orde & deshonneste en toute puterie & ribauldise, à decepuoir femmes, partie par force, partie par argent, dons & promesses, & auoit compaignée charnelle à Iuifues, & ne croioit point le saint Sacrement de l'autel, & s'enmoquoit, & ne se confessoit point, & estoit vn tres-mauuais catholicque. En plusieurs & diuerses heresies estoit encouru, & ne craingnoit puissance aucune, pource qu'il estoit fort en la grace du Roy & des Seigneurs. Toutesfois feut fort poursuui par l'Vniuersité & gens d'Eglise, tellement qu'on le preint, & emprisonna l'on, & à la fin feut content de se rendre prisonnier és prisons de Monsieur l'Euesque de Paris. Et feut examiné sur plusieurs poincts, lesquels il confessa, & feut trouué par gens clerks à ce cognoissans, qu'il estoit digne d'estre brullé. Mais à la requeste des Princes, ceste peine luy feut relaschée, & seulement au paruis nostre Dame feut publicquement presché & mistré par l'Euesque de Paris, vestu en habit Pontifical, & feut déclaré en effect estre de la loy des Iuifs, & contempreur des Sacremens Ecclesiasticques, & auoir encouru les sentences d'excommuniement, qu'il auoit par long temps contemnées & mesprisées. Et le condamna on à estre perpetuellement en la fosse au pain & à l'eau.

Le Comte de Flandres Louys s'efforçoit de faire grandes exactions sur ses subiects, & les vouloit souuent tailler ainsi qu'on faisoit en France. Et pource feirent dire au Comte, qu'il s'en voulust deporter, dont il ne feut pas content. Et s'en alla à la ville de Gand requerir aide d'argent par maniere de taille, & vsa d'aucunes hautes paroles, & luy feut refusé sa requeste, dont il feut bien mal content. Et se partit de la ville, & delibera de se monstrier leur Seigneur par voye de fait. Et auoit vn bastard bien vaillant homme d'armes, auquel il chargea ceste

C

1381. besongne. Et de fait, il feit grande assemblee de gens de guerre, & s'en veindrent loger assez pres de la ville de Gand comme à vne lieuë, & faisoient à ceux de Gand guerre mortelle. On tuoit, on prenoit, & mettoit on à rançon, & bontoient feus, ardoient moulins, & faisoient toute guerre que vrais ennemis pouuoient faire. Et le dict Comte pour luy aider, feir mander des Anglois, lesquels veindrent à son seruice. Ceux de Gand voyans les manieres qu'on leur tenoit, plusieurs fois s'assemblerent, & conclurent que pour mourir ils ne laisseroient point leurs libertez, & fort se defendoient, & portoient des dommages au Comte. Et à seureté demanderent parler à luy, ce qui leur fut octroyé. Et enuoyerent de bien notables gens deuers le Comte, lesquels de par les habitans le supplierent qu'il leur voulust pardonner, si aucune chose luy auoient mesfait. En lui suppliant qu'ils ne fussent point subiects à aucuns subsidies ordinaires: mais s'il auoit à faire d'aucunes choses en ses necessitez, ils estoient prests de luy aider de certaine somme, & tant faire qu'il feroit content. Et cuidoient les dicts Ambassadeurs auoir satisfait: mais aucuns jeunes hommes estans pres du Comte, commencerent à leur dire, qu'il auroit par force les vilains s'il vouloit, & qu'il les falloir poindre à bons esperons, & les subjuguier de tous poincts, & ainsi s'en allerent les dicts Ambassadeurs. Le Comte les cuidoit tousiours subjuguier & suppediter, & les mettre en estat qu'ils n'eussent que manger, tellement qu'ils se mettoient à sa volonté, & tousiours faisoient forte & terrible guerre. Et lors ceux de Gand delibererent de y resister par voye de fait. Et pour estre leur Capitaine, eleurent vn nommé Iacques Arteuelle, qui estoit vne belle personne, haut & droit, vaillant & de tres-bel langage, & estoit fils d'un nommé Arteuelle qui se voulut faire Comte, lequel eut le col couppe, & se mit sus, & assemblea soison de gens, & delibera de se moestre sur les champs. La chose venue à la congnoissance du Comte, manda gens à Bruges & de toutes parts. Et yffit Arteuelle & sa compaignie, & tant que luy & les gens du Comte se rencontrerent & approcherent. D'un costé & d'autre y eut combat de trait tant d'arbalestriers que d'archers, & à la fin combatterent main à main longuement, & tellement que le Comte feut desconfit. Et y eut bien cinq mille de ses gens morts &

retiez sur la place, & puis se retrahit à Bruges. Et parla Arreuelle ^{1381.} au peuple tousiours les animant à la guerre. Et combien qu'il estoit nouuelles que les François aideroient au Comte, toutesfois ils ne debuient point craindre leurs jolinetes superstitieuses, qui estoient cause de leur destruction, & qu'ils deuissent poursuivre leur guerre encommencée, veu la victoire qu'ils auoient eue. Et donna tel couraige au peuple, qu'il leur sembloit qu'ils estoient taillez de conquiesre tout le Royaume. Et tellement que les bonnes gens du plat pays, & autres, laisserent leurs labouraiges & mestiers, & preindrent les armes telles qu'ils peurent finer. Et tousiours se soustiuoit Arreuelle, comme il pourroit greuer le Comte, qui estoit dedans Bruges. Et de tout ancien temps ceux de la ville de Bruges, ont accoustumé de faire vne belle & notable procession, & porter le precieus sang de Bruges, & là abbe de foison de peuple de Bruges & du plat pays. Et là ordonna Arreuelle deux mille hommes des plus vaillans, lesquels seulement estoient vestus de leurs robes, mais deffoubz armez & bien garnis. Et à diuerses fois, & par diuers lieux entrerent dedans la ville, & se trouuerent tous ensemble au marché, ainsi qu'on faisoit la dicte procession, & crierēt alarme au long des rues, Dont le Comte fut bien esbahi. Toutesfois assez diligemment assembla gens, & se efforcea de resister. Mais à la fin il feut vaincu, & se retrahit en son hostel, & feut suiui par les Gantois, lesquels violemment entrerent en son hostel, le cuidans trouuer. Mais il se sauua par vne fenestre, & se bouta en l'hostel d'vne pauvre vieille femme, & y feust iusques à la nuit, & de là s'en alla à l'Escluse. Les Gantois le imputerent à ceux de Bruges, disans que c'estoit par eux qu'il s'estoit sauué, & leur coururent sus, & en pillerent & roberent, & à toute leur proye s'en retournerent à Gand.

La Royne Ieanne de Sicile & de Ierusalem, Comtesse de Prouence, fille de Charles Duc de Calabre, fils de Robert Roy de Sicile & de Naples, & de Marie soeur du Roy de France Philippes, laquelle auoit regné trente & vn ans, & n'auoit peu auoir lignée, adopta Louys Duc d'Anjou, & en feit son heritier, lequel l'en remercia, & delibera de y entendre. Et de ce, Charles Prince de Tarente, qui auoit espousé la niepce de la dicte Dame, feut tres-mal content, & à luy allia les plus grands

13. 81. Seigneurs du pays , & le Pape Urbain mesmes luy aida & conforta. Car il ne faisoit doubte , si le Duc Louys feut venu, qu'il n'eust adheré à Clement. Laquelle chose venüe à la congnissance du Duc Louys, il feit grande assemblée de gens de guerre, & escriuit à Messire Philippes d'Artois, qui estoit vaillant cheualier, qu'il voulust prendre la charge d'aller combattre le dict Charles. Lequel s'en chargea, assembla gens, & s'en alla au dict pays, & le dict Charles se prepara à le recepuoir. Et la dicte Ieanne & son mari delibererent d'aider au dict Philippes , & de fait le feirent, & y eust bataille dure & aspre. Et auoit le Pape Clement enuoyé gens avec le dict Philippes, lequel feut desconfit, & feurent pris Ieanne & son mari, & le dict Messire Philippes d'Artois, & detenus prisonniers. Et se feist le dict Charles couronner par l'ordonnance de Urbain en Roy de Sicile, & eust bien grand finance de la rançon du dict Messire Philippes, & du mari de la dicte Ieanne, Laquelle assez tost apres alla de vie à trespasement. Quand le Pape Clement sceut ces nouuelles, doubtant que plusieurs Seigneurs se meissent hors de son obeissance, escriuit au Roy Duc Louys qu'il pensast de se mettre sus, & de venger la mort de la dicte Ieanne sa mere par adoption. Lequel delibera de ainsi le faire, & d'y aller l'esté ensuiuant.

En ceste année le Mareschal de Sancerre, s'en alla en Limosin pour resister aux ennemis, specialement aux gens, qui estoient en vne ville fermée nommée la Souteraine, deuant laquelle il meit le siege, & y feut par aucun temps, & par composition les Anglois rendirent la place, & s'en allerent vers Limosin, pillant & robant, & plusieurs maux innumerables faisoient, & les suiuit le dict Mareschal, & y eut plusieurs rencontres & petites batailles, mais le Mareschal estoit tousiours victorieux, & s'en retourna à Paris vers le Roy.

Le Roy accompagné de ses Oncles, & de plusieurs notables Prelats & autres, le seiziesme iour de Septembre alla à Saint Denys, & feist faire vn bien notable seruice pour l'ame de son pere.

Et pource qu'il y auoit iour assigné pour le fait de la paix entre luy & les Anglois, il enuoya à Boulongne l'Archeuesque de Rouen, l'Euesque de Bayeux, le Comte de Brenne, & Messire Arnould de Corbie, & se assemblerent à Lelingue.

han, & là eut plusieurs choses ouuertes, & finablement ne feirent rien, sinon de prolonger les trefues en esperance de bonne paix. 1381.

Le Duc de Bretaigne feit son hommaige au Roy le vingt-cinquiésme iour de Septembre. Et estoit le Roy bien accompagné de Prelats, Princes & Barons & gens de Conseil. Et aussi estoit le Duc venu à tout bien belle compaignée & gente.

L'an mille trois cents quatre vingts & deux, le Duc d'An- 1382.
jou, & aussi les autres Seigneurs & ceux de la Court, considerans que depuis que les Aydes auoient esté mis jus, ils n'auoient pas les profits qu'ils souloient auoir, desiroient fort à remectre sus les Aides, & feirent plusieurs assemblées, mais iamaïs le peuple ne leur vouloit souffrir. Combien que Messire Pierre de Villiers, & Messire Iean des Mares, qui estoient en la grace du peuple, comme on disoit, en faisoient grandement leur debuoir, de leur monstrier les grands dangers & perils qui leur en pourroient aduenir, & de encourir l'indignation & malueillance du Roy. Lesquelles demonstresances ils prenoient en grande impatience, & reputoient tous ceux qui en parloient ennemis de la chose publique, en concluant qu'ils garderoient les libertez du peuple iusques à l'exposition de leurs biens, & preindrent armeures & habillemens de guerre, feirent dixeniers, cinquanteniers, quarteniers, meirent chaînes par la ville, feirent faire guet, & gardes aux portes. Et ces choses se faisoient presques par toutes les villes de ce Royaume, & à ce faire, commencerent ceux de Paris. Et à Roën se meirent sus deux cents personnes mecaniques, & veindrent à l'hostel d'un marchand de draps, qu'on nommoit le Gras, pource qu'il estoit gros & gras, & le feirent leur Chef comme Roy, & le meirent sur un chariot comme en maniere de Roy, voulut ou non, & contre sa volonté, & pour doubte de la mort fallut qu'il obeït, & le menerent au grand marché, & luy feirent ordonner que les subsides cherroient, & qu'ils n'auoient plus cours. Et si aucuns vouloient faire un mauuais cas, il ne failloit que dire Faictes, si estoit executé. Et procederent à tuer & meurtrir les Officiers du Roy au faict des Aydes. Et pource qu'on disoit ceux de l'Abbaye de Saint Otien auoir plusieurs priuileges contre la ville, ils allerent furieusement en l'Abbaye, rompirent la tour où estoient leurs chartres, &

138 2. les-prindrent & deschirerent. Et y eussent eu l'Abbaye & Religieux grand dommaige, si le Roy depuis deüement informé, ne leur eust confirmé leurs dicts priuileges. Et apres s'en allerent deuant le chasteau, cuidans entrer dedans pour l'abbatre. Mais ceux qui estoient dedans, se defendirent vaillamment, & plusieurs en tuerent & naurerent. Presques par tout le Royaume, telles choses se faisoient & regnoient, & mesmement en Flandres & en Angleterre, où le peuple se esmeut contre les nobles, tellement qu'il fallut qu'ils se retirassent, & s'en allassent. Aucuns demurerent avec le Roy d'Angleterre, cuidans estre asseurez: mais le peuple y alla, & en la presence du Roy tuerent cinq ou six cheualiers des plus notables, & son Chancellier, l'Archeuesque de Cantorbie. Et puis leur coupperent les testes comme à ennemis de la chose publique, par grand cruauté & inhumanité les trainerent parmy la ville, & meirent la teste du dict Archeuesque au bout d'une perche sur le pont, & fouloient son corps aux pieds emmy la bouë. Or fault retourner à la matiere du peuple esmeu à Rouën, & à Paris & partout. Le Duc d'Anjou differa à faire aucunes punitions, ou mestre remede aux choses dessus dictes dès le moys d'Octobre iusques en Mars, & cependant cuidoit tousiours mestre les aides sus, & mesmement l'imposition du douzieme denier, & trouua des cauteles en diuerses manieres pour amuser le peuple. Mais rien n'y valloit, à ce qu'ils s'y feussent consentis. Toutesfois en Chastelet il feit crier la dicte ferme de l'imposition, & brüller & deliurer pour la leuer mandement expres, dont on murmuroit & grommeloit par tout tres-fort. Et debuot commencer la dicte ferme le premier iour de Mars. Et desia se assembloient meschans gens, & y eut vne vieille qui vendoit du cresson aux halles, à laquelle le fermier veint demander l'imposition, laquelle commença à crier. Et à coup veindrent plusieurs sur le dict fermier, & luy firent plusieurs playes, & apres le tuerēt & meurtrirēt bien inhumainement. Et tātost par toute la ville le menu peuple s'esmeut, preindrent armeures, & s'armerent tellement, qu'ils firent vne grande commotion & sedition de peuple, & couroient & recouroient, & s'assemblerent plus de cinq cents. Quand les Officiers & Conseillers du Roy, & l'Euesque de Paris, veirent & apperceurent la maniere de faire, ils se partirent

le plus secretement qu'ils peurent de la ville, & emporterent ce qu'ils peurent de leurs biens meubles petit à petit. Et ceux qui ce faisoient, estoient meschans gens & viles personnes de pauvre & petit estat, & si l'on en eût, tous les autres y affouyoient. Et pource qu'ils estoient mal armez & habillez, ils sceurent que en l'hostel de la ville auoit des harnois, ils y allerent, & rompirent les huis où estoient les choses pour la defense de la ville, preindrent les harnois, & grand foison de maillets de plomb, & s'en allerent par la ville, & tous ceux qu'ils trouuoient fermiers des aides, ou qui en estoient soupçonnez, tuoient & mettoient à mort bien cruellement. Il y en eut vn qui se mit en franchise dedans Saint Jacques de la boucherie, & luy estant deuant le grand autel, tenant la representation de la vierge Marie, le preindrent & tuerent dedans l'Eglise, s'en alloient aux maisons des morts, pilloient & roboient tout ce qu'ils trouuoient, & vne partie jectoit par les fenestres, deschiroyent lettres, papiers & toutes telles choses, effonçoient les vins: apres ce que tout leur saoul en auoient beu. Et de tant feurent encores plus pires à exercer leur mauuaise. Si vint à leur cōnoissance, qu'il y auoit des impositeurs dedans l'Abbaye de Saint Germain des prez, si saillirent hors de la ville, & là veindrent, & s'efforcèrent d'entrer dedans, & demanderent ceux qui s'y estoient retraicts. Mais ceux de dedans se defendirent vaillamment, tellement que point n'y entrerent. Et de là se partirent, & veindrent au Chastelet de Paris, où il y auoit encores deux cents prisonniers pour delicts & debtes qu'ils debuoyent, & rompirent les prisons, & les laisserent aller franchement. Pareillement firent ils aux prisonniers de l'Euesque de Paris, & rompirent tout, & deliurerent ceux qui y estoient, & mesmement Hugues Aubriot, qui estoit condamné comme dict est. Et luy feut requis qu'il feust leur Capitaine, lequelle consentit, mais la nuit s'en alla. Et tousiours croissoit la multitude de peuple ainsi desuoyé. On le uidoit refrener, mais rien n'y valloit, & la nuit entendoient en gourmanderies & beueries. Et le lendemain veindrent à l'hostel de Hugues Aubriot, & le cuidoiēt trouuer pour le faire leur Capitaine. Et quand ils veirēt qu'il n'y estoit pas, feurent comme enragez & desplaisans, & commencerent entrer en vne fureur, & vouloyent aller ab-

batre le pont de Charenton. Mais il feurent desmeus par Messire Jean des Mares, & commengoient ja aucunement à eulx repentir & refroidir.

Merueilles, en vn villaige aupres Sainct Denys, vn iour vne vache auant la dite commotion, eut vn monstre en semblance d'une beste, qui auoit comme deux visages, & trois yeulx, & en sa bouche fourchée deux langues, qui sembla chose merueilleuse à l'Abbé, qui estoit vn bon preudhomme. Et dit, que telles choses iamais ne venoient, que ce ne feussent mauvais signes & apparences de grands maux.

Parauant aussi au Cardinal le moyne apparut feu à gros globeaux sur la ville de Paris, coruscant & courant de porte en porte sans tonnerre ne vent, & le temps estant doux & serain, qu'on tenoit chose bien merueilleuse.

Quand les choses que auoient fait ceux de Paris, veindrent à la cognoissance du Roy & de son Conseil, il en feut moult desplaisant & non sans cause. Et delibera d'en faire vne bien cruelle punition. Laquelle chose venue à la congnoissance de ceux de Paris, ils enuoyerent deuers le Roy, & aussi fait l'Vniuersité plusieurs notables tlercs & Docteurs, lesquels monstrerent bien grandement & notablement, comme les plus grands de la ville & principaux en estoient courroucez & desplaisans, & que ce qui auoit esté fait, estoit par meschans gens & de bas estat, en implorant sa misericorde, & qu'il leur voulut pardonner toute l'offense, & surseoir de mettre plus Aydes sus. Ery eut de grandes difficultez, & le Roy tres-esmeu n'en vouloit ouyr parler. Finablement meu de grande misericorde, feut content que le peuple jouyt de ses immunittez & franchises, & faire cesser ce qui estoit mis sus, & leur pardonna tout ce qui auoit esté fait, pourueu que Iustice se feroit de ceux qui auoient rompu le Chastetet. Et de sa response feurent les Ambassadeurs tres-contents, & en remercierent le Roy. Et se fait mettre Messire Jean des Mares en vne listiere à cause de sa maladie, & mener par les carrefours, & le publia au peuple. Desia le Preuost de Paris auoit pris plusieurs des malfaieteurs pour en faire Iustice. Et quand le peuple sceut qu'on en prenoit foison, & qu'on en vouloit faire punition, derechef s'esmeurent aucunement, en disant, que c'estoit chose trop estrange, de faire mourir si grand multitude de gens. Laquelle

quelle chose venue à la cognoissance du Roy, manda que tout fust suris iusques à vne autre fois. Toutesfois souuent on en prenoit, & les jectoient en la riuere. Le Roy, ses Oncles, & son Conseil cuidoient par simulations induire le peuple, à consentir les aydes estre leuées comme du temps de son pere, & assembla les trois Estats à Compiègne, & à la my-Apuril manda les plus notables des villes à estre deuers luy, & obeïrent. Et là proposa Messire Arnould de Corbie, premier President en Parlement, & monstra bien grandement & notablement les grands affaires du Roy, tant pour le fait de la guerre, que aussi pour l'entretienement de son Estat. Et qu'il n'estoit pas possible que sans aydes la chose publicque se peut conduire, ou qu'il falloit que le Royaume veint à perdition, & fust subiect à pilleries & roberies, en requerant qu'ils n'empeschassent que le Roy ne vst de sa puissance, de le pouuoir & debuoir faire. Lesquels respondirent qu'ils n'estoient venus que pour ouyr, & rapporter, mais qu'ils s'employeroient de leur pouuoir, à faire consentir ceux qui les auoient enuoyez, à faire le plaisir du Roy. Et leur ordonna-on que à Meaulx ils feissent sçauoir la response, & à Pontoise. Ce qu'ils firent. Et tous presques firent response, que ainçois aimeroient mieux mourir, que les Aydes courussent. Et combien que ceux de Sens qui furent à Compiègne, se firent forts que ceux de Sens le consentiroient, toutesfois quand ils y furent, le peuple dict que iamais ne le consentiroient, ne souffrieroient. Le Roy feut fort pressé de pardonner à ceux de Paris, & de trouuer moyen d'y aller ioyeusement, & parler à eux. Et furent aucuns enuoyez à Paris, lesquels rapportèrent que tres-volontiers ils verroient le Roy, & ioyeusement le recepueroient. Et le Roy dit, que tres-volontiers il iroit. Mais deux choses requeroit. L'une, que à sa venue, ceux de la ville laissassent leurs armeures & harnois, & qu'ils ne se armassent point. L'autre que les chaisnes de nuit ne fussent point tendues, & que les portes iour & nuit fussent ouuertes, & que seulement ceux qui estoient natifs de la ville de Paris, & qui auoient à perdre, allassent armez par la ville, & que par six de la ville de Paris, on luy feist sçauoir à Meleun la response. Si s'assemblerent en la ville de Paris, & leur feut rapporté la volenté du Roy, & y eut de meschans gens qui commencerent à murmurer, & dirent que iamais ne se

1382. consentiroient à mestre aides ne tailles', & estoient plus enflambez que deuant. Et feurent six enuoyez deuers le Roy, & y eut plusieurs allées & venües, & iournées prises à Saint Denys, où il y auoit plusieurs Conseillers du Roy. Et de ceux de Paris y eut ordonnez aucuns qui y allerent, & à la fin y alla Messire Jean des Mares. Et feut là vne conclusion finale prise, C'est à sçauoir que le Roy iroit à Paris, & pardonneroit tout, & la ville luy feroit cent mille francs. Et de ce feurent les parties contentes, & feut fait grande ioye, & en l'Eglise de Saint Denys chanta l'on *Te Deum laudamus*. Et ceux de Paris feurent bien ioyeux, & y veint le Roy, & à grand ioye feut receu. Mais à payer l'argent des cent mille francs, derechef y eut aucunes difficultez ou contradictions, pource que les habitants vouloient que les gens d'Eglise y contribuassent, Qui estoit contre raison.

En ce temps la Comtesse de Flandres Marguerite descendüe de la Couronne de France, bien aagée alla de vie à trespassement, & auoit son fils Louys lequel auoit tousiours en volonté d'estre Anglois. Mais à chacune fois la bonne Dame luy rompoit son propos & volonté, en luy montrant la haulte folie qu'il feroit. Et en montrant le dict Louys sa mauuaise volonté, il auoit vne fille seule laquelle il vouloit bailler en mariage au Duc de Lancastre d'Angleterre. Mais la bonne Dame l'empescha, & feit tant que la dicte fille feut mariée au Duc de Bourgongne Philippes le hardy, lequel par ce moyen feut Comte de Flandres, d'Artois & de Rethel.

Au dict an mille trois cents quatre yingts & deux, le Duc d'Anjou considerant qu'il auoit eu du Roy moult grands finances & thresors, eut conseil auec aucunes ieunes gens nobles de s'en aller en Prouence, & delà à Naples, & preint son chemin par Auignon deuers le Pape Clement. Et de fait y alla, & feut receu bien grandement & honorablement. Et enuoya le Pape au deuant de luy des Cardinaux & autres, & à le recepuoir y eut de grandes solemnitez. Et assez tost apres le Pape l'ordonna & declara estre Roy de Sicile & de Naples, & le couronna en Roy, & le receut en foy & hommaige tant des Royaumes, que de la Comté de Prouence. Puis s'en alla, & feit forte & aspre guerre, en destruisant tout le pays. Belle, grande & notable compaignée y auoit amené.

avec luy , laquelle il bouta en Prouence , & faisoient les Prouençaux forte resistance, & se defendoient fort. Plusieurs villes , chasteaux & forteresses y eut prises , & grande quantité de gens morts & pris. Et dura la dicté guerre pres de huit moys. Et finalement les Prouençaux voyans qu'ils n'auoient aide ou secours aucun , se meirent en l'obeissance du Roy Louys , comme vrai Comte de Prouence. Et receut les foy , hommaige & sermens des gens d'Eglise , nobles , & autres du pays , & y commit officiers , ainsi qu'il est accoustumé de faire en tel cas. Et assez tost apres se partit le dict Roy Louys , & tira vers les marches de Naples. Et se faisoient au pays de Prouence & alenuiron chansons , comedies & balades à la louenge , du dict Roy. Non attendans ne considerans les fortunes de guerre, qui pouuoient suruenir. Il & ses gens entrerent au pays de Lombardie, où ils trouuerent de grands empeschemens , specialement entre les montaignes d'Italie , où ils trouuerent plusieurs grandes resistances. Ety perdit le dict Roy beaucoup, tant de gens que de richesses. Et souuent ceux qui passoient deuant , & aussi ceux qui estoient à la queue de l'ost , estoient destrouffez , & mis à pied , & d'aucuns on ne sçauoit qu'ils deuenoient, ne oncques puis ne feurent veus. Toutesfois luy & son armée passerent oultre , & contre ceux qui le vouloient empescher , eut en plusieurs lieux victoires & rencontres. Et arriua le Roy Louys & son armée vers les marches de Naples. Et ce veint à la congnoissance de Charles foy disant Roy de Naples & de Sicile, lequel auoit assemblé grand compaignée de gens de guerre , & auoit trop plus grand puissance & quantité de gens, que le Roy Louys. Et auoient tous esperance qu'il y auroit bataille , & autre chose ne demandoient les François. Mais Charles vfa fort de soutiueret , & par tout où les François debuoient passer , faisoit retraire le peuple en bonnes places & forte, & leur viure & bestail , & meit grandes & grosses garnisons en ses places. Et couroient souuent ses gens sur l'ost des François , & leur portoient de grands dommaiges, Et souuent en estoient les François aduertis , & reboutoient les parties aduerses bien hastiuement en leurs places, ne iamais peu ou neant ne arrestoient emmy les champs. Char-

1382.

les foy difant Roy de Sicile, par toutes voyes & manieres faisoit diligence, de trouuer moyen comme il pourroit greuer le Roy Louys son aduerfaire. Et veint à luy vn compaignon, qu'on disoit estre ouurier de merueilleuses manieres de poisons. Et entre autres choses il auoit vne petite lancette, qui estoit comme la tierce partie d'une lance, de laquelle il auoit tellement enuenimé le fer, que si en aucune maniere celuy qui l'auoit, touchoit à la robe, chapperon ou vestement d'un homme, voire encores si vne personne y fichtoit fermement son regard, la dicte personne tantost estoit empoisonnée, & mouroit. Et ordonna le dict Charles que le dict empoisonneur, en guise de messaiger, herault ou poursuivant, iroit vers le Roy Louys, pour le deffier & demander iour de combattre, afin qu'il le peust empoisonner. De laquelle chose faire, il se faisoit fort, & n'en faisoit doubte. Et de laquelle chose le Roy Louys par vn Italien, qui auoit congnoissance du dict mauuais homme, feut aduertit. Et ainsi qu'il venoit pour accomplir sa mauuaise volonté, feut pris sans veoir la presence du dict Roy Louys. Tantost feut interrogué, & assez legerement confessa le cas, & feut decapité par Iustice. Dont le dict Charles feut bien desplaisant, & tant qu'il pouuoit, faisoit diligence d'empescher de venir viures en l'ost du Roy Louys. Et de ce, estoient luy & ses gens tres-fort greuez.

Les Flamends se rebellerent contre Louys Comte de Flandres, lequel assemble plusieurs gens, tant de Bruges, que d'Artois & d'ailleurs, pour refrener la fureur desdicts Flamends, & se mit sur les champs. Et en ceste rebellion, n'y auoit que ceux de Gand, & estoit leur Capitaine Philippes Arteuelle, lequel estoit fort affecté contre le dict Comte. Car on disoit qu'il auoit faict couper la teste à son pere. Et estoit beau, langaiger, hardy & courageux. Mais les autres villes comme Bruges, Lille, Audenarde & autres, se tenoient du parti du Comte. Quand le Comte sceut que Arteuelle estoit sur les champs, il prepara & assemble ses gens, & tant que les batailles se veirent, & s'approcherent les vns des autres. Et à l'assembler, firent d'un costé & d'autre merueilleux & grands cris, & d'un costé & d'autre, traict se tiroit, & dards. Et y eut dure & aspre bataille, & vaillamment de toutes parts se combattirent. Foison de communes aussi y auoit du costé du

Comte, & de vaillans archers de Boulonnois & d'Artois. Et de la partie d'Arteuelle arriuoient de tous costez gens de communes du plat pays, lesquels veindrent hardiement frapper en la bataille contre les gens du Comte, par les costez & aussi par derriere, & tellement, que Arteuelle & ses gens eurent victoire. Et s'enfuyt ou retrahit le Comte & ses gens, & s'en veint ledict Comte par bois & chemins estranges iusques à Lisse, les autres de ses gens à Bruges, & les François à Audenarde. Et y en eut de morts en la dicte bataille des gens d'Arteuelle quatre mille, & de ceux du Comte dix mille. Arteuelle en sa compaignée auoit enuiron quatre cents Anglois, & quarante mille hommes sans les bannis. Et continuellement arriuoient vers luy communes de toutes parts, & leur disoit Arteuelle plusieurs paroles par lesquelles il les animoit fort contre leur Seigneur, & que ce qu'ils faisoient, estoit pour leurs libertez & franchises garder & obseruer. En leur demonstrent par diuers langaiges, qu'ils auoient iuste & sainte querelle.

Quand Arteuelle veid la grand compaignee qu'il auoit, si disposa d'aller mestre le siege deuant Audenarde, où il scauoit que les François s'estoient retraiets, & de fait y alla, & y mit le siege. Et à l'aborder, les François faillirent vaillamment sur les Flamends, & grand foison en tuerent, mais ils ne peurent soustenir la grand charge & quantité de gens que Arteuelle auoit. Et se retrahirent en leur place, laquelle ils feirent fortifier diligemment, & feirent visiter les viures & habillemens de guerre, & se trouuerent assez competemment garnis. Et pource delibererent & conclurent de eulx tenir, & souuent faisoient faillies, & plusieurs Flamends tuoient tant de traict que autrement. Au pays de Flandres, auoit vn Seigneur, nommé le Seigneur de Hanselles, lequel se joingnit avec Arteuelle, & enuoya defier le Comte, & se mit au dict siege avec les Flamends.

Arteuelle se doubtoit fort que le Roy ne aidast au Comte encores, veu que ceux de dedans Audenarde estoient François. Et pource enuoya Arteuelle vn cheuauteur vers le Roy, en maniere de poursuiuant ou herault, en luy faisant scauoir par paroles arrogantes, qu'il ne voulust donner faueur aucune, aide, ou confort au Comte; ou autrement ils se allie-

1382. roient aux Anglois, & escriuiſt vnes lettres lesquelles le meſſai-
ger preſenta au Roy en la preſence de ceux du ſang, & de ceux
du Conſeil. Et apres que les lettres eurent eſté leuës, veu que
ce n'eſtoit qu'un meſſaiger, il feut gracieuſement renuoyé
ſans aucune reſponſe.

Et tantost le Comte veint deuers le Roy, en luy expoſant
la rebellion de ſes ſubiets, & qu'il eſtoit ſon vaſſal tant à cau-
ſe de la Comté de Flandres, que de pluſieurs autres grandes
terres & Seigneuries, en le requerant, qu'il vouluſt l'aider, &
donner confort. Et combien ſelon ce que aucuns diſoient, il
auoit faiſt des fautes, en ayant pluſieurs grandes conion-
ctions avec les Anglois, toutesſois le Roy delibera de luy ai-
der comme à ſon vaſſal, pour pluſieurs cauſes & raiſons. lors
alleguées. Et pource qu'on voyoit, qu'il eſtoit expedient d'ad-
uancer la beſongne, le Roy tres-diligemment manda, & feut
mander gens de toutes parts, qu'on feust vers luy à la my-O-
ctobre en armes, & que chaſcun ſe diſpoſaſt d'eſtre le mieux
habillé qu'il pourroit. Et feut obeï par les vaſſaux, Capitaines
& autres, & feirent tellement que au iour assigné, tresgrand
compagnée & merueilleuſe, & de vaillants gens eſtoient ſur
les champs par tout, en tirant vers Arras & les marches de Pi-
cardie. Quand le Roy ſceut que ſes gens eſtoient preſts, & ſi
belles & grandes compagnies, il delibera de partir, & ſe
mettre ſur les champs. Et en enſuiuant la loüable maniere
de ſes predeceſſeurs, delibera d'aller à Sainct Denys, ſi y
alla, & feut grandement & honnorablement receu par les
Abbé & religieux. Et le lendemain matin feut par l'Abbé
chantée & par les religieux vne bien notable meſſe, avec
vn ſermon par vn Maïſtre en Theologie. Et ce faiſt, les
corps de Sainct Denys & de ſes compagnons, feurent deſ-
cendus & mis ſur l'autel. Le Roy ſans chapperon & ſans
ceinture les adora, & feut ſes oraiſons bien & deuotement,
& ſes offrandes, & ſi feirent les Seigneurs. Ce faiſt, il feut
apporter l'Oriflambe, & feut baillée à vn vieil cheualier
vaillant homme, nommé Meſſire Pierre de Villiers l'an-
cien. Lequel receut le corps de noſtre Seigneur, & feut les
ſermens en tel cas accouſtumez. Et apres ſ'en retourna le Roy
au bois de Vincennes.

Le peuple de Paris touſiours fort grommeloit, & feut

assemblé, & en leur presence le Duc de Bourgogne 1382. fait vne proposition bien notable, en exhortant le peuple à pacification, & à obeïr au Roy leur souuerain Seigneur.

Trefues y auoit entre les François & les Anglois, tresmal gardées & entretenues par les Anglois, & tousiours en Guyenne les rompoient, & sur la mer vers Normandie pilloient & roboient, & faisoient plusieurs grands excez & dommaiges aux François. Pour laquelle cause ceux de Normandie eulx voyans ainsi foulez, firent finance de nauire, & se meirent sur la mer, & rencontrèrent les Anglois lesquels estoient en vne grand nef, & joingnirent ensemble, & y eut fort combattu d'un costé & d'autre, & finalement les Normans eurent victoire, & feurent les Anglois desconfits, dont les dictz Normans se habillerent trespompeusement de leurs biens, tant qu'ils durerent.

En ce temps le Mareschal de Sancerre estoit en Poictou, Xaintonge & Guyenne, & mit en l'obeissance du Roy plusieurs places, les vnes par composition, & les autres par force, & si eut diuerses rencontres d'Anglois. Car plusieurs fois se trouuerent en escarmouches sur les champs, & tousiours en venoit à l'honneur & profit du Roy, & au sien.

Le Roy Iean d'Espagne sceut, que vne bien grande quantité d'Anglois tant nobles que archers estoient descendus en vne Isle estant sur la mer pres de la Rochelle, & là les veint assieger. Ceste Isle estoit trespeu peuplée, & mal garnie de viures. Et tant feut deuant eux, que apres qu'il eut gagné leur nauire, & que les Anglois eurent default de viures, ils commencerent à traicter. Et par composition feut ordonné qu'ils s'en iroient tous desarmez en leur pays, & leur bailla le Roy d'Espagne vaisseaux, & promirent de eulx non armer iusques à trois ans. Et s'en allerent ainsi. Et disoit on, & estoit commune renommée, que si le Roy d'Espagne eust encôres demeuré par aucun temps, il les eust eu à sa volonté, & mené en son pays. Et que par ce, trefaisément eust esté trouué traicté entre les François & Anglois.

Or fault retourner aux Flamends, qui tenoient le siege deuant Audenarde, où estoient les François. Et faisoient Arte-

1382.

uelle & les Flamends de grandes diligences d'affaillir la place, & auoir à leur volonté les dictz François, qui estoient fort lassez & trauaillez de eulx defendre, & non sans cause, & enuoyerent vers le Duc de Bourgongne & vers le Comte les aduertir, que si en brief n'auoient secours, ils ne se pourroient plus tenir, & que aussi viures leur defaillioient. Le Duc de Bourgongne faisoit grand diligence d'assembler gens de guerre, pour aller leuer le siege, & de fait en assembla. Ce qui veint à la cognoissance de Philippes Arteuelle, & luy feut rapporté par aucuns Flamends espies, & le sceurent ceux de sa compaignée. Et en y eut vn de la ville de Gand, bien notable homme, lequel leur monstra bien doucement, & le plus gracieusement qu'il peut, par maniere de predication, qu'ils feroient bien de trouuer accord, & qu'il se debuoit requerir, en declarant les inconueniens qui s'en pouuoient ensuiure. Mais incontinent il fut tué, & mis en pieces, & si vouloient ils faire le mesme à plusieurs autres. Mais Arteuelle les pacifia & appaisa, & prescha contre les raisons de celuy qui feut tué, en contemnant & mesprisant les François & leur puissance, & le appelloient les Flamends leur Prince & leur Seigneur. Et au plus pres de Audenarde, auoit bien cinq cents pourceaux, qui passoient & auoient gardes. Ce que apperceurent ceux de dedans, lesquels estoient bien despoirueus de viures. Et se assemblerent aucune petite compaignée à cheual & à pied, & saillirent hors de la ville, & se meirent ceux de cheual entre ceux de pied, & le siege des Flamends, & veindrent aucuns de ceux de pied iusques au lieu où estoient les pourceaux, & en preindrent deux ou trois qu'ils trainerent vers la ville, & moult fort se preindrent à crier les dictz pourceaux, & tous les autres les suiuiroient, & pour abreger, tous entrerent dedans la ville. Et s'esmeurent aucuns des Flamends pour empescher que les François n'eussent les pourceaux, mais ceux de cheual & autres qui saillirent de la ville, resisterent. Plusieurs des Flamends y eut de tuez sans dommaige des François, lesquels des pourceaux feurent fort reconfortez. Et auoient bonne volonté de eulx tenir, veu encores qu'il estoit ia venu à leur cognoissance, que le Roy estoit sur les champs, Et estoit merueilles des vaillances, que faisoient les François dedans la place, & tous les iours tuoyent plusieurs Flamends tant de

de traict que autrement.

Le Roy enuiron la fin d'Octobre vint en la cité d'Arras, & enuoya vn gentilhomme, qui entendoit & parloit bien Flamend, par deuers Philippes Arteuelle & les Flamends, pour les desmouoir & monstrier qu'ils auoient mal fait, d'auoir fait l'entreprise, & les choses qu'ils faisoient. Et sur ce leur monstra plusieurs inconueniens qui leur pourroient aduenir, le plus gracieusement qu'il peut, & feirent bonne chaire au gentilhomme. Mais la response de Arteuelle feut, que en nulle maniere ils ne laisseroient leurs harnois, & poursuuroient ce qu'ils auoient commencé, veu que c'estoit pour la liberré du pays. Et à tout la dicté response, s'en retourna ledict gentilhomme deuers le Roy, auquel il dit, ce qu'il auoit trouué. Quand le Comte sceut la venue du Roy, il enuoya deux cheualiers deuers le Roy, lesquels bien grandement, & en assez briefues paroles & gracieuses exposerent le bon droit, & la iuste querelle que auoit le dict Comte, en le suppliant, que comme son vassal, il le voulust aider, & rebouter l'orgueil, & les commotions des Flamends. Le Roy qui estoit ieune, respondit de son mouuement aux dicts cheualiers, Retournez vous en deuers beau Cousin, & luy dictes, que en brief il aura de nos nouuelles, dont ils feurent bien contents. Et quand le dict Comte le sceut, à la compaignée qu'il auoit, il feut bien joyeux.

Le Roy diligemment se mit sur les champs, & ordonna ses batailles par le conseil des Connestable, Marechaux & Capitaines. Et quand le Comte le sceut, il considera que le passaiage seroit bien difficile au Roy & à ses gens, sinon par le pont de Commynes, lequel les Flamends occupoient, en intention de defendre le passaiage. Et pource pour le gaingner & occuper sur les dicts Flamends, enuoya le Seigneur d'Antoing Guillaume bastard de Flandres, le Seigneur de Burdegand son bastard de Flandres, & autres Capitaines accompagnez de gens de guerre, lesquels en belle & bonne ordonnance approcherent dudiect pont. Si les receurent les Flamends vaillamment. Et y eut fait de vaillans fait d'armes tant d'un costé que d'autre, & trefasprement & durement combaterent, & tellement resisterent les Flamends, que les gens du Comte jà ne feussent venus à leur intention, si ce

E

n'eust esté le dict Guillaume, lequel se tira & ses gens vers vn moulin, où il trouua des bateaux, & trouua moyen de passer de l'autre part de la riuiere. Et veindrent luy & sa compaignée au dict pont, pour frapper sur lesdicts Flamends, lesquels feurent desconfits, & la plus grand partie morts & tuez. Et assez tost apres se rassemblerent & rallierent les Flamends en nombre de huit mille combatans, & veindrent bien asprement au dict pont de Commines. Et combien que les gens du pont, vaillamment resistassent, & se defendissent, toutesfois il fallut qu'ils demarchassent, & se retrahissent, & mesinement se retrahit ou enfuyt le bastard de Flandres, & plusieurs autres. Guillaume dessus dict resista, & demeura, & fait merueilles d'armes, dont les Flamends estoient bien esbahis. Et combien qu'il feust enuironné de ses ennemis, lesquels de leur puissance taschoient à le prendre ou tuer: toutesfois il feit tant par sa vaillance, à l'aide de ses gens, qu'il se sauua, & reueint deuers le Comte, qui feut bien dolent & desplaisant de ce que les Flamends auoient recouuert le dict pont. Et feit tresbonne chere audiect Guillaume, & le remunera, & donna de ses biens grandement. Quand Arteuelle sceut les premieres nouuelles de la perdicion du pont, & que ses gens auoient esté desconfits, il feut bien courroucé, & delibera de leuer son siege, & venir luy & sa compaignée vers ledict pont. Et tantost apres luy veindrent nouuelles, qu'il auoit esté recouuert & regaingné. Et pource demeura...

Le Roy comme dessus est dict, se meit sur les champs, en intention & volonte de combattre les Flamends, & auoit grand foison de peuple avec luy, & ordonna par deliberation des gens de guerre, que les gens debilitiez de leurs corps, & les mal habillez & armez, demeureroient à la garde du bagaige. Et au surplus, pource que necessaire estoit de gaigner le pont de Commines, que les Flamends tenoient comme dessus est dict, pour auoir passaige feurent ordonnez Messire Oliuier de Clifson, Connestable de France, & Messire Louys de Sancerre, Marechal de France, à tout deux mille combatans, qu'ils iroient audiect pont, duquel les Flamends auoient rompu vne arche, pour empescher le passaige. Et à la garde duquel estoient commis des plus vaillans gens de guerre qu'ils

eussent, & y auoit des Anglois, & monstroient bien qu'ils auoient grand volonté de eux defendre. Les François, c'est à sçauoir Clisson, & Sancerre, & leurs gens allerent deuant le dict pont, & faisoient les Flamends guet merueilleusement. Et considererent les François, que veu la rompure du pont, il estoit impossible que par le dict lieu, ils les peussent gaingner. Et pource trouuerent moyen & maniere de passer la riuere par au dessus, la nuit ensuiuant, & par lieux dont les Flamends en rien ne se doubtoient. Et quand ils le sceurent, ils feurent bien esbahis, & se meirent en bataille au deuant du pont. Et les François vigoureusement & vaillamment les assaillirent, & feurent iceux Flamends desconfits, & y en eut plusieurs morts & tuez, & les autres s'enfuirent ou retrahirent vers leurs gens. Le pont qui auoit esté par eulx rompu, feut réparé & refaict, & bien fortifié. Et à la garde & defense d'iceluy, feut commis vn vaillant cheualier le Seigneur de Sempy, accompagné de gens de guerre. Et par le dict pont passerent tous les François. Quand Arteuelle sceut les nouvelles de la dicte desconfiture, il feut moult diligent de bien enhorter ses gens d'estre vaillans en armes, & de eux aprestier à combatre. Et leur veint dire vne vieille forciere, qu'elle feroit tant, qu'il gaigneroit, si on combatoit en bataille. Arteuelle ordonna de neuf à dix mille Flamends pour y aller, & à vn point du jour veindrent frapper sur aucuns logis des François. Et à grande & belle ordonnance veindrent pour accomplir ce qui leur auoit esté enchargé. Et de faict, approcherent d'un lieu, où estoient logées aucunes parties de l'ost des François, & frapperent sur le dict logis. Mais les François vaillamment se defendirent. Et à l'heure Clisson, qui estoit logé vers les dictes marches, qui sceut & ouyt le bruit, s'en veint au lieu, & si tost qu'il feut arriué, les Flamends ne teindrent gueres, & feurent desconfits. Et y en eut de trois à quatre mille de morts, les autres s'enfuirent où bon leur sembla. Philippes Arteuelle doubtant que ses gens dont il auoit grand nombre, ne sceussent ces nouvelles, preint à parler auant que aucune chose veint à leur congnoissance, & leur dict, que en brief il recouurerait ledict pont, & que les François à la dicte besongne auoient esté desconfits.

1382.

Le Roy apres ses gens passa au dict pont de Commines, visita ses gens, & en trouua plusieurs qui auoient esté naurez & blesez aux dictes besongnes, & bien peu de morts. Messire Iean de Vienne, Admiral de France, bien vaillant cheualier, feut ordonné d'aller par le pays, faire amener & conduire viures pour l'ost, & preint son chemin vers Ipre. Plusieurs Flamends tant de la ville que du pays s'estoient assemblez, & s'esforçoient de courir sus, & de combattre le dict Messire Iean de Vienne, lequel se disposa à y resister, & les combattit & desconfit, & y en eut plus de trois cents de tuez. Quand ceux de Ipre, veirent la dicte desconfiture de leurs gens, se rendirent, & meirent en l'obeissance du Roy. Et pour ceste cause, enuoyerent vn religieux deuers le Roy, le supplians qu'il leur voulust pardonner, & qu'il les voulust prendre à sa grace & mercy. Ce que le Roy feit trefvolontiers.

Arteuelle animoit tousiours ses gens, & leur donnoit courage, & enuoya douze hommes de sa compaignée en l'ost du Roy, pour sçauoir qu'elles gens il auoit pour conseruer le fait de l'ost du Roy, & de ses gens. Et aussi le Roy enuoya en habits dissimulez Messire Guillaume de Langres & douze autres, lesquels entendoient & parloient Flamend, pour sçauoir l'estat de l'ost des Flamends, lesquels y furēt, & en eux retournans, rencontrèrent les douze que Arteuelle auoit enuoyez en l'ost du Roy, lesquels ils tuerent, & rapporterent au Roy ce qu'ils auoient trouué, & comme les Flamends se dispoient à combattre le Roy & son ost. Et cependant les François en diuers lieux faisoient forte guerre, & soudainement allerent vne partie deuant la ville du Dam, qui estoit forte ville, & la preindrent d'affault. Et tous les iours les François dommageoient les Flamends, & se commença Arteuelle aucunement à esbahir, quelque semblant qu'il monstra.

Le Seigneur de Hancelles, dont dessus est faite mention, lequel se joingnit avec les Flamends & Arteuelle, quand il sceut & apperceut la puissance du Roy & de ses gens, congneut sa follie, & le danger & peril, si le monstra à ses gens. Mais ils n'en teindrent compte, & se animerent plus que deuant. Et pource il monta secretement à cheual, & s'en alla, & les laissa. Et dient aucuns que ainsi cuida.

faire Arteuelle, & dit au peuple, qu'on luy laissast prendre iusques à dix mille combatans, & il se faisoit fort de desfaire la plus grand partie de l'ost du Roy, & leur monstroit la maniere assez apparente. Mais ils respondirent, qu'ils ne souffriroient point, qu'il se partist d'avec eulx, comme auoit fait le Seigneur de Hancelles.

Les batailles du Roy feurent ordonnées, & eurent Clifson, & Sancerre, & Moulon de Blainville l'avant-garde. Et avec eux se joingnirent les Comtes de Saint Paul, de Harcourt, de Grand pré, de Salmen Allemagne, & de Tonnerre, le Vicomte d'Aulnay, & les Seigneurs d'Antoing, de Chastillon, d'Anglure, & de Hanguest. Les Ducs de Berry & de Bourbon, l'Euesque de Beauvais, & le Seigneur de Sempy faisoient les ailles. Le Comte d'Eu, & autres faisoient l'arriere garde. En la grosse bataille estoit le Roy, le Comte de Valoys frere du Roy, & le Duc de Bourgongne Philippes, avec grande & grosse compaignée. Et feut crié de par le Roy, que personne sur peine de perdre corps & biens, ne se meist en fuite. Et feut ordonné, que tous descendissent à pied, & renuoyassent leurs chevaux. Et ainsi feut fait. Excepté que le Roy seul estoit à cheual. Et autour de luy feurent ordonnez certains chevaliers, le Besgue de Villaines, le Seigneur de Pommiers, le Vicomte d'Acy, Messire Guy le Baueux, Enguerrand Hubin, & autres. Toutesfois aucuns dient que vn chevalier nommé Messire Robert de Beaumanoir, feut ordonné à tout cinq cents lances pour les verdoier & escarmoucher, pour veoir leur estat & gouvernement. Ce qu'il feut bien diligemment, & retourna vers l'avant-garde, & descendirent à pied, & renuoyerent leurs chevaux comme les autres. Deux choses adueindrent, qu'on tenoit merueilleuses. L'une, qu'il surueint tant de corbeaux qui enuironnoient l'ost tant d'un costé que d'autre, que merueilles, & ne cessoient de voleter. L'autre que par cinq ou six iours le temps feut si obscur, & chargé de bruines, que à peine on pouuoit veoir l'un l'autre. Et quand le Roy sceut, que les Flamends venoient pour le combatre, il feut vne maniere de promesse qui les combatroit, & feut marcher ses gens, & desployer l'Oriflambe. Et aussi tost qu'elle feut desployee, le temps à coup se esclaircit, & deueint aussi beau & clair, qu'on auoit oncques veu, tellement que les ba-

1382. tailles se entreueirent. Et anima fort Arteuelle ses Flamends. Pareillement Messire Oliuier de Clifson parla, & monstra aux François qu'ils debuoiert auoir bon couraige à combattre, & plusieurs mots & bonnes paroles leur dit. Les batailles marcherēt les vnes contre les autres, tant qu'ils approcherēt pour combatre main à main. Et y eut bien aspre & dure besongne, & se porterent les Flamends si vaillamment, que eulx assemblez, ils feirent reculer les François vn pas & demy. Et lors vn François commença fort à crier Nostre Dame, Mont-Ioye, Sainct Denys à eux, & plusieurs autres aussi. Et en ce point, preindrent vertu & couraige les François, & tellement qu'ils reculerent les Flamends, & les rompirent, & feurent desconfits en peu de heure. Et d'un costé & d'autre, y eut de vaillans armes faictes. Et cheurent les Flamends les vns sur les autres à grand tas, & y en eut plusieurs morts estouffez, & sans coup ferir. Et estoit commune renommée, qu'il y en auoit bien eu quarante mille morts. Les autres dient vingt cinq ou trente mille de morts. Et des gens du Roy enuiron quarante trois personnes. Messire Guy de Baueux, vn vaillant cheualier fut blessé.

Après la dicte desconfiture, on douta fort que les Flamends ne se ralliassent pour combattre. Et pource feurent ordonnez les Seigneurs d'Albret & de Coucy, à tout quatre cents hommes d'armes à cheual à les pourfuiure, & feirent tellement, que les Flamends n'eurent loisir de eux assembler, & là où ils les trouuoient, frapportoient dessus, & y en eut plus de mille de morts. Et quand les Flamends, qui s'en estoient fuyz de la bataille, veirent qu'on les pourfuiuoit ainsi chaudement, ils s'enfuirent és bois, marescaiges & riuieres. Et y en eut plusieurs noyez és dictes riuieres & marescaiges, où ils se bautoient si auant, qu'ils ne s'en pouuoient auoir, & là mouroient.

Et quand on eut bien sceu par les Flamends, la quantité d'eulx, on trouua que veritablement il falloit, qu'il y en eust bien quarante mille de morts. Et si y auoit mesmes des Flamends de la partie du Comte, qui scauoient les adresses des bois, lesquels s'y bouterent, & plusieurs en tuerent. Le Roy feut moult ioyeux de ceste victoire. Et en eurent grand honneur les Conneftable Clifson, & Sancerre Mareschal, & ceux de l'auant-garde.

Et quand ceux de Flandres qui estoient demeurez au siege de Audenarde, & l'auoiēt fort fortifié, sceurent que leurs gens estoient desconfits, ils leuerent leur siege comme sans arroi, & s'en allerent par diuerses pièces. Et alors saillirent ceux de dedans, & les poursuuirent, & les trouuoient par petites parties ou compaignées, & les tuoient. Et y eut derechef grand quantité de Flamends tuez & mis à mort.

Le Roy voyant & congnoissant la grand' grace que Dieu luy auoit faicte, bien & deuotement avec ses parens, & comme tous ceux de son Ost, en remercierent Dieu.

Le Comte de Flandres en faisant son debuoir, veint en l'ost du Roy bien accompagné, & en la presence des Seigneurs du sang, & de plusieurs Capitaines, Barons, & Seigneurs, remercia le Roy du grand bien & plaisir qu'il luy auoit faict, & pareillement remercia tous les assistans. Auquel le Roy respondit, Beau Cousin, le vous ai aidé & secouru tellement, que vos ennemis sont desconfits. Combien que du temps de feu Monseigneur mon pere, dont Dieu veuille auoir l'ame, vous feustes fort chargé d'auoir eu alliance, & fauorisé nos ennemis les Anglois. Si vous en gardez doresnauant, & ie vous aurai en ma grace.

Le Roy auoit grand desir de sçauoir si Arteuelle estoit mort, ou non. Et y eust vn Flamend bien nauré & blessé, qui estoit l'un des principaux Capitaines, auquel on demanda s'il en sçauoit rien. Et il respondit, qu'il croioit certainement qu'il estoit mort, & estoit à la besoingne assez pres de luy. Et feut mené sur le champ, & fait telle diligence qu'il trouua le corps d'Arteuelle mort, & le monstra au Roy, & aux assistans. Et pource le Roy le voulut faire guairir, & donner sa vie. Mais le Flamend ne voulut, & dit, qu'il vouloit mourir avec les autres. Et par l'euacuation du sang & des playes mourut.

Le Roy voulut venir à Courtray, & abatre les portes, & y tuerent les gens d'armes, & y feurent trouuez largement viures & biens. Et combien que le Roy eust faict crier qu'on ne tuaist personne, & qu'on ne feist desplaisir à nully, toutesfois en despit de la bataille de Courtray, où les François auoient esté desconfits, les gens de guerre tuerent presques tous ceux de la ville, & les pillerent & roberent;

1382. & puis bouterent feux par tout, & ardirent & brulerent. Et en la dicte ville, feurent trouuées lectres que ceux de la ville de Paris auoient escript aux Flamends, tres-mauuaises & feditieufes. Desquelles choses le Roy feut bien desplaisant. Et adueindrent les choses dessus dictes enuiron la vigile de la Saint Martin.

Le Roy avec ceux de son sang, joyeux de la victoire que Dieu leur auoit donné, delibera de s'en retourner à Paris, pour remedier à leurs mauuaises volonteiz, & passa par les villes de Picardie, esquelles il feut grandement & honnorablement receu, & luy feurent faicts plusieurs beaux dons, & de grand valeur. Et à tout son Conseil, & à tout son aise s'en venoit. Et pour aucunement passer l'hyuer, il veint en la ville de Compiengne chasser & deduire, & y feut par aucun tēps pour soy esbatre. Et apres il veint à Saint Denys en Frâce pres de Paris, accompagné de ses Oncles, & de plusieurs Barons & Seigneurs. Les Abbé, Religieux & Couuent, & ceux de la ville de Saint Denys, le receurent bien grandement & notablemēt selon leur pouuoir. Et veint le Roy à l'Eglise, & preint l'Oriflambe luy estant nue teste, & sans ceincture, & la rendit en moult grand deuotion deuant les corps saincts, & la bailla à l'Abbé. Et donna à l'Eglise vn moult beau poille de drap d'or. Et auoient les Ducs de Berry & de Bourgongne, & tous les notables Barons grand joye, & moult se esiouyffoient de veoir les maintiens du Roy, & à l'Eglise feirent aucuns dons.

Et pendant qu'ils s'esbatoient à Saint Denys, le Roy delibera en toutes manieres d'abbatre l'orgueil de ceux de Paris, lesquels estoient moult esbahis, & non sans cause. Et veint le Preuost des marchans, qui lors estoit, vers le Roy, & luy dit, que toutes les choses estoient appaisées, & qu'il pouuoit entrer à tout son plaisir & volonté en la ville, & le pria tres-humblement qu'il eust pitié du peuple, & leur voulüst pardonner & remettre l'offense qu'ils auoient fait. Et dient aucuns, que de ce que le Preuost des marchands auoit dit au Roy, le peuple n'en scauoit rien. Toutesfois il s'offroit, & plusieurs notables de la ville, de le faire entrer à ses plaisir & volonté. Et le Roy respondit, qu'il estoit content d'entrer dedans la ville, & ordonna au dict Preuost le iour. Et feit crier le Roy en son ost, que tous feussent prests & armez pour entrer en la dicte ville de Paris.

de Paris. Le iour au matin les gens du Roy approcherent la porte Saint Denys, & feurent les barrieres rompues & abbatus, & pareillement le feut la porte. Et ce fait, y eut trois batailles ordonnées toutes à pied. En la premiere estoit Clisson le Connestable, & le Marechal de Sancerre. En la seconde, estoit le Roy grandement acompaigné de ses parens, & estoient tous à pied. Excepté le Roy, combien que aucuns dient, que ses Oncles estoient à cheual. Au deuant du Roy veindrent à pied bien humblement le Prevost des marchands, & forson de ceux de la ville, qui veindrent pour faire la reuerence au Roy, & aucune briefue proposition. Mais ils les refusa, & ne voulut qu'ils feussent ouys, ne qu'ils feissent reuerence, ne deussent parole, & passa outre, & vint à nostre Dame; descendit de dessus son cheual, & vint à l'Eglise, & en bien grand deuotion feit son Oraison, & son Offrande. Aussi feirent les Oncles & autres Seigneurs. Et s'en reuint au portail de l'Eglise, & monta à cheual, & s'en vint descendre au Palais. Ses gens d'armes estoient logez par les quartiers és hostelleries, & feut crié à son de trompe, qu'on ne dist aucunes paroles iniurieuses, ne qu'on ne print biens, ou que on feist dommaige à autrui. Deux y eut, lesquels vserent d'aucunes manieres seditieuses, & de mauuais langaiges, lesquels feurent tantost pris, & pendus à leurs fenestres. Les Ducs de Berry & de Bourgongne, cheuaucherent par la ville bien acompaignez. Et y eut des habitans de la ville bien trois cents de pris. Et entre autres Messire Guillaume de Sens, Maistre Jean Filleul, Maistre Martin Double, & plusieurs autres, iusques audit nombre. Et n'y auoit celuy à Paris, qui n'eust grand doute & peur. Et y en eut de decapitez aux halles, qui estoient des principaux de la commotion. La femme d'un d'eux, qui estoit grosse d'enfant, comme desesperée se precipita des fenestres de son hostel, & se tua. Apres ces choses, feurent encores gens par la ville, pour oster les chaînes, lesquelles feurent emportées hors de la ville au bois de Vincennes. Et feurent tous les harnois pris és maisons de ceux de Paris, & feut vne partie portée au Louure, & l'autre au Palais. Et disoit-on qu'il y auoit assez pour armer cent mille hommes. La Duchesse d'Orleans & l'Vniuersité de Paris, veindrent deuers le Roy le prier & requierir que seulement on procedast à punir ceux

1382. qui estoient principaux des seditions. Vn nommé Nicolas le Flamend, qui estoit l'un des principaux, eut aux halles le col couppe. Et apres ces choses ainsi faictes, on mit sus les Aydes, c'est à sçauoir, gabelles, impositions, & le quatriesme. Et feut l'Escheuinaige osté, & ordonné, qu'il n'y auroit plus nuls Escheuins, ne Preuost des marchands, & que tout le gouuernement se feroit par le Preuost de Paris. Messire Jean des Mares, qui estoit vn bien notable homme, Conseiller & Aduocat du Roy en Parlement, lequel auoit esté du temps du Roy Charles, cinquesme en grande auctorité, & croioit le Roy fort son conseil, feut pris & emprisonné. Et estoit commune renommée, que ce n'estoit pas, pour cause qu'il eust esté consentant des seditions & commotions, qui auoient couru. Car elles luy estoient moult desplaisantes, & y eut volontiers mis remede. Mais es brouillis & differences, qui auoient esté entre le Roy Louys de Sicile, cuidant bien & loyaument faire, les Ducs de Berry & de Bourgongne auoient conceu grand haine contre luy. Et luy imposa-on, qu'il auoit esté comme cause des dictes seditions. Si feut mis en Chasteler, & ny fallut gueres de proces, ne sans à peine l'examiner, ne dire les causes, feut dict qu'il auroit le col couppe. Et combien qu'il requist estre ouy en ses iustificacions & defenses, & aussi qu'il estoit clerc, marié avec vne seule vierge & pucelle, quand il espousa, ce nonobstant feut mené aux halles. Et en allant disoit ce pseume; *Indica me Deus, & discerne causam meam de gente non sancti.* Eut la teste couppee, à la grande desplaisance de plusieurs gens de bien & notables, tant parens du Roy & nobles, que du peuple. Auec le dict des Mares, y en eut douze autres qui furent decapitez. Et estoit grand pitié de veoir la grande perturbation qui estoit à Paris. Apres plusieurs executions faictes, le Roy ordonna qu'on luy feist vn siege Royal sur les degrez du Palais, deuant la presentation du beau Roy Philippes. Et trestost feut grandement & notablement paré, Et l'asseis en chaire, accompagné de ses Oncles les Ducs de Berry & de Bourgongne, & de foison de nobles gens de Conseil. Et là feut-on venir le peuple de Paris, qui estoit grand chose, de veoir la quantité du peuple qui y estoit. Et com-
manda le Roy à Messire Pierre d'Orgemont, son Chancel-

lier, qu'il dist ce qu'il luy auoit enchargé de dire. Lequel commença bien grandement & notablement dire le trespassement du Roy Charles cinquiesme, & le Sacre & couronnement du Roy present, le voyage de Flandres, & la victoire, & l'absence du Roy, les grands & mauuais & merueilleux cas de crimes & delicts, commis & perpetrez en effect par tout presques le peuple de Paris, dignes de tresgrandes punitions. Et qu'on ne se debuioit esmerveiller des executions ja faictes, en monstrant que encores y auoit des prisonniers dignes de punition, & d'autres à punir & à prendre, en declarant les matieres suffisantes de ce faire. Et teint ces paroles assez longuement. Et en prenant issue, demanda au Roy, si c'estoit pas ce qu'il luy auoit enchargé. Lequel respondit que Ouy. Apres ces choses, les Oncles du Roy, se méirent à genoux aux pieds du Roy, en le priant qu'il voulust auoir pitié de son peuple de Paris. Apres veindrent les Dames & Damoiselles toutes descheuelées, lesquelles en plorant, pareille requeste feirent. Et les gens & peuple à genoux, nue teste, baisans la terre, commencerent à crier misericorde. Et lors le Roy respondit, qu'il estoit content que la peine criminelle, feut conuertie en ciuile. Et feurent tous les prisonniers mis à plaine deliurance. Et feut la peine ciuile imposée à chascun des coupables, selon ce qu'ils auoient mespris. Mais elle estoit qu'il fallut qu'ils payassent & baillassent de meuble ou la valeur, la moitié de ce qu'ils auoient. Et y eut moult grand finance exigée, & à peine croyable. Et n'en veint au profit du Roy le tiers. Et feut la cheuance distribuée aux gens d'armes. Lesquels en feurent payez & contentez. Et leur donna le Roy congé, & promeirent veu que ils estoient bien payez & contentez, de ne faire en eulx en allant aucunes pilleries ne roberies. Mais ils teindrent tres-mal leur promesse. Car aussi tost qu'ils feurent sur les champs, ils commencerent mortelleuses pilleries à faire, en rançonnant le peuple, & faisoient maux innumérables.

Quand ceux de Rouën, qui estoient comme dict est, encores en couraige de leur fureur, sceurent comme ceux de

1382. Paris festoient esmeus, & qu'ils se gouernoient en la maniere dessus dicté, ils feirent pareillement & pis que deuant. Mais quand ils veirent ce que le Roy auoit fait en Paris, ils eurent grand crainte & peur. Et non sans cause. Ils enuoyerent deuers le Roy demander misericorde, & qu'il leur voulust pardonner, ce qu'ils auoient mespris. Et pour ceste cause, le Roy enuoya Messire Iean de Vienne, Admiral de France, vaillant cheualier, & preud'homme, accompaigné de gens de guerre. Et avec luy Messire Iean Pastourel, & Messire Iean le Mercier, Seignour de Noujant. Et entrerent dedans, & feirent abbatre aucunes des portes, & prendre grande quantité des habitans, spécialement ceux qui auoient contredit à payer les aydes, & qui auoient couru sus, & iniurié les fermiers. Et de ceux-cy, y eut plusieurs executez, & leurs testes couppees. Et lors les habitans demanderent pardon & misericorde. Et pource que c'estoit pres de Pasques, c'est à sçauoir la sepmaine peneuse, & la resurreccion de nostre Sauueur Iesus-Christ, les prisonniers feurent deliurez. Et comme à Paris, le criminel feut conuerti en amende ciuile. Et feurent exigées tres-grandes finances tres-mal employées, & en bourses particulieres comme on dist, & non mie au bien de la chose publique. Et ainsi feurent les choses appaisées à Roüen.

L'an mille trois cents quatre vingts & trois, en Angleterre y eut de grandes seditions & commotions. Et estoit, pource que à vn Parlement qui feut tenu à Londres, feut mis en deliberation, si on feroit guerre au Roy, & au Royanme de France. Et des notables Prelats & nobles feurent d'opinion, qu'on trouuaist maniere d'auoir paix, & qu'il estoit plus expedient & profitable, que de faire guerre. Et senroient bien que la volonté du Roy Richard d'Angleterre, estoit plus à paix que à guerre. Et celui, qui soustenoit plus fort ceste maniere, c'estoit l'Archeuesque de Cantorbie, vaillant Prelat, & preud'homme. Contre lequel plusieurs s'esmeurent, & feirent vne grande commotion, & le tuerent, & meurtrirent bien inhumainement, & plusieurs autres de sa compaignée. Et disoient que leur Roy estoit bien lasche de couraige, & qu'ils feroient guerre. Et pource ordonne-

rent que Thomas fils du Roy, Hugues de Caruelay, Cresson-
nal, & Robin Canole assembléeient gens de guerre, & vien-
droiēt en France. Et se trouuerent huiēt cents hommes d'ar-
mes, & dix mille archers pōur venir en France. Et firent ap-
pareiller leur nauire, & se meirent sur mer. Mais merueilleux
vents se leuerent, tellement qu'ils se rebouterent vers Angle-
terre. Et y eut plusieurs de leurs nefes peries, & de leurs gens.
Et quand les vents seurent cessez, derechef preparerent plu-
sieurs autres nauires, & rafreschirent leurs gens qui estoient
demeurez en la dictē tempeste. Et bien orgueilleusement,
comme ils ont bien accoustumē, se meirent sur mer derechef,
& eurent vent assez propice, & s'en veindrent descendre à Ca-
lais. Puis se meirent sur les champs, & cheminerent iusques en
Flandres, où ils seurent en aucuns lieux festoiez grandement,
& leur seurent viures administrez.

Et de ces choses le Roy rien ne sçauoit, lequel se disposa
d'aller en pelerinage à Chartres, & visiter l'Eglise, qui est bel-
le & notable, fondée de nostre Dame. Et y feut grandement
& honnorablement receu, ainsi qu'il appartenoit, & fit ses
oraïsons & offrendes. Et luy estant au dict lieu, on luy rap-
porta nouuelles que ceux d'Orleans, s'estoient esmeus, &
auoient les aucuns fait aucuns grands excez, & auoient refu-
sé de payer les aydes, & qu'ils auoient grande sedition & com-
motion contre les fermiers & Officiers du Roy. Et pource y
alla, & feut grandement & honnorablement receu par ceux
de la ville. Mais pourtant ne demorerent pas les fautes
qu'ils auoient fait, impunies. Car comme à Paris & à Rouē,
fit abbatre aucunes portes, & oster les chaines, & aux prin-
cipaux delinquans fit couper les testes, & payerent aucuns
certaine finance. Et feut tout appaisé.

Et s'en retourna à Paris, où il ouyt nouuelles des Anglois,
qui estoient en Flandres, & faisoient maux infinis, pilloient,
robboient & prenoient places. Le Roy delibera d'y remedier,
& manda gens de toutes parts. Ceux de Gand, sçachans que
le Roy faisoit armée, enuoyerent vers luy des nobles de la
ville, lesquels cuiderent auoir accez au Roy, pour luy expo-
ser les causes de leur venue. Mais le Roy qui auoit esté infor-
mé qu'ils s'estoient alliez aux Anglois, & leur auoient baillé
viures & confort, ne les voulut veoir, ne ouyr, & leur fit di-

15. 83. requ'ils s'en retournassent en leurs maisons. Gens venoient de toutes parts au Roy , & tant qu'on trouua que le Roy auoit bien de seize à dix-huict mille cheualiers & escuyers, & foison de gens de traict. Et voulut & ordonna , que rotis ceux qui venoient à son seruice , eussent estat en toutes leurs causes , iusques à deux moys apres leur retour. Et gens aagez , & aussi trop ieunes , s'en retournassent à leurs maisons , sans qu'ils feussent tenus d'aller au dict voyage. Les Gantois tousiours poursuiuoient de trouuer moyen de parler au Roy, & le prier, que si aucunes choses ils auoient faict , qui feust à sa desplaisance , qu'il leur voulut pardonner, & faire leur paix enuers le Duc de Bourgogne, & le Comte de Flandres , & ils estoient prests d'obeir. Mais le Roy ne feut conseillé à ce faire, & leur feut dit , qu'ils s'en retournassent. Et au Roy venoient tousiours nouuelles , que les Anglois descendoient, & mesnément que le Comte de Vuaruic estoit descendu à bien mille hommes d'armes, & cinq mille archers, & estoit arriué & abordé à Bourbourg. Le Roy assemblea ses gens, & fit crier que sur peine de la hart , ils ne feissent pilleries , ne robberies. Car ils feurent bien payez. Difficulté eut grande, comme vn si grand ost pourroit auoir viures. Et feut mandé vn marchand & bourgeois de Paris, nommé Colin Boulart, lequel se fit fort de trouuer du bled, & mener à l'ost pour cent mille hommes, quatre moys. Et luy feut ordonné, afin qu'il le feist, & aussi qu'il seroit bien payé, lequel fit ses diligences.

Le Roy se partit de Paris, & vint à Saint Denys, ouyt messe , preint l'Oriflambe en grande reuerence, & la bailla à Messire Guy de la Trimouille vaillant cheualier. Lequel receut le corps de nostre Seigneur , & fit le serment accoustumé, & la preint.

Et vint à la cognoissance du Roy , que les Gantois mesmes , lesquels faisoient si bien la maniere d'estre bons François , prièrent aux Anglois qu'ils youlussent mettre le siege deuant Ipre en Flandres. Lesquels le feirent, & ceux de dedans vaillamment se defendoient. La chose venue à la cognoissance du Roy , il delibera de aider aux dictz de Ipre, & de debouter ses ennemis , qui estoient au pays de Flandres. Et se mit sur les champs , & vint iusques à Arras

accompagné de son ost. Et de là se partit, & entra au pays de Flandres, & sceut que ceux de Ipre estoient bien oppressez, & fort trauaillees des Anglois, si prent son chemin vers Ipre, où les Anglois estoient, & tenoient le siege. Et eux sentans, que le Roy & son ost approchoient d'eux, ils leuerent leur siege assez hastiuement. Et au partir, bouterent le feu aux faux-bourgs, lesquels valloient mieux que la ville, dont ce feut grand dommaige. Et tout le pays destruisirent, pillerent, & robberent, en prenant hommes, femmes, & enfans, & en faisant maux innumerables. Et de là, s'en allerent deuant Cassel, faignans d'y mestre le siege, & de resister à la puissance du Roy, & de faict meirèrent le siege. Ceux qui auoient l'auantgarde du Roy, c'est à sçauoir Clisson le Connestable, & le Duc de Brétaigne, commencerent à tenir leur chemin vers lesdits Anglois. Et aussi tost qu'ils le sceurent, ils leuerent leur siege, & bouterent le feu en leurs tentes, & s'en allerent la nuit, à Bergues, Bourbourg, & Grauelines, se retrahirent, & faisoient merueilleux & grands signés & semblans de resister à l'entreprise du Roy, & de son armée.

Robert Canole estoit deuers Bergues, & pource qu'il estoit renommé d'estre le plus vaillant & mieux accompagné d'Anglois, le Roy delibera d'aller deuant l'assieger. Et quand Canole sceut les nouuelles, il partit de la dicte ville, & s'en alla à Grauelines, où les gens du Roy le suiuirent. Et feut mis le siege deuant la dicte ville, & y eut de belles armes faictes; & tresvaillamment se portoient les Anglois, en monstrant toutes manieres de eulx vouloir bien defendre, & aussi faisoient ils. Et pource les Capitaines François feirent approcher l'artillerie, c'est à sçauoir canons, bombardes, & autres habillemens propres à assieger & assaillir villes. Et quand les Anglois apperceurent & veirent les preparations qu'on leur faisoit, ils delibererent de eulx partir, & en aller. Ceux de la ville resisterent le plus fort qu'ils peurent, & s'efforcèrent de les retenir, & empescher leur partement. Ce qu'ils ne peurent faire, & secretement partirent par vne porte non assiegée, lequel partement les François ignoroient. Ce qui feut rapporté à ceux qui estoient de-

1483.

uant au siege, mais ils ne le pouuoient croire. Et supposé qu'ils ne veussent point escarmoucher, ne eux monstrier ainsi qu'ils souloient, toutesfois les François cuidoient & imaginoient que ce feust vne fiction, pour cuider faire quelque grosse entreprise ou saillie sur les François. Et y eut trois de la nation de Picardie, qui estoient dedans, lesquels pource que par les portes on ne laissoit personne saillir, descendirent par dessus les murs & fossez, & affermerent aux François que sans doubte les Anglois estoient partis, & encores on ne les vouloit pas croire. Et pource y eut des plus vaillants de ceux qui estoient au siege, qui preindrent vn petit vaisseau, & se meirēt dedans, & par l'eau allerent iusques aux murs, & à eschelles assez aisément entrèrent dedans la ville en assez gēte compaignée. Et y eut aucuns qui s'assemblerent en la ville pour resister. Mais tous feurent mis à l'espée. Et apres tous ceux de l'ost y entrèrent, & feut tout pillé & pris, & en aucunes extremités de la ville, feut le feubouté, tellement que toute la ville feut comme brulée & arse. Plusieurs y auoit des habitans retraits en leurs maisons, lesquels pour euitier le peril du feu, saillirent dehors. Mais on les tuoit, à mesure qu'on les trouuoit, & n'y en eut comme nuls saueuz, qui feussent de defense. Plusieurs ieunes hommes & enfans, feurent pris & reduits en seruitude, pour auoir finance & rançons.

Après ces choses ainsi faictes, le Connestable Clifson & les François sceurent, que les dictz Anglois s'estoient retraits à Bourbourg, & veint Clifson deuant la dicte ville avec l'ost des François, & feit tant Clifson qu'il trouua maniere de parler à leurs Capitaines, & par belles & douces paroles les cuida induire, à ce qu'ils s'en allassent en leur pays, & delaisassent le pays du Roy. Mais ils en feurent plus aigres, & fort abandonnez en grosses paroles, & feirent des saillies, & de merueilleuses armes & vaillances, & aussi trouuerent ils les François forts & roides à resister, & les rebouter dedans. Le siege feut mis deuant eulx de toutes parts, & dresse & afeit on les engins, & les fait on iecter & tirer, & enuiron la fin d'Octobre feut ordonné, qu'on feroit assaillir la ville. Et de fait, feut assaillie, & estoit merueilles de la vaillance des François. Et entre les autres, feit moult, & se porta vaillamment Messire
Philippe

Philippes d'Artois, Comte d'Eu, & preint la banniere du Roy 1385.
à fleurs de lys, & monta en vne eschelle, & si chascun eust fait
comme luy, on disoit que la ville eust esté prise d'assault, com-
bien que les Anglois fort se defendoient. Et demanderent à
parler au Duc de Bretagne, qui estoit en la compaignée, &
leur fut accordé, & cessa l'assault. Et veint le dict Duc de Bre-
tagne parler à eux. Auquel ils ramenteurent le seruice qu'ils
luy feirent en Bretagne, & qué tousiours luy & ses prede-
cesseurs auoient serui la Maison d'Angleterre, & qu'il leur
voulust aider à trouuer moyen, que honnestement ils peus-
sent saillir, & retourner en leur pays, (Car ils voyoient bien,
qu'ils ne pouuoient resister à la volonté des François,) & qu'il
debuoit bien considerer, que si n'eussent esté les Anglois, il
ne feust pas Duc de Bretagne. Lors le Duc leur promet, qu'il
y feroit le mieux qu'il pourroit. Et s'en alla deuers le Roy, &
parla à luy, non mie par maniere de supplication, mais d'une
forme de admonestement, en luy monstrant, que les faicts
de guerre estoient aduentureux, & qu'ils estoient puissants
gens dedans, & que à les auoir d'assault, il y pourroit perdre
foison de ses gens, & des plus vaillans qu'il eust, & si ne sçauoit
qu'elle en seroit l'issuë, & que l'hier approchoit fort, & que
le pays de Flandres estoit froid, en luy monstrant qu'il y deb-
uoit aduiser, & luy conseillant qu'il debuoit trouuer expé-
dient & moyen qu'ils s'en allassent, & que la ville demeurast
au Roy. Autres Seigneurs & Capitaines estoient d'opinion
contraire, & que le Roy ne debuoit point leuer son siege, ne
partir, sans les auoir à son plaisir & volonté. Et specialement
y eut vn vieil cheualier, vaillant homme, nommé Messire
Pierre de Villiers, lequel monstroist au Roy bien euidem-
mēt, que ses ennemis estās dedans la ville, estoient perdus, qui
continueront à les assaillir, & que à l'opinion & imagination
du Duc de Bretagne ne se debuoit arrester, veu que autres
fois les auoit eu à son seruice, & auoit esté leur allié. Et si dit
plusieurs autres paroles aucunement poignans, lesquelles le
Duc pour venir à son intention dissimula, & attrahit à sa cor-
delle plusieurs des Seigneurs du sang & du Cōseil, tellement
que le Roy conclud qu'il traicteroit, & s'en iroit, & retour-
neroit à Paris. Et par le moyen dudit Duc feut traité & ac-
cordé, que les Anglois s'en iroient saulues leurs corps, &

1383. biens, & laisseroient la ville à la volonté du Roy. Ce qui feut fait, & se partirent de la ville, & veindrent au Roy le remercier & regratier du gracieux traité qu'il leur auoit fait, & veindrent bien pompeusement parez & habillez, & puis s'en allerent à Calais. Et du dict traité, feurent la plus grand partie des gens de guerre tresmal contents, & mauldissoient le Duc de Bretaigne, en disant diuerses paroles. Les Francois entrerent dedans la ville, & y en eut vn de la compaignée, qui par force entra dedans l'Eglise, & rompit l'huis, & y auoit vne moult belle image de Saint Iean, d'argent, laquelle il cuida empoingner & prendre, mais l'image lui tourna le dos. Et deuint celuy qui ce fait enragé, & hors du sens. Et de ce, tous les autres compaignons de guerre, se meirent en grand deuotion, tellement que dedans l'Eglise, n'y eut aucun mal fait, & en la ville se porterent doucement & gracieusement.

Et retourna le Roy à Paris. Et vint à Saint Denys, où il feit ses oraisons & offrandes, & remeit l'Oriflambe en la forme & maniere dessus declarée. Et quand il feut à son hostel à Paris, & il eust ouy aucuns Capitaines parler, il considéra la fraude & malice du dict Duc de Bretaigne. Mais il la dissimula. Et apres le Roy, le dict Duc retourna à Paris. Et apporta vne maniere d'abstinence de guerre. Et de là s'en partit, le plustost qu'il peut, & s'en alla en Bretaigne. Et feut ordonné par le Roy, que son oncle le Duc de Berry iroit deuers Calais, pour auoir conuention avec le Duc de Lancastre, & y feurent bien par l'espace de deux moys. Et sur les matieres, pour parlerent souuent les dicts deux Ducs, & enuoyerent deuers leurs Roys. Et finalement leur dicte assemblée ne porta nul fruit, sinon vnes trefues, lesquelles ne durerent gueres.

Le Comte de Frandres, au dict an alla de vie à trespassement. Duquel le Duc de Bourgongne Philippes le hardy, auoit espousé la fille. Et par ce moyen eut la Comté de Flandres, & y feut bien obey. Et à l'heure de sa mort leuerent les plus terribles & horribles vents, qu'on auoit oncques veu, dont plusieurs gens disoient ce que bon leur sembloit.

Les trefues dont dessus est fait mention, feurent publiées en Guyenne, où estoit le Marechal de Sancerre.

Et apres ce , plusieurs brigans & gens de guerre, se meirent 1383.
soubdainement sus , & se meirent sur les champs , sans ce
que le dict Mareschal s'en donnast garde. Et veindrent
frapper sur le dict Mareschal & ses gens , & le cuideront
tuer & meurtrir. Mais vaillamment il se defendit, & y eut
vne bien dure & aspre besongne. Et n'estoient pas les
François au quart autant que les autres. Et trouua moyen
le dict Mareschal de se retraire & ses gens. Et y en eut
d'un costé & d'autre de morts. Et estoit pitié des maux
que faisoient les dicts de Guyenne , de piller , robber &
prendre places , & faisoient guerre à toutes personnes,
où ils pouuoient. Et estoit commune renommée que les
Anglois le faisoient faire. Car ils sont cauts & malicieux,
& en telles manieres ont accoustumé d'vser de paroles ambi-
gues & diuerfes. Et par effect monstroient que leurs paro-
les, n'estoient que vne maniere de faintise sans ferme volonté.
Et au temps passé, plusieurs fois l'ont fait.

Et en ce temps ou enuiron , le Duc Louys de Bourbon
se partit de ce Royaulme pour aller en Barbarie. En sa
compagnée estoient le Comte de Harcourt , & le Sei-
gneur de la Trimouille , & autres iusques au nombre de
huiet cents cheualiers , escuyers , & plusieurs autres de
nations estranges. Et vers Africque feit de grands dom-
maiges aux Sarrafins , vaillants en armes , & tous les iours
y auoit escarmouches , & de belles armes faictes. Et y
feut six sepmaines , en grande souffreté & indigence de
viures , & auoient les Sarrafins retrainct tous leurs viures en
Africque. Et tellement que le dict Duc Louys & les Chre-
stiens feurent contraincts de leuer leur siege qu'ils auoient
mis , & retourner en leur pays.

L'an mille trois cents quatre vingts & quatre , les tref- 1384.
ues qui auoient esté pourparlées entre les Ducs de Ber-
ry & de Lanclastre à Calais , feurent derechef publiées
& par terre & par mer , & assez competemment gar-
dées.

Et delibera le Duc de Berry d'aller visiter le Pape en Aui-
gnon. Et en y allant, il veint nouuelles au dict Duc que les pai-
sans, laboureurs, & gens mecaniques en Auuergne, Poictou,
& Limosin , se mectoient sus , & tenoient les champs , & fai-

1384.

soient maux innumerables, & feirent vn Capitaine nommé Pierre de Bruyeres. Et quand ils trouuoient nobles gens, ou bourgeois, ils meſtoient tout à mort, & les tuoient. Ils rencontrerent vn bien vaillant homme d'armes & noble d'Eſcoſſe, & luy meirent vn bacinet tout ardent ſur la teſte, & piteuſement le feirent mourir. Ils preindrent vn prebſtre, & luy couperent les doigts de la main, luy eſcorcherent la couronne, & puis le bouterent en vn feu, & le bruſlerent. Ils trouuerent vn hoſpitalier, & le preindrent, & pendirent à vn arbre par les aiſſelles, & le tranſpercerent de glaiues, viſetons, & ſagettes, & ainſi mourut. Et ne ſçauoit-on ſonger, dire ne penſer maux, qu'ils ne feiſſent, & les plus grandes cruauitez & inhumanitez que oncques feurent faiſtes. Et pource le Duc de Berry aſſembla des nobles & des gens de guerre, dont il fina aſſez aiſément, & ſcut où les dictes communes eſtoient. Et à vn matin frappa ſur eux, & ne feirent gueres de reſiſtence, & legerement feurent deſconfits, & grand foiſon en y eut de tuez ſur le champ, & de prins, leſquels feurent tous pendus. Et les autres ſe meirent en fuite, & retournerent à leurs maiſons labourer, comme ils faiſoient parauant, & feurent delaiſſez, & leur feut tout pardonné. Et de ceſt exploict, feut le Duc de Berry moult loüé, & recommadé, & ſ'en alla outre vers le Pape. Lequel quand il ſçeut ſa venüe, il enuoya des gens de ſon Palais & ſeruiteurs, & ſi enuoyerent tous les Cardinaux, & feut grandement & honorablement recou par le Pape, lequel le feſtoia, & feir feſtoier en pluſieurs & diuerſes manieres, & monſtra à chaſcune fois qu'il alloit deuers luy, ſon Palais, & ſes joyaux, & treſlonguement parloient enſemble, & ſe faiſoient treſbonne chere. Le Duc de Berry voulut prendre congé du Pape. Car il auoit à faire en pluſieurs manieres pour les beſongnes du Roy, & du Royaume. Et au partir, n'y eut ſi petit ſeruiteur du Duc, à qui le Pape ne feiſt donner aucune choſe. Et au Duc donna vne bien pretieue choſe, c'eſt à ſçauoir vne partie des clous dont noſtre Seigneur feut crucifié.

1385.

L'an mille trois cents quatre vingts & cinq, il y eut aucune rumeur & renommee, que le corps de Monſeigneur Saint Denys, n'eſtoit pas en l'Abbaye ou Eglise Saint Denys. Et diſoient aucuns religieux de eſtrange pays, qu'ils l'auoient en

leur pays & Eglise. Et y eut aucunes enquestes faictes, & trouua on qu'il estoit en ladicte Abbaye de Saint Denys en France. Et en signe de ce, on ouurit la chasse, & trouua on les enseignemens dedans, par lesquels apparoissoit, que les dictes reliques estoient dedans; & y eut de beaux miracles. Car il y auoit vn homme enragé ou demoniacque, terriblement vexé & trauaillé, qui feut mené deuant le crucifix, & de là, deuant les corps saincts, & y eut des religieux faisans oraisons & prieres, requerans l'aide des corps saincts, & feut tout guairi, & ne luy souuenoit de chose qu'il eust faicte ou dicte, durant sa maladie. Il y auoit le fils d'une bonne femme, auquel vne espine estoit entrée dedans l'œil, & disoient les chyrurgiens qu'il n'y auoit remede, & qu'il perdroit l'œil, & elle le voüa, & mena à Monseigneur Saint Denys, & feut de tout point soudainement guairi. Et vn homme y eut, qui feut mors d'un chien enragé, tellement qu'il deuint hors du sens & enragé, si feut mené deuant la chasse de Saint Denys, & tantost recouura santé.

En ce temps vn Sarrafin Prince des Turcs nommé l'Amaurabaquin, auoit promis & voüé au Souldan de Babylone de faire guerre aux Chrestiens, & qu'il auoit songé que Appollon luy apportoit, & bailloit vne moult belle couronne, laquelle e douze personnes portans la croix adoroient. Et luy sembloit que ce feussent religieux de Saint Iean de l'hospital, & que la lueur & resplendisseur de la dicte couronne alloit iusques en Occident. Et de fait se meit sus, & feist guerre mortelle aux Chrestiens iusques à bien dix iournées, & conquesta tout le pays, & feist tellement qu'il meit l'Empereur de Constantinople en telle necessité qu'il fallut qu'il se rendist tributaire à luy, & en auoit tous les ans certaine pension.

Le Roy d'Armenie, qui estoit vaillant Roy, saige, prudent, & riche, feut tellement vexé & trauaillé des Turcs, qu'il feut contrainct à soy partir de son Royaume, & delibera de s'en venir vers le Roy. Et sur la mer, eut moult à faire par les terribles vents & tempestes. Et finalement apres plusieurs vexations & trauaux, arriva en France. Si veint deuers le Roy, où il feut moult honnorablement receu, & luy feist le Roy vne tres-grand chere, en l'accolant, & baisant, & ordonna, &

1385. voulut que à ses despens son Estat feust tenu, & ainsi faire le promet le Roy.

Côme dessus ha esté touché, le Duc Louys, soy disant Roy de Sicile, estoit allé vers Naples, & eut bien à faire à passer les montaignes, & y feir grande perte de gens, & de biens. Car les premiers qui passioient, aussi tost qu'ils estoient oultre, les Lombards les destruisoient, & mettoient à pied. Et pareillement ceux qui passioient les derniers, estoient destrouffez, & en y eut de morts aucuns. Et quand ils feurent passez, encores feurent ils plus esbahis. Car Charles qui se disoit Roy de Sicile, auoit tellement fait retraire les gens & viures, qu'ils ne trouuoient que mager pour eux, ne pour leurs cheuaux, & estoient en grande pauureté & misere. Le Roy Louys enuoya à Charles luy signifier, que la Royné l'auoit adopté à son fils, & donné le Royaume qui luy appartenoit, en luy requerant qu'il luy voulust laisser, sans luy donner aucun empeschement. Et promptement le dict Charles luy fait response, que le Royaume luy appartenoit par succession, & que son intention n'estoit pas de luy laisser : mais l'empescheroit & luy resisteroit en toutes manieres possibles. Et lors le Roy de Sicile estant en grande indigence, & perplexité d'auoir conseil qu'il auoit à faire, veu que leurs cheuaux mouroïent, & que toutes leurs jolietez estoient vendües, & à peine pouuoient-ils auoir du pain d'orge ou d'espeautre, ou trouuer moulins pour mouldre, l'enuoya sommer & requerir qu'il le voulust combattre, & plusieurs fois y enuoya, & bien par dix fois, & Charles tousiours vsoit de saintes paroles couuertes. Et vne fois iura & promet de le venir veoir en champ. Et pource le Roy Louys cuidant que son aduersaire le veint combattre, lequel estoit en la Cité de Barlette, alla deuant en belle bataille arrangée. Et estoient les François assez bien armez, mais petitement habillez, & tellement que le Roy n'auoit qu'une cotte d'armes de toille, paincte seulement. Charles voulut accomplir sa promesse de le veoir aux champs, & partit par vne des portes de la ville, & cuidoient les François qu'il les veint combattre, mais il rentra par vne autre porte. Le Roy Louys se voyant illudé de son aduersaire, & en la necessité dessus dite, & que en son Ost auoit forte mortalité, delibera de s'en partir & retourner. Et de courroux & desplaisance

mourut, & alla de vie à trespassement le vingt & vniesme iour de Septembre. On meit son corps en vn coffre de plomb, & luy feit-on ses obseques possibles selon l'aduanture. Et au regard de ses gens tant nobles que non nobles, ils s'en retournerent à grand peine à pied, chascun vn baston en leur main, & estoit grand pitié de les veoir. Et ainsi toute la cheuance que le Roy Louys auoit eu du Royaume, qui estoit merueilleuse, feut perdue. Et ce feut bel Exemple à Princes, de ne faire telles entreprinſes, si on ne ſçait bien comment.

Or est vrai, que le Roy Louys de Sicile, conſiderant la grande despence qu'il auoit esté neceſſité de faire en Prouence, & conquerir la Comté de Prouence, & les pertes qu'il auoit eu à paſſer les monts, enuoya Meſſire Pierre de Craon, auquel moult il ſe fioit, en France vers la femme fille du Comte de Blois, afin d'auoir argent. Car il luy en auoit laiſſé vne partie. Laquelle bonne Dame, bailla au dict Meſſire Pierre ce qu'elle auoit. Et meit le dict de Craon à ſoy partir plus qu'il ne deuoit, & veint à Veniſe bien grandement & orgueilleuſement habillé. Et là, ſçeut la mort du Roy Louys, dont comme on diſoit, il feut bien joyeux, & ſ'en retourna, & veint en grands pompes à Paris. Et vn iour entra au Conſeil du Roy, auquel estoit Monſeigneur de Berry. Et quand il veid le dict de Craon, il luy dit, Ha faulx traître, mauuais & deſloyal, tu es cauſe de la mort de mon frere. Si tu euſſes faiſt diligence, de luy porter l'argent que tu auois receu, les choſes autrement euſſent aduenües, en diſant Prenez-le, & que iuſtice en ſoit faiſte. Mais il ne feut pas prins, ne arreſté. Car il n'apparoifſoit en rien, de ce que Monſeigneur de Berry diſoit.

En la diſte année, depuis le printemps iuſques en Aouſt, y eut ſi grande ſechereſſe que merueilles, tellement que tous les biens de la terre, feurent comme de nul fruit. Et depuis le dict moys d'Aouſt iuſques en Mars, y eut ſi merueilleux & ſi mauuais hyuer & meſchant, que tous les raisins & autres biens de la terre, feurent pourris. On faiſoit diligemment durant le dict temps proceſſions, mais rien n'y vallut.

Au dict temps les Anglois feirent ſçauoir qu'ils estoient

1385. contents qu'on s'assemblast derechef pour aduiser si on pourroit trouuer traité entre eulx & les François. Et pour ce faire, enuoyerent le Duc de Lenclastre à Calais. Le Roy alla en pelerinage à Sainct Denys, & en sa compaignée estoient ses Oncles. Et de là enuoya le Duc de Berry vers Calais en bien grand estat & pompe, & y eut tentes tendües & dressées. Et quand les Ducs estoient assemblez, faisoient tresbonne chere, & disnoient & souppoient le plus souuent ensemble, & tous seuls deuisoient, ainsi que bon leur sembloit. Et aucunesfois parloient du fait de trouuer traité & accord. Et se mettoit le Duc de Berry fort en son debuoir, faisant plusieurs offres grands. Mais le Duc de Lenclastre n'y vouloit entendre. Et auoit le Duc de Berry tres-grand desir d'auoir paix bonne & ferme. Et feut ordonné que par tout on feist processions, & deuotes prieres à Dieu pour auoir paix. Mais par la maniere que tenoient les Anglois, qui sont caults & malicieux, & de la condition dessus declarée, apparoissoit euidemment qu'ils n'auoient intention aucune d'entendre à paix. Et pource s'en retourna à Paris, le Duc de Berry deuers le Roy. Et se disposa d'aller es pays, dont il auoit le gouuernement, vers les marches de Languedoc & de Guyenne. Et feit mandement de gens de guerre, & en assemblea competemment.

1385. L'an mille trois cents quatre vingts & cinq y eut mutation de monnoye. Et disoit-on que le Roy, y auoit merueilleux profit, & au grand dommaige du peuple, & de la chose publique du Royaume. Ety eut de grands murmures tant de gens d'Eglise, que nobles, marchands & autres. Et la faisoit-on plus foible, que celle qui auoit parauant couru. Et à peine la vouloit-on prendre, & mesinement les créditeurs, à qui estoit argent deu de prest, de rêtes, & autres manieres de debtes. Et disoit-on, qu'il n'estoit ja mestier de la müer, veu que le Royaume estoit opulent & riche. Toutesfois la chose demeura en la maniere qu'elle auoit esté ordonnée. Et donna-on cours à la monnoye qui souloit estre, pour certain pris.

Mariage feut traité entre le Comte de Neuers, & la fille du Comte de Hainault, & le fils du Comte de Hainault, & la fille du Duc de Bourgongne, afin que alliance feust faite ferme & stable, & à ce qu'il se declarast au Roy, & qu'il se ioignist à faire guerre.

re guerre aux Anglois. Lesquelles choses feurent iurées & 1385.
promises. Et feurent les nopces à Cambray. Et y eut grand feste, & belles joustes, Et combien que les Roys n'ayent pas accoustumé de eulx exercer en telles manieres de joustes, toutesfois le Roy voulut joustier contre vn nommé Colart d'Espinau, fort jousteur réputé. Et de fait jousta, & se porta tres-vaillamment, & de tous en feut loué & prisé.

Le Roy de Navarre eut intention de faire empoisonner les Ducs de Berry & de Bourgongne, & de la matiere parla à vn nommé Iean Destan Anglois, & luy feit de grandes promesses en cas qu'il le feroit, & luy offrit bailler argent promptement. Lequel Destan luy promet d'en faire son debuoir. Et ainsi il eut argent comptant assez largement. Et feit faire le dict Roy de Navarre vne pouldre, laquelle il bailla au dict Destan. Laquelle estoit de telle force & vertu, que si vne personne en eust mangé, tant feust petit, il feust entré en vne chaleur, que les cheueux & poil de la teste luy feussent cheus, & au bout de trois iours feust mort, & allé de vie à trespassement. Et mangeoient souuent les dictz deux Ducs ensemble. Aussi estoient-ils freres, & fort s'entr'aimoient. Et toutes & quantes fois qu'ils debuoiert dîner ou soupper l'un avec l'autre, tousiours ce Iean Destan frequentoit les lieux où on dresseoit la viande, & plusieurs & diuerses fois y veint, & tellement que aucuns de leurs seruiteurs eurent imagination, que le dict Destan qu'ils ne congnoissoient point, & ne sçauoient qui il estoit, n'y venoit point pour bien. Et pource le feirent prendre, & mettre en prison, & faisoit trop bien la maniere d'estre innocent, & qu'il n'estoit venu que pour veoir l'honneur de la Court, & apprendre la forme de seruir. Toutesfois il feut interrogué, & aucunement aux interrogations varioit, & pource on luy monstra la question, & incontinent apres confessa ce que dessus est dict. Et pource feut decapité, & escartelé.

Le Roy estoit encores à marier, & plusieurs grands Seigneurs raschoient fort à auoir son alliance, & non sans cause. Et enuoya-on en plusieurs & diuers pays peintres, pour luy apporter au plus pres que faire se pourroit, les sphisionomies de celles dont on luy parloit. Et finalement celle qui plus luy pleut, feut Isabeau de Bauiere, qui estoit belle, ieune, & gente, & de tresbelle maniere.

H

1585.

En ce temps auoit en France de vaillants chevaliers, & escuyers, & de gens de trait, & bien largement. Et sembloit aux Capitaines & Chefs de guerre, que si vne fois ils descendoient en Angleterre, que tres-aïsement la conquisteroient. Et tant que les paroles allerent iusques en la presence du Roy, lequel estoit ieune, & de vaillant courage. Et assembla ceux de son sang, & aussi des Capitaines. Et feut conclud, d'entreprendre le voyage, & descendre en Angleterre. Et feurent mis en escript les choses necessaires pour executer ce qui auoit esté entrepris, & mesmement de faire diligence d'auoir nauires. Lesquelles choses ne se pouuoient executer, ne faire, sans grande finance. Et pource feut mise sus vne grande & excessiue taille. Laquelle feut cause que vne grande partie du peuple, s'en alast hors du Royaume en autres pays. Et estoit pitié de l'exaction. Car on prenoit en diuers lieux à peu pres tout ce qu'on auoit vaillant, sans quelque consideration, ou auoir regard à la faculté des personnes. Grands nauires & de diuers pays feurent assemblez. Et estoit renommée, qu'il y en auoit si grande quantité, que on en eust fait vn pont à passer iusques en Angleterre. Et feit-on grand prouision de viures, habillemens de guerre, & autres choses necessaires. Et estoient les choses bien ordonnées pour passer. Et toutesfois tout veint à neant, & ne porterent les dictes prouisions aucun fruit. Et disoit-on, & estoit commune renommée, que aucuns Seigneurs du sang de France en feurent cause. Et que la grosse somme de deniers, qui feut levée à cause de la dicté taille, feut entre eux butinée. Et qui pis estoit, aucuns auoient en argent & grands dons des ennemis, pour rompre la dicté entreprise.

Quand Messire Jean de Vienne, Admiral de France, veid & sceut que l'entreprise dessus dicté estoit rompue, il feut moult desplaisant, & non sans cause, si feurent plusieurs autres Capitaines. Le dict Admiral delibera d'assembler gens, & de passer en Escosse, pour faire guerre à l'aide des Escossois aux Anglois, & feit tant qu'il eut soixante nauires & autres vaisseaux, garnis de gés de guerre & de viures, & autres choses necessaires. Et se mit sur mer environ apres le commencement du printemps, & y feut iusques au commencement d'esté, auant qu'il peust entrer en Escosse. Pendant lequel temps les Anglois à bien grosse puissance, & plus deux fois que n'estoient les

François, se meirent sur mer pour combattre les François, 1385. & auoient fait faire vn vaisseau tout fourré, farcy & garni de poix, pour le faire ioindre aux vaisseaux des François. Et leur sembloit que par ce moyen avec autres habillemens qu'ils auoient, qu'ils brulleroient & arderoient les vaisseaux des François. Cependant y eut merueilleuses tempestes sur mer de vents & tonnerres, & tellement que les aucuns vouloient comme que ce feust, retourner en France. Et par aucun temps apres, le temps s'appaisa, & cesserent les tempestes, & feut le temps bien clair & net. Et en vne belle grefue sur la mer, descendirent les François pour eux aisier. Et la plus grande partie de la compaignée de ceux qui là estoient, estoient d'opinion & volonté de retourner en France. Mais le dict Admiral, qui estoit vn vaillant cheualier & courageux, commença à parler à eulx si gracieusement & doucement, & tellement que les principaux, qui estoient d'opinion de retourner, delibererent d'aller en Escosse avec le dict Admiral. Les gens d'Eglise connoissans la vaillâce du dict Admiral, & son entreprise, & aussi le peuple, faisoient belles processions & bien deuotes, en priant Dieu pour luy, & sa compaignée. Ils allerent tant par mer, que ils veindrent en Escosse, & arriuerent à Edimbourg. Et allerent le dict Admiral & aucuns de sa compaignée vers le Roy d'Escosse, & luy feirent la reuerence & l'honneur qui luy appartenoit, en luy exposant qu'ils estoient là venus pour faire guerre aux Anglois en sa compaignée, & pour l'aider à les combattre, en le priant & requerant que le plustost qu'il pourroit, il liurast bataille aux Anglois, & ils estoient prests & disposez, d'y employer leurs personnes. Et sembloit par ses manieres, qu'il n'estoit pas ioyeux de leur venue. Toutesfois il respondit, qu'il falloit bié trois semaines auant qu'il peust auoir mädé & assemblé ses gens, & qu'il en feroit diligence. Et feit crier que aux François, on baillast viures en les tresbien payant, & non autrement. Et seulement le Roy d'Escosse bailla trois mille combatans aux François, lesquels delibererent à la dicte compaignée passer outre, & sçauoir s'ils trouueroient les Anglois, & se partirent ensemble, & passerent par merueilleux deserts, & tant cheminerent, qu'ils arriuerent en Angleterre, en vn pays aucunement peuplé, & où auoit aucunes forteresses, & feirent tout ce que ennemis ont accoustumé de faire, en boutät feus,

1385. & prenant tout tant qu'ils pouuoient & trouuoïent, & tuoient ceux qui resistoient. Et teindrent par huit iours les champs; sans qu'ils trouuassent empeschement, ne gens qui les voulussent combattre. Et veindrēt deuant vn chasteau nommé Drouart, que les Anglois & Escossois tenoient cōme imprenable. Et aduisa l'Admiral la dictē place, & luy sembla que par vn endroict elle estoit prenable d'assault, & en parla à ses compaignons, lesquels feurent tous d'opinion qu'on l'assaillist. Les Escossois au contraire disoient que ce seroit folle, & qu'ils la tenoient cōme imprenable. L'Admiral feit ses preparatoires, & feit sonner ses trompettes à l'assault. Et combien qu'il y eust gens de defense dedans, toutesfois les François assaillirent si vigoureusement & asprement la place, qu'ils y entrerent, & la gaignerent à la veüe des Escossois qui les regardoient, sans faire semblāt d'aider aux François, & estoient comme statuēs de pierre, esbahis de la grand'vaillāce des François. Autres places y auoit, qu'on tenoit fortes au pays: mais rien n'arrestoient deuant eulx. Et y gaignerent assez competemment. Et fort doubtoient les Escossois, qu'ils ne leur jouassent vn mauuais tour, & se separerent des François. Toutesfois ils trouuerent tousiours le Comte du Glas bon & loyal enuers eulx, & les aidoit & confortoit en toutes les manieres qu'il pouuoit. Les exploits que faisoient les François, veindrent à la congnoissance du Roy d'Angleterre, lequel feut fort sommé & requis par les gens des dictes marches, qu'il voulust resister à l'entreprise des François, & qu'il y meist remede. Et diligemment assembla des gens de guerre, le plus qu'il peut, & escriuit à l'Admiral en luy improperāt sa folle entreprise d'estre venu en son pays, & que en brieif il luy feroit monstrier. L'Admiral reçeut le plus honorablement que il peut, le messaige qui estoit venu, en luy donant largement du sien, & escripait au Roy d'Angleterre, qu'il ne se debuoir point esbahir, s'il estoit entré en son pays, & qu'il ne faisoit chose, que ennemi ne deubt faire à autre. Et que si en sa presence il vouloit qu'on feist armes, il offroit à les faire faire de dix François contre trente Anglois, ou de cent François contre trois cents Anglois. Et le Roy d'Angleterre respondit, que telles offres n'estoient ne raisonnables ne faisables, & ne les acceptoit point. Mais il assembla foison de gens, & les enuoya es marches où estoit le dict Admiral. Et quand il se

ſceut, il parla aux Eſcoſſois bien & doucement, en leur priant ^{1385.} & requerant que par vertu des alliances, que les Roys de France & Eſcoſſe & leur pays auoient enſemble, qu'ils les vouluſſent aider & conforter. Si reſpondirent les Eſcoſſois, que là où les Anglois les ſuiuroient iuſques à l'entrée d'Eſcoſſe, & qu'ils ſ'efforçaſſent d'y entrer, ils reſiſteroient le plus qu'ils pourroient, & recepueroient les François. Quand l'Admiral ſceut la venue des Anglois, & qu'ils eſtoient ſi groſſe puiſſance, & plus dix fois qu'il n'auoit de gens, & que les Eſcoſſois n'auoient pas intention de leur aider à combattre les Anglois, ils ſe retrahirent vers les marches d'Eſcoſſe en la Comté du Glas, où ils feurent receus. Quand les Anglois ſceurent qu'ils eſtoient au dict pays, ils ſ'en retournerent, & ne pourſuiuirent plus les dictſ François.

Es dictes marches feurēt par aucun temps les François pour eux aiſier, & leur faiſoit-on bonne chere. Et commencer l'Admiral à frequenter les nobles Dames & Damoifelles du pays, leſquelles eſtoient bien joyeuſes de veoir les François, & ioyeuſement les receurent. Et tellement que l'Admiral faccointa d'une Dame prochaine parente du Roy, & eſtoir aucune renommée qu'il auoit ſa compaignée. Si feut aduertit par la dictē Dame qu'il ſe ſaluaſt, où il eſtoit en aduenture d'auoir à faire de ſa perſonne, & ſes gens auffi. Et tantost & bien diligemment enuoya viſiter ſes vaiſſeaux, & les meſtre à point. Et le plus ſecretement qu'ils peurent, luy & ſes gens entrerent dedans, & ſ'en veindrent en France. Et ne rapportèrent aucun profit, mais ſeulement renommée de vaillance & hardieſſe, & ſans comme nulle perte de gens. Et par le Roy, les Seigneurs & autres feurent bien recens.

Au tēps que le dict Admiral eſtoit allē en Eſcoſſe, pource que l'armée qui vouloit paſſer en Anglētēre, eſtoit rōpiē, il demeura à l'Eſcluse trefgrand ſoiſon de beau & grand nauire. Et y eut aucuns de la ville de Gand, leſquels meys d'une grāde mauuaiſtiē, delibererent d'ardre le nauire, & y faire bouter le feu. Et celui qui en auoit la charge, eſtoit homme de baſeſtat, nommé Francon, & luy feir on de grandes promeſſes. Et de faire ſ'en veint à l'Eſcluse, cuidant exēcuter ſa mauuaiſe volōtē, & luy & ſes aliez arracherent les serrures & verrouils des portes. Le Capitaine de l'Eſcluse ſ'en appercent, & le feir

1385. ſçauoir au Roy qui eſtoit au pays. Le Roy manda qu'on preint les malfaiſteurs, & qu'on en feiſt bonne iuſtice. Mais ils ſ'enfuirent & partirent de la ville, & ſe retrahirent en la ville de Dam, en laquelle auoit pluſieurs Anglois, qui ſ'en debuoient aller en Anglaterre, leſquels ceux de Dam reueindrent, doubtans que le Roy ne leur donnaſt à faire, comme il feiſt. Car il ordonna que le ſiege feuiſt mis deuant la ville, ce qui feut faiſt. Et quand ceux de dedans, veirent qu'on y meſtoit le ſiege, ils commencerent à ſe mocquer des François, & leur diſoient pluſieurs injures, opprobres, & villenies. On y feiſt pluſieurs affauls, qui peu proſiterent. Car ceux de dedans eſtoient vaillants gens, & fort ſe defendoient, & merueilles d'armes faiſoient, & auoient fort trait, & alloient les pierres de leurs canons iuſques aux tentes du Roy. Les François voyans leurs manieres, feirent drefſer leurs canons, & feirent faire engins de bois nommez chars, pour approcher des murs, tellement que ceux de dedans, ne les euſſent peu greuer. Et quand les aſſiegez congneurent les preparatoires que faiſoient les François, & puis que le Roy y eſtoit en perſonne, iamais ne partiroyent iuſques à ce qu'il les euſt, ils ſ'aſſemblerent, & conclurent, & delibérerent, ſils pouuoient auoir traité qu'ils y entendroyent. Et pour ce faire, ils enuoyerent deuers le Roy, & offrirent bailler la ville, & qu'on les laiſſaſt aller eulx & leurs biens ſaulues. Et leur feut reſpondu, que le Roy auroit aduis ſ'il le feroit ou non, & delayoit on à faire reſponſe. Et doubtoient aucuns de dedans que les delais ne ſe feiſſent, que pour leur faire dommaige. Or il y auoit d'un coſté de la ville mareſts tres-grands, & ne cuidoient pas les François qu'on les peuiſt paſſer, & pource n'y auoient ils point mis de garde, & par là aucuns & comme tous les Anglois ſ'en allerent. Et au matin enuiron le poinct du iour ceux qui tenoient le ſiege, ſ'en apperceurent, & afin que plus n'en partiſt par là, feut mis un ſiege par deuers les dicts mareſts, & feut la ville tout alenuiron aſſiegée, dont ceux de dedans feurent bien esbahis. Et quand les murs feurent aucunement batus, les François conclurent d'afſaillir la ville, combien que encores dedans y auoit de vaillants gens. Et apres aucuns preparatoires faiſts, neceſſaires à afſaillir, y eut faiſt aſſault dur & aſpre, & de grandes armes faiſtes. Et finalement feut d'aſſault la ville priſe, &

fans guerres grand' perte de François, veu la grande vaillance & defense de ceux de dedans. En ceste ville y auoit de grandes richesses & largement. Tout feut pillé & pris par les François, & tuoient & mettoient à mort tout ce qu'ils trouuoient. Le Roy tantost feut crier que sur peine de la hart on ne tuaist les desarmez, & y eut grande occision. Les vns se cuiderent sauuer, & allerent par vne des portes: mais Clifson Connestable les suiuit, & ne cessa l'on de tuer des ennemis iusques à la nuit. Et Francon qui debuoit bouter le feu au nauire, se retrainit, en vne bien forte place à six milles de Gand. On delibera d'y aller l'assieger, mais quand il le sceut, il s'en alla retraire dedans Gand. Les François veindrent deuant ladicte place, & la preindrent, & feut toute rasée iusques à terre. Et est chose comme incroyable des grandes richesses, que les François y trouuerent. Le Roy voulant pourueoir à la garde & seureté des nauires estans à l'Escluse, feut faire vne belle & grosse tour à l'Escluse au haure. Et depuis comme on dict, donna le Roy le dict nauire, & la ville de l'Escluse au Duc de Bourgongne son oncle.

On rapporta au Roy que sur les marches de Zelande auoit vn pays assez fort, où il y auoit beaux pasturaiges, & largement viures, lesquels fauorisoient les Gantois, & s'estoient preparez à resister à la puissance du Roy. Si ordonna le Roy qu'on y allast, & qu'on y menast son armée. Forte resistance y eut faicte par ceux du pays, nonobstant laquelle les François y passerent & entrerent. Et trouuerent vn bien riche pays plain de biens, tant de viures pour eux & leurs cheuaux, que autres richesses. Et preindrent ce qu'ils trouuerent, & y eut grande occision de gens. Car ils s'estoient mis en defense, cuidans resister. Et si y eut des prisonniers pris des plus riches. Et curdoient ceux qui les preindrent, les mestre à finance, & auoir quelques grandes sommes d'argent: mais le Roy les feut prendre, afin que de eulx punition en fust faicte. Mais plusieurs des Princes & Seigneurs estans en la compaignée du Roy, luy firent requestes & prieres qu'il leur voulust pardonner la mort, & ils se declareroient ses subiects. Laquelle chose le Roy estoit prest de faire, & leur feut dict. Mais ils respondirent qu'ils aimoient mieux mourir, & que apres leur mort, leurs os & leurs pouuoient, resisteroient à ce qu'ils ne feussent en l'obeis-

1385. sance du Roy, & tres-constamment persisterent en ceste opinion & volonté. Et pource feut ordonné, que tous seroient decapitez. Et en y eut l'un d'eulx cuidant eiter la mort, lequel s'offrit à les decapiter, & les decapita. Et le plus loing qui feut en degré de ceux qu'il decapita, estoit son arriere-cousin. Et pource le Roy, veuë l'inhumanité d'iceluy, & le courage qu'il eut de decapiter ses parens, le feist mourir, & non sans cause.

En Auignon avec le Pape auoit trente six Cardinaux, & si n'estoit obei en toute Chrestienté, que à peine en France. Il n'y auoit celuy qui ne voulust mener vn grand estat, & tout le principal du profit qu'ils pouuoient trouuer ne auoir, venoit du Royaume de France. Et toutes manieres qu'ils pouuoient trouuer d'auoir argent, ils le faisoient. Et lors y auoit vn Abbé de Saint Nicaise de Rheims, bien notable homme, auquel le Pape commanda qu'il veint en France, & que de tous benefices il preint la moitié des reuenus, pour estre employée à renir les estats de luy & ses Cardinaux. Et que ceux qui desobeiroient, il les priuast de leurs benefices. Lequel Abbé obeit au commandement du Pape. Et s'en veint en France, & se transporta en Bretagne, & Normandie, pour executer sa commission. Et faisoit de bien aspres contraintes, & grandes sommes de deniers commençoit à exiger, & des benefices mesmes d'aucuns escholiers estudians à Paris, lesquels se plainquirent à l'Vniuersité. Et feut conclud, que le Recteur, & aucuns deputez iroient deuers le Roy. Et y veindrent, & y eut vne proposition bien notable faicte par vn Docteur en Theologie, & monstra que la chose n'estoit ne soustenable ne faisable par le Pape. Et leur feut respondü, que le Roy y pouruiroit. Et y eut Ordonnances faictes, par lesquelles feut defendu, que nul or, ne argent, ne se transportast hors du Royaume. Et oultre qu'on faist tous les benefices, & que les fruiets feussent mis en la main du Roy. Et que le tiers en feust mis és reparations des maisons & edifices, l'autre tiers à payer les charges, & l'autre au viure des personnes Ecclesiastiques. Et quand ils sceurent en Auignon ces nouuelles, ils feurent bien esbahis. Le Roy pour ceste cause enuoya vers le Pape Messire Arnould de Corbie, lequel exposa au Pape les complainctes que faisoient & auoient faictes au Roy l'Vniuersité, & les gens d'Eglise

glise touchant la dicte exaction. Et le Pape & les Cardinaux 1385. congnoissans que à bonne & iuste cause, ils se plaignoient, promeirent cesser, & de faict cessèrent les dictes exactions. Et s'en retourna le dict de Corbie à Paris deuers le Roy. Et ainsi l'Vniuersité feut contente de la responce.

Le Roy apres la prise de la ville de Dam, s'en retourna à Paris, bié desplaisant de ce que l'entreprise, qui auoit esté faite de passer en Angleterre, auoit esté rōplie, & qu'on n'y estoit passé. Et donna congé aux gens d'armes qu'ils s'en allassent en leurs maisons, & qu'ils feussent prests de retourner au printemps. Cependant ceux de Bruges & de Ipse enuoierent deuers le Roy vn orfèvre bien eloquent, en priant & requerant au Roy qu'il luy pleust auoir bonne paix avec ses subiets de Flandres. A laquelle chose le Roy estoit fort enclin, & accorda d'y entendre. Et feut conclud qu'il enuoieroit à Tournay, & aussi vers les Flamends, & que là on aduiserait si aucun bon accord ou expedient s'y pouuoit trouuer. Et de faict, le Roy y enuoia de bien notables gens, & aussi feit le Duc de Bourgogne. Ceux de Gand y enuoierent cinquante personnes bien pompeusement habillées, tant en cheuaux que vestures & habillemens, dont les gens du Roy ne feurent pas bien contents. Car ils leur sembloit qu'ils deussent estre venus en toute humilité. Mais en paroles, langaiges, & manieres, ils se porterent si doucement & gracieusement, que toutes les gens du Roy & du Duc en feurent tres-contents. Et y eut accord & traité faict, dont on feit grand ioye. Et se meirent en l'obeissance du Roy & du Duc, selon les poincts contenus en la chartre faicte du dict traité.

En ce temps feut le mariage du Roy à Amiens, & de Dame Isabeau de Bauiere, & y eut ioustes & grandes festes faictes.

La disme de l'Eglise de Saint Denys en France, qui souloit estre de neuf cēts soixante & vne liures treize solds parisis, feut reduicte par le Pape à la requeste du Roy à quatre cents. Et à ceste cause l'Abbé feit faire deux images d'argent, l'une de Saint Nicolas, & l'autre de sainte Catherine.

Pierre de Courtenay, Anglois d'Angleterre, lequel estoit des plus prochains du Roy d'Angleterre en seruice, & auquel il se fioit moult, veint en France voulant faire armes contre le Seigneur de la Trimouille. Et se presenta en la presence du

1385. Roy au dict de la Trimouille, en luy requerant qu'il voulust accomplir ce qu'il requeroit. Et le Conseil du Roy respondit, que telles manieres de faire n'estoient à souffrir, ne point honnestes, veu qu'il n'y auoit point de matiere. Et le Seigneur de la Trimouille respondit qu'il le combatroit, & qu'il y auoit assez cause, veu qu'il estoit François, & Courtenai Anglois. Et feut iournée assignée à la cousture Saint Martin. Il y auoit des Astronomiens à Paris lesquels veindrent dire au Seigneur de la Trimouille, qu'il combatist hardiment. Et que au iour assigné, il feroit tresbeau temps, & qu'il vainqueroit son adversaire. Au iour assigné, ils apparurent en champ en la presence du Roy, & des Seigneurs, & faisoit vn temps tres-pluieux. Et quand ils feurent tous prests de besongner, & de faire armes, le Roy les feit prendre, & defendre qu'ils ne combattissent point. Et ainsi se departirent. Le dict Anglois s'en partit de Paris, & le feit le Roy deffrayer, & donner du sien bien & honnestement. Et s'en vint deuers le Comte de Saint Paul, qui auoit espousé la sœur du Roy d'Angleterre, & se vantoit qu'en la court du Roy, il n'auoit trouué François, qui l'eust osé combatre. Vn gentilhomme Seigneur de Clary estoit present, qui luy respondit, que s'il vouloit, il le combatroit le lendemain, ou quand il luy plairoit. Et estoit homme de petite stature, mais de grand couraige. Et en feut l'Anglois content, & iour assigné au lendemain, & comparurent le François & l'Anglois au champ, & combattirent bien & vaillamment. Et finalement l'Anglois feut blessé, & cheut à terre, & feut desconfit, & y eut le Seigneur de Clary grand honneur. La chose venue à la cognoissance du Duc de Bourgogne, il en feut tresmal content, & disoit que le dict de Clary auoit gaigné de mourir, & qu'il luy coupbast la teste, pour ce que sans le congé du Roy, il auoit fait armes, & combatu le dict Anglois. Et il respondit que ce pouuoit auoir lieu entre gens d'un parti: mais vn François pouuoit combatre vn Anglois son ennemy mortel, en tous les lieux qu'il le trouuoit. Toutesfois le dict de Clary, craignant le courroux & maltraitement du Duc de Bourgogne, se absentia, & en diuers lieux se larira, & mussa. Et à la fin, le Roy luy pardonna l'offense qu'il luy auoit peu faire, en faisant armes sans son congé.

1386. L'an mille trois cents quatre vingts & six, le Roy desirant

rouffours de passer en Angleterre, manda le Duc de Touraine son frere, & les Ducs de Berry, de Bourgogne, & de Bourbon, & autres Princes, tous deliberez de non plus entendre à aucun traité avec les Anglois. Quand le Roy d'Armenie sceut la dicte deliberation, il vint en la presence du Roy, & des dicts Seigneurs & du Conseil, & feit vne belle proposition, en monstrant le fait des ennemis de la foy, & la conquete qu'ils auoient fait, & les tirannies qu'ils faisoient aux Chrestiens. Et que le souverain remede estoit, que les Roys de France & d'Angleterre feussent bien vnus ensemble, & qu'ils estoient assez puissants pour resister à l'entreprise des Turcs, & les confondre & conquerir leur pays, en exhortant le Roy qu'il voulust encores entendre à faire paix. Et s'offroit à aller en Angleterre, en parler au Roy, de laquelle chose le Roy feut trescontent. Et dit, que le plus grand desir qu'il eust, c'estoit qu'il eust bone paix avec ses ennemis. De laquelle respon^{se}, le Roy d'Armenie feut tresioyeux. Et le plus tost qu'il peut, se mit à chemin pour aller deuers les Anglois. Et de fait, arriua en Angleterre, où il feut receu grandement & honnorablement, & vint en la presence du Roy d'Angleterre. Et là recita les causes de sa venuë. Et si en la presence du Roy, il auoit fait belle proposition, encores se porta il mieux, en monstra^{nt} quel profit la paix d'entre les deux Royaumes, pouuoit faire au bien de la Chrestienté. Et conclud le Roy d'Angleterre d'y entendre, & qu'il enuoyeroit à Calais de ses gens en certain temps. Et retourna le Roy d'Armenie deuers le Roy, & luy dict la response qu'auoist fait le Roy d'Angleterre. Et estoit le Roy tresioyeux d'y entendre. Et pource enuoya à Boulongne bië notable Ambassade. Et estoit le moyen le dict Roy d'Armenie, & là feurent six semaines. Et estoit merueilles de veoir l'orgueil des Anglois, & leur arrogance, & demandoient plus beaucoup, qu'ils ne souloient faire. Et par leurs manieres, apparoissoit euidement, qu'ils n'auoient aucune volonté d'accorder, ne traiter, & n'y eut rien fait. Si s'en retournerent les Anglois en Angleterre, & les François à Paris deuers le Roy, auquel ils reciterent les allées, venuës & paroles, qui auoient esté faites & dictes. Et estoit tout euident & clair, que les Anglois ne vouloient aucun accord, s'ils n'auoient tout ce

1386. qu'ils demandoient. Et cependant de Brest en Bretagne, & de Cherbourg en Normandie qu'ils tenoient, faisoient forte guerre sur la mer. Et leur resistoient les François, & estoient les frontieres bien garnies de vaillants gens, & tellement, que quand les Anglois sailloient des dictes places, le plus souuent bien chauldement & asprement estoient reboutez, iusques dedans leurs places dessus dictes à leur grande confusion.

Quand le Roy, ceux du Sang, & le Conseil sceurent & apperceurent la maniere des Anglois, ils conclurent de faire armée, & de passer en Angleterre. Et pour ce faire, estoit chose necessaire d'auoir argent. Et furent faicts gros emprunts des gens d'Eglise, & vne grosse taille sur le peuple, montans à grandes sommes de deniers. Et se chargea le Duc de Berry d'en faire les diligences. Et enuoya Monseigneur le Connestable de Clisson, en Bretagne, Messire Jean de Vienne, Admiral de France, en Normandie, & le Seigneur de Sompy, en Picardie, pour faire prouision de nauires, & aussi de gens. Et estoit commune renommée, que le dict Duc de Berry assembla assez gens, pour conquerir & combattre toutes nations estranges. Et feut ordonné, que tous se rendroient à certain temps à l'Escluse. Et pour auoir, quand on seroit descendu, quelque retraict, on feist faire certaines clostures de bois, en maniere de murs de ville, qu'on debuoit dresser au dict pays d'Angleterre. Et pour les choses dessus dictes accomplir, y eut de grandes mises & despeses.

Il feut grande renommée que le Duc de Bretagne fauorisoit fort les Anglois, & feurent trouuées certaines lettres de ce faisans mention, & y auoit tresgrande apparence. Et vint la chose à la congnoissance du Duc, lequel enuoya bien diligemment vne notable Ambassade deuers le Roy, en soy excusant, & monstrant que les dictes lettres ne veindrent oncques de luy, & que les Anglois les auoient contrefaites, pour luy donner charge. Et receut le Roy benignement son excusation, consideré mesmement qu'il feist dire, qu'il monstreroit si euidentement qu'il estoit bon François, qu'on s'en apperceuroit, & qu'on enuoyast à Brest en Bretagne, pour auoir la place, & qu'il y aideroit de tout son pouuoir. Mais plusieurs disoient, que ce n'estoit que fiction. Toutesfois le

Duc feit grand appareil de nauire bien garni, & feit affieger Brest sur la mer. Et sur les vaisseaux, feit faire chasteaux de bois, tellement que les Anglois par la mer n'eussent peu iſtre, ne eulx en aller. Et pareillement par terre feit faire grosses bastilles de bois, & meſtre gens dedans, & feit tout bien garnir de viures. Et estoient les choses tresbien disposées à auoir la place. Le Duc de Lancastre delibera d'aller en Espagne faire guerre, & assembla foison de gens de guerre, & grand foison de nauire, pour y aller. Et de fait, se meit sur mer, & feut prié & requis, que en passant il voulust leuer le siege par la mer, mis par le Duc de Bretagne. Ce qu'il promeit de faire. Et de fait approcha les marches de Bretagne, & veint vers la place où les vaisseaux du Duc de Bretagne estoient, les cuidant gagner, ou au moins faire departir, & par trois iours les assaillir: mais les Bretons si vaillamment se defendirent, que le Duc de Lancastre ne veint pas à son intention. Et se departit de l'entreprise, qu'il cuidoit faire, & preint son chemin en Espagne. Et feurent les Anglois dedans Brest tellement affamez, qu'ils estoient contraincts, & comme deliberez d'eux rendre, & laisser la place, n'eust esté que les Bretons feurent contraincts de leuer le siege, pource qu'ils n'estoient payez.

En cetéps y eut grand guerre entre le Roy d'Espagne & le Roy de Portugal, lequel estoit fort allié des Anglois. Et l'année de deuant le Roy d'Espagne à dix mille combatans, estoit entré au Royaume de Portugal, & y faisoit forte & aspre guerre, & veint deuant Lisbonne vne grosse ville de Portugal. Le Roy de Portugal assembla gens de toutes parts, & si auoit des Sarrafins & des Anglois. Et avec le Roy d'Espagne estoit Messire Geufroi de Roie, à tout huit cents hommes bien armez. Et feurent contents les Espaignols & les Portugalois de combattre, & se meirent sur les champs, & se rencontrerent l'un l'autre, & y eut dure & aspre bataille, & foison de morts d'un costé & d'autre, & finalement les Espaignols feurent descōſits, & s'enfuit le Roy d'Espagne. Et le Roy de Portugal encores nō contét d'auoir gagné la bataille, voulut faire forte guerre, & enuoya en Angleterre pour auoir gens, & en escripuit au Duc de Lancastre, lequel auoit espousé la fille de Pierre, qui se disoit Roy d'Espagne. Et se disposa le Duc de

1386. Lanclastre de venir en aide au Roy de Portugal , & passa par empres Brest, cōme dessus est dit. Quand la chose veint à la cōgnoissance du Roy d'Espaigne, il enuoia aussi hastiuement deuers le Roy de France, querir aide & secours. Le Duc de Bourbon, vn vaillant Prince s'offrit d'y aller , & d'y mener gens le plus qu'il pourroit. Et cependant qu'il faisoit son armée, le Roy y enuoia mille combatans estans soubz Messire Pierre de Villaines, & Oliuier de Glisquin , & firent grande diligence d'aller vers le Roy d'Espaigne. Dont il feut moult ioyeux , & les meit en garnison en ses villes. Quand le Duc de Lanclastre sceut que les François estoient venus , il feut bien esbahi, & leur enuoia dire que la chose ne touchoit le Roy de France, & que s'ils le vouloient seruir, il les contenteroit trestbien. Les François respondirent, que si la chose touchoit le Roy ou non, ils n'en auoient point à congnoistre , & qu'il leur auoit commandé qu'ils veinssent seruir le Roy d'Espaigne , & pour ce y estoient-ils venus, en luy obeissant , pour le seruir. Et commencerent à faire forte guerre, & aspre, & merueilleuse, & se monstroient bien les François estre vaillants en armes. Le Duc de Lanclastre considerant que aisément il ne pourroit pas venir à son intention , & que grandes nouuelles estoient de la venüe du Duc de Bourbon , & que dés auant son partement, il scauoit que les François debuoiert passer en Angleterre, & faisoient grand appareil, delibera d'entendre à trouuer moyen d'aucun traicté, & accord. Et y eut aucunes trefues entre les deux Roys , & finalement il feurent amis. Et auoit le Duc de Lanclastre deux filles, & les deux Roys estoient à marier, & eut le Roy d'Espaigne l'une des filles, & le Roy de Portugal l'autre. Et y eut paix & bon accord , & par ce moyen les François s'en retournerent, & ne feut aucune necessité que le Duc de Bourbon s'en allast en Espaigne. Et debuoit le dict Duc de Lanclastre porter des armes d'Espaigne vn quartier. Et tous les ans auoit certaine somme d'argent , à cause de sa femme qui estoit fille de Pierre, soy disant Roy d'Espaigne. Et apres ces choses , surueint vne merueilleuse & piteuse mortalitéés dicts pays, & tellement qu'on disoit , qu'il n'y demeura pas le quart du peuple qui y estoit. Et y moururent, la femme du dict Duc de Lanclastre & son fils. Et y eut sur la mer telle, & si grande tempeste, & vents merueilleux , que les naui-

res du dict Duc feurent toutes peries & perduës: toutesfois il 1386.
 feit diligence d'en trouuer d'autres, & en eut, & s'en retourna
 en Angleterre. Et y eut bien pitëuse venüe, quand on sceut la
 merueilleuse mortalité qui auoit esté, par le moyen de laquel-
 le plusieurs cheualiers & escuyers de bien estoient trespassez.
 Et ne scauroit-on à peine declarer la douleur qu'auoient les
 Dames & Damoiselles, & les enfans, qui estoient demeurez
 veufues & orphelins.

Le Roy se tenoit à Paris, & tousiours faisoit-on prepara-
 toires pour passer en Angleterre. Le Roy auoit vne soeur
 nommée Catherine, qui n'auoit que de neuf à dix ans. Mon-
 seigneur de Berry oncle du Roy, auoit grand desir que son fils
 l'eust en mariage, & enuoya vers le Pape pour en auoir dipen-
 se, laquelle il eut bien aisément. Et donna le Roy sa soeur au
 fils du Duc de Berry, & en fit le mariage.

Et apres se partit de Paris, & vint à Saint Denys faire ses
 offrandes. Et y eut difficulté s'il prendroit l'Oriflambe, & di-
 soient le plus des cheualiers & escuyers que non, & qu'elle ne
 se debuoit prendre sinon à la defense du Royaume, mais non
 mie quand on veut conquerir autre pays. Il se partit de Saint
 Denys, & vint à Senlis, & de là à Amiens, & de Amiens à
 Arras, es quelles citez il feut grandement & notablement
 receu, comme il luy appartenoit. Il feit enquerir s'il y auoit
 nauire prest. Et trouua-on, qu'il y auoit neuf cents nefes ou
 vaisseaux tous prests & garnis de viures, & huit mille cheua-
 liers & escuyers, & gens de trait & gros varles sans nombre.
 Et sembloit que les choses estoient bien fort apprestées pour
 passer. Et feut ordonné que par tout on feist prieres, & orai-
 sons, & processions, ce qui feut fait bien diligemment. On
 vint deuers le Roy luy dire qu'il attendoit trop à partir, &
 que tout estoit prest, & le temps doux & paisible. Et il respon-
 dit, qu'il attendoit son oncle le Duc de Berry, qui estoit à Pa-
 ris, auquel il manda qu'il s'aduanceast, Lequel Duc rescripuit
 au Roy qu'il feist bonne chere, & vescust ioyeusement sans
 partir. Les gens de guerre & autres de bonne volonté, estoient
 en grande desplaissance de ce qu'on ne parloit, veu que le tēps
 estoit propice, & conuenable, & estoient de tres-grand desir
 & affection de exploiter sur leurs ennemis. Et de tres-grande
 desplaissance commencerent à piller & rober, & destrouffer

1386. gens allans par le pays. Et feut l'entreprise rompüe, & de nulle valeur. Et si feurent les dictes pilleries si merueilleuses, que au pays ne trouuerët plus que manger, & feurent contraincts eulx en aller & departir par default de viures & de payement, combien qu'on eust leué grand argent.

Au dict'an le vingt-cinquiésme iour de Septembre, la Royne eut vn fils nommé Charles. Parquoy feurent ordonnez cheuaucheurs par tout le Rayaume, pour le faire sçauoir aux gens d'Eglise, nobles & peuple. Si en feut fait grandioye par tout. Et combien que au temps passé, on eust accoustumé de faire aumosnes, & releuer le peuple d'aucunes charges qu'on leur faisoit, toutesfois de ce ne feut rien fait, ne monsté semblant de le vouloir faire. Et le iour des Innocens ensuiuant, le dict enfant alla de vie à trespassement. Et feut enterré à Saint Denys en la chapelle de son ayeul Charles cinquiésme de ce nom.

En ce temps-y eut merueilleux vents & tempestes és forests & jardinaiges, arbres arrachez de terre & maisons, cheminées abbatües sans nombre, & si feit merueilleux tonnerres, & si adueint en vne ville sur la riuere de Marne, que le tonnerre & fouldre cheut sur vne Eglise, tellement que la dicte Eglise feut toute arse, & la custode où estoit le corps de nostre Seigneur, mais on trouua l'hostie sacrée, toute entiere sur l'autel.

Le Duc de Berry, apres l'entreprise faillie de passer en Angleterre, & par sa faulte, comme on disoit, faignit de vouloir tant faire qu'on passast. Et disoit en soy excusant, qu'il ne pouuoit plus tost venir. Et estoient les excusations apparemment vaines & friuoles. Et de fait, veint iusques à l'Escluse, où le Roy estoit. Mais le temps n'estoit pas bien disposé. Car sur mer estoient merueilleuses tempestes. Et si estoient les gens de guerre tellemēt separez en diuers lieux, qu'il estoit tout apparent, qu'il n'estoit pas possible de passer, & les manieres que tenoit le Duc de Berry, n'estoient que mocqueries & derisions. Et estoit-on tres-mal content, & en disoit-on plusieurs meschantes paroles. Et feurent tous les nauires petis par la tempeste de la mer, ou gaignez par les Anglois. Et y auoit vaisseaux plains de viures & de vins, iusques à deux mille tonnes, lesquels feurent gaignez par les Anglois. Et feut contrainct

train & le Roy s'en retourner à Paris, & donna la ville de bois, dont dessus est fait mention, au Duc de Bourgogne son Oncle. 1386.

En la dicte annee, le Roy de Navarre, (qui estoit fils de la Roynne Blanche, fille du Roy Louys dit Hutin,) lequel au Royaume de France par plusieurs & diuerses fois ~~seu~~ ^{fit} ~~maux~~ ⁱⁿnumera- bles, alla de vie à trespassement. A la mort y auoit vn Euesque, lequel fit vne maniere d'escripre à sa soeur, en louant fort sa vie & sa fin. Mais autres qui en scauoient, affermerent que pource que par vieillesse il estoit tout refroidi, on conseilla qu'il feust enuveloppé en vn drap mouillé en eaitte de vie, & y feust coufu dedans, & que quand le drap seroit sec, qu'on l'arroufist de la dicte eaitte. Celuy qui le cousoit, auoit deuant luy de la chandele de cire allumée, & pour rompre son fil, il print la chandele de cire pour le bruler. Mais il adueint que le feu du filet alla iusques au drap. Et fut le dict drap mis en feu & en flamme, & n'y peut on oncques mestre remede, & vesquit trois iours, criant & brayant à tres-grandes & aspres douleurs, & en cet estat alla de vie à trespassement. Et disoit-on que c'estoit vne punition diuine.

En ce temps y auoit vn gentil cheualier nommé Messire Iean de Carrouget, qui auoit espousé vne tres-belle & vaillante Dame, lequel par aucun tēps auoit esté absent. Et quand il reueint, la Dame en plorant dit à son mari, qu'elle auoit esté prinse à force & cōgneüe charnellemēt par vn escuyer nommé Iacques le Gris, Lequel quand il sceut qu'on le vouloit charger d'un tel cas, feut bien desplaisant, & souuent affermoit par serment, que oncques le cas ne luy estoit aduenü. Toutesfois Carrouget ne le creut point, & le fait adiourner en la présence du Roy en cas de gage de bataille, & cōparut, & feut ié & le gage, & ceste matiere réuoiée en la Court de Parlemēt. Et le tout veu & cōsidéré, fut dict qu'il y cheoit gage, & fut adiugé le gage, & ordonné que la Dame seroit detenüe prisonniere. Et feroit serment, que ce qu'elle imposoit à Iacques le Gris, estoit vrai, & ainsi le iura & afferma, & le dict Iacques aussi pareillemēt le contraire. Si feurent les parties mises au chāp, & les cris faicts en la forme & maniere accoustumée, Et disoit-on que Messire Iean Carrouget auoit fiebures, & que à c'este heure le prendrent, si combatirent les dicts champions bien & aspre-

1386. ment l'un contre l'autre. Et finalement Jacques le Gris cheut. Et lors Carrouget monta sur luy, l'espée traicte, en luy requerant qu'il luy dist verité. Et il respondit que sur Dieu, & sur le peril de la damnation de son ame, il n'auoit oncques commis le cas dont on le chargeoit. Et pourtant Carrouget qui croyoit sa femme, luy bouta l'espée au corps par dessoubz, & le feit mourir, qui feut grande pitié. Car depuis on sceut veritablement, qu'il n'auoit oncques commis le cas, & que vn autre l'auoit fait, lequel mourut de la maladie en son lit, & en l'artictle de la mort, il confessa deuant gens, que ce auoit il fait.

En Bretagne au dict temps, auoit vn cheualier nommé Messire Robert de Beaumanoir, qui feist appeler deuant le Duc vn autre cheualier nommé Pierre de Tournemine, en gaige de bataille. Et disoit qu'il auoit vn sien parent de son nom & armes, lequel on chargeoit de maintenir la fille d'un laboureur, deuers lequel veint le dict de Tournemine, & luy dit, qu'il estoit bien meschant, qu'il ne tuoit, ou faisoit mourir le parent du dict de Beaumanoir, veu la cause dessus dite, & luy conseilloit qu'il le feist, & tellement il enhorta le dict laboureur, qu'il se meit en aguet de le tuer par plusieurs fois, & le trouua vne fois à son aduantage, & le tua. Et disoit le dict de Beaumanoir, que le meurtre auoit esté fait par l'induction du dict de Tournemine, & que faulxement & mauuaisement il l'auoit fait, & s'il le vouloit nier, il estoit prest de l'en combattre, & iecta son gaige. Tournemine respondit, en niant tout ce que disoit Beaumanoir. Et finalement veüe la matiere, & tout consiedré, le gaige feut adiugé, & dict qu'il y auoit gaige de bataille. Et y eut iour & lieu assigné, auquel les parties comparurent en la presence du Duc, & feurent les sermens faicts en la maniere accoustumée. Et apres cry fait, que chascun feist son debuoir, ils s'approcherent l'un de l'autre, & combattirent bien longuement, & ne scauoit-on à peine lequel auoit le meilleur, & finalement de Tournemine feut desconfit, sans recongnoistre le cas, & comme mort feut mis hors du champ.

1387. L'an mille trois cents quatre vingts & sept, y eut en France vne merueilleuse & comme generale mortalité, & si piteuse que à peine trouuoit-on qui enseuelist les morts, & estoit de bosses & de flux de ventre. Et ne scauoit-on remede ha-

main trouuer. Si feut aduifé, qu'il falloit auoir recours à Dieu, 1387. & ordonna-on à faire processions, & deuotes oraisons. Et estoit grand pitié de veoir les pleurs & gemissemens des creatures humaines. Les vns prians à Dieu, qu'elle voulust cesser, les autres pleurans leurs parens & amis trespassez. Et comme soudainement cessa la dicte mortalité, que on tenoit vn œuure de Dien.

Les nobles de Normandie & autres gens de guerre, voyans que en rien on ne les occupoit, delibererent de faire finance de vaisseaux, & eux mestre sur mer, pour greuer les Anglois, s'ils pouuoient, & de fait ils le feirent. Laquelle chose veint à la congnoissance des Anglois, lesquels s'appareillerent à resister, & equipperent les Anglois, & fournirent de gens, & de choses necessaires à ce appartenans, leurs nauires, & se meirent sur mer en intention de trouuer les François, lesquels aussi ne demandoient autre chose. Et estoit Chef des Anglois Messire Hue le Despensier, & cinglerēt tant par mer qu'ils aperçurent les vns les autres, & se disposerent les François & Anglois à combattre, & approcherent, & commencerent à tirer de canons, arbalestes, & sagettes. & y eut bien dure & aspre besongne, & plusieurs blesez d'un costé & d'autre. Or adueint que le trait faillit aux Anglois, & se ioingnirent à eulx les François, & finablement les Anglois ne peurent soustenir l'assault, que les François leur faisoient, dont ils feurent desconfits, & presque tous morts & iettez en la mer. Et feut Messire Hue le Despensier pris & amené en Normandie. Dedans les vaisseaux des Anglois qui feurent pris, auoit peu de viures, mais de grandes richesses, & feut tout butiné entre les François. Et dient aucuns, que Messire Hue le Despensier feut deliuré sur sa foy, & comme sans finance.

Le Cardinal de Luxembourg, lequel feut fait pour le bien qui estoit en sa personne, Cardinal en l'aage de dix-huict ans, alla de vie à trespasement, & feut enterré en Auignon aux Celestins. Et à son enterrement, y eut foison de peuple, Et y eut des aueugles, qui par les merites du glorieux Saint, recourent veüe, & des boiteux, qui allerent droict. Aussi plusieurs creatures humaines, malades de diuerfes maladies, veindrent faire leurs deuotions, en requérant le glorieux Cardinal trespasé, qu'il voulust prier Dieu, qu'il leur donnast santé, les-

1387. au neufiesme iour estoient guairis, & tous sains.

En ce temps auoit grandes diuisions en Angleterre. Messire Oliuier de Clifson, Connestable de France, & Messire Iean de Vienne, Admiral, voyans & considerans le voyage de passer en Angleterre, rompu, delibererent d'y passer à tout trois mille combatans, & qu'ils prendroïent assez nauire & gens aux marches de Bretagne, Normandie, & Picardie, & leur sembloit, veüe la dicte diuision qui estoit en Angleterre, qu'on porteroit grand dommaige aux Anglois. Et pour faire aucuns preparatoires, Clifson s'en alla en Bretagne. Les Anglois qui en eurent aucune congnoissance, escripirent au Duc de Breagne, cōme à leur accointé, qui les voulust aider, avec plusieurs autres choses. Quand le Duc de Bretagne sceut que le Connestable de Clifson estoit en Bretagne, il luy manda comme à son aini & seruiteur de venir disner avec luy, & qu'il luy feroit tresbonne chere. Le Connestable cuidant que ce feust à bonne intention, y alla volontiers, cuidant estre tresbien en la bonne grace du Duc, & qu'il n'eut aucune malueüillance contre luy. Et estoit le Duc à Vennes, & aussi tost que Clifson y feut, par l'Ordonnance du Duc fut prins, & mis en vne tres-mauuaise prison, & tres-durement traité, & souuent on le menaçoit de le faire mourir, & le traictoit on moult durement & meschamment. Et apres par le moyen d'aucuns Barons de Bretagne, qui monstrerent au Duc le mal qu'il faisoit, veu que Clifson estoit si vaillant cheualier, & le pere duquel, & Clifson mesmes l'auoient grandement serui, & qu'il estoit Connestable de France, qui estoit grand chose, & par ce il pouuoit encourir l'indignation du Roy, y eut aucun traité & accord. Et requeroit le Duc, que Clifson meist toutes les places qu'il tenoit, en la main du Duc, & qu'il luy feist certains sermens & promesses de le seruir, & autres choses, comme on disoit non bien honnestes. Et quand on dit à Clifson, ce qu'il falloic qu'il feist, & ce que le Duc vouloit, ou autrement il seroit en grand danger de sa vie, il luy fait grand mal de l'accorder. Toutesfoiis il sy accorda, & meit ses places en la main du Duc, & fait ce de quoy on le requeroit, ou promet de le faire & accomplir, & à ce s'obligea. Et par ce moyen, feut deliuré, tres-mal content, & monstroic bien par ses manieres, que il auoit bien intention de s'en venger. Et en le deliurant le

Duc, dit qu'il voyoit bien que la deliurance qu'il faisoit de 1387.
 Clifson, vne fois retourneroit au grand dommaige du pays.
 La chose venüe à la cognoissance du Roy, il feut bien
 mal content, & non sans cause, & enuoya vne Ambaf-
 sade vers le Duc, & luy manda que comme que ce feust, il
 meist les places de Clifson en sa main, ou autrement qu'on l'adi-
 ourneroit à comparoir en personne en Parlement. Et cepend-
 ant Clifson arriua deuers le Roy, soy plaignant du Duc, &
 luy recita la maniere, comment il auoit esté gouverné par le
 Duc, & les promesses qu'il luy auoit faictes, & plainement de-
 uant le Roy, ceuz du Sang, & le Conseil, dit que le Duc estoit
 faulx & mauuais enuers le Roy, & la Couronne de France.
 Le Roy & le Conseil, considerans que le cas estoit tres-mau-
 uais, & que ce estoit crime de leseMajesté, ordonnerent qu'on
 luy enuoyeroit certains Commissaires, à l'adiourner pour
 comparoir en personne à Orleans, par deuant luy. Et de faict,
 y feurent certaines personnes notables, lesquelles feirent di-
 ligence de venir en Bretagne en la presence du Duc, lequel
 les receut bien doucement & honnorablement. Et luy expo-
 serent les causes pourquoy le Roy les auoit enuoyez, en au-
 cunement detestant le plus doucement qu'ils peurent, le cas
 par luy commis en la personne du Connestable, & que pour
 ceste cause ils estoient chargez, de l'adiourner à comparoir en
 personne deuant le Roy à Orleans, ce qu'ils faisoient. Et apres
 ces choses ainsi dictes, le Duc respondit en briefues paroles
 qu'il estoit seruiteur du Roy, & luy vouldroit obeir en tou-
 tes choses. Et que ce qu'il auoit faict, ce n'estoit au contempr
 du Roy, ny comme à Connestable, mais il estoit son vassal, &
 en plusieurs & diuerses manieres, il auoit mespris vers luy, &
 qu'il auoit assez de matiere de môstrer qu'il auoit enuers luy
 confisqué corps & biens, & que trop doucement & gracieu-
 sement il auoit procedé contre luy. Ce qu'il monstreroit en
 temps & lieu. Et que tres-volontiers en l'esté, il compareroit
 en personne par deuant le Roy, esperant qu'il n'auoit que
 iustice & raison, & leur fait tresbonne chere. Et preindrent
 congé, & s'en veindrent deuers le Roy, auquel ils dirent la
 response du Duc.

En ce temps y eut vn Docteur en Theologie, de l'ordre des
 freres prescheurs, nommé Maistre Iean de Montefono, qu'on

1387. tenoit bien notable homme, & bon clerc, lequel souuent preschoit. En vne predication dit & tint publicquement, que la glorieuse vierge Marie, mere de nostre Saulueur &, redempteur Iesus-Christ, feut engendrée en peché originel. L'Euesque de Paris le sceut, & sur ce assembla plusieurs notables clerics tant seculiers, que reguliers, & mendiens. Et feut la matiere ouuerte, & disputée, & debaruée en son hostel, & feut conclud que la dicte conclusion du dict Maistre en Theologie, seroit & debuioit estre damnée. Et pour ce, feut faite vne procession generale à nostre Dame de Paris. Et par l'Euesque de Paris vestu en estat Pontifical, feut la dicte proposition damnée bien & solemnellement. Et à Rouën, y eut vn autre Docteur en Theologie, qui prescha publicquement, comme auoit fait l'autre, & estoit du dict Ordre, & en preschant dit, que s'il ne le scauoit monstrer, qu'il vouloit qu'on l'appelast Huet. Et au contemp de ce, quand on voyoit aucuns de la dicte Religion, on les appelloit Huets, & mesmement les ieunes enfans de l'Vniuersité, le crioient à haulte voix, quand ils les voyoient.

En Angleterre auoit grande diuision, & disoit-on que le Roy Richard se gouernoit par gens non nobles, & non mie de grand estat, dont les nobles du pays estoient tresinal contents. Et s'assemblerent les oncles & parens, & avec eux les plus nobles qui y feussent, & pource que aucuns contredisoient aucunement au Roy, il feit couper aucunes testes. Lesquelles choses enflamberent plus les dicts nobles, & soudainement, & cōme on ne se donnoit de garde, veindrent deuant Londres armez, tous prests de combattre. Et y auoit avec le Roy, le Duc de Hibernie, & sembloit au peuple de Londres, que tantost les desconfiroient. Et feurent les vns deuant les autres en bataille arrangée, & s'approcherent d'vn costé & d'autre, & tirerent largement sagettes, & puis s'assemblerent aux haches, lances & espées. Et en peu d'heure, les nobles desconfirent le Roy Richard, & ceux qui estoient avec luy. Car ils estoient exercez en armes, & qui sçanoient que c'estoit de guerre, & les autres non. Le Roy Richard se retrahit aux prochains chasteaux, & avec luy le Duc de Hibernie, & les principaux de son Conseil. Aucuns y en eut de pris, auxquels on couppa les testes, & estoient ceux qui estoient avec le Roy,

bien esbahis, & leur conseilla le Roy, qu'ils se retrahissent en France, ce qu'ils feirent. Et combien qu'ils feussent ennemis du Roy de France, toutesfois les receut-~~il~~ doucement & benignement, & leur feit ordonner leur establiement grandement. Et feirent sçauoir au Roy d'Angleterre leur gracieuse reception. De laquelle chose, il enuoya remercier le Roy de France. Et appaisa les nobles, & par eulx se gouerna. Et y eut aucunes trefues.

En Guyenne vers Limosin y ha vne place bien forte nommée Chalucet, & y auoit de gens grosse garnison, & en estoit Capitaine vn nommé Testenoire, vaillant homme d'armes, lequel domageoit fort les François, & couroit, & appatissoit souuent le pais. Il assemblea bien quatre cents combatans tous gens de guerre, portans habillemens pour escheler & prendre places, & s'en veindrent deuant Montferrand, sçachans que dedans n'auoit aucunes gens de defense, & arriua en vne nuit obscure, & meit vne assez grosse embusche au plus pres de la ville, & ordonna dix ou douze compaignons ausquels le plus il se fioit, qui estoient vaillans & armez deffoubz, menans huit ou neuf cheuaux chargez de diuerses marchandises, lesquels veindrent au point du jour, au port leuis crier & requerir qu'on les meist dedans, & leurs marchandises. Aucuns de la ville veindrent, qui se disoient portiers pour le jour, & aualerent le pont leuis. Les Anglois qui se disoient marchands, tirerent leurs dagues, & tuerent les portiers, & saillir l'embusche, & entrèrent dedans la ville. Les habitans se cuiderent allier, pour les rebouter, mais ils ne peurent resister. Et pillerent & roberent la ville, preindrent prisonniers, & feirent tous les maux, que ennemis ont acoustumé de faire. Laquelle chose veint à la congnoissance du Marechal de Sancerre, qui estoit vers les dictes marches, lequel tantost assemblea gens de guerre, en intention d'aller assieger Testenoire dedans Montferrand. Mais Testenoire en sceut les nouuelles, & chargea sur cheuaux, charrettes & chariots, ce qu'il auoit pillé, & le plus tost qu'il peut, avec ce qu'il auoit, se retrahit à Chalucet, dont il estoit venu.

Iean de Bretaigne, espousa la fille de Messire Olliuier de Clisson.

Il y eut vn Cardinal de l'Antipape Urbain, qui veint vers

1387. Clement, faignant qu'il vouloit estre en son obeissance, & de-laisser Urbain, & y feut par aucun tēps, & luy faisoit on beaucoup de biens. Et sceut & enquit de tout le faict de Clement, & amassa de l'argent l'argement, & puis s'en alla par Allemagne, & de là vers Urbain l'Antipape.

1388. L'an mille trois cents quatre vingts & huit, comme dessus ha esté touché, le Duc de Bretaigne auoit esté adiourné à comparoir en personne à Orleans par deuant le Roy. Mais au iour assigné, combien qu'il feut longuement attendu, il ne veint, ny ne comparut en aucune maniere. Quand Clifson veid qu'il ne venoit point, il s'agenouilla deuant le Roy, en disant que autresfois il auoit dit, & encores maintenoir, que le Duc luy auoit faullement faict les choses dessus dictes, & comme fauls, traistre & desloyal estoit content de le combattre, & autre qui le voudroit soustenir. Et iecta son gant par maniere de gaigne sur le liect, lequel aucunement ne feut receu par personne. Le Roy retourna à Paris, tres-fort indigné contre le Duc, & auoit le Duc grand crainte & doute que le Roy par le moyen de son Connestable Clifson, ne fust armée pour aller en Bretaigne contre luy. Et plusieurs de ses Barons y auoit, lesquels luy monstroient qu'il auoit mal faict, & qu'il feroit bon d'y trouuer aucun expedient. Et pour ceste cause, le Duc enuoya vers le Roy certains Ambassadeurs, pour aucunement appaiser l'indignation du Roy. Et quand ils feurent à Paris, y eut aucunes difficultez, si le Roy les orroit ou non. Car le Connestable tousiours chauldement pourfuiuoit. Et finalement feut dict que le Roy les orroit. Et excusoient le Duc, de ce qu'il n'estoit venu à Orleans, en offrant qu'il estoit cōtēt de venir iusques à Blois, & il pleust au Roy enuoyer personnes, aux quelles il se peust fier, & à seureté il viendrait iusques en la presence du Roy. Et pour ceste cause, le Roy considerant la matiere estre haulte & grande, enuoya ses deux Oncles les Duc de Berry & de Bourgongne iusques à Blois. Et là veint le Duc, auquel les deux Ducs monstrerent qu'il auoit grandement failly & offensé, mais que s'il s'en vouloit venir à Paris deuers le Roy, il leur sembloit qu'ils trouueroient moyen de tout appaiser, tant enuers le Roy, que Clifson. Et delibera le Duc de soy y en venir avec les dictz deux Seigneurs. Et luy sembloit bien veu qu'ils le supporteroient, que par

par leur moyen tout s'appaiseroit. Et de fait, s'en veint come 1388.
eulx à Paris, & le presenterent au Roy, lequel quand il veid
que ses deux Oncles le presentoient, tresioyeusement & gra-
tieusement le receut, & luy feit tresbonne chere, dont plu-
sieurs s'esbahissoient. Et luy disoit on plusieurs paroles aucu-
nement contre l'honneur, de sa personne, touchant les dictz
cas. Et des manieres dessus dictes, Clifson estoit tresmal con-
tent & desplaisant, & eut volontiers vsé de fait, s'il eust osé, &
s'arrestoit fort à sçauoir si le Duc ou autre voudroit leuer son
gaige, qu'il auoit iecté. Mais les dictz deux Ducs de Berry &
de Bourgongne parlerent par diuerfes fois à luy, en disant,
que s'il se vouloit soubmettre du tout au Conseil du Roy, en
monstrant que autre chose ne pouuoit-il demander, & que
le Duc estoit content. Et finablement Clifson feut d'accord,
que les parties ouyes, le Roy en son Conseil luy feist iustice &
raison, & feut fort à mouuoir de sy consentir, jaçoit que au-
tre chose ne pouuoit il raisonnablement requerir. Il sceut que
le Roy à la requeste des dictz deux Seigneurs ses Oncles, a-
uoit tout pardonné audict Duc en tant qu'il luy touchoit, l'of-
fense, & les cas commis & perpetrez par iceluy Duc, & en
auoit eu remissiō, & apperceuoit qu'il n'auoit que son interest
ciuil. Si veindrent & comparurēt en la presence du Roy & de
son Conseil, & feit proposer Clifson les excès que le Duc luy
auoit fait, & la forme, qui estoit pour le Duc bien deshona-
ble. Par le Conseil du Duc feut defendu, en proposant plu-
sieurs excusations, plus tendans, à excusatiō & doler sa faulte,
que autrement. Et les parties ouyes, feut appoincté, & dict par
le Chancelier, que le Roy les auoit ouys, & qu'il feroit tout
ce qu'il appartiendrait par raison. Si feut le Conseil du Roy,
plusieurs & diuerfes fois assemblé, tant en la presence du Roy,
que autrement. Et finablement feut la sentence pronócée par
la bouche du Châcellier, par laquelle le Duc de Bretagne feut
condanné à deliurer les places de la Rochedarien, Ioffelin, &
autres qui estoient au dict Conestable Clifson, avec tous les
joyaux, thresors, & autres biens meubles estans dedans les di-
ctes places. Et en faisant du criminel ciuil, feut condané en cēt
mille francs. Et sur ce, feurēt leſtres Royaux faites, & seellées,
& baillées à chascune des parties. Et par ce moyen, feut la paix
faicte entre Clifson, & le Conestable, & ne dura gueres.

L

1388. En ce temps, il veint à la congnoissance du Roy, que le Docteur religieux prescheur, qui auoit presché de la conception de la benoïste & glorieuse vierge Marie, mere de Dieu, estoit deuers le Pape Clement. Et pource y enuoya l'Vniuersité certains Ambassadeurs, & feut appelé & euocqué de Montefono en la presence du Pape, & feut ouy, & aussi ceux de l'Vniuersité bien & au long. Et finablement feut condamné ledict de Montefono à retourner à Paris, & à prescher, & à soy reuocquer publicquement. Laquelle chose il promet de faire, mais la nuit se partit, & s'en alla en Arragon dont il estoit.

La Cité de Boulongne en Lombardie feut obeissance à Clement estant en Auignon, & non mie à Urbain estat à Rome. Et enuoya l'Vniuersité de Boulongne vers le Pape en Auignon demander roolle pour les escholiers à auoir benefices, & l'eurent.

La Royne eut vne fille nommée Ieanne, laquelle alla de vie à trespasement. Il y eut vn hermite, ayant vne croix rouge à son bras dextre, & sembloit vne bien deuote creature, & de bien dure & aspre vie, & faisant grande penitence, lequel veint à la Court du Roy, requerant tres instamment qu'il parlast au Roy, & feut par aucun temps, qu'on n'en tenoit compte. Et finablement feut dict au Roy, & en parla on en plain Conseil diuerfes fois. Et faisoit on grande difficulté de luy laisser parler, & estoient plusieurs d'opinion qu'on ne le souffrist point venir en la presence du Roy, & finablement par la volonté du Roy, il parla au Roy. Car le Roy dit qu'il le vouloit ouyr. Et dit au Roy qu'il auoit eu reuelation de Dieu, que s'il ne faisoit cheoir les aides, que Dieu se courrouceroit à luy, & en sa personne le puniroit. Et si n'auroit lignée qui vesquist. A laquelle chose le Roy pensa fort, & y eut diuerses imaginatiōs, & feut le Roy en volonté de faire cheoir les Aydes. Et quand il veint à la congnoissance des Ducs de Berry & de Bourgogne, que le Roy estoit aucunement en ceste volonté, ils vindrent vers luy, en lui disant que le dict hermite n'estoit qu'un folastre, & qu'on ne se debuoir arrester à chose qu'il dist. Et que si n'estoit les Aides, il ne scauroit de quoy soustenir le faict de la guerre, ne soustenir son estat, ne celuy de la Royne. Et tellement firent, qu'ils desmeurent le Roy, & tousiours coururent les Aydes.

En l'année deffus dicté, le Duc de Gueldres en Allemagne, 1388. enuoya deffier le Roy, & és lettres de defiance n'y auoit contenu aucunes causes, mais que simples defiances. Le Roy receut le herault assez honorablement. Et luy fait bonne chere, & luy feut respondu, qu'on voyoit bien ce que son maistre auoit rescript, & que le Roy y pouruoyeroit, & luy fait on assez bon don, & luy dit on qu'il s'en retournast à celui qui l'auoit enuoyé, ce qu'il feut. Le Roy assembla son Cōseil, & ceux de son Sang, pour sçauoir qu'il auoit à faire. Et y eut diuerfes opinions. Car les vns conseilloyent que le Roy ne se bougeast, & qu'il meist les gens d'armes sur les marches & frontieres du dict Duc de Gueldres, & que s'il commençoit que aucunement il feut guerre, que le Roy y pouruoyeroit. Les autres disoient que puis que le Roy estoit deffié, que c'estoit commencer en effect guerre, & ce luy seroit grand deshonneur, s'il ne se reuenchoit, & monstroit sa puissance contre le Duc. Et feut conclud par le Roy, qu'il iroit iusques en Gueldres, & assembla gens de guerre de toutes parts. Et partit le Roy bien accompagné & tira és marches d'Ardenne, & faisoit grande diligence de auācer son allée, & de approcher du Duc de Gueldres, & tant qu'il arriua à Verdun, où il feut grandement & notablement receu. Le Roy enuoya vers le Comte de Iuilliers, lequel estoit pere du dict Duc de Gueldres, entant qu'il auoit espousé sa fille, pour sçauoir s'il vouloit faire guerre, & soustenir son fils. Lequel respondit qu'il estoit seruiteur du Roy, & lui vouldroit complaire en toutes manieres. Et veint l'Archeuesque de Colongne vers le Roy, & amena avec luy le dict Comte de Iuilliers, Auquel le Roy fait tresbonne chere, & aussi parla il au Roy tresdoulcement & humblement, & luy iura foy, loyaulté & seruice, & si promet à son pouuoir de faire humilier son fils enuers le Roy. Et pource qu'on auoit viures à grand difficulté, Colin Boulart marchād de Paris, enuoya vers le Rhin, & par sa diligence on amenoit & faisoit venir viures largement. Ceux aussi du Traict, & de Brabant, en amenoient assez. Car les gens du Roy estoient tresbien payez, parquoy ils payoient bien. Le Comte de Iuilliers enuoya à son fils, en luy montrant la follie qu'il auoit fait, de deffier le Roy ainsi legerement, & qu'il estoit taillé d'estre destruit, s'il ne se venoit humilier vers le Roy. Lequel Duc

L ij

1388. n'en tint compte, & pour son pere ne voulut rien faire. Et toutesfois tous les pays voisins veindrent capter la beneuolence du Roy, & eux offrir à luy complaire en toutes manieres. Quand le Comte veid que son fils ne luy vouloit obeir, il enuoya la mere du Duc, laquelle parla à son fils le plus doucement qu'elle peut, en luy monstrant qu'il ne pourroit resister à la puissance du Roy. Mais il feut plus obstiné que deuant, & en ce point & en ceste volonté feut bien quinze iours, & iusques à ce que l'Archeuesque de Colongne y allast. Et tousiours le Roy, le plus doucement qu'il pouuoit, approchoit les marches du pays du dict Duc de Gueldres. Auquel l'Archeuesque de Colongne, monstra sa faulte, & haulte folie, & s'il ne se aduisoit, il estoit taillé d'estre perdu, & sa terre destruiete. Et à la fin se modera, & feut de accord d'aller à seureté deuers le Roy, & le amena l'Archeuesque, où estoit le Roy, & toute son armée emmy vn champ. Et qād le Duc veid toute la compaignée, il s'esmerueillā de la haulte & grande puissance que le Roy auoit, & de la cheualerie. Parquoy il delibera d'auoir paix, & pria son pere & l'Archeuesque qu'ils voulussent traicter avec le Roy, ce qu'ils feirent tres-volōtiers, & en feut le Roy trespōtent. Et feut certains sermēs, & feut tresjoyeux d'auoir veu le Roy, & de sa tresgratieuse reception, & print congé du Roy, lequel luy fait aucuns dons. Et par toutes les Allemaignes publia la doulceur gratieuse, vaillance, & puissance du Roy. Et enuiron la fin d'Octobre, le Roy se mit en chemin pour retourner, & passer certaine riuie, laquelle en esté estoit passable. Mais lors les eāes, estoient deuēues si grandes & grosses, qu'on n'y eust peu passer, & mesmement les chariots, charettes, sommiers & bagaiges. Et y eut des gens qui essayerent à passer, & en y eut vne partie de noyez & de morts. La plus grand partie du bagaige demeura en la riuie, & y eut grand dommaige. Et tout ce, on imputoit au Duc de Bourgogne.

Le Roy arriua à Rheims à la Toussaincts, & y ouyt le seruice, & se logea en l'hostel de l'Archeuesque. Et quand la feste feut passée, & le seruice des morts. Il assemblea ceux de son sang & Conseil en la salle dudit hostel, & y auoit grande assemblée, où estoient les Oncles, cousins & parens du Roy, & des Prelats, & gens d'Eglise. Et y estoit le Car-

dinal de Laon, l'Archeuesque de Rheims, & autres. Et feut mis en deliberation que doresnauant il auoit à faire, veu l'aage qu'il auoit, & considerez les affaires du Royaume. Car combien qu'il feust assez ieune d'aage, toutesfois il auoit grand sens & entendement, & estoit tresbelle personne, benigne, & douce, & voyoit faire à ses Oncles & autres par leur moyen, choses qui estoient plus au profit d'eulx, & d'aucuns particuliers, que du bien public. Le Chancelier, qui presidoit au Conseil apres le Roy, demanda au Cardinal de Laon, qu'il luy en sembloit, & que le Roy auoit à faire, Lequel moult se excusa de vouloir deliberer, ou parler le premier. Toutesfois apres que le Roy luy eut commandé, il monstra que le Roy estoit en aage competent, pour congnoistre & sçauoir le faict de son Royaume, & pour oster de tous poincts plusieurs enuies des Seigneurs, qu'ils auoient les vns enuers les autres, dont inconueniens aduenoient, & pouuoient aduenir plus grands, Il feust d'opinion que le Roy seul eut le gouvernement de son Royaume, & qu'il ne feust plus au gouvernement d'aultruy, c'est à sçauoir de ses Oncles, & specialement du Duc de Bourgongne, combien que expressément il ne les nomma pas, mais on les pouuoit assez entendre. Apres, l'Archeuesque de Rheims, & les Chefs de guerre, feurent de ceste opinion, & ainsi feut conclud. Et bien & gratieusement le Roy remercia ses Oncles, des peines & traualx qu'ils auoient eu de sa personne, & des affaires du Royaume, en les priant que tousiours ils l'eussent pour recommandé. Lesquels preindrent congé du Roy, lequel leur donna du sien le mieux qu'il peut. Et s'en alla le Duc de Berry en Languedoc, dont il auoit le gouvernement, & le Duc de Bourgongne à ses terres & Seigneuries, tres-mal content, & ses gens desplaisans, de ce que ils n'auoient l'administration & l'auctorité qu'ils auoient eu parauant, quand ils gouuernoient. Or adueint que le dict Cardinal, qui auoit dit le premier son opinion, assez tost apres alla de vie à trespasement bien piteusement. Car il feut sçeu que veritablement il auoit esté empoisonné, & le congneut & sentit bien, & pria & requit tres-instamment, que nulle enqueste ou punition en feust faicte. Il feut ouuert, & trouua-on les poisons. Le Roy en feut tres-deplaisant & courroucé.

Et le Roy de son mouuement aduisa qu'elles gens il vou-

L iij.

1388. loit auoir près de luy, & choisit principalement le Seigneur de la Riuere pour estre en sa compaignée. Et près de sa personne, le Seigneur de Noujant, lequel il feit son grand Maistre d'hôtel, & auoit à nom Messire Iean le Mercier. Gentilhomme & noble estoit de pere & de mere, lesquels n'estoient pas si bien heritez, qu'on pourroit bien dire, mais ils en viuoient. En iu- nesse feut moult nourri avec le Roy. Saige & prudent estoit, & de grande discretion. Et en effect auoient presque tout le gou- uernement des finances, luy, & le fils d'un Secretaire nommé Montagu. Et s'en veint le Roy à Paris, & feit veoir & visirer les Ordonnances anciennes que ses predecesseurs auoient fait, en les confirmant, & adioustant où mestier estoit, & les feit publier, & ordonna qu'elles feussent gardées & obseruées sans enfreindre. Et gouuernoit tellement le dict Seigneur de Noujant, qu'il feit vn bien grand thresor pour le Roy, lequel il gardoit pour les affaires du Roy, qui luy pouuoient surue- nir. Et tousiours estoit fort desplaisant le Duc de Bourgon- gne, qu'il ne gouuernoit.

Or est vrai comme dessus ha esté dict, que comme le Roy reueint de Flandres apres la commotion faicte par le peuple, nommée les mailles, il damna, abolit, & meit au neant les Pre- uosté & Escheuinaige de la ville de Paris, & feut tout vni à la Preuosté de Paris, & auoit le Preuost de Paris toute la charge, gouuernement & administration. Et pour le temps, estoit Pre- uost de Paris vn nommé Messire Iean de Solleuille, qui auoit esté des Seigneurs de Parlemēt, qui estoit bon clerc, & tresbien faisoit son debuoir. Lequel à certain iour s'en veint deuers le Roy & son Conseil, & leur exposa les charges, peines & tra- uaux qu'il auoit pour le gouuernement de la Preuosté de Pa- ris, & des marchands, & que bonnement les deux ensemble ne se pouuoient pas bien exercer. Et feut aduisé par le Con- seil, que les Preuost & Escheuins des marchands, iamais ne se remestroient sus, comme ils estoient, veu les inconueniens & les cas dessus declarez. Mais ils estoient bien d'opinion, que on aduisast vn notable clerc & preud'homme, qui eust le gou- uernement de la Preuosté des marchands de par le Roy, & ne plus ne moins que le Preuost de Paris, pareillement celuy qui y feroit commis, s'appelleroit Garde de la Preuosté des mar- chands pour le Roy. Et feurent aucuns chargez de trouuer vne

personne qui feust propre & habile à ce, & que celuy qu'ils au- 13 88.
roient aduisé, rapportassent au Conseil. Lesquels enquirent
en Parlement, Chastelet, & autres lieux. Et entre les autres,
ils rapporterēt au Roy & au Conseil, que en Parlement, auoir
vn Aduocat bon clerc & noble homme, nommé Maistre Jean
Iuuenal des Vrsins, & qu'il leur sembloit qu'il seroit tres-pro-
pre. En ce Conseil plusieurs auoit, & mesmemēt des nobles de
Bourgongne, qui luy appartenoiēt, qui plainemēt dirent qu'ils
respondoient pour luy, qu'il gouuernerait bien l'Office de la
garde de la Preuosté des marchands. Et estoient ses predeces-
seurs extraits des Vrsins de deuers Naples, & de Rome du Môr
Iourdain, & feurent amenez en France par vn leur Oncle,
nommé Messire Neapolin des Vrsins, Euesque de Mets. Et
feut son pere Pierre Iuuenal des Vrsins, bien vaillant homme
d'armes, & l'vn des principaux, qui resista aux Anglois avec
l'Euesque de Troyes, qui estoit de ceux de Poitiers, & le
Comte de Vaudemont. Et quand les guerres feurent faillies
en France, s'en alla avec autres sur les Sarrazins, & là mourut,
auquel Dieu face pardon. Le dict Maistre Jean Iuuenal, insti-
tué au dict Office de Garde de la Preuosté des marchands,
veint demeurer en l'hostel de la ville, & trouua que les affaires,
droits, & priuileges de la ville auoient esté delaissez. Et à
l'aide d'aucuns notables bourgeois de la ville, delibera de
trouuer les moyens de les remestre sus. Et fallut commencer
proces tant contre la ville de Roüen que autres, & obtint plu-
sieurs Arrests tant de compaignées Françoises, que autres. Et
si trouua que plusieurs empeschemens auoit sur les riuieres,
obstans lesquels, les vaisseaux amenans viures à Paris, estoient
empeschez, & ne pouuoient passer, & mesmement en la ruiere
de Marne. Et pource à la requeste du Roy, feut obtenu vn
mandement adressant à luy mesme, qui estoit Officier Royal,
& Garde de la Preuosté pour le Roy, qu'il pourueust, &
meit remede tellement, que les vaisseaux librement & sans
empeschement peussent venir à Paris, en demolissant ce qui
seroit trouué nuisible & dommageable. Et au cas, que aucuns
seigneurs des lieux y auoiēt dommaige, le Roy vouloit qu'ils
feussent recompensez pour vn denier de reuenue, de dix,
feust de moulins, gors, ou autres choses. Si enuoya par vertu
du dit mandement, sur la riuere de Marne, pour soy infor-

1388. mer quels empeschemens il y auoit, & les eut par declaration, & enuoia pour faire les demolitions, bien trois cents compaignons pour y aller, & leur distribua par nombre les lieux, où ils iroient, & le iour & l'heure qu'ils exploicteroient. Et en vne nuit rompirent & abbatirent tous les dictz empeschemens. De laquelle chose les Seigneurs feurent tres-mal contents, & enuoierent à Paris, & voulussent qu'on, fallut que de vn denier de dommage, qu'ils y pouuoient auoir, preinsissent dix, & leur feut permis de faire des moulins & gors, tellement que le nauigaige des vaisseaux ne feust point empesché. Et ainsi feut fait, laquelle chose feut tres-profitable pour la ville de Paris.

Comme dessus ha esté dict, le Duc de Berry auoit le gouuernement de Languedoc, & faisoit de merueilleuses exactions sur le peuple. Pour laquelle cause plusieurs habitans s'en alloient demeurer hors du Royaume, tant en Prouence, que en Arragon, & aucuns es marches de France. Et y eut vn Religieux de l'Ordre de S. Benoist, qui feut enuoyé deuers le Roy. Et en la presencedu Roy & du dict Duc, declara les exactions que faisoit le Duc, bien haultement & grandement, & sans espargner, & que le pays requeroit qu'ils eussent derechef le Comte de Foix. Et pource qu'il doubtoit que Monseigneur de Berry ne luy feist desplaisir, le Roy le meit en sa garde, en defendant au Duc qu'il ne luy meffist, ou feist meffaire en corps ne en biens, en aucune maniere. Ce que promet le Duc, nonobstant qu'il feust bien desplaisant & courroucé, de ce qu'on l'auoit blasonné en la presence du Roy. Et s'excusa, en disant qu'il n'en scauoit rien, & escripuit qu'on cessast, & aussi fait-on.

Vn hereticque vint à Paris, lequel semoit beaucoup d'erreurs, & auoit vn libre en quoy il estudioit, auquel plusieurs mauuais choses estoient contenües, lequel feut pris, & son libre aussi, & feut presché publicquement, & son libre ars, bruslé & mis en feu. Et quant à l'hereticque, il feut mis en prison, sans ce qu'on procedast en sa personne. Car on trouua, qu'il estoit alteré d'entendement.

1389. L'an mille trois cents quatre vingts neuf, le Roy voulut que la Roynne sa femme entraist à Paris. Et ce, il le fait notifier, & à scauoir à ceux de la ville de Paris, afin qu'ils se preparassent

sent. Et feurent toutes les rues tendues, par lesquelles elle de- 1389.
 uoit passer. Et y auoit à chasque carrefour diuerses histoires, &
 fontaines iectans eaüe, vin, & lait. Ceux de Paris allerent au
 deuant avec le Preuost des marchands, à grand multitude de
 peuple criant Noel. Le pont par où elle passa, estoit tout ten-
 du d'un taffetas bleu à fleurs de lys d'or. Et y auoit vn homme
 assez leger, habillé en guise d'un Ange, lequel par engins bien
 faicts, veint des tours nostre Dame de Paris à l'endroit du dict
 pont, & entra par vne fente de la dicte couuerture, à l'heure
 que la Roïne passoit, & luy meit vne belle couronne sur la te-
 ste. Et puis par les habillemens qui estoient faicts, feut retiré
 par la dicte fente, comme s'il s'en retournaist de soy mesmes au
 ciel. Deuant le grand Chastelet auoit vn beau liest tout tendu,
 & bien ordonné de tapisserie d'asur à fleurs de lys d'or. Et di-
 soit-on qu'il estoit faict pour representation d'un liest de iusti-
 ce, & estoit bien grand & richement paré. Et au milieu auoit
 vn cerf bien grand à la mesure de celui du Palais, tout blanc,
 faict artificiellement, les cornes dorées, & vne couronne d'or
 au col. Et estoit tellement faict & composé, qu'il y auoit homme
 qu'on ne voioit pas, qui luy faisoit remuer les yeuls, les cor-
 nes, la bouche, & tous les membres, & auoit au col les armes
 du Roy pendans, C'est à sçauoir l'escu d'asur à trois fleurs de
 lys d'or, bien richement faict. Et sur le liest empres le cerf, auoit
 vne grande espée, toute nue, belle & claire. Et quand ce veint
 à l'heure que la Roïne passa, celui qui gouernoit le cerf, au
 pied de deuant dextre luy feit prendre l'espée, & la tenoit tou-
 te droicte, & la faisoit trembler. Au Roy feut rapporté qu'on
 faisoit les dictes preparatoires, & dit à Sauoisi, qui estoit vn de
 ceux qui estoient des plus pres de luy, Sauoisi, le te prie tant que
 ie puis, que tu montes sur vn bon cheual, & ie monterai der-
 riere toi, & nous nous habillerons tellement, qu'on ne nous
 congnoistra point, & allons veoir l'entrée de ma femme. Et
 combien que Sauoisi feist bien son debuoir de le desmouuoir,
 toutesfois le Roy le voulut, & luy commanda que ainsi feust
 faict. Si feist Sauoisi ce que le Roy luy auoit commandé, & se
 desguisa le mieux qu'il peut, & monta sur vn fort cheual, & le
 Roy derriere luy, & s'en allerent parmy la ville en diuers lieux,
 & s'aduancerent pour venir au Chastelet, à l'heure que la Ro-
 ïne passoit, & y auoit moult de peuple & grand presse. Et se

M

1389. boursa Sauoisi le plus pres qu'il peut, & là auoit sergens de tous costez à grosses boulayes. Lesquels pour defendre la presse, & qu'on ne feist quelque violence au liêt, où estoit le cerf, frappaient d'un costé & d'autre de leurs boulayes bien fort, & s'efforçoit tousiours Sauoisi d'approcher. Et les sergens qui ne congnoissoient ne le Roy, ne Sauoisi, frappaient de leurs boulayes sur eulx. Et en eut le Roy plusieurs coups & horions sur les espaules bien assis. Et au soir en la presence des Dames & Damoiselles, feut la chose scetie & recitée, & s'en commença-on à farçer, & le Roy mesmes se farçoit des horions qu'il auoit eus & receus. La Royne à l'entrée, estoit en vne listiere bien richement ornée & habillée, & aussi estoient les Dames & Damoiselles, qui estoit belle chose à veoir. Ils soupperent, & feirent vne grand chere. Et qui voudroit mesre tous les habillemens des Dames & Damoiselles, des cheualiers & escuyers, & de ceux qui menoient la Royne, ce seroient choses longues à reciter, & ne seruiroient de gueres. Et apres soupper, y eut chansons & dances iusques au iour, & faicte vne tres-grande chere. Et le lendemain, y eut ioustes, & autres esbatemens.

Le Pape Clement enuoia vers le Roy le Cardinal de Thury, pour declarer la piteuse calamité & misere du Royaume de Sicile. Lequel arriua deuers le Roy, & luy exposa la charge qu'il auoit, en luy priant & requerant qu'il voulust aduiser, comme on y pourroit remedier, & offrit de par le Pape, à y employer & gens, & argent, de tout son pouuoir. Le Roy feut respondre par son Chancelier, que tres-uolontiers il y aduiferoit.

Le Roy voulut aller à Saint Denys en France, & y mena la Royne, & y feut receu bien grandement, & le lendemain y eut messe bien notable. Et au dict lieu estoit venue la Royne de Sicile, bié & grandement accôpaignée, & y amena ses deux fils. Lesquels le Roy à bien grande solemnité feut cheualiers, & à grand ioye de tous les assistans. Car ils estoient tresbeaux enfans, douls, & gratieux, & les faisoit beau veoir. Et le Roy pour festoier la Royne, & plusieurs Seigneurs tant estrangers que autres, ordonna au dict lieu de Saint Denys certaines ioustes estre faictes, & y feut-on grands preparatoires, tant d'escharfaulx, que de habillemens, & durerent trois iours,

Le premier iour jouterent les cheualiers. Et à l'entrée au champ, les cheualiers qui debuient jouter, estoient menez par Dames vestües de robes semées, & bordées d'eschers. Et auoit au col du courfier lié vn gros las d'or & de soye, que les Dames tenoient en leurs mains, & au champ les presentoient, montées sur grosses hacquenées. Et les cheualiers presentes au champ, les Dames descendoient, & montoient sur eschar-faults. Et pareillement feurent menez les escuyers par Damoiselles, vestües comme celles du premier iour. Le troisieme iour, n'y eut ne Dames ne Damoiselles, qui menassent les jousteurs. Aussi joustoit-il, qui vouloit, feussent cheualiers ou escuyers. Vne belle salle feut faicte de tentes longue & large, où les disners & soupers feurent. Et pource que des dictes joustes ont esté faictes tapisseries, on s'en est passé en brie. Et estoit commune renommée, que des dictes joustes estoit venu des chpses des-honestes en matiere d'amourettes, & dont depuis beaucoup de maux sont venus. Et dit vne Cronique, que és dictes joustes *lubrica facta sunt.*

Le Roy voulant honnorer la personne de Messire Bertrand de Glisquin, en son viuant Connestable de France, & lequel estoit trespasé au seruice du Roy son pere, & enterré en la chappelle à Saint Denys, feit faire en la dicte Eglise de Saint Denys vn tresbeau seruice de morts, & y auoit tres-grand luminaire de cierges & de torches. Et estoient le Connestable Messire Oliuier de Clisson, le Marechal de Sancerre, & huit autres tous vestus de manteaux noirs, faisans le deuil. L'Euesque d'Auxerre chanta la messe. Et quand ce veint à l'offrande, l'Euesque & le Roy veindrent à l'entrée du choeur. Et premierement veindrent quatre hommes d'armes armez de toutes pieces, montez sur quatre coursiers bien ordonnez & parez, representans la personne du mort quand il viuoit. Secondement apres veindrent quatre hommes d'armes, ayans les cottes d'armes du trespasé quand il viuoit, portans les bannieres aux dictes armes. Ce faict, l'Euesque retourna à l'autel, & veindrent à l'offrande, ceux qui faisoient le deuil, tenans chascun vn escu aux armes du mort, & vne espée nue, la pointe dessus. Et apres secondement allerent à l'offrande ceux du sang & parens du Roy. Et puis veindrent huit gentils-hommes armez ou habillez de haubergeons, qui porroient les

1389. heaulmes, & quatre bannieres aux armes du mort, & les mirent sur l'autel. Et apres ces choses, y eut vn beau sermon par vn Docteur en Theologie, bien notable, lequel declara les vertus, vaillance, & preud'homme du trespaslé. Et feut la messe acheuée, & s'en allerent disner. Et y eut aumosne generale aux pauvres, qui y voulurent venir. Et estoient les Seigneurs & tous les presens ioyeux, de l'honneur que le Roy auoit fait à vn si gentil cheualier & vaillant, comme estoit le feu Connestable. Et ce fait, s'en retourna à Paris.

Le Duc de Berry, Oncle du Roy, print à femme la fille du Comte de Boulongne, laquelle estoit tresbelle Damoiselle. Mais enfans n'en pouuoit auoir, dont il estoit moult desplaisant.

Le Comte d'Estampes feut conjoint par mariage avec la Duchesse d'Athenes, laquelle alla de vie à trespaslement, & feut ensepulturée à Saint Denys en France.

Toufiours auoit allées & venues des François aux Anglois, & aussi des Anglois aux François, pour trouuer les manieres d'auoir paix, & souuent pour ceste cause on s'assembloit. Et apres plusieurs choses, feurent accordées & ordonnées trefues iusques à trois ans entre les Roys & Royaumes, sur esperance cependant de faire paix, & feurent iurées & promises.

Le Pape Clement plusieurs & diuerses fois escripuit au Roy, qu'il le voulust visiter, & il auoit tres-grand desir de le veoir, & communiquer avec luy du fait de l'Eglise, & du Royaume de Naples; & de Sicile. Et le Roy, soubz ombre d'y vouloir aller, feit des exactions des gens d'Eglise bien grieues, & à leur bien grand desplaisance. Et estoit large, & abandonné à l'argent distribuer, & donner les finances. Et là où son feu pere donnoit cent escus, iken donnoit mille. Dont estoient ceux de la Chambre des Comptes tres-mal contents. Et tellement, que quand les Receueurs venoient en la dicte Chambre rendre leurs comptes, ainsi qu'ils debuient faire, & ils voyoient les dons excessifs, ils mettoient, ou faisoient mettre en teste sur l'article de ce faisant mention, *Nimis habuit, recuperetur*. Et feut lors aduisé par le Seigneur de Noujant, qui auoit la charge principale des finances, & autres du Conseil du Roy, qu'on ne gardast point d'or monoyé, & que tout tantost feust amassé en gros lingots, comme le faisoit faire le Roy.

Charles cinquiesme. Et aduisa le dict de Noujant, qu'il feroit vn cerf d'or, pareil à la grandeur & corpulence de celui qui est au Palais entre deux piliers. Et feut commencé, & en feut fait la teste, & tout le col, & non plus.

La Royne feut grosse d'enfant sentant, d'ot le Roy & tout le peuple feut bien ioyeux, & voulut le Roy qu'elle entrast bien & honorablement à Paris. Et en signe d'aucune ioyeuseté, à tous bannis & prisonniers donna franchise & immunité iusques à quatre moys, sans ce que rien on leur peust demander. Eren outre voulut que la Royne füst couronnée & sacrée. Et s'en retourna à Saint Denys, & du dict lieu s'en partit, pour venir & entrer à Paris à belle & noble compaignée; tant de ceux du sang, que de gens d'Eglise, nobles & peuple. Et s'en veint au Palais à Paris, & le lendemain à grande solemnité feut couronnée & sacrée, & estoit richemēt habillée & vestüe, & de ioyaux bien garnie. Et si estoient ses Dames & Damoïselles, les Seigneurs, cheualiers, & escuiers, chascun selon son estat. Et s'en veindrent à Saint Paul au disner, qui estoit ordonné. Et là le Roy l'attendoit, & y eut grande & notable feste, & trompettes & menestriers cornoient. Er si y auoit bas instruments, heraults & poursuiuans, ausquels le Roy feut donner largement. Et y eut ioustes, & iousta le Roy, lequel feut bien son debuoir. Mais plusieurs gens de bien feurent trefmal contents de se qu'on le feut iouster. Car en telles choses peut auoir des dangers beaucoup, & disoient que c'estoit trefmal fait. Et l'excusation estoit, qu'il l'auoit voulu faire.

Le peuple auoit grande esperance que à la ventie de la Royne, & pour son couronnement, ils deussent auoir aucune allégeance, touchant les tailles & aydes extraordinaires. Mais rien n'en feut diminué, mais la gabelle du sel augmentée. Et si feut la mormoye, qu'on faisoit du temps du pere, du tout annulée, sans ce qu'on luy donnast aucun cours, dont ils feurent moult greuez & trauaillez.

Après ces choses ainsi faictes; le Roy, veües les prieres, du Pape, delibera de le visiter. Et ainsi qu'il estoit sur son partement, veindrent derechef du pays de Languedoc au Roy grâdes plainctes, du Duc de Berry son oncle, en eux complaignant des grandes exactions qu'il faisoit sur le peuple, & tel-

1389.

lement qu'il s'en estoit parti plus de quarante mille mesnages. Si supplioient & requeroient ceux qui estoient venus de la partie du pays, qu'il y voulust remedier. Le Roy dolent & desplaisant des plainctes qu'on faisoit de son Oncle, respondit qu'il iroit au pays de par delà, & y mettroit remede. Et manda à son Oncle, qu'il ne se bougeast, & qu'il remediast aux dictes exactions, ou sinon il y pouruoyeroit tellemēt que les autres y prendroient exemple.

Le Roy pour accomplir son voyage d'aller deuers le Pape, s'en alla à Saint Denys, soy recommander à Dieu, & aux corps saints, & y fit ses offrandes, & donna à l'Eglise de tresbeaux vestemens. Et s'en vint à Montargis, puis à la Charité, & de là à Neuers, & passa par Auvergne, & Mascon. Et es dictes villes, feut notablement receu, & à grande & ioyeuse chere. Et luy fait on dons & presens, selon la possibilité & faculté des pays. Et s'en veint à Lyon, & les habitans feurent moult ioyeux de sa venue, & parerent les ruës. Et à l'entrée de la ville, joignant la porte, y auoit vn bien riche poille sur quatre bastons, que tenoient quatre belles ieunes filles, & se met le Roy desfoubz. Et en certains lieux en la ville, auoit iusques à mille enfans vestus de robes Royales, loüans, & chantans diuerses chansons de la venue du Roy. Cheres se faisoient, feux & tables feurent mises par les ruës, & ne cesserent de quatre iours de ce faire, iour & nuit. Jeux & esbatemens se faisoient, & tous signes qu'ils pouuoient faire de ioyeusetez, de la venue du Roy leur souuerain Seigneur, & de le veoir en bonne santé & prosperité. De la dicte ville de Lyon, apres ce qu'il y eust esté par aucun temps, se partit, & s'en veint à Rocquemeure, vne belle place sur le Rhosne, qui estoit au Roy assez pres d'Avignon. Laquelle chose veint à la congnoissancē du Pape, dont il feut moult ioyeux. Et se disposa le Roy d'aller en Avignon, où le Pape estoit. Lequel enuoia au deuant certains Cardinaux avec Euesques & Prelats, lesquels feirent les reuerences au Roy, & le Roy à eulx, ainsi qu'il appartenoit. Et estoit le Pape en son Palais en Consistoire, où il attendoit le Roy en son siege Papal. En Avignon faisoient grand ioye de la venue du Roy, & le receurent bien & honnorablement. Et s'en veint le Roy iusques au Palais, entra dedans, & iusques au lieu où le Pape estoit. Et luy fit le Roy la reuerence qu'il ap-

partenoit, comme fils de l'Eglise, en mettant vn genouil à terre, baissant le pied, la main, & la bouche. Et empres le siege, où estoit le Pape assis, auoit vne chaire bien ordonnée & parée, non mie si haulte que celle du Pape, en laquelle le Roy feut assis. Et apres aucuns signes de ioyeuseté, monstrez l'vn à l'autre, le Roy dit, qu'il estoit venu vers luy le visiter, en soy offrant à son seruice & de l'Eglise, en toutes manieres à luy possibles, dont le Pape & les Cardinaux le remercièrent bien grandement. Et luy dit le Pape que aussi à luy comme à bras dextre de l'Eglise, & vrai champion, & trefchrestien Roy, il auoit singuliere fiance. Et ce faict, ils se partirent du conclave, & allerent prendre leur refection. Auec le Roy, estoit Louys qu'il auoit faict cheualier, & Charles son frere, & aussi la Royne de Sicile leur mere. Et à la messe, courónna le Pape en Roy de Sicile, Louis. Le Pape & le Roy à part eux deux seuls, eurent plusieurs paroles & colloctions ensemble, tant du faict de l'Eglise, que d'autres choses, & depuis en la preséce des Cardinaux. Puis se disposa le Roy à soy partir, & prendre congé du Pape, & luy feurent faicts aucuns presens, & aux Seigneurs, & seruiteurs estans en sa compaignée. Et si octroya au Roy nominatiōs pour auoir & obtenir benefices, à ses seruiteurs & Officiers. Et si en eut plusieurs qui demanderent dispenses de diuerfes manieres, & rien ne leur feut refusé. Et print congé, & sa compaignée, du Pape & des Cardinaux.

Le quatriesme iour de Nouembre partit le Roy d'Auignō, & print son chemin vers Montpellier, & par Carcassonne, & Narbonne passa. Esquels lieux feut grandement & notablement receu, comme il appartenoit, & luy feut on beaux & grands presens. Et s'en vint à Thoulouse, qui estoit le lieu principal de Languedoc, & y feut iusques au huietiesme iour de Ianuier. Et pendant le temps qu'il y feut, plusieurs plaintes & requestes luy feurent faictes: A toutes lesquelles choses le Roy feut, & feut faire si doulces & gratieuses responses, que tous en estoient contents, & donna prouisions, où il les falloir donner. Et quand il entra à Thoulouse, trouua que en la prison de l'Archeuesque, estoit vn nommé Oudart de Atéuille, qui auoit esté Baillif & Officier du Roy, auquel on imposoit aucuns cas sentans heresie. Le Roy à sa bien venue le deliura, & ce nonobstāt ordonna que le procez qui auoit esté

1389. fait, feut veu & visité par notables clerks, lesquels en feirent leur rapport. Et feut trouué que à tort & contre raison, on auoit procedé contre luy iniustement. Et par les varlets d'un surnommé Betizas, familier & seruiteur du Duc de Berry, il auoit esté chargé. Et en aucun endroict du procez, on trouuoit ledict Betizas aucunes fois entaché du peché de Sodome. Et en feut faite information, & icelle veüe, feut mis en prison, puis examiné, & confessa le cas à luy imposé assez plainement. Et pource feut ars & brulé.

Le Roy delibera d'aller veoir le Comte de Foix, & se partit de Thoulouse pour venir à Masieres, qui est la ville principale de la Comté de Foix. Et en icelle estoit le Comte, qui estoit bien vieil, mais riche homme, & puissant de cheuance, & de gens. Au deuant du Roy enuoia cent cheualiers, & de gras moutons sans nombre, & cent bœufs gras, & apres douze beaux destriers ou coursiers, lesquels auoient au col sonnettes d'argent, comme celles qui estoient au col des bœufs, & failloient en plaine terre merueilleusement. Et ceux qui conduisoient le dict bestail, & aussi cheuauchioient les dicts destriers, estoient vestus en habit de vachiers & bouuiers, encores que ce feussent des plus nobles gentilshommes, qui feussent au pays de Foix. Dont le Roy, & sa compaignée, & ceux du pays mesmes, rioient, & se deuisoient, en disant quels vachiers & bouuiers à mener bestail, & paiges à mener coursiers. Et de toutes les choses dessus dictes, feut fait present au Roy de par le dict Comte de Foix. A Masieres le Roy feut receu grandement & notablement, & festoié par le Comte plusieurs & diuerses fois. Et ordonna un ieu nommé ioculatoires, à iecter dards & iauelines, & promestoit au mieux jouant & iectant vne belle Couronne qu'il auoit, qui estoit moult riche. Et de ce faire, le Roy dès ieunesse se delectoit à iecter verges de coudre, & souuent à Paris en iectoit en la Court de Saint Paul par dessus les salles, & n'y auoit en son hostel personne qui de ce l'eust mieux fait. Et au dict ieu se essaya de iouer, & de fait gaigna le pris, & luy feut baillée la Couronne, laquelle aussi tost donna aux cheualiers & escuiers du Comte. Lequel feit au Roy foy & hommaige de la Comté de Foix, & de toutes les autres terres qu'il tenoit au Royaume de France. Et encores voulut-il donner, ceder & transporter au
 Roy

Roy la Comté apres sa mort. Car il n'auoit lors aucuns enfans. Et est vrai, que aucun temps parauant il auoit vn tres-beau fils, auquel il tenoit son estat moyennement le mieux qu'il pouuoit, mais non mie si grandement, que le fils eust biē voulu. Et estoit fils de la sœur du Roy de Nauarre, & s'en alla au dict Roy de Nauarre son oncle, soy plaindre de son pere, en disāt, qu'il ne tenoit cōpte de luy, non plus que d'un simple gentilhomme de son hostel. Et feut par aucun temps avec son dict oncle, lequel conseilla à son dict nepueu qu'il empoisonnast son pere, & ainsi il feroit Comte de Foix, & Seigneur de tout, & qu'il luy feroit finance de bonnes & fortes poisons, & prescha tant son dict nepueu, fils du dict Comte, qu'il s'y consentit. Et print les poisons, & s'en vint vers son pere, cuidant mettre à execution le conseil, que son dict oncle luy auoit donné. Et tous les iours espioit l'heure, qu'il le pourroit faire, & aucunes fois alloit en la cuisine de son pere, ce qu'il n'auoit accoustumé de faire. Et d'aduenture la petite boüette de ladicte poison cheut à terre, & feut leuée par vn des gēs du Comte, & monstree aux physiciens & apothicaires, qui disoient, que c'estoiet tresmauuaises poisons. Si feut le fils pris & arresté. Vn homme estoit, qui auoit gaigné à mourir, auquel en feut baillé avec autres viandes, & tantost mourut. Le Comte feit interroguer son fils, & examiner, lequel confessa la chose, ainsi que dessus est escripte. Et pour ceste cause, il luy feit couper la teste, & aimoit mieux que le Roy eust la dicte Comté, que nul autre, & pource luy donna.

L'antipape Urbain à Rome mourut, les Romains en esleurent vn autre, qu'on appelloit Boniface.

Il y auoit vn nommé Paulus Tigrin, lequel se disoit Patriarche de Constantinople, & sur les marches de deuers Orient, leua de merueilleuses finances, & vint en Cypre, où par le Roy feut receu grandement & honnorablement, & le tenoit on riche desia de trente mille florins, & commença sa renommée à croistre par tout le pays, & donnoit benefices, & faisoit merueilleuses assemblées de finances, & vint à Rome du temps de Urbain l'Antipape, lequel feit faire information de la vie du dict Paule, & de son gouuernement, & trouua on que ce n'estoit qu'un abuseur, si le feit prendre, & emprisonner, & eut sa finance, qui estoit grande. A l'Antipape Urbain,

N

1389. comme dict est, Boniface luy succeda, & deliura à sa coronation ledict Paule. & le laissa aller où il voulut, lequel s'en vint le plus tost qu'il peut, vers les marches de Sauoye, & luy dit qu'il estoit son parent. Et luy declara vne grande Genealogie, laquelle ledict Seigneur de Sauoye creut, & vne tresbonne chere eut de luy, & luy donna du sien bien grandement. Et le feit vestir & habiller selon l'estat de Patriarche, bien & notablement. Et à douze cheuaux l'enuoya vers le Pape en Auignon, en le recommandant comme son parent, & vrai Patriarche de Constantinople. Parquoy le receut le Sainct Pere bien honnorablement. Auquel recita maux infinis que luy auoit fait l'Antipape Urbain, soubz ombre de ce qu'il fauorisoit Pape Clement, & luy donna le Pape plusieurs beaux & bons dons. Si demanda congé de visiter le Roy de France, & y vint, & le receut le Roy honnorablement, & luy feit tresbonne chere, & se monstroient vne tres-deuote creature, & frequentoit bien & deuotement l'Eglise. Et voulut visiter l'Eglise & l'Abbaye de Sainct Denys, & apres plusieurs choses dit à l'Abbé & religieux, qu'il scauoit qu'ils auoient le corps de Monseigneur Sainct Denys, mais il auoit de belles choses de Sainct Denys, comme sa ceinture, & plusieurs bons liures qu'on n'auoit pas par deça. Et que si on luy vouloit bailler deux religieux, qu'il les leur feroit auoir. Et luy feut accordé que ainsi se feroit, & feurent deux religieux ordonnez. Et cauteleusement & malicieusement se tira vers les marches de la mer, & se mit en vn vaisseau avec ses richesses, & s'en alla. Les deux religieux allerent apres, le cuidans trouuer, & feurent iusques à Rome, & en enquerroient le mieux qu'ils pouuoient. Mais ils sceurent que ce n'estoit qu'un trompeur & abuseur. Parquoy ils s'en reueindrent.

1390. L'an mille trois cents quatre vingts & dix, quand le Roy feut retourné de Languedoc, combien qu'il auoit dict, & fait scauoir à son Oncle, que son plaisir n'estoit pas, qu'il fait si grandes exactions sur le peuple, dont il auoit le gouuernement, pourtant ne cessa il point qu'il ne fait tailles trop merueilleuses, & sans ce que necessité en feust. Lesquelles choses veindrent à la cognoissance du Roy, dont il feut tresdesplaisant, & dit qu'il n'y scauoit remede, sinon de le defa-

poincter. Messire Jean Herpedenne le sceut, & feit' sçauoir 1390. au Duc de Berry, comme on le vouloit desapoincter du gouuernement qu'il auoit. Et feut le Duc tresmal content, de ceux qui estoient alentour du Roy, & de son Conseil, & spécialement du Connestable Clisson. Et estoit le Roy fort indigné contre son dict Oncle, & de fait le desapointa, & enuoya seulement vn simple cheualier, nommé Messire Pierre de la Capreuse, homme saigé & prudent, lequel en peu de temps s'y transporta, & lequel s'y porta grandement & notablement, & en estoit le peuple trescontent. Mais il veint à sa congnoissance, que le Duc de Berry tresimpatiemment portoit son desapointement du dict gouuernement. Et de fait feit à sçauoir au dict de la Capreuse, que s'il s'en mesloit plus, qu'il le feroit courroucer du corps. Et luy qui n'estoit qu'un simple cheualier, & pource doubtoit sa personne, s'en retourna deuers le Roy.

Les Turcs faisoient forte guerre aux Chrestiens, & merueilleuse iûsques à Genes. Pour laquelle cause les Geneuois enuoyerent vne bien notable Ambassade deuers le Roy. Et feirent par la bouche d'un clerc qui estoit là, vne proposition bien notable, & loüoit fort le Roy, la Maison de France, & le Royaume, puis exposa les tyrannies que faisoient les Sarrazins aux Chrestiens, & que à lui comme à Roy treschrestien, ils requeroient à auoir aide & confort pour resister à l'entreprise du Turc. On les feit retraite, & feut mise leur requeste en deliberation, laquelle sembloit bien haulte, & v cheoit bien aduis, & diuerses fois y aduiferent. Et au dict Conseil, estoit le Duc de Bourbon, le Comte d'Eu, l'Admiral de Vienne, & autres. Et dict le bon Duc de Bourbon, que en suiuant le bon Roy Saint Louys, il iroit volontiers, s'il plaisoit au Roy. Pareillement feirent les dessus dicts, & le Seigneur de Coucy, le Comte de Harcourt, & plusieurs cheualiers & escuyers, dont le Roy feut trescontent. Si feurent mandez les Ambassadeurs ou messaigers en la presence du Roy, lequel leur feit response, que volontiers il les aideroit & conforteroit, & que en brief il leur bailleroit gens tant de son sang, que autres, & leur feit dons & presens. De laquelle response, ils feurent tresjoyeux & contents du Roy. Et avec ce que les dicts Seigneurs s'offroient d'aller cō-

1390. tre les Sarrafins, & faisoient comme bons & vrais Chrestiens, toutesfois volontiers aussi ils y alloient pour eulx distraire de la Court. Car ils voyoient soudre aucunes diuisions, & si faisoit on des choses, qui leur sembloient estre non bien honnestes, lesquelles estoient à leur grand desplaisance. Les dicts Seigneurs faisoient diligence bien grande pour assembler gens, & tant qu'ils se trouuerent bien quinze cents cheualiers & escuiers, avec les arbalestriers, & autres gens de trait. Les nouvelles feurent en Angleterre, comme aucuns Seigneurs de France, se dispoioient d'aller sur les Sarrafins. Et à ceste cause le Comte Derby, vn vaillant cheualier d'Angleterre, delibera d'aller avec les dicts Seigneurs de France, & vint vers eulx avec vne compaignée de ceux de son pays non mie grande. Et s'en partirent du Royaume de France, & prindrent leur chemin à Marseille. Et par tout où ils passioient, on leur faisoit bonne chere, car ils payoient competemment ce qu'ils prenoient. Et de Marseille tirerent à Gennes, où ils feurent grandement receus, & leur faisoit on grand chere. Et en passant, faisoient diligence de trouuer gens de trait, & trouuerent iusques à mille arbalestriers, sans ceux qui estoient és nauires, qu'on estimoit bien à quatre mille combatans bien armez & habillez, & trouuerēt des vaisseaux de mer bien & largement. Et pource qu'on doubtoit qu'il y eust aucuns debats pour le schisme qui estoit en l'Eglise. (Car les François & autres renoient Clement pour vrai Pape, & les autres Boniface à Rome) feut ordonné & defendu que de la dicte matiere ne feust faicte aucune mention ou parole, & que chascun sans auoir en ce regard, en bonne amour, fraternité, & dilection comme bons Chrestiens, en bonne & parfaicte vnion se emploiasent, contre les mescreans, en la defense de la foy Catholique.

Après que les choses feurent prestes & disposées à mōter sur la mer, les Chrestiens entrèrent és vaisseaux, & feirent chef vn nommé Jean de Oultremarins, qui estoit vaillant homme, & tout son tēps s'estoit tenu sur mer à faire guerre aux Sarrafins, & scauoit & cognoissoit leurs manieres de faire. Après leur partement, quand ils feurent aucunement bien auant sur la mer, suruindrent merueilleuses tēpestes de vents, & tresmerueilleux & horrible temps, desplaisant, & non sans cause, à ceux qui n'auoient pas accoustumé la mer. Mais tousiours le-

dict Jean leur Capitaine les confortoit, en leur donnant fiance & esperance en Dieu, & arriuerent en l'Isle de Sardaigne. Et là descendirent, & estoient tres-ennuyez & desplaisans d'y estre venus, & tres-volontiers les aucuns s'en feussent retournez. Mais ce vaillant Duc de Bourbon, si doucement les confortoit, & donnoit couraige, que tous delibererent de le suiure, & rentrerent en leurs vaisseaux, & voguerent sur mer. Et si parauant ils auoient eu forte tempeste, encores l'eurent-ils plus merueilleuse & terrible, & n'y sceurent trouuer remede, sinon auoir recours à Dieu, & à sa glorieuse mere, & à tous les Saints auxquels ils auoient fiance. Et se meirent tous en oraisons & prieres, & comme à coup toute la tempeste cessa. Le Roy de Thunes meit dedans Carthage deux mille combattans. Et aux champs en auoit bien quarante mille. Car il auoit sceu la venue des Chrestiens, lesquels approchoient de terre en lieu propice pour descendre. Et lors le Capitaine nommé Jean commença à parler aux Chrestiens, en leur exposant la maniere des Sarrazins à combattre, & qu'ils eussent bon couraige, & fiance en Dieu, & il auoit esperance qu'ils auroient victoire des mescreans. Et veindrent iusques à descendre sur la greue, où descendirent les Anglois bien vaillamment les premiers. Et d'un costé & d'autre y eut traict abondamment. Et firent bien & hardiement les archers d'Angleterre, & tellement que les Sarrazins reculerent. Et tousiours descendoient les Chrestiens, & y eut de vaillantes armes faictes, spécialement par l'Admiral de Vienne, le Seigneur de Coucy, le Comte Derby, & autres. Et les animoit fort le Duc de Bourbon, & le Comte d'Eu, qui estoient tousiours les premiers à faire leur debuoir, & donnoient couraige aux autres. Ceux de dedans Thunes faillirent à escarmoucher, qui faisoient merueilles d'armes, & se monstroient bien vaillants gens, & habiles en armes, & finalement par la vaillance des Chrestiens, feurent reboutez dedans Thunes. Parquoy delibererent les Chrestiens y mettre le siege deuant, & là eut diuers assauts. Ceux de dedans estoient trop forts, & bien se defendoient. Et auoit-on ordonné des Chrestiens pour tenir les champs, lesquels les Sarrazins souuent venoient assaillir bien hardiement, & plusieurs fois reboutoient les Chrestiens iusques à leurs nauires. Il y auoit des Geneuois, qui parloient &

1390. entendoient bien le langage des Sarrafins, & auoient aucune congnoissance du Capitaine de dedans Thunes, & eurent paroles ensemble, & le cuiderent induire qu'il se feist Chrestien, & qu'il rendist la ville, & on la luy laisseroit comme sienne, & si luy faisoit-on plusieurs promesses & offres bien grandes. Et il respondit qu'il auoit bonne Loy, en laquelle il auoit esté nourri de ieunesse, & que iamais ne la laisseroit, ne la ville ne rendroit, avec plusieurs autres paroles. Et quand les Chrestiens sceurent sa response, & la volonté de ceux de dedans, ils liurerent plusieurs assauls & par mer & par terre, & en diuers lieux. Mais tousiours estoient reboutez les Chrestiens à leur dommage, & voyoient bien qu'ils ne pouuoient faire chose qui peust profiter, & pource leuerent le siege, & delibererent de tenir les champs, & combattre les Sarrafins, qui estoient sur les champs en belles tentes, & grand foison. Quand les Sarrafins apperceurent la volonté des Chrestiens, ils vindrent au deuant d'eulx, & s'assemblerent en bataille, laquelle feut dure & aspre. Mais apres que les Sarrafins veirent la force & vaillance des Chrestiens, ils se meirent en fuite, & feurent desconfits, & y en eut vne grande quantité de morts, & en leurs tentes les Chrestiens bouterent le feu, apres qu'ils eurent pris ce qui estoit dedans. Et s'assemblerent les Capitaines des Chrestiens, pour sçauoir qu'ils auoient à faire, & trouuerent qu'ils ne se pouuoient tenir au pays par default de viures. Et aussi que leur puissance estoit fort diminuée de gens, tant par mortalité, & guerré, que autrement. Et pource conclurent qu'ils s'en retourneroient dont ils estoient venus. Et ainsi le feirent, & se meirent en leurs nauires. Quand le Roy de Thunes sceut la desconfiture de ses gens, il doubta que ce que les Chrestiens s'en alloient, ne feust qu'une fiction, & pour assembler derechef gens, & eulx renforcer. Et feit tant qu'il parla aux principaux des Geneuois, à la requeste desquels la dicté armée auoit esté faicte, en volonté de traicter à eulx, & de faict y eut accord, C'est à sçauoir, que le Roy rendroit tous les prisonniers Chrestiens qu'il detenoit, & dix mille ducats, & trefues iusques à certain temps, doubtant que les Chrestiens ne retournassent. Et en ce voyage, eut le Duc de Bourbon grand honneur.

Le Duc de Milan, & les Florentins, & Boulonnois de Lom-

bardie, eurent forte guerre ensemble. Et estoit le Duc comme on disoit, trop plus puissant, que les autres. Parquoy ils enuoierent deuers le Roy vne bien notable Ambassade, en luy suppliant qu'il les voulust prendre en sa Seigneurie, & pour ses subiects, & qu'ils luy obeïroient en toutes manieres, comme à leur Seigneur. Et sur ce assembla le Roy son Conseil, & feut trouué que entre le Roy & le Duc de Milan, auoit grandes alliances iurées & promises, & que ce ne seroit pas son honneur de les prendre en sa Seigneurie, & ceste responce leur feut faite. Mais aussi si le Duc de Milan les vouloit aucunelement traualier ou vexer, qu'il leur aideroit.

Les Anglois qui conuersoient aucunesfois avec les François à Calais, disoient que les François estoient lasches de courage. Et y auoit deux Barons ou cheualiers d'Angleterre, qui maintenoient qu'ils n'auoient trouué François, qui avec eulx, ou contre eulx voulussent faire armes. Laquelle chose venüe à la congnoissance de Messire Regnault de Roye, & de Messire Geufroy Boufficault, veindrent deuers le Roy, & luy suppliant, qu'il leur voulust donner congé de faire armes. Et de ce, le Roy feut très-content, & s'en allerent à Boulongne, & les Anglois estoient à Calais. Et comparurent les Anglois, & aussi feirent les François. Et combattirent fort & asprement, & assez longuement. Et finablement feur dict par les Iuges, que c'estoit assez fait, & eurent honneur les vns & les autres, & dînerent & soupperent ensemble, & feirent tresbonne chere les vns aux autres, & se feirent de beaux & gratieux presens. Les François presenterent leurs cheuaux & harnois en l'Eglise de nostre Dame de Boulongne, & se rendirent à Paris à grand honneur.

Au dict an le Roy s'en alla esbatre à Saint Germain en laye, & la Royne aussi, & plusieurs des Seigneurs, Dames, & Damoiselles, & deuisoient ensemble, & s'esbatoient és bois de Poissy. Et vne fois suruint vn terrible tonnerre, si se retrahirent au chasteau. Et disoient aucuns que oncques n'auoient veu si horrible ne terrible tonnerre, & entre Saint Germain & Poissy y eut quatre hommes morts & foudroyez. Et apres ce, toute la nuit feut le plus merueilleux vent que oncques on eut veu, & arracha arbres és forests & iardins, & abbatit cheminées & haults des maisons, & aucuns clochers, & feut

1390. des dommaiges innumerables. Et disoit-on, & aussi estoit-il vrai, que le Conseil estoit assemblé, pour faire vne grosse raille sur le peuple, & quand on veid les dictes tempestes, le Conseil se separa, & feut rompu. Et à la requeste de la Royne feut expressément defendu, qu'on n'en leuast aucunement.

Le Roy d'Espaigne vn iour s'en alloit esbatre aux champs, pour chasser. Si trouua vn lieure lequel ses chiens chasserent, si frappa son cheual des esperons, & courut apres, son cheual cheut, & luy aussi, & de la diète cheute en feut si malade, qu'il en mourut. Et pource son fils enuoya deuers le Roy, pour renouveler les alliances, qu'ils auoient son feu pere & luy ensemble. Laquelle chose le Roy feut volontiers.

Il vint vn homme en guise de hermite à Paris, disant qu'il vouloit parler au Roy, comment que ce feust. Et veint iusques à Saint Paul en l'hostel du Roy, & que ce qu'il vouloit dire, estoit sur le faict du schisme qui estoit en l'Eglise. Et feurent aucuns du Conseil commis & deputez de parler à luy, & luy parlerent. Et feut deliberé, que le Roy ne luy parleroit point, ne le verroit, & luy dit-on, qu'il s'en allast.

L'Vniuersité de Paris, faisoit grande diligence d'exciter le Roy pour mettre paix en l'Eglise, & appaiser le schisme qui y estoit. Et de ce faire, auoit le Roy grande volonté de y entendre. Et dit que on aduifast les moyens, & ce qu'il auoit à faire, & il l'executeroit tresdiligemment, & ne tiendrait point à luy.

Grandes dissentions, haines, & diuisions y auoit en l'hostel du Roy, & par tout le Royaume, tant entre les Princes, que les populaires, spécialement entre les gens, pour le faict des Aydes & finances qu'on exigeoit sur le peuple, sans ce que comme point rien en feust mis au bien de la chose publicque. Mais pourtant autre chose ne s'en faisoit, & s'en alloit la finance en bourses particulieres, & ne scauoit-on que tout deuenoit.

En la fin de la diète année, y eut sur mer & sur terre, les plus merueilleux vents qu'on veid oncques, & tellement qu'il n'arracha pas seulement les arbres, & abbatit les autres choses dessus dictes. Mais il y eut citez abbatües & fondües, & estoient en la mer les ondes si grandes, qu'elle vomissoit poissons de diuerses especes iulques sur la terre. Et disoit-on que c'estoit signe de tout mal.

1391. L'an mille trois cents quatre vingts & onze, le Roy voulant

lant aucunemēt appannager son frere Louys, luy bailla la Duché d'Orleans, laquelle apres la mort de Philippes Duc d'Orleans, estoit venue à la Couronne, & l'en receut en foy & hommaige. Dont ceux d'Orleans feurent tres-mal contents, disans que le Roy leur auoit promis, que iamais ne partiroyent de la Couronne, & en feirent forte poursuite, mais finablement la chose demeura en ce poinct, & feut nommé Duc d'Orleans. Et combien qu'il feust ieune d'age, toutesfois il estoit saige, & de bon entendement, & desiroit fort à acquerir loyaulment & à bon pris, terres & Seigneuries, & acquesta la Comté de Blois, la Seigneurie de Coucy, la Comté de Soissons, & plusieurs autres terres & Seigneuries.

Quand les Florentins & Boulonnois sceurent, que le Roy ne les vouloit pas prendre en sa subiection & Seigneurie, ils fallierent du Comte d'Armaignac, en luy requerant qu'il leur voulust aider, à faire guerre au Duc de Milan. Et combien que il feist plusieurs doubtes, craignant à prendre si grand charge, toutesfois il sy accorda. Car plusieurs luy conseilloyent, & luy disoit-on, que s'il vouloit mener plusieurs estans au Royaume de France, qu'on nommoit compaignées, qui pilloient & robboient, il feroit vn grand bien. Et principalement pour ceste cause il sy condescendit, & les assembla, se meit sur les champs, & passa les monts pour venir deuant Alexandrie. De laquelle chose le Duc de Milan feut aduerti, & dedans Alexandrie meit des gens tres-vaillants secretement. Et quand il sceut la venue du Comte d'Armaignac, qui se dispoisoit à mestre le siege, le Duc feut mestre vne bien grosse embusche assez pres de la ville. Le Comte d'Armaignac, & ses gens se meirent deuant la ville. Ceux qui estoient en embusche, enuoierent certains coureurs, comme pour escarmoucher les gens du Comte, lesquels non sçaichans qu'il y eust grosse garnison dedans, & aussi l'embusche, coururent sus aux coureurs, & les suivirent iusques à l'embusche, & la passerent, & lors ceux de l'embusche faillirent, & y eut fort combatu. Le Comte d'Armaignac voulant secourir ses gens, y alla bien accompagné. Et quand la garnison, qui estoit dedans la ville, ainsi que dict est, le veid, ils faillirent, & feut le Comte desconfit, & en y eut bien trois cents de morts, & luy mesmes feut nauré de huiet playes, & en disant, *In manus tuas Domine commendo spiritum meum*, alla de vie

O

1391. à trespassement. Vaillant homme estoit, & auoit cuidé bien faire.

Au dict an le bon Comte de Foix aagé de quatre vingts ans, en soy voulant mestre à table pour soupper, feut frappé d'apoplexie, parquoy alla de vie à trespassement. Il auoit esté vaillant Prince en son temps; & subinga tous ses voisins. Et estoit bien aimé, honnoré, & prisé, crainct, & redoubté. Et estoit trefbon François, & pource estoit-il en haine du Roy de Nauarre. Riche estoit, & auoit grand thresor. Vn fils bastard auoit, bel & vaillant homme, & bien aimé de ceux du pays. Et comme dessus est dict, il auoit donné la Comté au Roy, & en effect l'auoit fait son heritier. Mais le Roy qui estoit liberal, donna au bastard la Comté, & tout le thresor, & en feut receu par le Roy en foy & hommaige.

Dessus ha esté fait mention de l'Arrest & appointement du Duc de Bretagne, & de Messire Oliuier de Clifson, Cónestable de France, que le Duc n'ha voulu executer. Et quand il feut au pays, rien n'accomplit de chose qui feust ordonnée, ne par luy promise. Dont le dict Connestable se plaignit au Roy, dont il feut tres-mal content, & desplaisant. Parquoy il enuoya vers le Duc pour ceste cause, en luy mandant, qu'il accomplist ce qu'il luy auoit esté ordonné. Mais il n'en teint compte. Et pource Clifson suscita vne grand guerre en Bretagne, qui feut bien aspre, & y eut de grands dommaiges faicts au pays, & feurent comme presques destruits, où les frontieres estoient. Et y eut de vaillans rencontres & armes faictes aucunes fois inhumaines. Les choses estoient fort à la desplaisance du Roy, & de son Conseil, & pource le Roy commanda à son Oncle le Duc de Berry, qu'il allast en Bretagne parler au Duc. Quand le Duc de Bretagne sceut la venue du Duc de Berry, il se meit en vn vaisseau bien accompagné, & contremont la riuere veint au deuant de luy, & ensemble arriuerent à Nantes. La Duchesse de Bretagne, qui estoit soeur du Roy de Nauarre, veint avec ses enfans au deuant du dict Duc de Berry. Plusieurs conuisy eut, où on feit tres-grád chere, & y eut de beaux dons donnez d'un costé & d'autre. Et requit le Duc de Berry au Duc de Bretagne, qu'il assemblast ses Barons & son Conseil, & ainsi feurent conuoquez & assemblez en bien grand nombre. Et avec le Duc de Berry,

auoit enuoyé le Roy de bien notables gens de Conseil, & autres. Et en sa presence & de son Conseil, feurent exposées les doleances que faisoit le Roy. C'est à sçauoir de la monnoye, qu'il faisoit d'or & d'argent, & toutesfois il ne la deuoit faire que noire. Secondement feut exposé comme il n'auoit obeï à l'Arrest, que le Roy auoit donné touchant son Connestable, & qu'il n'auoit voulu deliurer, ne deliuroit les chasteaux, & autres terres dessus declarées, & autres estans à Iean de Bretagne. En commandant & requerant qu'il se desistast de forger les dictes monnoyes, & qu'il voulust accomplir ce qui estoit ordonné touchant le Connestable, & qu'on cessast de faire guerre, veu que ce n'estoit que destruction de pays, & que desia en auoit, qui estoient moult dommaigez. Quand le Duc & ses Barons eurent ouy, ce que les Ambassadeurs auoient dict & proposé, les Barons feurent tres-contents, en disant assez plainement, que les requestes estoient raisonnables. Mais le Duc à chose qu'ils dissent, ne voulut ouurir les aureilles, & en estoit tres-mal content. Et s'en allant à son hostel, dit qu'il feroit emprisonner tous les Ambassadeurs du Roy, & arrester. Messire Pierre de Nauarre, qui estoit frere de la Duchesse, sceut la volété du Duc, & vint à sa soeur, en luy priant qu'elle voulust aduertir le Duc, qu'il ne meist pas à execution, ce qu'il vouloit faire, en luy monstrant les inconueniens qui en pouuoient aduenir. Laquelle tresbenignement ouyt, ce que son frere luy disoit, & en congnoissant qu'il luy disoit verité, luy dit, & promet qu'elle y feroit ce qu'elle pourroit. Et pour ceste cause le Duc estant au soir en sa chambre, la Duchesse & ses enfans avec elle, veindrent à la chambre, & entrerent dedans, & aux pieds du Duc se iecterent, en pleurant effondément, en luy humblement suppliant, qu'il voulust auoir regard à ce que les Ambassadeurs du Roy luy auoient dict, & qu'il ne voulust faire ce qu'on disoit, qu'il auoit entrepris de les arrester. Quand le Duc veid sa femme & ses enfans, il y pensa aucunement, & finalement leur dit qu'il accompliroit leur requeste. Toutesfois plusieurs de ses gens mesmes disoient que ce n'estoit qu'une fiction. Et quelque chose qu'il en feust, il ordonna que le lendemain ils feussent à l'Eglise pour ouyr la responce, qu'il leur vouloit faire, qui seroit douce, raisonnable, & paisible. Et le lendemain, le Duc de Berry, &

1391. les autres Ambassadeurs allerent en la dicte Eglise, & feut la responce du Duc faicte, C'est à sçauoir qu'il iroit deuers la personne du Roy mesmes, & luy feroit telle responce qu'il en seroit content. De laquelle responce les dicts Ambassadeurs feurent contents, & s'en retournerent deuers le Roy, & le Duc de Berry s'en alla à Poitiers. Et en accomplissant ce que le Duc de Bretaigne auoit promis, il se disposa de venir deuers le Roy bien grandement accompagné. Car il auoit quatre cents gentils-hommes, tous armez de haubergeons bien beaux, & s'en veint à Paris. Et auant qu'il y feust, & veint en la presence du Roy, il y eut aucuns brouillis & differents en jeux & esbatemens, dont inconueniens peussent estre venus: mais le Duc d'Orleans appaisa tout. Et s'en veint le Duc en la presence du Roy, qui le receut tres-gratieusement & benigne-ment, dont le Duc feut trescontent, & ensemble feirent bonne chere tant en conuis que autrement, & bien ioyeuse. Et s'excusa le Duc en la presence du Roy & du Conseil, le mieux que il peut & sceut, tant par luy mesmes de bouche, que par son Conseil. Et specialement des choses touchans le Connestable, & disoit qu'il luy faisoit grand mal, quand son vassal & subiect, se portoit si orgueilleusement contre luy. Et que s'il n'auoit point rendu aucunes places, on ne s'en debuioit point esbahir: Car il doutoit que Clisson des dictes places ne luy feist guerre, comme sans icelles il auoit ja faict vn an entier. Finablement apres plusieurs respôses de costé & d'autre faictes & alleguées, feut par le Roy appointé, que le premier appointement par le Roy faict, tiendroït & vaudroït. Et quelque volonté que les parties eussent ou montraissent, ils monstroient semblant que ils feroient le plaisir du Roy.

Le sixiesme iour de Feburier en la dicte année, la Roynne eut vn fils nommé Charles, lequel feut baptisé par l'Archeuesque de Sens, accompagné de dix autres. Et de la dicte natiuité, feurent enuoyez messaigers par tout le pays, & fait-on sonner les cloches, de Paris, & y eut grandes ioyes & festes, tant de feux faicts parmy la ville, que de tables mises parmy les rues.

En ceste année, y eut par plusieurs fois faictes diuerses assemblées & colloctions, pour trouuer maniere & moyen d'auoir paix entre le Roy & les Anglois. Et pource que en-

tre Calais & Boulongne auoient esté diuerſes voyes ou- 1391.
 uertes, le Roy d'Angleterre deſirant d'en auoir vne fin & cō-
 cluſion, delibera d'enuoyer le Duc de Lancaſtre ſon Oncle
 iuſques vers le Roy de France. Et de faiſt, veint iuſques à A-
 miens, où il feut receu ioyeuſement par le Roy, lequel auoit
 bien accouſtumé de faire bonne chere à eſtrangers, & à ſes
 ennemis meſmes. Et demanda le Duc au Roy iour & heure,
 qu'il peult parler à luy, & expoſer les cauſes pourquoy il e-
 ſtoit venu. Iour luy feut assigné en la preſence du Roy & de
 ceux de ſon ſang, & autres de ſon Conſeil. Et feit le Duc plu-
 ſieurs demandes, & meſmement demandoit le demeurant de
 l'or ou argent qui feut promis pour la redemption du Roy
 Iean, montant à vn million, la Duché de Guyenne iuſques au
 portereau d'Orleans, & la Comté de Poictou. Et que en ce fai-
 ſant, bonne paix ſe tiendroir. Les dictes nouuelles ouyes, on
 les feit retraire. Et cependant le Conſeil du Roy eut aduis,
 qu'on feroit la reſponſe, laquelle autresfois auoit esté faiſte
 en autres conuentions, eſquelles ils faiſoient les requeſtes
 deſſus dictes. C'eſt à ſçauoir que aux demandes qu'on faiſoit
 pour les Anglois, on ne donneroit aucune reſponſe, pour de-
 nier ou reſuſer ce qu'ils demandoient, ne leur rien accorder.
 Mais ſimplement leur feut reſpondu, qu'ils rendiſſent le Roy
 Iean, & les oſtaiges qui eſtoient en Angleterre avec luy, &
 qui y eſtoient morts par leur faulte. Et que par le traicté qu'ils
 auoient faiſt, debuoiſent faire vider les gens des places, qui
 y feirent dommaiges irreparables, pour leſquels on leur de-
 manda trois millions. Et quand ils auroiēt faiſt ce que dit eſt,
 ils rendroient reſponſe à la dicté Requeſte, & aux demandes
 qu'ils faiſoient. Le Duc de Lancaſtre, quand il ouyt la dicté
 reſponſe, Il dit qu'il rapporteroit à ſon Roy, ce qu'il luy auoit
 esté dict. Et au ſurplus print congé du Roy, & ſ'en alla à ſon
 pays.

L'an mille trois cents quatre vingts & douze, on diſoit au- 1392.
 cunement que le Duc d'Orleans, (qui eſtoit ieune d'aage,
 mais auoit aſſez bon ſens & entendement, & eſtoit beau Prin-
 ce & gracieux,) par le moyen d'aucuns qui eſtoiēt pres de lui,
 oyoir volontiers gens ſuperſtitieux, qu'on nommoit, & main-
 tenoit exercer ſortileges. Et pource que Meſſire Pierre de
 Craon ſe tenoit bien ſon ſeruiteur, il delibera de l'en aduertir.

1392.

Et de fait par la maniere qu'il peut l'en aduertir, & luy dist la renommée qui de luy couroit. Dont le Duc ne feut pas bien content. Car il luy sembloit que Craon le tenoit sorcier, & le fait bouter hors de la Court. Et pource que le Duc d'Orleans, auoit aucune affection au Connestable Clifson, & qu'il le croyoit, & que aucunes fois auoit eu paroles entre Clifson & luy, d'une maniere de haultaineté, Craon cuida que ce qu'il auoit esté bouté hors de la Court, que ce feust par le moyen de Clifson, & qu'il luy eust conseillé, Il delibera en luy mesme qu'il le courrouceroit, & feroit mourir ou batre. Et pour executer son intention & propos, manda gens, & en venant de Saint Paul où le Roy estoit, en vn hostel, en vn lieu, Craon se meit en vne maniere d'embusche, & vingt compaignons avec luy bien habillez, & couuerts, & armez. Et le iour du saint Sacrement, le quatorziesme iour de Iuin, que Clifson s'en venoit de deuers le Roy de Saint Paul en son hostel, les compaignons saillirent & l'assaillirent. Et tantost tira son espée, & merueilleusement se defendit. Et disoit on, qu'il estoit tousiours garni de haubergeon par dessoubz, ou d'autre forte garniture, & feut iecté de dessus son cheual à terre, & habilement se releua, & se bouta dedans vne maison, & eut es fesses trois coups. Ceux qui firent l'exploit, bien hastiuement s'enfuyrent, doubtrant le peuple, & aussi que les gens de Clifson ne s'assemblassent, lesquels desia s'assembloient. Parquoy ils se meirent en fuite, mais ils ne sceurent si bien fuir, qu'il n'y en eust trois de pris, qui feurent mis en Chastelet, & là par les gens du Roy examinez, confesserent le cas, parquoy eurent les testes coupées. Craon feut appelé à ban, & ne comparut point, parquoy il feut banni, & ses biens confisquez. L'Admiral se transporta pour executer la sentence, en vn chastelet, où on cuidoit qu'il feust retraié, mais il n'y estoit pas, & s'en estoit parti. Et print la place, & entra dedans, & y trouua bien des meubles, qui montoient bien iusques à quarante mille escus. Et ne laissa rien à la femme dudit Craon qui estoit dedans, sinon de trespauures habillemens, & la meit dehors, pour s'en aller où bon luy sembleroit.

En ce temps le Roy bailla à Monseigneur d'Orleans Pierrefons, & la Ferté-Millon.

Clifson feut guairi des playes qu'il auoit eu, & faisoit grand

diligence d'enquerir, où estoit Craon, & disoient aucuns qu'il estoit és Allemaignes, ou en Bretagne, ou en Hainault hors du Royaume. Et en la fin on trouua qu'il estoit allé vers le Duc de Bretagne, le quel l'auoit receu, & faict tresbonne chere. Et estoit commune renommée, que de la diète bature le Duc de Bretagne estoit consentant, & estoit bien desplaisant qu'on ne l'auoit tué. Quand le Roy & son Conseil feurent aucunement aduertis, que le Duc de Bretagne estoit consentant de la bature de Clifson, & qu'il auoit receu Craon, & lui auoit faict bonne & ioyeuse chere, combien qu'il eust commis vn si horrible & dâné cas & crime de lese Majesté, & pource estoit banni du Royaume de France, feut deliberé & conclud par le Roy, que luy mesmes iroit en Bretagne. Et mesmement que le Duc touchant la prise de Clifson, n'accomplissoit ce qui auoit esté ordonné par le Roy, & que luy mesmes auoit promis d'accomplir. Et manda le Roy à ses Oncles de Berry, & de Bourgongne, la deliberation qu'il auoit faict d'aller en Bretagne, en les requerant qu'ils veinssent vers luy le mieux accompaignez qu'ils pourroient. Lesquels feurent bien esbahis, quand ils sceurent l'entreprise, & comme ceux qui estoient au Conseil du Roy, auoient osé estre si hardis, d'auoir faict la diète conclusion, sans les appeller, eulx qui estoient Oncles du Roy, veu que l'entreprise estoit grande, & à l'executer pouuoit auoir des difficultez & dangers beaucoup. Et de ce, feurent tresmal contents de ceux qui estoient autour du Roy, & qu'on disoit le gouuerner, c'est à sçauoir Clifson, la Riuere, & Noujant, & si estoient plusieurs autres. Car ils tenoient le Roy de si pres, que nul Office n'estoit donné sinon par eulx, ou de leur consentement. Et sembloit par leurs manieres, qu'ils cuidoient estre perpetuels en leurs Offices, & qu'on ne leur pouuoit nuire. Et haultement, & en grande auctorité se gouernoient. Et si estoient les gens d'Eglise, & de l'Vniuersité, tres mal cõtents d'eux. Car ils greuoient eulx, & leurs Iurisdicions Ecclesiastiques, & leurs priuileges. Et voloient de si haulte aille, que à peine on en osoit parler. Et afin qu'on n'eust pas leget accez deuers le Roy, se firent partir de Paris, & aller à Saint Germain en laye. Ce nonobstant l'Vniuersité delibera d'enuoyer vne notable Ambassade deuers le Roy au dict lieu de Saint Germain. Ety feurent deputez le Re-

1392. fteur meſmes, & pluſieurs nobles clerks de toutes les quatre facultez. Et quand ils feurent à Sainct Germain, feirent ſçauoir à Monſeigneur le Chancellier, & au Conſeil, qu'ils auoient à parler au Roy, & qu'il leur pleuſt de leur faire auoir audience, & par pluſieurs fois interPELLERENT, & feirent diligence de l'auoir. Et apres pluſieurs reſponſes & choſes diſtes par le Chancellier, il leur dit, que le Roy eſtoit occupé en tres grandes & haultes beſongnes, & que de preſent n'auroiét audience, & qu'ils ne ſe ſouciaſſent de leurs priuileges, & qu'on les garderoit tresbien, & qu'ils ſ'en allaſſent. Et pource ſ'en retournerent à Paris, ſans eſtre ouys. Ce qu'on tenoit à choſe bien eſtrange.

Le Roy pour executer ce qui auoit eſté entrepris & conclud en ſon Conſeil, ſe partit des marches de deuers Paris, & ſe meit à chemin pour venir au Mans, & y arriua enuiron la fin de Iuillet. En la diſte ville, attendit ſes Oncles les Ducs de Berry, & de Bourgongne. Et eſtoit le Duc de Berry fort occupé à la conquête de Guyenne, où il labouroit & trauailloit fort, & en auoit conqueſté la plus grand partie, & preſques tout. Toutesfois il faiſoit la meilleure diligence qu'il pouuoit, de ſ'en venir. On enuoya deuant Sable, vne place forte, faire commandement qu'ils rendiſſent la place au Roy, & luy feiſſent obeïſſance. Mais ils feirent les ſourds, & ne obeirent en aucune maniere, & diſoit on que Craon eſtoit dedans. Quand le Duc de Bretagne ſceut que le Roy approchoit, & qu'il auoit intention de venir en armes ſur luy, il enuoya vers le Roy bien notable Ambaſſade. Car il doubtoit fort la venue du Roy, & qu'il n'entraſt en armes en ſon pays. Si preſenterent ſes Ambaſſadeurs leurs leſtres qui eſtoiét de creance, qui feut que le Duc ſ'eſmerueilloit que le Roy vouloit venir au diſt pays, & qu'il n'eſtoit ia neceſſité qu'il amenast armée, & qu'il le feroit obeir en toute la Duché de Bretagne, & que tout eſtoit ſien, & à ſon commandement. Et ſ'offroit à luy faire tout ſeruice, comme ſon bō, vrai, & loyal vaſſal & ſubieſt. Or eſt vrai que enuiron le commencement d'Aouſt, on ſ'apperceuoit bien, que le Roy en ſes paroles & manieres de faire, auoit aucune alteration, & diuerſité de langaige non bien entretenant. Lequel diſt, que comme que ce feust, il vouloit iſtre aux champs en armes. Et de faiſt, monta à cheual,
pour

pour iſtre, & au deuant de luy veint vn meſchant homme mal habillé, pauure, & vile perſonne, lequel veint au deuant du Roy, en luy diſant, Roy où vas tu? Ne paſſes plus outre, car tu es trahi, & te doit on bailler icy à tes aduerſaires. Le Roy entra lors en vne grande frenesie, & merueilleuſe, & couroit en diuers lieux, & fraploit tous ceux qu'il rencontroit, & tua quatre hommes. Lors on feit grande diligence de le prendre, & feut pris & amené en ſon logis, & feut mis ſur vn liſt, & ne remuoit ne bras, ne iambe, & ſembloit qu'il feust mort. Les Phyſiciens veindrēt qui le veirent, lesquels le iugerent mort ſans remede. Tout le peuple pleuroit & gemittoit, & en ceſt eſtat, le voyoit chaſcun qui vouloit. Les Anglois meſmes, par le moyen du Seigneur de la Riuere, le veindrent veoir. Et de ce, feut le Duc de Bourgongne trefmal content. Et dit au Seigneur de la Riuere, que vn iour viendroit, auquel il ſ'en repentiroit. C'eſtoit grand pitié de veoir les pleurs & douleurs qu'on menoit. La choſe veint à la cognoiſſance du Pape, & du Roy d'Angleterre, qui en feurent tres-deſplaiſans. Et par tout on faiſoit proceſſions, & Oraisons tresdeuotes. Si recouura ſanté, & ſe voia à noſtre Dame, & à Monſieur Saint Denys. Il feut en vne Abbaye de religieuſes, & y feut ſa neuſuaine. Bien deuotement veint à Chartres, feut ſa deuotion en l'Egliſe, & y donna vn beau don. Et feut ramené à Paris.

Et tousiours faiſoient les Seigneurs de la Riuere, & Noujant, le mieux qu'ils pouuoient. Les Ducs de Berry, & de Bourgongne, reprindrent le gouuernement du Royaume. Et combien que les diſts de la Riuere, & Noujant, euſſent bien & notablement gouuerné, & eſpargné vne grand finance, toutesſois les diſts Ducs ne queroient que maniere de les vouloir deſtruire. Et aduint que le Duc de Bourgongne rencontra le Seigneur de Noujant au Palais, & luy dit, Seigneur de Noujant, il m'eſt ſuruenue vne neceſſité, pour laquelle me fault auoir preſentement trente mille eſcus, Faiſtes les me bailler du threſor de Monſieur le Roy, ie les reſtituerai vne autre fois. Lequel luy reſpondit bien doucement, & en grand reuerence, que ce n'eſtoit pas à luy à faire, & qu'il en parlaſt au Roy, & au Conſeil, & qu'il feroit ce qu'il luy ſeroit ordonné. Le diſt Duc qui vouloit auoir, la diſte ſom-

1392. me, sans ce que personne en sceust rien, (Cē qui eust esté en la charge du dict Seigneur de Noujant,) respondir, Vous ne me voulez faire ce plaisir, ie vous assure que en brief vous destruirai. Et tantost apres ne feurent pas contents les dicts Ducs, d'auoir desapointé ceux qui gouernoient, & de leur auoir osté tout le gouuernement qu'ils auoient, mais les persecuterent eulx & leurs alliez en plusieurs & diuerses manieres, & specialement le Connestable Messire Oliuier de Clifson, les dicts de la Riuere, & Noujant. Et feut mandé Clifson par le Roy, qui respondit à ceux qui y veindrent, que le Roy n'auoit mestier de Connestable, & n'y voulut venir. Car il se doubtoit, & non sans cause: Siseut desapointé, & le Comte d'Eu, fait Connestable. Et procederent au bannissement dudit Clifson, & de fait feut banni. Et quand le dict Duc de Bourgongne, eut dict au dict de Noujant, les paroles dessus dictes, il vint au dict Iuuenal, Garde de la Preuosté des marchands (duquel Noujant auoit espousé la niepce,) & luy dit, ce que le Duc de Bourgongne luy auoit dict. Dont le dict Iuuenal le conforta, en luy disant, que souuent les grands Seigneurs dient des paroles, qu'ils ne mettent pas à execution, & qu'il falloit trouver moyen de capter sa beneuolence. Et le dict de Noujant, qui estoit saige & prudent, & cognoissant bien gens, respondit qu'il congnoissoit bien les conditions du Duc, & qu'il auoit accoustumé de mettre ses volontez à execution. Et qu'il l'auoit bien monstre au fait de Messire Iean des Mares, & d'autres. Et tantost apres feut mis en la bastille de Saint Antoine, & bien gardé, & ne trouuoit ami, ne parent, ne autre, qui s'en osast meller. Et tous les iours disoit on, & estoit commune renommée, qu'on luy couperoit la teste, & venoient plusieurs ses haineurs qui l'accusoient, & bailloient de grandes charges. Comme dict est, le dict Iuuenal auoit espousé la niepce du dict Seigneur de Noujant, lequel se gouernoit tellement en son Office, qu'il auoit l'amour & la grace du Roy, & de tout le peuple, tant de gens d'Eglise, que nobles, marchands, & commun. Et par les paroles mesmes que le Roy disoit souuent, qu'il n'auoit franchise en sa maladie, ne autrement, que en son Preuost des marchands, & ceux de sa ville. Or est vrai, que le dict Duc feit emprisonner pareillement le Seigneur de la Riuere, & plusieurs au-

tres, duquel de la Riuere le dict Iuuenal estoit parent. Et sca- 1392.
uoit que eulx estans en gouuernement, auoient grandement
faict leur debuoir, & que ce qu'on leur faisoit, n'estoit que par
enuie. Et pource il delibera de leur aider, & en parla aux dicts
Seigneurs, & à ceux qui se mesloient du gouuernement de la
Iustice, en toute douceur & humilité, requerant qu'on leur
feist iustice, accompagnée de misericorde, si mestier estoit. Et
de ce, le Duc de Bourgogne, quelque semblant qu'il mon-
strast, saignant que la requeste estoit raisonnabl estoit tres-
mal content. Et des lors commença à machiner c^ontre le dict
Iuuenal, pour le destruire. Et finablement la chose par le
moyen du dict Iuuenal feut tellement conduite, que és dicts
de la Riuere & Noujant, ne feut trouuée chose, par laquelle
ils eussent defferui à auoir forfaict ne corps, ne biens, & feu-
rent seulement bannis de la Court du Roy, en leur defen-
dant qu'ils n'en approchassent de quatorze ou quinze lieues,
& seulement eurent dommaige és biens qui feurent pris en
leurs maisons, apres leur prise, & en plusieurs frais & mises
qu'il fallut faire. Et le tout considéré, Dieu leur fait belle gra-
ce, d'ainsi eschapper.

Les Seigneurs dessus dicts recognoissans la faulte qu'ils
auoient faict touchant Clisson, & aussi que le Roy recou-
uroit souuent santé, & luy donnoit on le plus de plai-
sance qu'on pouuoit, voulurent que tout ce qui auoit esté
faict contre Clisson, feust rappelé, reuocqué, & mis au
neant. Toutesfois tousiours estoit en l'indignation du Duc
de Berry.

Au dict temps, le Roy auoit aucunement recouert santé,
& luy donnoit on le plus de plaifance, comme dict est, qu'on
pouuoit. Et feut ordonné vne feste au soir en l'hostel de la
Royne Blanche, à Saint Marcel pres Paris, de hommes sau-
uaiges enchaifnez, tous velus. Et estoient leurs habillemens
propices au corps, velus, faicts de lin, ou d'estoupes atta-
chées à poix raisine, & engressez aucunement pour mieux re-
luire. Et veindrent comme pour danfer en la salle, où auoit
torches largement allumées. Et commença on à ietter par-
my les torches, torchons de fouierre. Et pour abreges, le
feuse bouta és habillemens, qui estoient bien lassez & cou-
sus. Et estoit grand pitié de veoir ainsi les performes em-

1392. brasées, & combien qu'ils s'entreteinsissent, toutesfois se delaisferēt ils. Et d'iceux hommes sauuaiges, est à noter que le Roy en estoit vn. Et y eut vne Dame veufue, qui auoit vn manteau, dont elle affeubla le Roy, & feut le feu tellement estouffé, qu'il n'eut aucun mal. Et y en eut aucuns ars & bruslez, qui moururent piteusement. Vn y eut qui se iecta en vn puis, l'autre se iecta en la riuere. Et fut la chose moult piteuse & merueilleuse. Plusieurs diligences feurent faictes d'enquerir dont ce venoit, & en parloit on en diuerses manieres, & ne peut on oncques sçauoir ne auerir le cas. Et pour l'enormité du cas, feut ordonné que le dict hostel, où adueindrent les choses dessus dictes, qu'on disoit l'hostel de la Royne Blanche, seroit abbatu & demoli. Le Roy lequel s'estoit voué à Monseigneur Saint Denys, y alla en pelerinaige, & ses Oncles avec luy. Et fait mettre le corps de Monseigneur Saint Louys en vne chasse, & voulut quelle feust couuerte d'or. Et pour la faire belle & bien faire, il donna deux cents cinquante deux mares d'or, & mille liures parisis pour au dessus de la chasse, faire vn chapiteau de cuiure. Messieurs aussi de Berry, & de Bourgogne, donnerent de beaux & riches vestemens, en remerciant Dieu, & Monseigneur Saint Louys, de la grace que Dieu auoit fait au Roy, d'auoir recouuert santé.

Cliffon nonobstant toutes les choses dessus dictes, faisoit tousiours forte guerre, & merueilleuse, & auoit tousiours plusieurs qui luy aidoint, comme le Seigneur d'Aigreuille, lequel alloit vers luy pour le seruir, & menoit certaine quantité de gens. Mais il feut rencontré par les gens du Duc de Bretagne, & fort se defendit. Et y eut d'un costé & d'autre de morts. Et à la fin feut le dict Seigneur de Aigreuille prins prisonnier, & mis à rançon & finance, laquelle il paya, & feut deliuré.

Le Pape en faueur du Roy de Sicile, ordonna vn dixiesme, pour luy aider à trouuer moyen de recouurer son Royaume, & pour ses autres necessitez. Les gens d'Eglise sy opposerent, & l'Vniuersité, & appellerent des Commissaires ordonnez, & eurent apostres refutatoires. Mais il leur feut dict plainement, que nonobstant leurs appellations & oppositions, ils le payeroient. Et ainsi le firent.

Soubz ombre d'aucunes differences dessus declarées, plusieurs Seigneurs tenoient des gens sur les champs, Lesquels faisoient des maux beaucoup. Et pource feut aduisé, qu'il falloit trouuer moyen de les mettre hors. Et feut ordonné que le Marechal Boufficault, en meneroit vne partie en Guyenne. Et ainsi le feit.

Le Comte de Saint Paul auoit vne grande guerre au Roy de Boheme. Et disoit que son pere auoit presté argent grand foison au dict Roy, & de ce auoit obligation. Et auoit enuoyé vers le dict Roy, requerant qu'il le voulust payer, lequel voulut veoir son obligation, & luy enuoya l'on, & la veid, & la leut, & puis la recta au feu, & respondit, que iamais n'en payeroit rien. Et pource le dict Comte delibera de faire guerre audit Roy, lequel tenoit la Duché de Luxembourg. Et pource le dict Comte print le demeurant des dicts gens de guerre, & les mena en la Duché de Luxembourg, en laquelle on ne se donnoit garde d'auoir guerre, & n'en estoit nouvelles, & occupa la plus grand partie, & luy obeissoit-on. Le Roy de Boheme le sceut, & tantost enuoya gens d'armes pour defendre son pays, & feit mettre le siege en aucunes places. Le Comte enuoya prier au Roy, qu'il luy enuoyast aide de gens. Ce que le Roy feit, & y enuoya le Connestable, à tout huit cents hommes d'armes. Et les gens du Roy de Boheme, qui tenoient le siege, le sceurent, & doubterent que les François ne feussent plus qu'ils n'estoient. Et pource se leuerent, & s'enfuirent hastiuement, & laisserent leurs tentes, & tout ce qui estoit dedans, & des biens plusieurs, dont les François feurent moult riches.

En la dicte année, les eaües feurent si trespassees & petites, que les riuieres feurent non nauiguables.

Vne Loy feut faicte ou vne Constitution dont dessus est fait mention, que en France les Roys seroient couronnez en l'age de quatorze ans, Laquelle n'auoit pas esté publiée. Et pource le Roy ordonna, qu'elle feust publiée, & enregistrée, tant en Parlement que es autres Chambres. Et ainsi feut fait.

Il y eut deux Chartreux, qui s'en alferent à Rome, deuers l'Antipape Boniface, en l'exhortant qu'il voulust entendre à auoir vnion en l'Eglise, & que sur ce il voulust escrire au Roy

1392. de France. Lequel se condescendit fort à leur requeste. Et feit faire vne Epistre bien faite & dictée au Roy, laquelle il bailla aux diëts Chartreux. Et veindrent en France, & la presentèrent au Roy. Et la veid, & feit lire le Roy, & en estoit bien content. Et en icelle offroit Boniface à faire toutes choses licites à auoir vnion en l'Eglise. Le Pape Clement le sceut, & voulut faire prendre & emprisonner les diëts deux Chartreux, tant par le moyen de l'Vniuersité, que autrement. Mais le Roy les en garda, & defendit qu'on ne meist la main à eux, ne que aucun empeschement leur en fust fait, ne en corps, ne en biens, & les receut le Roy tres-doulcement & gracieusement. Tantost le Pape Clement enuoya deuers le Roy diligemment, en luy signifiant, qu'il estoit prest de faire cesser le schisme en toutes manieres. Combien que plusieurs disoient, que ce n'estoit que toute fiction, & qu'il auoit intention que ja accord ne se feroit, né à vnion ne entendroit, sinon qu'il feust tousiours Pape. Et plusieurs Seigneurs & notables clerics, tiroit à son intention & cordelle. Processions & Oraisons se faisoient bien & diligemment, pour la paix de l'Eglise & vnion. Et y eut vne propre messe ordonnée & faite, & pardon à ceux qui la diroient, & pour l'vnion de l'Eglise prioient.

La Duchesse d'Orleans nommée Blanche l'ancienne, fille de feu Charles le Bel, fils de Philippes le Bel, alla de vie à trespassement. Et dient aucuns, que ce feut celle, à laquelle le Roy Philippes de Valois, ou le Roy Iean son fils, parla aucunemēt aigrement. Et elle luy respondit, que si elle eust eu couillons, il ne luy eust osé dire ce qu'il luy disoit. Elle estoit de belle, honeste, & sainte vie, & grand aumosniere en sa vie, distribuant aux pauvres tous ses biens meubles, tellement qu'on n'y trouua comme rien. Le corps feut porté à Saint Denys, & y eut beau seruice de morts, auquel le Roy estoit present, & faisoient le deuil les Oncles du Roy, & ceux du sang. Et disoit-on merueilles de biens d'elle. Et par tout prieres & oraisons se faisoient, pour le salut de son ame.

Quand on sceut la grace que Dieu auoit fait au Roy du feu qui feut bouté, quand le Roy, & autres, faisoient les hommes sauuaiges, dont il eschappa sain & saif, par le moyen de la Dame, qui le couurit de son manteau. On feit deux choses, L'vne, vng seruice pour ceux qui y trespasserent, bel & nota-

ble. L'autre, le Roy & ceux du sang allerent en pelerinaige à 1392. pied à la chappelle des martyrs, au pied de Montmartre, pour reuenir à nostre Dame en deuotion. Et estoit le Roy seul à cheual, ses frere & Oncles, & autres du sang, & foison de gentils-hommes, nuds pieds. Et en cest estat, veindrent iusques à nostre Dame, où ils feurent receus par l'Euesque, chanoines, chappelains, & gens d'Eglise bien honnorablement, feirent leurs offrandes & oraisons, & y eut vne tresbelle messe chantée, & maintes larmes des yeulx jectées, en remerciant Dieu de la grace, qu'il auoit faict au Roy.

Le Duc d'Orleans, frere du Roy, se gouernoit aucunement trop à son plaisir, en faisant ieunesses estranges, à luy qui estoit si prochain parent du Roy & de la Couronne, lesquelles ne fault ja declarer. Si feut ordonné, qu'on luy monstreroit doucement & gracieusement. Lequel feut semblant de le prendre en patience. Car il estoit assez cault, & saige de son aage. Mais il auoit ieunes gens pres de luy, & aussi les vouloit il auoir, qui le induisoient à faire plusieurs choses, que bien aduertit, il n'eust pas faict. Et vne iournée, le dessus dict Iuvenal, lequel le Duc auoit retenu de son Conseil, se aduisa qu'il luy diroit, & de faict luy dit par vne maniere ioyeuse. Si le print le dict Duc trop plus en gré, qu'il ne feut de ses Oncles, & respondit qu'il pouruoyeroit aux charges qu'on luy donnoit. Et commença à faire faire vne belle chappelle aux Celestins de Paris, & autres bonnes œuvres.

L'an mille trois cents quatre vingts & treize, y eut plusieurs 1393. colloquutions & parlemens faicts, pour trouuer moyen d'auoir paix entre les Roys de France & d'Angleterre, dont se entremectoient plusieurs notables personnes gens d'Eglise, & plusieurs autres tant nobles que autres, tant d'un costé que d'autre. Et feut le Roy d'Angleterre à Vuestmonstier aupres Londres vn Parlement, où les trois Estats estans assemblez, feut mis en deliberation, si on traicteroit de paix avec le Roy de France, & y eut diuerses imaginatiōs. Car les ieunes Princes & nobles estoient d'opinion, qu'on n'entendist point à paix. Et leur sembloit, que qui viendrait en France en grand puissance, qu'on la conquesteroit, veu la maladie du Roy, & qu'il y auoit eu en aucuns lieux des differences, & mesmemēt en Bretagne. Les anciens Princes, Seigneurs, & Prelats feurent d'o-

1393. pinion contraire, & alleguoient plusieurs grandes & belles raisons, par le moyen desquelles la plus grande & saine partie se condescendit, à ouurir traicté de paix avec les François, & que fils y vouloient entendre, qu'on y enuoyast notable Ambassade. Et feut ce fait à sçauoir au Roy de France, lequel feut tres-content d'y entendre. Et y eut iour & lieu pris à y besongner. Et y enuoyerent les Anglois les Ducs de Lancastre & de Clocestre, & aucuns Comtes, Prelats & gens d'Eglise, qui veindrent à Calais. De la partie du Roy, y feurent enuoyez les Ducs de Berry & de Bourgongne, & gens d'Eglise, & autres, qui veindrent à Abbeuille en Ponthieu. Et feut ordonné & accordé, que l'assemblée se feroit à Melinguehan en vne chappelle, en laquelle feut ordonné qu'on feroit deux huis opposites l'un de l'autre, pour entrer & yssir les Princes en la dicte chapelle, & d'un costé & d'autre se tendroient tentes pour eulx retraire. Le Duc de Bourgongne feit dresser vne moult belle tente, en forme & maniere d'une ville enuironnée de tours, & enicelle auoit grand logis, & y auoit assez espace pour retraire trois mille homes, & entour par dedans y auoit salles & chambres, où estoient tendues diuerses tapisseries, les vnes de laine, à batailles diuerses, toutes barües en or, & es autres estoit signée la passion de nostre Sauueur Iesus Christ, & estoient tenues moult belles, & moult riches. Et puis y auoit les sieges des Seigneurs à eulx asseoir, tres-noblement parez, qui estoit bien plaissante chose à veoir, & le bas comme le plancher couuert de tapis velus. Et disoient les Anglois, que oncques n'auoient veu chose en tel cas si riche, ne si bien ordonnée. Et là feurent les series de Pasques, tous les Seigneurs assemblez en la dicte chapelle. Et delayerent à ouurir les matieres & ouuertes de paix, (pource qu'on leur auoit enuoyé aucunes choses secretes par escript,) iusques au mois de May ensuiuant. Auquel temps, & d'un costé & d'autre, feut promis de retourner. Et cependant y eut les plus merueilleuses tempestes de tonnerre, gresle, & vents horribles qu'on veid oncques. Et disoit-on que ce faisoient les diables, courroucez & indignez de ce qu'on ouuroit les matieres de paix. Et au dict mois de May, reueindrent les dicts Seigneurs bien parez, & richement, tant d'un costé que d'autre. Et tres-diligemment entendoient à ouurir les moyens de paix. Or estoit le Cardinal

nal de la Lune à Paris, lequel y estoit venu par l'ordonnance 1393.
 & commandement du Pape Clement, pour l'union de l'Eglise. Lequel veint, où lesdicts Seigneurs estoient, pour parler aux Anglois du fait de l'Eglise, & leur demanda à auoir audience. Ce que les dicts Princes d'Angleterre ne luy voulurent donner en aucune maniere, & plusieurs fois le refuserent, disans qu'ils n'estoient enuoyez de leur Roy pour ceste maniere. Toutesfois à la requeste des Princes de France, & par son importunité, il eust audience, & leur feit vne notable proposition de l'Élection de Clement, pour monstrier qu'elle estoit bonne, iuste, & canonicque, & qu'on luy debuoit obeir, & le reputer pour Pape, en detestant le fait de l'Antipape, & es matieres deduisoit plusieurs & grandes auctoritez de la sainte escripture. Et quand il eut tout au long dit, tout ce que il voulut dire, & proposer, la responce des Anglois feut bien briefue, en disant ce que dict est, que de la matiere n'auoient point de charge de leur Roy, mais bien sçauoient qu'il tenoit pour Pape Boniface, & que pour tel le tenoient tous ceux du pays d'Angleterre. Et que s'il vouloit aller au dict pays d'Angleterre, prescher & dire ce qu'il leur auoit dict, qu'ils luy feroient auoir sauf-conduit. Mais le dict Cardinal n'y voulut aller, & s'en retourna. Les dicts Seigneurs de France & d'Angleterre, ouriront plusieurs moyens d'auoir paix ensemble, & leur sembloit que les choses y estoient tresbien disposées. Et les choses estoient secretes, & eussent esté mises à effect, si ce n'eust esté la maladie du Roy. Et conclurent que le Roy iroit iusques à Abbeuille, & le Roy d'Angleterre iusques à Calais. Et derechef le Roy deueint malade, & en la frenesie où il auoit esté au Mans. Qui estoit grand pitié, tant pour le Royaume, que pour sa personne. Car il estoit bel, & bien formé de tous ses membres, & de grand & vaillant couraige.

Le Duc de Berry, qui long temps auoit eu en grande indignation Messire Oliuier de Clisson, Connestable de France, le receut en sa grace, & feut sa paix faicte.

Plusieurs grandes diuisions auoit en la Court du Roy, mais tousiours Iuuenal mettoit tout à point, dont plusieurs le honnoroient & prisoient. Les autres qui ne pensoient que à leur profit, luy en sçauoient mal gré, disans qu'il se mesloit de plus de choses qu'il ne luy appartenoit. Et de fait, y en eut qui

Q

1393. dirent au Duc de Bourgogne, qu'il auoit dict plusieurs paroles de luy & d'autres, & fait plusieurs choses dignes de grande punition, si luy en dirent aucunes, qui n'estoient que toutes bourdes. Le Duc de Bourgogne, qui ne l'auoit pas trop bien en sa bonne grace, pour cause qu'il auoit pourchassé la deliurance desdicts de Noujant & de la Riuiere, legement ouurit les oreilles, & les creut, & feurent les cas mis en escript, & baillez à deux Commissaires de Chastelet, pour en faire information. Et subuertit-on bien trente tesmoings tous faulx, qui deposioient l'un comme l'autre. Puis apporta-on l'information au dict Duc, vn leudy apres dîner, & luy dirent que l'information estoit faite, & qu'il ne la failloit que grossifier. Lequel leur dit qu'elle suffisoit ainsi, & qu'ils la baillassent aux Aduocats & Procureur du Roy de Parlement, afin qu'ils feussent instruits le Sabmedy matin, de proposer les cas contre le dict Iuuenal. Ce qui fent fait. Mais le dict Procureur respondit, qu'il ne se feroit ja partie contre le dict Iuuenal, ny ne proposeroit ce qu'ils apportoiert. Car par plusieurs conjectures voyoit bien, que c'estoient toutes choses controuuées. Parquoy les dicts cas feurent baillez à vn Aduocat de Parlement, nommé Maistre Iean Andriguet, Lequel se chargea de les proposer le Sabmedy matin, comme de par le Roy, & commandement du grand Conseil. Or adueint que les dicts Commissaires de Chastelet, quand ils se partirent du Duc de Bourgogne, s'en veindrent soupper à l'eschiquier en la Cité, & se teindrent assez aises. Car aussi estoient-ils bien payez, & beurent fort, tellement qu'ils meinent leur information sur le bord de la table, & d'auenture en janglant & caquetant ensemble, avec aucuns des sollicitours & conducteurs de la besongne, les dictes informations cheurent à terre. Et le lieu, où ils souppoient, estoit la chambre du maistre de l'hostel, si y suruint vn chien, qui estoit de l'hostel, qui les print pour ronger, & les porta en la ruelle du liét, dont les dicts Commissaires ne s'aduiferent. Car l'un se attendoit, que l'autre les eust en sa manche. Et quand vint que le Seigneur feut couché, la Dame en se voulant coucher pres de son mari, s'en alla à la ruelle, & toucha de son pied aux dictes informations, & dit à son mari, qu'elle auoit trouué vn gros roolle, en la ruelle du liét. Lequel luy dit, qu'elle luy baillast, ce qu'elle feit.

Et quand il veid que c'estoit vne information contre Maistre Iean Iuuenal, Garde de la Preuosté des marchands de par le Roy, il feut bien fort esbahi, en disant, Helas qui sont ces mauuaises gens qui le veulent greuer? Si se leua à l'heure presques de minuidt, & veint à l'hostel de la ville, frappa à l'huis, & parla au concierge qui couchoit en bas, en disant qu'il vouloit parler au Preuost. Si se leua, le feit entrer en sa chambre, & tantost luy bailla les dictes informations. Et quand le Preuost les veid, il remercia le bourgeois, lequel apres qu'il luy eut compté, comme il les auoit trouué, s'en retourna à son hostel. Encores feut le dict Preuost bien ioyeux, quand il feut aduerti des bourdes & charges qu'on luy impoisoit, & congnoissoit bien aucuns des tesmoings. Et ne se sceut le lendemain leuer si marin, qu'il n'arriuaist à sa porte vn huissier d'armes, nommé Iesus, qui le vint adjourner à comparoir en personne par deuant le Roy, & son Conseil, au bois de Vincennes (où le Roy estoit, qui estoit retourné à conualescence) au Sabmedy matin ensuiuant, à l'heure de neuf heures. Et au dict lieu, feut ordonnée vne forte tour & prison pour le mestre. Et le dict Sabmedy feut renommée comme publicque, qu'on luy debuoit couper la teste, dont tout le peuple s'esbahissoit. A la dicté heure & iour, le dict Preuost ne s'y trouua pas seul. Car il feut acompaigné de trois à quatre cents des plus notables de la ville de Paris, & veint au bois, non de rien esbahi. Si comparut deuant le Roy & son Conseil. Et proposa le dict Maistre Iean Andriguet, en alleguant les cas qu'on luy auoit baillé par escript, & prenant conclusions criminelles. Et lors se leua le dict Iuuenal, qui estoit aduerti du cas, par la dicté telle quelle information, & se voulut defendre comme il en estoit bien aisié, & auoit vn beau langaige, & si estoit plaisant homme, aimé, honoré, & prisé de toutes gens. Mais le dict Andriguet dit qu'il ne debuoit point estre ouy, & qu'on le debuoit enuoyer en prison. Et sur ce, y eut plusieurs paroles. Et finalement le Roy en sa personne dit, qu'il vouloit que son Preuost des marchands feust ouy. Lequel s'excusa bien & grandement des cas qu'on luy impoisoit, & se defendir, en soy deschargeant bien & honorablement. Et outre dit, que contre vn Officier Royal, on ne debuoit pas proceder par informations. Et aussi qu'il ne croioit pas, quelque chose que dist Andriguet, qu'il y

Qij

1393. eust informations faictes, veu que ce n'estoient que toutes choses controuuées. Et lors le dict Andriguet, qui certifioit qu'il en apperoit bien, demanda aux Cômmissaires qui estoient derriere luy, qu'ils luy baillassent, qui cuidoient les auoir, & demandoient l'un à l'autre, Ne les auez vous pas? Pour abbreger, ils ne sçauoient qu'elles estoient deuenües. Et quand le Roy, veid la maniere, luy mesmes dict, Le vous-dis par sentence que mon Preuost est preud'homme, & que ceux qui ont fait proposer les choses, sont mauuaises gens. Et dit au dict Iuuenal, Allez vous-en mon ami, & vous mes bons bourgeois. Si s'en retournerent. Et quand les faulx. tesmoins sceurent l'issue, ils feurent moult esbahis, & parlerent l'un à l'autre, en congnoissant leur faulte, & estoient en bien grande perplexité, & sceurent que leur information estoit perdue. Et les Cômmissaires leur dirent, qu'il falloit qu'ils deposassent encores ainsi qu'ils auoient fait. Et ils respondirent qu'ils n'en feroient rien, & qui plus est, qu'ils sçauoient le dict Iuuenal estre preud'homme, & demeura la chose en ce point.

En ce temps, y eut vn beau miracle à nostre Dame de Saint Martin des champs. Il y auoit vne creature pocheresse, qui estoit enceinte d'enfant, & sa grossesse elle la mussoit le mieux qu'elle pouuoit, tellement qu'on ne s'en apperceut oncques. Toute seule se deliura, & cuida couvrir, & celer son cas aduenü, & elle mesme mussa son enfant en vn fiens. Vn chien sentit aucunement qu'il y auoit quelque chose, & grata tellement au lieu, qu'il descouurit l'enfant. Vne bien deuote femme le veid, qui passoit d'aduenture par là, & print cest enfant, & le porta à Saint Martin des champs, deuant l'autel nostre Dame, en faisant vne Oraison telle qu'elle sçauoit. L'enfant ouurit les yeulx, cria, & alaieta, & feut baptisé, & vesquit trois heures, apres mourut.

C'estoit grand pitié de la maladie du Roy moult merueilleuse comme dict est, & ne congnoissoit personne quelconque. Luy mesme se descongnoissoit, & disoit que ce n'estoit il pas. On luy amenoit la Royne, & sembloit qu'il ne l'eust oncques veüe, & n'en auoit memoire ne congnoissance, ne d'hommes ou femmes quelsconques. Excepté de la Duchesse d'Orleans. Car il la voyoit, & regardoit tres-volontiers, & l'appelloit belle sœur. Et comme souuent il y ha de mauuai-

ses langues, on disoit, & publioient aucuns qu'elle l'auoit en-
 forcelé, par le moyen de son pere le Duc de Milan, qui estoit
 Lombard, & que en son pays, on vsoit de telles choses. Et feut
 malade depuis le mois de Iuin iusques en Ianuier. Et l'vne des
 plus dolentes & courroucées qui y feust, c'estoit la Duchesse
 d'Orleans. Et n'est à croire ou presumer, qu'elle l'eust vou-
 lu faire ou penser. Il vint à Paris vn meschant homme, lequel
 à proprement parler estoit forcier. Et se vanta que qui le vou-
 droit laisser faire, qu'il guairiroit le Roy. Et qu'il auoit vn li-
 bure qui s'adressoit à Adam, de la consolatiō de son fils Abel,
 qu'il pleura, & en feit le deuil cent ans. On feit parler à luy, &
 trouua l'on que c'estoit vn trompeur. Et de luy feut faite pu-
 nition, telle que au cas appartenoit. L'on feit par tout pro-
 cessions, biē deuotes oraisons, & prieres pour la santé du Roy.
 Car autre remede on ne trouuoit. Et diuerses fois, les Phyli-
 ciens du Roy feurent assemblez, & autres physiciens mandez
 de diuers pays. Mais on n'y scauoit trouuer ne la cause de la
 maladie, ne la forme comment on le pourroit guairir. Et luy
 laissa la diēte frenaisie, & disoit on que c'estoit par le moyen
 des prieres & Oraisons qu'on auoit fait, & qui de iour en iour
 se faisoient.

Le vingt-quatriesme iour d'Aoust, la Royne eut vne fille,
 qui feut nommée Marie. Et feit la Royne promesse & vœu,
 que si elle viuoit, qu'elle seroit religieuse.

Afin que les Anglois ne cuidassent pas qu'on ne voulust en-
 tendre à paix en toutes manieres licites & raisonnables, on
 enuoya Messire Philippes Vicomte de Meleun deuers les
 Anglois, leur requerir qu'ils voulussent continuer les iour-
 nées entreprises, sus le fait de la paix. A laquelle parfaire,
 le Roy, ses parens, & ceux de son sang auoient tres-bonne
 volonté.

Le Roy alla en pelerinaige à Saint Denys en France, &
 aussi au mont Saint Michel. Et auoit de belles & grandes de-
 uotions en Dieu, & s'en retourna esbatre à Saint Germain
 en laye. Et luy faisoit on toutes les plaïsanées qu'on pouuoit.

La guerre estoit tousiours forte en Bretaigne entre le Duc,
 & Clisson, laquelle estoit bien desplaisante à plusieurs. Et y en-
 uoya le Roy, l'Euesque de Langres, Messire Herué Lereche-
 ualier, & Maistre Pierre Blanchet, lesquels veindrent en Bre-

1393. taigne, & parlerent à Clisson, en luy monstrant les inconueniens qui estoient aduenus, & aduenoiēt tous les iours à cause de la dicte guerre. Lequel respōdit, qu'il estoit prest de faire le plaisir du Roy, & tresgratieuſement se porta. Puis allerent vers le Duc, mais il ne les voulut ne veoir, ne ouyr, & sembloit qu'il feust fort indigné contre le Roy mesmes. Et apres ce que plusieurs de ses gens luy eurent remonstré, que au moins ne pouuoit-il que de les ouyr, il les feit venir en sa presence. Si luy exposerent bien humblement & doucement la charge qu'ils auoient de par le Roy. Ce qu'il print en grande impatience. Toutesfois il respondit assez gratieuſement, mais on apperceuoit bien qu'il estoit fort indigné. Les Ambassadeurs s'en retournerent & dirent la response qui leur auoit esté faicte.

Le Roy estant à Saint Germain en laye & son Conseil, l'Vniuersité de Paris enuoya vne notable Ambassade par deuers luy, le prier & requerir, qu'on voulust entendre à l'vnion de l'Eglise. Et leur octroya leur requeste, & voulut qu'on aduiſast toutes les manieres, par lesquelles l'vnion se pourroit faire, & il estoit prest d'y entendre. De laquelle chose les Ambassadeurs au nom de l'Vniuersité rendirent graces & mercis au Roy, & aux Seigneurs qui estoient avec luy, & en firent leur rapport à l'Vniuersité. Laquelle feit vne bien notable procession à Saint Martin des champs, en remerciant Dieu & le Roy de sa bonne response. Et pource que plusieurs craignoient & doubtoient publicquement dire leur imagination & opinion, feut dict qu'on auroit vn coffre, auquel par vn pertuis on mettroit l'imagination des opinans. Et feurent ordonnez de chascune nation deputez qui verroient les cedules. Et feut trouué que la commune opinion de ceux qui meirent les cedules, estoit, que la voye de cession, ou de compromis, estoit la plus seur. Et sur ce vn bien notable clerc, & grand Orateur, nommé Maître Nicole de Clemangis, feit vne tresbelle Epistre, qui feut monstrée au Roy, & presentée de par l'Vniuersité. Lequel tresbenignement & doucement la receut.

Boniface l'Antipape de Rome escriuit aussi vnes lettres au Roy, par lesquelles sembloit bien, qu'il auoit bonne volonté à l'vnion de l'Eglise.

Le Roy de Hongrie escriuit au Roy de la victoire que les 1393. Sarrafins auoient eu alencontre de luy, & la forme & maniere de la bataille, en luy requerant aide & confort. (A laquelle chose faire, le Roy estoit fort enclin) & si luy escripuit la moquerie & derision que les Sarrafins faisoient & disoient, de la diuision qui estoit entre les Chrestiens, touchant l'Eglise, & le schisme d'icelle.

Le Roy d'Armenie, qui auoit esté assez longuement en France, Seigneur de belle & bonne vie, honneste, & catholique, alla de vie à trespassement. Et feut mis en sepulture, vestu de vestemens tous blancs: Et à son enterrement, feurent les Princes & Seigneurs, & foison de peuple. Et estoit assez riche de meubles: Car quand il vint, il apporta de grandes richesses, lesquelles il distribua en quatre parties. L'une, à vn bastard qu'il auoit. La seconde, aux pauvres mendiants. La tierce, à ses familiers & seruiteurs. Et la quarte, aux Maistres gouverneurs de son hostel. Et estoit fort plaint pour sa belle vie, & honneste conuersation.

Quand le Roy & son Conseil eurent ouy la response des Ambassadeurs, qu'on auoit enuoyé vers le Duc de Bretagne, on doubta fort qu'il ne feust mal content, de ce qu'on ne luy auoit enuoyé aucun du sang du Roy. Et pource feut aduisé par le Conseil, que le Duc de Bourgongne y iroit, lequel y alla, & le receut le Duc grandement, notablement, & ioyeusement. Et feut mandé Clisson par les Ducs tous seuls, lequel parla à eulx en toute douceur & humilité, & tellement qu'il y eut bonne paix & accord fait, dont tout le pays feut bien ioyeux. Et monstroient le Duc à Clisson tous signes d'amour. Et pource qu'on auoit parlé du mariage de la fille du Roy, & du fils du Duc, il s'en vint à Paris, & laissa en Bretagne Clisson son Lieutenant & gouuerneur de tout le pays.

En la dicte année, Monseigneur de Berry feut à Saint Denys en France. Et auoir voloncé & grand desir d'auoir vne partie du chef Saint Hilaire, qui estoit en la dicte Abbaye. Et de ce, auoit plusieurs fois requis l'Abbé & religieux. Dont apres plusieurs difficultez luy feut accordé, & luy en baillerēt partie. Pour laquelle enchasser, il feir faire vn beau cheftrout d'or, & le feir mestre dedans, & l'apporta à Poictiers, & le donna à l'Eglise de Saint Hilaire. Et en recompensation

1393. de ce, il donna à la dicte Eglise de Saint Denys, vne partie du chef & du bras de Monseigneur Saint Benoit.

Les Iuifs à Paris feurent accusez d'auoir en despit de nostre Sauueur Iesus-Christ, tué vn Chrestien, & quoy que ce feust, l'auoient villené & batu. Et en faisant information, feut trouué, qu'ils faisoient plusieurs choses non bien honnestes, en despit des Chrestiens. Plusieurs en y eut de pris, & emprisonnez, & battus de verges par les carrefours, & condamnez en dixhuit mille escus, lesquels ils payerent, qui feurent employez à faire le petit pont à Paris. Et si y en eut plusieurs qui se feirent Chrestiens, & feurent baptisez.

Le Roy qui n'auoit pas mis en oubli, la requeste que luy auoit fait le Roy de Hongrie, de luy enuoyer aide & secours, luy enuoya le Comte d'Eu, Connestable de France, bien grâdemment accompagné. Et quand le Prince des Turcs sceut, que les François venoient pour luy faire guerre, il se retrahit, & laissa les entreprises qu'il auoit fait contre le dict Roy de Hongrie. Le Comte d'Eu, desplaisant qu'il n'auoit fait quelque exploict de guerre sur les Sarrazins, sceut par le rapport de gens de bien, que le Roy de Boheme sentoit mal en plusieurs articles de la foy, & ne valoit guieres mieux que Sarrazin, & pource se bouta au dict Royaume. Et meit le Roy, & tout le pais en sa subiection, & s'en retourna à grand honneur & louenge.

Il y auoit en l'Vniuersité de Paris, vn bien notable clerc nommé Maistre Iean de Varennes, lequel estoit tresbien beneficié en plusieurs & diuers lieux. Lequel delaisa tous ses benefices, excepté sa prebende de Rheims, delibéré de soy retraire. Et s'en vint au pays, & esleut son lieu & sa demeure assez pres de la Cité de Rheims à Villedommange, en vne chappelle fondée de Saint Dié, assise au dessus du dict village.

1394. L'an mille trois cents quatre vingts & quatorze, y eut plusieurs allées & venües, pour le fait de trouuer moyen de paix entre les Roys de France & d'Angleterre. Et de ce faire, auoient grand desir d'un costé & d'autre d'y entendre. Et mesmemēt le Roy d'Angleterre desiroit d'auoir alliance sur toutes choses par mariage, combien que la plus aînée des filles du Roy n'auoit que sept ans. Et feut aduisé qu'il estoit expedient

diër que derechef feussēt enuoyez notables Ambassades pour traicter de la matiere. Et de ce, feurēt contents les deux Roys. Et enuoya le Roy à Boulōgne nos Seigneurs les Ducs de Berry & Bourgongne avec notables gens de Conseil, & autres. Et aussi de la partie des Anglois feurent enuoyez plusieurs notables Princes, & grands Seigneurs. Et feurent entre eulx ordonnées & concludës certaines trefues en esperance de paix, durant quatre ans. Et disoit on que entre les Princes, y auoit conclusions tendans à finale conclusion de paix. Et pource que souuent les Anglois vsent de paroles deceptiues, feut aduisé qu'on reuísiteroit les bonnes villes, & qu'on les fortifieroit. Et en outre feut defendu, qu'on ne iouast à quelque ieu que ce feust, sinon à l'arc, ou à l'arbalestre. Et en peu de temps les archers de France feurent tellement duiçs à l'arc, qu'ils surmontoient à bien tirer les Anglois, & se mettoient tous communément à l'exercice de l'arc & de l'arbalestre. Et en effect, si ensemble se feussent mis, ils eussent esté plus puissants que les Princes & nobles. Et pource feut defendu par le Roy, qu'on cessast, & que seulement y eust certain nombre en vne ville, & pays, d'archers & d'arbalestriers. Et en apres, commença le peuple à iouer à autres ieux & esbatemens, comme ils faisoient parauant.

En ce temps, vint à Paris comme Legat, le Cardinal de la Lune, commis pour le faict de l'Vnion de l'Eglise.

Et environ le Carefme, les diçts faux tesmoings, qui auoient depesé contre Maistre Iean Iuuenal des Vrsins, Garde de par le Roy de la Preuosté des marchands, eurent contrition & repentance de leur peché. Et veindrent vn iour à leur Curé, en luy exposant la faulte qu'ils auoient faict, le plus secretement & doucement qu'ils peurent tous ensemble, & en vne mesme maniere, & estoient bien trente ou environ. Quand le Curé les eut ouy, il leur dit, qu'il ne les oseroit absouldre, & qu'ils allassent au penitencier de l'Euesque de Paris, & y allerent, & les enuoia à l'Euesque, & y feurent, & les ouit. Et leur dit, que le cas de soy estoit si grand & si mauuais, qu'il craingnoit bien à les absouldre. Et pource qu'ils allassent au Cardinal de la Lune, qui estoit à Paris, & Legat de nostre Sainct Pere, lesquels y feurent, & faisoient toutes ces choses le plus secretement qu'ils pouuoient. Lequel Cardinal les ouyt, & les abso-

R

1394. lut, & leur donna en penitence, que le Vendredy saint au matin, ils feussent à l'huis du dict Preuost tous nuds, en luy confessant leur cas & mauuaisié, & le priant qu'il leur voulust pardonner. Et ils respondirēt, que si le dict Iuuenal les voyoit, il les congnoistroit bien. Et pource le dict Cardinal feut content, qu'ils eussent chascun vn drap affeublē, & feussent nuds dessous. Lesquels le dict matin vindrent à l'huis dudict Iuuenal, lequel s'estoit leué bien matin, pour aller gagner les pardons, qui trouua à son huis les dessus dicts ainsi affublez, qui feut bien esbahi. Si leur demanda qu'ils vouloient, desquels l'un dict leur faulte & peché. Et tous à vne voix en pleurant, requirerent pardon. Et adonc le dict Iuuenal, & ses seruiteurs commencerent à pleurer. Aussi ny pensoit il plus, & leur demanda qui ils estoient, qui demandoient pardon. Lesquels dirent que par leur penitence, ils ne se debuioient point nommer. Mais parce qu'il auoit veu l'information, dont dessus est fait mention, les nomma chascun par leur nom, tellement qu'il n'en oublia nul, & leur dit, vous estes tel, & tel, puis bien doucement leur pardonna. Dont ils le remercierent humblement, en baisant la terre, & pleurans effondément. Et puis par le moyen d'aucuns des dessus dicts à qui il parla, il sceut toute la mauuaisié, & dont estoit venue, & pourquoy.

Et entre le dict Cardinal, & ceux de l'Vniuersité, pour le fait de l'vniō de l'Eglise y eut plusieurs diuersitez merueilleuses, & propositions bien & trop rigoureuses. Et baillerent ceux de l'Vniuersité vne proposition, que le Cardinal veid & leut, & eurent aussi de luy response bien rigoureuse. Et en outre de l'auctorité Apostolicque leur defendit, qu'ils n'vsassent plus de telles manieres de langaiges, dont ils ne feurent pas bien contents, & de tout leur pouuoir poursuiuoient ladite vniō. Et escripuit le Pape au Roy, qu'il luy voulust enuoyer Maistre Pierre d'Ailly, & Maistre Gilles des Champs, qui estoient deux solēnnels Docteurs en Theologie. Lesquels quand on leur en parla, dirent plainement qu'ils n'y iroient point. Car ils se doubtoient de leurs personnes. Quand le Pape veid que ceux de l'Vniuersité estoient si aigres, il aduisa qu'il falloir qu'il se ioignist avec les Seigneurs, & ceux qui estoient pres du Roy. Et enuoya messaiges bien garnis

d'or & d'argent, & de choses plaisantes, & spécialement feit faire vn plaisir au Duc de Berry, tellement que luy & le Cardinal se ioignirent ensemble, & menacerent fort aucuns de l'Vniuersité. Lesquels s'en allerent au Duc de Bourgongne, & luy supplierent qu'il feist tant enuers le Roy, qu'ils feussent ouys. Lequel le feut, & tellement qu'ils feurent ouys, & feirent vne epistre, laquelle le Roy voulut estre mise en François, ce qui feut fait. Puis tout veu & considéré, leur feut defendu que d'icelle, ne du contenu, ils ne parlassent, ne vassassent point. Dont ils feurent tresmal contents, & delibererent que tousiours poursuiuroient le contenu en la dicte epistre. Et pource qu'on les vouloit empescher, intimerent cessations, & se sentoient bien auoir aucun port d'aucuns estans pres du Roy. Et en l'intimation des dictes cessations, estoit present le dict Cardinal: mais le Duc de Berry estoit absent.

Et cependant les Cardinaux estans en Auignon, desirans l'vnion de l'Eglise, considerans comme il leur sembloit, que le Pape tressaigement y entendoit, s'assemblerent en intentio d'y remedier. Et de ce, feut le Pape tant mal content que merueilles. Et s'en retourna le dict Cardinal de la Lune au Pape, lequel le seiziesme iour de Septembre, cheut malade de apoplexie, dont il mourut comme soubdainement. Riche, & puissant estoit, tant en meubles que autrement, & est chose comme incroyable, de la cheuance qu'il auoit. Et lors les Cardinaux, apres ce qu'il feut mis en sepulture honorablement, ainsi qu'il appartenoit bien, delibererent de eulx mestre en conclaue. Laquelle chose le Roy cuida plusieurs fois empescher par messaigers, & autrement, esperant d'y mestre vnion. Dont ils feirent difficulté, disans qu'il leur failloit vn chef, & aussi que Messire Raymond de Turaine, qui se disoit nepueu du feu Pape, leur menoit guerre tresgrande, & auoit pris par la vaillance de son corps, plusieurs places aux quelles il auoit mis garnisons, parquoy il tenoit les Cardinaux en Auignon en grande subiection. Dôt les Cardinaux escriuirent au Roy, dequoy il feut bien desplaisant contre le dict Raymond, & luy escriuit qu'il se deportast. Lequel craignant le Roy, le feut par aucun temps, & s'abstint de faire guerre. Et eux considerans & voyans qu'il leur failloit vn chef, eleurent le Cardinal de la

1394. Lune, lequel feut nommé Benediſt. Et aſſez toſt apres recommença le diſt Meſſire Raymôd à faire guerre, & eſtoit ſa querelle, qu'il demandoit les biens meubles & ſucceſſion du Pape Clement ſon Oncle. Et diſoit on, qu'il faiſoit guerre au Pape ſans Rome, & au Roy ſans Couronne, c'eſt à ſçauoir au Roy de Sicile, & au Prince d'Orenge ſans terre, car toutes ſes terres eſtoient occupées.

Le Roy auoit deuotion d'aller à Sainſt Denys, & y alla, & fait ſes offrandes. Car continuellement eſtoit comme en oraiſons & prieres, croiant par l'interceſſion de Monſeigneur Sainſt Denys, euit l'inconuenient de maladie qui luy eſtoit aduenüe, doubtant y rencheoir.

Et apres l'eſlection du diſt Cardinal de la Lune, il enuoya deuers le Roy auant ſa conſecratiõ, en luy ſignifiant ſon eſlection, laquelle par l'impreſſion & importunité des Cardinaux il auoit accepté. Et faiſoit ſçauoir au Roy, que par toutes voyes qu'on aduiſeroit, il eſtoit preſt d'entendre à l'vnion de l'Egliſe. Dont le Roy & auſſi ceux de l'Vniuerſité feurent bien ſoyeux. Et delibererent ceux de l'Vniuerſité d'enuoyer vers le Pape. Et de faiſt, ils enuoyerent vne bien notable Ambaſſade, & eſcripuiſſent lettres exhortatoires à entendre à vnion. Et veindrent en Auignon, & preſenterent les lettres au Pape, lequel vouloit aller diſner. Et quand il eut veu les lettres, par leſquelles on l'exhortoit ſi doucement. Il reſpondit en deſpouillant ſa chappe, qu'il eſtoit auſſi preſt de ceder, comme il auoit eſté preſt de deſpouiller ſa chappe, laquelle de faiſt il deſpouilla. Et depuis demanderent audience en public, & l'eurent, & les ouyt le Pape à leur plaifir, & leur dit, qu'il eſtoit content de leur oſtroyer roolle, pour auoir des benefices. Et que pour ouurir la forme & maniere de venir à la voye de ceſſion, il faudroit auoir aucunes colloquutions ſecretes. Et ſ'en retournerent les diſts Ambaſſadeurs treſſoyeux. Et la reſponſe ouye à Paris, le Roy y enuoya ſon aumosnier, nommé Maiſtre Pierre d'Ailly, qui eſtoit vn bien notable Docteur en Theologie. Lequel preſenta les lettres du Roy, & eut audience. Et luy fait le Pape pareille reſponſe, comme à ceux de l'Vniuerſité. Et apres ſ'en retourna à Paris, & rapporta au Roy la bonne volonté que le Pape auoit à l'vnion de l'Egliſe. Mais pluſieurs doubtoient que ce ne feust que toute fiction, &

qu'il disoit d'un, & qu'il pensoit d'autre.

Le Roy par la deliberation de son Conseil, & de ceux de l'Vniuersité, voulut & ordonna que les Archeuesques, Euesques, Abbez, religieux, & autres personnes Ecclesiastiques feussent assemblez, & leur manda qu'ils feussent à Paris à certain iour, pour auoir leur aduis de proceder en la matiere. Et combien que tous n'y veindrent pas, (Car aucuns auoient iustes excusations,) toutesfois la plus grand partie y vint. Et si y auoit plusieurs grands & notables clerks, tant de l'Vniuersité de Paris, que d'autres Vniuersitez, & lieux de ce Royaume. Et estoit belle chose, & notable, de veoir l'assemblée. Et pour demander les opinions, & en faire les relations au Roy, & à son Conseil, feut ordonné Messire Simon de Cramault, Patriarche d'Alexandrie, & Euesque de Carcassonne, qui estoit vn des principaux du Conseil du Roy, & notable clerk. Les Prelats, & autres personnes Ecclesiastiques, feurent tous assemblez au Palais à Paris. Et là estoit present le dict Maistre Pierre d'Ailly, Aumosnier du Roy, Docteur en Theologie, & les Ambassadeurs de l'vniuersité, qui auoient esté en Auignō vers le Pape Benedict. Lesquels feirent leur relation des responses, que leur auoit faict le Pape Benedict, disant qu'il estoit prest & appareillé d'entendre à l'vniō de l'Eglise en toutes manieres, iusques à ceder son droit, si mestier estoit. Et ce fait, le Patriarche leur exposa, comme le Roy les auoit mandez, pour auoir leur aduis & conseil, des manieres de proceder, & de trouuer la voye d'y paruenir. Lors les dicts Prelats, en gardant les loüables coustumes anciennes, feirent vne procession par la grand salle du Palais, & par la Court, pour venir à la sainte Chapelle, où feut dictē vne messe du saint Esprit par vn Prelat; pour inuocquer l'aide de Dieu, à ce qu'il les voulust inspirer, à bien deliberer, puis s'en retournerent en la dictē salle. Et les fait le Patriarche iurer, qu'ils diroient leur vraye opinion, sans aucune fiction, ne partialité, & demanda à chascun son opinion, dont y en eut plusieurs belles & haultes. Et finalement tous feurent d'opinion, que la voye de cession, estoit la plus expediente, *imō* necessaire à trouuer vniō, & meilleure que la voye de compromis, dont aucuns auoient touché. Laquelle deliberation feut rapportée au Roy, aux Seigneurs du sang, & du grand Conseil, lesquels en feurent tres-contents.

R. iij.

1394. Et feut conclud , que la dicte voye diligemment se practiqueroit. Et y eut gens ordonnez , à faire les instructions. Et donna le Roy cōgé aux Prelats de eux en retourner , & leur feut chargé expressement de faire processions & Oraisons pour l'Eglise , & aussi pour la santé du Roy.

En la dicte année, la Duchesse d'Orleans, eut vn fils, nommé Charles, & à le baptiser, y eut grande solemnité.

Et le douziésme iour de Ianuier ensuiuant , la Royne eut vne fille nommée Michelle. Et voulut le Roy que la porte de Paris , par laquelle on va aux Chartreux , à Vanues , & autres plusieurs villaiges , qu'on appelloit la porte d'enfer , eust nom la porte Saint Michel, & la feit faire plus grande & ample, que elle n'estoit.

Depuis le mois de Decembre iusques au premier iour de Mars, les riuieres tant grandes que petites, feurent si grandes, terribles, & merueilleuses, qu'on veid oncques, & feirent plusieurs grands dommaiges. Et estoit pitié de veoir les maisons, hommes, femmes, & enfans , qui par rauines venoient à val les eaües. Et feut ce, comme tout generalement en ce Royaume. Qui estoit chose bien piteuse, & merueilleuse.

1395. L'an mille trois cents quatre vingts & quinze, le Roy comme Tres-chrestien, & Catholicque, & bras dextre de l'Eglise, de tout son pouuoir voulut & delibera de entendre à mettre vnion en l'Eglise. Et combien que les Anglois eussent fait vne Epistre par l'vne de leurs Vniuersitez, adressant au Roy Richard, differente de celle de l'Vniuersité de Paris , à eulx semblant la voye de cession non estre la plus conuenable, & plusieurs grandes raisons sur ce alleguoient, responsables à ceux de France, maintenans que la voye de compromis, ou de faire Concile general, où toutes les deux parties, feussent presentes , où deüement appellées , estoit la plus conuenable. Toutesfois le Roy delibera d'auoir vnion par voye de cession, selon la deliberation qui auoit esté faite en son Palais. Et enuoya vers Benedict vne bien notable Ambassade, c'est à scauoir les Ducs de Berry, & de Bourgongne, & son frere le Duc d'Orleans, accompagnez de l'Euesque de Senlis, de Maistre Oudart de Moulins, du Vicomte de Melun , & de Messire Gilles des Champs, & autres, qui arriuerent en Auignon le quatriésme iour de May, enuiron quatre heures apres midy, & al-

lèrent tout droit vers le Pape, & luy presenterent les lettres 1395.
du Roy escriptes & signées de sa main. Et pareillement l'E-
uesque d'Arras, en presenta vnes au College des Cardinaux.
Et les receut le Pape bien grandement & honnorablement, &
luy baisèrent le pied, la main, & la bouche. Et apres print la pa-
role le Duc de Berry, en disant les causes pourquoy le Roy les
auoit enuoyés. Et le Pape respondit qu'ils estoient las & tra-
uaillez, qu'ils s'en allassent reposer, & que le lendemain vein-
sent dîner avec luy, & il leur diroit, quand ils auroient audien-
ce. Ceux aussi de l'Vniuersité de Paris, auoient pour la matie-
re mesme enuoyé vne notable Ambassade, & lettres, lesquel-
les feurent presentées au Pape & aux Cardinaux par Maistre
Iean Luquet, qui feurent receus en la maniere dessus dicté, &
dict comme aux dicts Seigneurs. Et les feit-on retraire en la
chambre de parement, & prindrent vin, & espices, & s'en alle-
rent à Vienne, où ils estoient logez. Et là feut le Conseil
assemblé, pour sçauoir s'ils auroient audience, & aussi si Mai-
stre Gilles des Champs proposeroit, qui en estoit chargé. Le-
quel recita ce qu'il auoit intention de dire. Et luy feut ordon-
né ce qu'il diroit, & aussi ce qu'il tiendrait.

Et le lendemain retournerent au Palais, dînerent avec le
Pape, & feurent grandement & honnorablement seruis, & de
diuers mets. Et apres dîner leur feut dict par le Pape, qu'ils
veinssent le lendemain, & qu'ils auroient audience. Lesquels
vindrent, & feurent ouys en la presence du Pape, & de vingt
Cardinaux, où proposa Maistre Gilles des Champs, & print
son theme, *Illuminare his qui in tenebris, & in umbra mortis sedent, ad
dirigendos pedes nostros in viam pacis*. Lequel il deduisit bien notable-
ment, en montrant le bien de paix, en recommandant le Roy,
& les Seigneurs, & le Royaume, & aussi la bonne volonté du
Pape, de tendre à fin d'union. Et demanderent audience à part
& particuliere, & à leur donner iour. Le Pape feut response
incontinent, & print son theme, *Subditi estote omni creatura propter
Deum, siue Regi tanquam precellenti, siue Ducibus, tanquam ab eo missis*.
Et tres-benignement & gracieusement le deduisit, & en con-
clusion dit, qu'il entendoit à trouuer union en l'Eglise, en tou-
tes manieres deües & raisonnables, qui luy seroient conseil-
lées.

Et au lendemain, assigna iour à auoir audience particulie-

1395. re, & y veindrent, & proposa l'Euesque de Senlis, & print son theme, *Spiritus sanctus docebit vos omnem veritatem*. Et faicte la diuision, & fondation de son theme, requit au Pape qu'il baillast la cedula, & toutes les escriptures qui auoient esté faictes tant en son eslection, que en son entrée du Conclau, & que expressément ils auoient charge de ce requerir, & qu'il auoit escript au Roy, qu'ainsi le feroit. Le Pape respondit, que sur ceste matiere, il parleroit aux Seigneurs à part. Lesquels respondirent que s'il y parloit, si ne feroient-ils aucune response, iusques à ce qu'ils eussent eu & veu autant de la dicté cedula. Et lors il l'enuoya querir par le Cardinal de Pampelune, qui l'auoit en garde, & feut leüe, & en fait Maistre Gontier Coul, Notaire & Secrétaire du Roy, autant. Laquelle il enuoya au Roy, & leur sembloit qu'elle seruiroit tresbien à l'intention, pour laquelle ils estoient venus. Car expressément à l'entrée du Conclau, les Cardinaux iurerent & promirent d'entendre à la voye d'vnion, & que si l'un deulx estoit esleu, il y entendroit *vsque ad cessionem inclusiuè*. Et estoit signée de toutes les mains des Cardinaux. Toutesfois le Pape requit & supplia, que elle fust tenue secreta. Et le vingt-huictiesme iour de May, le Pape en brief dit, que luy & ses Cardinaux auoient aduisé, que luy & l'Antipape, & ses Cardinaux d'un costé & d'autre, feussent assemblez en quelque lieu, pres du Royaume de France, & soubz la protection du Roy, & qu'il failloit qu'ils feussent ouys, & qu'il n'y auoit autre voye plus seure. Car il failloit auoir le consentement des deux parties.

Le Mardy premier iour de Iuin, les Ducs & Ambassadeurs retournerent deuers le Pape, & les Cardinaux. Et pour respondre à la voye que le Pape auoit ouuert, proposa Maistre Gilles des Champs, & print son theme, *Viam veritatis elegi, & iudicia tua non sum oblitus*. Lequel il deduisit, & declara les voyes qui auoient esté ouuertes au Conseil de l'Eglise à Paris. Dont la premiere estoit, d'auoir Concile general. La seconde, de s'assembler en un lieu soubz la protection du Roy. Et en ce estoit comprise la voye de compromis. La tierce estoit, la voye de franche cession, & volontaire renonciation des deux parties à leur droit. Et que en ceste maniere, s'estoient tous arrestez, le Roy & le Conseil. Le Pape persista en son imagination, & vfa de gracieuses paroles, en declarant plusieurs choses, & deman-

da

da qu'on luy baillast la dicte voye , fulcie & roborée de toutes les raisons , & la maniere de la practiquer. Et luy feut respondu , qu'il pouuoit assez entendre , ce qu'il luy auoit esté dict , sans rien bailler par escript. Et lors vfa d'aucunes paroles , monstrant qu'il estoit aucunement desplaisant , disant que nul ne le pouuoit en rien contraindre sinon Dieu , dont il estoit Vicaire. Et à tant s'en allerent les Seigneurs disner. Et de par le Roy priuément fait-on prier aux Cardinaux , qu'il leur pleust de venir deuers eulx à Villeneufue , lesquels y allerent tres-volontiers. Et leur requit Monseigneur de Berry , que en leurs priuez noms , ils voulussent dire & declarer leurs imaginations. Lesquels tous en effect feurent d'opinion , qu'il n'y auoit voye , sinon de faire bouter l'Antipape dehors , ou la voye aduisée par le Pape , de conuention. Et s'en retournerent les Cardinaux à leurs maisons. Et enuoia le Pape aux Seigneurs vn Euesque leur prier , que à chascun d'eulx parlast à part. Dont ils voulurent auoir l'opinion de leur Conseil , qui feut different. Car les aucuns disoient qu'ils y debuoient parler , les autres non.

Et le Mecredy , veille de la feste Dieu , allerent vers le Pape , & disnerent avec luy , & tous les principaux de l'Ambassade , & y demeurerent iusques à Vendredy matin , & feurent à vespres. Apres lesquelles , les Ducs de Berry , & d'Orleans allerent soupper , & Bourgongne demeura avec le Pape , & parla à luy à son aise. Car tous deux ieusnoient. Le Ieudy parla à part à Monseigneur de Berry , & le Vendredy matin à Orleans , lequel se confessa à luy , & de sa main receut le saint Sacrement del'autel. Si s'en retournerent à Villeneufue , & au Conseil reciterent , ce que le Pape leur auoit dict , qui estoit tout vn , qui estoit , qu'il se plaignoit fort de ce qu'on vouloit ouurir la voye de cession , & dit aucunes paroles bien poignans. A quoy le Duc de Bourgongne luy auoit bien respondu , en sustentant l'opinion du Roy.

Si luy feut requis par les Seigneurs , qu'il voulust bailler conclusion finale de sa volonté en public. Et y eut vn Iacobin nommé frere Jean Hatonis , qui meit aucunes conclusions erronnées , parquoy feut requis qu'il feust arresté , & saisi de son corps. Et finalement le Pape le vingt-cinquième iour du mois de Iuin , fait venir les Seigneurs , & disnerent avec luy. Et apres disner , leur bailla certaine Bulle declaratiue de son in-

1395. tention. Et les dictz Seigneurs respondirent, qu'ils la feroient veoir & visiter, & se partirent, & allerent à Villeneuve. Et les conduisoient les Cardinaux d'Albanie, & de Pampelune. Entre lesquels Cardinaux y eut de grosses paroles, sur le fait du contenu en la dicte Bulle. En imposant l'un à l'autre, que ce auoit-il fait faire, & qu'il vouloit gouuerner, & tant qu'ils procederent iusques à dementir l'un l'autre bien haultement. Et dit Albanie à Pampelune, qu'il'auoit menti par la gueule, & y eut entre eulx plusieurs meschantes paroles, dont se rioient les Seigneurs. Et la nuit, feut le feu bouté en deux arches du pont, qui estoit de bois, tellemēt qu'il failloit passer à bateaux. Et de ce, ceux de la ville d'Auignon, & plusieurs Cardinaux feurent fort troublez. Et disoient aucuns, que ce auoit fait faire le Pape à cautelle. Mais il s'en excusa grandement, en assermant qu'il n'en sçauoit rien, & en estoit desplaisant, & tresdiligemment le fait refaire. Et qui voudroit mettre toutes les allées, les venües, les propositions, & allegations d'un costé & d'autre, la chose seroit longue. Et doit suffire de monstrier la bonne & vraye affection qu'auoit le Roy, & nos Seigneurs de son sang, à l'vnion de l'Eglise.

Les Iacobins d'Auignon, quand ils sceurent les conclusions de Hatonis, ils veindrent vers les dictz Seigneurs, & Ambassadeurs de l'Vniuersité declarer, que les dictes conclusions n'auoient oncques esté faittes de leur sceu ou consentement, & que en rien ils n'y adheroient.

Plusieurs assemblées & consultations feurent faittes, tant aux Cordeliers d'Auignon, comme à Villeneuve, & autrement. Et feut conclud que les dictz Seigneurs, & autres Ambassadeurs du Roy, & de l'Vniuersité, se tiendroient fermes à la voye de cession, & non mie à la volonté du Pape. Et en ce, se adioingnirent tous les Cardinaux, excepté deux, ou vn, nommé Pampelune. Et en rien n'approuerent la bulle que le Pape auoit baillée. Et feirent mettre par escript leurs volontez, & offrirent de les signer. Et enuoyerent les dictz Seigneurs & Ambassadeurs vers le Pape, luy requerir audience publicque, & par deux fois : mais à chascune fois plainement les refusa, & ne leur vouloit octroyer. Mais qui plus est, il defendit aux Cardinaux, qu'ils ne signassent leurs opinions. Et lors les dictz Ambassadeurs du Roy, requirent aux dictz Messieurs les Car-

dinaux, qu'ils voulussent dire leurs opinions publicquement. 1395. Laquelle chose ils feirent tres-volontiers, en recitant la conclusion faicte au Conclau, & les sermens & promesses, & en effect le contenu de la Cedula, à laquelle ils se tenoient. Et par ce adhererent à la voye conclüe par le Roy, & l'Eglise de France. Et eussent bien voulu, qu'on leur eust déclaré la forme & maniere de practiquer la dicte voye. Par les dicts Seigneurs leur feut respondu, qu'ils ne s'en doubtaissent, & qu'ils le practiqueroient tresbien. Et remercierent bien & grandemēt Messieurs les Ducs, de ce qu'ils auoient pris la peine & trauail, d'auoir passé le Rhosne à bassteaux, veüe la roide eaüe, & le fort vent qu'il faisoit. L'Vniuersité de Paris auoit enuoyé vne Epistre, laquelle feut leüe en la presence des Seigneurs, & conclurent qu'elle ne seroit point présentée. Et ce iour mesmes au matin, qui estoit le vingt-sixiesme iour de Iuin, feut mise la premiere pierre en l'Eglise de nouveau edifiée de Saint Pierre Celestin, où estoit enterré Saint Pierre de Luxembourg. Ety auoit foison de gens, & y eut vn beau sermon faict par Maistre Gilles des Champs, & recommanda fort la vie du dict Cardinal. Et fait-on deux cedulaes, l'vne de l'intention du Pape, l'autre de celle du Roy. Et esleua-on le cercueüil où estoit le corps, & dessus meit-on les deux cedulaes, en priant au dict Cardinal, qui auoit eu tant grand desir & affection à l'Eglise, qu'il voulust ficher au coeur des gens, laquelle voye estoit la meilleure. Et se tenoit tousiours fort le Pape en son imaginatiō, & aussi faisoient les dits Seigneurs & Ambassadeurs, & les Cardinaux auec eulx, excepté Pampelune. Et apres plusieurs allées & venües vers le Pape, de Villeneuve aux Cordeliers, & Augustins d'Auignon, nos Seigneurs desirans auoir vne issüe & conclusion, & aussi les Cardinaux requierent au Pape, à auoir audience publicque. Et de ce faire, delaya longuement.

Et finalement le Ieudy huiëtiesme iour de Iuillet, nos dits Seigneurs & aussi les Cardinaux, vindrent au Palais du Pape, en la chambre de parement, & là feirent supplier au Pape, que ils parlassent à luy. Et apres aucunes excusations, il issit hors de sa chambre, & veint en la dicte chambre de parement. Et les Seigneurs se agenouillerent, & par la bouche de Monseigneur de Berry, le prierent qu'il voulust ouyr les dicts Cardinaux

1395. publicquement en paroles tres-douces & humbles. Et allegua plusieurs raisons, en montrant qu'il estoit plus raisonnable de les ouyr à part. Et à la fin trefenuis se condescendit, & feit le Cardinal de Florence pour tous les autres, (excepté Pampelune,) la proposition, & bien grandement recita tout le demené de la matiere, & toutes les voyes qui auoient esté ouuertes de venir à vnion, & que tous estoient condescendans à la voye esleüe par le Roy & l'Eglise de France, c'est à sçauoir de cession. Et luy feirent aucunes requestes raisonnables, mais en effect il les refusa, & disoit qu'on les luy baillast par escript, & estoient paroles toutes frustratoires euidemment. Et pource les dicts Seigneurs requirent audience publique, & estoient desplaisans de ce qu'il ne vouloit bailler la Cedula, & qu'il ne vouloit pas reuocquer le commandement, qu'il auoit fait aux Cardinaux, de non signer, & sceller leur opinion. Laquelle audience le Pape leur refusa. Dont les dicts Seigneurs feurent moult courroucez, & prindrent congé du Pape, en disant, qu'ils rapporteroient au Roy ce qui auoit esté fait & dict. Apres laquelle chose, le Pape les pria bien affectueusement, qu'ils dînassent le lendemain avec luy. Et mon dict Seigneur de Berry respondit, qu'ils auoient assez mangé & parlé à luy, tout à son aise. Et que s'il n'auoit volonté de condescendre à la voye que le Roy luy conseilloit, qu'ils ne reuiendroient plus. Et à tant se departirent, & allerent à Villeneuve à leurs logis. Et de là tirerent à Paris deuers le Roy.

Le iour de Saint Barthelemy, les dicts Seigneurs & Ambassadeurs arriuerent à Paris deuers le Roy, & en briefues paroles, reciterent au Roy & à son Conseil, ce qui auoit esté fait. Et supplierent au Roy, qu'il luy pleust de poursuire, ce qu'il auoit commencé pour l'vnion de l'Eglise, & que ce luy seroit grand honneur, que la chose se conduisist tellement, qu'il peust paruenir à son intention. Et feut lors conclud par le Roy & son Conseil, que le Roy enuoyeroit vers les autres Roys & Princes Chrestiens pour ceste matiere. Et de fait, feurent ordonnez à aller es Allemaignes, l'Abbé de Saint Gilles de Noyon, & Maistre Gilles des Champs, notable Docteur en Theologie, lesquels y allerent, & feirent grandement & notablement leur debuoir, mais trespetit fruit en

rapporterent. Et en Angleterre, feurent enuoyez Messire 1395.
 Simon de Cramault, Patriarche d'Alexandrie, & l'Archeuef-
 que de Vienne, & autres, lesquels y feurent receus grande-
 ment & honorablement. Et apres la proposition faicte, &
 la cause declarée, pourquoy ils estoient venus, eurent du
 Roy d'Angleterre responce gracieuse, disant que la voye
 que le Roy de France auoit esleu, estoit bonne & louia-
 ble, à laquelle il s'adioignoit. Et donna de ses biens aux
 dits Ambassadeurs, puis s'en reuindrēt à Paris deuers le Roy,
 & feirent leur relation bien & notablement. Et quand le Pape
 Benedict, sceut les diligences que le Roy faisoit, il feut bien
 esbahi. Et pour le aucunement cuider desmouuoir, & aussi les
 Seigneurs, qui auoient esté deuers luy, de son mouuement, &
 sans ce qu'il en feust requis, octroya au Roy vn dixiesme. Dōt
 les gens d'Eglise n'estoient pas bien contents. Et aussi pour-
 tant ne feut pas la poursuite delaissée.

En ce temps, comme dict est, s'entretenoient tousiours les
 traictés des Roys de France & d'Angleterre. Et entre les Sei-
 gneurs y auoit eu certain accord, que le Roy d'Angleterre de-
 buoit auoir en mariage Madame Isabeau, fille du Roy, laquel-
 le n'auoit d'aage que sept ans, & il en auoit trente, & qu'il y au-
 roit trefues de trente huit ans, esquelles il y eut plusieurs &
 diuerfes clauses, concernans le bien public des deux Royau-
 mes. Et pour parfaire le dict traicté, le Roy d'Angleterre en-
 uoya à Paris le Comte Roland de Corbe, Admiral d'Angle-
 terre, le Comte de Northampton, Mareschal d'Angleterre, &
 Messire Guillaume Strop, grand Chambellan, & autres no-
 bles d'Angleterre, pour demander la fille du Roy. Et auoient
 procuration suffisante pour espouser, & passer l'accord en la
 forme & maniere dessus déclarée. Et par aucuns iours feurēt
 assemblez Messieurs les Ducs de Berry, & de Bourgon-
 gne, lesquels auoient conduict ceste matiere, & finablement
 accorderent le dict traicté. Et le dict Comte Roland par le
 moyen de sa procuration, au nom, & comme procureur du
 Roy d'Angleterre, espousa Madame Isabeau del'aage dessus
 dict. Et feurent les nopces au Palais, & y auoit trois Roys, c'est
 à sçauoir le Roy de France, le Roy de Sicile, & le Roy de Na-
 uarre, & plusieurs Ducs, Comtes, Princes, & Barons, Arche-
 uesques, Euesques, Abbez, & Prelats, nobles, bourgeois & ha-

1395. bitas de bonnes villes , & y eut huit mets, & chascun mets, en huit paires de manieres. Et si on vouloit declarer les assiettes des personnes, les paremens & habillemens, tant en tapisserie, que robes, trompettes, & menestriers, & ceux qui seruoient, la chose seroit trop longue à reciter. Toutesfois le commun langage estoit, que là pouuoit on veoir la pompe & superfluité des François, & les bombans. Et dons merueilleux s'entredonnoient les Roys & les Princes les vns aux autres. Et pource que plusieurs choses comme on disoit, se faisoient, qui n'estoient honorables, ne profitables pour les Royaumes, on se passe de les declarer. Vne chose toutesfois n'est pas à delaisser, que pour le dict temps, le Roy d'Angleterre tenoit Cherbourg, qui est vne place tresforte en Normandie, & Brest en Bretagne, qui sont places comme on dict, à faire guerre tresgrande es dicts pays, & comme imprenables, si gés de fait y estoient, & qui eussent viures. Lesquelles n'estoient que engaigées de certaine somme d'argent. Desquelles sommes le dict Roy de France paya & contenta le dict Roy d'Angleterre. Et pource rendit il les dictes places en l'obeissance du Roy, qui feut vn grand bien pour le Royaume, & pour le pays.

En ceste année feurent merueilleux vents par l'espace de trois mois; & specialement au mois de Septembre feurent si horribles & si grands, qu'ils abbatoient gros arbres portans fruit, forests, maisons, & cheminées, & estoit grand pitié des dommaiges qu'ils faisoient au Diocese de Maguelonne.

Au pays de Languedoc feut veüe au ciel vne grosse estoile, & cinq petites. Lesquelles comme il sembloit, assailloient, & vouloient combattre la grosse, & la suiurent bien par l'espace de demie heure. Et oioit on voix au ciel par maniere de crys. Et apres feut veu vn homme qui sembloit estre de cuiure, tenant vne lance en sa main, & iectant feu, qui empoignit la grande estoile, & la frappa. Et oncques puis rien ne feut veu.

En aucunes marches de Guyenne, feurent ouies voix, & froissemens de harnois, & de gens qui se combattoient. Lesquelles choses donnoient aux gens grand cremeur, crainte, & peur, & non sans cause. Et pource que les dictes choses aduindrent auant la bataille de Hongrie, aucuns disoient que ce,

en estoit signification.

Or estoient les trefues fermées entre les deux Roys de France & d'Angleterre, & alloit on de l'un à l'autre qui vouloit. Et pour lors faisoit on grans cheres & esbatemens, comme ioustes, dîners, & souppers, & estoit toute abondance d'or & d'argent. Et regnoient en France merueilleuses pompes, tant en vestures & habillemens, que chaines d'or & d'argent. Et combié qu'il ne feust point de guerre, toutesfois leuoit on tousiours les aydes, & l'argent sur le peuple, lequel fort murmuroit, & disoit que Dieu punissoit le Royaume pour la cause dessus dicté, par la maladie du Roy.

Aucuns dient que en ceste année, le Mareschal Boufficault eut le gouuernement de Gennes pour le Roy, & auoit bien dix ou douze mille cheuaux, & meit en l'obeissance du Roy, Milan, Plaisance, Paue, & plusieurs autres places. Et assez tost apres feut deux fois sur les Sarrafins. Et estoit chef des Sarrafins le Basac, qui feut longuement deuant Constantinople, où le dict Mareschal feut moult de belles vaillances & armes, & aida fort à secourir la ville de Constantinople, qui estoit assiegée des dicts Sarrafins. Et dedans estoit vn cheualier François nommé Chasteaumorant, lequel vaillamment se porta, & tellement que le Basac leua son siege. Et s'en allerent luy, & ses Sarrafins.

Les Turcs, qui comme dessus est touché, s'estoient retraicts quand ils auoient sceu la venue des Chrestiens, & mesmemēt de France, s'assemblerent en bien grand nombre. Et estoit merueilleuse chose de la grand quantité qui estoit, & leur sembloit qu'ils pouuoient & debuient conquerir toute Chrestienté. Le Roy de Hongrie assembla gens pour leur resister, bien cinquante deux mille Chrestiens, & se meit sur les champs, & aussi y estoient les Sarrafins. Et quand ils feurent aucunement pres l'un de l'autre, le Roy de Hongrie enuoya environ quatre cents hommes d'armes, à veoir & coniecturer l'ost des Sarrafins. Lesquels feurent enclos : mais vaillamment & longuement se defendirent, tellement que plusieurs Sarrafins tuerent, & finablement ne peurent resister à la puissance de leurs ennemis, & tous feurent mis à mort. Quand les Chrestiens veirent ceste desconfiture, & sceurent la grand compaignée que les Turcs estoient, eurent ensemble aduis

1395. qu'ils auoient à faire. Et feut la plus grand partie d'opinion, qu'ils s'en retournaissent. Mais le Roy, qui estoit vaillant cheualier, & autres des plus grands Seigneurs, eurent autre imagination, c'est à sçauoir qu'on les combatist. Et ne fallut guieres marchander. Car ils estoient les vns pres des autres. Si frapperent nos gens sur la premiere bataille, contre laquelle les dicts quatre cents auoient combatu, & y en auoit de las & de blesez. Et y eut forte & aspre besongne d'un costé & d'autre. Et ne peurent les dicts Sarrafins de la premiere bataille, soustenir la vaillance des Chrestiens, & se trouuerent desconfits. Et lors le Roy de Hongrie leua sa banniere, en donnant couraige à ses gens. Si frappa sur les Sarrafins, lesquels ne arresterent point, & feurent desconfits, & y en eut bien cent mille de morts. Et feut tué le fils du dict Basac, nommé l'Amaurabaquin. Et son nepueu, accompagné de grand nombre de Sarrafins, qui venoit à l'aide de son Oncle pour combattre les Chrestiens, quand il sceut la dicte desconfiture, il s'en retourna dont il estoit venu. Lesquelles choses venües à la cõgnoissance du Roy, il feit faire processions par tout son Royaume, & rendit, & feit rendre graces à Dieu.

Aucuns Seigneurs du pays de France, estoient allez en Lombardie, en armes, & mesmement plusieurs de la Comté d'Armaignac, dõt estoit Capitaine vn cheualier nommé Messire Amaulry de Seuerac, qui vaillant cheualier estoit, & pour lors ieune d'age. Et feurent contraincts les François tant par famine, que mortalité, de eulx en retourner mal habillez, & comme tous nuds, & à grand difficulté passoient par les destroits de Sauoye, & du Daulphiné, & n'auoient aucun argët, pour eux deffrayer en retournant. Et pource failloit qu'ils se pourueussent de viures, dont ils se pouruoioient le plus doucement & gracieusement qu'ils pouuoient, en demandant & requerant qu'on leur donnast à manger, en les laissant passer, & aller à leur pays. Et s'assemblerent les nobles du Daulphiné, pour leur courir sus. Et pour ce faire, assemblerët le Comte de Valentinois, l'Euesque de Valence, le Prince d'Orange, & le Seigneur de la Vernouilliere, & pour abreger, tous les nobles du Daulphiné, & leurs alliez. Et les estimoit on à bien huit cents cheualiers & escuyers, & de fait se meirent sur les champs. Laquelle chose venüe à la congnoissance du dict Seuerac,

uerac, il enuoia deuers eulx vn herault, en leur priant & re- 1395
querant, qu'ils le laissassent passer luy & ses gens seurement,
& leur ordonnassent quelque peu de viures. Et encores e-
stoient ils contents de ce que Dieu leur auoit donné, d'en
payer partie selon leur possibilité. Lesquels n'en voulurent
rien faire: mais persisterent en leur imagination & opinion. Et
pource Seuerac parla à ses compaignons, en leur montrant
qu'il valloit mieux qu'ils se defendissent, que de eulx laisser
prendre & tuer, & qu'il auoit esperance en Dieu, & en leurs
couragees. Et faisoient les dits Seigneurs la nuit grands feus,
mais petit guet. Car enrien ils ne craignoient la puissance du-
dict Seuerac, & des siens, lesquels comme dict est, estoient la
plus grand partie tous nuds, & sans arroy. Au point du iour
veindrent frapper sur les nobles du Daulphiné, & les descon-
firent. Et y feurent pris le dict Comte de Valentinois, l'Eues-
que de Valence, le Prince d'Orenge, & plusieurs autres. Et
pource que le dict Seuerac, doubtoit que ceux qui s'en estoient
fuyz, ne se ralliassent ensemble, congnoissant que leur des-
confiture estoit vne chose soudaine, & que quand on veint
frapper sur eulx, ils n'auoient pas eu loisir de eulx armer, ne
habiller, desira de trouuer vne maniere d'expedient avec eux.
Car à tout considerer, combien que ses gens feussent armez
de leurs harnois, toutesfois il y auoit plusieurs passaiges bien
difficiles. Et quand il n'y eust eu, que les paisans du pays, si y
eust eu fort à faire. Et pource les dits Seigneurs mesmes,
ayans desir d'estre hors de ses mains, & doubans que si leurs
gens s'assembloient, pour luy courir sus, qu'on ne les tuast, de-
manderent au dict Seuerac, qu'il leur feist bonne compai-
gnée, & on les laisseroit passer seurement. Lequel en feut d'ac-
cord, & ses gens. Et au regard des dits Princes, ce qu'ils vou-
lurent donner de leur franche volonté, Seuerac & ses gens
en feurent contents, & des autres gentilshommes, chascun
paya vn marc d'argent. Et par ce moyen le dict Seuerac, & ses
gens, qui estoient tous nuds, mal habillez, & sans argent, s'en
veindrent à leur pays, & deuers leur Seigneur, le nouveau
Comte d'Armaignac, montez, armez, & bien garnis. Ainsi
va aucunes fois des aduentures de guerre. Et des dits du pais
de Daulphiné, se mocquoient les François, Anglois, & toutes
autres nations.

T

1395. Ceux de la Cité & pays de Gennes, eulx sçaichans & sentās fort greuez, enuoierent vers le Roy, en luy priant & requerrant, qu'il les voulust prendre en sa garde. A laquelle chose le Roy, & ceux de son sang, & Conseil, delibererent d'y entendre diligemment.

Le Roy deuint en ceste saison merueilleusement malade, & estoit grand pitié de le veoir, & les choses qu'il faisoit. Et n'y trouuoit on remede, sinon prier Dieu. Et estoit belle chose & piteuse des deuotions, que auoient toutes gens. Et faisoit on aumosnes à Eglises, hostels Dieu, & pauvres gens.

1396. L'an mille trois cents quatre vingt & seize, le Roy & son Conseil aduiferent, que le Schisme de l'Eglise estoit bien merueilleux, & par iceluy pouuoit auoir plusieurs erreurs en la foy, & que à luy comme à Roy Treschrestien, & bras dextre de l'Eglise, appartenoit de faire diligence de mettre paix en l'Eglise. Et pource conclud d'y entendre de son pouuoir, & enuoia diuerses, grandes, & notables Ambassades, par deuers presques tous les Roys & Princes Chrestiens, & y feit le Roy de moult grandes despenses. Et en la matiere, feurent ouuertes par les dicts Ambassadeurs diuerses voyes, de mettre paix & vnion en l'Eglise, qui estoit chose bien necessaire.

En ce temps, le Roy d'Arragon lequel souuentefois prenoit plaisir & deduiet de chasser tant de grosses bestes, que de lieures, & volontiers couroit apres ses chiens, Aduint vn iour luy print volonté de veoir courre vn lieure, & vint aux champs bien monté & accompagné, & feut par les petirs chiens trouué & leué vn lieure, qui commença fort à courir, & le suiuiot les leuriers, & aussi le Roy alloit apres, & faisoit fort courir son cheual, lequel cheut & trespacha des pieds de deuant. Parquoy le Roy cheut à terre, & se rompit le col, & mourut, qui feut grand dommaige, comme on disoit. Et pource Roys, Princes, cheualiers, escuyers, & autres personnes prenans plaisir à tels deduiets, doibuent bien entendre à eulx. Et est bien grand simplesse, de se mettre trop à telles choses ardemment, dont la mort se peut ensuiure sans profit & honneur. Et estoit lors le Patriarche d'Alexandrie en Arragon, si feut aucunement retenu. Le seruice du Roy feut fait bel & notable. Et ce fait, feurent renuoyez le dict Patriarche, & les autres Ambassadeurs du Roy, sans au-

tre response, obstant la mort du Roy.

1396.

Les autres Ambassadeurs aussi qui auoient esté enuoiez en diuers Royaumes, retournerent deuers le Roy, & feirent leur relation, disans, que la plus saine partie estoit d'opinion, que la voye par le Roy esleüe, estoit la meilleure, & qu'elle estoit bonne, sainte, & iuste.

De par le Roy d'Angleterre, & le Clergé de son pays, furent enuoyez certains clerks bien aigus deuers le Roy, touchant le faict de l'Eglise, & feirent vne proposition, & à la fin dirent, que leur Roy n'acceptoit point la voye de cession, & qu'il sembloit que la voye d'assembler general Concile, estoit la plus expediente. Et on leur requit, que avec aucuns ils voulussent parler de la matiere, & conferer ensemble, pour scauoir les causes qui les mouuoient, & ouyr aussi les causes du Roy. A quoy ne voulurent entendre en aucune maniere, & s'en retournerent en Angleterre, combien que depuis ils changerent leur imagination.

Le Comte de Hainault, auoit forte guerre contre les Friens, & enuoia deuers le Roy luy prier, qu'il luy enuoiaist des gens d'armes pour luy aider. Laquelle chose le Roy luy octroya, & de faict lui enuoia gens de guerre largement, par quoy il suppedita ses ennemis.

En ce temps feut aduisé par le Roy, & ceux de son Sang, & Conseil, & aussi par les Anglois, qu'il faillloit acheuer ce qui auoit esté encommencé, touchant l'alliance par mariage de Madame Isabeau de France. Et requeroient les Anglois, qu'on leur liurast la dicte Dame. Et feut aduisé, qu'il estoit expedient que les Roys s'entreueussent en quelque lieu, & qu'ils parlaissent ensemble. Et de faict, pour la cause, le Roy vint à Boulogne, & delà à Ardres, & le Roy d'Angleterre vint à Calais. Et feurent ordonnées certaines têtes, où chascun Roy en la sienne seroit. Et entre les deux tentes, debuoiert les deux Rois parler ensemble, accompaignez chascun de quatre cents cheualiers, & escuiers, bien ordonnez & habillez.

Le vingt-septiesme iour d'Octobre au dict an, le Roy issit de Ardres accopaigné de ses Oncles, & de plusieurs Ducs & Comtes ses parens, & de quatre cents cheualiers & escuiers, bien ordonnez & habillez, comme en bataille arrangée. Et deuant le Roy, estoit le Comte de Harcourt, son prochain pa-

T ij

1396. rent, lequel portoit l'espée du Roy. Et quand ils veindrent à vn trait d'arc des tentes, ils descendirent tous à pied, excepté le Roy, & ses prochains parens. Et quand ils veindrent aux cordes, qui soustenoient les tentes, le Roy, & les autres descendirent tous à pied. Et se diuisa l'armée en deux, deçà & de là les tentes. Et leur feut ordonné, qu'ils ne se bougeassent, & tinssent sans mouuoir. Et pource que le Roy doubtoit, que aucuns de ieune couraige, ne s'esmeussent, parquoy il se eust peu ensuiure aucun inconuenient, parla à eulx bien doucement & gracieusement, en les exhortant & commandant qu'ils ne se bougeassent, en monstrant quel deshonneur ce seroit, s'ils rompoient les formes & manieres pour parlées entre luy & son aduersaire d'Angleterre. Et les dictes formes & manieres garderent aussi les Anglois, sans enfreindre. Et eulx estans à la veüe l'un de l'autre, veindrent vers le Roy les Ducs de Lancastre, & de Glocestre, & autres Comtes & Seigneurs d'Angleterre. Lesquels bien humblement s'agenouillèrent, disans qu'ils venoient vers luy, pour sçauoir en quelle forme, habirs, & ordonnance, ils se debuoiēt assembler. Et pour ceste mesme cause, estoient allez vers le Roy d'Angleterre, nos Seigneurs les Ducs de Berry, & de Bourgongne: Le Roy receut les dicts Princes d'Angleterre honorablement. Et la responce ouye, le Roy leur donna à chascun vn bien bel anneau. Lesquels les receurent, en remerciant le Roy tres humblement, & s'en retournerent deuers leur maistre. Et voulut le Roy, auant le partement des dicts Princes, boire avec eulx, & prindrent vin & espices. Et pareillement feit le Roy d'Angleterre à nos Seigneurs. Et quant à la requeste qu'on faisoit, de sçauoir quels habillemens, & les manieres qu'ils feroient l'un à l'autre, le Roy d'Angleterre respondit, que les conuenances ou pactions de paix & amitié, ne consistoient ou gisoient pas en superfluité de robbes & vesture, mais en cordial amour & affection. Laquelle chose feut fort notée. Car par ce, il monstroir la grande affection qu'il auoit au bien de paix.

Or est vrai que entre la distance des tentes, & comme au milieu du chemin, auoit vn grand pal fiché en terre, & à ce pal là se debuoiēt assembler les deux Roys. Et enuiron trois heures apres midy, se meirent à chemin à pied. Car la distan-

ce n'estoit pas longue. Et vint le Roy en vn simple habit iusques aux genouils, fourré de martres, son chapperon à vne longue cornete entour sa teste, troussée en forme de chapeau, & estoit accompagné de ses Oncles. Et d'autre part, le Roy d'Angleterre issit hors de sa tente, vestu d'une robe longue iusques aux talons, & deuant luy auoit Messire Iean de Hollande, qui portoit son espée, & le Comte Marechal, qui portoit vn baston Royal doré. Et tantost que les deux Roys veirent l'un l'autre, toutes leurs gens se mirent d'un costé & d'autre à genouils, iusques à ce qu'ils feussent venus au pal. Et quand il y feurent, ils se baisèrent & salüèrent l'un l'autre, en bonne amour, paix & dilection, & lors on demanda les espées & le vin. Et seruirent les Ducs de Berry, & de Bourgogne, & les Ducs de Lancastre, & de Glocestre. Et estoit grand noblesse, & pitié de veoir la dicte assemblée, & de ioye pleuroient ceux qui les veoient. Et en signe d'amour, & de dilection, donna le Roy, au Roy d'Angleterre vne tresbelle coupe dor, garnie de pierres pretieuses, & vne aiguere. Et aussi le Roy d'Angleterre luy donna vn tresbeau vaisseau, à boire ceruoise, avec vn vaisseau aussi à mestre eaüe, garnis de pierres pretieuses. Et lesquels dons ils receurēt benignement, en remerciant l'un l'autre. Et à la requeste, au moins par la persuation des Princes, & Seigneurs, iurerent & promirent l'un à l'autre, que si Dieu leur donnoit grace de venir à bonne & finale paix, qu'ils fonderoient, & feroient faire à communs frais & despens, pour memoire de vision mutuelle faicte au dict lieu, vne Chappelle.

Et quand les Roys veirent, que leurs gens tant d'un costé que d'autre, gardoient si bien & fermement ce qui leur auoit esté commandé, en monstrant le desir, & affection, & la ioye qu'ils auoient, que bonne paix feust entre les deux Roys, leurs Royaumes, & peuple. Lors le Roy d'Angleterre, & les dicts Ducs & Seigneurs de son sang, vindrent en la tente du Roy de France. Laquelle estoit bien parée & ornée, de beaux draps d'or & riches, en laquelle auoit deux chaires bien richement habillées. Et feut offerte par plusieurs & diuerses fois au Roy d'Angleterre, la chaire à dextre. Ce qu'il ne voulut accepter, & tant plus luy offroit-on, tant plus la refusoit. Et finalement se assit à senestre, & le Roy en la dextre. Et ne de-

1396. meura en la dicte tente que les dicts Roys, les Ducs de Berry, de Bourgogne, de Bourbon, de Lanclastre, & de Clocestre, & les Comtes Roland & Mareschal. Et là ouurirent, & traisterent les matieres, pourquoy ils estoient assemblez, tendans à bonne amour, à fin de paix & alliance par mariage. Ce qui fut fait, entre eulx feut secret. Car il n'y auoit que les Roys, & Princes dessus dicts. Lesquels aucunement rien ne reuelerent, sinon du mariage d'Angleterre, & de la fille du Roy. Car dès lors, le Roy appelloit le Roy d'Angleterre son fils, & l'autre l'appelloit son pere. Et apres que leur Conseil feut fini, preindrent vin, & espices, & feurent seruis en la forme dessus dicte. Et au partir, le Roy donna à son fils vne nef d'or, de grand poids, garnie de pierres, qui estoient de grand pris, laquelle il print, en le remerciant. Et s'en allerent eux deux iusques à l'autre tente d'Angleterre, parlans ensemble, & eulx esbatans. Et eulx à la tente venus, le Roy d'Angleterre donna à son pere vn beau fermail garni de pierres pretieuses, & s'en reueindrent ensemble iusques au pal. Et là venus, se entreaccolerent, & baisèrent, & s'en retourna chacun en sa tente, en recommandant à Dieu l'un l'autre. Et s'en retourna le Roy à Ardres, & laissa à la garde de sa tente, les Comtes de Saint Paul, & de Sancerre, le Seigneur d'Albret, Messire Jean de Bueil, Maître des Arbalestriers de France, & Messire Jean de Trie. Et pareillement feirent les Anglois, & meirent des Princes, & Seigneurs du pays, en la leur.

Le Sabmedy au matin enuiron neuf ou dix heures apres midy, comparurent en leurs estats & habits, cōme ils estoient en la iournée de deuant, excepté que le Roy d'Angleterre auoit vn chapperon mis sur sa teste, & veindrent les dicts deux Roys iusques au pal. Et baillerent la main l'un à l'autre, en se saluant en toute amour & dilection, & les ceremonies gardées de chascune part, & comme dessus. Et print le Roy de France le Roy d'Angleterre par la main, & le mena en sa tente, accompaignez chascun de douze de leurs parens & Conseillers. Et tantost suruint vn terrible temps de pluie, gresle, & vent, par telle maniere que ceux qui estoient hors des tentes, feurent contraincts d'eulx bouter dedans. Et feurent les dicts Roys, & leurs parens & Conseillers, bien quatre bonnes heures ensemble. Et quand le Conseil feut fini, aucuns enquirent

secretement, ce qui auoir esté conclud. Et feut respondu, que 1396. on feir'bone chere,& que les Roys en parole de Roys, auoient les saincts Euangiles touchez,iuré, que dorefnauât ils feroient bons & loyaux amis ensemble, & que comme pere & fils, se entre aimeroient,& aideroiēt l'un à l'autre enuers tous,& contre tous. Et feirent alliances perpetuelles pour eulx, & leurs successeurs, & de pays à pays, & de peuple à peuple,tant reelles,que personnelles.Et les assistans tant d'une partie que d'autre, commencerent à faire grand ioye, & grand chere, & touchoiēt l'un à l'autre, en rendant graces à Dieu du dict Traicté. Et feit-on venir vin & espices, & beurent tous ensemble. Et lors le Roy à grand ioye & lieffe, donna au Roy d'Angleterre son gendre, quatre paires d'ornemens d'Eglise, semez de perles à or batu, (Esquels estoient signez la representation de la benoïste Trinité, & du mont Oliuet, & les imaignes de Saint Michel, & de Saint George, & deux gros pots d'or,ornez de pierres pretieuses, vaillants de, seize à vingt mille escus, dont il remercia le Roy, & s'en reueindrent au pal, en disant à Dieul'un à l'autre. Et depuis reuint le Roy d'Angleterre, lequel ioyeusement & de bon coeur donna au Roy vn beau collier d'or riche, & bien garni de pierres pretieuses. Puis s'en retournerent, & estoit ja tard, pres de Soleil couchant. Et enuoia le Roy avec son gendre pour le conduire, les Ducs de Berry,& de Bourgongne iusques à Guines, & soupperēt avec luy.Et pareillement les Ducs de Lanclastre, & de Clocestre, conuoyerent le Roy iusques à Ardres,&avec luy soupperent, & tous feirent ioyeuse chere,& y feurēt iusques à neuf heures au soir. Et apres se partirēt des dicts lieux lesdits Ducs de Berry, & de Bourgongne, comme aussi les dicts Ducs de Lenclastre, & de Clocestre, pour reuenir chascun deuers son Roy. Mais ce ne feut pas sans empeschement. Car en icelle heure que les dicts Princes se partoient pour eulx en retourner, survint vne pluie si grosse, & si terrible, qu'il sembloit que Dieu voulust faire vn nouveau deluge. Et qui plus est, vn vent si horrible, & vehemēt, que tous les luminaires feurent esteints, & ne pouuoit-on congnoistre, ne appercevoir l'un l'autre. Et comme les bestes sauuaiges vont parmy montaignes, & bois, ainsi alloiēt les dits Seigneurs,& n'y sceurent trouuer remede, sinon recourir à Dieu. Ce qu'ils feirent bien, & deuotement,

1396. parquoy ils veindrent à port de salut. Et pour la grande violence du vent, y eut des tentes du Roy cent & quatre cordes rompües, & du Roy d'Angleterre, quatre seulement. Et la cause si est, car ils estoient en bas lieu. Et feurent les draps tant de soye, que de laine, rompus & deschirez, dont il y auoit foison, & de moult beaux. Plusieurs gens disoient que en icelle paix faisant, auoit trahison, ou qu'elle y aduiendroit. Mais ceux qui sceurent & congneurent la vraie amour, dont procedoient les parties, conclurent & creurent fermement, que le diable d'enfer, aduersaire de paix, feit les dictes tempestes, comme desplaisant de ce qu'il n'auoit peu empescher le bien de paix. Ce feut grand chose, comme les parens, gens, & seruiteurs garderent sans enfreindre les Ordonnances, qui leur auoient esté enioinctes. La premiere chose qui feut dicté, estoit que chascun Roy auroit quatre cents cheualiers & escuiers, lesquels ne seroient point armez, & n'auroit chascun que son espée, ou autre cousteau, & que autre harnois ils n'auroient soubz ombre de achapt; ne autrement. En outre, que soubz peine de la hart, nul n'approchast les tentes des Roys. Auec ce, feut defendu que au parterment des Roys, c'est à sçauoir du Roy de France de Saint Omer, & du Roy d'Angleterre, de Calais, nul ne les suiüst soubz pareille peine, sinon ceux qui estoient deputez & ordonnez, & furent comptez, & nommez ceux qui debuoiuent suiure. Toutesfois il estoit permis aux marchands menans viures, merceries, & autres choses, d'aller exercer leur faict de marchandise à Ardres, ou à Guines, sans eux bouger de là. Et feut en outre ordonné, que nulles rixes, clameurs, débats, noises, discords, ou paroles iniurieuses, ne se meussent entre les gens, ne d'un costé ne d'autre. Et que on ne iouast à iecter la pierre, luster, tirer de l'arc, ne à quelque autre ieu, dont peust venir murmure, impatience, noise, ou debat. Et que durant le temps, que les Roys parleroient ensemble, on ne sonnast, ne fait sonner trompettes, ne autres instrumens de musique. Et que chascun obeïroit sommairement, & de plain, à tout ce qui seroit ordonné. Toutes lesquelles choses feurent gardées grandement & notablement, tant d'un costé que d'autre, sans enfreindre.

Le lendemain au matin que les dictes tempestes estoient suruenües, les dicts Roys, & leurs parens, voulans proceder

der à la consommation & perfection des' choses, pour lesquelles ils estoient assemblez, veindrent en leurs tentes, & chascun d'eux se departit pour venir au pal. Et en venant, arriva Madame Isabeau de France, accompagnée du Duc d'Orleans son oncle, & de Barons, cheualiers, & escuiers, Dames, & Damoiselles, & auoit belles & grandes hacquenées, liètieres, cheuaux, & chariots bien garnis. Et quant à la dicté Dame, elle estoit moult richement habillée, de chapeau d'or, colliers, & anneaux de grand pris. Et quand elle fut assez pres des dicts Roys, feut descendüe de dessus sa hacquenée, & prise par les Ducs d'Orleans, de Berry, & de Bourgongne. Et aussi tost qu'elle feut descendüe, veindrent en grand appareil les Duchesses de Lanclastre, & de Clocestre, accompagnées de foison de Dames & Damoiselles bien ornées, & appareillées, lesquelles feirent la reuerence en la maniere accoustumée. Et n'auoit oncques esté veu de memoire d'hōme, chose si haute, ne si notable, ne Dames, & Damoiselles si richement habillées. Et la presenterent les dicts Ducs, accompagnez des dictes Duchesses, au Roy d'Angleterre. Et en allant vers luy, s'agenouilla deux fois. Et lors le Roy d'Angleterre se leua de sa chaire, & la veint embrasser, & baiser. Et lors le Roy luy dit, Mon fils, C'est ma fille, que ie vous auois promis. Je la vous liure, & delaisse, en vous priant, que la veuillez tenir comme vostre espouse & femme. Lequel ainsi le promet. Et lors les pere, mari, & oncles la baiserent, & la delaisserent és mains des dictes Duchesses, qui la menerent à Calais. Et peut-on penser, que ce n'estoit pas que plusieurs ne pleurassent à grosses larmes, & specialement la dicté Dame, en faisant grands sanglots & merueilleux. Le Roy d'Angleterre pria à son pere qu'il disnast avec luy, ce qu'il feist volontiers. Si luy feist tout le plus d'honneur qu'il peut, tellement qu'il le feist seoir à la dextre, & n'auoit que eux deux à table, & le feist seruir par les Ducs de Lanclastre, & de Clocestre. Et apres disner, prendrent vin & espices. Et seruit le Duc d'Orleans, le Roy son frere, & le Duc de Lanclastre, le Roy d'Angleterre. Puis donna le Roy à son fils vn dragouer, garni de pierres pretieuses, avec vn tres-riche fermillet. Et le Roy d'Angleterre, donna à son pere vn autre fermillet, qui auoit esté au feu Roy Iean, & estoit le plus riche de tous les dons, qui auoient esté

1396. faict. Et ce faict, les Roys monterent à cheual, & veindrent iusques au pal, pour prendre congé l'un de l'autre, & dirent adieu, en eulx baissant de bonne & loyale amour. Et donna le Roy à son fils au partir, vn beau & riche diamant, & vn saphir. Et son fils luy donna deux beaux coursiers, bien ornez & parez. Puis se departirent, & s'en reuint le Roy à Paris, & son fils à Calais.

En ceste année, combien comme dessus ha esté touché, que le Roy de Hongrie eust eu grande victoire sur les Sarrazins: toutesfois ils s'assemblerent tres-grande quantité de Sarrazins, & se meirent sur les champs pour destruire les Chrestiens, & mesmement ceux de Hongrie, & leurs voisins, & leur faisoient maux innumerables. Pour laquelle cause, le Roy de Hongrie, enuoia deuers le Roy vne Ambassade de gens de bien. Lesquels exposerent en effect ce que dict est, en suppliant & requerant au Roy, qu'il luy pleust de enuoier gens, pour resister à la mauuaise volonté des mescreans. Et les ouit le Roy tres-doucement & benignement. Et comme ayant pitié des maux qu'ils faisoient aux Chrestiens, assembla son Conseil pour y enuoyer. Et au Conseil, estoit present le Duc de Bourgongne, nommé Philippes le Hardy, lequel dit qu'il y enuoiroit son fils aîné Iean, Comte de Neuers. De laquelle offre, il feut honoré & prisé, & feut dict qu'il y venoit de vaillant couraige, de offrir son fils aîné. Et lors le Comte d'Eu, Conestable de France, Messire Iean le Maingre, dict Boucicault, Mareschal, & Messire Iean de Vienne, Admiral de France, & les Seigneurs de Coucy, de Roie, de la Trimouille, & plusieurs cheualiers & escuiers, s'offrirent d'y aller, ce qui leur feut accordé. Puis assemblerent gens d'armes, & de trait, & se meirent en chemin, en intention de passer le plustost qu'ils pourroient. Et conduist le Duc de Bourgongne son fils iusques à Saint Denys, & là feit ses offrandes, & le commanda à la garde de Dieu; & de Monseigneur Saint Denys, puis pria aux Seigneurs qui estoient en sa compaignée, qu'ils l'eussent pour recommandé. Si s'en partirent, & passerent par les Allemaignes, où ils trouuerent plusieurs plaisirs & gratuitez. Mais pourtant ne laissoient-ils point qu'ils ne pillassent & robbassent, & feissent maux innumerables de pilleries & roberies, lubricitez, & choses non honnestes. Et mei-

rent à passer, auant qu'ils feussent és marches, où ils auoient 1396.
à besongner, bien trois mois. Et sans auoir dommaige de leurs
gens, & biens, passerent la Dunoüe, qui est vne grosse riuere,
& enuoierent vn vaillant cheualier de Bourgongne, nommé
Messire Gaucher de Rupes, deuers le Roy de Hongrie,
pour auoir conseil, de ce qu'ils auoient à faire, & de la manie-
re d'entrer en la terre des Sarrafins, & de les assaillir, &
aussi de eulx defendre si on les assailloit. Et leur feit à sça-
uoir le Roy, qu'ils ne feussent pas chaulds, ne trop hastez en
ceste guerre, & qu'il conseilloit qu'on laissast encommencer les
gens de pied du pays, & autres, qui auoient accoustumé la
guerre és frontieres, & conignoissoient la maniere des Sarra-
fins, & puis qu'ils allassent apres. Et qu'ils seroient tous fraiz,
& les Sarrafins lassez, par les affaires qu'on leur auroit ja bail-
lé. Dont les François ne feurent pas contents, ne de ceste opi-
nion, & disoient qu'ils iroient des premiers. Les gens d'Egli-
se sceurent, que les François auoient des manieres bien lu-
bricques d'exces en mangeries, beuueries, jeux de dez, pute-
ries, & ribaulderies, & leur monstrent le danger où ils
estoyent, & que les Sarrafins estoient grand quantité de peu-
ple. Et que supposé qu'ils feussent suffisans pour resister, tou-
tesfois s'ils ne se mettoient en bon estat, comme bons Chre-
stiens, il estoit à doubter qu'il ne leur mescheust. Mais de tout
ce que dict est, ne tindrent compte. Ils auoient grands pou-
laines à leurs souliers, & estoit grand pitié des dissolutions que
ils auoient. Toutesfois ils sceurent que en vn lieu auoit grand
peuple de Sarrafins, assez pres d'un chasteau, lequel on nom-
moit Richo, lesquels en rien ne se doubtoient. Les François,
& autres Chrestiens vindrent soudainement frapper sur eux,
& y eut bien trente mille Sarrafins, morts, ou pris, & les autres
se meirent en fuite. Et assez tost apres, les Chrestiens assiege-
rent le chasteau de Richo. Et premierement n'y enuoierent
que cinq cents combatans, & les autres suiuirent. Et quand
le Roy de Hongrie le sceut, il s'en vint par la Dunoüe, & assail-
lirent la place. Ceux de dedans se defendirent vaillamment, &
finablement feut le chasteau pris, & ceux de dedans mis à
mort, & tuez.

Après vindrent deuant Nicopoli, vne forte Cité, & bien
garnie de Sarrafins vaillans en armes, & l'assiegerent, & touf-

1396.

jours leur aidoit & confortoit le Roy de Hongrie, & les gens du pays. Et par diuerſes fois liurerent pluſieurs affaults, tellement que ceux de dedans feurent ſi tres-laſſez, qu'ils n'en pouuoient plus. Et y feurent les Chreſtiens dixſept iours deuant. Mais les Sarraſins eſtans dedans la place, ſceurent la venue du Baſac, & de ſes gens, pour combattre les Chreſtiens. Et parlerent les Chreſtiens au Roy de Hongrie, pour ſçauoir ce qu'ils auoient à faire. Trop bien voioient & apperceuoient qu'ils eſtoient venus à la bataille, & qu'il failloit combattre. Car le Baſac venoit, lequel auoit grand multitude de Sarraſins. Et d'autre part auſſi, le Roy de Hongrie, & les Princes du pays, & marches voiſines, aſſemblerent le plus de gens qu'ils peurent avec les François, leſquels demanderent à auoir l'auant-garde. Et ſur ce eurent conſeil, & aſſemblerent des Chefs de guerre. Et le Roy de Hongrie bien grandement ſacquiſta, & monſtra qu'il eſtoit expedient qu'il euſt l'auant-garde. Et diſoit que ſes gens congnoiſſoient les Sarraſins, & ſçauoient leur maniere de combattre, car tous les iours ils auoient eſcarmouches enſemble, ce que les François ignoroient. Et ſi diſoit plus, que ſi ſes gens eſtoient deuant, & ils ueoient les François en volenté de bien faire, ils ſ'efforceroient de bien combattre, & ſi ne pourroient fuir, ou reculer, car les François les ſuiuroient de pres. Et que ſi au contraire ſe faiſoit, & que les François euſſent l'auantgarde, & il venoit vne rupture tant feust petite, tous les Hongres & autres des pays d'Allemaigne ſe meſtroient en fuite, & demeureroient les François perdus & deſconfits. Les Seigneurs de France perſiſterent en leur opinion & requeſte d'auoir l'auantgarde, combien que le Seigneur de Coucy feust de l'opinion du Roy de Hongrie, diſant que la bataille feroit plus ſeulement conduite. Mais Meſſire Guy de la Trimouille, luy dit, que il auoit peur. Lequel de Coucy, qui eſtoit grand Seigneur, & vaillant cheualier, luy dit, qu'il ne le faiſoit mie par crainte ne peur, mais pource que c'eſtoit le plus ſeur. Et qu'on doit prendre ſur ſes ennemis tout l'aduantaige, & ouurer le plus ſaigement & prudemment que faire ſe peut. Et que à la beſongne, il monſtreroit qu'il n'auoit pas peur, & qu'il meſtroit la queuë de ſon cheual en tel lieu, où il n'oſeroit meſtre le muſeau du ſien. Et loua grandement le Roy de Hon-

grie la vaillance & courage des François : mais il doubtoit fort la fuite de ses gens , & estoit bien desplaisant , qu'on ne vouloit croire son conseil. Il enuoia visiter les Turcs par le Comte de Hongrie , lesquels venoient pour combattre. Ce qu'il feit à sçauoir aux François , dont ils feurent bien ioyeux , & en louerent Dieu. Et combien qu'ils eussent plusieurs prisonniers , ausquels ils auoient promis de non les tuer , mais les mettre à finance , toutesfois ils les feirent tous mourir. Et pour abreger , les François eurent l'auantgarde , & feurent les batailles ordonnées tant d'un costé que d'autre , c'est à sçauoir des Chrestiens , & Sarrafins. Et quand ce vint à l'assembler , les François moult fierement & vaillamment se porterent , & avec eulx auoit autres nations. Les Sarrafins aussi faisoient le mieux qu'ils pouuoient. Et entre les autres François , estoient le Seigneur de Coucy , l'Admiral de Vienne , & autres qui merueilles de leurs corps faisoient , & soustenoient grand fais en la bataille , côme ceux qui de tout temps estoient reputez vaillants , & aussi faisoient les autres. Mais finalement les Sarrafins entamerent , & feirent ouuerture es Chrestiens , ayans l'auant-garde. Aussi estoient les Sarrafins dix contre vn. Et finalement les autres nations estans en la grosse bataille & arrieregarde se retrahirent , & n'osferent attendre le fais des batailles des Sarrafins. Et feurent les François & ceux de leur compaignée , desconfits , & tous morts ou pris. Et plusieurs feurent pris sans tuer , & mesmement le Comte de Neuers , le Marechal Boucicault , Vienne , Coucy , & autres , lesquels feurent menez deuant le Basac. Et dit on vne chose merueilleuse , que le Seigneur de Coucy , qui estoit vaillant & bon preudhomme , estoit mené tout nud , & le chassoit on , en le boutant & frappant deuant les autres. Mais au bout d'une haye , un manteau soubdainement le couurit. Dont il vint , on ne sçait. Apres , quand on les eut amenez deuant le Basac , qui estoient environ trois cents Chrestiens , il ordonna , & commanda que tous feussent tuez en sa presence , & mis à mort. La cause si feut , car les Chrestiens auoient prins vne Cité nommée Craco , où ils trouuerent plusieurs Sarrafins , lesquels ils meirent tous à l'espée. Là eust on veu grand pitié , de veoir Chrestiens ainsi mettre à mort , lesquels par apparence patiemment la receurent. Entre les autres feut reserué ,

1396. & gardé de mourir le Mareſchal Boucicault. Car autres fois en guerre, auoit faiët bonne compaignée à pluſieurs Sarraſins. Et combien que le Comte de Neuers, feust en bien grand danger d'eſtre tué, toutesfois il feult ſaulué. Et diſoit on communément, qu'il y eut vn Sarraſin, nommé nigromantien, deuin, ou forcier, qui dit qu'on le ſauluaſt, & qu'il eſtoit taillé de faire mourir plus de Chreſtiens, que le Baſac, ne tous ceux de leur loy, ne ſçauroient faire. Et par ce moyē feut ſaulué, & les autres mis à mort piteuſe. Et eſtoit comme commune renommée, que la diſte deſconfiture eſtoit venue ſur les François & Chreſtiens, par l'orgueil des François, & parce qu'ils n'auoiēt pas voulu croire le Roy de Hongrie. Et auſſi que Dieu le permit pour leurs pechez. Car ils feirent en allant moult de maux, & auoient touſiours ribauldes, & iouoient à jeux diſſolus. Helas, la choſe feut tant douloureuſe & piteuſe au Royaume de France, que merueilles, comme gens aians entendement peuuent conſiderer. Et y en eut pluſieurs qui ſ'enfuirēt de la bataille, quand ils veirent que les Sarraſins auoient le deſſus. Et preſques tous ceux du pays ſ'enfuirent. Vne choſe merueilleuſe & miraculeuſe aduint. Car les Sarraſins laiſſerent les Chreſtiens morts emmy les champs, pour les faire deuorer aux loups & beſtes ſauuaiges, ſans vouloir ſouffrir qu'ils ſeuſſent mis en terre. Et feurent treize mois tous nets & blancs, ſans ce que oncques beſte y touchaſt, & diſoient les Sarraſins que les beſtes n'en daignoient manger. Le Comte de Neuers, feut mis à finance, & pareillement Boucicault, leſquels la payerent, puis ſ'en reuindrent en France. Quand en France les nouuelles feurent ſceües, y eut grands pleurs & douleurs, & non ſans cauſe. Et meſmement les Dames & Damoiſelles demeurees veufues ſans maris, & les enfans ſans peres. Et feurent ordonnez par les Eglifes ſeruices, & meſmement en la ville de Paris feurent en toutes les Eglifes faiëttes de tresbelles vigiles, & commendaces & meſſes le neufieſme iour de Ianuier.

En ceſte année, le Roy eſtant en compaignée de ſes Oncles, la Duchefſe de Brabant le vint veoir & viſiter. Et ſ'offrit à luy à le ſeruir enuers tous, & contre tous. Et declara au Duc de Bourgongne en la preſence du Roy, que la Duché de Brabant apres la mort d'elle, luy competeroit & appartenoit. Mais

elle le prioit que Antoine fils second du dict Duc, eust la Duché apres sa mort. De laquelle chose le dict Duc feut d'accord. Le Roy la receut bien & honnorablement, & luy feit tresbonne chere, & au partir luy donna de ses biens.

Quand le Duc de Milan sceut, que les Geneuois s'estoient adressez au Roy pour estre en sa garde, il n'en feut pas bien content, & talcha par toutes manieres à rompre le coup, & les en faire departir par gratieuses paroles. Mais les Geneuois en rien n'y voulurent entendre, & enuoierent à Paris, & se soubmeirent de tous poincts à la Seigneurie du Roy.

En ce temps, feut fait le mariage du fils du Duc de Bretagne, & d'une des filles du Roy, & luy feut promis trois cents mille francs, mais elle trespassa.

Le Roy d'Angleterre voulant tousiours complaire à son pere, luy feit à sçauoir qu'il vouloit espouser sa femme à Calais, en face de sainte Eglise, en priant aux Ducs de Berry, & de Bourgogne, qu'ils voulussent estre au dict lieu à certain iour, lesquels par le vouloir du Roy y allerent. Et l'espousa bien & solennellement en l'Eglise, en la forme accoustumée. Et y eut vn bien notable disner, où on feut serui de plusieurs mets, & diuerfes manieres de ieux, & esbatemens, & le lendemain, iustes. Et se monstrerent en toutes choses les Anglois bien pompeusement, ainsi qu'ils ont bien accoustumé de faire. Et quand la grand solemnité des nopces feut passée, ils reindrent vn grand Conseil, pour sçauoir que on auoit à faire, pour tousiours entretenir les alliances. Et feut ordonné que les trefues, qui auoient esté ordonnées & par mer, & par terre, seroient criées publicquement, gardées & obseruées. Et que on ordonneroit conseruateurs, qui seroient commis à les faire garder & obseruer. Et pource que le Roy requeroit diligemment à son fils le Roy d'Angleterre, qu'il voulust entendre avec luy à l'vnion de l'Eglise, à laquelle chose son dict fils estoit fort enclin, & y auoit grand volonté, il delibera d'enuoyer vers les deux contendans. Et de fait, y enuoia bien notable Ambassade, laquelle veint premierement en Auignon deuers Benedict. Mais oncques ne les voulut veoir, ne ouyr, & pource ne passerent point oultre, ny ne allerent deuers l'Antipape, mais s'en retournerent en Angleterre. Et feut lors

1396. deliberé, que pour ceste matiere les dictz deux Duc de Berry, & de Bourgongne, s'assembleroient avec le Roy d'Angleterre, le Dimanche de *Latave Ierusalem*. Et s'arresta fort le Roy à la voye de cession. Et que cependant tous les deux Roys enuoiroient chascun Ambassade deuers les contendans, à ce qu'ils voulussent consentir, & auoir agreable la voye de cession, & pareillement vers le Roy des Romains, pour les requerrir qu'ils voulussent accepter, & auoir agreable la dicté voye de cession. Et de fait, y enuoyerent.

En ce temps veindrent en l'Eglise de Monseigneur Saint Denys, aucuns qui auoient esté malades. Lesquels s'estoient voüiez à Monseigneur Saint Denys, & à ses compaignons, & par leurs merites affermoient auoir esté guairis. L'un auoit esté empoisonné, l'autre estoit enragé, & hors du sens & entendement, & le tiers auoit vn flux de sang, & ne le pouuoit on restraindre, & s'en veindrent à l'Eglise de Saint Denys rendre graces à Dieu, & aux glorieux Saints.

Au dict temps, la Roïne eut vn fils, lequel Monseigneur le Duc d'Orleans, leua sur fons. Et feut au saint Sacrement de baptesme, nommé Louys. Et en fait on à Paris, & par tout le Royaume, grand ioye & solemnité.

Le Roy d'Espaigne enuoia vers le Roy, & aussi vers Benedict, pour le fait de l'vnion de l'Eglise. Et quand ils feurent vers Benedict, il les corrompit par argent, tellement qu'ils ne voulurent oncques dire, ce qui leur estoit enchargé. Toutesfois le Patriarche d'Alexandrie, fait tant quand les dictz Ambassadeurs veindrent deuers le Roy, qu'il eut les lectres & instructions que le dict Roy d'Espaigne leur auoit baillé. Par lesquelles apparoit assez, que si Benedict ne s'aduisoit, qu'il auoit volonté, de luy faire subtraction. Et feut la matiere mise au Conseil du Roy, & ouuerte par diuers clerks. Et finalement feut aduisé & presque conclud, veu la maniere de proceder de Benedict, qu'on luy pouuoit faire subtraction.

Or est ainsi, que le Roy d'Angleterre auoit renuoié apres le retour de ses autres Ambassadeurs à Boniface, luy signifier d'entendre à l'vnion de l'Eglise, & qu'il voulust accepter la voye de cession. Mais ils s'en veindrent sans respõse effectuelle. Et disoit on, que c'estoit pource qu'il auoit sceu, que Benedict l'auoit refusé. Reueindrent aussi les Ambassadeurs, qui auoient

auoient esté enuoyez par les Roys de France, & d'Angleterre 1396. ensemble. Et feurent vers les deux contendans, & leur exposèrent les prieres & requestes des deux Roys, touchant la dicte vnion, & affection qu'ils auoient au bien de l'Eglise. En leur requerant, qu'ils y voulussent entendre, en la forme & maniere qu'ils declareroient. Mais ils s'en retournerent, & rapporterent que tous les deux contendans estoient tant plains de conuoitise & d'auarice, & aueugles de vraye connoissance, que à autre chose ils ne vouloient entendre.

Au Royaume de France regnoient plusieurs pechez, & tenoient plusieurs, que les maux, & les accidens qui venoient, estoient pour les pechez publicques qu'on y faisoit, non corrigez ne punis. Et pource que principalement il n'y auoit si meschant, qui en ieux & manieres de parler, ne reniasse Dieu, maugreassent & despitassent ses Saincts, & la benoiste glorieuse vierge Marie, y eut certaines Ordonnances par le Roy faictes, & publiées par mandemens patens, contenant les punitions qu'on debuoit faire. Lesquelles par aucun temps durerent & feurent executées. Mais pource que des plus grâds aucune punition n'en estoit faicte, les choses retournerent en leur premier estat, à la tresgrand desplaisance des gens de bien.

L'an mille trois cents quatre vingts dixsept, le Roy de Na- 1397. uarre enuoya deuers le Roy, pour luy requerir qu'il luy feist iustice, & enuoya l'Euesque de Pampelune, qui estoit vn trefnotable clerc, lequel presenta ses lectres au Roy, qui estoient seulement de creance, en luy priant & requerant, qu'il luy voulust bailler audience pour dire sa creance, & assigner iour à la dire, lequel luy feut assigné. Et bien notablement recita ce qui luy estoit enchargé, en declarant la prochaineté de lignaige, que le Roy de Nauarre auoit au Roy, & les terres & Seigneuries qu'il debuoit auoir au Royaume de France, & mesmement en Normandie, en requerant qu'il les luy voulust faire bailler & deliurer, & que aussi son maistre & Seigneur estoit prest & appareillé, de faire ce qu'il appartiendrait. Icelui Euesque feut grandement receu par le Roy, & aussi par les Seigneurs. Et luy feut dict, que les demandes estoient grandes & pesantes, & que le Roy y auroit regard, aduis & conseil. Et en ceste matiere, y eut de grandes difficultez. Et disoient au-

1397. cuns, que ce seroit mal fait, de luy rien bailler, veu les horribles & detestables maux, que son pere auoit fait en ce Royaume. Et qu'on ne scauoit la volonté de son fils, & que s'il auoit en Normandie les places qu'il demandoit, & il vouloit faire guerre, que grands inconueniens en pourroient aduenir. Les autres disoient, qu'il y auoit eu accord avec le pere, & ferme paix faite, & qu'on ne debuioit point auoir regard au temps passé. Et pour pourueoir à l'inconuenient allegué, s'il auoit places en Normandie, feut dict par ceux de ceste opinion, qu'on luy en baillast ailleurs. Et ainsi feut fait. Et feut erigée Nemours en Duché. Et en Gastinois, & Champaigne, luy feurent baillées terres & Seigneuries iusques à dix mille liures tournois de reuenue. Et à Messire Pierre de Navarre, son frere, la Comté de Mortaing. Et à tant se partit le dict Euesque, & disoit on que son maistre en auoit esté content.

Et pource que tousiours, & comme continuellement on faisoit diligence tant en ce Royaume que dehors, de trouuer moyens de guairir le Roy, & remede de pourueoir à son inconuenient, vindrent deux Augustins à Paris, qui s'offroient à guairir le Roy. Et demanderent plusieurs choses à faire les remedes, & n'y voulut on rien espargner. Et courroient diuers langaiges entre le peuple, en disant que la maladie du Roy estoit punition diuine, pour les grandes exactions qui se faisoient sur le peuple, sans rien en employer au fait de la chose publicque.

Quand le Roy Richard d'Angleterre, se veid au dessus de ses besongnes, comme il luy sembloit, & il feut en Angleterre, il cuidoit que tous murmures cessassent contre luy. Si feit grande exaction sur son peuple, d'or, & d'argent, disant que c'estoit pour son mariage à la fille de France, & aussi que les Irlandois se rebelloient contre luy, & qu'il y vouloit aller. Et de ces exactions & tailles, la plus grand partie du peuple, nobles & gens d'Eglise estoient tresmal contents. Et de fait, le Duc de Clocestre, & le Comte d'Arondel, murmurèrent fort en plusieurs manieres, & faisoient alliances secretes. Lesquelles choses vindrent à la congnoissance du Roy Richard. Si les feit tous deux prendre, & examiner, & apres qu'ils eurent confessé le cas, il leur feit couper les testes, c'est à scauoir au

Duc de Gloceſtre à Calais, & au Comte d'Arôdel à Londres. 1377.
 A cauſe dequoy, ſe leuerent pluſieurs diuiſions, & paroles. Et diſoient les aucuns, que c'eſtoit ſans cauſe, & que ce n'eſtoit que pource qu'ils aduertifſoient le Roy, qu'il faiſoit mal, de ſouffrir à faire faire les griefues exactions, qui ſe faiſoient ſur le peuple. Les autres diſoient, qu'ils auoient voulu attenter à la perſonne du Roy, ſoubs ombre qu'il auoit trefues au Roy de France, & baillé Cherbourg, & Breſt. Et quelque choſe qu'il en feust, les deux Princes moururent, & feurent exécutez.

Le Roy reuint à ſanté, mais elle ne luy dura gueres. Et eſtoit choſe bien piteuſe d'ouïr les regrets qu'il faiſoit, quand il ſentoit qu'il debuït rencheoir, en inuocquant & reclamant la grace de Dieu, & de noſtre Dame, & de pluſieurs corps ſaincts. Les Gentilshommes, Dames, & Damoifelles, & tous ceux qui le voyoient, pleuroient à chaudes larmes, & ceux auſſi qui l'oyoient reciter, de grand pitié & compaſſion qu'ils en auoient. On print ſon barbier, & aucuns des ſeruiteurs du Duc d'Orleans, pour ſçauoir ſi on luy auoit rien fait, dont la maladie venir en peuſt. Mais à la fin on trouua, qu'ils eſtoient innocens en toutes manieres, & feurent deliurez.

En ce temps y eut grand mutation d'Officiers. Car pluſieurs eſtoient morts en la bataille de Hongrie, & feut fait Conneſtable de France, Sancerre, lequel parauant eſtoit Mareſchal, & Meſſire Iean le Maingre, dit Boucicault, feut fait & ordonné Mareſchal, Meſſire Iacques de Bourbon, grand Chambellan, & Meſſire Hutin d'Omout ordonné à porter l'Oriflambe. Et feurent ces choſes faiſtes le vingtiſme iour de Iuillet.

Et combien que comme dict eſt, que le mariage euſt eſté tout accordé, du ſils au Duc de Bretagne, & de la fille du Roy, & qu'il y euſt aucune ſolemnité faiſte, toutesſois encores de nouueau feurent elles faiſtes à Paris en grands pompes, tant de veſtures, que de ioyaux, & habillemens des Dames & Damoifelles, & y eut iouſtes, & autres choſes accoutumées faiſtes.

Madame Marie de France, qui dès le temps de ſa natiuité, auoit eſté ordonnée à eſtre religieuſe, feut menée à Poiſſi,

1397. & là rendüe religieuse de son bon gré & volonté. Et luy feut bien habillé & ordonné son hostel & logis, ainsi comme il appartenoit bien, & luy ordonna on assignatiō à tenir son estat, & luy feurent baillées des Dames de religion, estans en la diète Abbaye, pour luy tenir compaignée.

Le Roy reuint derechef à santé. Et pource que à Sain& Denys estoit l'un des cloux, dont nostre Sauueur feut crucifié, lequel n'estoit pas bien enuaisselé, ainsi qu'il appartient, le Roy fait faire un beau & riche reliquaire, & le donna à l'Eglise de Sain& Denys, à ce que le dict clou feust mis richement & honorablement.

En la dicté année, l'Empereur de Constantinople, enuoia vers le Roy demander aide & confort contre les Turcs, lesquels luy faisoient forte guerre, & taschoient auoir la Cité de Constantinople. Et y veindrent de bien notables gens, qui monstroient, que sans aide l'Empereur ne pourroit resister, & en toute humilité feirent leur proposition. Et eux retraicts, la matiere feut ouuerte au Conseil. Et feurent tous d'opiniō, que combien que l'année deuât, le Roy y eust eu grand dommage, que encores debuoit on entendre à leur aider. Et lors s'agenouilla Monseigneur le Duc d'Orleans, frere du Roy, en luy suppliant & requerant, qu'il luy pleust donner congé d'y aller, & que tresvolontiers il y emploieroit sa personne. Laquelle requeste luy feut reputée à bien grand honneur, & vaillant couraige. Et sur ce, le Roy ne luy fait aucune response. Et appella l'on les Ambassadeurs, & leur fait faire response. le Roy, que en temps conuenable il aideroit & conforteroit l'Empereur, & luy enuoieroit gens. Et leur feut fait dons beaux & honorables, & s'en retournerent vers leur maistre.

Le Conestable du Basac, & son principal Capitaine, enuoia de tresgratieux presens au Roy, lesquels le Roy receut tresbenignement, & renuoia les messaigers.

Le Roy de Boheme auoit grand desir de veoir le Roy, & sceut que le Roy debuoit venir à Rheims, & que par aucun temps se tiendrait là, si fait diligence d'y venir. Laquelle chose venüe à la congnoissance du Roy, il en feut bien ioyeux, & delibera de luy faire bonne chere. Et ainsi comme le Roy s'esbattoit aux champs, à chasser, & voler, enuiron à deux lieues de Rheims, survint le Roy de Boheme, lequel

il receût bien & honnorablement, & à grand ioye le mena à 1397.
Rheims, & feut festoyé en toutes manieres bien grandement.
Et luy feit le Roy de beaux dons & plusieurs presens. Et cepē-
dant qu'il y feut, suruint vne Ambassade d'Allemagne, pour
auoir vnion en l'Eglise, disans qu'ils auoient esleu la voye de
cession comme luy, dont le Roy feut moult ioyeux.

L'an mille trois cents quatre vingts dix-huict, Il vint à la 1398.
congnoissance de Benedict, que le Roy auoit enuoié deuers
les Roys & Princes de Chrestienté, pour le faict del'vnion. Et
que en ce, le Roy d'Angleterre estoit joint avec luy. Dont
il feut bien desplaisant, doubtant qu'il n'eust fort à faire. Par-
quoy il enuoia deuers le Roy, le Cardinal de Pampelune, qui
estoit à luy fort allié. Le Roy, & ceux de son sang, le sceurent
assez tost. Et pource feut mandé au dict Cardinal, qu'il ne veint
point, & aussi non feit-il plus. Et si Benedict auoit esté parauant
mal content, encores le fut-il plus. Et escripuit au Roy, & à
Monseigneur de Berry, ainsi que bon luy sembla. Et es lettres
escripuoit plusieurs choses, touchant le dict Messire Simon de
Cramault, Patriarche d'Alexandrie, en le chargeant. Mais le
Roy, & nos Seigneurs, ne sy arresterent ja. Car ils voioient &
apperceuoient, que ce n'estoit que pource qu'il auoit à coeur,
d'aider à son pouuoir à executer l'intention du Roy, qui
estoit iuste & raisonnable.

Le Roy pour pourueoir au schisme de l'Eglise, delibera d'as-
sembler à Paris les Prelats de son Royaume, pour auoir aduis
& conseil, qu'il estoit à faire en la matiere. Et y eut bien gran-
de & notable compaignée de gens d'Eglise, clercs, & autres
notables personnes, Docteurs, Maistres, & graduez. Et plu-
sieurs par diuerses fois on auoit enuoié pardeuers Benedict,
qui estoit en Auignon, pour le prier & requier qu'il y voulust
aduiser, & qu'il n'y auoit prouision, sinon que tous les deux
contendans feissent cession. Et que on feist vn Concile gene-
ral, où les Cardinaux tant d'un costé que d'autre, feussent avec
les Prelats de Chrestienté. Et que là on aduisast, qu'il y eust vn
Pape seul & vnicque. Mais Benedict en rien n'y vouloit enten-
dre. Et pour trouuer la maniere d'y proceder, y eut plusieurs
grandes & notables consultations faictes. Et finalement feut
deliberé & conclud, qu'on ne soubstraieroit pas seulement à
Benedict, la collation & disposition des benefices: mais qu'on

1398. luy feroit pleniere subtraction de toute obéissance. Et sur ce, feurent lettres bien notablement faictes, & composées, lesquelles feurent enuoiées, & publiées par tout le Royaume de France. Et feut conclud que l'Eglise de France seroit reduite à ses anciennes libertez, & franchises, C'est à sçauoir que les Ordinaires donneroient les benefices, estans en leur collations, & que toutes graces expectatives, & reseruations cesseroient. Et que aux benefices, on procederoit par voye d'ellection, & en appartiendroit la collation aux Ordinaires. Et pour ceste cause, fut ordonnée vne notable procession à Sainte Geneuiefue, en laquelle feurent les Ducs de Berry, de Bourgongne, & de Bourbon. Et là feut vn notable Sermon ou predication Maistre Gilles des Champs, lequel sçauoit bien la matiere, & auoit tousiours esté present en la deduction d'icelle.

Et aduint que tantost vacqua l'Abbaye de Saint Denys, par la mort de Guy Abbé d'icelle. Et feut esleu Messire Philippes de Villetre, qui estoit vn bien notable clerc, Docteur en Theologie. Et y eut des difficultez beaucoup, touchant la confirmation de l'ellection, bien qu'ils estoient exempts, tant & si auant que l'exemption se peut estendre. Et feut dict, que l'Euesque de Paris, qui estoit ordinaire du lieu, confirmeroit ou infirmeroit la dicte ellection. A laquelle chose l'Euesque proceda, & trouua que l'ellection estoit iuste, sainte & canonique. Et pource la confirma, & si luy bailla le don de benediction. Mais il y eut lettres faictes & baillées par l'Euesque de Paris, que ce feust sans preiudice de l'exemption des religieux, Abbé, & Conuent de la dicte Eglise de Saint Denys. Et pource que semblable cas de iour en iour pouuoit aduenir, le Roy assemblea ceux de son sang, des gens d'Eglise, & de l'Vniuersité, pour sçauoir qu'on auroit à faire, quand le cas pareil aduiendroit, touchant les exemptions. Et feut ordonné generally, que si aucunes Eglises, ou benefices vacquoient, qui feussent electifs, on y procederoit par voye d'ellection, dont la consecration, confirmation, ou benediction, appartiendroit aux Ordinaires, sans preiudice des droicts, prerogatiues & exemptions des exempts & ordinaires. Et feurent les dictes choses touchant les dictes subtraction & reduction de l'Eglise de France, conclües le vingt-septiesme iour de Iuliet.

Quand les Cardinaux estans en Auignon, sceurent la conclusion de subtraction faicte par le Roy, & l'Eglise de France, ils firent pareillement subtraction à Benediſt, & soudainement & secretement ils partirent d'Auignon, & s'en vindrent à Villeneuve, qui est au Royaume.

En ce temps, le Comte de Perigort, qui estoit grand Seigneur, & puissant au pays de Guyenne, assembla gens de guerre, & les meit en ses places. Et soubz ombre qu'il se disoit tenir le parti des Anglois, commença à faire aspre & forte guerre aux François, vers les marches de Guyenne. Et faisoit maux infamis, & pilloit, robboit, & faisoit courre tout le pays. Pour laquelle cause, le Roy delibera d'y enuoier. Et feut deliberé, que le Mareschal Boufficault iroit. Et y alla à grand compaignée de gens de guerre, tant d'hommes d'armes, que de traict, & meit le siege deuant Montignac, où le dict Comte estoit, lequel finalement se soubmit à la Cour de Parlemēt du tout. Et meit le dict Mareschal la Comté en l'obeissance du Roy, & prit Montignac, Bourdille, Auberoche, Saulac, & autres places, & y eut grand peine, & de belles armes faictes. Et amena Boufficault le dict Comte de Perigort, à Paris. Et luy ouy, à grande & meure deliberation, feut dict par Arrest, que le dict Comte auoit forſaiſt corps & biens. Toutesfois la vie luy feut sauuée. Et feut la dicte Comté de Perigort, avec les appartenances, donnée à Monseigneur le Duc d'Orleans, frere du Roy, & luy feut baillée par appennaige à luy & à ses hoirs males, procreez de sa chair.

Et pource qu'on voioit que Benediſt ne vouloit faire obeissance, & que tousiours estoit pertinax en son opinion, on delibera qu'on l'assiégeroit dedans le Palais d'Auignon. Et de faict, y feut le siege mis, & y souffrit moult de miseres, peines, & travaux, tant de viures, que autrement. Mais il auoit moult grand courage, & tousiours se tenoit fort, & confortoit ceux qui estoient avec luy. Rodrigo de la Lune son frere, faisoit toutes les diligences qu'il pouuoit, de luy faire auoir viures, & quelque siege qui y feust, bien souuent par manieres subtiles, on y mettoit viures. Or adueint que aucuns estans au dict siege, aduisoient souuent manieres de trouuer moyens subtils, de entrer en la place du Palais, où estoit Benediſt. Et aduiserent qu'il y auoit vn esuier, ou conduit d'eaux, de la cuisine du

1398. dict Palais, qui estoit grand & large, & que par iceluy, en ostant vn treillis de fer qui y estoit, on pourroit tres-aisément entrer. Et trouua-on moyen de oster le dict treillis de nuit, si subtilement, qu'on le remettoit & ostoit quand on vouloit. Ceux de dedans s'apperceurent & imaginerent bien, que par le dict lieu, on auoit intention d'entrer. Et pource y meirent guet secret, & considererent qu'on ne pouuoit entrer que l'un apres l'autre, & que ceux qui entreroient, quand bon sembleroit, ils seroient pris & attrapez par ceux de dedans, & ainsi feut fait. Car aucuns de ceux du siege, & des plus vaillants, vindrent au dict esuiuer ou conduict de cuisine, & entrerent dedans, & à mesure qu'ils entroient, estoient pris, & tant qu'il y en eut de pris, de cinquante à soixante. Dont ceux qui tenoient le siege, feurent moult esbahis, & non sans cause. Car il y auoit de leurs parens, & amis. Et finalement y eut traité & accord, par lequel ceux du siege se leuerent, & les prisonniers feurent rendus, & s'en alla chascun, où il voulut.

Et est à aduertir, qu'il y auoit ja grandes haines, enuies, & diuisions, entre les Ducs de Bourgogne, Philippes le Hardy, & Orleans, frere du Roy, lequel soustenoit Benedict, & disoit, que c'estoit mal fait de luy auoir fait substraction, & plusieurs mesmes de France, le tenoient pour vrai Pape. Et quand telles diuisions venoient à la congnoissance du dict Maistre Iean Iuuenal des Vrsins, Garde de par le Roy de la Preuosté des Marchands, il alloit parler à eulx, & à autres, qui pouuoient aider à reprimer leur ire, & tellement qu'ils s'appaioient, ou au moins dissimuloient.

Et comme dessus ha esté touché, vindrent à Paris deux Augustins, qui se faisoient fort de guairir le Roy, & leur feurent baillées toutes les choses qu'ils vouloient & demandoient, & eurent bien grand finance. Et de fait, meirent la main à la personne du Roy, & comme l'on dict, luy feirent aucunes incisions au chef, & comme il feut trouué, meirét le Roy en grand danger, de le faire mourir piteusement. Et pource feurent pris, & emprisonnez, interrogez, & questionnez. Et pour abbrevier, confesserent qu'ils ne s'y congnoissoient. Et y eut plusieurs notables gens assemblez, tant d'Eglise, que lais, lesquels conclurent qu'ils seroient degradez, & qu'ils auroient les testes couppees. Et pour ceste cause, feurent faits escharfaulx en gre-

en greue deuant l'hostel de la ville, & du Saint Esprit. Et y eut 1398.
 vne maniere de pont de planches fait, qui venoit à l'endroict
 d'une des fenestres de la salle du Saint Esprit, laquelle fenest-
 re on mit en l'estat & semblance d'un huis, & feurent mis
 les dictz Augustins sur les dictz escharfaults. Et feit-on vne
 maniere de briefue predication. Et apres issit l'Euesque de Pa-
 ris en habit Pontifical par la dicte fenestre, & veint iusques aux
 deux Augustins. Lesquels estoient reuestus, comme s'ils eus-
 sent voulu dire messe. Et apres ce qu'il eut parlé à eulx, il leur
 osta à chascun d'eulx les chasuble, estole, manipule, aube, &
 surplis, en disant certaines Oraisons, puis s'en retourna par où
 il estoit venu. Et parauant en sa presence, feurent rais & ostez
 leurs cheueux, sans apparence de couronnes. Et tantost ceux
 de la Iurisdiction laye, les prindrent, & les despouillerent, &
 leur laisserent seulement leurs chemises, & à chascun vne pe-
 tite iacquette par dessus. Et feurent mis en vne charrette, &
 liez, & menez aux halles, & là eurent les testes couppees, & si
 feurent escartelez, & les corps portez au gibet, & les testes
 mises sur deux demies lances, en l'escharfault aux halles,
 où ils auoient esté decolez. Et feurent plusieurs esbahis com-
 ment on les auoit degradez, & baillez à la Iustice seculiere.
 Mais par clerks notables, veu les cas par eulx commis en la
 personne du Roy, feut dict que c'estoit Iustice. Et disoient au-
 cuns, que les dictz Augustins se disoient au Duc d'Orleans, &
 que par haine que le Duc de Bourgongne auoit au dict Duc
 d'Orleans, leur auoit fait faire & procuré, ce qui feut fait.
 A cause que le Duc d'Orleans, auoit fait brusler vn nommé
 Maistre Jean de Bar, qui estoit nigromantien & inuocateur de
 diables, & estoit au Duc de Bourgongne. Et disoit-on, que
 pour les enuies, qui estoient entre les dictz deux Ducs, diuer-
 ses choses se faisoient.

En ceste année, apres que le Roy Richard eut en Angle-
 terre, fait couper les testes des Seigneurs d'Angleterre des-
 sus dictz, plusieurs diuisions se commencerent. Et mesme-
 ment Henry de Lanclastre, fils du Duc de Lanclastre, tenoit
 plusieurs diuerfes & estranges manieres, sentans aucunes mur-
 mures & conspirations contre le Roy Richard, lesquelles vin-
 drent à sa congnoissance. Et pource manda le Duc de Lan-
 clastre, pere du dict Henry, & luy dit ce qui estoit venu à sa

Y

1398. congnoissance touchant son dictz fils. Et selon ce qu'on disoit, y auoit de meschantes choses entreprises contre le Roy, & trouuoient assez de matiere pour le faire mourir. Quand le Roy d'Angleterre apperceut les choses dessus dictes, il delibera de tenir vn Parlement à Vaincestre, & assembla les trois Estats du pays, & y eut grande assemblée, & feit des Ducs, & des Comtes. Et en ce Parlemēt, Henry de Lanclastre dit au Comte Mareschal, qu'il estoit fauls, traistre, & desloyal, & mauuais, & qu'il auoit faulusement & mauuaiselement tué, ou faict mourir son oncle, le Duc de Clocestre frere de son pere. Et qu'il auoit emblé les deniers du Royaume, & les auoit applicqué à son profit, & plusieurs autres trahisons auoit faict. Le Comte respondit, qu'il auoit faulusement & mauuaiselement menti. Et y eut gaigne iecté, & adiugé, & dit qu'il cheoit gaigne de bataille. Et pour ce faire, y eut iour assigné. Et tousiours cuidoit le Duc de Lanclastre pere de Henry, muer le propos du Roy, & des parties. Mais il n'y pouuoit bonnement trouuer remede. Au iour assigné, les parties tous armez comparurent en champ. Et apres les sermens, feut à chascun permis faire son debuoir. Et quand Henry de Lanclastre veid son aduersaire, marcha bien vaillammēt huiet pas, sans ce que l'autre commençast à marcher. Toutesfois il se esmeut, & comme de grād courage venoit à Henry. Et quand veint à l'approcher, tous deux iecterent leurs lances. Et ce faict, le Roy d'Angleterre les feit tous deux prendre, & les bannit de son Royaume, le Comte Mareschal à perpetuité, & Henry de Lanclastre, iusques à dix ans. Et de ce, feut le pere bien content. Henry s'en veint à Paris, vers le Roy de France, & les Seigneurs, & feut receu bien grandement & honnorablement, & luy feit-on tresbonne chere. Et luy ordonna le Roy son estat bien honnorablement. Dont le Roy d'Angleterre feut tres-mal content, & tres-impatiemment le porta, & luy sembloit, veu l'alliance, que le Roy, & les Seigneurs de France, ne le deussent point auoir receu. Et depuis, le pere du dict Henry, alla de vie à trespassement. Et cuidoit bien Henry de Lanclastre, que le Roy d'Angleterre deust appaiser son courage, & le rappeler, & luy laisser la succession de son pere, tant de meubles, que d'immeubles. Mais il feit tout le contraire, car il print tous les meubles, qui estoient grands, & les applicqua à son profit. Et

de ce, le dict Henry eut bien grand desplaissance. Dont Mon-^{1398.} seigneur de Berry fort le confortoit, & l'appaisoit le plus qu'il pouuoit. Toutesfois il sembloit bien à sa maniere & contenance, qu'il auoit vn couraige bien depiteux, & intention, s'il eust peu de s'en venger.

Ceste année, la Royne Blanche alla de vie à trespassement, à Neauphle le chastel, le cinquiesme iour d'Octobre, dont ce feut grand dommaige. Elle feut portée en terre à Saint Denys bien solemnellement, ainsi qu'il appartenoit. Elle auoit vne partie del'vn des clous, dont nostre Seigneur feut crucifié, qu'elle feut bien & honorablement enchasser, & le donna à nostre Dame des Carmes, pour mettre en leur Eglise.

Le Roy, la Royne, & nos Seigneurs les Ducs, enuoierent à leur fille, & niepce d'Angleterre, de beaux & riches dons, par notables cheualiers, & escuiers, qui feurent en Angleterre, & là les presenterent. Et quand ils feurent retournez, ils rapporterent, que en Angleterre auoit plusieurs diuisions, & qu'on murmuroit fort contre le Roy pour les exactions qu'il faisoit, & qu'ils doubtoient fort qu'il n'y eust vn grand brouillis. Car il n'y auoit ne gens d'Eglise, nobles, ne autres, qui n'en feussent mal contents. Et quand Henry de Lanclastre, qui estoit par deça le sceut, il en feut bien ioyeux, & se reconforta fort.

Les Cardinaux de Thury, & de Saluces vindrent à Paris en grands pompes & estats, & veindrent deuers le Roy, & nos Seigneurs les Ducs, & feirent vne proposition par la bouche du Cardinal de Thury, & disoient maux infinis de Benedict, & plusieurs autres paroles. Et feirent deux Requestes, l'vne, que le Roy voulust escrire aux Roys & Princes diligemmēt, touchant le fait de l'vnion. La seconde feut, qu'il voulust faire diligence, & mettre peine à prendre Benedict. Sur la premiere, leur feut respondu, que le Roy y auoit entendu, & entendroit le mieux que faire se pourroit. A la seconde Requeste, feut fait responce, que ce n'estoit pas à faire au Roy, de faire prendre Benedict, ne mettre la main sur luy. Et aussi que ce n'estoit pas chose aisée à faire. C'estoit merueilles des pompes & estats des dicts Cardinaux, lesquels estoient à toutes gens de quelque estat qu'ils feussent, à grand desplaissance & abomination.

1398. Il y eut deux Cardinaux, l'un nommé Martin, & l'autre Boniface, lesquels se cuiderent eschapper du Palais d'Auignon, en habits dissimulez, & furent rencontrez par les gens du Marechal Boufficault, & prins. Et dit-on, que Martin de desplaisance de pauureté & indigence, alla de vie à trespassement. Et au regard de l'autre nommé Boniface, l'on disoit que Boufficault, en auoit bien eu cinquante mille ducats.

En ce temps, vn bourgeois de Viêtré en Bretagne, nommé Pierre Pilet, iecta son gage de bataille contre vn gentil-homme du dict pays, nommé Guillaume Marcille. Et le chargeoit d'auoir fait tuer par ses fils vn sien parent. Le dict Marcille au contraire maintenoit, que iamais n'en auoit esté consentant. Et estoit le dict Pilet vn bel homme, fort, & roide, & Marcille estoit vieil & ancien. Et luy feut permis que en son lieu il meist le bastard du Pleffis. Et soustenoit fort le dict Pilet, Monseigneur de Laual, deuant lequel se faisoit le gage. Et feurent les sermens faicts. Et feut le dict Pilet iecté à terre d'un coup de lance par le bastard, & apres tira son espée, & le tua. Et tantost apres, on enuoia querir le bon homme vieil, qui estoit prisonnier comme raison estoit, & feut deliuré. Et si son champion eust esté desconfit, eust souffert mort.

1399. L'an mille trois cents quatre vingts dix-neuf, le Roy retourna en santé, & auoit bon sens & entendement, & feit la solemnité de Pasques en son hostel à Saint Paul. Au huitiesme iour apres, l'Euesque de Paris veint au dict hostel en la chappelle, & de sa main le Roy receut le Saint Sacrement de Confirmation, en grand deuotion. Et si feirent plusieurs autres Seigneurs, chéualiers, & escuiers.

Les Ducs de Berry, de Bourgongne, & de Bourbon, auoient grand desir de sçauoir dont venoit la maladie du Roy, & feirent assembler tous les Physiciens de l'Vniuersité de Paris, & autres, dont il estoit memoire. Et feut mise la matiere en termes, & spécialement si la maladie qu'il auoit, venoit de choses intrinseques, ou par accidens extrinseques. Et y eut diuers argumens & imaginations. Et finalement on ne sceut que conclurre, & demeura la matiere indiscusse, & sans aucune determination, dont les Seigneurs ne feurent pas bien contents.

En ce temps aucuns de l'Ordre de Saint Bernard, appor-

rerent comme ils disoient , le saint suaire , où nostre benoist 1399.
Sauueur Iesus-Christ feut ensepulturé , & le meirent à Saint
Bernard à Paris. Et y eut grande affluence de peuple , & en le-
uerent vne bien grand finance d'argent. Et disoit on , qu'il y
eut de beaux miracles faicts , combien qu'on n'en declarast
aucuns particulièrement.

Ceux de Venise enuoierent vers le Roy, demander aide &
confort contre les Turcs , lesquels auoient occupé plusieurs
villes. Et leur donna on esperance de leur aider , & aussi en
auoit le Roy bonne volonté.

On disoit que aucuns mieux aimans leur profit particu-
lier, que le bien publicque , procuroient & faisoient diligen-
ce , qu'on meist vn dixiesme sus. Et estoit renommée , que le
principal qui poursuiuoit ceste matiere , estoit Messire Simon
de Cramault , Patriarche d'Alexandrie , qui disoit qu'il auoit
faict plusieurs grandes mises en Ambassades , & autrement,
pour le faict de l'Eglise. Et que autrement il ne pouuoit estre
contenté, ne satisfait. Et feurent les gens d'Eglise assemblez,
pour auoir leur consentement. Et plusieurs quand ils ouyrent
parler de la matiere, s'absenterent , & departirent. Et de ceux
qui y demurerent, les aucuns oncques ne sy voulurent con-
sentir. Toutesfois feut le dixiesme mis sus , à la grand desplai-
sance de la plus saine partie. Et ne trouua l'on à peine person-
ne Ecclesiastique, qui se voulust mesler de le receuoir, & le-
uer. Et feut ordonné, qu'on le feroit leuer par personnes layes.
Et ainsi feut fait bien rigoureusement , & en feut leué grand
finance. Et disoit on que c'estoit pour le faict de l'Eglise, & de
la poursuite de l'vnion. Mais tout s'en alla en autres choses
bien inutiles , & en prindrent les Princes & autres ce qu'ils
peurent, à leur profit particulier.

En ce temps , les Turcs & Sarrafins greuoient fort Con-
stantinople , & faisoient forte & aspre guerre. Pour laquelle
cause l'Empereur de Constantinople , enuoia deuers le Roy
requerir aide , & secours. Et y enuoia le Roy le Marechal
Boussicault , à tout douze cents combatans , & en sa compai-
gnée estoit Chasteaumorant, vn Cheualier de Bourbonnois.
Lesquels se porterent vaillamment, & feirent plusieurs grâds
dommaiges aux Sarrafins , & resisterent à leur mauuaise en-
treprise & volonte. Et quand ils eurent faict le mieux qu'ils

1599. peurent, delibererent d'eulx en retourner, dont les Grecs feurent bien desplaisans. Mais l'air estoit non propice aux François, & desia aucuns se commençoient à mourir, & si auoient faulte d'argent, & souuent de viures. Et de fait, le Marechal Boufficaud s'en partit, & laissa le dict Chasteau-morant vaillant cheualier, à tant seulement cent combatans. Lequel tresvolontiers y demeura, dont les Grecs encores combien qu'ils feussent peu de gens, feurent grandement recontritez.

En ceste année, feut moult grande abondance d'eäues, & creurent les riuieres merueilleusement, & se desfriuerent au grand dommaige des biens de dessus la terre. Et emmenoiient maisons, gens, enfans, & biens meubles.

Et en cet an, y eut grande, horrible, & piteuse mortalité en Bourgongne, Champaigne, Brie, Paris, & Normandie, & pour abbreger, par tout le Royaume de France. Et quand elle cessoit en vn pays, elle commençoit en vn autre. Et est comme chose incroyable, de la grande quantité de peuple qui mourut. Et disoit on, que c'estoit à cause des horribles & detestables pechez, qui se commettoient publiquement & notoirement, sans aucune reprehension. Et quand on en parloit en predications, au Conseil du Roy, ou autre part, on contemnoit & desprisoit ceux qui en parloient à bonne intention. Les gens d'Eglise, ne sçauoient que faire, sinon prieres & processions solemnelles, dont ils faisoient grandement leur debuoir. Et les religieux, Abbé, & Conuent de Saint Denys, à la requeste d'aucuns Seigneurs, & autres, en vne bien notable procession, porterent iusques à Paris en la sainte Chappelle, le corps de Monseigneur Saint Hyppolite, & celebrerent vne bien notable messe, & puis le rapporterent à Saint Denys, & cessa la mortalité.

Vne merueilleuse Comete apparut au ciel. Et combien qu'on die que telles choses sont naturelles, toutesfois elle sembla fort estrange. Car elle dura huit iours entiers enflambée, & estoit de grande estendue. Et disoient aucuns Astronomiens que c'estoit signe de quelque grand mal aduenir.

Les Allemands eurent en aucune desplaisance leur Empereur, si le desappointerent, & en meirent vn autre.

Il y eut grandes alliances iurées & promises, entre Monseigneur d'Orleans, & Henry de Lanclastre, & se monstroient grands signes d'amour, & souuent estoient ensemble.

Or est vrai, comme dessus ha esté dict, que Henry de Lanclastre auoit esté bāni du Royaume d'Angleterre, & s'en vint en France, où il estoit bien desplaissamment, & ne faisoit que penser & soultiuer, comme il pourroit trouuer maniere & moyen de faire vn grand brouillis. Et en ce temps, ceux de Hibernie se rebellerent contre le Roy d'Angleterre, & feut content d'y aller en personne, & de faict y alla. Et apres son partement, plusieurs monopoles, conspirations, & seditions, se commencerent à esnouuoir. Lesquelles choses vindrent à la congnoissance de Henry de Lanclastre, duquel le pere estoit mort. Car durant sa vie, il eust resisté aux entreprises & malices de son fils. Et delibera de trouuer maniere de passer en Angleterre. Et apres le passément du dict Roy d'Angleterre en Hibernie, aucuns plains de mauuaise volonté, vindrent là ou la Roïne, fille de France, estoit. Et luy osterent tous ses seruiteurs & seruantes de la langue de France, excepté vne Damoiselle, & son Confesseur, & aucuns Anglois, entendans & parlans quelque peu de la langue de France. Et en vn chasteau la meirent, qui feut vn exploict bien merueilleux, dont le dict de Lanclastre, feut biē ioyeux. Et luy sembla qu'il estoit tēps qu'il passast en Angleterre, & à ce faire, se disposa le plus secretemēt qu'il peut. Toutesfois il vint à la cognoissance d'aucuns Seigneurs de France, qui se doubtoient biē qu'il ne voulust faire quelque mauuaise besongne ou entreprise contre le Roy Richard, gēdre du Roy. Et de ce on lui parla: mais il affermoit que ce n'estoit pas son intention, ny ne feut oncques, de faire chose preiudiciable ou dommageable au Roy d'Angleterre, son souuerain Seigneur, & que ce qu'il faisoit, c'estoit pour son honneur & profit, & pour luy cuider faire seruice & plaisir: toutesfois l'issue monstra tout le contraire. Et pour abbreger, s'en alla en Angleterre, & passa la mer, & tantost trouua satellites, qui luy promeirent aider, & ainsi le feirent. Il escriuit lettres tres-seditieuses à plusieurs Prelats, nobles, & gens des bonnes villes, faisans mention de plusieurs bourdes & mensonges. Et tantost trouua gardes, suites & allies. Et s'en veint deuers le Duc d'Yorck son Oncle, qui le re-

1399. print fort : mais il iura , & afferma , comme dessus il auoit dict en France. Combien que desia auoit il fait prendre plusieurs nobles d'Angleterre, & autres, & leur auoit fait couper les testes , & icelles enuoier à Londres. Et auoit obeissance desia en plusieurs places & villaiges , & comme tout le peuple se tiroit vers luy, & obeissoit. Quand la chose vint à la congnoissance du Roy Richard, il feut moult troublé, & non sans cause, & delibera de s'en venir en Angleterre , & retourner, & de fait ainsi le feit. Et quand il y feut, comme de toutes sès gens comme tout seul feut delaisé, dont il feut moult esbahi. Et encores luy vint il bien pis. Car par ceux ausquels se fioit, feut prins, detenu, & emprisonné, & baillé, & liuré és mains de son aduersaire. Et lors tout le peuple commença à crier , & dire tant gens d'Eglise, nobles, que autres, qu'on le debuot priuer du Royaume , & mestre en chartre perpetuelle. Car il auoit fait mourir ses parés sans cause, & baillé Cherbourg, & Brest, & fait paix au Roy de France , & aux François , sans le consentement du peuple. Et qu'il auoit fait de grandes & excessiues exactions sur le peuple , sans l'auoir employé au fait de la chose publicque, & du Royaume. Et prenoit on gés de tous estats, qui auoient serui le Roy Richard, qui estoient executez à mort, pillez, & robbez. Et feut conclud, qu'il failloit faire vn autre Roy par eslection. Et feut esleu Henry de Lanclastre, & constitué & ordonné Roy par les trois Estats. Et l'Archeuesque de Cantorbie, l'oingnit, & feit vne grande proposition, & print son thesme , *Habuit Iacob benedictionem*. Et le deduisit, ainsi que bon luy sembla. Et se nomma & porta le dict Henry publicquement & notoirement Roy. Et monstra vne ampoule, que vn ange comme il disoit auoit apporté à Saint Thomas, pour en oindre , & sacrer les Roys d'Angleterre. Et auoit le Roy enuoie deuers Henry de Lanclastre, pour sçauoir que ce estoit qu'on faisoit en Angleterre contre son fils , ausquels on monstra la dicte ampoule. Et si parauant il auoit fait mourir plusieurs personnes d'Angleterre bié notables, encores quád il se trouua maistre, il en feit plus mourir sans cause & sans raison. Et qui pis est , il feit tant que les seruiteurs du Roy Richard mesmes , & ausquels il se fioit , le meirent à mort bien inhumainement. Et pource que plusieurs en ceste matiere en ont escript , on s'en passe en brieu. Et trouue on bien, que les

les Anglois ont autresfois faict de tels exploits.

1399.

En ce temps, estoit à Paris Monseigneur le Duc de Berry, Oncle du Roy, & en sa compaignée estoit le Comte d'Estampes, lequel souuent beuuoit, & mangeoit à sa table, & vn iour le mal d'apoplexie le print, & à la table sa teste meit sur ses bras, qui estoient sur la table comme croisez, & cuidoit on qu'il dormist. Et disoit ledict Mōseigneur de Berry en riant, Beau Coufin dort. Mais il dort tellement, que oncques puis n'en reueilla.

Quand le Roy sceut, ce qui auoit esté faict en Angleterre contre son gendre, il feut bien desplaisant, & congneut on biē que toutes alliances, & trefues, estoient rompües, & qu'on estoit à la guerre. Toutesfois Henry, soy disant Roy d'Angleterre, enuoya vers le Roy luy faire sçauoir, que s'il vouloit enuoyer à Boulongne de ses gens, qu'il enuoiéroit à Calais. Et ainsi feut faict. Et y eut personnes notables enuoiées de costé & d'autre, & parlerent ensemble. Et y eut seulement vnes trefues conclües à la Penthecoste ensuiuant.

Pource que l'année d'après, auoit pardon general & indulgences en Court de Rome, & que le Royaume estoit bien appauuri, & que si on permettoit aller à Rome, que ce seroit grande euacuation de pecunes, veu que à Rome ils tenoient l'Antipape pour Pape, feut defendu qu'on n'y allast point, par cry public: mais ce nonobstant grand peuple y feut.

Pource que par les Ordonnances Royaux, qui auoient esté mises sus, l'Eglise de France, auoit esté remise en ses libertez & frāchises, & ordonné que les Ordinaires donneroiēt les benefices, ils en disposerēt à leurs varlets & seruiteurs. Et de ce, ceux de l'Vniuersité se plainriēt, & nō sans cause. Et aussi on entreprenoit fort sur leurs priuileges, & en diuerses manieres n'en pouuoient iouyr. Ils requièrent au Roy qu'on y pourueust, ou autrement ils faisoient sçauoir qu'ils cesseroient. Et de faict, pource qu'on ne leur feit aucune prouision valable, ils cessèrent de faict, & durerent leurs cessations tour au long du Carisme. Et depuis feut trouué expedient, & recommencerent leurs leçons.

En Sicile, & Naples, le Roy de Sicile en plusieurs lieux estoit obeï, & tenu pōur Roy, & spécialement à Naples. Et y eut vn Comte du pays mesmes, auquel il se fioit, lequel par trahison

Z

1399. bouta le Roy Lancelot dedans Naples. Et pource quand la chose vint à la congnoissance du Roy de Sicile, il enuoia le Comte de la Marche au pays, pour faire guerre.

1400. L'an mille quatre cents, Il vint à la congnoissance du Roy, que l'Empereur de Constantinople, auoit grand desir de venir en France, tant pour veoir le Roy, que aussi pour luy requerir aide & confort, pour resister alencontre des ennemis de la foy, qu'aussi pour le remercier des secours, aides, & curialitez qu'il luy auoit fait. Et quand le Roy sceut sa venüe, il feit faire diligence, que à l'entrée du Royaume, y eust cheualiers & escuiers pour le conduire & defrayer par tout, où il passeroit. Et quand il feut assez pres de Paris, il enuoia ses Oncles au deuant de luy, & le Roy mesmes le receut à l'entrée de Paris, & luy donna vn beau coursier bien enharnaché tout blanc. Et l'ame-na le Roy iusques au Palais, & puis le feit mener au Louure, où il feut logé. Et estoit l'hostel tresbien habillé & paré, & là tenoit son estat aux despens du Roy. Et faisoient le seruice de Dieu selon leurs manieres & ceremonies, qui sont bien estranges, & les alloit veoir qui vouloit:

En ce temps, feut ordonné par le Roy, & ceux de son sang, qu'on feroit diligence d'auoir Madame Isabeau Roine d'Angleterre, qui estoit pucelle. Car oncques le Roy Richard, compaignée charnelle n'auoit eu avec elle. Et enuoia on querir saufconduit, lequel feut accordé, & enuoie par Héry de Lancelastre. Et y feurent commis le Seigneur de Hugueuille, & Maistre Pierre Blanchet, Conseiller, & Maistre des Requestes de l'hostel du Roy. Lesquels arriuerent en Angleterre, & feirent leur requeste, & ce qui leur estoit enchargé par le Roy. Et y eut par les Anglois des difficultez, & vouloient auoir descharge de plusieurs promesses, qui auoient esté faictes au traité de mariage, & de ce qu'elle auoit eu, & apporté. Et pource que le dict Maistre Pierre Blanchet, debatoit fort les matieres au profit, & à l'honneur du Roy, les Anglois conceurent grand haine contre luy, & aussi contre son compaignon. Et feut aucune renommée, que tous les deux feurent empoisonnez, & quoy qu'il en feust, mourut Maistre Pierre Blanchet, & le dict de Hugueuille, feut en tel point, qu'il vomit iusques au sang clair, dont il feut bien malade: mais par laps de temps il guairit. Les autres dient, qu'il y auoit grande mortar-

lité en Angleterre, & que tous deux feurent frappez, & que 1400. Maistre Pierre Blanchet y mourut, & Hugueuille eschappa. Et feurent bien long temps en Angleterre, sans ce qu'ils y eussent rien fait.

Et en ce temps, Maistre Jean Iuuenal des Vrsins, qui auoit la Garde de la Preuosté des marchands de par le Roy, feut ordonné par eslection de la Court de Parlement, Conseiller & Aduocat du Roy en la dicte Court. Lequel au dict Office de la Garde de la Preuosté, s'estoit grandement gouverné, & honorablement. Et tousiours quand il y auoit aucun discord entre les Seigneurs, il mestoit peine à tout appaiser, tellement que de son temps, nonobstant la maladie du Roy, aucun inconuenient n'en aduint.

En ce mesme an, feut fait le mariage de Louys Duc d'Anjou, cousin du Roy, & de la fille du Roy d'Arragon, nommée Ioland, qui estoit vne des belles creatures, que on peust point veoir. Et y eut bien grande & solemnelle feste, comme à tel Seigneur & Dame appartenoit bien.

Le Roy de Boheme, qui auoit esté esleu en Empereur d'Allemagne, feut pour aucunes causes, par l'ordonnance des Electeurs de l'Empire, & des gens d'Eglise, Princes, & nobles d'Allemagne, desappoincté de l'Empire. Et disoient aucuns, que c'estoit de son consentement. Et feut ordonné Empereur, le Duc Robert de Bauiere, renommé d'estre bon, & vaillant Prince. Et sur ce, enuoierent le dict Empereur, & ceux d'Allemagne deuers le Roy. Et aussi sur le fait de remedier au schisme, & auoir vnion en l'Eglise. Les Ambassadeurs feurent honorablement receus, & de ce qu'ils auoient signifié au Roy les choses dessus dictes, on les remercia, & leur feit on aucuns presents, & s'en retournerent. Et pource qu'ils n'auoient aucunement particulierement déclaré, la forme & voye qu'ils entendoient de venir à vnion, combien que le Patriarche Cramault eust rapporté, que quand il feut en Ambassade, qu'ils se adheroient au Roy, & estoient d'opinion d'essire la voye de cession. Toutesfois le Roy delibera d'enuoier deuers les Escliseurs de l'Empire, pour scauoir leur intention, & de fait y enuoia. Et leur feut respondu, que à auoir vnion ils estoient prests d'entendre, mais non mie par la voye de cession, ainsi que le Roy l'auoit aduisé. Dont les Ambassadeurs feurent bien elbahis.

1400. Car ils affermerent que à Cramault, n'auoient fait autre res-
ponse. Laquelle chose feut rapportée au Roy. Dont luy &
ceux du sang, feurent tresmal contents du dict Patriarche Cra-
mault. Et pource luy feut defendu, que plus ne veint au Con-
seil du Roy.

En ceste année, la Royne de Dacie, quin'auoit que vn seul
fils, ieune d'age, enuoia vers le Roy luy requerir, & prier qu'il
luy pleust, qu'elle eust vne fille; de la lignée de Frâce, pour son
fils. Et estoit present à faire la requeste au Roy par les Ambas-
sadeurs, le Duc de Bourbon. Lequel respondit, mais que l'vne
de ses filles feust en age, que volontiers il luy enuoieroit.

Charles fils du Roy, qui estoit vn tresbel enfant, feut tres-
grieffuement malade, & deueint eüique, & tout sec. On ordon-
na prieres estre faictes par toutes les Eglises de Paris, & feut
faict ainsi, & en plusieurs & diuers lieux. Toutesfois il alla de
vie à trespasement, dont tous feurent desplaisans. Et disoit
on plusieurs & diuerses paroles, à la grand charge d'aucuns
Seigneurs.

L'Empereur feut couronné à grand solemnité, en la forme
& maniere accoustumée.

Combien comme dessus ha esté touché, le Roy eust donné
au bastart de Foix, la Comté de Foix, routesfois le Roy de-
puis ordonna, que le Captal de Beu en Guyenne, l'auroit.

Monseigneur le Duc de Berry, qui auoit donné à Saint
Denys, vne partie du chef & bras de Monseigneur Saint Be-
noist, y feit faire vn plus beau reliquaire, que celuy où ils es-
toient enchassez, & le donna à la dicte Eglise de Saint Denys.

1401. L'an mille quatre cents & vn, apres le retour de Monsei-
gneur de Hugueuille, & que Maistre Pierre Blâchet auoit esté
trespasé comme dict est, qui estoient allez pour le fait de la
Royne d'Angleterre, femme du Roy Richard, les Anglois cō-
gnoissans qu'ils feroient leur honneur, de la renuoier au Roy
son pere, luy feirent ramener iusques à Calais. Et là par l'or-
donnance du Roy, allerent l'Euesque de Chartres, Messire
Iean de Poupaincourt, premier President de Parlement, &
autres, pour requerir aux Anglois, qu'ils la leur voulus-
sent deliurer, lesquels en feurent contents. Et à Lelingue-
han, feirent tendre vne tresbelle tente, bien ornée & garnie.
Et le septiesme iour d'Aoust, la dicte Dame biē accompagnée

des Seigneurs d'Angleterre, la feirent venir iusques à la dicte tente. Et là suruint le Comte de Saint Paul, ordonné avec les autres pour la recevoir, & feurent baillez les vin, & espices, & donnerent à la Dame de beaux dons, & aussi à la Damoiselle, & à aucuns des seruiteurs. Et prindrent les Anglois congé de elle, pleurans à grosses larmes, & la bonne Dame aussi pleuroit, & plusieurs des assistans. Et puis la prindrent le Comte de Saint Paul, & autres, pour l'amener à Boulongne. Et assez pres estoit le Duc de Bourgongne, à tout cinq cents cheualiers & escuiers, lequell la receut bien honnorablement, & la conduisit iusques à Boulongne, & de là l'amena iusques à Paris. Et en passant par les villes de Picardie, feut grandement festoïée. Et quand elle approcha pres de Paris, allerent au deuant d'elle, Messeigneurs les Ducs d'Orleans, de Berry, & de Bourbon, & la conduisirent iusques à Saint Denys, & de là à Saint Paul, deuers le Roy son pere, & la Roynne sa mere, qui la receurent à grand ioye, combien que la bonne Dame pleuroit fort.

En ceste année, en Beauuoisis, & bien seize lieües de pays, y eut de merueilleux vents, & cheut grosse gresle en aucunes places, comme gros oeufs d'oye, qui feist de grands dommages, & feut enuiron le mois de May, & feurent merueilleux tonnerres, choruscations, & esclaircissements. Et cheut le tonnerre en vne maniere de feu, qui entra en la châtre de la Roynne, laquelle gisoit d'enfant, qui ardit & brusta toutes les custodes & courtines de son liêt, & autre mal n'y feist. Et cependant que le Lendict se tenoit, (qui estoit lors grand chose des marchands, & marchandises qui y affluoiert,) suruint soudainement grandes coruscations & tonnerre, & cheut gresle presque par tout le dict Lendict, grosse comme oeufs d'oye, & abatit plusieurs loges, & presque toute la granche du Lendict.

Le Duc d'Orleans, frere du Roy, feist confederations & alliâces avec le Duc de Gueldres d'Allemagne, & alla le dict Duc d'Orleans iusques à Mouson, à tout bien mille & cinq cents hommes d'armes, & le Duc de Gueldres en auoit bien cinq cents. Et de fait, l'amena iusques à Paris par Coucy, & y eut grands sermens, & alliances faictes. Et pource qu'il n'en auoit parlé à ses parens, les Ducs de Betry, & de Bourgongne,

1401. en feurent tresmal contents. Et dés lors y eut de grands grommelis, & manieres tenües entre eulx, bien estranges, tellement qu'on apperceuoit euidemmēt qu'il y auoit haines mortelles. Et toute la principale cause si estoit, pour auoir le gouvernement du Royaume, & mesmement des finances. Et manderent chascun des dicts d'Orleans, & Bourgongne, gens d'armes foison, lesquels veindrent autour de Paris, & feirent des maux beaucoup. Et finablement le Duc de Berry s'entremet de faire la paix. Et de fait les requit de venir à son hostel à Nelles. Laquelle chose ils feirent, & là feurent d'accord le quatorziesme iour de Ianuier, & feirent promesses d'amour, & alliances ensemble, & baiserent l'un l'autre, lesquelles ne durerent guieres.

Et en ce mesme mois, y eut vne Comete merueilleuse, qui se prorēdoit du Septentrion en Occident, & apparut bien par quinze iours. Et imaginoient dés lors plusieurs personnes d'entendement, tant Astrologiens, que autres, que c'estoit signe de quelque male fortune aduenir en ce Royaume.

1402. L'an mille quatre cents & deux, y eut aucunes diuisions touchāt la substraçtiō à Benediçt, & mesmemēt entre les Princes. Car le Duc d'Orleans soustenoit fort Benediçt. Et disoit que ceux qui auoient fait la dicte substraçtion, estoient fauteurs de schisme, & qu'il eust mieux vallu de le tollerer, que d'estre sans Pape souuerain en l'Eglise. Et la chose venue à la congnoissance de l'Vniuersité, ils feirent prescher publicquemēt, que quiconque vouloit soustenir, que la substraçtion ne feust bien faite, on le debuoit reputer fauteur de schisme. Ceux d'Espaigne, & autres, qui auoient adheré, & adheroient à Benediçt, tenoiēt fermemēt que la substraçtion ne se pouuoit valablement faire, ne soustenir. L'Euesque de Saint Pons, monstra que d'auoir mis le siege deuāt le chasteau d'Auignon, qui estoit vne maniere d'incarceration, & de tenir le prisonnier là dedans, estoit chose damnée, & non soustenable, quelque substraçtion qu'on luy eust fait. Laquelle ne pouuoit empêcher qu'il n'eust esté, & feust Pape. Et sur ce, auoit entre les clerics mesmes, de merueilleuses imaginations, & lesquelles aucuns n'osoient monstrier.

En ce temps, le Roy étant en santé, il ordonna qu'en son

absence le Duc d'Orleans eust le gouvernement & administra- 1462.
tion du Royaume, & le Roy devint malade. Adôc'il entreprint
le dict gouvernement, & cōmença à faire aucunes exactions.
Et feit faire vne grosse taille sur le peuple, en laquelle feurent
compris les gens d'Eglise, voire comme contraincts, & si vou-
loit qu'ils payassent des impositions & aides. Et la chose ve-
nue à la cognoissance de l'Archeuesque de Rheims, il sy op-
posa pour luy, & tous ses adherens. L'Archeuesque de Sens,
s'efforça d'excommunier tous ceux qui y contrediroient. Et y
auoit de grands brouillis & murmures, qui pouuoient estre
cause de grand mal. Et feirent les Ducs de Berry, de Bourgon-
gne, & de Bourbon, publier & dire que ce n'estoit point de leur
consentement, que telles choses se faisoient, & qu'ils en'estoient
desplaisans. Le Roy toutesfois vint à santé. Et feit le Duc
d'Orleans publier, comme le Roy l'auoit ordonné Lieutenant
& Gouverneur du Royaume en son absence, & que encores
vouloit-il, qu'il le feust. Mais les dicts Ducs, & plusieurs nota-
bles gens monstrent, que ce n'estoit pas chose raisonnable,
ne honorable, veu sa ieunesse, qu'il l'eust, & qu'il auoit meil-
leur mestier de gouverneur, que de gouverner, & les choses
estoit appârentes. Et pource il feut ordonné, qu'il n'auroit
point le gouvernement, dont il feut bien mal content, & de
ce qu'il feut dict, que le Duc de Bourgogne, nommé Philip-
pes le Hardy, l'auroit. Et l'eut, sans ce qu'il voulut souffrir que
le Duc d'Orleans, en eust quelque auctorité, gouvernemēt, &
administration. Et dès lors, eurent grandes haines conceües
& malueillances les vns enuers les autres.

Quand le Duc de Bourgogne se veid en si grande au-
torité, comme d'auoir le gouvernement du Royaume, il
voulut trouuer certaines manieres de reformations, pour re-
former toutes gens, qui auoient administrations, tant du Roy,
que d'autres, tant sur gens d'Eglise, que lais. Et ce, pour
auoir argent. Et la chose venue à la congnoissance de l'Ar-
cheuesque de Rheims, qui estoit notable Prelat, & de bel-
le & grande representation, il vint deuers le Duc de Bourgon-
gne, & en sa compaignée aucuns notables gens, qui s'oppose-
rent & contredirent à ce qu'il vouloit faire, & si feirent plu-
sieurs autres. Et pource le Duc de Bourgogne cessa d'execu-
ter son intention.

1402.

Et quand le Duc d'Orleans veid qu'il n'auoit point le gouuernement, il feit semblant, & feit publier qu'il ne luy en chaloit, & s'en alla en la Duché de Luxembourg, où il feut receu bien & honnorablement. Et pour lors, y auoit guerre entre le Duc de Lorraine, & ceux de Mets. Et les meit le Duc d'Orleans à bon accord. Et se gouuerna tellement & si grandement, qu'il y eut grand honneur, & profit.

En ce temps auoit forte guerre entre les Anglois, & les Escossois, & allerent plusieurs nobles du Royaume de France, pour aider aux Escossois. Et y eut bataille dure & aspre, & feurent les Escossois & François desconfits, par eulx trop aduancer, & cuider faire vaillance, par outrecuidance plus, que par sens & discretion. Là feut pris le Comte du Glas, & autres plusieurs nobles d'Escoffe, & plusieurs gentils hommes de France. Et entre les autres, Messire Pierre des Essars, natif d'assez pres de Paris, & feut mis à finance, & autres François, lesquels feurent racheptez tant par dons du Roy & des Princes, comme par aumosnes. Et les recommandoit-on aux profnes, des parroisses, & és sermons. Et plusieurs bonnes gens, hommes, & femmes, leur donnoient, & tellement, que par ce moyen ils feurent deliurez,

En ce temps, l'Empereur de Grece, qui auoit esté deux ans & demy à Paris, se partit pour s'en retourner en Constantinople. Et tant qu'il feut à Paris, & dés qu'il entra au Royaume, ne despendit rien, & feut deffrayé par le Roy. Et si le feut conduire bien & notablement, par vn cheualier, vaillant homme, & qui autresfois auoit esté en Grece, nommé Chasteau-morât.

En ceste année, Vn vaillant cheualier estant és marches de Guyenne, nommé Messire Iean de Herpedenne, Seigneur de Belleuille, & de Montagu, qui estoit pour le Roy, Seneschal de Saintonge, esquelles marches souuent auoit de belles rencontres, & faicts de guerre, feit scauoir à Paris, à la Court du Roy, qu'il y auoit certains nobles d'Angleterre, aians desir de faire armes pour l'amour de leurs Dames, & que s'il y auoit aucuns François, qui voulussent venir, ils les receuroient à l'intention dessus dicte. Et quand aucuns nobles estans lors à Paris, specialement à la Court du Duc d'Orleans, le sceurent, ils leuerent leurs oreilles, & vindrent au dict Duc d'Orleans luy prier, à ce qu'il leur donast congé, d'aller resister à l'entreprise
des

des Anglois, en intention de combattre les dictz Anglois, les- 1402.
quels & d'un costé & d'autre estoient renommez vaillans gés
en Angleterre, & Guyenne. Les noms des Anglois estoient, le
Seigneur de Scales, Messire Aymon Cloiet, Iean Heron, Ri-
chard Vuiteuale, Iean Fleury, Thomas Trays, & Robert de
Scales, vaillants gens, & forts, & puissans de corps, & vstrez en
armes. Les noms des François estoient, Messire Arnould Guil-
lon, Seigneur de Barbasan, Messire Guillaume du Chastel,
de la basse Normandie, Archambauld de Villars, Messire
Colinet de Brabant, Messire Guillaume Bataille, Carouis, &
Champaigne, qui estoient tous vaillants gentilshommes. Et
leur donna congé le dict Duc d'Orleans, soy confiant de leurs
prouesses & vaillances. Toutesfois aucune difficulté feut fai-
cte de Champaigne, lequel oncques n'auoit esté en guerre, ne
en telles besongnes, mais il estoit vn des bien luidans, qu'on
eust peu trouuer. Et pource le dict Seigneur de Barbasan dit au
dict Duc d'Orleans, Monseigneur laissez le venir, car s'il peut
vne fois tenir son ennemi aux mains, & ioindre à luy, par le
moyen de la luidte il l'abbatra, & desconfira. Et ainsi feut don-
né congé au dict Champaigne, comme aux autres. Et s'en par-
tirent de Paris bien ordonnez, & garnis de harnois, & autres
choses necessaires en telles manieres. Et s'en veindrent bien
diligemment en Guyenne, vers ledict Seneschal de Saintonge.
Et feut chef des dictz sept François, le Seigneur de Barbasan,
& des Anglois, le Seigneur de Scales. Et feut la iournée prise
au dixneuuesme iour de May. Auquel iour comparurent les
parties bien ordonnées, armées, & habillées, comme apparte-
noit. Et le matin bien & deuotement ouïrent messe, & s'ordō-
nerent en grand deuotion, & receurent chascun le pretieux
corps de Iesus-Christ. Et grandement & notablement les en-
horta le dict Seigneur de Barbasan de bien faire, & de garder
leur bien & honneur. En leur demonstrant la vraie & raison-
nable querelle, que le Roy auoit contre ses ennemis anciens
d'Angleterre, sans auoir regard à combattre pour Dames, ne
acquérir la grace du monde, & seulement pour eulx defendre
contre l'entreprise de leurs aduersaires, avec plusieurs autres
bons enseignemens. Et quant aux Anglois, que ils feirent, on
ne sçait pas bien : mais aucuns dient, qu'en leur habillant, ils
beuuoient, & mangeoient tresbien. Et vindrent aux champs,

1402. entalentez de combattre, & eulx faire valoir. Et estoient haufts & grands, monsttrans fier couraige. Et les François monstroïët bien signes d'auoir grand volonte, de eulx defendre. Et estoïët garnis les Anglois de targes & pauois, pour le geët des lances. Et apres feut crié par le herault, par le commandement dudiët Seneschal de Saintonge, Iuge ordonné du consentement des parties, que chascun feïst son debuoir. Et s'approcherët les vns des autres, & iecterent leurs lances sans porter aucun effect, & vindrët aux haches. Et pource qu'il sembloit aux Anglois, que s'ils pouuoient abbatre Messire Guillaume du Chastel, qui estoit grand & fort, du demeurant plus aisément en viendroient à leur intention, ils delibererent d'aller deux contre luy. Et de faiët, ainsi le feirent. Et tellement, que Archambauld se trouua seul, sans ce qu'aucun luy demandast rien, & vint à celuy qui auoit à faire à Carouis, qui estoit le premier qu'il trouua, & luy bailla tel coup de hache sur la teste, qu'il cheut à terre, & estoit le diët Robert de Scales, qui y mourut. Et quã est de Champaigne, ce qu'on disoit, aduint. Car il se ioingnit à son homme, & l'abbatit à la luiët, par dessoubz luy, & se rendit. Archambauld alla aider à Messire Guillaume du Chastel, qui auoit bien à faire, lequel les Anglois n'approcherent pas si tost, & feut l'vn contrainët laisser le diët du Chastel, & se prendre à Archambauld. Et y eut de belles armes faiëttes d'un costé & d'autre, & se rëndirent les Anglois. Et y eut Messire Guillaume Bataille bien à faire. Car il cheut, & feut abbatu à terre par l'Anglois, mais tantost feut secouru par aucuns des François. Et pour abbrevrer, les Anglois feurent desconfits.

La Duchesse de Bretagne, se maria au Roy Henry, laquelle auoit trois fils du Duc de Bretagne, Jean, Richard, & Artus. Et veindrent nouuelles, qu'elle vouloit trouuer moyen de rirer à elle en Angleterre les diëtts trois enfans, & y meëtait peine, & faisoit diligence. Laquelle chose vint à la congnoissance du Roy, & de ceux de son sang, spécialement du Duc de Bourgogne, Philippes le hardy, lequel le plus diligemment qu'il peut, alla en Bretagne, & trouua les diëtts enfans, & les amena à Paris bië & grandemët accompagnez, & estoïët tous trois vestus d'vnes mesmes robes, c'est à sçauoir de veloux vermeil. Et les receurët le Roy & les autres Seigneurs à grãioye. Et par ce, feut fraudée la diëtte Duchesse de son intètion.

Il y auoit au dict an à Paris vn bien notable homme, Procureur en Parlement, nommé Maistre Iean le Charton, qui auoit espousé vne belle ieune, & gracieuse femme. Et à vn Védredy, on luy auoit ordonné d'une sole, laquelle il mangea, & dit ces paroles, Il me semble que j'ai mangé vn mauuais morceau. Et enuiron quatre iours apres, alla de vie à trespassemēt. Et n'auoient aucuns enfans : mais il auoit des parens, lesquels feurent heritiers. Et assez tost apres son trespasement, la dicte femme se remaria, & print son clerc, qui estoit biē habile homme. Lesquels apres le mariage parfaict, feirent adiourner les heritiers du premier mari, par deuant le Preuost de Paris. Et y eut plusieurs faicts & coustumes, proposées d'un costé & d'autre. Et entre les autres faicts, les heritiers du dict premier mari proposerent qu'elle auoit mauuaise renommée de sa personne, & qu'elle auoit empoisonné son premier mari. Et de ce, feut faicte information, laquelle veüe, le Lieutenant du dict Preuost, feit emprisonner la dicte femme, & son nouveau mari. Et y auoit matiere pour les questionner. Et de faict, le feurent tresbien, mais rien ne vouloient confesser. Finablement vn iour le dict Lieutenant vint à la femme, & vsa de belles paroles, & luy dist, que son mari auoit tout confessé, & que ce auoit esté par elle. Et lors elle s'escria, & dit, que ce auoit il faict. Et feut amenée deuant le mari, & l'appella traistre, de ce qu'il auoit confessé, & toutesfois il n'en estoit rien. Et à la fin confessa tout, & aussi feit le mari. Et feut la femme arse en la presence du mari. Et apres le mari feut mené au gibet, & pendu. Qui feut exemple aux autres femmes, de non ainsi faire.

En ce temps, les Tartares Sarrafins feirent guerre au Basac, & aux Turcs. Et y eut vne merueilleuse bataille, & aspre, & grande quantité de Sarrafins, morts d'un costé & d'autre, & à peine le compte d'eulx est croiable. Toutesfois les Tartares eurent victoire, & feurent les Turcs desconfits, & le Basac, & les nobles Turcs feurent pris. Le Prince des Tartares leur feit à tous couper les testes, & au Basac feit mettre aux narines des anneaux de fer, comme aux bugles pour les dompter & maistroier, & aux anneaux meit des cordes, & le faisoit ainsi mener par ses villes & Citez.

Les Anglois equipperent des vaisseaux sur mer, & meirent gens dedans, qui faisoient maux infinis sur la mer, &

Aa ij

1402. spécialement greuoient fort les Isles estans en la mer, obeissans au Roy de France. Les François se meirent sus es marches estans sur la mer, obeissans au Roy de France, & firent tant de diligences, que souuent trouuoient les Anglois sur la mer, & les assailloient, & aussi les Anglois se defendoient le mieux qu'ils pouuoient. Toutesfois les François plusieurs petites victoires eurent aucunement sur leurs ennemis, & tellement qu'ils ne s'aduanturerent plus d'ainsi voguer sur la mer.

Le Duc d'Orleans, pour aucunes causes qui le mouuoient, enuoia defier le Roy d'Angleterre, & es lectres de deffiance, y auoit plusieurs choses contenües, lesquelles le Roy d'Angleterre tres-impatiemment porta, & en feut tresdeplaisant. Et dit que le Duc d'Orleans auoit faulxement & mauuaisement menti, & fait publier en ses pays les deffiances.

Le Roy commanda que les Prelats feussent mandez, touchant le fait de l'vnion de l'Eglise. Et sur ceste matiere, le Roy d'Espagne enuoia messaiges au Roy, luy faire sçauoir qu'il adheroit en toutes manieres à Benediçt, & le tenoit pour vrai Pape, & vnicque.

En l'année dessus dicté, alla de vie à trespassement le vaillant Connestable de Sancerre. Et estoit moult belle chose d'ouyr les paroles qu'il disoit, en requérant mercy & pardon à Dieu, & à tout le monde, & en contemnant ceste vie presente. Et remercioit Dieu, de ce qu'il l'auoit preserué de tant de perils & dangers, où il auoit esté de mort soubdaine en guerre, & autrement. Et à la fin de ces paroles, rendit l'espée de Connestable, & supplia qu'il feust enterré à Saint Denys. Et y feut mis & sepulturé à grand honneur. Et offrit le Duc d'Orleans à prester trois mille escus, pour luy faire fonder vne messe.

Le Roy le vingt & vniesme iour de Ianuier, eut vn fils nommé Charles, & feut baptisé à Saint Paul.

Combien que le siege de deuant Benediçt au Palais d'Auignon feust leué, toutesfois y auoit il gens, qui se donnoient tousiours garde s'il istroit, en intention de l'arrester. Il y auoit vn gentilhomme & vaillant, nommé Messire Robinet de Bracquemont, qui auoit en sa compaignée des François armez & habillez, assez pres d'Auignon, lequel alloit & retournoit, quand il vouloit au dict Palais parler à Benediçt.

Lequel se descouurit au dict Bracquemont, & tant qu'il luy ^{1402.} accorda de le mettre dehors. Si le mit, sans quelconque solennité. Et print Benedict le corps de nostre Seigneur, en vne belle bouëtte, & le porta en sa main avec vnes lettres du Roy, par lesquelles il certifioit, que oncques n'auoit esté consentant qu'on feist subtraction à Benedict. Et quand il feut aux champs trouua des François, qui le conduisirent, là où il luy pleut. Et lors il feist faire sa barbe, laquelle n'auoit fait faire, depuis qu'il auoit esté assiégué. Et ceux d'Auignon, feurent bien esbahis. Car la demeure qu'il auoit faite, & faisoit en Auignon, leur estoit profitable, & aussi au pays. Les Cardinaux, au moins aucuns, quand ils veirent qu'il estoit issu, cuiderent faire leur paix, en offrant à aller à luy, & promettant plusieurs choses. Mais pour lors il n'y voulut entendre, & enuoia vers le Roy luy signifier son issue, esperant que le Roy luy rendist obeissancc, mais pour lors rien n'y feut ordonné.

L'an mille quatre cents & trois, le mariage ja pieça pour- ^{1403.} parlé de Monseigneur le Daulphin Louys, & de la fille du Comte de Neuers, fils du Duc de Bourgongne Philippes, feut accordé & conclud. Et y auoit pour la proximité du lignage, dispensation, & feurent les nopces au Louure. Et feist le Duc de Bourgongne, faire vn beau & grand disner, & y eut belle feste, & bien seruie, & plusieurs entremets, & tresbeaux & grands dons.

On ha accoustumé à Pasques, de faire vne table attachée au cierge beneit. Et y met-on les années, que le Pape fut créé, & le Roy couronné. Et en plusieurs Eglises, estoit déclaré l'an de la creation du Pape Benedict. Et pource qu'on luy auoit fait subtraction, il despleut à aucuns Seigneurs. Et feurent enuoiez sergens és Eglises, & là où ils trouuoient les tableaux, où estoit fait mention de Benedict, ils les arrachoiēt, & emportoient. Et pource qu'entre les autres, on chargeoit fort le Duc de Berry, il s'en excusa fort, en affirmant qu'il n'en estoit coupable, & que ce qui auoit esté fait, estoit sans son sceu & volonté.

Le Mareschal Boucicaut, qui estoit à Gennes, appaisa moult de diuisions & differences, qui estoient entre eulx. Dont il fut fort prisé & aimé, & se mit sur la mer, & porta plusieurs grâds dommaiges aux Sarrafins, & leur faisoit tresforte guerre. Vne

1403. iournée en flottant sur la mer, il rencontra aucunes nauires, qui estoient aux Venitiens, & menoiert plusieurs choses defendües aux Sarrafins. Et pource il les print, & en eut beaucoup de profit. Mais les Venitiens se rauiserent & rallierët, & feirent tellement, qu'ils eurent victoire contre Boucicaut. Et luy feut bon mestier, que en vn moyen vaisseau il se sauuaist.

Comme dessus ha esté touché, quand les Cardinaux sceuerent que Benediët estoit en sa franche volonté, considerans que les Espaignols luy adheroient, & que au Royaume de France auoit des difficultez, & que aucuns pour Pape le tenoient & reputoient, ils delibererent de faire leur paix enuers Benediët, & pareillement ceux d'Auignon. Et pourchasserent tellement, que Benediët les receut en sa grace: pourueu que ceux d'Auignon feroiët refaire les murs du Palais, qui auoient esté rompus durant le siege d'Auignon.

Et ce fait, le Pape Benediët delibera d'enuoier deuers le Roy, & de fait, y enuoia le Cardinal de Poitiers, & aussi celui de Saluces. Et eux arriuez à Paris, ils vindrent deuers le Roy, & demanderent audience, laquelle ils eurent le vingt-cinquième iour de May. Et fait la proposition le Cardinal de Poitiers, & môstra bien & grandement les vertus qui estoient au Pape Benediët, & que oncques il n'auoit refusé à entendre en routes manieres iustes & raisonnables, à auoir vniõ en sainte Eglise, & encores estoit tout prest d'y entendre. Et à la fin il requeroit au Roy, qu'il se voulüst deporter d'vser de la dicte subtraction, & tenir Benediët loyal Pape, comme il auoit fait parauant. Et à ce le induisoit par belles paroles. Et apres ce que les dicts Cardinaux feurent retraicts, le Roy meit en deliberation qu'il auoit à faire. Et y eut diuerses opinions & imaginations, & tenoient fort les Ducs, excepté Orleans, qu'on se debuoit tenir à la subtraction, & que à bonne & iuste cause, elle auoit esté faite. Les autres & plusieurs estoient de contraire opinion, & disoient que le Roy, & son Royaume, demeureroient seuls en ceste imagination. Car tous les tenans & estans en l'obeissance de l'Antipape, ne luy auoient fait aucune subtraction, ne les autres Roys Chrestiens, tenans Benediët pour Pape, & que le Roy demeurast seul en ceste opinion, ce seroit mal, & des-honneur. Et que c'estoit moins mal, de non vser de la dicte subtraction, que de la tenir. Et quand le Roy, eut

tout oui, lequel estoit lors en bon point, il dit, qu'il n'auoit pas 1403.
memoire, que oncques il fust cōsentant de ladicte subtraction,
& qu'il vouloit obeir à Benediſt, comme à vrai Pape, & iura, &
promeit de luy obeir, & de faire annuler ladicte subtraction, &
fut le iour de Pasques. Dont les Ducs, & ceux qui tenoient leur
parti, feurent malcontents, mais à la fin ils se rappaiserent. Et y
eut faicte vne notable procession, où estoient les Ducs de Ber-
ry, de Bourgongne, d'Orleans, & de Bourbon, & plusieurs
Princes, & Barons. Et là feut, publiée l'obeissance, & y eut vn
bien notable sermon, fait par Maistre Pierre d'Ailly, & print
son theme, *Benedictus Deus, qui dedit voluntatem in cor Regis.*

Les Iacobins, & plusieurs de l'Vniuersité, qui auoient esté
boutez hors durant ces brouillis, feurent rappelez, & tenus &
reputez de l'Vniuersité, comme deuant. Mais il y eut, & auoit
vne grand difficulté, touchant l'Abbé de Saint Denys, qui
auoit esté esleu par les Religieux, & confirmé & benit par l'E-
uesque de Paris, durant la subtraction, combien qu'ils feussent
exempts. Car Benediſt, quand il sceut que la restitution luy
auoit esté faicte, il se tenoit fort, & disoit qu'il en pouuoit dis-
poser. Et pour ceste cause, on enuoia vers luy. vne Ambassa-
de, & encores depuis vne autre, luy requerir, qu'il voulust con-
firmer toutes les eslections, confirmations, consecrations, be-
nedictions, collations, & prouisions de benefices, qui auoient
esté faictes durant la dicte subtraction: mais il n'en voulut rien
faire. Le Duc d'Orleans, qu'on tenoit tant son ami, que mer-
ueilles, y alla, cuidant que à sa requeste, il feist ce que dict est. Et
fut receu à grand ioye, & solemnité par le Pape, & luy fait vne
grand chere: mais il s'en retourna sans rien faire, ne qu'il peust
muer l'imagination & opiniō du Pape. Dont le Roy fut moult
desplaisant, quand son frere luy eut rapporté. Si assambla son
Conseil, pour ſcauoir qu'il auoit à faire. Et feut conclud, que
le Roy defendroit ceux qui estoient possesseurs, en leurs pos-
sessions, lesquelles ils auoient à iuste tiltre, & ne souffriroit
point qu'on s'aidast au contraire de Bullés Apostoliques. Ou-
tre, feurent defendues les exactions d'argent, que faisoit Bene-
diſt en yacans, & autrement. Dont des gens d'Eglise du Roy-
aume, feurent bien ioyeux. Mais le Pape Benediſt au contrai-
re, fut bien desplaisant, quand on luy enuoia signifier. Et en or-
donna le Roy, lectres du vingt-neufiesme iour de Decembre.

1403. Aussi en ce mois y eut vn bien notable bourgeois de la ville de Paris, qui se pendit, & estrangla, & oncques on ne peut sçauoir la cause.

En ce temps, vn prestre nommé Iues Gilemme, Damoiselle Marie de Blansy, Perrin Hemery ferrurier, & Guillaume Florer, Clerc, faisoient certaines inuocations de diables, & disoit le prestre qu'il en auoit trois à son commandement, & se vantoient qu'ils guairiroient le Roy. Et feut delibéré qu'on les essayeroit, & leur souffrirait-on faire leurs inuocations. Et demanderent qu'on leur baillast douze hommes, enchaînez de fer. Et ainsi feut fait, & feirent vn parc, & dirent aux dictz douze hommes, qu'ils n'eussent aucune peur, & feirent tout ce qu'ils voulurent, mais rien ne feirent. Puis feurent interroguez, pourquoy ils n'auoient rien fait. Et ils respondirent, que les dictz douze hommes s'estoient signez, & garnis du signe de la croix, & pour ce point seul auoient failli. Laquelle chose n'estoit que tromperie, qui feut reuelée par le dict Clerc au Preuost de Paris, lequel les fait prendre. Et finalement le vingt-quatriemesme iour de Mars, feurent publicquement preschez, & les punitions faictes selon les cas, c'est à sçauoir ars & bruslez.

Vn autre homme y eut, qui s'efforça de trouuer moyen de parler au diable, & feut en plusieurs & diuers lieux pour s'enquerir, s'il y auoit personne, qui s'en messast, mais rien n'y trouuoit. Et luy feut conseillé qu'il allast en Escosse la sauuaige, & de fait y alla, & luy feut enseigné vne vieille, qu'on disoit soy meller de telles besongnes, A laquelle il parla, & elle luy dit, qu'elle le feroit bien. Et de fait luy monstra vn vieil chasteau ancien tout desrompu, & n'y auoit que les murs, & parois, tous pleins de ronces & espines. Et y auoit vn corbeau contre le mur, comme pour soustenir vn gros bois, & qu'il se tint là sans auoir peur. Et il trouueroit vn homme en maniere d'un Maur de Maurienne, & qu'il luy demandast ce qu'il voudroit, & il luy respondroit. Lequel compaignon alla au lieu, & quand il y eut esté par aucun temps, on apporta sur deux grosses pierres vne maniere de biere ou cercueil, où il y auoit vne personne toute nue, laquelle feut mise sur le dict corbeau. Et lors il veid venir plus de dix mille corbeaux, qui descharnerent ceste personne, & luy mangerent toute la chair, & ne demeura que

que les os. Et ce fait, feut remis au dict cercueil, & emporté. 1403.
 Et apres ce, il veid venir le Maur de Maurienne, dont la vieille luy auoit parlé, & luy demanda que c'estoit de cest homme, ainsi deschiré, lequel luy dit, que c'estoit le Roy Salomon. Et lors il l'interrogea, si il estoit damné, lequel luy dit que nō, mais tous les iours il souffreroit iusques à la fin du monde telle penitence, & mal, comme si il estoit en vie. Et apres ce, il luy feit trois demandes, l'une, de ce qu'il queroit, & vouloit sçauoir, laquelle chose il ne voulut oncques à personne reueler, ne la demande, ne aussi la response. La seconde, il luy requit, qu'il luy enseignast les thresors perdus. Et à ce fait respōse, que luy, ne ses compaignons, iamaïs ne les enseigneroient. Car ils les gardoient pour leur maistre, l'Antechrist. La tierce demande feut, si Paris seroit point destruiēt, veu que les gēs qui y estoient, estoient si dissolus en estats, & que infinis maux s'y faisoient tous les iours. Et il respondit, qu'il ne seroit pas destruiēt du tout : mais il souffreroit beaucoup. Car plusieurs grandes diuisions y seroient, mais finale destruction ne souffreroit il pas. Car supposé que plusieurs maux s'y feissent, toutesfois aussi y faisoit on beaucoup de biens, & qu'il y auoit plusieurs bonnes personnes, dont les prieres empescheroient la destruction.

Pource qu'on voioit euidentement les enuies qui estoient & regnoient, entre les Ducs d'Orleans, & de Bourgongne, on aduisa qu'il seroit expedient de les separer, & employer au fait de la guerre, sans ce que l'un ne l'autre se messast du gouuernement. Car pour ceste cause, estoit leur diuision. Et feut ordonné, que l'un iroit vers Calais faire guerre aux ennemis, & l'autre vers Bordeaux. Et se partit le Duc d'Orleans de Paris, & voulut en passant faire son entrée à Orleans. Et de fait, la feit, & y feut grandement & notablement receu. Les rues tendues, & fontaines artificielles par la ville en diuers lieux, iectās vin, lait, & eau. Et se logea en son Hostel, & feut l'Vniuersité deuers luy. Et proposa Messire Raoul du Refuge, un bien notable Docteur, bien grandement & notablement. Et aussi respondit le Duc mesmes, bien faigement, & prudemment. Et reprist tous les points, touchez par le proposant, & à chascun respondit. Et receut aucuns presens, qui luy feurent faicts. Et si feit son entrée à Monseigneur Saint Aignan d'Orleans, en

B b

1403. habit de chanoine, en la forme, & maniere accoustumée. Et puis cuida passer outre: mais il feut remandé, & fallut qu'il s'en retournast, & toute sa compaignée, & en effect n'y eut rien fait, qui vallust, & si y eut vne grand despenſe. Et pareillement le Duc de Bourgogne s'en alla en Flandres, en intention d'aller à Calais, & fait faire des bois merueilleux, comme chaſteaux, pour eulx loger deuant la place. Mais tout vint au neant, qui estoit grand pitié, d'auoir leué tant d'argent, comme on disoit d'auoir fait, & ſans rien faire au profit de la chose publicque.

Les Anglois infestoient fort les François sur la mer, & mesmement les Bretons, & estoient bien grosse compaignée. Pour laquelle cause, Messire Oliuier de Clifſon, & Messire Guillaume du Chaſteau, vaillants cheualiers, se meirent sur la mer en trente vaiſſeaux. Lesquels ils equipperent, & garnirent tresbien de vaillans gens de guerre, & autres choses necessaires. Et ſceurent que les Anglois estoient vers les rais de Sain&Mathé, & assez pres à vn vespre, les apperceurent les Bretons, & delibererent de les combattre le lendemain matin. Quand ce vint au matin, ils approcherent les vns des autres. Et les Bretons diuiferent leurs nauires en deux parties, comme pour faire deux batailles. Aussi pareillement feirent les Anglois, & approcherent bien & hardiement les vns des autres. Et combati-
rent fort, & y eut de belles armes faites d'un costé & d'autre. Et dura la bataille depuis bien matin iusques à midy. Et finalement les Anglois feurent desconfits, & y en eut cinq cents de morts, & tous armez les iectoiet en la mer, & en emmenerent bien mille prisonniers, & tout leur nauire, où ils trouuerent de bonnes choses, & de grand valeur. Et encores derechef les Bretons se meirent sur la mer, & y auoit autres chefs de Bretagne, que les dessus nommez, & veindrent nauiger dessus les riuages d'Angleterre, & aux Isles de Iarſay, & Greneſay, & feirent des desplaistrs beaucoup aux Anglois, & gaignerent merueilleusement, & à toute leur gaigne & proye, s'en retournerent en Bretagne. Et disoit on que c'estoit grand richesse, de ce qu'ils auoient gaigné.

Quand les Anglois veirent que les Bretons leur faisoient si forte & aspre guerre, ils assemblerent grand nauire, & l'equipperent & guarnirent de gens, iusques à cinq ou six mille.

combatans, & de tout ce qu'il leur sembloit estre necessaire, & 1403. voguerent sur la mer, tant qu'ils vindrent sur les marches & riuages de Bretagne, d'ot les Bretons ne se donnoiet de garde, & descendirent en Bretagne, & commencerent à faire tous les maux, que ennemis ont accoustumé de faire. Et tresdiligement les Bretons pour les debouter s'assemblerent, & vindrent es marches où les Anglois estoient sur les riuages de la mer. Et les Anglois, qui estoient en diuerses courses, se rassemblerent, & ioignirent ensemble, & s'approcherent tellement les vns des autres, qu'il y eut bataille aspre, & dure, vne grosse demie heure, qu'on n'eust sceu dire, lequel auoit le meilleur. Et feurent les Bretons desconfits, & plusieurs morts d'un costé & d'autre: mais trop plus des Bretons. Ramenteuans les Anglois, ce qui auoit esté fait sur la mer aux rais Saint Mahé. Et se retrahirent en leurs vaisseaux avec leur proye, & avec nauire tresgrand foison, qui pouuoient bien porter dix mille tonneaux de vin, & s'en retournerent en Angleterre, à grand ioye, & lieffe.

Thomas de Perfi, & ses alliez, parens du Roy Richard prochains, desplaisans de ce qu'on auoit ainsi traistreuement pris & tué le Roy Richard, se meirent sus en armes. Et quand la chose vint à la congpoissance du Roy Henry, il manda à Thomas, qu'il veint parler à luy. Lequel respondit qu'il n'y entreroit ia, & que faulsement traistreuement, & mauuaiselement, il auoit fait mourir son souuerain Seigneur, & qu'il estoit fauls, traistre, & desloyal. Et pource le Roy assembla des gens le plus qu'il peut, & aisément en fina, car ils le tenoient pour Roy, & vint en bataille contre Thomas de Perfi. Et combataient les vns contre les autres longuement, & feut Henry de Lanclastre deux fois pris, & aussi rescous. Et finablément le Roy Henry eut victoire contre Thomas de Perfi, & y eut d'un costé & d'autre de neuf à dix mille Anglois morts, & y mourut Henry de Perfi. Et feut Thomas pris, & aucuns iours après, le Roy Henry le feit prendre, & attacher à vn piéu, & le feit fendre, & oster les entrailles de dedans le corps, & les feit iecter en vn feu. Et apres, le feit destacher, & lui couper la teste.

Le Comte de Saint Paul, lequel auoit espousé la sœur du Roy Richard, & en auoit vn fils, enuoia defier le Roy Henry, dont il tint peu de compte. Toutesfois ledict Comte se

1403. meit sur la mer en personne , & auoit pris gens de nauire bien habillez , & ordonnez , & vint sur les riuages de la mer d'Angleterre , & prenoit tout ce qu'il pouuoit trouuer , tant prisonniers, que biens meubles. Et voulut bouter les feux par tous les villaiges: mais il y eut vn Prestre en habit de religieux, qui estoit Anglois, lequel luy dit, qu'il valloit mieux qu'il print argent, & qu'on rachetast les feux. Et que s'il y vouloit entendre , que luy mesmes feroit diligence d'aller aux villaiges, pour auoir de l'argent , & en promettoit bien de huiet à dix mille nobles. Et de ce, feut le Comte de Saint Paul content. Et le tint le dict prebstre en ces paroles , bien quatre iours. Et cependant les Anglois s'assemblerent , & venoient de toutes parts, pour combatre le dict Comte. Et quand il les veid , il apperceut bien qu'il n'estoit pas suffisant pour resister. Si se retrahit en ses vaisseaux , & s'en vint en France. Et tantost apres, le Roy d'Angleterre enuoia vn herault vers le dict Comte, en luy rescripquant lettres derisoires , & en soy mocquant de luy , luy manda qu'en brief le visiteroit , & aussi feit il. Car il enuoia gens d'armes en la Comté de Saint Paul , & feit piller, & robber toute la Comté & terre du dict de Saint Paul , sans ce qu'ils trouuassent aucune resistance , puis s'en retournerent en leur pays.

1404. L'an mille quatre cents & quatre , on feit vne bien grande taille , & disoit on qu'elle montoit bien à dix-huiet cents mille liures. Et auoit esté deliberé, que l'argent qui en seroit leué, seroit mis en la tour du Louure, afin qu'on s'en aidast en temps, & en lieu , & principalement pour passer en Angleterre, mais elle ne porta oncques profit. Et feut tout pris par les Seigneurs , & despensé tresinutilement. Et cuida le Duc de Bourgongne empêcher, qu'elle ne feust leuée: mais il ne feut pas creu. Et si disoit on, que le Duc d'Orleans auoit esté rompre les huis, où le thresor du Roy estoit, & print tout ce qu'il y trouua.

Au printemps, feut le temps trespluieux, & s'en ensuiuirent plusieurs maladies de rheumes de testes , & de siebures , & en moururent aucuns.

Au dict an, mourut Philippes Duc de Bourgongne, dict le hardy, qu'on tenoit vaillant, saigé, & prudent. Et estoit Prince de grand louenge, sinon que tresenuis il payoit , comme

on disoit. Et tant, que tous ses meubles, n'eussent pas suffi à 1404.
payer ses debtes. En ce temps, le Duc de Berry estoit à Paris,
& quand il sceut les nouuelles, que son frere estoit trespasé, il
feut moult dolent. Et luy dit-on, comme il estoit mort en no-
stre Dame de Halles en Brabant, & qu'il auoit eu moult belle
fin, & se fait porter en l'Eglise. Laquelle chose aucunement
le conforta, nonobstant qu'il luy print vne tref-mauuaise ma-
ladie, tant du cas susdict, que d'autres accidens qu'il auoit, &
tellement qu'on n'y scauoit remede, sinon prieres à Dieu, les-
quelles il fait faire diligemment, & par toutes les Eglises de
Paris, fait des aumosnes. Et fait remestre de la taille, vingt
mille escus. Et si donna à nostre Dame de Paris, vne bel-
lé croix, si recouura santé. Puis fait faire vn beau & notable
seruice pour son frere aux Augustins, de messes, & vigiles,
comme il est accoustumé. Et pareillement le fêit faire, le Roy
aux Celestins, pres de son Hostel de Saint Paul.

Aucuns ieunes hommes nobles, & autres de la Duché de
Normandie, voyans & considerans qu'ils ne faisoient rien, n'y
ne s'occuppoïent en maniere quelconque, mais estoient oiseux,
s'assemblerent, & disposerent d'aller en Angleterre, & de fait
y allerent, & estoient comme sans chef. Et assez pres de
la riué d'Angleterre, feurent rencontrez par les Anglois,
& combatus, & desconfits, par faute de bonne conduicte, &
gouuernemēt en fait de guerre. Et feut ce, empres d'une Isle,
laquelle ils auoient toute pillée, & robbée. Et quand aucuns
de la compaignée sceurēt que les Anglois venoient, & estoïent
assemblez, ils conseillèrent qu'on s'en retournast, & estoient
des anciens, qui scauoient l'vsaige de guerre, & congnoissoient
les Anglois. Mais les ieunes hommes disoient, que ce seroit
chose non conuenable, de fuir & se retraire deuant vilains, &
feurent desconfits, & plusieurs morts, & pris.

Messire Guillaume du Chastel, vn vaillant cheualier de
Bretaigne, assembla aucunes gēs de guerre, & descēdit en An-
gleterre, & tantost les Anglois s'assemblerent, & le veindrent
combattre, & à l'assemblée feut tué. Si se retrahirent les gens
le plus tost qu'ils peurent, & retournerent en Bretaigne. Mes-
sire Tanneguy du Chastel, frere du dict Messire Guillaume,
aussi vaillant cheualier, quand il sceut la mort de son frere, il
en feut desplaisant. Et delibera d'aller, & descendre en Angle-

1404. terre, & assembla bien quatre cents combatans, gens de fait, & vſitez en fait de guerre, & en diuers lieux deſcendit, & y feut bien huit ſepmaines, & porta aux Anglois des dommaiges largement, en boutant feux, & en prenant tous les meubles de valeur, qu'ils trouuoient, & les meſtoiēt en leurs vaiſſeaux. Et ſi y eut des Anglois pris, amenez priſonniers comme on ha accouſtumé faire en tel cas. Et luy, & ſes compagnons ſ'en retournerent en Bretagne, avec bien grand gain & profit, & ſans comme point de dommaige des leurs.

A la Rochelle, auoit vn marchand, demeurant & reſidant en la ville, logé pres des murs, lequel auoit vn frere, qui tenoit le parti des Anglois, & demouroit vers Bordeaux, lequel par diuerſes fois, par meſſaiges, & autrement, induiſoit ſon frere de trouuer moyen de bailler la ville de la Rochelle aux Anglois. Et ſon diſt frere, luy accorda, comme mal conſeillé. Et auoit deux moyens, l'un par eſcheller, l'autre par gaigner la porte, & donner entrée aux ennemis, leſquels euſſent eſté en certaine embuſche, pres de la ville. Et de fait, le diſt Anglois vint occultement à la Rochelle, à l'hoſtel de ſon frere, leſquels auoient intention de parfaire leur mauuiſe volonté, & de la meſtre en effect. Et vint à la congnoiſſance d'un de la ville, qui reuela que le diſt Anglois eſtoit en la maiſon de ſon frere. On y alla, & tous deux feurent pris par la Juſtice, & mis en priſon. Et tantost feurent interrogez, & confeſſerent le cas, & feurent decapitez, ainſi que raiſon vouloit.

Le treizieme iour de Iuillet, au diſt an, l'Vniuerſité feit vne belle & notable proceſſion, pour la ſanté du Roy. Et partirent de Sainte Geneuiefue, & vindrent à Sainte Catherine du val des Eſcholiers, bien ordonnément, ainſi que il eſt accouſtumé de faire. Et quand ils feurent arriuez, feirent commencer la meſſe, & le ſermon. Pluſieurs ieunes enfans eſcholiers, ſ'en alloient eſbatans autour de Sainte Catherine, vers l'hoſtel de Meſſire Charles de Sauoiſi. Et y eut paiges, qui emmenoient de boire leurs cheuaux, qui paſſerent ſciemment parmy les Eſcholiers, en faiſant ruer leurs cheuaux, & tellement que aucuns des Eſcholiers cheurent à terre. Les autres Eſcholiers prindrent des pierres, qu'ils ieſterent apres des paiges, qui ſe bouterent dedans l'hoſtel, & iuſques

là les pourſuiuirent les eſcholiers. Quand les gens du dict Sauoiſi ouirent le bruit, ils ſaillirent à tout arcs & fleſches de l'hoſtel, & commencerent à tirer, tellement, que les fleſches cheurent dedans l'Egliſe, & où on faiſoit le ſermon. Et feurent tous ceux qui eſtoient en la proceſſion, moult eſfrayez. Et eſtoit le dict Meſſire Charles de Sauoiſi en ſon hoſtel, lequel n'en feiſt ſemblant. Les Docteurs, Eſcholiers, & ceux qui eſtoient en la proceſſion, ſ'en retournerent, & y eut des Eſcholiers bien vingt quatre de bleſsez. Le Recteur alla bien accompaigné, deuers Meſſire Guillaume de Tignonuille, Preuoſt de Paris, luy requerrir, qu'il feiſt prendre les malſaſteurs, veu que le cas eſtoit grand & enorme. Et ſi allerent vers le Duc d'Orleans, pource qu'on diſoit le dict Sauoiſi eſtre à luy. Et apres vindrent à la Court de Parlement, laquelle leur reſpondit, qu'elle leur feroit iuſtice, & raiſon. Et y en eut de pris, & mis à la Conciergerie. Et les parties ouies, où feut Sauoiſi en perſonne, ſ'enſuiuit l'Arreſt, C'eſt à ſçauoir que Sauoiſi feut condamné à aſſeoir cent liures de rente amorie, & à bailler deux mille francs, & que ſon hoſtel ſeroit abbatu. Et ne feut point condamné à faire amende honnorable. Car il eſtoit clerc non marié. Mais trois de ſes gens le feurent, C'eſt à ſçauoir que eulx en chemiſe, vne torche en leur poing, iroiēt à Sainte Geneuiefue, au carrefour de Saint Seuerin, & deuant Sainte Catherine, & ſeroient batus de verge par les carrefours, & bannis trois ans. Et feut le dict Arreſt donné le vingt troiſieſme iout d'Aouſt.

Le trentieſme iour d'Aouſt, Louys Daulphin de Viennois, & Duc de Guyenne, eſpouſa Marguerite fille du Duc de Bourgongne, lean, & y eut grand feſte. Et le ſixieſme iour de Septembre, alla à noſtre Dame, veſtu en habit Royal, & bien grandement accompaigné du Roy de Nauarre, & des Ducs d'Orleans, de Berry, de Bourgongne, & de Bourbon, des Comtes du Perche, de Saint Paul, de la Marche, de Dampmartin, de Tanquarville, & de pluſieurs Barons, Cheualiers, & eſcuiers, Et eſtoit treſbel enfant, & le faiſoit beau veoir.

Vn piteux cas aduint à Paris, à l'eſchole de Saint Germain, en vne maiſon d'un notable marchand de Paris, où le feu ſe bouſſa d'aduanture aupres d'un chantier de bois. Et feut le feu ſi

1404. aspre, & si grand, qu'on n'y peut mettre remede, & le Seigneur de la maison, la femme, & vne fille qu'ils auoient, ne sceurent oncques trouuer moyen de eulx sauuer. Si se iecterent dedans vne chambre coye, & là moururent tant par la force de l'eauie qu'on iestoit, que estouffez par la force du feu.

Après la mort du Roy de Nauarre, lequel feit tant de maux au Royaume de France, & lequel iusques à sa mort ne cessa de le greuer, & dommaiger, son fils n'eut pas l'imagination, comme son pere. Et enuoia à Paris, comme dessus est dict, deuers le Roy gens notables. Lesquels eurent la responce cy dessus declarée, dont leur maistre feut aucunement content. Et desiroit que executiō reelle feust faite, & qu'il sceust ce que il auroit, pour recompense de ce qu'il demandoit, c'est à sçauoir des Comtez de Champagne, d'Eureux, & Cherbourg, & autres terres qu'il pretendoit à luy appartenir. Et pource vint en France deuers le Roy, & luy exposa, & à son Conseil bien doucement les causes de sa venüe, en requerant au Roy, qu'il luy vouldust faire raison & Iustice. Et sur ses demandes, y eut plusieurs & diuerses consultations, & assemblées. Et finalement iceluy Roy de Nauarre, ceda, & transporta tout le droit qu'il pouuoit auoir, & auoit és Comtez de Champagne, & d'Eureux, & tout ce qu'il auoit en Normandie. Et en recompense, le Roy erigea Nemours en Gastinois en Duché, & luy assigna en Gastinois, & Champagne douze mille liures de reuenu. Et depuis y eut aucune difficulté de Cherbourg, & disoit le Roy de Nauarre, qu'il n'estoit point compris en la Comté d'Eureux. Mais pour tout appaiser, il eut certaine somme d'argent. Et adonc feut content qu'il demeurast au Roy, & en effect feut bien achepté.

Combien qu'on vouldust dire, qu'il y eust trefues avec les Anglois, toutesfois sur la mer faisoient maux innumerables. Messire Charles de Sauoisi, dont aucunement est fait mention, auoit grand desir de soy faire valoir. Et enuoia en Espagne pour sçauoir s'il pourroit finer de nauire, en intention de faire armée contre les Anglois. Et sur ce, en escripuit au Roy d'Espagne, & n'eut pas responce telle qu'il eust biē voulu, dont il feut bien desplaisant. Et aucunement declara sa volonté de faire guerre aux Anglois, dont le Roy feut mal content, & fit sçauoir

sçauoir en Espagne, qu'on ne luy baillast point de nauire. Et 1404. disoient aucuns pres du Roy, que Sauoisi faisoit mal, de vouloir executer son entreprise, veües les trefues. Et quand Sauoisi sceut les paroles, il dit publiquement, qu'il faisoit comme bon & loyal François. Et s'il estoit gentilhomme, qui voulust dire le contraire, il estoit prest de s'en defendre, & en iecta son gaige, lequel personne ne receut.

Et disoient les Anglois, qu'ils pouuoient faire guerre, & qu'il n'en chailloit au Roy. Et qu'il n'y auoit chose si secreete au Conseil du Roy, que tâtost apres ils ne sceussent, & que on ne leur feist à sçauoir. Et pour ceste cause, feut pris vn Capitaine, qu'on appelloit le Seigneur de Courseray, & mené en Chastellet. Et feut sçauoir au Roy, qu'il estoit prest de soy soubmeestre, & soubmeestoit à la Court de Parlement, dont le Roy feut content. La Court ordonna Commissaires à faire informatiõ, & feut examiné sur les charges. Et le tout veu, feut trouué pur, & innocent, & deliuré par la Court. Et tout ce qu'on luy impoisoit, n'estoit que par enuies & haines particulieres, qui estoient entre les Seigneurs, qui estoient en la Court causées comme l'on disoit, de choses non bien honorables, entre les seruiteurs des Seigneurs.

Depuis la mort du Roy Richard, qui estoit fils du vaillant Prince de Galles, les Gallois faisoient guerre aux Anglois. Et enuoia le Prince de Galles en France deuers le Roy, pour auoir argent, & du harnois, & aide de gens. Dont le Roy feut content, & luy enuoia vn beau bacinet bien garny, vn bel haubergeon, & vne espée. Et au surplus dit aux messaigers, que trelvolontiers il l'aideroit, & conforteroit, & luy enuoieroit gens. Et pour y aller, ordonna le Comte de la Marche de son consentement, lequel assembla nauires, & gens, & trouua soixante & deux vaisseaux d'armes garnis de toutes choses. Et se rendirent tous à Brest en Bretagne.

Et comme dessus ha esté dict, les Anglois par moyen auoient cuidé auoir la Rochelle, & s'estoient embuschez vne grosse, & grande compaignée, & estoient chefs vn surnommé de Beaumont, qu'on disoit Comte de Beaumont, & le bastard d'Angleterre. Et quand ils veirent, qu'ils auoient failli, ils aduiserent, veu qu'ils estoient grosses gens, que de eulx en aller sans rien faire, leur seroit reputé à lalcheté de couraige. Et delibererent

Cc

404. d'entrer & descendre en Bretagne vers Brest, pourte que le dict bastard sçauoit le pays, & auoit esté Capitaine de Brest, & commencerent à piller, & robber, & bouter feux, & faire tource que ennemis peuuent faire. Parquoy diligemment se meirent sus les nobles du pays. Et le Duc mesmes, feit mandement. Et aussi Clifson, & le Seigneur de Rieux, qui estoient au pays, assemblerent gens le plus qu'ils peurent, & se meirent sur les champs. Et feut ordonné le Seigneur de Rieux, pour aller veoir qu'elles gens c'estoient, mais il trouua que ceux du pays mesmes auoient deliberé de les combatre, & desia auoient comme commencé l'escarmouche, & descendit à pied comme les autres, & commença bien dure meslée. Et tantost suruint le Duc, & Clifson, & depuis les Anglois ne firent aucune resistance. Et feut tué le dict Comte, & dit on, que Messire Tanneguy du Chastel, le perça d'une lance tout outre. Le bastard s'enfuit à son nauire, & enuoia demander au Duc saufconduit pour aller parler à luy. Ce qui luy feut accordé. Si feut dire au Duc, que la guerre qu'il faisoit, estoit pour cause du douaire de la Duchesse de Bretagne, qui auoit espousé le Roy d'Angleterre. Et ce faict, descendit en vne marche de Bretagne, & ardit deux villaiges, & vne Eglise. Et de là s'en alla és Isles, prenant son chemin en Angleterre.

Les Anglois en Guyenne, faisoient forte guerre, & auoient entré les autres places, vne nommée Corbesin, forte, & comme imprenable. Et tous les ans, leuoient cinquante mille escus de patus. Et enuoia l'on vers le Connestable luy requerir, qu'il y voulust remedier, & se meist sus. Et amassa gens de toutes parts. Et y eut aucuns de Bordeaux pour le cuider decepuoir, qui luy debuoiert bailler la ville de Bordeaux. Dont ils ne firent rien. Et feut apperceüe leur mauuaistié, & pour ce ils feurent decapitez. Et pour ce s'en alla le Connestable mestre le siege deuant Corbesin, à la requeste de ceux du pays, et y tint le siege par douze sepmaines. Et apres plusieurs assauts, & essayemens d'auoir la place, ceux de dedans parlerenterent, & feurent contents de eulx en aller, saufs leurs corps, & leurs biens, & quatorze mille escus, qu'ils eurent. & les paya le pays, & leur feut vn grand profit. Car d'auoir eu la place, la chose estoit biē douteuse, & avec la dicte place, feut treize autres places reduictes en l'obeissance du Roy.

Le Comte de Clermont bien accompagné, vint au dict 1404. pays de Guyenne. Et quand les Anglois le sceurent, ils luy enuoierent offrir la bataille, dont le dict Comte feut ioyeux, & content, & se disposa à les receuoir. Mais ils n'y vindrent, ne comparurent, & en assez peu de temps conquesta bien trente trois places. Et delibera de soy tenir au pays l'hyuer. Et les vnes print par force, les autres par accord, & aucunes fait abbatre, & les autres remparer, pour resister aux ennemis.

En ce temps, la Duchesse de Bar, alla de vie à trespassement.

Le Duc d'Orleans, achepta la Seigneurie de Coucy, & plusieurs autres belles terres, & Seigneuries. Et feut adiourné en Parlement en cas de retrait. Mais la chose demeura en cest estar.

La Roynes de Sicile l'ancienne, alla aussi de vie à trespassement. Et declara son meuble qu'elle auoit, c'est à sçauoir deux cents mille escus, & plusieurs ioyaux. Et luy feut demandé pourquoy elle les auoit gardé, veu la grande necessité, en laquelle auoit esté le Roy de Sicile son mari. Et elle respondit, qu'elle doubtoit que son dict mari ne feust prisonnier au dict pays, & les auoit espargné, & gardé pour le rachepter. Et que la dicte cheuance seroit bonne pour ses enfans. Et estoit vne tresbonne & sainte Dame, & eut vne moult belle fin.

Le Pape Benedi& voulant monstrier, qu'il auoit bonne volonté à l'vnion de l'Eglise, enuoia l'Euesque de Saint Pons, & autres notables personnes deuers l'Antipape, nommé Boniface, à ce qu'il voulust eslire iour & lieu, où ils peussent seulement conuenir ensemble, pour trouuer remede de oster, & faire cesser le schisme qui estoit en l'Eglise. Et quand ils feurent à Rome, & que l'Antipape le sceut, il leur feit sçauoir qu'il ne les orroit, ne à eulx ne parleroit, sinon qu'ils parlassent à luy comme Pape, dont les dicts Ambassadeurs feurent en grande perplexité. Et à la fin, veu que c'estoit pour si grand bien, & que ce qu'il vouloit, n'estoit qu'une maniere de vaine gloire transitoire, si le feirent. Et proposa l'Euesque de Saint Pons, & exauçoit fort Benedi&, & sa bonne & sainte volonté à l'vnion de l'Eglise, en faisant la

1404. requête dessus dicté. De laquelle proposition, l'Antipape feut tresmal content, & se retrahit en sa chambre, & soubdainement luy vint vne fiebure, dont il mourut. Quand le Capitaine du chasteau de Sainct Ange, veid que son maistre estoit mort, il print les dicts Ambassadeurs, & les meit au dict chasteau, & là les retint prisonniers. Apres la mort del'Antipape, les Cardinaux en esleurent vn autre, le quel ils nommerent Innocent, auquel les dicts Ambassadeurs feirent prier, qu'il les voulüst faire deliurer, & sembloit qu'il en eust bonne volonré. Mais le Capitaine n'en voulut rien faire, s'il n'auoit argent. Et par ce moyen, & non autrement, s'en issirent. Et s'en retournerent deuers le Pape Benedict, sans aucune responce, dont le dict Pape feut bien desplaisant. Et delibera d'aller en personne iusques à Rome: mais qu'il y feust conduict par les fleurs de lys, & le fait sçauoir au Roy. Et sy offrit le bon Duc de Bourbon de luy mener: mais le Roy ne le voulut consentir. Et à tant aussi se tint Benedict, deuers lequel plusieurs Abbez vindrent de diuers pays, & le plus, du Royaume, & mesmement de ceux qui estoient promeus durant la substraction. Et leur feit le Pape vne bonne & grande chere, & leur donna à vn chascun le don de benediction, & à dîner, & à chascun vn anneau, & auèques leur donna à chascun permission, & congé, d'vser de mitre en leurs Eglises, en faisant le seruice diuin.

Le Comte de la Marche, comme dessus est dict, auoit assemblé grand nauire vers Brest en Bretagne, pour aller en Galles. Et se meit sur la mer, & y feut depuis la may-Aoust iusques à la may-Nouembre, attendant tousiours nouuelles de par les Gallois, pour sçauoir où il descendroit, mais oncques n'y vint personne à luy. Et tousiours estoit sur les riuages de la mer d'Angleterre, & y feit aucuns exploicts de guerre, & s'en reuint sans aucun fruit. Ils auoient mis en vn vaisseau d'armes, leurs harmois, & autres biens: mais le vaisseau feut pery, & perdu en la mer.

La Duchesse de Bourgongne, mourut en ce temps.

Et combien que à l'encommencement de l'année, on eust mis vne grosse taille sus, laquelle ne porta aucun profit à la chose publique du Royaume. Neantmoins à la fin de la dicté année, en feut vne autre faicte aussi grosse.

dont tout le profit alla en bourses parriculieres. Dont gens d'Eglise, & autres, se plaignoient, & murmuroient moult fort.

L'an mille quatre cents & cinq, le Comte de Saint Paul, qui estoit Lieutenant du Roy és frontieres de Calais, assembla foison de gens, tant du pays, que d'autres, en intention d'aller assieger vn chasteau, qui estoit assez pres de Calais, nommé le Marc. Et de fait y alla, en intention d'y mettre le siege, ou d'assaillir la place, & ainsi le firent. Et comme ils estoient à l'assault, le Comte de Pembroc, & ses gens, saillirent de certaine embusche, où ils estoient, & frapperent tres-vaillamment sur les François, lesquels feurent desconfits. Et y en eut plusieurs morts, & aussi de prisonniers. Et quant au Comte de Saint Paul, il se retrahit, sans auoir dommaige de sa personne, ne de prise ne de mort. Le Comte de Pembroc, voiant ceste aduerture, qui luy estoit aduenüe, delibera d'aller à l'Escluse, pour faire guerre. Et de fait y alla, & y feit plusieurs maux. Mais il feut rebouté, tant par plusieurs Allemäds, qui estoient és marches, comme aussi par les Flamends, & François. Et feut contrainct à s'en retourner, dont il estoit parti.

Le gouuernement, comme on disoit, pour lors estoit bien petit. Et en feut le Roy, & aussi les Seigneurs, par plusieurs fois aduertir par propositions, & autrement: mais nulle prouision n'y estoit mise. Et si disoit-on beaucoup de choses publiquement, qui estoient bien ordes & des-honestes.

En ce temps, les eaües feurent merueilleusement grandes, & horribles, & feirēt moult de maux tant és bléds, que és prez. Et des villaiges, qui estoient pres des riües, feurent par la dicte inondation, plusieurs petites maisons comme abbatües, & en venoit le marrin aual l'eaüe.

Enuiron le treiziesme iour de Iuillet, feit horribles tempestes, de tonnerres, gresles, & autres tempestes. Et cheut le tonnerre sur le pont de Charenton, & abbatit trois cheminées, & les iecta en la riuere. Et rencontra vn compaignon, auquel osta le chapperon, & la manche dextre de sa robbe, & passa outre sans luy mal faire. Et par vn trou entra en la maison de Monseigneur le Dauphin; & en vne chambre rencontra vn ieune enfant, lequel il tua, & luy consomma la chair, les os, & tout, & ne luy laissa que la peau, toute noire, & plusieurs en

Cc iij.

1405. blessa en diuerſes manieres. Et continuoit, iusques à ce qu'on print de l'eau beneite, en l'aspergeant en la chambre, & ailleurs par l'Hostel. Et ne sceut-on oncques qu'il deuint.

Et tousiours se plaignoit-on du gouuernement, qui estoit tresmauuais, & le voioit on euidement, mais aucune prouision ne s'y me&oit. Les Seigneurs commencerent fort à murmurer les vns contre les autres, & leurs seruiteurs aussi.

Et le dix-neufiesme iour de Iuillet, la Royne, & le Duc d'Orleans s'en allerent à Poissi. Et la cause si estoit, pour induire Madame Marie de France, qui auoit esté rendue religieuse à Poissi, afin qu'elle voulust istre dehors de l'Eglise, pour estre mariée à Edouard, fils du Duc de Bar. Et en parlerent à la dicte Dame Marie, en luy disant plusieurs paroles, pour à ce la mouuoir. Mais il ne feut oncques en leur puissance, qu'elle y voulust consentir, & demeura ferme & stable en son imagination, en disant que puis quil auoit pleu au Roy, à la Royne, & à ses parens & amis, que iamais hors de l'estat de Religion ne seroit. Et y eut, comme on dict, plusieurs choses non honnestes, faictes en la dicte Abbaye, & quoy qu'il en feust, renommée en estoit.

Et s'en retournerent la Royne, & le Duc d'Orleans à Paris. Et le septiesme iour ensuiuant, se partirent de Paris, & veindrent au val la Royne, en vne place nommée Pouilly, en intention de tirer à eulx Monseigneur le Daulphin. Et de faict, le Duc de Bauiere, le Marquis du Pont, & Montagu, delibererent de luy transporter, sans ce que le Duc de Bourgongne en sceust rien. Et de faict, le firent passer par la riuiere iusques à Saint Victor, & le vouloient emmener, comme on disoit, où estoit la Royne, & le Duc d'Orleans. Et en le menant, se leua vne merueilleuse & horrible tempeste de pluye, vent, & tonnerre, tellement, qu'ils feurent contraincts de demeurer la nuit à Ville-neufue, empres Paris.

Or est vrai, que le Duc de Bourgongne venoit à Paris, & estoit logé à Louures en Paris, Auquel hastiement on enuoia dire les nouuelles, comme on emmenoit Monseigneur le Daulphin, & ceux qui estoient en sa compaignée. Et lors il monta à cheual, le plus diligemment qu'il peut, pour acconſuiuir le dict Monseigneur le Daulphin, lequel ceux qui le me-

noient, bien matin auoient fait monter à cheual, & s'en al- 1405.
loient. Mais le dict Duc de Bourgongne, feit telle diligence,
qu'il les acconſuiuit, & ramena à Paris le dict Monſeigneur le
Daulphin, à grand ioye du peuple. Et en la preſence du dict
Daulphin, feit faire vne bien notable propoſition, où eſtoient
le Roy de Nauarre, le Duc de Berry, & pluſieurs autres Sei-
gneurs, Prelats, & Barons, en faiſant monſtrer le mauuais
gouuernement qui eſtoit, & les maux qui ſ'en enſuiuoient.
Et que ce qu'il auoit fait, c'eſtoit pour bien, & feit dire qu'il
eſtoit venu pour quatre cauſes. Premièrement, pour le gou-
uernement du Roy, & de procurer ſa ſanté. Secondement,
pour meſtre Juſtice ſus en ce Royaume, auquel maux infinis
ſe faiſoient, ſans ce que Juſtice & raiſon ſ'en feiſt. Tiercement;
pour meſtre le Domaine ſus, dont les profits eſtoient comme
nuls, & mis à nonchaloir, & grand negligéce. Quartemét, pour
aſſembler les trois Eſtats, pour pourueoir aux affaires du Roy-
aume, & aduiſer au gouuernement. Car ceux qui ſe diſoient
l'auoir, gaſtoient tout, comme il feit monſtrer clairement, &
euidemment. Et apres que tout feut grandement & notable-
ment demonſtré, par celuy qui propoſoit, Monſeigneur le
Daulphin ſeleua, & dit, que ce que le Duc de Bourgon-
gne l'auoit emmené à Paris, eſtoit de ſon conſentement, &
franche volonté. Apres la dicte propoſition faiſte, le Roy de
Nauarre, & le Duc de Berry, allerent à Saint Paul, où les
autres enfans du Roy eſtoient, & les priſt le Duc de Berry
en ſa garde. Et apres que Monſeigneur le Daulphin, eut dict
les paroles deſſus dictes, le Duc de Bourgongne dit, que ce
qu'il auoit fait, il l'auoit fait comme vrai & loyal ſubier
du Roy, & ſily auoit perſonne qui vouluſt dire le contraire,
il eſtoit preſt d'en reſpondre de ſa perſonne. Le Ieudy en-
ſuiuant, le Duc de Lembourg, frere du Duc de Bourgon-
gne, entra à Paris, à tout huiſt cents hommes d'armes, les-
quels entrerent par la porte de Saint Denys, au long de la
rue, & ſ'en vindrent au Louure, où Monſeigneur le Daul-
phin eſtoit, & luy feit la reuerence, en ſoy offrant à ſon ſerui-
ce. Et ſ'en reuint à ſes gens, puis monta à cheual, & ſe loge-
rent ſes gens en hoſtelleries, lesquels ſe gouernerent bien
doulcement & gratieufemét. Et demurerent le Duc de Bour-
gongne, & ſes deux freres, avec Monſeigneur le Daulphin.

1405. & feirent mestre les commune & gens de Paris sus, & armer. Et feut ordonné Monseigneur de Berry, Capitaine, de Paris, & côme Capitaine cheuaucha par Paris. Si peut-on penser, que grands débats y auoit, & que la Roynes, & le Duc d'Orleans, estoient tres-mal contêts, & se dispoioient les choses à vn bien grand mal, pour estre cause de la destrucțiō finale du Royaume.

Et pource que le Roy reuint à aucune conualescence, il print les choses en sa main, en defendant la voye de faict, tant d'vn costé, que d'autre. Il feut ordonné par le Roy, en son Conseil, qu'ils enuoieroyent vne notable Ambassade à la Roynes, & deuers le Duc d'Orleans. Et feurent commis & deputez le Duc de Bourbon, & le Comte de Tancarville, & Messire Iean de Montagu, grand Maistre d'Hostel du Roy, lesquels allerent à Melun, où la Roynes, & le Duc d'Orleans, estoient. Aufquels feut exposé l'inconuenient qui pouuoit aduenir, des manieres qu'on tenoit tant d'vn costé que d'autre. Et que tout le plat pays estoit plain de gens d'armes, qui pilloient & destrouffoient tout, à la desplaissance du Roy bien grande. En leur requérant, qu'ils voulussent rappaiser leurs couraiges, & que le Duc de Bourgongne estoit prest en toutes choses, de faire le plaisir du Roy. Et à ce, feut faict responce par la Roynes, & le Duc d'Orleans, que sur ce, ils auroient à loisir aduis, & conseil, & que lors ils ne pouuoient faire responce, ne n'y estoient disposez. Veu la grande injure qu'on leur auoit faict, & mesmes à la Roynes, laquelle auoit mandé son fils le Daulphin, qui venoit vers elle, accompagné de ses parens simplement, sans aucunes armes inuasibles, & que ce, luy estoit forte chose à dissimuler. Et la responce ouye, les dicts Ambassadeurs, s'en retournerent sans rien faire. Et demandoient expressément la Roynes, & Monseigneur le Duc d'Orleans, qu'on leur restituast, & enuoiaist Monseigneur le Daulphin. Et faisoit le Duc d'Orleans, mandement de gens d'armes de toutes parts, & desja en auoit foison en Brie, Gastinois, Solongne, & Beauffe, & auoit avec luy le Duc de Lorraine, & le Comte d'Alençon. Le Roy de Sicile vint aussi à Paris, accompagné de gens de guerre, & autres, qu'il auoit sur les champs. Et fallut qu'il feist certains sermens, qu'on vouloit aussi que la Roynes, & le Duc d'Orleans feissent. Mais rien n'en voulurent faire. Toutesfois par le moyen du Duc de Bourbon, qui tousiours les asseuroit,

ils

ils veindrent iusques à Corbeil , & de là apres iusques à aucun 1405.
 temps, vindrent iusques au bois de Vincennes. Le vingthuit-
 iefme iour d'Aouſt, veint l'Eueſque du Liege, pour ſeruir le
 Duc de Bourgongne, à huit cents lances, & douze cents cou-
 ſtillers, & cinq cents archers, & meit biē deux heures à entrer.
 Et feit des difficultez, auant qu'il vouluſt entrer. Et à Paris a-
 uoit bien vingt mille cheuaux eſtranges: mais oncques rien
 n'en rencherit, excepté le bled, & bien peu. Le premier iour
 de Septembre, arriuerent entour de Paris, ceux des Comté, &
 Duché de Bourgongne, bien deux mille combatans. Et par
 force entrerent dedans Laigny, & ſe logerent entre Paris &
 Pontoife, & tout deſtruifoient. Les gens auſſi au Duc d'Auſtri-
 che, au Comte de Vuirtemberg, au Duc de Sauoye, & au Prin-
 ce d'Orenge, vindrent au mandement du Duc de Bourgong-
 ne, & eſtoient fix mille cheuaux, logez autour de Prouins. Et
 vers le pont Sainct Meſſence, eſtoient logez ceux de Hollan-
 de, Zelande, Hainault, Brabant, & Flandres, leſquels tout de-
 ſtruifoient, & eſtoit grand pitié des maux qu'ils faiſoient. Le
 Duc de Berry, Capitaine de Paris, feit remeētre les chaiſnes au
 trauers de la riuiere, deçà & delà l'Isle noſtre Dame, & planter
 groſſes poutres, pour icelles ſouſtenir, & ordonner en eſtat les
 portes pour fermer, leſquelles n'auoient fermé, auoit plus de
 vingt quatre ans. Et le Sabmedy, quinziefme iour d'Octobre,
 on cria alarme à Paris, & ſ'armerent les gens de guerre, & auſſi
 ceux de la ville. Et y eut grande eſmeute, & vouloient ſaillir
 par la porte de Sainct Antoine: mais Monſeigneur de Berry
 monta à cheual, & appaiſa tout, & defendit, & empelcha que
 perſonne ne ſaillit.

Au bois de Vincennes, eſtoit la Royne, & le Duc d'Or-
 leans, & y allerent tous les Princes eſtans à Paris, & y eut plu-
 ſieurs gēs de Conſeil. Et feut aduiſé, & conclud, qu'on ne pou-
 uoit appaiſer ceſte diuiſion, ſinon qu'on accompliſt au Duc de
 Bourgongne ſes requeſtes, ou la plus part de ce qu'il deman-
 doit. Et feut conclud, qu'ainſi ſe feroit. Et de le faire, & accom-
 plir, le iurerent tous les Seigneurs preſens, excepté le Duc
 d'Orleans, qui ne vouluſt oncques faire aucun ſerment. Le
 Mercredy enſuiuant, le Duc d'Orleans manda le Preuoſt, des
 marchands, & aucuns notables gens de Paris, & leur dit, qu'il
 eſtoit bien eſbahy des manieres qu'on luy tenoit, & meſmemēt

D d

1405. le Duc de Bourgongne, qui n'estoit pas si prochain de la Couronne qu'il estoit. Et quant à luy, son intention estoit de seruir le Roy, & la chose publique du Royaume, & de tenir, ce qui seroit aduisé pour le profit du Royaume, en soy offrant aux dictz de Paris, faire pour eulx, & par leur conseil, ce qui luy seroit possible. Et vîa de moult belles, & gracieuses paroles, car il en estoit bien aisié. Et lors quand la cognoissance en vint au Duc de Bourgongne, il delibera, veu les gens qu'il auoir, d'aller deuant le bois en armes, pour assieger la place: mais les autres le reprimerent, & empescherent. Et apres plusieurs difficultez, le Duc d'Orleans feist le serment: comme les autres. Et feut crié à Paris, que tous gens d'armes vuidassent. Et le leudy partirent de Paris le Duc de Lembourg, l'Euesque du Liege, & le Comte de Neuers, tous armez, & s'en allerent en leurs pais. Aussi feut il mādē à ceux qui tenoient les chāps, tant d'un costé, que d'autre, qu'ils s'en partissent, & qu'ils s'en retournassent, dont ils estoient venus, & ainsi le feirent. Et le Vendredy apres midy, entra la Royne à grands pompes à Paris, tant de listieres, chariots branlans couuerts de draps d'or, & hacquenées, que d'autres diuers paremens. Et estoient en sa compaignée les Roys de Sicile, & de Nauarre, & les Ducs de Berry, d'Orleans, & de Bourgogne, & plusieurs Seigneurs, Comtes, & Barons. Et le Sabmedy, feut tenu encores vn grand Conseil, & feurent les sermens renouellez, & y eut bon accord faict entre les Seigneurs, dont le peuple, & toutes personnes faisoient grand ioye. Et le Dimanche, alla la Royne à nostre Dame en vn chariot, & ses deux fils avec elle, accompagnée des Seigneurs sus dictz, qui estoit belle chose, & noble à veoir. Et feut tenu vn conseil, comment on se auoit à gouuerner. Et feut deliberé entre autres choses, qu'on restraindroit les Officiers de l'Hostel du Roy, & de ceux de la Royne, & des enfans, & de ceux qui demeureroient, on leur diminueroit leurs gaiges. Plusieurs belles Ordonnances y feurent faictes, lesquelles comme on dict, ne durerent guieres.

Au dict an, auoit eu vn debat entre le fils du Seigneur de Grauille, & Messire Geofroy Boucicault, pour paroles iniurieuses dictes l'un à l'autre, en la chambre de la Royne. Et disoit on, que Boucicault auoit baillé vn coup de pied à Grauil-

le, & que lors Grauille iura, que auant qu'il feust le bout de l'an, il le batteroit. Si aduint que le dernier iour de Decembre, qui estoit le dernier iour de l'an, Grauille accompagné de cinq ou six varlets, rencontrèrent Boucicault vers les marches de greue, & le battirent tresbien d'espées, par bras, & iambes. Et disoit on, qu'il estoit bien employé, & qu'il auoit eu tort, d'auoir iniurié Grauille, qui estoit bien gentilhomme de nom & armes.

Le Comte d'Armaignac, qui auoit espousé la fille du Duc de Berry, se meit sus en Guyenne, & fait forte guerre aux Anglois la dicte année. Et gagna bien soixante places, les vnes par force, & les autres par composition, & fait vn bien grand dommaige aux Anglois.

Au dict an mille quatre cents & cinq, le Pape Benedi^{ct} voulut aller à Genes, & ordonna vn dixiesme estre leué en ce Royaume, & en toute son obeissance. Dont ceux de l'Vniuersité ne furent pas contents. Et allerent le Recteur, & aucuns de l'Vniuersité deuers les Seigneurs, en leur requerant, qu'il leur pleust, qu'en ce Royaume le dixiesme ne se leuast point, & quoy que feust, que ceux de l'Vniuersité n'en payassent rien, & que sur ce, on en escripust au Pape. Mais on leur respondit en effect, que le dixiesme se leueroit, & qu'ils en paieroient, dont ils ne furent pas bien contents. Et disoit on communément que les dicts Seigneurs, ou de leurs gens, en debuoient auoir leur part. Et conclurent ceux de l'Vniuersité, d'enuoier vers Benedi^{ct} pour ceste cause gens notables, & firent sur eulx vne collecte, qui monta bien iusques à deux mille escus.

L'Antipape luy estant à Rome, enuoia vne bulle bien faite à l'Vniuersité, en soy offrant en toutes manieres, à l'vnion de l'Eglise. Et s'excusoit fort de la detention qu'on fait des Ambassadeurs de l'Vniuersité à Rome, deuant la creation, lesquels feurent mis au chasteau de Saint Ange, & que ce ne feut point de son consentement, ne de ses Cardinaux. Mais le Capitaine le fait faire, pour doubte qu'on ne leur feist desplaisir, & pour la garde & conseruation de leurs personnes.

Le Duc de Berry enuoia à Rome vers l'Antipape, & luy escripuit, en l'exhortant d'entendre à l'vnion de l'Eglise. Et feurent ses Ambassadeurs bié grandemēt & honorablemēt receus.

D d ij

1405. Et escripuit au dict Duc de Berry, qu'il ne tenoit point à luy, & qu'il estoit prest, & appareillé d'y entendre, & de faire tout ce qui seroit aduisé, & grandement se mestoit en son debuoir.

Le mariage se feit entre le Duc de Gueldres, & la fille du Comte de Harcourt. Pour laquelle cause, le Duc de Gueldres vint à Paris, & luy y estant, le Duc de Lembourg l'enuoia deffier. Pour laquelle cause, s'en retourna le plus tost qu'il peut.

Le Pape Benedict, comme dict est, se disposa d'aller à Genes, & de fait y feut, & y feut receu grandement & honnorablement par les Geneuois. Et auoir le dict Pape foison de gens de guerre, lesquels tous entrèrent en la ville, dont les Geneuois n'estoient pas bien contents. Et feit Benedict vne belle proposition, en declarant qu'il auoit bonne intention en toutes manieres possibles, d'entendre à l'vnion de l'Eglise. Et pour ceste cause, il estoit venu en la dicte ville de Genes, en leur requerant, qu'ils luy voulussent aider de nauire, & qu'il vouloit aller à Rome, afin d'entendre à l'vnion de l'Eglise. Les Geneuois voians en leur ville tant de gens d'armes, que le Pape y auoit mis, faignoient que en tous temps passez, ils auoient accoustumé de faire vne maniere de monstres de gens de guerre, pour sçauoir la puissance de la ville. Et aussi qu'il estoit grandement expedient, de veoir les gens de guerre du Pape, pour sçauoir s'ils estoient en nombre suffisant, pour conduire le Pape à Rome. Et l'induisirent qu'il se consentist, à faire ce que dict est, lequel tresenuis en feut d'accord, & faingnit qu'il en estoit content. Et de fait, issirent dehors tous les gens de guerre. Et quand ils feurent dehors, ils fermerent les portes, & laisserent entrer leurs gens: mais de ceux du Pape, ne voulurent souffrir, que vn tout seul y entrast. Dont le Pape feut tresmal content, & doubtoit fort de sa personne. Mais ceux de Genes, enuoierent vers luy pour l'appaiser, & feut toute leur excusation, qu'ils se doubtoient de leurs femmes, qui estoient belles, & qu'il ne veint soubz ombre d'aucunes d'elles, brouillis, & inconuenient. Et autre chose n'en feut.

En ce temps, on parloit fort de la Royne, & de Monseigneur d'Orleans, & disoit on, que c'estoit par eulx que les

raillies se faisoient, & que les'aides couroient', & leuoient, 1405. sans ce que aucune chose en feust mise & employée au faict de la chose publique, & assez haultement par les rues on les mauldiffoit, & en disoit-on plusieurs paroles. La Royne en vn iour de feste voulut ouyr vn sermon, & y eut vn bien notable homme, lequel à ce faire feut commis. Lequel commença à blasmer la Royne en sa presence, en parlant des exactions, qu'on faisoit sur le peuple, & des excessifs estats, qu'elle, & ses femmes, auoient, & tenoient, & comme le peuple en parloit en diuerfes manieres, & que c'estoit mal faict, dont la Royne feut tres-mal contente. Et le dict Prescheur en s'en retournant de la predication, feut rencontré d'aucunes femmes & hommes de la Court, & luy dirent qu'ils estoient bien esbahis, comme il auoit osé ainsi parler. Et il respondit, que encores estoit-il plus esbahi, comme on osoit faire les fautes, & pechez, qu'il auoit dict & déclaré. Et en s'en allant outre, il rencontra encores vn autre homme, qui luy dit en iurant le sang de nostre Seigneur, que qui le croiroit, qu'on l'enuoieroit noyer. Et le bon homme dit, Il n'en faudroit qu'un autre, de telle volonté que tu es, avec toy, pour faire vn grand mal. La dicte predication vint à la congnoissance du Roy, & luy rapporta-on plus pour mettre à indignation, le bon homme, que autrement. Et dit le Roy, qu'il le vouloit ouyr prescher, & feut ordonné, que le iour de Pentecoste, il prescheroit. Lequel prescha, & print son theme, *Spiritus sanctus docebit vos omnem veritatem*. Et le deduisit bien grandement & notablement. Et si l'auoit parlé en la presence de la Royne, des grands pechez qui couroient, encores en parla-il plus amplement & largement en la presence du Roy. Et feit tant, que le Roy feut content, & si luy feit donner aucune legere somme d'argent.

En Saintonge, auoit vne place nommée Mortaing, qui debuoit estre au Vicomte d'Aunay, laquelle les Anglois tenoient moult fort. Et n'estoit année, à cause de la dicte place, qu'ils n'eussent d'apparis sur le pays, bien quatre vingts mille escus. Laquelle les François delibererent d'assieger, & de faict y meirent le siege, & y assortirent canons, & coullars, & autres engins, & feirent toutes les diligences en tel cas accoustumées. Ceux de dedans faisoient merueilles de eulx defendre, & aucunesfois faisoient saillies, & de grands dommaiges.

1405. aux François. Celle qui s'en disoit Dame, estant en la place, estoit fort obstinée, & ne vouloit pour rien ouyr parler de traité, ne de rendre la place. On proceda par les François, à faire mines, & si dommageoient fort ceux de dedans les coullars, par où on iectoit grosses pierres, & pesantes. Et vn iour aduint, qu'une grosse pierre. cheut sur le feste de la châtre, où estoit la fille de la dicte Dame, laquelle pierre fouldroia, & abbatit tout le dict feste, & y feut la dicte fille tuée, dont ceux de dedans feirent grand plaincte & douleur, & mesmement sa dicte mere. Et feurent les Anglois à ce menez, apres sept sepmaines que le siege y auoit esté mis, qu'ils n'auoient plus que menger, & si veoient & apperceuoient bien, qu'ils n'auoient point de secours. Et par vne faulxe poterne, trouuerent maniere de eux en aller par la mer. Et les François voians, que plus n'y auoit de defense, entrèrent dedans, & gaignerent la place, & la rendirent au Vicomte d'Aunay, auquel elle estoit.

En ceste saison, aduint à Clugny vne bien piteuse chose. Car il y vint soubdaine mêt, vne si grande abondance d'eäues, & si merueilleuses rauines en iceluy lieu, & tout le pays d'environ, qu'elle abbatit, & prosterna plusieurs gros villaiges, & maisons. Et estoit grand pitié, de ouyr les clameurs & voix du peuple, criant à Dieu mercy, & y en eut vn moult grand nombre de noyez, & dura la dicte rauine quinze heures. Et la chose passée, c'estoit pitié de veoir les hommes & femmes morts, qui feurent bien & diligemment enseuelis.

Comme dessus ha esté dict, il y eut vn merueilleux tonnerre, & vne grand tempeste en l'hostel de Monseigneur le Dauphin. Mais vn autre, au dict an, vint à Saint Germain en laye, bien grand & horrible, auquel estoient la Roïne, & le Duc d'Orleans, qui auoient esté veoir Madame Marie de France à Poissi, & faisoit à vne vesprée depuis disner beau temps, & net. Parquoy delibererent d'aller chasser au bois, & se mit la Roïne en vn chariot, & ses Damoiselles avec elle, & le Duc d'Orleans, & autres femmes, à cheual. Et soubdainement survint vne merueilleuse tempeste de vêts, grosse gresle, & pluie, & tellement, que le dict Duc d'Orleans feut contrainct de se bouter dedans le dict chariot, où la Roïne estoit. A cause de quoy les cheuaux du dict chariot, qui estoient forts & puissans, feurent tellement espouventez, qu'ils commencerent à cou-

rir tant qu'ils peurent, iusques à ce qu'ils se trouuerent en la vallée, vers le pont du pec, & s'en alloient tout droict en la riuere. Et disoit-on qu'ils se feussent fourrez & bouttez dedans l'eau, & que tous ceux qui estoient dedans, eussent esté noyez, si ce n'eust esté vn homme, qui s'aduifa de couper les traiz des cheuaux. Et de ce, feurent grands nouuelles à Paris, & par tout. Et y eut d'aucunes gens notables, & catholicques, qui aduertirent la Roynie, & le Duc d'Orleans, que c'estoit exemple diuin, & qu'ils estoient taillez, que de brieuf leur mescheroit, s'ils ne faisoient cesser les aides, & charges qu'on donnoit au peuple, & qu'ils payassent leurs debtes qu'ils debuoiert aux marchands, qui leur auoient liuré leurs marchandises. Et pour ceste cause, le Duc d'Orleans feit sçauoir par tout, que ceux à qui il debuoit, veinssent à certain temps à Paris, & il les feroit contenter & payer. Dont plusieurs de diuers pays y veindrent, & feurent aucunement contentez les aucuns, specialement ceux qui estoient de loingtain pays, & qui auoient despendu en venant & retournant. Aux autres feut donné partie de ce qu'on leur debuoit, & aux autres neant.

Le Roy estant malade, le Duc d'Orleães voulut auoir le gouuernement de Normandie, & de fait alla vers Rouen, & cuida entrer au chasteau, & en la ville. Mais il trouua resistance, & luy feut respondu, qu'ils estoient au Roy, & luy obeïroient, & non à autre. Si s'en retourna tres-mal content. Et quand le Roy feut en santé, le dict Duc luy pria, & requit, qu'il en eust le gouuernement, & qu'il s'y voulust consentir. Mais oncques n'en voulut rien faire, & estoit grand pitié de veoir les choses, en l'estat qu'elles estoient. Car on leuoit foison d'argent, & grands cheuances, & toutesfois le Roy n'auoit rien, & à peine auoit-il sa despenfe. Et aduint vne fois qu'il disnoit, & estoit à table, que la nourrisse, laquelle nourrissoit Monseigneur le Dauphin, vint deuers le Roy, & dict, qu'on ne pouuoit en rien le dict Seigneur, ne à celles, ou ceux qui estoient autour de luy, & qu'ils n'auoient que menger, ne que vestir. Et qu'elle en auoit plusieurs fois parlé à ceux, qui auoient le gouuernement des finances, mais nulle prouision n'y estoit mise. Le Roy de ce feut tres-mal content, & respondit à la dicte nourrisse, que luy mesme ne pouuoit rien auoir, & qu'il n'auoit autre chose, & feut le Roy tres-mal content.

1405. des façons qu'on tenoit. Et pour y pourueoir, manda le Duc de Bourgogne, qu'il vint deuers luy, le plustost qu'il pourroit. Lequel y veint volontiers, & diligemment: nonobstant que pour lors il estoit empesché pour les partaiges de luy, & de ses freres, touchant les successions de leurs pere, & mere, esquelles choses il feut longuement embesongné. Et finalement s'en partit, bien & grandement accompagné, & eut nouvelles en chemin, assez pres de Paris, du partement de la Royne, du Duc d'Orleans, & de Monseigneur le Daulphin. Et feit les choses dessus touchées, sans plus les reciter.

Messire Charles de Sauoisi, vaillant cheualier, assembla des gens de guerre du Royaume de France, ce qu'il en peut finer, en intention d'aller sur mer vers la coste d'Angleterre. Et de fait, luy & sa compaignée veindrent sur les marches de Bretagne, & là trouuerent plusieurs vaisseaux d'Espaigne, garnis de gens de guerre, & s'assemblerent en intention de venir vers la coste d'Angleterre, pour greuer les Anglois. Et de fait y vindrent, & sur la mer trouuerent plusieurs petits vaisseaux, esquels auoit certains Anglois, & sembloit que ce ne feussent que pescheurs. Dont les aucuns vaisseaux, & tout ce qui estoit dedans feurent noyez, & les autres, tirerent vers Angleterre, & feirent à sçauoir la venie des dictz François. Lesquels arriuerent au port de Tache, & là trouuerent vingt-six naues, où estoient plusieurs Anglois, lesquelles estoient chargées de diuerses marchandises. Et combien que aucuns Anglois estans es dictz vaisseaux, se cuidassent mettre en defense, esperans d'auoir secours des villes & villaiges Anglois pres du dict port, toutesfois leur defense en rien ne profita. Et bruslerent les François la plus grand partie du dict nauire, & celles qui estoient chargées de marchandises, comme laines, & autres choses, feirent seurement conduire & mener iusques au port de la ville de Harefleu, laquelle est située en Normandie. Les François descendirent à terre au dict pays d'Angleterre, & aduiserent vne ville bien peuplée, & trouuerent les Anglois d'icelle appareillez à resister aux François. Et quand les François les veirent comme sans ordonnance, les assaillirent, & y eut tant d'un costé que d'autre assez aspre besongne. Mais par le moyen des arbalestriers François, & Espaignols, les François eurent victoire. Et y eut plusieurs Anglois

glois morts, & les autres s'enfuyrent. Et lors brulerent les François la plus grand partie de la ville, & prindrent tout ce qu'ils peurent emporter, & s'en retournerent à leurs nauires. De là s'en partirent, & s'en vindrent en l'Isle de Piolent, où Messire Jean de Martel, vn vaillant cheualier de Normandie, auoit esté autres fois pris. Et là se trouuerent les Anglois, de mille à douze cents archers, armez, & habillez, avec les communes de la dicte Isle, prests de resister aux François, lesquels cuiderent prendre terre, mais fort estoient empeschez par les dicts Anglois de traict. Et finalement ils ne peurent soustenir le fais & charge des arbalestriers, parquoy se meirent en fuite, & y en eut de quatre à cinq cents de morts, & pris. Et marcherent outre les François en la dicte Isle, & trouuerent vne Abbaye, en laquelle ne feirent aucun dommaige, & allerent en cinq villages, lesquels ils meirent en feu, & flambe. Et en icelle Isle, trouuerent plusieurs biens meubles, de plusieurs & diuerses manieres, lesquels ils prindrent, & feirent emporter, & mettre en leur nauire. Et de là s'en retournerent les François, & s'en vindrent en l'Isle de Vuis, de laquelle Isle, le Comte de la Marche, feut dechassé. Et sur le riuage, veindrent environ quatre cents Anglois, tous armez & habillez, lesquels se mocquoient des François, & estoient ce sembloit, en volonté de defendre que les François ne descendissent. Mais quand ils les veirent approcher, ils s'enfuirent, & y en demeura vingt-deux en la place. Les dicts François marcherent auant en la dicte Isle, & trouuerent vn tres-gros, & bon village, & bien garni de plusieurs biens, dont ils prindrent à leur volonté, ce que bon leur sembla, & puis bouterent le feu par tout, & s'en retournerent bien garnis en leurs nefes. De la dicte Isle, s'en allerent au port de Hantonne. Et les Anglois, eulx doubans de leur venue, auoient mis grands paulx dedans la mer pour empescher que les François ne prinssent terre, & s'auoient mis canons & autres habillemens. Quand on apperceut la maniere des dicts Anglois, les François vaillamment allerent à eulx, les vns à bateaux, & les autres à petits coques. Et se cuiderent les Anglois defendre: mais rien n'y vallut, & feurent vaincus, & y en eut de morts, & de pris, & gagnerent les François leurs habillemens de canons, & autres engins de guerre. Et allerent au village, & prindrent ce que bon leur sembla. Et bouterent le

E e

1405. feu, & ardirent le villaige, & s'en retournerent en leurs nef's puis s'en vindrent à toute leur gaigne à Harefleu.

Le Comte de la Marche, comme dessus ha esté touché, auoit esté ordonné d'aller en Galles, & ne feut pas sa faulte: Car luy, ne ses gens ne pouuoïent auoir aucun payement, dont il eut grand desplaisance. Et le Mareschal de Rieux, & le Seigneur de Hugueuille, considerans que grand des-honneur seroit au Roy, si on n'alloit aider aux Gallois, veu que le Roy l'auoit promis, ils delibérerent & conclurent d'y aller, & de fait y allerent. Et en allant, eurent diuerses rencontres sur la mer, & aussi quand ils feurent arriuez au pays de Galles, desquelles ils issirent à leur honneur. Et feurent receus grandement & honorablement par les Seigneurs, & gens dudict pays. Et requirerent les dict's Seigneurs François, que le plus tost qu'on peust, on les meist en besongne. Et de fait, meirent le siege deuant vne ville fermée, estant és dictes marches de Galles, tenue par les gens de Henry, qui estoit située assez pres de la mer. Et n'y eurent pas esté longuement, qu'ils apperceurent sur la mer assez pres nauire, où auoit par apparence gens de guerre. Et quand les Gallois le veirent approcher des riuages de la mer, il leur sembla qu'on venoit leuer le siege, & bien soudainement se leuerent, & partirent. Et quand les François le veirent, aussi s'en partirent-ils du dict siege, & se retrahirent où il leur feut ordonné. Et és dictes marches, auoit vne autre ville bien forte, tenue par les gens du dict Henry de Lenclastre, laquelle nuisoit fort au pays de Galles, & feut assiegée par les François, & Gallois. Et se defendirent fort les Anglois, & faisoient des saillies, mesmement du costé des François, & de belles armes. Et s'esmerueilloient fort ceux de dedans la place, & les Gallois aussi de la vaillance des François, lesquels se portèrent vaillamment & grandement. Et finalement les Anglois rendirent la place par certaine composition. Et icelle rendue, prindrent ce qu'ils peurent prendre, & y bouterent les Gallois le feu, & meirent en feu, & en flambe toute la ville, & raserent les murs. Et ce fait, pource qu'il estoit hyuer, les François feurent logez en diuers lieux, & y passerent l'hyuer, sans ce que on les embesongnast en aucune maniere. Et pource enuiron l'entrée de Carefme se meirent sur mer, & s'en retournerent en leur pays de France.

Comme dessus ha esté touché, il y auoit diuision entre les 1405. Seigneurs, lesquels auoient gens d'armes sur les champs, qui faisoient maux innumerables. Et les Ducs de Berry, & de Bourgongne, estās à Paris, & la Royne, & le Duc d'Orleans dehors. On sceut bien apparemment qu'il y auoit en vaisseaux bien equippez, & habillez en la ville de Paris, gens armez & habillez, qui vogoient sur la riuiere. Et doubtoit-on, que ce ne feust pour trouuer moyen & maniere, de prendre le Roy en l'Hostel de Saint Paul, & de le mener, où estoient la Royne, & le Duc d'Orleans. Et ce, feut la cause, que le Duc de Berry, feit mestre gros pieux, & grosses chaînes de fer à trauers la riuiere.

En ce temps, le Duc de Bourgongne feit assembler le peuple de Paris, & feit vne maniere de proposition, en monstrant le mauuais gouuernement du Royaume, & que si ceux de Paris, luy vouloient aider, qu'il y meeroit bien remede, & feit plusieurs requestes en ceste matiere, lesquelles en effect luy accorderent, excepté vne. Car il requeroit que ceux de la ville, s'armassent sur les chāps avec luy, quand il iroit. A quoy ils respondirent, qu'ils garderoient leur ville, mais qu'ils s'armassent, ne qu'ils faillisset avec luy, ils ne le feroiēt point. Et pource que on veoit euidemment que tous ces brouillis, ne venoient que pour auoir le gouuernement, feut ordonné & conclud, le septiesme iour de Nouembre, que Monseigneur le Daulphin auroit le gouuernement. Mais aucuns disoient que la prouision n'estoit pas suffisante, pource qu'en effect le Duc de Bourgongne l'auroit. Car sa fille estoit mariée avec Monseigneur le Daulphin, lequel estoit tout au gouuernement du dict Duc, & sans luy ne faisoit rien.

En ceste saison, vn notable Docteur en Theologie, nommé Maistre Iean Iarson, Chācellier de l'Eglise de nostre Dame de Paris, & Curé de Saint Ieā en greue, feit vne notable proposition, & print son theme, *Vinut Rex, Vinut Rex, Vinut Rex*. Laquelle proposition est assez cōmune, & escripte en plusieurs lieux. Et si on-eust voulu garder le contenu en icelle, en bonne police, & gouuernement du Royaume, les choses eussent bien esté. Mais on auoit beau prescher, car les Seigneurs, ne ceux qui estoient entour eulx, n'en tenoient compte, & ne pensoient qu'à leur profit particulier.

1405. C'estoit grand pitié de la maladie du Roy, laquelle luy tenoit longuement. Et quand il mengeoit, c'estoit bien gloutement, & louuiffement. Et ne le pouuoit-on faire despouiller, & estoit tout plain de poux, & de vermine, & d'ordure. Et auoit vn petit lopin de fer, lequel il meit secretement au plus pres de sa chair. De laquelle chose on ne sçauoit rien, & luy auoit tout pourri la pauvre chair, & n'y auoit personne qui oſast approcher de luy, pour y remedier. Toutesfois il auoit vn Physicien, qui dit qu'il estoit neceſſité d'y remedier, ou qu'il estoit en danger, & que de la guairison de la maladie, il n'y auoit remede, comme il luy sembloit. Et aduifa qu'on ordonnast quelque dix ou douze compaignons desguifez, qui feussent noircis, & aucunement garnis deſſous, pour doubte que il ne les blessast. Et ainsi feut fait, & entrerēt les compaignons, qui estoient bien terribles à veoir, en la chambre. Et quand il les veid, il feut bien esbahi, & veindrent de fait à luy. Et auoit on fait faire tous habillemens nouueaux, chemise, gippon, robbe, chausses, bottes, qu'un portoit. Et le prindrent, & disoit plusieurs paroles, & le despouillerent, & luy vestirent les dictes choses qu'ils auoient apporté. Et estoit grand pitié de le veoir, car son corps estoit tout mengé de poux, & d'ordure. Et si trouuerent la dicte piece de fer. Et toutes fois, qu'on le vouloit nettoier, falloit que ce feust par la dicte maniere. Et estoit vne chose, dont aucunes gens s'esmerueilloient. Car on le venoit veoir aucunes fois, & regardoit fort les gens, & ne disoit mot quelconque. Mais quand Messire Iean Iuuenal des Vrsins y venoit, lequel auoit eū le gouuernement de la ville de Paris long temps, & estoit son Aduocat fiscal, il luy disoit, Iuuenal, Regardez bien que nous ne perdions rien de nostre temps.

Le Roy reuint à santé, & bonne memoire, & pensoit des besongnes du Royaume, le mieux qu'il pouuoit, & octroya à l'Vniuersité, qu'elle ne payeroit rien du dixiesme, mis sus par Benedict.

En Bourdelois, le Comte d'Armaignac, faisoit de grandes conquestes, & alla deuant Bourdeaux, accompagné de seize cents hommes d'armes, & quatre mille hommes de trait, & leur presenta bataille, mais oncques homme ne issit.

Il y eut aucunes trefues entre les François, & les Anglois,

lesquelles ne durerent guieres. Et pendant icelles, les Anglois 1405. enuoierent en France requerir, qu'on leur laissast prendre des bleds en France, car en leur pays ils en auoient necessité. Mais par l'ordonnance du Conseil feut ordonné, qu'ils n'en auroiēt point, & defendu qu'on ne leur en vendist aucunement.

Souuent on enuoioit messaiges pour l'vnion de l'Eglise, en diuers Royaumes, & deuers les contendans. Et y faisoit faire le Roy toutes diligences, qu'il estoit possible de faire.

En ceste année, Messire Regnault de Trie, Admiral de France, se desista de son office, au profit de Messire Clignet de Brebât. Et disoit on, qu'il luy en auoit baillé quinze cēts escus.

Après l'accord fait des Seigneurs, l'armée du Roy se diuisa en trois parties. L'une, feut enuoïée à Bordeaux, auquel lieu on auoit esperance, que les Anglois combatteroient les François. Les autres feurent enuoyez en Picardie, contre les Anglois de Calais, & pour resister à la descente, que aucunes fois ils faisoient. La tierce, feut enuoïée en Lorraine, contre le Duc qui auoit fait plusieurs excez, au preiudice du Roy, & de ses subiets.

L'an mille quatre cents & six, vn nommé Mahiet de Ruilly, 1406. sergent à cheual au Chastellet de Paris, disoit, & auoit dit plusieurs & diuerses fois, de tresdeshonestes paroles touchant la foy. Pour laquelle cause, le vingtcinquiesme iour de May, feut presché au paruis nostre Dame. Et persista ce nonobstant en plusieurs erreurs, parquoy le seiziesme iour de Decembre, feut ars & brulé au marché aux pourceaulx.

Le seiziesme iour de Iuin, entre six & sept heures au matin, feut eclipse de Soleil bien merueilleuse, qui dura pres de demie heure. Et ne veoit on quelque chose que ce feust, non plus que s'il eust esté nuit, & default de Lune. Et estoit grand pitié de veoir le peuple se retraire dedans les Eglises, & cuidoit on que le monde deust faillir. Toutesfois la chose passa, & feurent assemblez les Astronomiens, qui dirent que la chose estoit bien estrange, & signe d'un grand mal aduenir.

Et tantost apres, y eut vents terribles, & horribles, qui arrachioient arbres portans fruiets, & autres gros arbres es foreits. Et si y eut grelle au Lendit, & à Saint Denys, merueilleuse, & grosse. L'une, comme vn homme hale le poing, & comme vn pain d'un denier, l'autre, comme les deux poings, & aucune,

E e ij

1406. comme œufs d'oye. Et y eut foison de bestail mort aux chāps, & oiseaux aux bois, & plusieurs cheminées, & maisons abbatiues. Et feit la dicté gresle des dommaiges beaucoup.

Le vingt-neufiesme iour de Iuin, Philippes, second fils du Roy, espousa la fille du Comte de Hainault, & Isabeau, la fille du Roy, laquelle auoit esté mariée au Roy Richard d'Angleterre, feut conioincte par mariage, avec Charles, fils du Duc d'Orleans. Et pleuroit fort la dicté Isabeau, laquelle estoit assez de bon aage, comme de douze à treize ans, & Charles au dict temps n'auoit que onze ans. Et feurent les nopces à Senlis grandes, & notables. Et ce faict, la Comtesse de Hainault, emmena avec elle en Hainault le fils du Roy.

Vn Cardinal, feut enuoié d'Auignon, deuers le Roy, & les Seigneurs du sang, de par Benedict. Et feit vne proposition belle, & notable de par Benedict, en le loüant merueilleusement, & en blasmant l'ellection de Innocent, qui estoit à Rome, & tout son faict. Et estoient presens le Recteur de l'Vniuersité, & aucuns deputez, lesquels requirrent d'estre ouys. Laquelle chose par plusieurs & diuerses fois leur feut refusée. Et finalement par importunité eurent audience. Et le dixseptiesme iour de May, proposa Maistre Jean Petit, lequel estoit bien notable Docteur en Theologie, en damnant les faicts de Benedict, & en declarant plusieurs choses, en respondār aux choses & raisons que auoit dit le dict Cardinal, & que subtraction luy debuoit estre faicte, & ainsi le requeroient. Ceux de l'Vniuersité de Thoulouze, auoient faict certaine Epistre, contenant certains poincts, qu'il ne fault ia reciter, laquelle feut damnée le dixseptiesme iour de Iuillet, par Arrest de Parlement. Et cōtre la mesme Epistre proposa Maistre Pierre Plout, en monstrant l'iniquité & mauuaistié des choses contenuës en icelle, en faueur de Benedict. Et feut monstrée aux Aduocats & Procureur du Roy, laquelle veüe, ils conclurent eulx ioindre avec l'Vniuersité. Et sur ce parla bien & haultement, comme il en estoit bien aisié, Messire Jean Iuuenal des Vrsins, en prenant grandes conclusions, tāt contre ceux de l'Vniuersité de Thoulouze, que contre ceux qui l'auoient apporté, en requerant aussi qu'elle feust damnée, & deschirée. Et en effect, les conclusions du Procureur du Roy feurent adiugées. Et la chose venüe à la cognoissance du Cardinal, & de ceux qui l'auoient ap-

porté, ils s'en partirent bien hastiuement, & s'en allerent dont ils estoient venus. Et le Sabmedy septiesme iour d'Aoust, feut faicte subtraction à Pierre de la Lune, en tant qu'il touchoit les finances, & defendu qu'on n'en portast aucunement hors du Royaume. Et ordonna on à ceux qui auoient la garde des passages, tant par ponts, que par bacs, & bateaux, qu'on visitast ceux qui passeroient, à sçauoir s'ils porteroient aucunes finances. Et à l'occasion de ce, le Roy en eut plusieurs grands profits. Et à faire seeller la dicte lectre, y eut de grands difficultez, car ceux qui tenoient la partie de Benedict, donnoient de grands empeschemens. Et finalement Messire Charles de Sauoisi, feit telle & si grand diligence, que les lectres feurent seellées, & publiées, & lors feut fort en grace de l'Vniuersité de Paris. Et au regard de faire subtraction, feut dict, que tout furséerroit iusques à la Toussaincts. Et touchant le faict de l'Eglise, & Pierre de la Lune, feurent mandez tous les Prelats du Royaume de France, & du Daulphiné, tant Archeuesques, que Euesques, Abbez, & Chapitres, à estre à Paris à la saint Martin d'hyuer ensuiuant.

Et pource que à Paris, y auoit tousiours aucuns grommelis, entre les Ducs d'Orleans, & de Bourgongne, feut ordonné, que comme du temps de Philippes le hardy, Duc de Bourgongne, son fils iroit à Calais, & le Duc d'Orleans, en Bourdelois. Et s'en partirent, en intention d'accomplir ce qui leur auoit esté ordonné. Et s'en partit le Duc de Bourgongne, & s'en alla en Flandres, & es marches de pardelà, faire ses preparatoires. Et à Bruges en Flandres, en ce temps y eut vne grande diuision, mais le Duc appaisa tout, & trouua la chose bien difficile d'assieger Calais. Et veu le temps pluuieux, & que c'estoit sur l'hyuer, feut aduisé, qu'il ne seroit pas possible, qu'il en peust istre à son honneur. Si garnit les places Françoises d'enuiron Calais, & y meit gens de guerre, qui souuent courroient deuant Calais, & aussi faisoient les Anglois sur les François. Et au regard du Duc d'Orleans, il feut en Bourdelois, & meit le siege à Bourg, & à Blaye, & auoit belle, & grand compaignée. Mais le temps si mal se disposa, que par son ost à peine pouuoit on aller, & estoient les gens en la boüe iusques aux genouils, & si se commençoit aucunement à mourir. Et pource luy, & sa compaignée, feurent cōtraincts de eulx en retour-

1406. ner à Paris, lequel retour luy cousta cher, côme apres sera dict.

A la Saint Martin d'hyuer, feurent assemblez, comme dict est, & mandez les Prelats de par le Roy, lesquels y veindrent bien diligemment. Et estoit grand chose, du peuple qui estoit lors à Paris, tant à cause des dicts Prelats, comme des Chapitres, & autres gens d'Eglise.

En ce temps, les Comtes d'Alençon, & de Clermont, & le Connestable, meirēt le siege deuant vne place nommée Brantonne, qui estoit forte place. Et y auoit dedans de vaillants Anglois, & Gascons. Et pour lors en Guyēne, auoit des Capitaines Anglois renommez, puissans & vaillans en armes. L'un, nommé Pierre le Biernois, l'autre Archambault de Rauffac, lesquels delibererent de venir leuer le siege, & assemblerent foison de gens, & se meirent ensemble, en intention de frapper sur les dicts Seigneurs, lesquels feurent de ce aduertis, & delibererent de les combattre. Et pour ce faire, se leuerent de leur siege, & vindrent au deuant des dicts Anglois. Et se meirent tant d'un costé que d'autre, en belle Ordonnance, & rencontrerent les vns les autres, & à l'abborder, y eut mainte lance rompüe. Et apres ce que la chose eut aucunement duré, & qu'ils eurent fort combatu tant d'un costé, que d'autre, & tellement qu'on ne scauoit, lesquels auoient le meilleur, Pierre le Biernois, se commença à retraire, & mettre en fuite, & par ce, obtindrent les François leur intention, & feurent les Anglois desconfits. Et disoit on, que si le dict Biernois ne se feust retrait, & qu'il eust tousiours tenu pied, & aussi ses gens, que la besongne eust esté bien perilleuse de la partie des François. Et y feut pris le dict Archambault de Rauffac, & huit vingts autres prisonniers, & neuf vingts de morts. Et quand ceux de Brantonne, veirent la desconfiture de leurs gens, ils se rendirent, & meirent en l'obeissance du Roy. Et le dict de Rauffac, rēdit sa propre place de Rauffac avec trois autres, & si feut mis à finance à vingt mille escus. Et apres ce, les dicts deux Comtes d'Alençon, & de Clermont, s'en retournerent à Paris: mais le Connestable demeura au pays. Et s'assemblerent les François apres la dictē desconfiture, en plusieurs & diuerses parties, & gaignerent plusieurs places. Et mesmement en la compaignée du dict Connestable, les vnes par force, & les autres par composition.

Et combien que grandes finances feussent exigées, tant de tailles,

tailles, que gabelles, quatriefmes, & impositions, toutesfois el- 1406.
les estoient mal distribuées, & les applicquoient les Seigneurs
& ceux qui en auoient le gouuernement, à leurs plaisirs, &
profits. Et tellement, que à grand difficulté, le Roy, & la Roy-
ne, en auoient, ou pouuoient auoir pour leur despenfe ordi-
naire, & aussi leurs enfans pour leurs necessitez.

En ce temps, Messire Charles de Sauoisi, assembla des gens
de guerre en assez competent nombre, & feir equipper vais-
seaux d'armes. Et à Boulongne, & enuiron ces marches, se meit
sur mer, en intention de trouuer les Anglois, pour les dom-
maiger s'il eust peu. Et de faict, il les trouua à la bouche de la
Tamise, c'est à sçauoir enuiron le lieu où la dicte riuere en-
tre en la mer, en cinq nefz bien equippees, & emparées, &
entre les autres, y en auoit vne bien grande. Si s'assemblerent
vaillamment tant d'un costé, que d'autre, & dura la meslée
assez long espace de temps. Et finalement les François eu-
rent victoire, & feurent les Anglois desconfits. Et y eut
cinq cents de morts, & trois cents prisonniers, amenez avec
leurs nefz. Et disoit on communément, que luy & ceux de sa
compagnée, sy estoient vaillamment portez.

Or fault retourner à la matiere de l'Eglise, pour laquelle les
Prelats, & autres, estoient assemblez à Paris, où il y auoit de
bien notables clerics, qui n'estoient pas tous d'une opinion.
Car les vns soustenoient Benedict, & les autres disoient,
qu'on le debuioit desappoincter, & que c'estoit par luy, que en
l'Eglise n'auoit vnion, & que la subtraction estoit necessaire.
Finalement feut appoincté par le Roy en son grand Conseil,
qu'on esliroit douze clerics Theologiens, & Canonistes. Dont
les vns soustiendroient le faict du Pape, & que à luy faire
subtraction, toucher en rien ne se pouuoit, ou debuioit fai-
re, & les autres, soustiendroient le contraire. Et que ce faict,
le Roy auroit avec eulx mesmes, & ceux de son sang, conseil,
qu'il auroit à faire. Lequel appoinctement pleut à tous. Et
feurent choisis les douze, esleus, & nommez. Et premiere-
ment y eut deux propositions faictes de par l'Vniuersité de
Paris. Dont la premiere feut vn notable Docteur, de l'Ordre
Saint François, nommé Maistre Pierre aux bœufs, natif de
Paris. Et preint son theme, *Aleliis omnes filij Israel, decernite quid
facere debeatis.* Iudic. xii. cap. lequel il deduisit bien grande-

1406. ment & notablement. Et apres à vne autre iournée, proposa Maistre Iean Petit, vn Docteur en Theologie seculier, bien notable clerc, & print son theme, *Recedite à tabernaculis impiorum hominum, & nolite tangere ea, quæ ad eos pertinent; ne intoluamini in peccatis eorum.* Et tendoient tous les dicts deux proposans, à ce que Pierre de la Lune, debuoit ceder, & que s'il ne cedit, on luy debuoit faire subtraction. Et que le Roy, en son Eglise de France, pouuoit pourueoir par ses Prelats, à la collation des benefices, qui cheoient en collation, & aux eslections, de ceux qui cheoient en eslection.

Et le Sabmedy du premier Dimanche de l'Aduent, au dict an mille quatre cents & six, proposa Messire Pierre de Cramault, Patriarche d'Alexandrie, & Euesque de Poitiers, & print son theme, le premier chapitre de Ozée, *Congregati sunt filij Israel, & Iuda, ut ponant sibi caput vnum.* Et le deduisit bien & grandement, en soustenant l'opinion del'Vniuersité dessus declarée, par les proposans dessus dicts. Et apres qu'il eut fini, le Chancelier demanda à ceux qui debuoiennent tenir le parti du Pape, s'ils estoient prests, lesquels demanderent delai. Et leur feut dit expressément, qu'ils veinssent le Lundy ensuiuant, ce qu'ils feirent.

Et proposa Maistre Guillaume Fillastre, vn bien notable Legiste, & Canoniste, lequel estoit Doyen de l'Eglise de Rheims, & preint son theme, *Manete in dilectione mea.* Io. xxv. cap. Et le deduisit, tendant à monstrier, qu'on ne debuoit point toucher à contraindre Benedict, à faire cession, ne luy faire subtraction. Et parla aucunement trop, comme on disoit, en diminuant l'auctorité & puissance du Roy, & de l'Eglise de France. Et que le Roy estoit subiect au Pape, & ne pouuoit faire, ne conclurre, ce que l'Vniuersité, & les proposans deuant dicts, demandoient, & requeroient. Mais il ne respondit point aux raisons, & mouuemens des proposans dessus dicts. Et pource feut dict, que à vn autre iour ceux qui tenoient le parti du Roy, y respondroient.

Et le Sabmedy ensuiuant, quatriesme iour de Decembre, proposa vn bien notable Prelat, Archeuesque de Tours, surnommé du Brueil, lequel print son theme, *Principes populorum congregati sunt cum Deo Abraham, quia Dñi fortes terræ, vehementer eleuati*

sunt. In illo Psalmo , omnes gentes. Et respondit bien & grandement aux raisons de ceux qui maintenoient , que le Pape Benedi&ct , ne debuioit ceder , ou qu'on ne luy debuioit faire substra&ction. 1406.

Après , le onzi&esme iour de Decembre , en soustenant le fai&ct du Pape , proposa vn tref-excellent Do&cteur en Theologie , nomm&é Maist&re Pierre d'Ailly , Euesque de Cambrai , & depuis Cardinal , lequel print son theme , *Pax Dei , quæ exuperat omnem sensum , custodiat corda vestra , & intelligentias vestras.* ad Philippenf. 4. cap. Et le deduisit , comme il estoit bien aisi&é , & mon&stroit que pour ceste matiere , on debuioit faire vn Concile general. Et que proceder , par les matieres ouuertes , il sembloit , que ce seroit chose non raisonnable , ne possible à faire. Et pour ce que le Roy , & aucuns de son sang , estoient trefmal contents du Doyen de Rheims , à cause d'aucunes choses par luy allegu&ées , la di&cte proposition finie , il se voulut en toute humilit&é excuser , & print son theme , *Locutus sum in lingua mea , notum fac mihi Domine , finem meum.* Et qui eust creu aucuns du sang , & autres ieunes , on luy eust fai&ct vne trefmauuaise compaign&ée. Mais il parla si humblement , & doucement , qu'on pourroit faire , en priant , & requerant qu'on luy voulust pard&oner pour ceste fois. Et pour lors , ne luy feut fai&cte aucune responce , combien que hors du Conseil , on luy mon&stra bien , qu'il auoit mal parl&é , & qu'il ne luy aduint plus. Et feut receu en grace , comme deuant.

Ceux qui tenoient le parti de l'Vniuersit&é de Paris , après proposerent par la bouche d'un notable Prelat bon clerc , Do&cteur en Decret , Abb&é du mont Sain&ct Michel , & print son theme , en la presence du Roy , *Da mihi auxilium de tribulatione.* Psalm. 69. & cap. canones , xv. disti&nt. Tendant à la fin , que tendoit l'Vniuersit&é de Paris , & allegua plusieurs notables auct&oritez. Et en ensuiuant leur matiere , proposa vn tref-solemnel Do&cteur en Theologie , nomm&é Maist&re Piere Plout , & print son theme , *Conuertantur retrorsum omnes , qui oderunt Syon ,* in Psalmo , Sæpe expugnauerunt. Et mon&stra bien la puiss&ance du Roy , en telles matieres , & respondit bien & grandement à plusieurs raisons allegu&ées par les parties aduerses. Et la proposition finie , se leua le di&ct Fillastre , Doyen de Rheims , & repliqua à ce qui auoit

1406. esté dict contre luy, & ses adherens, & print son theme, *Obmutui & filii à bonis, quia dolor meus renouatus est*, en soustenant son faict, & ceux de sa partie. Et pource qu'on auoit fort chargé le Pape Benedict de plusieurs abus, qu'on disoit par luy auoir esté faicts, le dict Doyen y respondit. Et lors le Patriarche Cra-mault aussi voulut replicquer. Et pource que le dict Doyen en sa premiere proposition, auoit prins en son theme, *Manete in dilectione mea*, il print ce qui s'ensuyt au chapitre, *Si seruaueritis mādāta mea, manebitis in dilectione mea*, & le deduisit à son bon plaisir. Et l'Archeuesque de Tours, voulut aussi repliquer, & feut ouy en la presence du Roy, & print son theme, *Deus iudicium tuum Regi da, & iustitiam tuam filio Regis*. Psalm. 61. Et monstra fort qu'on ne debuoit point faire de subtraction à Benedict. Mais, Maître Iean Petit, qui auoit proposé vne autre fois, voulut encores proposer, & print son theme, en adioustant au theme de Monsieur de Cambrai, *In Domino Iesu Christo*. Et feut la finale proposition. Laquelle finie, feut dict par le Chancelier de France, Lundy parleront les Aduocats & Procureur du Roy, par la bouche de Maître Iean Iuuenal des Vrins, premier Aduocat du Roy.

Lequel à la iournée print son theme, *Viriliter agite, & confortetur cor vestrum, omnes qui speratis in Domino*. Psal. 31. lequel il deduisit bien grandement, & notablement. Et principalement monstra deux choses. L'vne, la puissance du Roy de France, qui est le bras dextre de l'Eglise, & qu'il luy loist, & doit assembler les personnes Ecclesiastiques de son Royaume, touchant le faict de l'Eglise, pour auoir conseil, & en iceluy presider comme chef, quand il en est requis, & sans aucune requeste de personne, si bon luy sembloit, comme au cas qui s'offroit, où il auoit esté requis de par l'Vniuersité, & aucuns Prelats, & personnes Ecclesiastiques. Et que sans supplication de personne, quand il verroit estre expedient, le pourroit faire, & en iceluy conclurre, & faire executer, ce qui seroit conclud & aduisé en iceluy Conseil. La deuxiesme chose, il monstra plusieurs notables raisons, par lesquelles on se debuoit adherer à la requeste de l'Vniuersité de Paris, & de ceux qui auoient parlé à son intention en la matiere, en repugnant, & reprimant aucunes choses, qui auoient esté alleguées au contraire. Et par ce, feurent les matie-

res bien debaties d'un costé, & d'autre, & ne restoit qu'à dire leurs opinions. Et estoit moult belle, solemnelle, & notable chose, de ouyr les raisons des opinans. Aussi en toute Chrestienté, on eust bien failli à trouuer plus notables clerics. Et finalement feut ouuert & aduisé, qu'il estoit necessité d'auoir un Concile general, pour reformer l'Eglise tant en chef, qu'en membres. Et pour abbreger, feut fait subtraction à Pierre de Lune, dict Benedict, & l'Eglise de France reduite à ses anciennes libertez & franchises. Et que les Ordinaires, donneroient les benefices estans en leurs collatiōs, & aux electifs, on pouruoyeroit par eslection, & confirmations, selon le droit ancien escript. Et feurent faictes nominations, tant pour les Officiers du Roy, que pour l'Vniuersité, & personnes Ecclesiastiques.

Et le seiziesme iour de Ianuier, y eut vne notable procession faicte à Paris, en laquelle y auoit bien soixante quatre tant Archeuesques, qu'Euesques, & d'Abbez foison. Et disoit-on, que à Paris auoit lors, de deux cents à douze vingts Archeuesques, Euesques, & Abbez, & Docteurs, & Licentiez sans nombre, lesquels feurent en la dicte procession. Et y feurent les Ducs, Comtes, & Barons. Si peut-on penser, que c'estoit belle chose à veoir.

En ce Careme, l'Annonciation nostre Dame, feut le Vendredy saint. Et dit-on, que quand elle eschet le iour du dict Vendredy, qu'il y ha pardon general de peine, & de coulpe au Puy. Et y feut tant de monde, & de peuple, que merueilles. Et y eut bien deux cents personnes mortes, & estainctes.

Grands murmures, plainctes, & haines couuertes, couroient tousiours à Paris, dont grand mal s'en ensuiuit.

Au dict an mille quatre cents & six, il vint à la congnoissance du Comte de Hainaut, que le Roy estoit en bonne santé. Et s'en vint à Paris deuers le Roy, lequel le receut grandement, & honorablement. Et bien humblement remercia, & regrantia le Roy, de l'alliance qu'il luy auoit plu faire de sa fille, en soy offrant au seruice du Roy, & aux siens. Et le Roy, pour plus entretenir l'amour du dict Comte, & estre en son seruice, luy donna quatre mille liures de rente, sur la recepte de Vermandois. Et outre, pour estre de son conseil, par maniere de pension luy ordonna six mille liures, que ceux de Tournai, deb-

1406. uoient par chascun an au Roy, laquelle chose, venüe à la congnoissance des habitans de Tournai, delibererent qu'ils ne le souffriroient point. Et disoient que dés long temps la dicté somme se debuoit emploier en l'aumosne du Roy. Et pour cesté cause enuoierent deuers le Roy, & feirent tant qu'ils obtindrent ce qu'ils demandoient.

Et y eut vn mariage faict de la fille du Duc de Bourgongne, & du Comte de Pointhieure, fils de la fille de Messire Oliuier de Clifson, jadis Connestable de France.

Quand le Duc de Lorraine sceut que le Roy estoit mal content de luy, & qu'il enuoioit gens d'armes au pays, pour luy faire guerre, & resister aux entreprises qu'il faisoit contre le Roy, & les droicts de sa Couronne, Il enuoia deuers le Roy vne bien notable Ambassade, en priât au Roy, qu'il feust en sa grace. Et de tout ce qu'il pouuoit auoir faict, il se meit au iugement du Roy, & de sa Court. Et pource les gens d'armes, qui y estoient enuoiez, s'en retournerent.

L'autre armée, comme dict est, feut enuoïée en Picardie, où il y eut plusieurs courtes entre les Anglois, & les François, sans faire comme nul dommaige les yns aux autres, & quoy que ce soit, les Anglois y eurent peu de dommaige. Et pource qu'il y auoit és dictes marches, vne place nommée Belingault, laquelle leur portoit grand dommaige par fois, les dicts Anglois y bouterent le feu, & la raserent. Puis meirent le siege à Guines, où estoient les François, & y feirent de durs assauts, mais ceux de dedans vaillamment se defendoient. Et y auoit souuent tant d'un costé, que d'autre, beaux faicts d'armes. Et finalement les dicts Anglois honteusement se leuerent. Et és dictes marches estoient le Seigneur de Saint George de Bourgongne, Messire Philippes de Ceruolles, son neueu, & autres cheualiers, & escuiers, lesquels souuēt couroient sur ceux qui tenoient le siege. Les Anglois delibererent vn iour de faire course deuant la place, où estoient les François, & meirent vne embusche, & deuant enuoierent vingt de leurs gens, bien armez & montez, courir deuant les François. Messire Philippes de Ceruolles, qui estoit vaillant cheualier, saillit hors, & autres de sa compaignée, & en escarmouchant, chasserent tellement les Anglois, qu'ils passerent outre leur embusche, de laquelle les Anglois saillirent. Et feut pris le dict de

Ceruolles, & le menerent à Calais. La chose venüe à la con- 1406.
 gnoissance du dict Seigneur de Saint George, cuidant trou-
 uer les moyens de rencontrer les Anglois, & rescourre le dict
 Philippes, faillit hors bien & vaillamment: mais rien ne feit.
 Car les dicts Anglois s'estoient ja retraicts avec leur prise, de-
 dans leur ville, & place de Calais. Et s'en retournerent ceux
 qui y estoient enuoiez, sans autre chose faire.

En Guyenne, tousiours se faisoient exploicts de guerre,
 & au partir de Briancourt, les François assiegerent vne place
 bien forte, nommée Flouc. Et quand ils eurent esté deuant
 par aucun temps, ils feirent tant, que par force ils eurent la di-
 cte place. Et de là s'en allerent deuant Limeuil, & y liurerent
 plusieurs assauls. Et finablement par composition les Anglois
 rendirent la place, & y trouuerent les François foison de
 viures, & autres choses à eux necessaires, qui leur feut vn
 grand confort, & consolation, & là grandement se raffreschi-
 rent. Et depuis allerent deuant Mussiden, bien forte place.
 Et quand ils y eurent esté par aucun temps, & fait plusieurs
 & diuers assauls, vn cheualier François qui auoit espou-
 sé la fille du Seigneur du dict Mussiden, feit tant, que la
 dicte place feut mise en la main du Roy, & en son obeis-
 sance.

Ceux d'Angleterre, qui estoient desplaisans de la mort du
 Roy Richard, s'assemblerent vers les marches de Galles, & en-
 uoierent vers le Roy vne Ambassade, en demandant aide &
 confort de gens, à véger la mort du Roy Richard. Et feirēt vne
 proposition bien notable, en damnant la tresinique & detesta-
 ble mort du dict Richard. Et en montrant que de tout temps,
 le Royaume estoit venu par succession, & non mie par esle-
 ction, & debuioient succeder les plus prochains. Et que à Hen-
 ry de Lenclastre, supposé qu'il n'eust commis le meurtre en la
 personne de son souverain Seigneur, toutesfois le Royaume
 ne luy debuoit competer ne appartenir. Mais en debuoit estre
 Roy, comme plus prochain, le Comte de la Marche d'Angle-
 terre. Et feurent ouys bien au long, puis eurent response, que
 le Roy estoit prest, & appareillé de leur aider, mais qu'ils
 feussent fermes en leur opinion. Et leur feit le Roy donner
 bien largement de ses biens, & s'en retournerent en Angle-
 terre.

1406.

En ce temps, c'estoit grand pitié de veoir le gouuernement du Royaume. Les Ducs prenoient tout, & le distribuoiẽt à leurs seruiteurs, ainsi que bon leur sembloit. Et le Roy, & Monseigneur le Daulphin, n'auoient de quoy ils peussent soutenir leur moyen estat. Et s'en allerent les Ducs, comme dessus a esté touché. Et s'en alla le Duc d'Orleans à Saint Denys, & requit à veoir le chef de Monseigneur Saint Denys à nud, & luy feut monstré. Et disoient les Religieux qu'ils l'auoient tout entier, & ceux de nostre Dame de Paris, disoient qu'ils en auoient vne grand partie. Et sur ce, y eut grand debat, & proces. Le Duc de Bourgogne, s'en retourna de deuers Calais, sans rien faire, dont en la presence du Roy il s'excusa grandement. Et dit, qu'il s'en estoit retourné, car aucun payement ne se faisoit à ses gens. Et disoit que le Roy de Sicile, en Anjou, & au Maine, auoit pris l'argent de toutes les tailles, & aides, lequel luy estoit ordonné pour payer ses gens, & que rien n'en auoit peu auoir, & que le Duc d'Orleans auoit le deueurant. Et au regard du Duc d'Orleans, qui alla en Guyenne, veu que l'hyuer approchoit, luy feut conseillé, qu'il laissast passer l'hyuer, lequel estoit tres-pluieux, & que en la nouuelle saison, il feist sa guerre. Et ce, luy conseillèrent les vaillans & anciens cheualiers, & escuiers, estans avec luy. Mais les ieunes gens, non bien stilez en armes, luy conseillerẽt le contraire, & creut leur opinion, dont ne s'en ensuiuit pas bonne issue. Et de fait, assiegea Blaye, qui estoit vne forte place, bien garnie de viures, d'artillerie, & de gẽs de guerre. Et en auoient plus largement, que ceux de dehors qui tenoiẽt le siege, lesquels ne pouuoient auoir viures, sinon de la Rochelle, par la mer. Et vne fois entre les autres, leur venoit grand foison de viures, & artillerie du dict lieu, & enuoia au deuant pour les conduire iusques à l'ost, trois cents combatans. Ceux de Bordeaux qui estoient sur la mer, lesquels faisoient tous les iours diligence de greuer les François, les rencontrèrent, & combattirent d'un costé, & d'autre bien vaillamment, par l'espace de deux heures. Et y en eut, d'un costé & d'autre plusieurs naurez & blesez, Et de fait, feurent les François desconfits. Et y en eut plusieurs de morts, tant de noyez que autrement, & de pris, six vingts, & les autres s'en retournerent en l'ost. Et s'en retourna le Duc d'Orleans, & leua son siege, dont on ne luy donna point d'honneur. En

sa

la compaignée, auoit vn vaillant cheualier, nommé Messire Robert de Charlus, lequel estoit moult desplaisant de ce que on s'en alloit sans rien faire. Et enhorta plusieurs gentils compaignons, à faire quelque chose auant qu'ils s'en retournassent. Et delibera d'aller assieger vne place, qu'on tenoit forte, & comme imprenable, nommée Lourde. Et de fait, luy, & la compaignée y allerent, & iurèrent que iamais n'en partiroyent, iusques à ce qu'ils eussent la place, sinon que par force ils feussent combatus. Et y tindrent le siege vn an entier, & eurent beaucoup de malaises, tant pour occasion des neiges, lesquelles au dict an feurent moult grandes, & excessiues, comme par default de viures, car à grand peine en auoient. Et finalement ceux de dedans voyans qu'ils n'auoient aucun secours, & que viures leur failloient, rendirent la place au Roy. Laquelle entreprinse, & qu'ils en estoient venus à leur intention, sembla à ceux qui sy congnoissoient, estre au bien grand honneur des François.

Comme dessus ha esté touché, substraction feut faicte à Pierre de Lune, le dix-huictiesme iour de Feburier, non mie du consentement de tous. Car l'Archeuesque de Rheims, & plusieurs autres estoient d'opinion, & soustenoient qu'elle ne se debuoit point faire. Et cependant vindrent nouuelles, que l'Antipape Innocent estoit mort à Rome. Et auant que les Anticardinaux procedassent à faire quelque eslection, ils firent certains grands sermens, touchant d'auoir vnion en l'Eglise. Et iceux faicts, procederent à leur eslection, & en eleurent vn, qu'ils tenoient pour Pape, nommé Gregoire douziesme. Et apres la coronation, luy, & les Anticardinaux eleurent la voye de cession, & delibererēt que c'estoit la meilleure, & la plus seure voye, qui se peüst trouuer, & comme la plus nécessaire, l'approuerēt. Et enuoia Gregoire à Benedict sur ce vne Bulle bien faicte, & pareillement à tous les Roys, & Princes Chrestiens, de la date de la douziesme Calende de Nouembre. Benedict receut l'Ambassadeur de Gregoire, biē grandement, & honnorablement, & luy feit vne tresbonne chere. Et les deuxiesmes Calendes de Feburier, feit vne tres-gratieuse response, en monstrant tout signe d'auoir volonte, d'entendre à l'vnion de l'Eglise. Le Roy, & tous ceux de son sang, & Conseil, feurent bien ioyeux, quand ils apperceurent que Gregoire

G g

1406. auoit ceste volenté. Et feurent d'opinion, qu'il estoit necessité de poursuiure la matiere iusques à la conclusion. Et feurent ordonnées plusieurs Ambassades, pour enuoier tant deuers Gregoire, que Benedict, & belles & notables Instructions. Et faisoit on toutes les diligences, qu'on pouuoit faire en ceste matiere. Et derechef escripuient lettres à Benedict, & aux Princes Chrestiens, du huietieme iour de Mars, en monstrant tous signes d'auoir grande affection à l'vnion de l'Eglise. Ce nonobstant, plusieurs tant Prelats, que de l'Vniuersité, poursuiuoient tant qu'ils pouuoient, que la subtraction faicte à Benedict, feust publiée, & y procedoient aucuns bien rigoureusement, & aigrement. Mais ce nonobstant, pource qu'aucuns disoient, qu'il auoit escript si gracieusement à Gregoire son aduerfaire, monstrant grands signes de volenté, d'entendre à l'vnion de l'Eglise, feut conclud que rien ne se feroit, iusques à ce qu'on eust eu la response des Ambassadeurs, qui estoient allez deuers luy de par le Roy.

1407. L'an mille quatre cents & sept, mourut Oliuier de Clifson, le vingt-quatrieme iour d'Auril, qui auoit esté Conestable de France, moult vaillant cheualier. Et l'appelloit-on le boucher, pource que és besongnes, où il estoit contre les Anglois, il en prenoit peu à rançon, & de son corps faisoit merueilles en armes. Et trouue-on, qu'il feut né le iour de S. George, & faict cheualier aussi le iour de S. George, & encores qu'il mourut la veille, ou le iour de Sainct George. Et est celuy, que batit à Paris Messire Pierre de Craon, Duquel de Craon, en reparation d'iceluy meffai, la representation est en vne croix, deuant le gibet de Paris.

En ce temps, cheur tant de chenilles, de limaçons, & autres vermines, que toutes les fucilles, & herbes des grains, feurent, comme routes du tout mengées, & gastées.

Le seiziesme iour d'Octobre, Tignonuille, Preuost de Paris, fait prendre deux cōpaignons, de tresorde, & deshonneste vie, lesquels auoient commis plusieurs delicts, crimes, & malefices, Et les fait pendre, combien qu'ils se deissent clerks, & aussi estoient-ils. Et feut faicte grande poursuite par l'Vniuersité, & aussi par l'Euesque de Paris, contre le dict Tignonuille.

En ce mesme temps, plusieurs choses se faisoient par les Scigneurs, comme prinse de bleds, & de vins sur les riuieres, &

autres viures, & se faisoient plusieurs mengeries, par les Officiers particuliers, & pource par le Roy, & son Conseil, feut ordonné que telles manieres ne se feissent plus, & feut crié publicquement à son de trompe, que plus ne se feist.

Toufiours y auoit quelque grommelis entre les Ducs d'Orleans, & de Bourgongne, & souuent failloit faire alliances nouuelles. Et tellement que le Dimanche, vingtiesme iour de Nouembre, Monseigneur de Berry, & autres Seigneurs, assemblerent les dictz Seigneurs d'Orleás, & de Bourgongne, & ouïrent messe ensemble, & receurent le corps de nostre Seigneur. Et prealablement iurerent bonne amour, & fraternité ensemble: mais la chose ne dura guieres. Car le Mercredy ensuiuant au soir, vn nommé Raoulet d'Ostouille, s'embuscha en vn hostel, en la rue de barbette. Et s'estoit allé esbatre le dict Duc d'Orleans, au dict hostel de barbette, auquel on disoit que la Royne estoit. Et en s'en retournēt pour aller à son hostel, le dict Raoulet accōpagné de dix ou douze cōpaignons, faillist, & bailla au dict Duc d'Orleans plusieurs coups, & luy fendit la teste, luy coupa le poing, & le tua, & mourut. Et y eut vn de ses seruiteurs, Allemand, qui se iecta sur son maistre, pour le cuider guarentir, qui feut tué avec luy. Et pour lors, on ne sçauoit qui l'auoit tué, & disoit-on que ce auoit esté le Seigneur de Canny, pource qu'on disoit qu'il luy auoit osté sa femme. Ne iamais on ne eust pensé, que ce eüst fait faire le Duc de Bourgongne, veu les sermens qu'ils auoient faicts, & alliances, & autres amitez promises, & receptiō du corps de Iesus-Christ. Et si feut à l'enterrement vestu de noir, faisant dueil bien grand, cōme il sembloit. Et dient aucuns, que le sang du corps se escreua. Et feut enterré aux Celestins, en vne belle Chappelle, qu'il auoit fait faire. Et le Sabmedy matin, le Duc de Bourgongne, alla parler au Roy de Sicile, & au Duc de Berry, qui estoient ensemble à Nesle, lequel leur confessa le cas, disant qu'il l'auoit fait faire. Et lors le Duc de Berry luy dit, qu'il feroit bien de s'en aller, & partir. Et aussi il s'en alla monter à cheual, & partit de Paris.

Le vingt-huictiesme iour de Decembre, il y eut vne maniere de liēt de Iustice tenu, où on feit plusieurs Ordonnances. Et entre les autres, pource qu'on veoit le Roy souuēt malade, fut ordonné, que si le Roy alloit de vie à trespassemēt, que son fils

1407. aîné, quelque aage qu'il eust, seroit couronné, & sacré en Roy. Et que le Roy estant essonné de maladie, le Daulphin son fils aîné regenteroit, & comme Regent gouverneroit.

En ce temps, y eut merueilleuses gelées, & feut toute la riuere de Seine, prinse tellement, que de la Cité, on alloit en greue, & de Saint Bernard aussi, & passioient chariots, & charrettes par dessus, comme ils eussent peu faire en plaine terre. Et en Ianuier, la glace se despeça, & rompit, & s'en alloient les grands glaçons, qui feirent maux infinis, & mesment rompirent ils aucuns des ponts de Paris. Et y eut vne chose merueilleuse, car on veid venir vn grand glagon, sur lequel auoit vn enfant, & diét aucuns qu'il estoit en vn vaisseau. Et y eut gens, qui se meirent en grand diligence de le sauluer, & de fait le sauluerent.

La Duchesse d'Orleans, vint à Paris, pour soy plaindre au Roy de la mort de son mari: mais pour lors elle ne feut guieres. Apres ces choses, le Duc de Bourgogne vint à Amiens. Et deuers luy allerent le Roy de Sicile, & le Duc de Berry, le Comte de Tancauille, & Montaigu. Qu'ils feirent ensemble, on ne sceut, sinon eulx mesmes. Excepté que le Duc de Bourgogne dit, que ce qu'il auoit fait faire de la mort du Duc d'Orleans, il auoit bien fait, & s'en excuseroit bien. Et s'en vint le dict Duc iusques à Saint Denys, & là feut par aucun temps, & deuers luy allerent les dictz de Sicile, & de Berry, & le Duc de Bretagne, & plusieurs autres Seigneurs. Et en vn Mardy au mois de Februrier, delibera de venir à Paris, & de fait y veint, accompagné de bien mille hommes d'armes. Avec luy auoit les Ducs de Lembourg, & de Lorraine, & veint deuers la Roynie accompagnée des dictz Ducs. Et feut Monseigneur de Berry vn dîner en son hostel de Nefle, où estoient Monseigneur le Daulphin, & les dictz Seigneurs. Et comme tout publiquement, crioient à Paris, Vive le Duc de Bourgogne. Et y auoit diuers monopoles, & lagaiges. Et le leudy, huietisme iour de Mars, feut faite vne proposiō, par vn Docteur deuant nommé, Maistre Iean Petit, lequel s'efforça de iustifier le cas aduenu en la personne du Duc d'Orleans, frere du Roy, par le dict Duc de Bourgogne, ou par son ordonnance. Et allegua plusieurs cas de diuerses especes, qu'on disoit auoir esté commis par le dict Duc d'Orleans, pour lesquels il disoit

qu'on le debuoit tenir & reputer tyran. Et concludoit qu'il estoit licite à vn chascun de le tuer, ou faire tuer, veu que autrement comme il disoit, ne se pouuoit faire. Laquelle chose sembloit bien estrange à aucunes gens notables, & clerks : mais il n'y eust eu si hardy quien eust osé parler. Et le Vendredy, le dict Duc de Bourgongne vint deuers le Roy, en le priant que de la dicte mort, il le voulust tenir pour excusé, & qu'il ne cuidoit aucunement auoir mal fait. Et en tant qu'il en auroit aucune rancune contre luy, qu'il luy voulust pardonner. Et lors le Roy, benignement & doucement luy pardonna, & faisoit ce qu'on vouloit. Aussi estoit-il aucunement empesché de maladie.

Ceste nuit, le Roy alla couchier avec la Royne, & disoit on, que à cause de ce, il auoit esté plus malade, qu'il n'auoit esté dix ans au parauant. Et vsoit on de diuers langaiges, & merueilleux.

La Royne doubtant que aucune commotion, ou grand inconuenient n'aduint à Paris, s'en alla à Melun, & emmena Monseigneur le Daulphin, sa femme, & tous les enfans avec elle. Et pareillement du dict lieu s'en allerent, & partirent de Paris, le Roy de Sicile, les Ducs de Berry, & de Bretagne, le Connestable, & Montaigu, & plusieurs autres, dont le Duc de Bourgongne feut tresmal content. Et estoit la dicte ville de Melun, bien garnie de gés de guerre. Et enuoia le dict de Bourgongne, vers la dicte Royne, & feut tant par belles paroles, qu'elle feut appaisée.

Messire Clignet de Brebant, Admiral de France, qui estoit à feu Monseigneur d'Orleans, feut desappointé, & Messire Guillaume de Chastillon, Seigneur de Dampierre, faist Admiral en sa place.

En ce temps, y eut vne fille de laboureur, qui feut née sans bras, & iambes, & en autres membres tresbien formée.

En ce temps, grandes diligences se faisoient de l'vniõ de l'Eglise, par tous les Roys, & Princes Chrestiens, desirans fort à auoir vn seul Pape, & vnicque. Gregoire l'Antipape ennoia à Benedict de bien notables, & bons clerks, lesquels eurent audience, & proposerent ce que bon leur sembla, en soustenant leur maistre. Et d'autre costé, de la partie de Benedict, & de son obeissance, on leur respondit bien. Et y eut diuerses paro-

1407. les, d'un costé, & d'autre, aucunement arrogantes, & aspres. Et finalement, feut conuenu que pour estre assemblez, le lieu de Gennes en Lombardie, estoit propre & conuenable. Et de ce, par Notaires presens, ordonné feut faire instrumens publicques, & par gens notables, elleus tant d'un costé, que d'autre, feut ordonné, que instrumens se feroient bien amples, de la maniere de conuenir, & de la garde de la ville, & des personnes & biens de ceux qui-y viendroient, & comparoistroient. Et de ce, spécialement feurent faictes de moult grandes diligences. Benedict auoit esté content de la voye de cession, & par plusieurs & diuerfes fois, tant par le Roy, que ceux de l'Vniuersité, feut sommé & requis, qu'il en baillast ses Bulles: mais oncques il ne le voulut faire, dont on feut bien mal content. Le Roy enuoia vne notable Ambassade à Rome, deuers l'Antipape Gregoire, en luy priant qu'il luy pleust de perseverer en sa prosecution de l'union de l'Eglise, & feirent les Ambassadeurs leur proposition. Mais il sembloit aux manieres que renoit Gregoire, & à ses paroles, qu'il ne queroit que subterfuges, & delais friuoles. Et quand on apperceut ses manieres, on le somma qu'il teinst ce qu'il auoit promis, c'est à sçauoir la voye de cession. Et nulle response n'y feit, dont les Ambassadeurs de Benedict, qui estoient presens, se plaignoient fort, en disant, qu'il tardoit trop à faire sa response. Et à la fin, feit vne response bien maigre, laquelle ne feut point acceptée. Et aussi n'estoit ce qu'une maniere d'eusion, mal coulourée. Et pour ce derechef feut sommé, qu'il declarast sa volonté, & qu'il voulust entendre, & tant faire que en sainte Eglise, y eust bonne, & parfaite union. Mais autre chose les Ambassadeurs n'en eurent. Et pource s'en retournerent deuers le Roy, & ceux qui les auoient enuoyé, & feirent leur relation de ce qu'ils auoient trouué à Rome.

Les prinſes des bleds, auoines, vins, & autres viures, lesquelles se faisoient pour le Roy, & les Seigneurs, se continuoient, & quand les marchands, & pauvres gens, venoient demander leur argent, on ne leur en bailloit point, que d'aduanture la moitié, ou le tiers. Dont les plaintes veindrent au Roy, dont il feut bien mal contēt, & feit defendre, & crier à son de trompe, que plus ne se feist. Toutesfois on disoit que la Royne, & le Duc de Bourgogne, auoient faict audict cry limiter

temps, seulement de quatre ans.

L'Vniuersité tousiours poursuiuoit le faict des clerks, qui auoient esté pendus, dont le Roy ordonna, qu'ils feussent despendus simplement. Mais l'Vniuersité ne feut pas contente:

Paroles s'esmeurent fort en la ville, touchant la proposition de Maistre Iean Petit, des conditions du feu Duc d'Orleans, & plusieurs notables gens, en estoient tresmal contents.

L'an mille quatre cents & huiet, apres la subtraction faicte à Benedict, & les Ordonnances Royaulx mises sus, par lesquelles l'Eglise de France, feut reduicte à ses anciennes libertez, & franchises, feut chose necessaire, de pourueoir à la forme & maniere de conferer les benefices, tellement que les supposts de l'Vniuersité, feussent bien pourueus. Et y eut Ordonnances faictes, belles; & notables; dont tous feurent contents. 1408.

Il y eut en Parlement des procez; touchant les Comtez de Rouffy, & de Brenne; entre le Roy de Sicile, & les vrais heritiers de ceux de Rouffy. Et auoit lóg temps, que la cause estoit introduicte. Et auoit eu le Roy de Sicile, ou ses predecesseurs, la recreance. Et au dict an, ceux qui estoient heritiers, obtindrent le principal.

Au dict an, le cinquiesme iour de May, Messire Guillaume de Tignonuille, qui estoit clerc, & bien notable cheualier, feut desapointé de l'Estat de Preuost de Paris. Et disoit on, que c'estoit pource qu'il auoit faict pendre les dictz clerks, dont dessus est faict mention, dont aucuns l'excusoient. Car il n'auoit rien faict, que par le conseil des gens du Roy de Chasteller, & s'en excusoit bien grandement, & notablement. Mais la vraie cause estoit, pource qu'il frequentoit souuent en l'hostel de feu Monseigneur le Duc d'Orleans, & si ne vouloit pas faire beaucoup de choses estranges, qu'on vouloit qu'il feist, en pretermettant l'ordre de Iustice. Et y feut mis Messire Pierre des Essars, qui estoit de l'hostel du Duc de Bourgogne, lequel en eut vn bon salaire, comme cy apres sera dict en tēps & lieu. Et au regard du dict Tignonuille, il feut ordonné estre President de la chambre des comptes, lai.

Le Lundy quatorziesme iour de Iuin, feut apportée vne Bulle de Benedict, par laquelle il excommunioit, & meitoit tout le Royaume en interdict. Et pource que aucuns disoient, que la conclusion prise l'an mille quatre cents & six,

1408. Il'auoit pas esté deuëment executée, & qu'il y eut diuerses opinions, & que aucuns encôres tenoient Benedicte pour Pape, & qu'il auoit dit, qu'il ne tiendrait chose qui feust deliberée, ny ne céderoit point, Il feut deliberé, que des dictes sentences on appelleroit en diuerses manieres & formes, qui lors feurent aduisees, & si luy feut on subtraction plus ample que parauant.

Pour appaiser l'Vniuersité de Paris, & aussi l'Euesque, sur ce que les clerics, dont dessus est fait mention, auoient esté pendus, feut ordonné, qu'ils seroient despendus, & mis en terre sainte. Parquoy le seiziesme iour de May, feurent despendus, & mis en coffres de bois par le bourreau. Et à processions grandes, & solemnelles, feurent apportez au paruis de nostre Dame. Et de là feurent portez à Saint Mathurin, où ils feurent enterrez. Et pour ceste cause, on sonna toutes les cloches des colleges, & parroisses de Paris.

Le vingt & vniesme iour du dict mois de May, le Roy feut amené au Palais, & feut exhibée la Bulle dessus dicte. Et feut vne notable proposition, vn bien notable Docteur en Theologie, nommé Courtecuisse, & monstra les iniquitez & incivilitez de la dicte Bulle, & la nullité, & publicquement feut deschirée, & dict & déclaré debuoir estre arse, & ainsi feut fait. Et sceut on que à Paris auoit deux hommes estans à Pierre de la Lune, l'un nommé Cousseloux, & l'autre Gosalue, qui auoient apporté la dicte Bulle. Lesquels feurent prins, & emprisonnez, & escharfauldez, & mistrez, & preschez publicquement. Et feut le Sermon, vn notable Docteur en Theologie, Ministre des Mathurins.

Au Liege auoit bien grand debat entre l'Euesque du Liege, & ceux du pays, lesquels s'estoient mis sus, & allerent assieger la ville de Traict, & se tindrent deuant par aucun temps. Mais le Comte de Hainault, à grand puissance entra au pays, & trespiteusement tout destruisit, en faisant tous maux que ennemis ont accoustumé de faire. Et disoit on publicquement, que c'estoit, pource qu'ils vouloient que leur Euesque feust prebste. Lequel Euesque requit aide au Duc de Bourgogne, luy priant qu'il luy voulust aider & secourir, comme son parét, ce qu'il delibera de faire. Et pour ceste cause se partit de Paris, & s'en alla en Artois, & en Flandres, & mada gés de routes parts.

Après le partement du Duc de Bourgogne, la Roynie vint à Paris.

à Paris, le penultiesme iour d'Aoust, bien accompagnée, de deux à trois mille combatans, & Monseigneur le Daulphin avec elle, & s'en vint loger au Loure. Et disoit on qu'elle auoit mandé la Duchesse d'Orleans, qu'elle veinst à Paris, demander Iustice de la mort de son mari.

Le cinquiesme iour de Septembre, cheut à Paris grosse gresle, qui fit maux innumerables, tant aux champs, qu'en la ville, car elle estoit grosse, comme œufs d'oye.

Les Officiers & Conseillers du Roy, estoient en grand soucy, cōme on pourroit pourueoir au gouuernement du Royaume. Le Roy estoit malade, Monseigneur le Daulphin ieune, les Seigneurs en diuision & haine les vns contre les autres. Et feut aduisé, que c'estoit le moins mal, que la Royne presidast en Conseil, & eust le gouuernement, que laisser les choses en l'estat, que elles estoient. Et feut ordonné, que ce se monstreroit par Messire Iean Iuenal des Vrsins, Aduocat du Roy, dont dessus ha esté fait mention, & par le Procureur general du Roy. Laquelle chose, il feut bien grandement, & notablement en la presence de ceux du sang, & des Prelats, & de foison de peuple. Et apres la proposition faicte, feut cōclud, que la Royne, le Roy estant malade, presideroit en Conseil, & auroit le gouuernement du Royaume.

Le vingt-huictiesme iour d'Aoust, la Duchesse d'Orleans, vint à Paris, & la fille du Roy, femme du ieune Duc d'Orleans, avec elle. Laquelle Duchesse estoit moult fort esplorée, & non sans cause. Et s'en vint loger en Behaingne, & les enfans demurerent à Blois. Et le cinquiesme iour de Septembre, la dicte Duchesse bien humblement veint deuers Monseigneur le Daulphin, & les Ducs de Berry, de Bretaigne, & de Bourbō, & feut sa complaincte bien piteusement. Et luy feut dict, qu'elle feust labien venuee, & que vn autre iour, on luy feroit responce, & s'en retourna en son hostel de Behainghe. Et le neufiesme iour, veint le Duc d'Orleans à Paris, en bien humble estat, vestu de noir, & tout droit s'en alla à saint Paul, vers le Roy, luy faire la reuerence, & demander vengeance de la mort de son pere. Et luy feut respondu, qu'on luy feroit toute raison. Et de là s'en alla en l'hostel de Behaingne, vers sa mere, & sa femme. Le Mardy ensuiuant, l'Abbé de Serisi, feut vne proposition en la presence de Monseigneur le Daulphin, & des

H h

1408. Seigneurs dessus dictz, & print son theme, *Iustitia, & Iudicium, preparatio sedis tue*. Lequel il deduisit bien grandement, & notablement, en detestant la mort de Monseigneur le Duc d'Orleans, & monstrent la grande enormité du cas. En respondant aux excusations, & mouuemens du Duc de Bourgogne, en monstrent qu'il n'auoit cause, ou apparence, de l'auoir faict, & que des choses qu'il alleguoit, si n'estoit ce pas à luy à faire, de le faire tuer. Et feit tant, & si grandement sa dicte proposition, que tous ceux qui estoient presens, disoient plainement, que oncques si grand faulte ne feut faicte au Royaume de France, si Iustice n'en estoit faicte, & que le Duc de Bourgogne, clairement auoit conliské corps, & biens. Et apres ce que le dict Abbé eut proposé, & esté ouy loquement, Maistre Guillaume Cousinot, vn notable Aduocat en Parlement, commença à parler, & en effect print conclusions, les plus haultes, & grandes, qui se pouuoient faire en la maniere. Et lors, apres la dicte proposition sur ce faicte, on les feit retraire, & eut Monseigneur de Guyenne aduis avec ceux de son sang, & autres presens du Conseil du Roy, que il auoit à respondre. Et la deliberation faicte, on feit appeller la Dame d'Orleans, & les enfans. Et leur feit response Monseigneur le Daulphin, que la mort du Duc d'Orleans son Oncle, luy desplaist, & à tous les presens tant de son sang, que autres, & qu'ils auroient Iustice. Et apres ce, tous ceux des fleurs de lys là presens, promeirent à aider à en faire Iustice, & se declarerent parties formelles contre le Duc de Bourgogne. Et pource qu'on apperceuoit biē que le dict Daulphin, fauorisait aucunement le Duc de Bourgogne, & son parti, il feut deliberé, qu'on mettroit gens d'armes dedans Paris. Et ainsi feut faict.

Le Duc de Bourgogne, pendant ces choses estoit es marches du Liege, & en sa compaignée, le Comte de Hainault, l'Euesque du Liege, & bien de dix à douze mille combatans. Les Liegeois s'estoient aussi mis sus, aians grande volonte de combattre. Et faillirent hors de la ville du Liege, en intention de resister aux autres, qu'ils tenoient pour leurs ennemis, & approcherent tellement, qu'ils veirent les vns les autres. Et estoient les Liegeois de trente quatre, à trente six mille testes armées. Et au regard des gens de Bourgogne, c'estoient gens de guerre. Et y auoit des archers de Boulonnois, & au

tres de Picardie. Les Seigneurs, & Capitaines du pays de Bourgogne, estoient, le Prince d'Orenge, les Seigneurs de Saint George, de Vergy, d'Espaigny, & autres. De Picardie, les Seigneurs de Crouy, de Rasse, & de Hely. De Flandres, les Seigneurs de Guistelles, de Fouckemberg, de Duinckerke, & de Robois. De Champagne, les Seigneurs de Chasteauuillain, & de Dampierre. De France, Messire Guichart Daulphin, le Seigneur de Gaucourt, & autres. Et si y estoit le Comte de Marre, d'Escoffe. Et quand ils veirent les Liegeois, ils ne s'effrayèrent de rien, & leur sembloit bi en, que ce n'estoit pas gens, quelque multitude qu'ils feussent, qui arrestassent guieres, & qui ne feussent bien aisez à desconfire, & ainsi en aduint. Car apres que les batailles s'assemblerent, les Liegeois n'arrestèrent comme point, & feurent desconfits. Et y en eut bien de vingt à vingt quatre mille de morts, & feut la dicté bataille, le vingt-troisiesme iour de Septembre au dict an. Et de la partie du Duc de Bourgogne, eut seulement de septante à quatre vingts personnes mortes. Et disoit on communément que la plupart des dicts Liegeois mourut, sans coup ferir, & pour la multitude cheurent l'un sur l'autre à grands tas, & s'estouffoient, & les esbahit bien le traiet des Picards, qui estoit merueilleux.

Quand les nouvelles veindrent à Paris de la dicté victoire, aucuns ne feurent pas ioyeux. Et commençà l'on à faire venir gens d'armes, & garder fort les portes de Paris, & les ponts, & passaiges des riuieres d'Oise, Ainne, & autres, afin que le Duc de Bourgogne, & ses gens, n'eussent aucun passaige pour venir en France. A Paris les choses estoient bien doubteuses, & vsoit on de merueilleuses paroles, & lāgaiges, qui estoient fort à la faueur du Duc de Bourgogne. Et y eut aucuns, qui pour les plus enflamber, feirēt semer qu'on leur vouloit oster leurs chaines, & harnois, & se meirent cedules tres-seditieuses contre le Preuost des marchands, qui estoit bien notable homme. La Roynne delibera de oster, & faire partir le Roy, & voulut emprunter argent: mais elle ne trouua oncques personne, qui luy voulust rien prester. Tousiours estoit en son imaginatiō de s'en aller, & d'emmener le Roy, & les enfans. Et mada ceux de la ville en grand quantité, & leur dit, qu'elle estoit desplaisante, de ce qu'on lui auoit rapporté, qu'elle vouloit faire oster les

H h ij

1408. chaisnes, & harnois, & que oncques n'y auoit pensé. Et que
 • fils n'en auoient à Paris assez, qu'elle en fineroit largement, &
 qu'ils demeurassent bons, & loyaux, & vrais subiets du Roy,
 & en bonne amour, & dilection. Et apres, le Chancelier de
 France, print la parole, & dit, qu'on ne se debuoit pas esmer-
 ueiller, si on auoit mandé des gens d'armes, veu les diuisions
 qui commençoient, & les murmures qu'on faisoit, & qu'ils
 feroient bien, qu'ils s'en voulussent deporter. Le troisieme
 iour de Nouembre, le Roy partit de Saint Paul, en la compai-
 gnée du Duc de Bourbon, & de Montaigu. Et se mit en vn ba-
 teau aux Celestins, & passa iusques à Saint Victor, & y auoit
 bien mille & cinq cents hommes d'armes à l'accompagner. Et
 estoit grand pitié des pilleries, & robberies, qui se faisoient sur
 les chāps, & ne passoit personne, quine feust destrouffé, pillé, &
 desrobé. Et failloit quand les Prelats, gens d'Eglise, ou autres
 personnes d'estat, vouloiēt aller dehors, qu'ils feussent accom-
 paignez de gens d'armes. Et le cinquiesme iour, par la porte
 de Saint Antoine, se partit la Royne, Monseigneur le Daul-
 phin, sa femme, les Roys de Sicile, & de Nauarre, le Duc de
 Berry, & autres Seigneurs, & s'en allerent tous iusques à Gyen.
 Et à Gyen se meirent sur la riuere de Loire, & s'en allerent à
 Tours.

Le quatriesme iour de Decembre, au dict an, mourut de
 courroux, & de dueil, la Duchesse d'Orleans, fille du Duc de
 Milan, & de la fille du Roy Iean. Et estoit grand pitié, d'ouir
 auant sa mort, ses regrets, & complainctes. Et piteusement re-
 gretoit ses enfans, & vn bastard nommé Iean, lequel elle veoit
 volōtiers, en disant qu'il luy auoit esté emblé, & qu'il n'y auoit
 à peine des enfans, qui feust si bien taillé de venger la mort de
 son pere, qu'il estoit.

De l'allée du Roy, de la Royne, & des Seigneurs, ceux de Pa-
 ris, seurent moult troublez, & esbahis. Quand le Duc de Bour-
 gogne, sceut le dict partement, il ne feut pas bien content,
 & delibera de venir à Paris. Et le vingt-huictiesme iour de
 Decembre, il y entra avec le Duc de Hollande, & grand
 quantité de gens d'armes, & n'alla personne au deuant de
 luy. Et feut par aucun temps à Paris, & ses gens estoient
 sur les riuieres de Seine, Marne, Yonne, & vne partie sur la
 riuere de Loire. Et le premier iour de Feburier, se partit

le Duc de Paris, & enuoia le Comte de Hainault à Tours, de-1408. uers le Roy, la Royne, & les Seigneurs qui y estoient, & parla à eulx. Et feut prise vne iournée à Chartres, pour trouuer paix & accord entre les Seigneurs, & pacification des differenc- ces, sous ombre desquelles plusieurs grâds maux se faisoient. Le Roy à Tours feut tres-fort malalade, iusques au vingtneuf- iefme iour de Nouembre, auquel il recouura santé. Et traista- on avec le Comte de Hainault, qu'il feist tant que le Duc de Bourgongne confessast qu'il eust mal fait, & qu'il demandast pardon au Roy. Et pour ceste matiere, feut enuoie avec le dict Comte de Hainault, Montaigu, grâd Maistre d'Hôtel. Et par- lerent au Duc de Bourgongne, & y eut plusieurs paroles d'un costé & d'autre. Et finalement respondit le Duc de Bourgongne, qu'il n'en feroit rien, & qu'il cuidoit auoir tresbien fait. C'estoit pitié des pilleries qui regnoient. Ceux de Paris alle- rent à Tours prier au Roy, qu'il retournast à Paris. Et le vingt- cinqiesme iour de Feburier, le Duc de Bourgongne en son simple estat entra à Paris, & auoit-on bonne esperance que tout s'appaiserait.

Le vingthuitiesme iour du dict mois de Feburier, environ midy, suruint vne merueilleuse tempeste de vent, & de tonner- re, & vne grosse pluie, qui feist moult de maux, & entre les au- tres, fouldroia vne moult belle Abbaye de Saint Bernard, nommée Royaulmont, que Saint Louys fonda. Et si le temps estoit merueilleux, encores faisoient plus grand dommaige les gens de guerre, estans sur les champs.

Assez tost apres le Duc de Bourgongne, entrerent à Paris, le Duc de Hollande, & le Comte de Namur. Et pource que le Duc de Bourgongne, craingnoit & doutoit à aller à Chartres, pour doubte de sa personne, feut aduisé que le Duc de Hollan- de iroit à Chartres, accompagné de gens de guerre, afin que inconuenient n'aduint, ne d'un costé, ne d'autre. Et le deuxief- me iour de Mars, entra le dict Duc de Hollande, accompagné de cinq cents hommes d'armes non armez, & de deux cents tresbien armez, & ordonnez. Et dès au parauant y estoient le Roy, la Royne, & les Seigneurs dessus dictz. Et le neuiefme iour de Mars, y entra le Duc de Bourgongne, & sen vint droit deuers le Roy, & la Royne, & y estoit present le ieune Duc d'Orleans. Et feut ouuerte la matiere du traité, tel qu'il se

1408. pouuoit pour lors faire. Et y auoit foison de gens de Paris, c'est à sçauoir, l'un des Presidens de la Court, certain nombre des Seigneurs, les Aduocats, & Procureur du Roy, le Preuost des Marchands, & les Escheuins, & plusieurs bourgeois, & autres personnes d'estat. Et fut la paix faite, & y eut certains accords, traitez, & promesses faites & sermés, & se entrebaiferent Orleães, & Bourgongne. Et debuoit auoir le Comte de Vertus, la fille du Duc de Bourgongne en mariage. Et pria le Duc de Bourgongne au Roy, que s'il auoit aucune rancune contre luy pour le dict cas, qu'il la voulust oster de son cœur, & pareillement au Duc d'Orleans. Et le feit le Roy, & aussi feit Orleans, par le commandemēt du Roy. Et y eut grands ioyes faictes de tous. Et ce faict, le Duc de Bourgongne, sans boire, ne menger en la ville, monta à cheual, & s'en partit. Et auoit vn tresbon fol en sa compaignée, qu'on disoit estre fol saige, lequel tantost alla achepter vne paix d'Eglise, & la feit fourrer, & disoit que c'estoit vne paix fourrée. Et ainsi aduint depuis.

En ceste année, feut tenu à Pise Concile general. Et y auoit huiet, vingts Archeuesques, Euesques, & Abbez, six vingts Maistres en Theologie, & bien trois cents Docteurs, qu'en Loix, qu'en Droit Canon, sans les Ambassadeurs des Roys, Princes, Vniuersitez, Colleges, & autres sans nombre.

En ce temps, Aimé de Broy, enuoia desier le Duc de Bourbon, disant qu'il debuoit faire certain hommaige au Duc de Bourgongne, & luy fait guerre. Mais le dict Duc se meit sur les champs, & contraingnit le dict Aimé à luy venir crier mercy. Et pource qu'il auoit prins aucunes places sur le dict Duc de Bourbon, il les rendit. Et aussi le dict Duc auoit bien grande puissance.

Audit Concile general, feurent priuez du Papat, Gregoire, & Benedict. Et fut esleu vn Cardinal Cordelier, & nommé Alexandre.

Le Dimanche, dix-septiesme iour de Mars, le Roy entra à Paris, & feut receu à moult grand ioye. Et y auoit trois Cardinaux, C'est à sçauoir, celuy de Bar, de Bordeaux, & d'Espaigne, & les Roys de Sicile, & de Nauarre, & les Ducs dessusdits, excepté Orleans, & Bourbon. Et le Ieudy ensuiuant, la Roynne y entra, accôpaignée comme dessus, C'est à sçauoir des dicts Roys, & Ducs, sans les Cardinaux. Et estoient toutes les Dames de la

Royne, vestües de blanc. Et se faisoient grands cheres à Paris, 1408. aux hostels du Roy, de la Royne, & de tous les Seigneurs, & és maisons des bourgeois de Paris en diuers lieux.

L'an millé quatre cents & neuf, les Geneuois estoient sous le gouuernement du Roy, où le Mareschal Boucicault estoit commis pour le Roy, & par long temps y feut, durant lequel il feit le mieux qu'il peut. Et feut en Sarrafinisme faire guerre aux Sarrafins. Mais soudainement les Geneuois le meirent dehors. Et disoit-on que c'estoit pource que les François, & autres gens de diuerses nations, qui estoient en sa compaignée, faisoient plusieurs choses, qui ne leur plaisoient pas.

Il y auoit vn Anglois nommé Haymon, qui feut appelé de gaige de bataille, Messire Guillaume Bastaille. Et maintenoit que à la besogne des sept François, contre sept Anglois, dont dessus est fait mention, il s'estoit rendu à son frere, rescous, ou non. Et que combien que les François en la fin obtinssent, que toutesfois le dict Bastaille, debuoit estre & demeurer prisonnier. Lequel Bastaille disoit le contraire. Et sur ce y eut gaige adiugé. Et veindrent en champ bien armez, & habillez. Et auoit-on conseillé au dict Bastaille, qu'il n'affaillist aucunement le dict Anglois, mais seulement se defendist. Et l'Anglois qui auoit grand volonte de le greuer, souuent s'efforçoit de frapper Bastaille, lequel tousiours destournoit de son pouuoir les coups de l'Anglois. Et tellement par bonne maniere se defendit, que l'Anglois n'obtint pas à son intention, sans ce que l'un, ne l'autre feussent blesez.

En ce temps aussi auoit vn Anglois nommé Cornouaille, que on tenoit grand Seigneur en Angleterre, & vaillant chevalier. Et vint en France, à sauf conduit, pour faire armes pour l'amour de la Dame, & poires à outrance. Aussi y auoit-il en la Court du Roy, vn vaillant chevalier, qu'on disoit Seneschal de Hainault, lequel feut sçauoir au dict Cornouaille qu'il estoit prest de luy accomplir le fait d'armes, ainsi qu'il le requeroit. Et le dix-huictiesme iour du dict mois de Iuin, se comparurent en la presence du Roy, bien montez, & armez, prests de assembler l'un contre l'autre. Mais le Roy les feit tous deux prendre, & separer, en leur defendant que ils ne feissent plus. Et feut lors faite vne Loy, ou Ordonnance, Que iamaïs

1409. nuls ne feussent receus au Royaume de France, à faire gaiges de bataille, ou fait d'armes, sinon qu'il y eut gage iugé par le Roy, ou la Court de Parlement.

En ce mois, feut le mariage consummé de Monseigneur le Dauphin, & de la fille du Duc de Bourgogne. Et celui du Comte de Charrolois, fils du dict Duc, & de la fille du Roy.

Et combien que dessus ha esté fait mention de la priation de Benedicte, & de Gregoire, faite l'année passée, & de l'election d'Alexandre. Toutesfois auous dient, que ce feut ceste année presente, & en ce mois. Et en feit-on grande solemnité à Paris, tant de feux, que de chanter, *Te Deum laudamus*, & sonner les cloches.

Au mois de Juillet, le seiziesme iour, mourut l'Euesque de Paris, nommé d'Orgemont. Dont le Pere, auoir esté Chancellier de France. Eufeut celui, qu'on dict auoir esté mort en sa cause, de grauelle, & de poux, par punition diuine, à cause qu'il auoit fait mourir Messire Jean des Mares, sans cause. Et Maître Pierre du Pré, bourreau de Paris, meit en vn certain lieu, les os du dict des Mares, où ils feurent bien vingt & quatre ans. Et après par ses enfans, & amis, feurent ostez, & mis à Sainte Catherine du val des Escholiers, en sa sepulture.

Au mois de May, feu Messire Guy de Roze, Archeuesque de Rheims, lequel auoit eu trois Archeueschez, c'est à scauoir Tours, Sens, & Rheims, se meit en chemin, pour aller au Conseil general. Et vint en vne ville pres de Gennys, & se logea en vne hostellerie. Et auoit vn varlet mareschal, lequel print debat à aucuns de la ville, & y eut vne maniere de commotion. Et quand l'Archeuesque ouit la dicte commotiō, il voulut descendre les degrez de sa chambre, pour aller tout appaiser. Et en descendant, il y eut vn de la ville, qui tiroit d'vne arbalestre, & d'aduenture le vireton entra par vne petite veüe, qui estoit au long des degrez par où il descendoit, & assenna sur le dict Archeuesque, dont il mourut, & alla de vie à trespassement, qui feut grand dommaige. Et feit la Iustice de la ville, tref-grande punition de celui, qui auoit tiré le vireton.

Le treiziesme iour de Septembre, Dame Isabeau de France, femme du Duc d'Orleans, alla de vie à trespassement, & mourut en enfantant, qui feut grand dommaige, & pitié.

A Paris,

A Paris, & ailleurs en ce Royaume, on prenoit par auctorité de Iustice, tous les Geneuois qu'on trouuoit, pour la rebellion qui auoit esté faite à Gennes, & en prenoit-on argent le plus qu'on pouuoit.

Le septiesme iour d'Octobre, feut pris Monseigneur Messire Jean de Montaigu, grand Maistre d'Hostel du Roy, qui auoit presques de seize à dix-sept ans, comme tout gouuerné le Royaume de France, & auoit marié ses filles bien grâdemment & haultement, en grands lignaiges, & fait plusieurs acquests. Et feut fils d'un Clerc des comptes, & sa femme, fille d'un Ad-uocat de Parlement. Et avec luy feut prins Maistre Martin Gouge, Euesque de Chartres, & un nommé Maistre Pierre de Lesclat. Les causes n'estoient, que pour oster le dict Montaigu, du gouuernement qu'il auoit. Et ne feurent les dicts Gouge, & Lesclat, guieres prisonniers, & payerent certaine somme de deniers. Mais au regard du dict Montaigu, le dix-septiesme iour du dict mois d'Octobre, feut condamné par Messire Pierre des Essars, à estre decapité aux halles de Paris. Combien qu'il feust clerc marié *cum vnica virgine*, & auoit esté prins en habit, non difforme à clerc. Mais en le menant à la Iustice, on luy vestit vne robe mypartie de blanc, & de rouge, qui estoit comme on disoit, sa deuise. Et estoit moult plainct de tout le peuple. Et doubtoit fort le dict des Essars, qu'il ne feust rescous, & pource en allant, il disoit qu'il estoit traistre, & coupable de la maladie du Roy, & qu'il desroboit l'argent des tailles, & aides. Et tenoit le dict Montaigu en ses mains, vne petite croix de bois qu'il baisoit, & en tres-grand patience & deuotion souffrit la mort. Et disoit-on communément, que ce estoit plus volonte que raison.

Les choses estoient bien merueilleuses lors à Paris, en grands murmures, & diuisions, tant des Princes, que du peuple. Et y eut vne reformation mise sus, & commissaires ordonnez. Dont on exigea grand finance de tous les Officiers du temps passé, comme de ceux auxquels le Roy auoit fait dons. Et prenoit-on argent des subiets, sans les ouyr en congnoissance de cause. Et presidoit Monseigneur de Guyenne, par lequel feut ordonné, que Monseigneur de Bourgongne auroit le gouuernement. Le Roy de Nauarre, & le Duc de Berry, & autres du sang, nobles, & des plus notables de Paris, estoient bien mal contents

1409. des manieres qu'on tenoit. Et parla le Duc de Berry bien aigrement au Duc de Bourgongne, lequel en teint peu de compte. Et combien que le Roy de Nauarre eust grandes alliances au Duc de Bourgongne, sermens, & promesses : toutesfois il fallia au Duc de Berry. Et assez tost apres s'en allerent, & partirent de Paris.

Aucuns dient, que ceste année de nouueau feurent creez les Escheuins à Paris, avec le Preuost des marchands. Quelque année que ce feust, tous ceux qui auoient eu amour, ou alliance à Montaigu, eurent à souffrir. Il auoit deux freres, L'un, Archeuesque de Sens, l'autre, Euesque de Paris, qui receurent les femmes parentes, & aucuns de leurs seruiteurs leur faisoient beaucoup de bien.

Le Duc Philippes de Bourgongne, & depuis le Duc Iean aussi, auoient faict faire plusieurs grans engins de bois, pour bastiller Calais. Et estoit belle chose, de veoir le marrain qui y estoit. Aucuns meus de mauuaise volonté, en vne nuit y bouterent le feu, & feut tout ars & brulé. Et ne peut-on oncques sçauoir, qui ce auoit faict.

1409. Au dict an mille quatre cents & neuf, feut en l'Isle de France vers Senlis vn merueilleux tonnerre. Et cheut en vne bien notable Abbaye, nommée Royaulmont. Et y ardit bien la moictié de l'Eglise, & le clocher, où estoient les cloches. Lesquelles de la force du feu, feurent toutes fondües, & le plomb dont la dicte Eglise estoit couuerte.

Aimé de Broy, estoit vn Capitaine de gens de compaignées de diuerses nations, faisans maux infinis. Et auoit toujours esté au Duc de Bourgongne : mais il se disoit au Duc de Sauioye. Et derechef commença à faire guerre au Duc de Bourbon, qui estoit vaillant en armes. Et disoit Aimé, que c'estoit pour son Seigneur le Duc de Sauioye : pource que le Duc de Bourbon, ne luy vouloit faire hommaige d'aucunes terres que il tenoit de luy. Parquoy le Duc de Bourbon, assembla assez hastiement gens de guerre, & se mit en chemin près dudieu, où estoit le dict Aimé. Et quand il veid la puissance du Duc, il se mit en fuite. Mais il ne se sceut tant haster, que ses gens ne feussent morts, ou prins, & la plus grand partie noiez. Et si print le Duc vne place, qu'on disoit estre au dict Aimé. Le Duc de Bourgongne y vint, & feit la paix du dict

Aimé enuers le Duc, & luy enuoia en fers, pour en faire son plaisir. Et en faueur du dict Duc de Bourgongne, il luy pardonna. Et promet le dict Aimé d'estre seruiteur de Monseigneur de Bourbon.

Le quinziesme iour de Iuillet, le Duc de Brabant, espousa la fille du Marquis de Morauie.

Le Duc d'Orleans, impetra vn mandement, pour adiourner en la Court de Parlement, le Comte de Neuers, sur certaines demandes qu'il auoit intention de faire. Et feut par vn sergent adiourné en sa personne. Lequel sergent en s'en retournant fut prins, & ses leſtres deſchirées, & feut pendu à vn arbre, qui feut vn horrible & detestable cas. Et quand le Comte de Neuers le sceut, il en feut bien deſplaisant, & s'en vint deuers le Roy, & la Court de Parlement, & s'en purgea tant par serment, que aussi par tesmoings. Mais toutesſois le pauvre sergent demeura mort. Et ne peut-on oncques ſçauoir, qui ce auoit fait.

Le Pape Alexandre, apres la nouuelle creation, enuoia le Cardinal de Bar deuers le Roy, lequel feut tres-honorablement receu. Aussi estoit-il prochain parent du Roy.

L'an mille quatre cents & dix, le Roy de Sicile, estant vers Naples, accompagné de plusieurs François, Bretons, & Angeuins, pour resister à l'entreprinſe du Roy Lancelot, se allia d'un vaillant Capitaine de gens d'armes, estant au pays de Romanie, nommé Paul des Vrsins. Lequel lignaigé des Vrsins, est bien grand & puissant és marches de Naples, & de Romanie. Et estoit le dict Lancelot à Rome, & se rencontrerent comme en bataille les vns contre les autres. Et feut le dict Roy Lancelot deſconfit, parquoy il se retrahit. Et diſoit-on qu'il y auoit eu de beaux & vaillans faicts d'armes, & que le dict Paul, feut cause de la victoire que eut le Roy Louys. Et si se n'eust-il esté, ceux du pays de France, euſſent fait vne grande occiſion de gens de Lancelot. Mais il l'empescha, diſant que ce n'estoit pas la maniere du pays. Et recouurerent les François Rome, & le chasteau de Saint Ange.

En l'année deſſus dicte, mourut le Pape Alexandre, & feut eſleu vn nommé Balthazar de Coſſe, qui estoit Cardinal, & homme de faict, & auoit esté Legat à Boulongne,

1410. & auoit tenu les Boulonnois en grande subiection, lequel feut appellé Iean vingt & troisieme.

Il vint vn iour à Paris vn fol, qui sembloit auoir sens & entendement, à qui l'eust voulu ouir parler. Et disoit qu'il guairiroit le Roy, & feit en greue assembler beaucoup de peuple, & feit semblant & maniere de prescher. Et toute la conclusion feut, qu'on enuoiaist deuers le Pape, & qu'il ferois merueilles, Et congneut-on bien que c'estoit vn vrai fol, & s'en alla.

Le mariage du fils du Roy de Sicile, & de la fille du Duc de Bourgongne fut fait, & grandes alliances. & sermés entr'eux.

Les Ducs de Berry, & de Bourbon, se partirēt de Paris, comme dessus est dict, & allerent à Gyen, où estoient les Ducs d'Orléans, & de Bretagne, & les Comtes d'Alençon, de Clermont, & d'Armaignac. Et feit vne maniere de proposition le Duc de Berry, en déclarant plusieurs choses contre le Duc de Bourgongne. Et s'allierent tous ensemble, & feirent sermens, & promesses de aider, & conforter l'un l'autre contre le dict Duc de Bourgongne. Et escripirent au Roy, & aussi aux bonnes villes, & Prelats du Royaume, vnes lettres, esquelles estoient incorporées celles qu'ils escripuoient au Roy, & les enuoierent aux Prelats, & bonnes villes, desquelles la teneur s'ensuyt.

Les Ducs de Berry, d'Orléans, & de Bourbon, les Comtes d'Alençon, & d'Armaignac, à Reuerend Pere en Dieu l'Eueſque, Doyen, & Chapitre de la ville de Beauuais, salut & dilection. Nous rescripuons à nostre tres-redoubté & souverain Seigneur, Monseigneur le Roy, en la maniere qu'il s'ensuyt.

Vous tres-hault, & tres-excellēt Prince, nostre tres-redoubté & souverain Seigneur le Roy, exposons & signifions en tres-grād clameur, & cōplainte, les choses cy apres declarées, Nous les Ducs de Berry, d'Orléans, & de Bourbon, & les Comtes d'Alençon, & d'Armaignac, vos tres-humbles Oncle, parcs, & sujets, pour nous, pour tous nos adherés, & vos biē-veuillans, Cōme les droits de vostre Couronne, Seigneurie, & Majesté Royale, soient si notablement instruez, vous en iceux, & iceux fondez en vous, en Iustice, puissance, & vraie obeissance de vos sujets, tellement que en tous les Royaumes, & Seigneuries du monde, l'estat, & l'auctorité de vous, & de vostre dite Seigneurie, en resplendit. Soiez aussi en oinct & consacré si dignemēt,

que du sainct siege de Rome, & de toutes nations, & Royaumes Chrestiens, vous estes tenu, & appellé Roy Treschrestien, & singulierement renommé en administration de vraie Iustice, & à icelle puissamment exercer, & executer, sans acception de personne, tant au pauvre, comme au riche, & comme Empereur en vostre Royaume, sans cognoissance d'aucun Souuerain, fors seulement de la diuine Majesté, dont ce vous est seulement, & singulierement octroïé. Soit aussi le noble corps de ceux de vostre sang, ferme & ioinct par obeissance en vraie vnté, à l'auctorité de vostre Seigneurie, & Maïesté, pour icelle seruir, garder, soustenir, & defendre comme membres, & subiects de vous, & à proprement parler, comme membres, & parties de vostre propre corps, les premiers & principaux pour vous obeir, eulx & chascun d'eulx, plus que nuls autres, tant pource qu'ils y sont plus tenus, & obligez, comme pour bon exemple à tous vos autres subiects de reuerence, & de vraie obeissance. Pour garder aussi, & faire garder l'estat, & auctorité de vostre dicte Seigneurie, par telle maniere que vous ayez sur eulx, & sur tous vos subiects, plaine puissance, & Seigneurie, en telle liberté, auctorité, faculté, & exercice, comme Roy, & Empereur, peut, & doit auoir sur ses subiects. Et tellement que par vostre puissance, & le sceptre de vostre Maïesté Royale, vous premiez & guerdónez les bons, punissez les mauuais, & corrigez les malfaiçeurs, rendez à vn chascun, & maintenez en ce qui est sien, tenez, & administrez iustice indifferement, & communément à vn chascun. Par telle maniere, que par icelle vous tenez vostre Royaume paisible, à la louenge premierement de Dieu nostre Createur, apres à l'honneur de vous, au bien de vos subiects, & bon exemple de tous autres, ensuiuant les nobles, & saintes voyes de vos predecesseurs Roys de France, qui en ceste maniere ont tousiours gouverné ce noble Royaume, & par ce, tenu en paix, honneur, & tranquillité. Et tellement, que toutes nations Chrestiennes, voisines, & loingtaines, voire souuentefois les mescreans, ont receu par deuers vous, & vostre noble Conseil, en leurs grâds debats, & affaires, comme à la vraie fontaine de Iustice, & de toute loyauté. Et il soit ainsi, nostre tresredoubté, & souuerain Seigneur, que de present vous, vostre honneur, Iustice, & l'estat de vostre Seigneurie, soient foutez, & blessez, & ne vous

1410. laissez on seigneurier vostre Royaume, ne gouverner la chose publique d'iceluy, en telle franchise & liberté, comme raison voudroit, comme c'est chose bien euidente à toutes gens d'entendement. Pource nostre tresredoubté & souverain Seigneur, Nous cy dessus nommez, sommes alliez, & assemblez, pour aller par deuers vous, pour vous humblement remonstrer, & informer au vrai del'estat de vostre personne, & de Monseigneur de Guyenne, vostre aîné fils, & comme vous estes detenus & demenez, du gouvernement aussi de vostre Seigneurie, de vostre Iustice, de vostre Royaume, & de toute la chose publique d'iceluy. A ce que nous ouïs à plain en ceste matiere, & aussi ceux, si aucuns en y ha, qui vueillent dire aucunes choses au contraire, par l'aduis, conseil, & deliberatiõ de ceux de vostre sang, & lignaige, des preud'hommes de vostre Conseil, & autres, qu'il vous plaira pour ceste cause mander, & appeller, en tel, & si grand nombre comme vous verrez estre à faire, vous pourueoiez reaulment, & de fait, ainsi qu'il vous plaira, à la seureté, franchise, & liberté de vostre personne, & de Monseigneur de Guyenne, vostre aîné fils, de vostre Estat, de vostre Seigneurie, & de vostre Iustice, & bon gouvernement de vostre peuple, & de vostre Royaume, & de toute la chose publique d'iceluy. Et que la Seigneurie de ce Royaume, l'auctorité, l'exercice, & la puissance d'iceluy, reside, & demeure en vous franchement, & liberalement, comme raison est, & non à autre quelconque. A ces fins, & conclusions obtenir, executer, & mettre sus reaulment, & de fait: Nous cy dessus nommez, voulons employer & exposer en vostre seruice, nos personnes, nos cheuances, nos amis, & nos subiects, & tout ce que Dieu nous ha donné, & presté en ce monde, A resister aussi, & debouter ceux qui voudroient venir, ou faire aucunes choses alencontre, si aucuns en y auoit. Et au plaisir de Dieu, nostre tres-redoubté & souverain Seigneur, ne pensons iamais departir d'ensemble, iusques à ce, que nous ouïs, vous ayez pourueu, & remedié aux inconueniens dessus declarez, & que nous voions, & congnoissions, vous estre à plain restabli, & remis en honneur, & haultesse de vostre Royale Maïesté, & en l'auctorité, liberté, franchise, & plaine puissance de vous, & de vostre Iustice, & Seigneurie. A ce faire, nostre tres-redoubté & Souverain Seigneur, nous sommes cõtraincts, tenus, & obli-

gez, tant par ce que dict est, comme pour craincte, honneur, & reuerence de Dieu nostre Createur premierement, duquel procede vostre Seigneurie, mesmement pour satisfaire à Iustice, & à vous apres, qui estes nostre Royal, seul, & souuerain Seigneur en terre, A qui par ce, & aussi par prochaineté de lignaige, sommes tant tenus, & obligez, que plus ne pouuons estre. Et en verité, nostre trefredoubté & souuerain Seigneur, la chose du monde, en quoy nous doubtons plus auoir courroucé & offensé Dieu nostre createur, & vous apres, & aussi blessé nostre propre honneur, ce sont les inconueniens dessus touchez, que nous auons longuemēt ainsi laissé passer par dissimulation. Et afin que ces choses soient notoires à vn chacun, & demenées en la forme, & maniere que faire se doit, nous les signifions en effect semblablement que à vous, aux Prelats, Seigneurs, Vniuersitez, citez, & bōnes villes de vostre Royaume, & à tous vos bienueillans. Si vous supplions nostre trefredoubté & souuerain Seigneur, tant humblement, comme plus pouuons, qu'il vous plaise considerer aussi, & aduertir nostre intention, & propos, & les fins aux quelles nous tendons, qui sont seulement, comme dict est, à la reparation de vostre estat, & honneur. Et qu'il vous plaise, de vous y employer de vostre pouuoir, & tellement, que par vous soit pourueu reaulment, & de fait, à la conseruation, franchise, & liberté de vous, & de vostre Seigneurie, au bon gouuernement de vostre peuple, & de vostre Iustice, & de vostre Royaume, & de toute la chose publique d'iceluy, A la loüenge de Dieu premierement, apres, à l'honneur de vous, au biē aussi de tous vos subiets, & bon exemple de tous autres. Et à ceste fin, doibuent tendre avec nous, tous les preud'hommes de vostre Royaume, tous vos vrais & loyaux subiets, & tous ceux qui bien vous veulent. Donnē à Gyen, soubz nos seaulx, le second iour de Septembre, l'an mille quatre cents & dix.

Le Duc de Bourgogne, feit plusieurs grandes exactions d'argent à Paris, & ailleurs, & mesmement sur ceux qu'on imaginoit fauoriser, ou qui estoient aux dicts Seigneurs absentez estans à Gyen. Et n'y auoit personne receüe à quelque excusatiō. Et se dispoisoient les choses à bien grands débats, diuisions, & seditiōs de guerres. Et craingnoit fort le Duc de Bourgogne à auoir à faire. Et feit tant que le Roy. enuoia deuers les dicts

1410. Seigneurs, defendre la voie de fait. Et aussi la defendit il au Duc de Bourgogne.

Enuiron le premier iour de Iuillet, il aduint choses merueilleuses. Car les cicoingnes s'assemblerent d'une part, & les herons d'une autre, & se combaterent cruellement, & pareillement les pies contre les corneilles. Ety eut des dicts oiseaux de morts, bien deux chariots plains. Et aussi les moineaux, ou passereaux, & autres oiseaux es maisons, se combatoient & tuoient les vns les autres. Laquelle chose estoit en grande admiration, & espouuementement à plusieurs gens d'entendement.

L'oncle du Roy d'Espagne, qui auoit le gouuernement du Royaume, pource que le ieune Roy d'Espagne, estoit mineur d'aage, assembla plusieurs vaillans gens du Royaume d'Espagne, tant de nobles, que d'autres, pour aller contre le Roy de Grenade, Sarrafin, qui d'autre part auoit assemblé Sarrafin sans nombre. Et se trouuerent vers les marches de Grenade, & assemblerent les batailles les vns contre les autres, & combaterent bien asprement, & cruellement, & tant que finalement les Chrestiens eurent victoire, & feurent les Sarrafin desconfits, & y en eut bien trente mille de morts.

Le Comte de Clermont, estoit Capitaine de Creil pour le Roy: mais on luy osta la Capitainerie, & feut baillée au Seigneur de Mouy, lequel estoit chambellan de Monseigneur le Daulphin.

Les Seigneurs dont dessus est fait mention, estans à Gyen, se partirent du dict lieu, & s'en allerent chascun en son pays. Et sceut on bien, que c'estoit pour assembler gens de guerre. Et pource de par le Roy feut enuoiée vne Ambassade deuers Monseigneur de Berry, qui estoit à Poitiers. Et estoit pour luy requeter, que nulle guerre ne feust faite, ne assemblée de gens d'armes. Mais ceux qui y allerent, s'en reuindrent sans rien faire. Le Duc de Bourgogne, voiant & scaichant que armée se faisoit contre luy, se pourueut, & manda gens de guerre, & en meit dedans la ville de Patis assez competement. Et feist muer aucuns des portiers, faire guet, & garder les portes, & enuoia gens à tous les passaiges, pour les garder, & empêcher que gens de guerre des dicts Seigneurs ne passassent, ne autres, sans scauoir qu'ils estoient, & dont ils venoient, & regarder

garder & visiter ce qu'ils portoient. Le Duc de Berry vint à Tours, & enuoia vne Ambassade deuers le Roy, & le Roy apres vers luy. Et pour abbreger, y eut plusieurs Ambassades d'un costé, & d'autre, qui s'en retournerent sans rien faire. Plusieurs lettres aussi se escripuoient d'un costé & d'autre, lesquelles aussi ne portèrent aucun effect. Et pource que le Duc de Bourgogne estoit à Paris, & auoit en ses mains le Roy, & Monseigneur le Daulphin, toutes les lettres qui s'escripuoient à Monseigneur de Berry, & aux autres Seigneurs, se faisoient au nom du Roy, ou du dict Monseigneur le Daulphin.

Le Duc de Bourgogne manda gens d'armes de toutes parts, & entre les autres, le Duc de Brabant son frere, qui y vint accompagné de trois cets hommes d'armes. Et de plain bout, se vint fourrer dedans Saint Denys, & pilla toutes les bonnes gens de la ville, qui luy feut vn bien grand des-honneur, veu que c'estoit la premiere armée qu'il auoit oncques fait. Et si redonda bien à deshonneur au Duc de Bourgogne, qui l'auoit mandé, ne oncques n'en tint compte, ne n'en feit faire aucune reparation. Et les Ducs de Berry, d'Orleans, & de Bourbon, & les Comtes d'Alençon, de Richemôt, & d'Armagnac, vindrent accompagnez de trois à quatre mille cheualiers, & escuiers, deuant Paris, & de toutes parts couroient, & n'estoit que pilleries, robberies, & destructiō de peuple, qui estoit chose trespitoyable. Et combien que largement, & trop, y eust ges de guerre d'un costé & d'autre : toutesfois ils ne se rencontroient pas trop volontiers. Si y auoit il des Guascons avec le Comte d'Armagnac, qui eussent volōtiers rompu lances, lesquels vindrent pres des portes : mais personne ne saillit. Aussi auoit il esté defendu de par le Roy, que personne ne saillist dehors, & estoit toute la guerre, seulement contre les pauvres gens du plat pays. Et y feurent depuis le mois d'Aoust iusques en Nouembre. Plusieurs se trauailloient de trouuer paix, & accord. Et finalement le Comte de Sauoye, par plusieurs & diuerfes fois y alla, & veint, tellement qu'il y eut vn accord & traité fait, Que tous ceux qui estoient du sang de France, se parriroient de Paris, & ne seroient plus empres le Roy, ne en la ville de Paris, excepté Messire Pierre de Navarre, Comte de Mortaing, & que les autres s'en iroient en leurs terres & Seigneuries. Et feurent ordonnez certains cheualiers, qui seroient

1410. autour du Roy, & au Conseil. Et que Messire Pierre des Esfars, qui estoit Préuost de Paris, seroit desappoincté, & en lieu de luy feut ordonné Messire Bureau de Saint Cler. Et au surplus que le traité faict à Chartres, se teint. Et feut ce, iuré & promis par tous les Seigneurs.

Le Duc de Bourgogne s'en alla en ses pays, & auoit grand regret d'estre parti de Paris, & tousiours doubtoit que les autres Seigneurs par quelque cautele n'y entraissent. Et de faict, escripuit à ceux de Paris, qu'il auoit sceu que par certains moyens ils y debuoient entrer, & que à Paris y en auoit plusieurs, qui en estoient consentans; & les debuoient meüre dedans. Mais ceux de Paris luy escripirent, en eulx excusans bien grandement, & notablemēt, & qu'il ne feist doubte qu'ils se garderoient bien, tellement que aucun inconuenient n'en aduiendroit.

1411. L'an mille quatre cents & onze, le Roy Lancelot, apres ce que luy, & ses gens, feurent boutez hors de Rome, assembla le plus de gens qu'il peut cōtre le Roy de Sicile. Et d'autre part aussi, se assemblerent gens de guerre, pour luy resister, en tant que ce que faisoit le dict Lancelot, desplaisoit fort au Pape. Et pource il bailla au Roy de Sicile, le confanon del'Eglise, en la compaignée duquel, pour le Pape, estoit Paul des Vrlins, vaillant homme d'armes, & puissant de gēs & d'amis au pays, (Car c'est le plus grand lignaige qui y soit,) & auoit l'auant-garde avec aucuns François, que le Roy de Sicile auoit mené. Et se meit le Roy Lancelot sur les champs, & les autres pareillement, & tant qu'ils veirent les vns les autres. Et bien vaillamment frappa l'auant-garde dessus dicte sur les gens du Roy Lancelot, lesquels feurent desconfits, & estoient grand compaignée de gens.

En ce temps, feut faict le mariage du Roy de Cypre, & de la fille du Comte de Vendosme, qui estoit de ceux de Bourbon.

Nonobstant la paix faicte à Vnicestro, tousiours y auoit gens d'armes sur les champs, qui faisoient maux infinis. Et entre les autres, y auoit deux Capitaines principaux, lesquels auoient plusieurs larrons, & meurtriers, en leur compaignée, en assez grand nombre. L'un estoit nommé Polifer, & l'autre Rodrigó. Et veint nouuelles au Conseil du Roy, qu'ils faisoient

des maux largement , & qu'ils estoient logez en vn villaige, ^{LIII.} nommé Claye, qui est cōme au chemin de Paris, & de Meaulx. Et feut ordonné qu'on les iroit prendre, pour en faire iustice. Et pour ce faire, partirent soudainement le Marechal Boucicaut, le Comte de Saint Paul, & le Preuost de Paris, nommé Messire Bureau de Saint Cler. Et s'en allerent droit au dict villaige de Claye, & se cuiderent ceux qui y estoient logez, mettre en defense, mais rien ne leur valut. Et s'enfuirent plusieurs, & y en eut plusieurs prins, mesmement les dicts Polifer & Rodrigo, lesquels feurent pendus au gibet de Paris, assez tost apres. Et les aucuns battus publicquement par les carrefours de Paris, & les autres iectez en la riuere de Seine.

Gens d'armes s'assembloient d'un costé & d'autre, & se tenoient sur le pays, lesquels destruisoient tout. Et se escripuoient diuerses manieres de lettres. Et mesmement escripuit le Duc d'Orleans, aux bonnes villes du Royaume, en detestant fort la mort & le meurtre fait à la personne de son pere, frere du Roy. Car peu de temps parauant auoient confederations, & amitez ensemble, sermentées & iurées sur le pretieux corps de Iesus-Christ, entre les mains du prebtre, & portoient l'ordre l'un de l'autre, ou auoient promis de les porter. Et que son pere le Duc d'Orleans, estant malade à Beaulté, le dict Duc de Bourgogne l'alla veoir, & visiter, & que depuis qu'il feut guari, dînerent ensemble, & vsoit le dict Duc de Bourgogne, de plusieurs belles & doulces paroles, en demonstrent tous signes d'amour, & d'amitié, tant qu'on pourroit faire. Et que ce nonobstant, la conspiration de la mort du dict son pere, estoit ia faicte, & tous les iours il se souloit de trouuer maniere, comme il pourroit mettre à execution sa mauuaise volonté. Et que combien que depuis v eust vn certain Traicté fait à Chartres, que toutesfois ledict Duc de Bourgogne ne l'auoit voulu tenir, ne accomplir. Et que c'estoit deshonneur au Roy, & ceux de son sang, & aux bonnes villes, si iustice n'estoit faicte du dict cas, qu'il disoit estre horrible. Et estoient les dictes lettres longues, & assez prolixes, & faictes en bel & doux langaige. Desquelles lettres escriptes au Roy, la teneur s'ensuyt.

A vous mon tref-redoubté, & souuerain, Seigneur le Roy,

К к ij

2411. Nous Charles Duc d'Orleans, Philippes Comte de Vertus, & Iean Comte d'Engoulesme, freres, vos treshumbles fils & nepueux, en treshumble recommandation, subiection, & toute obeissance, auons deliberé vous exposer & signifier conioinctement, & chascun pour le tout, ce qui s'ensuyt, Iagoit nostre tref-redoubté & souuerain Seigneur, que le cas de la trefdouloureuse, piteuse, & inhumain mort de nostre trefredoubté Seigneur, & pere, en son viuant vostre seul frere germain, soit fiché en vostre memoite, & sommes certains qu'il n'en est aucunement parti, ains est enraciné en vostre cœur, & au plus profond des secrets de vostre records, Neantmoins nostre trefredoubté, & souuerain Seigneur, l'office de pitié, les droicts de sang, les droicts de nature, & toutes les loix diuines, canonicques, & ciuiles, nous admonnestent, voire contraignēt icy luy vous recorder & ramenteuoir, mesmement aux fins cy apres esleues & declarées.

Il est vrai, nostre tref-redoubté, & souuerain Seigneur, que vn nommé Iean, qui se diët Duc de Bourgongne, par vne tresgrande haine couuerte, qu'il auoit longuement gardé en son cœur, & par vne faulse, & mauuaise enuie, ambition, & conuioitise de dominer, & seigneurier, & auoir auctorité, & gouuernement en vostre Royaume, comme il ha bien clairement demonsté, & demonstre notoirement chascun iour, en l'an mille quatre cents & sept, le vingt-troisiesme iour de Novembre, fait tuer & meurtrir traistreuusement vostre diët frere, nostre trefredoubté Seigneur & pere, en vostre bonne ville de Paris de nuit, par aguët loingtain, de fait appensé, & propos deliberé, par faulx, mauuais, & traistres meurtriers, affectez, & allouez pour ce faire, sans luy auoir monsté parauant aucun signe de malueillance, cōme c'est chose toute notoire à vous, & à tout le monde, auerée & confessée publicquement par le diët traistre meurtrier, qui est le plus faulx, & le plus desloyal traistre, cruel, & inhumain meurtre, qu'on puisse dire, ne penser. Et pensons qu'il ne se trouue point escript, que oncques mais, à quelque occasion que ce peust estre, tel, ne si mauuais, ait esté fait, ne pourpensé par quelque personne, ne alencontre de quelque personne que ce ait esté.

Premieremēt, pour l'horreur, & cruauté abominable du diët meurtre en soy, tant parce qu'ils estoient si prochains, & si con-

joincts ensemble par sang, & lignaige, comme cousins germains, enfans des deux freres. Ainsi il ne comiteit pas seulement crime de meurtre & homicide, mais comiteit avec ce, le plus horrible des crimes, c'est à sçauoir le crime de parricide, auquel les droicts ne sçauent imposer peines assez grandes, pour la tres-horrible cruauté, & abominable detestation d'iceluy. Comme aussi qu'ils estoient confederez & alliez ensemble, par deux ou trois paires d'alliances, seellées les aucunes de leurs seaux, & signées de leurs propres mains, par lesquelles ils auoient iuré, & promis l'un à l'autre, sur les saints Euangiles de Dieu, & sur le saint Canon, pour ce corporellement touchés, presens aucuns Prelats, & plusieurs autres gens de grand estat, tant du conseil de l'un, comme de l'autre, ne pourchasseroient mal, dommaige aucun, ne villenie l'un à l'autre, couuertement, directement, ne indirectement, ne souffriroient à leur pouuoir estre pourchassé en aucune maniere. Et feirent en outre au regard de ce, plusieurs grandes, & solennelles promesses, en tel cas accoustumées. Car en signe, & demonstration de toute affection, & perfection d'amour, de vne vraye vnité, & comme fils eussent & peussent auoir vn mesme cœur, & couraige, feirent, iurerent, & promeirent solennellement vraie fraternité, & compaignée d'armes ensemble, par especiales conuenances sur ce faictes. Laquelle chose, doit de soy emporter telle, & si grande loyauté & amour mutuelle, comme sçauent tous les nobles hommes. Et encores à plus grande confirmation des dictes fraternité & compaignée d'armes, preindrent, & porterent l'ordre, & le collier l'un de l'autre, comme c'est chose toute notoire.

Secondement, par les manieres tenües par le dict traistre meurtrier, au regard de l'exécution, & commission du dict meurtre. Car il; faignant auoir avec vostre dict frere toute amour, & loyauté, par ce que dict est, conuersoit souuent avec luy, & par especial en vne maladie qu'il eut, vn peu auant que ledict meurtre feust commis en sa personne, iceluy l'alla veoir, & visiter, tant à Beaulté, cōme à Paris, & luy monstroït tous signes d'amour, que freres, cousins, & amis debuoiēt & pouuoient porter, & monstrier l'un à l'autre, jaçoit qu'il eust desia traité, & ordonné sa mort, & que les meurtriers feussent ja par luy mandez en la maison louée, pour eulx receler, & en-

1411. buscher. Qui prouue & monstre trop clairement, que c'estoit vne bien cruelle, & mortelle trahison. Et qui plus est, le iour de deuant l'accomplissement du dict meurtre, vostre dict frere, & luy, apres le Conseil par vous tenu à S. Paul, en vostre presence, & des Seigneurs de vostre sang, & d'autres plusieurs, qui là estoient, preindrēt & mangerent espices, & beurent ensemble, & le semōnit vostre dit frere à dīner avec luy, le Dimāche ensuiuant, qui le luy accorda, jaçoit qu'il luy gardast telle faulse & corrompue pensēe, de le faire ainsi meurtir honteusement, & vilainemēt, qui est chose trop abominable, & horrible, à ouyr seulement racompter. Le lendemain nonobstant toutes les promesses, & choses dessus dictes, il, comme obstinē en son desloyal propos, & en mētant à executiō sa cruelle & corrompue volōntē, le fait meurtir le plus cruellement, & le plus inhumainement, qu'on veit oncques homme, de quelque estat qu'il feust, par ses meurtriers alloüez & affectez comme dict est, & qui ja par long temps l'auoient espiē & aguettē. Car ils luy coupperent vne main toute jus, laquelle demeura en la boüe iusques au lendemain. Apres il luy coupperent l'autre bras par dessus le coude, tant qu'il ne tenoit qu'à la peāie, & outre luy fendirent & accrauanterent toute la teste en diuers lieux, & tant, que la teste en cheut presque toute en la boüe, & le remuerent, roullèrent, & trainerent, iusques à ce, qu'ils veirent qu'il estoit tout roide mort. Qui est, & seroit yne tres-grande douleur, pitié, & horreur, à ouyr reciter du plus bas hōme, & du plus petit estat du monde. Ne oncques mais le sang de vostre noble Maison de France, ne feut si cruellement, & honteusement respandu, ne dont vous, ne ceux de vostre sang, & tous vos subiets & bien-veüllās, deuez auoir tel dueil, courroux, & desplaisance, & mesmement, la chose demeurant sans punition & reparation quelconque, comme elle ha fait iusques icy. Qui est la plus grand vergongne, & la plus honteuse chose, qui oncques aduint, ne pourroit aduenir à si noble Maison. Et seroit encores plus, si la chose demouroit longuement en tel estat.

Tiercement, par les faulses, faintes, & damnables manieres tenües, par le dict traistre meurtier, apres l'accomplissement du dict tres-horrible & detestable meurtre. Car il vint au corps, avec les grands Seigneurs de vostre sang, se vestit de

noir, feut à son enterrement, saignant pleurer, & faire dueil, 1411.
 & auoir desplaisance de sa mort, cuidant par ce, couvrir, celer,
 & embler son mauuais peché, & teint au regard de ce, plu-
 sieurs autres faintes & damnables manieres, à vous & à ce
 Royaume toutes notoires, qui trop longues seroient à reciter.
 Et en ceste faintise perseuera, iusques à ce qu'il cōgneut, & ap-
 perceut, que son meffait venoit en clairté, & lumiere, & estoit
 ja congneu & descouuert, par la diligence qu'on auoit fait. Et
 lors il confessa ouuertement au Roy de Sicile, & à Monsei-
 gneur de Berry vostre Oncle, auoir commis, & fait perpe-
 trer & commettre le dict meurtre. Et dict, que le diable l'a-
 uoit tenté, & surprins, lequel luy auoit fait faire, sans autre
 cause, ou raison quelconque y assigner. Et aussi estoit ce la ve-
 rité. Et non content d'auoir vne fois tué & meurtri si damna-
 blement son cousin germain, vostre seul frere, comme dict
 est: mais en perseuefant en l'obstination de son tres-deloyal,
 faulx, & mauuais couraige, s'est efforcé de le tuer, & meurtrir
 encores vne fois, c'est à sçauoir de vouloir esteindre, damner,
 & effacer entierement sa memoire & renommée, par faulx
 mensonges, & controuuées accusations, comme la Dieu gra-
 ce, il vous est bien apparu notoirement, & à tout le mon-
 de.

Pour occasion duquel faulx & traistre meurtre, nostre tres-
 redoubté, & souuerain Seigneur, nostre tres-redoubtée Dame,
 & mere à qui Dieu pardoint, si tres-desolée, & desconfortée,
 comme Dame, & creature queleconque pouuoit estre pour la
 perte de son Seigneur, & mari, & mesmement pource qu'on le
 luy auoit osté par si faulse maniere, au plus tost qu'elle peut,
 apres le cas adueni se retrahir par deuers vous, & je Iean en sa
 compaignée, comme à son Roy, & à son singulier secours, &
 refuge, en vous suppliant le plus humblement qu'elle sceut, &
 peut, qu'il vous pleust de vostre benigne grace la regarder, &
 nous aussi ses enfans, en compassion & pitié. Et du dict meurtre,
 si damnablement perpetré & commis, auéré, & confessé publi-
 quement par le dict traistre meurtrier, luy feissiez, & admini-
 strissiez raison, & Iustice, telle, & si grande, & si prompte-
 ment, comme il appartenoit, & appartient bien au cas, consi-
 deré l'enormité d'iceluy, & comme vous estiez, & estes tenu,
 & obligé de faire. Cōme parce que c'est le vrai, & droict propre

1411. don de chascun Roy, que administrer Iustice, & en est vrai débiteur à ses subiets. Et laquelle, sans requeste quelconque de partie, de son Office, il doibt indifferemment à vn chascun administrer, tant au pauvre, comme au riche. Et plus tost, & plus promptement, se doibt exciter, & esueiller à l'encontre d'un riche & puissant, que alencontre d'un pauvre, car lors en est-il besoing. Et aussi adonques à proprement parler, Iustice exerce sa vraie operation, & doibt lors vraiment estre appelée vertu. Et à ce, & par ce, principalement & directement furent Roys establis, & ordonnez, & forte Seigneurie, & puissance mises en leurs mains, pour icelles puissamment & vertueusement exercer, & mesmemēt quand les cas sy offrent, & le requierent, ainsi que fait le cas present, comme parce que la chose en vostre chef, & en vostre nom, vous touche si grandement, comme chascun sçait. Car son dict Seigneur, & mari, & nostre tres-redoubté Seigneur, & pere, ainsi mauuaiselement meurtri, estoit vostre seul frere germain. Laquelle Iustice, vous luy accordastes faire. Pour laquelle obtenir, elle eut ses gens continuellement par deuers vous, pour icelle vous ramenteuoir, & solliciter tres-diligemment. Laquelle administration de Iustice, elle attendit iusques au iour assigné, & encores treslonguement apres. Et pource que rien ne pouuoit obtenir, pour quelconques diligences qu'elle en feist faire, obstans les empeschemens & destourbiers qui y feurent mis, par le dict traistre, ses seruiteurs, & Officiers estans entour vous, cōme cy-apres sera dict, jaçoit nostre tres-redoubté, & souverain Seigneur, que nous sçauons certainement, que vous auez eu tousiours depuis, & encores auez tres-grande, & bonne affection, & volonté à icelle nous administrer. Nostre deuant dite tresredoutée Dame, & mere, retourna par deuers vous en propre personne, & je Charles en sa cōpaignée, en poursuiuant sa requeste, en vous requerant tres-instamment, que vous luy feissiez administrer Iustice. Et par deuant nostre tres redoubté Seigneur, Monseigneur de Guyenne, vostre aîné fils, & vostre Lieutenant quant à ce, tant de raison, comme par certaine commission, & puissance sur ce par vous donnée à Madame la Roïne, à luy, & à chascun d'eulx pour le tout, fait faire certaine proposition, contenant bien au long la maniere du dict meurtre, & les causes pour lesquelles il feut commis, & per-

perpetré, & aussi les responses, & iustifications, à certaines faulces, mauuaises, & desloyales accusations, mises en auant par le dict traistre meurtrier, en certaine proposition par luy faicte, par deuant nostre dict tres-redoubté Seigneur, Monseigneur de Guyenne, pour vouloir tortionnairement, & à force, pallier, & couvrir son mauuais meurtre. Et apres la proposition faicte, par nostre dicte tres-redoubtée Dame, & mere, elle fait faire & prendre ses conclusions alencontre du dict traistre meurtrier, telles, comme elle les peut prendre & eslire, selon la coustume, stile, & vsage de vostre Royaume, & requit que vostre Procureur feust adjoinct avec elle, pour faire les cōclusions conuenables, appartenans au cas, pour l'interest de Iustice. Apres lesquelles choses ainsi faictes, nostre dict tres-redoubté Seigneur, Monseigneur de Guyenne, par le conseil des Seigneurs de vostre sang, & autres de vostre Conseil, estans deuers luy en vostre chastel du Louure, respondit à nostre dicte Dame, que luy comme vostre Lieutenant, & representant vostre personne en ceste partie, & les Seigneurs de vostre sang, & ceux de vostre Conseil, estoient tresbien contents, & auoient tres-agreables les responses, & iustifications proposées par nostre dite Dame, & mere, pour vostre frere, à qui Dieu pardoint, nostre tres-redoubté Seigneur, & pere, & qu'elle l'auoit tresbiē excusé, & deschargé. Et que au surplus on luy feroit si tresbonne response, & prouision de Iustice, sur les choses par elle requises, qu'elle en deburoit estre contente. Et jaçoit que nostre dite Dame & mere, poursuiuiſt, & feist poursuiure tresdiligemment, & tres-instamment la dicte response, & eust derechef fait faire vne supplicatiō, faisant mention de tout ce que dict est, concluant, & tendant aux fins dessus dictes, à ce qu'elle peust obtenir quelque prouision de Iustice, laquelle vous feut presētée, & baillée en vostre main. Et fait en ceste matiere, plusieurs autres notables & grandes diligences, à vous, & aux Seigneurs de vostre sang, & à ceux de vostre Conseil notoires, & bien manifestes, qui seroient trop longues à reciter. Neantmoins elle ne peut oncques aucune chose obtenir, non mie seulement adjoinctiō de vostre dict Procureur, qui est vne pitieuse chose à recorder. Car le dict traistre meurtrier, voiant & congnoissant vostre inclination, & la grande & bonne volonté, que vous auiez à faire & administrer bonne Iustice. Sçai-

1411. chant aussi qu'il ne pouuoit iustifier son meffait en maniere quelconque, pour icelle destourber, & du tout empescher, outre, & par dessus les defenes, par vous à luy faictes, si solemnellement, & notablement par vos leſtres patentes, & par vōs meſſaigers ſolemnels, à ceſte fin enuoiez par deuers luy, veint en voſtre bonne ville de Paris, à puissance de gens d'armes, les pluſieurs eſtrangers, & bannis, qui feirent en voſtre Royaume pluſieurs grands & irreparables dommaiges, comme c'eſt choſe toute notoire. Et vous conuiat pource auant qu'il y arriuaſt, partir de Paris, comme auſſi noſtre tres-redoubtée Dame, Madame la Royne, & noſtre tres-redoubté Seigneur, Monſeigneur de Guyenne, & les autres Seigneurs de voſtre ſang, & les gens de voſtre Conſeil. Et il demeura en voſtre diſte ville de Paris, à tout ſa puissance, où il teint pluſieurs mauuaiſes, & eſtranges manieres, au regard de vous, de voſtre Seigneurie, & de voſtre peuple.

Et tant, qu'il conuiat pour eſcheuer les diſts grands inconueniens, & oppreſſions, qui eſtoient faictes à voſtre diſt peuple par luy, & ſes gens d'armes, vous, noſtre tres-redoubtée Dame Madame la Royne, noſtre diſt tres-redoubté Seigneur, Monſeigneur de Guyenne, & autres de voſtre ſang, veinſſiez tout à ſon bon plaſir en voſtra ville de Chartres, pour luy faire illec oſtroier, paſſer, & accorder, tout ce qu'il vouloit, & auoit aduiſé eſtre faict, pour ſoy cuider deliurer & deſcharger à tous jours mais, du diſt faulx & traître meurtre, & generallyment de tout, par ſa force, violence, & tyrannique puissance, par laquelle il ha notoirement tenu, & encores tient voſtre Juſtice deſſoubs ſon pied. Et n'ha ſouffert aucunement que vous, ne vos Officiers, ayez eu, ne ayez encores de preſent, aucune congnoiſſance ſur ſon peché, ne ſur ſon meſſeſt. N'y ne ſ'eſt daingné en maniere quelconque humilier enuers vous, que il ha tant courroucé, & offenſé par ce que diſt eſt, ne auſſi enuers voſtre Juſtice, ne ſoy meſtre en quelconques termes de raiſon: ains ha eſté à vous, & à ceux de voſtre ſang, en tout, & par tout deſobeiſſant, & qui pis eſt, les ha en toutes manieres efforcé, & violé. Parquoy par ce qui ſera diſt cy-apres, ſelon tous droiſts, & raiſons eſcriptes, eſt choſe claire, que tout ce qui feut faict à icelle journée, eſt, & doit eſtre diſt nul, & de nulle valeur. Ioinſt qu'au diſt

lieu de Chartres , le dict traistre meurtrier , veint en vostre presence à vne certaine journée à l'Eglise Cathedrale d'iceluy lieu. Et par l'un de ses Conseillers vous fait dire , & exposer, comme pour le bien de vous , & de vostre Royaume, il auoit fait mourir vostre frere. Et pource vous prioit que si aucune indignation, auiez pour ce conceüe alencontre de luy, qu'il vous pleust l'oster de vostre cœur. Et s'efforce , & veut maintenir, qu'il luy feut dict de par vous, qu'en la mort de vostre frere, n'auiez prins aucune desplaissance, & luy pardonniez tout. Or pour Dieu, nostre tres-redoubté & souuerain Seigneur, plaïse vous considerer , & bien penser à la forme & maniere de ceste requeste , & de ceste supplication , & les manieres que le dict traistre meurtrier , ha en ce tenu au regard de vous son Roy, son souuerain Seigneur. Car luy qui vous auoit tant courroucé & offensé, qu'on ne pourroit assez dire , & qui selon les droïts & raison escripte, n'est capable, ne prenable de pardon, ne grace quelconque. Et encores qui plus est , n'est digne, n'y ne luy est loisible , de venir en vostre presence, ne d'y auoir aucun acces, ne autre pour luy. Et si aucunement de vostre benigne grace , permis luy estoit, il debuoit venir en toute humilité, & tres-grande & singuliere recongnouissance , & repentance de son meffait, ha par ce que dict est, formellement fait tout le contraire. Car en perseuerant en l'orgueil , & obstination de son faulx couraige, il vous ha osé dire notoirement deuant tout le monde, & en lieu si notable, qu'il auoit fait mourir vostre frere pour le bien de vous , & de vostre Royaume. Et veut maintenir qu'il luy feut dict de par vous, que vous n'y auiez aucune desplaissance. Qui est si grand horreur , & si tres-grand douleur , à tout bon cœur, ouïr seulement recorder . que plus grand ne pourroit estre , & encores sera plus grand à ceux qui viendront apres vous, fils lisent, & trouvent en escriptures notables, qu'il soit parti de la bouche du Roy de France , (Qui est le plus grand Roy des Chrestiens,) que en la mort de son frere germain, si honteuse, cruelle, traistreuse, & inhumaine, il n'ait point prins de desplaissance. Lesquelles choses, nostre tres-redoubté & souuerain Seigneur, sont faites, & redondent clairement, en si tres-grand lesion, & vitupere de vostre honneur, de

1411. vostre Couronne, & de vostre Majesté Royale, qui y sont tellement bleffez, & foulez, que à peine est-ce chose repa-
rable. L'ordre aussi, & l'estat de toute Iustice, y sont si gran-
dement contemnez, & peruertis, que oncques tant ne furent,
ne plus ne pourroïent estre : & mesmement du subiet au regard
de son souuerain Seigneur, cõtre le biẽ, & la paix commune de
ce Royaume, qui iusques ores ha tousiours esté si grãd sur tous
les Royaumes du monde. Auec ce, que la dictẽ requeste, feut
causée de faulx & notoires mensonges. Car aiant faict faulse-
ment & traistreusement mourir vostre seul frere germain,
par mauuaise haine couuerte, & pourpensée de longue main,
& par ambition de seigneurier, & dominer, & auoir le gou-
uernement en vostre Royaume comme dict est, en la presence
de plusieurs ses seruiteurs, Il dit que oncques mais en ce Roy-
aume, si mauuais, ne si traistre meurtre, n'auoit esté commis,
ne perpetré : & toutesfois il disoit en sa Requeste, qu'il l'auoit
faict pour le bien de vous, & de vostre Royaume. Parquoy est
chose trop claire, selon tous droiẽs & raisons escriptes, que
comme dessus est dict, tout ce qui feut là faict à la dictẽ journée
de Chartres, est nul, & de nulle valeur. Et qui plus est, digne de
plus grand peine, & punition, il ne vous daigna oncques tant
reuerer, priser, ne honnorer, que de si grand, & detestable
mesfaict, dont il estoit, & est si notoirement chargé, il vous
requit remission, grace, ne pardon quelconque. Et tou-
tesfois il veut maintenir que sans confesser son mesfaict, &
sans en demander grace, vous le luy auez pardonné, qui est
selon tous droiẽs & raison escripte, vne chose delusoïre, &
illusoïre, & à proprement parler, vne vraie derision, & moc-
querie de Iustice, C'est à sçauoir, pardonner à vn pecheur sans
congnoissance de son peché, sans contrition, sans repentance,
sans en daigner faire requeste, ne supplication quelconque. Et
qui pis est, perseuerant notoirement, & mesmement en la pre-
sence de son Seigneur, en l'obstination de son peché. En ou-
tre, tout ce qui feut faict à la dictẽ journée, contient erreur
manifeste, & le destruisement & des-honneur clair, & euidẽt
de vous, & de vostre Royaume, & de toute la chose public-
que, aussi y appert il contradiction. Car il se dict auoir bien
faict, & par consequent ouuertement il requiert auoir me-
rite & remuneration. Et toutesfois il veut maintenir, que

vous luy auez octroyé grace, & pardon, qui ne chet point en bienfaict : mais en peché, & en demerite. Encores plus, car il n'y feut aduisé, ordonné, ne parlé chose quelconque, pour le salut de l'ame du trespaslé, & pour faire satisfaction à la partie blessée, laquelle vous ne pouuez, ne debuez remeestre en maniere quelconque. Si appert trop clairement, par ce que dict est, que ce qui feut faict au dict lieu de Chartres, feut faict contre tous les principes de droict, contre tout l'ordre & principe de raison, & iustice, & en violant iceux en tout, & par tout. Default aussi en ses principes essentiaux. Parquoy, & par autres choses qui seroient trop longues à escrire, appert notoirement, comme dict est, que ce qui feut faict au dict lieu de Chartres, ne vault rien, n'y n'est pas chose digne de recitation.

Et si aucuns vouloient dire, qu'il eust aucunement tenu & valu, si est-il chose trop claire, par ce que cy apres sera dict, que le dict traistre meurtrier est venu directement alencontre d'iceluy, & la forcé & violé en plusieurs & diuerses manieres. Car içoit que au dict lieu de Chartres, vous, nostre tref-redoubté & souuerain Seigneur, luy eussiez commandé, qu'il ne nous mellest dès lors en auant, & pourchassast aucune chose, qui feust à nostre preiudice, dommage, ou deshonneur, & que ainsi l'eust promis, & juré, neantmoins il ha faict le contraire. Car pour cuider damner la bonne memoire de nostre trefredoubté Seigneur, & pere, & pour nous cuider destruire, & desheriter à tousiours mais, il feit prendre vostre bon & loyal seruiteur, vostre Maistre d'hostel, à qui Dieu pardoint, & le feit emprisonner, & inhumainement gehennier, questionner, & tourmenter, tellement que ses membres par force de gehenne, feurent tout desrompus. Et par force & violence de martire, qu'il luy feit souffrir, l'efforça de luy faire confesser alencontre de vostre frere, nostre tref-redoubté Seigneur, & pere, à qui Dieu pardoint, aucunes des charges, qu'il luy auoit aucunes fois faulxement imposé, & mauuaiselement mis sus, pour vouloir couvrir son mauuais meurtre. Et pource essai, & voulut derechef effeindre, effacer, & damner la memoire de vostre dict frere, & tendre à vostre destruction. Et le dict grand Maistre feit mener au lieu de sa mort, lequel deuant les yeux, affirmas publicquement, & print sur la damnation de son ame,

1411. que oncques iour de sa vie, il n'auoit sceu, ne apperceu, que le dict feu nostre tres-redoubté Seigneur, & pere, eust pensé, machiné, ne traicté chose, qui feust contre le bien de vostre personne. Et pareillement aussi n'auoit-il: mais l'auoit bié, & loyaument serui toute sa vie. Et si aucune chose il auoit dict, ou confessé au contraire, ce auoit esté, par la force de la tres-inhumaine gehenne, & tourmens qu'on luy auoit fait, dont il auoit eu les membres tous cassez & desrompus, comme dict est. Et ainsi le prenoit sur le peril de son ame, & sur la mort qu'il attendoit à recepuoir presentement. Et en icelle affirmation perseuera iusques à la mort, presens plusieurs cheualiers, & autres notables personnes. Et par ce appert trop clairement, qu'il est venu de fait, & directement alencontre de ce qu'il iura, & promit au dict lieu de Chartres. En apres, Il ha recepté, recelé, & nourri, & encores fait chascun iour les meurtriers, qui à son commandement tuerent vostre dict frere. Et toutesfois ils feurent exceptez, & mis hors, de ce qui feut fait au dict lieu de Chartres. Plus, il ha'en toutes manieres, comme c'est chose toute notoire, vexé, trauaillé, & persecuté, les Officiers, & seruiteurs de vostre dict frere, & les nostres, & les ha fait desapoincter de leurs Estats, & de leurs Offices, qu'ils auoient entour vous, & en vostre Royaume, sans occasion, ne cause quelconque; mais seulement en haine & contempt des seruiteurs de vostre dict frere, & de nous. Et les aucuns ha voulu destruire de corps, & de cheuance, & s'est essayé de les vouloir faire mourir. Et toutesfois auoit il iuré & promis. Et en plusieurs autres, & diuerses manieres, qui seroient trop longues à raconter, est venu alencontre, comme c'est chose toute notoire. Apres toutes lesquelles choses, le dict traistre meurtrier, voyant, & congnoissant plainement l'horreur, & la cruauté de son meffait, & qu'il ne le pouuoit couvrir, ne palier en maniere quelconque, afin que vous, ne vos Officiers, n'eussiez aucune congnoissance de son meffait. Et pour mestre aussi à execution la vraie cause, pour laquelle il feit mourir vostre dict frere, c'est à scauoir pour seigneurier, & dominer, il ha de fait vsuré, & encores vsurpe l'auctorité, & le gouuernement de vous, & de vostre Seigneurie, & de vostre Royaume, desquels il ha vsé plainement, comme de sa propre chose. Et qui pis est, & doit estre chose plus que lamentable à tous vos subiects, &

bien vucillans, Il ha detenu, & detient encores en telle & si grande subiection vostre personne, & celle aussi de nostre tres-redoubté Seigneur, Monseigneur de Guyēne, vostre aîné fils, qu'il n'est personne de quelque estat qu'il soit de ce Royaume, ne autre, qui puisse auoir acces à vous, pour quelque cause que ce soit, sinon par le congé, & licence de ceux qu'il ha à ce commis, & ordonné entour vous à ceste fin. Et ha debouté d'entour vous, les anciens bien vaillants hommes, qui vous ont longuement & loyaument serui, & ha rempli leurs lieux & places de ses propres familiers, & seruiteurs, & autres tels qu'il luy ha pleu, & la plus grand partie, gens estrangers, & à vous incongneus. Et semblablement à nostre tres-redoubté Seigneur, Monseigneur de Guyenne, ha aussi desappoincté ses Officiers, & par especial, en tous les notables Estats, & Offices de vostre Royaume. Et les biēs, & substāce de vous, & de vostre Royaume, ha departi, où il luy ha pleu, & appliqué à son singulier profit, sans l'employer aucunement au bien de vous, ne à aucun releuement de vos subiects. Les autres, soubz aucunes saintes couleurs de Iustice, ha vexé, trauaillé, & rançonné, & à proprement parler, desnüé de leurs cheuances, lesquelles il ha appliqué & conuerti presentement à ses propres vsaiges, & vtilitez, comme c'est chose toute notoire à Paris, & ailleurs. Bref, il ha ouuert, & introduit en ce Royaume, les voyes de faire & commettre tous crimes & malefices indifferemment, sans en prendre, ne attendre punition, ne correction quelconque. Et tant, que soubz ombre de la faulte, & negligence, d'auoir fait Iustice du dict tres-enorme, & detestable meurtre, plusieurs autres crimes, & malefices ont esté commis en plusieurs & diuerses parties de vostre Royaume, depuis le dict cas aduenü. Disans les dicts malfaiçteurs, que aussi bien passeroiēt ils sans estre punis, comme faisoit celuy, qui auoit meurtri le frere du Roy. Qui est ouuerture d'une tresgrand playe, & la plus, qu'on puisse meētre en vne Seigneurie.

Et pource nostre tres-redoubté, & souuerain Seigneur, Monseigneur de Berry, vostre Oncle, le Duc de Bourbon, le Comte d'Alençon, le Comte de Richemont, & le Comte d'Armaignac, & ie Charles en leur compaignée, en voulant enuers vous acquieter nos foy & loyauté, en quoy nous sommes nus, & astrainés, Nous comme vos tres-humbles parens, &

1411. subiets, nous mesmes ensemble l'année passée, en propos, & intention, de venir par deuers vous, vous remonstrer les choses dessus dictes, le tresdarnable gouuernement de vostre Royaume, & la prochaine, & euidente desertion, & destruction totale d'iceluy, si les choses demeurent longuement en cest estat. A ce que nous ouis, ceux aussi, si aucuns en y eut, qui voulussent aucune chose dire au contraire, vous nostre tres-redoubté, & souuerain Seigneur, par l'aduis, deliberation, & conseil de ceux de vostre sang, & des gens de vostre Conseil, des Prelats, Seigneurs, & Barons, & des preud'hommes de vostre Royaume, tels, & en tel nombre, comme il vous eust plu estre à faire, eussiez remedié aux inconueniens aduenus, & qui autrement necessairement estoient, & sont en aduenture de aduenir bien prochainement, en la liberté, franchise, & seureté de vostre personne, & de nostre tres-redoubté Seigneur, M^oseigneur de Guyenne, vostre aîné filz. Et en apres feut mis ordre au bien, & bon gouuernement de vostre Royaume, de vostre Iustice, & de toute la chose publique d'iceluy, & au profit de vous, & de tous autres vos subiets, comme ces choses estoient plus à plain contenües en nos lettres patentes, que nous vous enuoïasmes. Et lors veinîmes auprès de Paris, où vous estiez. Et combien que pour la seureté de nos personnes, nous feussions accompagnez de nos parens, & amis, & vassaux, tous vos subiets, & veinîsions tous en vostre seruice, & seulement pour le bien de vous, & de vostre Royaume, comme dict est: neantmoins nous offrîmes nous venir par deuers vous, en compaignée modérée. Toutesfois nous n'y peûmes oncques auoir vn seul acces, ne vne seule audience, obstans les empeschemens, & destourbiers, qui y feurent mis par le dict traistre meurtrier, qui estoit tousiours au plus pres de vous, en empeschant si tresgrand bien, comme nous auions intention, & propos de faire, en perseuerant tousiours en l'obstination de son couraige, & en ambition de cōuoitise, qu'il ha tousiours eu, de seigneurier, & dominer, & d'auoir l'auctorité, & gouuernement de vous, & de vostre Royaume. Et nous conuint par certain appointement fait & prins par vous, & par vostre Conseil, retourner en nos pays, & faire departir nos g^s, pour escheuer la destruction de vostre peuple. Lequel appointement de nostre costé nous accomplîmes reellement, & de
fait,

fait, en tant qu'il nous touchoit. Mais il vint tantost alencontre, & le viola incontinent. Car entre autres choses, il feut appointé que ceux qui demeureroient entour vous en vostre Conseil, seroient gens non suspects, non fauorables, & non ayans pension de l'une, ou de l'autre des parties. Et il y ha laissé ses seruiteurs, & ses Officiers creéz par luy, & sont les plus principaux entour vous, & nostre dict tref-redoubté Seigneur, Monseigneur de Guyenne. Et les autres, pour la plus grand partie tous assermentez à luy. Par le moyé desquels il ha tousiours l'auctorité, & le gouvernement de vous, & de vostre Royaume, & mieux, & plus seurement, que s'il y estoit en personne. Et ainsi n'est aucunement pourueu aux dicts inconueniens, mais tousiours croissent chascun iour, & encores croistront plus, si Dieu, & vous, n'y mettez brief remede. Et d'auantaige, iacoit que Pierre des Essars, lors Preuost de vostre ville de Paris, & gouverneur de vos finances, par le dict appointement, deust estre desappointé de tous Offices Royaux, & de tous les estats, qu'il auoit entour vous. Neantmoins il luy fait auoir secretement vos lettres patentes, seellées de vostre grād seel, pour retourner à l'Office de la dicte Preuosté, soubz ombres desquelles, le dict Pierre est depuis retourné à Paris, & s'est efforcé de retourner, & entrer au dict Office de Preuosté. Et de fait, est venu au Chastellet de Paris, seoir en siege, & prendre la possession du dict Office. Et le tout, par l'ordonnance, sceu, & volonté du dict traistre meurtrier. Et n'est pas demeuré par luy, que la chose n'ait sorti son effect. Parquoy apert le dit appointemēt, estre violé de son costé. Et qui pis est, en faisant mesmes le dict appointemēt, il pourchassoit secretement le contraire d'iceluy, & en soy le rôpoit, & forfaisoit. Car en consentant le desappointement du dict Pierre des Essars, il pourchassoit secretemēt, qu'il feust appointé derechef, cōme dict est. Parquoy est chose trop manifeste, que oncques iour de sa vie, n'eut propos, volonté, ne intention de le tenir en aucune maniere. En outre, iacoit que par le dict Traicté, il eust esté appointé, que tous ceux qui auroient esté desappointez de leurs estats & Offices, soubz ombre d'auoir esté en la compaignée de moy Charles, & des autres Seigneurs dessus nommez au dict lieu de Vicestre, seroient restituez & reestablis en leurs Offices. Et que par l'Ordonnance de vous, & de vostre

Mm

1411. grand Conseil, entre les autres Messire Jean de Garencieres, eust esté remis, & restitué en l'Office de la Capitainerie de vostre ville de Caen. Neantmoins en directement venant alencontre le dict traistre meurtrier, l'ha fait depuis oster, & desappoincter du dict Office, & l'ha impetré pour soy-mesmes, en contempt, & haine du dict de Garencieres. Et de fait, tient & occupe le dict Office. Parquoy il appert trop clairement, qu'il ha violé & rompu le dict Traicté, en plusieurs, & diuerses manieres.

Et combien nostre tres-redoubté & souuerain Seigneur, que par nostre tres-redoubtée Dame & mère, à qui Dieu pardoint, aient esté faites les diligences dessus dictes, à ce que Iustice luy feust administrée, du dict mauuais, & damnable meurtre, & qu'il y ait ia pres de quatre ans, que le cas est aduenu, sans toutesfois que elle, ne nous, aions peu obtenir vne seule prouision de Iustice, En ensuiuant les voyes par elle prises, ie Charles, vous ai naguieres supplié treshumblement, qu'il vous pleust me donner, & octroyer vos lettres en termes de Iustice; alencontre des consentans & complices du dict meurtre. C'est à sçauoir vos lettres adressans à tous vos Iusticiers, que ceux qui par information deüe, se trouueroient chargez, & coupables des choses dessus dictes, ils preinsent, & emprisonnassent, & en feissent telle raison & Iustice comme au cas appartient, & ne estoit que pour exciter, & esueiller Iustice. Car de son Office, sans ma requeste, ne d'autre quelconque, elle le doibt, & est tenue de faire. Et ne croy mie, qu'il y ait en vostre Royaume homme, de quelque estat, ou condition qu'il soit, tant soit pauvre, ou de bas estat, à qui on les refusast en vostre Chancellerie en cas pareil, & à moindre trop, tât sçai-ie bien qu'on ne les deburoit pas refuser. Et toutesfois pour quelque diligence, que i'en aye sceu faire, ie n'ai peu obtenir les dictes lettres de Iustice. Et tient, pource qu'il en y ha aucuns en vostre Conseil, qui se sentent chargez des choses dessus dictes, & pource n'ont pas conseillé l'enterinement de ma supplication, & requeste. Pourquoy mon tres-redoubté & souuerain Seigneur, ie vous ai naguieres supplié treshumblement, comme plus pouuois, qu'il vous pleust pour le bien de vous, & de vostre Royaume, debouter, & mettre hors d'entour vous certaines personnes, que ie vous ai nom-

mé, & déclaré par mes lectres, qui notoirement empeschent le bien de Iustice, & le bon gouuernement de vous, & la paix commune de vostre Royaume, & empeschent tant qu'ils seront entour vous. Et ce faict, i'estois prest pour l'amour & reuerence de Dieu premierement, & de vous apres, & aussi pour le bien de vostre Royaume, sur les choses à moy naguieres dictes de par vous, par vos Ambassadeurs qu'il vous ha pleu à moy enuoier, vous donner, & faire telle response, descouurir aussi tellement & si clairement nos intentions, & propos, que Dieu, vous, & tout le monde en deburiez estre contents. De quoy, comme en la requeste precedente, ie n'ai peu par semblable cause, aucune chose obtenir.

Si vous supplions, nostre tref-redoubté & souuerain Seigneur, tant humblement, comme plus pouuons, que attendu & considéré ce que dict est, c'est à sçauoir l'enormité du dict meurtre, lequel on ne pourroit assez detester, ne blasmer, la notorieté d'aceluy, la confession de partie, qui l'ha confessé notoirement, & publicquement, Tant en iugement, par deuant nostre tref-redoubté, & souuerain Seigneur, Monseigneur de Guyenne, vostre aîné fils, & plusieurs de vostre sang, ceux aussi de vostre Conseil, & tref-grande multitude de vostre peuple, sur ce assemblée à la requeste, en vostre hostel de Saint Paul, & nostre tref-redoubté Seigneur, Monseigneur de Guyenne, seant en iugement, (comme représentant vostre personne, qui estes son Roy, son Iuge, & son souuerain Seigneur, & le nostre :) que hors iugement par deuant tels, & si notables tesmoins, comme le Roy de Sicile, & Monseigneur de Berry, vostre Oncle, par deuant lesquels il confessa purement, simplement, & absolument, sans cause, ou raison quelconque y assigner, fors seulement, qu'il l'auoit faict par la tentation de l'ennemi. Et depuis aussi l'ha confessé en plusieurs autres lieux, tant par deuant vous, comme par deuant plusieurs autres personnes notables. Laquelle confession ainsi faicte, selon toute raison escripte, & selon tous droicts & vsaiges notoirement obseruez, vault & doit valoir en son preiudice, ne iamais il ne doit estre receu à dire le contraire de sa confession, ne à la coulourer, ou iustifier autrement, qu'il feit premierement, par la-

M m ij

1411. quelle confession, il se damna luy mesmes de sa propre bouche, & iecta sur luy sa Sentence. Et est chose trop claire, que apres la dicte confession, il ne conuient faire encontre luy autre solemnité de proces, ny ne git la chose en aucune examination, ne congnoissance de cause. Et aussi selon raison, ne reste fors seulement prompte punition, & execution de Iustice, ne n'y affiert aucun delai. Et toutesfois par ce que dict est, nostre tres-redoubtée Dame, & mere, à qui Dieu pardoint, & nous aussi en l'ensuiuant, auons fait en ceste matiere toutes diligences possibles à tres-grandes instances, & souffert, & attendu treslonguement, & par treslongs delais. Car il y ha ia trois ans & demy passez, que ceste poursuite commence, sans ce que, comme dict est, nous y puissions oncques obtenir vne seule prouision de Iustice, ne appercevoir en maniere quelconque, que Iustice s'en vueille aucunement entremestre. Qui est, & sera, vne tres-douloureuse, & piteuse chose à ouyr seulement racompter. Attendu aussi, & considéré, les grands maux, dommaiges, & inconueniens par ce aduenus en vostre Royaume, & qui necessairement y aduiendront encores plus grands, si ce cas n'est réparé. Car comme vous pouuez veoir, & congnoistre clairement, depuis le dict meurtre aduenu, ce Royaume est tousiours cheu en inconueniens de plus en plus, & de petit en plus grand. Et aussi est-ce le droit propre du default de Iustice, de engendrer, nourrir, & multiplier tous inconueniens. Pource vous plaist de vostre grace, en faisant le debuoir de vostre Office, & en obeissant à Dieu nostre Createur, duquel le fait de Iustice despend, & procede, & la tenez de luy nuement. Et aussi eu regard & consideration en pitié, au bon maintienement de vostre Seigneurie, & de vostre Royaume, vous exciter, & esveiller, & promptement, plus grands delais arriere mis, vous employer à la dicte execution de Iustice. Et de ce, en si tres-grande humilité, comme nous pouuons, vous supplions, & requerons, & sommons tres-instamment, & comme nostre tres-redoubté & souuerain Seigneur, selon les droits, desquels les liures sont tout plains, il nous soit loisible, & permis pourchasser, par toutes voyes, tant de fait, comme autrement, la reparation du dict meurtre, & de l'honneur de nostre dict tres-redoubté Seigneur &

Pere, à qui Dieu pardoint, ainsi blesez de faict. Mais qui plus 1411.
est, sommes à ce tenus, & obligez, & nous est commandé par
les droicts, à tres-grandes & grosses peines. C'est à sçauoir, en
peine d'encourir tache de infamie, de non estre cenféz, ne re-
putez ses enfans, ne luy appartenir en aucune maniere, estre re-
putez indignes de sa succession, de son nom, de ses armes, & de
sa Seigneurie. Laquelle nous ne deuons, ne voulons encourir,
plustost vouldrions souffrir la mort, & si deburoit faire tout
noble cœur, de quelque estat qu'il soit. Nous vous supplons
doncques tant & si humblement comme plus pouuons quant
à ce, & aussi pour resister, & debouter la mauuaise intention
qu'il ha alencontre de nous, tendant en toutes voies à nostre
destruction, il vout plaise de vostre benigne grace, nous, à qui
Dieu ha fait tant de grace, qu'il nous ha fait naistre en ce mon-
de vos parés, & si prochains de vostre lignaige, cōme vos nep-
ueus, enfans de vostre seul frere germain, aider, secourir, &
conforter de vostre puissance, & à proprement parler, vous
plaise aider, secourir, & conforter vostre dict frere, duquel en
ceste partie nous demenons, & entendōs à demener la cause.
Helas nostre tres-redoubté & souuerain Seigneur, il n'est si
pauvre gentil-homme, ny homme de si bas estat en ce Royau-
me, ne autre quelconque, à qui on eust si traistrement &
cruellement meurtri & tué son pere, ou son frere, que il, ses
parens, & amis, ne se feissent partie, & ne poursuivaissent ius-
ques à la mort, alencontre du dict meurtrier. Et mesmement
le dict malfaieteur perseuerant de plus en plus, en l'obstination
de son cruel, & faux couraige, comme faict netoirement le de-
uant dict traistre meurtrier, qui naguieres vous ha osé escrire
& en plusieurs autres lieux notables, qu'il ha faict mourir vo-
stre frere, à qui Dieu pardoint, nostre tres-redouté Seigneur,
& pere, bien, & deüement. Desmentant pour occasion de ce,
moy Charles en plusieurs lieux, à quoy pour le present ie me
desporte de respondre plus auant. Car comme dessus est dict,
il vous appert bien claiement, qu'il est menteur, mauuais, faux,
traistre, & desloyal meurtrier. Et moy, la Dieu grace, ai trou-
jours esté, suis, & ferai net, sans reproche, & vrai disant. Nostre
tres-redoubté & souuerain Seigneur, nous prions au be-
noist fils de Dieu, qu'il vous doint tres-bonne vie, & longue.
En tesmoing de ce, nous Charles auons faict mestre nostre

1411. feel à ces presentes. Donné à l'argueau sur Loire, le quatorzième iour de Iuillet, l'an de grace mille quatre cents & onze. Ainsi signé P. du Puis.

Au contenu desquelles lectres, quand elles vindrent à la congnoissance du dit Duc de Bourgongne, par le conseil d'aucuns Conseillers, il feit maçonner lectres responsiues aux lectres dessus dictes du dict Duc d'Orleans bien longues, en soy excusant, & respondant au contenu des lectres dessus dictes. Laquelle response sembloit à plusieurs gens mal comburée, & en effect se fendoit sur la proposition de Maistre Jean Petit.

Le iour de la conuersion Saint Paul, apres le Soleil couché, s'ourdirent tres-horribles vents, & tempeste, avec vne grosse gresle, qui feit grand dommaige à Paris, & abbatit cheminees, & aucunes parties des maisons, & au plat pays, feurent descouuertes les maisons couuertes de chaulme, & les arbres portans fructs, & autres, foudroiez, & abbatus.

La Royne alla à Melun, & là vint le Duc de Berry, & Maistre Charles Cudée, Preuost des marchands de Paris, qui estoit bien notable homme, y feut enuoié, & autres plusieurs notables gens, pour sçauoir si en ces differences, on pourroit trouuer aucun moyen d'accord, ou paix. Et y furent diuerses voyes ouuertes, mais n'y fut ouuert qui teint, ne qui vint à bon port, & se disposerent les parties à vne grande & grieue guerre. Et apres ces choses, enuoiä le Duc d'Orleans, deffier le Duc de Bourgongne par Lectres. Au contenu desquelles il respondit en effect ce qui ensuyt,

Jean, Duc de Bourgongne, & c. A toy Charles, qui te dis Duc d'Orleans, à toy Philippes, qui te dis Comte de Vertus, & à toy Jean, qui te dis Comte d'Angoulesme, qui naguieres nous auez enuoié lectres de deffiances, faisons sçauoir, & voulons que chascun sçaiche, que pour abbatre les tres-horribles trahisons, par tres-grandes mauuaitiez, & aguets, appensées, conspirées, machinées, & faictes solement alencontre de Monseigneur le Roy, nostre tres-redoubté, & souuerain Seigneur, & le vostre, & contre sa tres-noble generation, par feu Louys vostre pere, en plusieurs, & diuerses manieres, & pour garder le dict vostre pere, faux, & desloyal traistre, de paruenir à la finale execution detestable, à laquelle il ha contenu contre nostre dict tres-redouté, & souuerain Seigneur, & le sien, & aussi

contre sa generation, si faulſement, & notoïrement, que nul ^{1411.} preud'homme ne le deuoit plus laisser viure, & mesmement nous qui sômes cousin germain de nostre dit Seigneur, Doyen des Pers, & deux fois Per, & plus aſtraints à luy, & à sa dicte generation, que autres quelconques de leurs parës, & ſujets, Ne debuions si faux, desloyal, & cruel traistre laisser sur terre plus longuement, que ce ne feust à nostre grâd charge, Auons pour acquiſter loyaument, & faire nostre debuoir, enuers nostre dit tres-redoubté, & ſouuerain Seigneur, & à sa dicte generation, faiſt mourir, ainſi qu'il deuoit, le dict faux & desloyal traistre. Et en ce, auons faiſt plaiſir à Dieu, ſeruiſſe loyal à nostre tres-redoubté, & ſouuerain Seigneur, & executé raiſon. Et pource que toi, & tes dicts freres, enſuiuez la trace faulſe, & desloyale, & ſelonne de voſtre dict pere, cuidans venir aux damnables, & desloyaux fins, à quoy il tendoit, auons tres-grande lieſſe au cœur deſdictes deſſiances. Mais du ſurplus contenu en icelles, toi, & tes freres auez menti, & mentez faulſement & mauuaiſement, & desloyaument, côme faux & desloyaux traistres que vous eſtes. Dont à l'aide de nostre Seigneur, qui ſçait, & congnoit la trefentiere & parfaite loyauté, amour, & vraie intention, que touſiours auôs eu, & aurons tant que viurons, à mon dit Seigneur le Roy, & à sa dite generation, & au bien de ſon peuple, & de tout ſon Royaume, Vous ferons venir à la fin, & punition telle, que tels faux, & desloyaux traistres, mauuais, rebelles, deſobeiſſans, & ſelons côme toi, & tes dicts freres eſtes, doiuent venir par raiſon. En teſmoin de ce, nous auons faiſt ſceller ces preſentes de nostre ſeal. Donnée en nostre ville de Douai, le trezieſme iour d'Aouſt, l'an mille quatre cēs & onze. ^{1411.}

Si eſcriuit vnes leſtres à la Royne, dont la teneur ſ'enſuyt,

Ma trefredoutée Dame, le me recommande à vous tant, & ſi humblemēt côme ie puis. Et vous plaiſe ſçauoir, que j'ay receu vos leſtres eſcriptes à Melun, le dernier iour de Iuillet dernier paſſé, & par icelles ſceu voſtre bō eſtat. Dōt j'ai eſté trefarfaitemēt liez, & ioyeux, & ſerai toutes & quantes fois, qu'il vous plaira m'en eſcrire. Priant nostre Seigneur, qu'il vous donne telle, & ſi bonne proſperité, côme vous voudriez, & ie le deſire pour moy meſmes. Et pource ma trefredoutée Dame, que par icelles vos leſtres, vous plaiſt de mon eſtat ſçauoir, dōt ie vous mercie treshumblemēt, Plaiſe vous ſçauoir, que à l'eſcriture de

1411. ces presentes, j'estois en tresbonne santé de ma personne, la mercy à Dieu, qui le semblable par son bõ plaisir, vous veuille en tout temps octroyer.

Ma tres-redoubtée Dame, en vos dictes lettres estoit contenu, que depuis que mon tres-cher Seigneur, & Oncle, Monseigneur de Berry, & mon tres-cher, & tres-amé frere, le Duc de Bretaigne, sont arriuez deuers vous en la ville de Melun, vous auez continuellement besongné sur le faict qu'il ha pleu à Monseigneur le Roy vous ordonner, touchant l'appaisement des diuisions, qui sont en ce Royaume. Et auez esperance en Dieu, que briefuement aucun bon appointemēt y seroit trouué. Et pource que proceder en vn mesme faict, par traité, & voye amiable, & par voye de faict, & de rigueur, seroit chose contraire, vous auez enuoié par deuers moy, & aussi deuers mes parties aduerfes, afin que durant le dict traité, aucune voie de faict, ne soit ouuerte. Car ce seroit, pour faire vn tres-grand desplaisir à mon dict Seigneur. Et aussi seroit peu d'honneur à vous, ma tres-redoubtée Dame, à mon dict Seigneur, & Oncle, & à mon dict beau frere de Bretaigne, que les choses estans en vos mains, où vous besongnez continuellement, aucune voie de faict feust attentée. d'un costé, ou d'autre. Et croiez fermement que le Duc d'Orléas, sera si bien conseillé, qu'il ne fera chose, qui doibue desplaire à mon dict Seigneur, & qui soit contre vostre honneur, attendu ce que dict est, & plusieurs autres causes, que ie puis assez considerer. Et que ie ne vueille doresnauant faire, ne souffrir estre faict par mes gens aucune voie de faict, ainçois m'en abstenir durant le dict traité. Ou autrement, ie ne garderois pas bien l'honneur de vous, & de mon dict Seigneur mon Oncle, & de mon beau frere de Bretaigne. Sur quoy, ma tres-redoubtée Dame, plaie vous sçauoir, que tousiours de mon pouuoir, j'ai serui, obeï, & gardé l'honneur de mon dit Seigneur, de vous, & de vostre generation. Et pour le bon seruice que j'ai faict, & pour resister à la tres-desloyalle, mauuaise, & damnable intention du faux traistre Duc d'Orléas, qui mort est, pere de Charles, qui se dict Duc d'Orléans, qui de toute sa puissance contend à la destruction totale de mon dict Seigneur, de vous, & de vostre noble generation, comme il est notoire à plusieurs, & vous le sçaez bien, ma tres-redoubtée Dame, l'affaire que j'ai

j'ai presentement, me vient. Et pource qu'il vous auoit pleu 147.
 me rescripre par vos autres lettres, de la dicte matiere, & que
 ie voulusse enuoier par de là de mes gens, pour faire si bonne
 response, que mon dit Seigneur, & vous, en deussiez estre con-
 tents. I'ai attendu mes freres, pour moi conseiller avec eux en
 ceste besongne, qui trop grandement me touche, cōme vous
 voiez. Mais en attédant, cōbien que ie n'aie sceu aucune chose,
 parquoy on me puisse noter, que i'aye quis voye de fait, contrē
 la paix, & bien publicque de ce Royaume, pour laisser voie de
 traitté, ainsi que mādē m'auz naguieres par vos autres lettres,
 Et que tousiours depuis la paix de Chartres, & traitté de Vice-
 stre, j'ai obei aux bons appoinctemēs, & cōmandemens de mon
 dict Seigneur, comme raison est, sans venir alencōtre en aucu-
 ne maniere. Laquelle chose m'ha esté tresp dure à souffrir, atten-
 du les trespdesloyales manieres, & desobeissances de mes dits ad-
 uersaires. Neantmoins au trespgrand contemp̄t de la Majestē
 & Seigneurie de mon dit Seigneur, Charles, & ses deux freres,
 m'ont enuoié par deux heraults, lettres patētes de desfiances.
 Desquelles, en tāt qu'il touche les desfiances, j'en suis trespcon-
 tent. Mais des faulx mensonges, & desloyales paroles, conte-
 niēs es dictes lettres, vostre reuerence faulue, ils ont menti, &
 mentent faussement, mauuaiselement, & desloyalement, comme
 faulx, mauuais, & desloyaux, traistres, & tels les ont monstré,
 monstrent, & monstrent leurs œuures, & leurs faits. Et quel-
 que chose qu'ils aient dict, ou diēt, il n'y ha en eulx fors que re-
 bellion, desobeissance, desloyauté, trahison, & machination
 mauuaise contre leur souuerain Seigneur, en ensuiuāt la trace
 faulse, & desloyale de leur dict pere. Et pour venir aux
 damnables, & desloyales fins, à quoy ils tendoient, à laquelle
 chose, ma trespredoubtée Dame, j'ai tousiours resisté, & con-
 tredict, & ferai tout le temps que ie viurai, & tant que au plai-
 sir de Dieu, ils ne viendront pas à leurs damnables, & trai-
 stres intentions: mais briefuement en seront punis, comme
 raison doibt. Et ma tres-redoubtée Dame, vous pouuez bien
 veoir, & apperceuoir clairement, que les paroles qui vous ont
 esté dictes par les dessus nommez, ont esté pour vous abuser,
 sans quelque volenté d'obeir à mon dict Seigneur, ne de ve-
 nir à quelque paix, ne traitté. Et par tout m'est pure necessité
 de garder mon honneur. Et pource ma tres-redoubtée Da-

1411. me, le vous supplie tres-humblement, que en toutes mes besongnes, & affaires, & mesmement en ce cas present, toutes choses considerées, & en especial les alliances qu'il ha pleu à mon dict Seigneur, & à vous, de vostre grace estre entre vous & moi, par les mariages de mon tres-redoubté Seigneur, & fils, Monseigneur le Duc de Guyenne, avec ma fille aînée, & de ma tres-chere Dame, & fille, Madame Michelle, avec mon fils seul, le Comte de Charrolois, comme dict est, ha esté fait pour le bien & conseruation de mon dict Seigneur, de vous, & de vostre noble generation, & aussi les sermens faicts à la paix de Chartres, laquelle pour moy ne feut oncques enfreinte. Il vous plaise moy auoir pour tres-singulierement recommandé, comme vostre tres-humble, & loyal subiet, & parent, en moy aidant, & confortant alencontre de mes dicts aduersaires. En moy tousiours mandant & commandant vos bons plaisirs, & commandemens, pour les accomplir tres-volontiers, & de grand cœur, comme tenu y suis. Ma tres-redoubtée Dame, le prie, &c. Escript en nostre ville de Douai, le treiziesme iour d'Aoust.

Le Comte de Saint Paul, en faueur du Duc de Bourgogne, esleua & meit sus les bouchers de Paris, c'est à sçauoir les Gois, les Saintyons, & les Tibers, & estoient assez grande compaignée. Les Gois, estoient trois freres, fils de Thomas le Gois, qui estoit boucher, bel homme, & en son estat bon marchand, demeurans luy, & ses enfans, & vendans chair en la boucherie de Sainte Geneuiefue, bourgeois, & natif de Paris. Ceux de Saintyon, & les Tybers, estoient de la grand boucherie, qui est jouxte le Chastelet, & avec eulx se bouterent gens de plusieurs mestiers de Paris, Chyrgiens, comme Maistre Iean de Troyes, qui auoit moult bel langaige, & ses enfans, & autres de son mestier, pelletiers, & cousturiers, & vn escorcheur de bestes, nommé Caboche, qui estoit de la boucherie d'empres l'Hostel Dieu, deuant nostre Dame, & toutes gens pauvres, & meschans, desirans de piller, & robber, estoient avec eux. Et pource que le Comte d'Armaignac, estoit avec le Duc d'Orleans, on meit nom à ceux qui tenoient son parti, Armaignacs. Terribles, & horribles meurtres, robberies, & pilleries se faisoient à Paris contre ceux qu'on tenoit estre du parti du Duc d'Orleans. Et suffisoit pour tuer vn notable bourgeois,

& le piller, & robber, de dire par quelque personne par haine, 1411.
Voila vn Armaignac. Et preindrēt l'enſeigne du Duc de Bourgongne, ou deuife, qui eſtoit le ſaultouer, qu'ils appelloient la croix S. André, & vne fleur de lys au milieu. Et y auoit en eſcript, Viue le Roy. Et tous la prenoient, voire les femmes, & petits enfans. Ils tuerent pluſieurs perſonnes, & les ieſterent en la riuere, & faiſoient publier, qu'ils ſ'en eſtoient fuyſ, mais oncques puis ne feurent veus. On faiſoit faire mandemens au nom du Roy, par leſquels il abandonnoit tous ceux, qui tenoient le parti du Duc d'Orleans, ou de ceux qui eſtoient avec luy, ou les aidoint, ou fauoriſoient. Et defendoit-on à tous Capitaines de ponts, ports, & paſſaiges, qu'on ne les laiſſaſt paſſer. Mais que tout feuſt ouuert au Duc de Bourgongne, & à ceux qui tenoient ſon parti, & qu'on l'accompagnaſt, & ſeruiſt. Et faiſoient entendre au peuple, & de faiſt eſcripuoient aux bonnes villes, qu'ils vouloient faire vn nouveau Roy, & priuer ſes enfans de la Couronne. Et trouuerent vne Bulle du Pape Urbain, par vertu de laquelle, ils faiſoient excommunier ceux qu'ils appelloient Armaignacs, tous les Dimanches aux proſnes, & diſoient ainſi, On vous denonce de l'autorité Apollique excommuniez, Iean de Berry, Charles d'Orleans, Charles de Bourbon, Iean d'Alençon, Bernard d'Armaignac, & Charles d'Albret, & leurs alliez, & complices, aidans & fauoriſans. Et avec ce qu'on faiſoit eſcrire au Roy leſtres contenans ce que diſt eſt, pareillement eſcripuoient ceux de l'Vniuerſité de Paris, dont eſtoient principaux vn Carme, nommé Maiſtre Euiſtache de Pauilly, & le Miniſtre des Mathurins. Et auſſi eſcripuoient ceux de la ville de Paris, vnes ſemblables leſtres en eſſect & ſubſtance.

Cependant le Duc d'Orleans, faiſoit de grandes diligences d'aſſembler gens. Auſſi faiſoient les autres Seigneurs. Les Ducs de Bourbō, & d'Alençon, paſſerēt la riuere de Seine, & le Comte de Vertus, paſſa en Brie, à bien grande compaignée. Et y auoit ja des Guaſcons à Han en Vermandois, c'eſt à ſçauoir Bernard d'Albret, vn bien vaillant homme d'armes, qui atoit de bien vaillants gens en ſa compaignée. Et ſceut nouuelles que le Duc de Bourgongne y venoit meſtre le ſiege. Et diſoit-on qu'il auoit bien en ſa compaignée, deux mil-

N n ij

1411. le cheualiers, huict cents escuyers, & bien quarante mille hommes de pied, presques tous Flamends. Le dict Bernard d'Albret, se fortifioit de iour en iour, le mieux qu'il pouuoit. Et combien que la ville feust fermée en aucuns lieux, toutesfois il se teint dedans, & y veint mettre le siege le Duc de Bourgogne, accompagné comme dessus, & la cuidoient prendre d'assault tout plainement. Mais ceux qui estoient dedans, vaillamment se defendoient, Les engins, & bombardes feurent assises, & tirerent bien chauldement. Et veid, & considera le dict d'Albret, & ses compaignons, que la ville contre vne telle puissance, n'estoit pas tenable, & que bonnement ils ne pourroient resister. Et pource se souteuerent de trouuer moyen d'aucun traicté, ou autrement, & pour ce cuidèrent parlementer.. Mais en rien on ne les voulut receuoir. Car il sembloit au Duc de Bourgogne, & aux Capitaines, mais que elle eust esté battüe, qu'on l'auroit d'assault. Et pource le dict d'Albret, considerant l'imagination de ses aduersaires, aduisa les moyens, comme luy, & sa compaignée, se pourroient sauuer, & saillir. Et feir à vn point de vn iour, ouurir vne des portes, & aualer le pont leuis, & ouurir les barrieres, faisant semblant de leuer vne escarmouche. Et à coup, luy, & toutes ses gens, qui estoient bien môtez, frapperent vaillamment, & hardiment sur l'vn des logis. Et cuidoient les gens du dict Duc au commencement, que ce ne feust que vne escarmouche. Mais d'Albret, & ses gens, tellement se porterent, qu'ils en tuerent beaucoup, & naurerent, & passerent outre, & s'en allerent, comme sans nulle perte de leurs gens, & ainsi abandonnerent la ville. Et y entrerent plainement, & à leur aise, & volonté, les gens du dict Duc, sans qu'ils trouuassent aucune resistance, & la pillerent, & estoit grand pitié du peuple qui estoit dedans. Car on y feir tous les maux qui se pouuoient faire. Et puis meirent le feu par tout, & ainsi destruisirent la dicte ville, qui estoit parauant assez bonne. Et depuis le dict Duc de Bourgogne alla deuant Roye, & Chauny, qui se rendirent assez aisément. Et tousiours le Duc d'Orleans approchoit, & alla iusques à Mondidier, en intention de combatre le Duc de Bourgogne. Et auoit l'auantgarde, le Comte d'Armagnac, & l'arrieregarde, le Comte d'Alençon, & la grosse bataille, le Duc d'Orleans, & les autres Seigneurs. Et sembloit

qu'ils eussent esté bien ioyeux, de trouuer le Duc de Bourgon- 1411.
gne, & sa compaignée, & à ceste intention y alloient. Mais il se
retrahit. Et disoit on, que la cause estoit, que les Flamends le
laissent, & s'en retournerent, disans qu'ils n'estoient tenus de
seruir que certain temps, & en l'enuiron de leur pays. Et lors le
Duc de Bourgogne manda les Anglois, pour luy venir aider.
Et estoit commune renommée, que dès lors eurent alliances
le Roy d'Angleterre, & le Duc de Bourgogne. Et se donnoit
on grâds merueilles, comme il s'en estoit retourné, & retraiât.
Car il auoit en sa cōpaignée, trois mille cheualiers, & escuiers,
& quatre mille arbalestriers, chascun garni de deux arbale-
stres, & de deux gros varlets, dont l'un tenoit vn grâd pennart,
& l'autre tendoit l'arbalestre, tellement que tousiours y en
auoit vne tendüe, quatre mille pionniers, quatre mille archers,
dont vne partie estoient Escossois, six cents hommes d'armes,
& mille archers du pays d'Artois, douze cents hommes d'ar-
mes du pays de Flâdres, & douze cents gros varlets, deux mil-
le ribaudequins, & bien quatre mille, que canons, que coule-
urines. Et combien qu'il se feust retraiât, escripuoit tousiours
bien diligēment au Roy, à la Royne, à Monseigneur de Guyē-
ne, à la ville de Paris, & autres, en appellant ceux d'Orleans, &
leurs complices, faulx, traistres, & desloyaux, & qu'ils vouloiēt
desappoincter le Roy de ses Couronne, & Royaume, & ses en-
fans aussi. En leur donnant esperance, qu'en brief il viendrait,
& à plusieurs de Paris particulièrement escripuoit, tant de ses
Conseillers que autres, lesquels de leur pouuoir auoient le
peuple. Et outre, faisoient mention les dictes lētres, d'aucu-
nes couleurs & mouuemens, pour lesquelles luy & sa compai-
gnée, s'estoient retraiâts. **Q**uand le Duc d'Orleans, & les au-
res Princes de sa compaignée, yeirent que le Duc de Bourgon-
gne s'estoit retraiât, ils delibererent de venir deuant Paris, es-
perans qu'ils y entreroient. Mais ils eussent mieux faiât, s'ils
eussent poursuui le dict Duc de Bourgogne iusques au pays.
Et y en eut de leurs gens, qui s'eschapperent iusques vers Cres-
py en Valois. Et y auoit lors vn Baillif à Senlis, nommé Troul-
lart de Malereux, tenant le parti de Bourgogne, qui auoit des
gens de guerre. Et sceut que vers la dictē ville, y en auoit de
logez, & vint frapper sur eulx soubdainement, & les rua ius, &
y en eut bien de morts, quatre vingts, & cinquante de prins.

Nn iij

1411. Quand à Paris sceurēt les nouuelles dessus dictes, feurent encores plus enflambez que deuant pour le Duc de Bourgogne. Et feut Messire Pierre des Essars, remis en son Office de Preuost de Paris, lequel feit de grandes diligences de meſtre garnison à Sainct Clou, Charentō, Corbeil, Creil, & Beaumōt, Auquel lieu de Beaumont, on meit en garnison le Vidame d'Amiens, lequel quand il sceut la venūe de ceux d'Orleans, qu'on nommoit Armaignacs, bien honteusement s'enfuit dedans Sainct Denys, où estoit le Prince d'Orenge, à douze cents combatans.

La Royne, laquelle auoit esté bien longuement à Melun, entra à Paris l'onzième iour du mois de Septembre. Et aussi tost qu'elle y feut, on luy osta vne grand partie de ses gens, Officiers, & seruiteurs, & pareillement si feut on au Roy. Et n'y auoit seruiteur, ne Officier, qui sceust en quel estat il estoit, ne qu'il debuioit faire.

Quand les gens d'Orleans, dicts Armaignacs, vindrent à Sainct Denys, ils y cuiderent aisément entrer, & feirēt diuers assauls. Et resistoient fort les dicts Prince d'Orenge, & ses gens, & y en eut de bleſsez beaucoup, d'un costé, & d'autre, & trespeu, & comme nuls de morts. Et sinablement prindrent composition, qu'ils s'en iroient eux, leurs cheuaux, & harnois, & promeirent que iusques à Noel ils ne s'armeroient. Et entrèrent les Seigneurs dedans avec vne partie de leurs gens, & les autres estoient logez autour, comme à Montmartre, à Aubervillier, & autres villaiges. Et feut l'onzième iour d'Octobre. Et trois iours apres, le Seigneur de Gaucourt, par la riuerre bien soubdainement eschella le pont de Sainct Cloud, où estoit le Seigneur de Cohan, qui se disoit Oncle du dict Messire Pierre des Essars, lequel auoit en abomination les pommes. Et pource le meirent en vn grenier, où il y en auoit foison, pour le meſtre à finance. Lequel sy meit pluſtost qu'il n'eust fait, s'il eut esté en vne bien dure prison. Et vomit tant qu'il y feut, & estoit en tel poinct, qu'il sembloit que l'ame luy deust partir du corps. Et le matin, apres la place prinſe, y auoit vn vaillant cheualier, nommé Messire Pierre de Bauffremont, cheualier de Rhodes, lequel venoit au dict pont à tout environ vingt combatans en sa compaignée bien esleus, pour soy meſtre dedans la place du dict pont, à aider de la garder, &

estoit de Bourgongne, & vint deuant la place, appellât le guet. 1411.
Les gens de Gaucourt, le veirent, & apperceurent, & prindrēt
de ceux qui auoient esté prins leurs hucques à la croix de Saint
André, aualerent le pont, & ouurirent les barrières. Et le dict
de Bauffremont, cuidant que ce feust de ses gens, & de son par-
ti, entra dedans, & là feut prins, & ceux de sa compaignée, &
paya sept mille escus.

Plusieurs escarmouches se faisoient comme tous les iours,
& estoient les Guascons logez au plus pres des portes de Pa-
ris. Et pource que le Comte de Saint Paul, auoit des archers
bien tirans du pays de Picardie, & aussi de Paris, & d'ailleurs, y
auoit arbalestriers, & archers, les Guascons auoient sur leurs
cheuaux coulrepointes, pour doubte du traict. Et tousiours
ceux quiissoient de Paris, estoient reboutez à leur dommaige.
Entre les autres, auoit vn homme d'armes, nommé Saillant,
qui estoit escuier d'eseuierie du Duc d'Orleans, qui ne faillloit
point seul au matin, & apres dîner, monter sur vn roucin blâc,
armé, & sa lance au poing, à venir verdoier entour de Paris. Et
faisoit sçauoir, si l'y auoit personne, qui voulust rompre vne
lance, & souuent y en alloit aucuns, ne oncques ne feut rué à
terre. Aucunes fois en iectoit jus, & abbatoit, & seulement em-
menoit le cheual de celuy qu'il abbatoit, sans rien attenter à la
personne de celuy qu'il abbatoit.

Le Comte de Saint Paul, qui auoit lors tout le gouuerne-
ment de Paris, & Messire Pierre des Essars, aduiserēt, que ceux
de la partie d'Orleans, n'estoient guieres qui escarmouchas-
sent, & que luy mesmes failliroit à si grosse compaignée, qu'il
les rebouteroit iusques à Saint Denys, & si frapperoit sur au-
cuns logis estans aux villaiges. Et auoient ceux qu'on appel-
loit Armaignacs, des amis à Paris, & selon leur pouuoir, fai-
soient sçauoir ce qu'il leur pouuoit nuire aucunement. Et dit
on, que de la dicte entreprise ils feurent aduertis. Et si estoit
le Seigneur de Gaulès, vaillant cheualier, & auoit grands char-
ges à Mont-martre, où il y auoit guet, & pouuoit aucune-
ment veoir, quand assemblée se faisoit dedans la ville. Et ad-
uint que ainsi que le Comte de Saint Paul auoit aduisé, il
l'executa, & faillit à bien grosse compaignée de gens de guer-
re de la ville de Paris, & vne grande multitude de peuple, ar-
mé tellement quellement. Ceux qu'on appelloit Armaignacs,

1411. se meïrent en deux parties embuschez derriere la montaigne de Mont-martre, en fosses basses vers le gibet. Et vindrēt ceux qui auoient accoustumē de escarmoucher, qu'on disoit Guafcons, quand ils veïrent les autres issir, & allerent au deuant, faisans voulstes en reculant, ou eulx retournans, tāt que ceux de Paris les poursuiuoient. Et assez tost apres, les embusches dessus dictes faillirent par deux costez, & veindrēt frapper sur le Comte de Sainct Paul, & ses gens, qui estoient plus six fois que les embuschez. Et quand le dict Comte les apperceut venir, il estoit failli par la porte de Sainct Denys: mais il s'enfuit, & s'en retourna par la porte de Sainct Honoré, & ses gens. Le peuple ne se peut pas si tost retraire, & y en eut de tuez, deux ou trois cents, tant de gens de traict, que de ceux de Paris. Qui feut chose piteuse, & qui enaigrit fort ceux de Paris. Entre ceux qui estoient issus de Paris, y auoit vn homme de pratique, qui issist hors de la porte, armé d'un haubergeon, de iacques, gantelets, harnois de iambes, & vn bacinet à camail, & vne hache en son poing, lequel estoit sur vne mule avec les gens de pied. Et quand la mule ouyt le bruit du harnois, elle ne peut, ou voulut reculer du costé de Paris, mais print son chemin au long du paué, vers Sainct Denys. Et y eut deux hommes d'armes, qui le suiuoient pour le prendre, & combien qu'ils feussent bien montez, toutesfois ils ne le peurent oncques atteindre, & entrerent luy & sa mule dedans Sainct Denys. Et feut mis à finance à trois cents escus, lesquels il paya auant partir, puis s'en retourna à Paris. Auquel lieu, ceux qui auoient esté aux dicts Seigneurs, n'auoient pas bon temps.

Aucunes gens de Paris, bōs, & notables bourgeois, eussent bien voulu trouuer moyen, qu'on y eut trouué aucun bon expedient. Et en fut aduertie la Royne, & aucuns estans pres du Roy, & de Monseigneur de Guyenne. Et leur sembloit, que Monseigneur le Duc de Berry feroit bon moyen, & qu'on le māderoit. Ce qui vint à la congnoissances d'aucuns extremes du parti de Monseigneur de Bourgongne, & luy feirent scauoir. Lequel escriuit à ceux de Paris, qu'ils ne l'y laissassēt point entrer, combien que la Royne auoit fait vne cedula, contenant certaines choses, que le Duc de Berry, eust faictes & promises. Et se doubtoit fort le Duc de Bourgongne, que la Royne ne le feist entrer. Et pource enuoya certains aduertissemēts à Paris,

à Paris, faisans mention, que si son Oncle, le Duc de Berry, venoit à Paris, qu'on ne souffrist en aucune maniere, que l'Archeuesque de Bourges, ne autres qu'il nommoit, veinssent en sa compaignée. Et que le dict son Oncle, ne autres, ne dissent aucune chose, qui feust contre le traicté fait à Vicestre, & l'Ordonnance que le Roy auoit fait luy estant en santé. Et mesmement concernant la seüreté de la bonne ville de Paris, & des personnes estans en icelle. Et ces choses se faisoient au nom du Duc de Bourgongne, & non de la ville de Paris. Et semble que la Roynes, n'estoit pas lors à Paris: mais à Corbeil. Car ils requeroient que la Roynes, & mes Dames de Guyenne, & de Charrolois, veinssent à Paris, avec leurs gens seulement, sans amener le Duc de Berry, ne de ses gens. Et qu'elle ne laissast à Corbeil, ou à Melun, que les gens que le Roy auoit ordonné à la garde des places. Et que le Roy, & Monseigneur de Guyenne, se allassent loger au Louure. Et que à Paris feust crié, & publié par tous les carrefours, & lieux accoustumez, que tous ceux qui estoient familiers, seruiteurs, ou partiaux des Ducs de Berry, d'Orleans, de Bourbon, Alençon, Armaignac, & Albret, vuidassent sur peine de confiscation de corps, & de biens. Et que Pierre de Sery, qu'on disoit vouloir mettre de nuit le Duc de Berry à Paris, & ses alliez, feussent punis selon leurs demerites. Et que toutes les fenestres del'Hostel de Nesle, feussent murées, & le pont abbatu. Et qu'on desappointast le Preuost des marchands, & qu'on y en meit vn autre, Avec plusieurs autres Requestes, dont la plus grand partie feurent accomplies. Et n'y vint point le Duc de Berry. Et pour lors c'estoit grand pitié d'estre à Paris, & de veoir ce qu'on faisoit, & disoit.

Or est vrai, que la venüe des dicts Seigneurs deuant Paris, despleut fort au Roy, & à Monseigneur de Guyenne, & nō sans cause. Car en effect, ils monstroient semblant de vouloir assieger Paris. Et pource le dict Seigneur manda le Duc de Bourgongne, dont il auoit espousé la fille, qu'il veinst à luy à Paris. Lequel feut bien ioyeux de ces nouvelles, & assembla gēs d'armes le plus qu'il peut. Et en sa cōpaignée auoit le Comte d'Arondel Anglois, lequel auoit amené de trois à quatre mille combatans Anglois. Et disoit on bien assez publicquement, que le Duc de Bourgōgne, auoit fait aucunes alliances avec le Roy

1411. d'Angleterre. Et se faisoient à Paris maux infinis secretement & publicquement. Les Gois leuerent vne grand compaignée de peuple, qui issirent par la porte de Saint Iacques, & allerent à Vicestre, vne moult belle maison, richement & notablement edifiée, & painte, qui estoit au Duc de Berry. Et y bouterent le feu, & feut arse, si bien qu'il ne demeura que les parois. Et auât la dicte demolition, le peuple ostoit les beaux huis, & les beaux chassiss voirres, & les emportoient.

Au commencement du mois d'Octobre, au dict an, le Roy voiant la maniere de proceder des dicts Seigneurs de son sang, ordonna mandemens patens, par lesquels estoient narrez, & declarez, plusieurs innumerables maux, qui auoient esté faicts, & se faisoient de iour en iour, par assembler gens de guerre, qui destruisoient le pauvre peuple, & pilloient, & robboient. Et en la conclusion, le Roy les abandonnoit, s'ils ne s'en departoient, & les tenoit, & reputoit ses ennemis. Et qu'on donnast passaige au Duc de Bourgogne par toutes villes, chasteaux, ponts, & passaiges, pour venir deuers luy, & qu'on l'accompaignast & luy donnast aide & confort, & que le Roy estoit acertené, qu'ils auoient intention de faire vn autre Roy en France. Et pource que le Duc de Bourgogne doubtoit, que aucuns ne feussent mal contents, de ce qu'il auoit faict venir le Comte d'Arondel, qui estoit vn Prince d'Angleterre il escriuit aux bonnes villes, qu'il estoit venu au Royaume, pour aider à trouuer bonne paix, & aussi pour seruir le Roy, & luy aider à debouter les dicts Seigneurs, en louant & colorant son intention.

En ce mesme temps, le Roy escriuit vnes lettres à sa fille l'Vniuersité de Paris, & estoient en forme de mandement patent. Esquelles estoit narré que les Seigneurs dessus dicts, le vouloient debouter, & destituer de son estat, & auctorité, & le destruire de sa Dignité, & faire vn nouveau Roy en France, & qu'ils auoient prins la ville de Saint Denys, le pont de Saint Cloud, deffié le Duc de Bourgogne, bouté feux, pillé, robbé, efforcé femmes, & faict maux sans nombre. Et leur prioit, & requeroit, que ces choses ils feissent prescher, & publier, & qu'il luy voulussent donner aide, & confort. Lesquelles choses l'Vniuersité de Paris, en voulant obeir à leur Pere, & Seigneur souuerain, firent executer de leur pou-

noir. Et en outre leur feit monſtrer certaines Bulles du bon Pape Urbain, par leſquelles il excommuniſoit tous ceux qui faiſoient telles aſſemblées, & leurs adherens, & complices, & qu'on ne les peuſt abſouldre, ſinon en l'article de mort. Et les priuoit des fiefs, terres, & Seigneuries qu'ils tenoient. Et mettoit interdict en leurs terres, & Seigneuries. Et abſoluoit les vaffaux des ſermens, foy, & hommaiges qu'ils auoient à eulx. Et ſoubz ombre des dictes Bulles, eſcriuirent ceux de l'Vniuerſité par tout les choſes deſſus dictes, afin que par tout on ſceuſt les œuvres des dicts Seigneurs, qu'on tenoit pour traîtres au Roy, & en outre pour excommuniés. Et outre, feirent & enuoierent par eſcript les choſes qui ſont deſendües, au temps de Interdict general, & auſſi permises. Et pource que les dictes Lettres ou Bulles, ſ'adreſſoient aux Archeueſques de Rheims, & de Sens, & aux Eueſques de Paris, & de Chartres, leſquels on tenoit pour Armaignacs, les dictes Bulles ne furent aucunement executées. Mais apres l'entrée du Duc de Bourgogne à Paris, dont cy apres ſera faiſt mention, feut trouué qu'elles ſ'adreſſoient à l'Eueſque de Beauuais, auquel le Roy eſcripuit qu'il procedaſt à l'execution d'icelles. Laquelle choſe il feit, & luy enuoia on vn mandement patent. Mais depuis, pource que pluſieurs des Seigneurs obeiſſoient au Roy, le Roy manda qu'il ſuspendiſt les dictes ſentences juſques à certain temps, & ainſi le feit.

Le trentieſme iour d'Octobre, vint le Duc de Bourgogne à Paris, accompagné du dict Comte d'Arondel, lequel arriua bien tard, & auoit bien grande compaignée de gens de guerre, & de traict. Et quant eſt des gentils-hommes, ils furent logez par fourriers, és maiſons des bourgeois de Paris, & ſpecialement és hostels de ceux qu'on ſouſponnoit auoir eu accointance, amour, & fraternité à ceux qu'on diſoit Armaignacs, ou aucuns d'eulx. Mais il y eut plus de ſix mille cheuaux, & de gens à pied, qui toute la nuit ne ceſſerent de trotter par la ville, pour trouuer logis, car perſonne ne les vouloit loger, ſpecialement les Anglois. Toutesfois le lendemain, tous furent logez. On cuidoit, & auoit on eſperance, que à la venue du Duc de Bourgogne, on deuiſt aduiſer quelque expedient, ou traicté de paix, & au moins, que les grands excès, qu'on faiſoit à Paris, deuiſſent ceſſer. Mais les choſes

1411. de iour en iour enaigriffoient, plus que deuant. Et pource que le Duc de Bourgogne se sentoît puissant, il ne vouloit ouir parler de paix, ne ceux dessus nommez, c'est à sçauoir les bourgeois, & leurs alliez, & en rien ne cessoient de faire de tres-inhumains exoes. Et faisoit on excommunier tous les Dimanches les dicts Seigneurs. Et mettoit on aux imaiges des Saints, la deuise de la croix Saint André. Plusieurs prestres en faisant leurs signacles à la messe, ou à baptiser les enfans, ne daignoient faire la croix droicte en la forme que Dieu feut crucifié, mais en la forme comme Saint André feut crucifié. A peine osoit on donner baptesme aux enfans de ceux; qu'on disoit estre aucunement fauorisans aux dicts Seigneurs. Et si vn homme estoit riche, il ne failloit que dire, Cestuy là est Armagnac, pour le tuer, piller, robber, & prendre ses biens. Et si n'y auoit homme de Iustice, ne autre qui en eust osé mot dire. Ne la Roynne n'en eust osé parler, ne d'accord faire, ou traité de pacification.

Le lendemain, ou deux iours apres, que le Duc de Bourgogne feut arriué à Paris, aucuns François de ses gens, & aussi Anglois, allerent à la porte de Saint Denys pour escarmoucher, s'ils trouuoient à qui, & ne muferent guieres, qu'il veint des compaignons de l'autre partie, & tousiours en suruenoit d'un costé & d'autre. Mais à ceux qui estoient issus de Paris, feut mestier de eulx retraire dedans la ville, & furent chassés iusques aux portes, & depuis n'y eut aucunes issues guieres faictes.

C'estoit tousiours grand pitié des pilleries, & robberies qui estoient sur les champs, & faisoient ceux qu'on appelloit Armagnacs, maux innumerables, & ne sçauoit on qu'ils pensoient, ou vouloient faire. Car d'entrer à Paris, n'auoit quelque apparence, de parler de paix, ou accord, n'estoit nouvelles. Ils fortifioient les villaiges où ils estoient, de barrières par les rües, spécialement le villaige de Saint Cloud, lequel ils fortifierent fort par les rües de charrettes, chariots, & poultrés. Et firent barrières, pour ouurir, & clore, issir, & entrer, quand bon leur sembloit. Et lors feut aduisé par le Duc de Bourgogne, & par les Anglois, & gens de guerre, estans au Conseil du Roy, qu'il leur faillist courir sus. Et enuoièrent espier par tous les legis secretement, pour sçauoir

comme les Armaignacs se gouuernoient. Et specialement y eut gens de guerre bien montez, qui allerent vers le villaige de Saint Cloud, & considererent comme il leur sembloit que bien aisément on les auroit, veu qu'il y auoit des haults lieux, & que le villaige estoit au bas, & par ce, ceux d'enhaült auroient l'aduantaige. Et qu'on eust de grosses arbalestres, canons, couleurines, & habillemens de guerre. Et feut conclud que on iroit, & qu'on feroit les prouisions nécessaires, dont ceux qui estoient à Saint Cloud, ne se donnoient de garde. Et eussent cuidé que plustost on feust allé aux villaiges d'empres Paris, du costé de la porte Saint Denys. Si feut ordonné, & commandé secretement à tous les Capitaines tant Anglois, que François, qu'ils feussent tous prests, & leurs gens, quand on les manderoit. Et si feut ordonné que les bourgeois de Paris, qui auroient puissance, feroient habiller gens à pied, pour aller en la compaignée des gens de guerre. Et feurent nommez, & mis en escript ceux qui seroient tenus de le faire. Et feut executé tellement, qu'on trouua de seize cèts à deux mille bons compaignons armez de haubergeons, iacques, salades, ou bacinets, & gantelets, & les aucuns garnis de harnois de jâbes, & de bōnes haches, ou autres bastōs, sans les archers, & arbalestriers de la ville. Et enuiron minuiet, partit toute la compaignée de la ville de Paris, le neufiesme iour de Nouembre. Et y estoient en personne le Duc de Bourgongne, & le Comte d'Arondel. Et veindrent au matin deuât le dit villaige du pont de Saint Cloud. Et combien que ceux qui y estoient logez, n'en feussent aucunement aduertis, toutesfois feurent ils assez tost prests de eulx defendre, & alla chascun à sa garde. Si feurent bien & roidement assaillis, & aussi par le moyen des dictes barrieres, se defendirent fort. Et eust esté bien difficile chose de les auoir par les dicts lieux. Mais les gens de pied de Paris, & autres, se meirent derriere les murs des maisons du costé des champs, & rompirent les murs, qui n'estoient que de plastre bien foibles, & en plusieurs & diuers lieux feirent de grandes entrées. Et ceux qu'on disoit Armaignacs, quand ils se veirent ainsi surpris, se cuiderent retraire sur le pont. Et ne les sceurent si tost, & si diligemment faire, qu'il n'y en eust de sept à huit cents de morts, aucuns dient neuf cents, & vne autre partie de prins. Et entre les autres feurent prisonniers

1411. Messire Guillaume Bataille, & vn cheualier de Picardie, nommé Messire Mauffart du Bois, lequel feut mis au Chastelet de Paris. Et au regard du dict Bataille, ceux qui le prindrent, ne l'amenerent pas dedans Paris, pource qu'ils scauoient bien que s'il y estoit, qu'il seroit en grand danger de sa personne. Et le meirent à finance, & sur sa foy le laisserent aller, & paya bien & diligemment ce à quoy il auoit esté mis. Apres la dicte besogne faicte, & les dicts de Saint Cloud desconfits, les dicts Seigneurs estans à Saint Denys se partirent, & abandonnerent Saint Cloud, & Saint Denys, & s'en allerēt eux & leurs gens à Montargis. Le Seigneur de Hely, entra à Saint Denys, & quand il y fut, il print l'Abbé de Saint Denys, & l'amena à Paris, disant qu'il estoit Armaignac. Et au pont de Saint Cloud, feut mis de par le dict Duc de Bourgongne, vn Capitaine autre que celuy qui y estoit parauant, lequel se nommoit Colin de Pise, lequel auoit esté prins par Gaucourt prisonnier, & paya finance, & puis s'en alla à Paris, où il feut prins par la Iustice, & mis en Chastelet, & depuis mené aux halles, où il eut le col coupé. Pource qu'il auoit ainsi laissé prendre le dict pont de Saint Cloud au dict Seigneur de Gaucourt: combien que de son pouuoir, il auoit fait diligence de le garder, ainsi qu'il disoit.

Les Bretons, & Gascons, qui estoient sur les champs, faisoient maux innumerables, dont c'estoit bien grand pitié.

Et apres ces choses, feut deliberé par le Roy, & son Conseil, que les dicts Seigneurs seroient bannis, & leurs biens declarez confisquez, & feurent les dicts bannissemens, & confiscations publiez. Et les nommoit-on Iean de Berry, Charles d'Orleans, Bourbon, Alençon, en leurs priuez noms. Et pour executer, & prendre les terres, & mettre en la main du Roy, furent ordonnez ceux qui s'ensuiuent, c'est à scauoir le Seigneur de Hely, qui estoit Marechal de Monseigneur le Dauphin, Duc de Guyéne, le Comte de Saint Paul, le Seigneur de Courcy, & Messire Philippes de Ceruolles en Berry, Messire Iean de Chaalon en Touraine, le Seigneur de Saint George, & Maître Pierre de Marigny, en Languedoc & feut osté le gouvernement au Duc de Berry. Le pays de Valois, se rendit, Clermont en Beauuoisin aussi, & se meirēt en l'obeissance du Roy, & de la partie de Bourgongne.

Le Roy, & les Ducs de Guyenne, & de Bourgongne, & le 1411.
Comte d'Arondel, allerent mestre le siege à Estampes, qui
estoit au Duc de Berry. Et de par luy estoit dedans vn vaillant
cheualier d'Auuergne, nommé Louys de Bourdon. Et feut
mis le dict siege tout au tour du chastel, qui estoit tres-difficile
à auoir, sinon par le miner. Ce que on craignoit, car c'estoient
tous sablons. Bourdon souuent failloit, & faisoit de grands
dommaiges à ceux du siege, & print le Seigneur de Roucy, &
plusieurs autres. Et finalement, l'une des tours, estant à vn
coing du chasteau, feut tellement minée, qu'elle cheut. Et
quand ceux de dedans veirent, que bonnemēt ne se pouuoient
plus tenir, ils se rendirent au Roy, saulues leurs vies, & eurent
tresbonne compaignée. Et au regard de Bourdon, il ne se vou-
lut rendre, & se retrahit en la grosse tour, luy, & vn varlet seu-
lemēt, & là se teint par aucun temps. Et feut mandé qu'il veinſt
parler au Roy, & aux dicts Seigneurs à seureté. Lequel y veint,
biē vestu d'une robe de veloux cramoisy toute brodée à ours,
& à la deuise du Duc de Berry, & aussi luy auoit-il donne. Et
parlementerent ensemble. Et luy feut monſtré qu'il ne se pou-
uoit tenir. Et finalement Monseigneur le Dauphin, & le Duc
de Bourgongne, luy pardonnerent tout. Et rendit la place,
sans ce qu'il feust prisonnier, ou payast finance. Et quand le
Roy, & les Seigneurs retournerent à Paris, il s'en veint avec
eux.

Orest vrai, que le Comte de la Marche, auoit l'auantgarde
du Roy, & avec luy le Mareschal Boucicault, & le Seigneur de
Hambuye, lesquels auoient bien deux mille hommes d'armes,
& de gens de traict, largement. Et si y auoit de gens de Paris,
que conduisoit l'un des bouchers dessus dicts, fils de Thomas
le Gois. Le Duc d'Orleans, estoit à Orleans, & auoit en sa com-
paignée deux vaillants cheualiers. L'un, nommé Messire Ar-
nauld Guillon de Barbazan, l'autre Messire Raoul de Gau-
court, qui auoient chascun vne gente compaignée des gens de
guerre. Le Comte de la Marche, & toute son auant-garde te-
noient les champs en Beausse, & tant qu'il veindrent à Yen-
uille, à Thoury, au Puifet, & au pays d'environ. Et se logea
le dict Comte au Puifet, & vne grand partie de ses gens. Et à vn
point du iour, qu'on ne veoit comme goutte, les dicts de Bar-
bazan, & de Gaucourt, veindrent, & leurs gens, sur le dict

1411. logis du Comte de la Marche, & en tuerent bien quatre cents, & preindrent. Et specialement feut prins le dict Comte de la Marche, lequel ils baillerent à vne partie de leurs gens, lesquels le menerent en la forest, en tenant le chemin d'Orleans. Et en ceste besongne feut tué le dict Gois, qui se cuidoit retrairre avec les autres vers le Marechal Boucicault, & le Seigneur de Hambuye, qui estoient logez pres du dict Puiset, & aucuns se y retrahirent. Et incontinent bien & diligemment, se meirent sus les dictz de Boucicault, & Hambuye, & se meirent en bataille à venir vers le dict Puiset, & faisoit encores si trouble, que à peine congnoissoit-on l'un l'autre. Et y eut des rencontres. Et y feut Barbazan vne fois prins, & apres rescous par le dict de Gaucourt, & y en eut de prins tant d'un costé, que d'autre. Et se retrahirent les dictz de Gaucourt, & Barbazan, en la forest d'Orleans. Et sil eust esté iour, ils eussent eu bien à faire. Car la puissance des dictz Boucicault, & Hambuye, estoit bien grande, comme de huiet cents cheualiers, & escuiers, & les autres n'estoien que de deux à trois cens combatans. Le Comte de la Marche, feut amené à Orleans à grand ioye, & ceux de la ville luy disoient en passant plusieurs villenies, & iniures. Dont le Duc d'Orleans feut desplaisant, & luy fait tresbonne chere à sa vénue. Et puis apres feut mis en la grosse tour d'Orleans, & bien gardé.

En ce temps, le Comte de Saint Paul, & le borgne de la Heuse, meirent le siege deuant le chastel de Saint Remy du plain, au pays du Maine, pour la querelle du Duc de Bourgonne. Et feut faite vne armée par le Comte d'Alençon, pour cūder leuer le siege, dont estoit chef Messire Jean de Dreux, son Marechal, & autres Capitaines, & veindrent ferir sur le siege, & feurēt desconfits par le Comte de Saint Paul, & sa compaignée. Et y en eut plusieurs prins, & morts, & entre les autres feut prins Messire Jehannet de Garencieres, & Jean Rousseline. Et feut le chastel rendu, & assez tost apres reprins par le Comte de Richemont, qui y vint à grande armée. Et de là, alla mettre le siege deuant le chastel de l'Eglise, lequel il print, & secourut le dict Seigneur fort, le parti d'Orleans.

Le Roy delibera luy, & sa compaignée, de s'en retourner, & manda aussi les autres qui estoient en Beausse, & laisserent garnison à Estampes, & en autres places, qu'ils auoient en leurs mains

maines, comme Dourdan, lequel feut rendu au Roy, sans coup ^{1411.} ferir, de la volonté de ceux qui estoient dedans. Et au regard de toutes les villes, places, & pays, estans delà la riuere de Seine, en allant en Champaigne, & és dictes marches, se meirent en l'obeïssance du Roy.

Le dixiesme iour de Decembre, entrerent le Roy, & les Seigneurs à Paris. Et fut fort plainte la mort du Gois, car il estoit vaillant & gracieux homme. Et feut apporté à Paris, & enterré à Sainte Geneuiefue. Et luy fait-on moult honnorables obseques, autant que si c'eust esté vn grand Comte, ou Seigneur. Et y feut present le Duc de Bourgongne, avec foison de peuple. Les aucuns disoient que c'estoit bien fait, & que le Duc de Bourgongne monstroït bien qu'on le debuït seruir, puis qu'il monstroït amour à ceux qui tenoient son parti. Les autres s'en mocquoient, veu qu'on n'auoit oncques veu en luy vaillance, ne qu'il feïst oncques chose, dont il le deust tant honnorer, & que le feu qu'il auoit bouté à Vicerestre, estoit vn des-honneste fait. On luy fait vne tombe dessus sa sepulture, où auoit vn epitaphe qu'on peut veoir

Et est à aduertir, que toutes les choses se faisoient au nom du Roy, & de Monseigneur le Daulphin. Mais ils laisserent la croix droite blanche, qui est la vraie enseigne du Roy, & preindrent la croix de Saint André, & la deuise du Duc de Bourgongne, le faultouer, & ceux qu'on disoit Armagnacs, portoient la bande, & pource sembloit que ce feussent querelles particulieres. De quoy aucuns de Paris, & des cheualiers, & escuiers qui estoient mesmes tresbons Bourguignons, estoient tres-mal contents.

Le Comte d'Arondel, feut fort festoïé à Paris, par le Duc de Bourgongne, & aussi les Anglois. Et leur fait-on de beaux & grands presens, & si feurent tresbien payez de leurs gaiges, & souldes. Et puis eurent congé, & s'en allerent à Calais, viuans sur le pays, ainsi que bon leur sembloit. Et tous les frais, mises, & despens qui feurent faitz, furent faitz aux despens du Roy, en manieres couuertes, sans ce qu'il en sceust rié. Car tout malade qu'il estoit, qui luy eust parlé d'Anglois, il eust fait maniere de les combatre, plus que de leur donner.

Le Comte de Saint Paul, alla assieger Coucy, qui est vne moult forte place, tant la ville, que le chastel, où il y auoit foi-

Pp

1411. son de gens tant de guerre, que de communes. Car tout le peuple crioit, Viue Bourgongne. La ville n'arresta guieres. Si meit le siege deuant le chastel, & feut trouué qu'il estoit minable, & pource on commanda à miner à l'endroit de l'une des tours. Ceux de dedans se defendoient fort, & en tuoient, & bleffoient beaucoup de dehors. Et au dict siege feurent assez longuement. Or aduint que la dicte tour feut minée, & cuidoit-on faire ouuerture dedans pour y entrer, sans ce que ceux de dedans s'en apperceussent. Et aussi ne faisoient-ils ne iamais n'eussent cuidé, qu'on y eust peu miner. Et aduint que les maistres de la mine, qui estoient Liegeois, tousiours faisoient fort besongner. Et à vn iour plusieurs hommes de guerre allerent venir que c'estoit de la mine, & soudainement la tour cheut sur tous ceux qui y estoient, & moururent, & encores y sont-ils. Qui feut à la desplaisance du Comte de Saint Paul, pour la perte de ses gens. Et apres aucuns iours, ceux de dedans rendirent la place, & la grosse tour, saulues leurs vies, corps, & biens, & si eurent huit mille escus.

Dedans le chastel de Moinmer en Champaigne, estoit Messire Clignet de Brebant de par le Duc d'Orleans. Les gens du Roy, & du Duc de Bourgongne, y allerent pour mettre le siege deuant la place. Mais le dict de Brebant, considerant qu'il n'auroit aucun secours, le rendit, moyennant la somme de six mille escus qu'il en eut. Plusieurs autres places aussi se rendirent, tant en Valois, que ailleurs.

Le onzième iour de Ianuier, le Roy de Sicile entra à Paris.

Le Mareschal de Hely, qui estoit Mareschal de Monseigneur le Dauphin, Duc de Guyenne, s'en alla par le commandement du Roy en Poictou. Et se roignit avec luy le Seigneur de Partenai, & de Saint Seine, & plusieurs autres Seigneurs du pays, & se rendirent à eulx plusieurs places.

Pareillemēt en Languedoc fut enuoié le Seigneur de Saint George, & Messire Regnier Pot, contre le Comte d'Armagnac, & Aimé de Viry, Saouisien, en Beaujolois, contre le Duc de Bourbon. Et quelque guerre qu'il y eust, le pauvre peuple d'un costé, & d'autre souffroit beaucoup de pilleries & robberies, & estoit grand pitié de veoir le Royaume en telle desolation. Et lisoit on à Paris souuent tant à la ville, que à l'Vniuersité à Saint Bernard, & ailleurs, des epistres bien sedi-

tieuses, contre ceux qu'on nommoit Armaignacs.

Dessus ha esté touché de Messire Mauffart du Bois, cheualier, qui feut prins à Sainct Cloud, & mis au Chastelet. Et luy fait-on parler, si l voudroit point faire le serment au Duc de Bourgongne, & à la requeste de plusieurs amis qu'il auoit, le Roy luy donnoit remission. Lequel respondit, qu'il n'auoit fait chose pour laquelle il deust auoir remission, ne auoit fait chose qu'il cuidast qui despleust au Roy, ou qui luy deust desplaire. Et qu'il auoit serui le Duc d'Orleans, son maistre, & auoit esté seruiteur de son pere, & qu'on les estoit venu assaillir à Sainct Cloud, & il s'estoit aidé à defendre. Apres laquelle responce, il feut tresbien gehenné, pour scauoir la volonté des Seigneurs, & tres-constamment se porroit és peines & trauaux qu'on luy faisoit. Et tresenuis ceux qui estoient cōmis à ce faire, faisoient ce qu'on leur ordonoit. Et finablement feut condamné à auoir la teste couppée aux halles. Et en la prisō où il estoit, y auoit autres prisonniers. Et à l'heure qu'ils vouloient prendre leur refection à disner, le bourreau auoit la charrette prestee en bas. Et y eut vn, qui commença à appeller Messire Mauffart du Bois, si hault, qu'il l'ouit. Et lors va dire à ceux qui estoient avec luy, Mes freres, & compaignons, on m'appelle pour me faire mourir, dont ie remercie Dieu. Et ne crains point la mort, vne fois me failloit-il mourir. Ne ja Dieu ne vueille, que j'euite la mort, pour renoncer à la querelle que j'ai tenu. Et à Dieu vous dis, mes freres, & compaignons, & priez pour moy. Et tous les baïsa l'un apres l'autre, & fait le signe de la croix, & descendit tres-constamment & fermement d'un bon visage, & monta en la charrette, & feut mené aux halles, & luy mesmes se despouilla. Et quand il feut en chemise, la rompit deuant, & luy mesmes la renuersoit, pour faire plus beau col à frapper. Et apres ce qu'il eut les yeux bandez, le bourreau luy pria qu'il luy pardonnast sa mort. Lequel le fait de bon cœur, & le pria qu'il le baïst. Foison de peuple y auoit : mais comme tous ploroient à chaudes larmes. Et accomplit le bourreau ce qu'il luy auoit esté commandé. Et disoit que oncques il n'auoit fait chose si enuis, & estoit tres-desplaisant d'auoir osté la vie à vn si bon, & vaillant cheualier. Et aduint vne chose qu'on tenoit merueilleuse. Car au dedans de huit iours, le dict bourreau mourut, &

1411. quatre de ceux qui feurent à le tirer, & gehenner.

Le Roy retourna en. santé, & feut sain, & en bon point, & bon sens, & entendement. Et luy exposa-on bien au long les manieres qu'auoient tenu ses parens, dicts Armaignacs, & comme ils estoient venus deuant Paris, les pilleries, robberies, & destruction de peuple qu'ils auoient fait, & faisoient, & plusieurs autres choses les plus aigres, que faire se pouuoient. Et lors, le Roy en son Conseil declara qu'ils estoient ses ennemis, & comme à tels leur declara faire guerre, & auoir confisqué corps & biens. Et deposa le Seigneur d'Albrer, de l'Office de Connestable, & feut fait Connestable, le Comte de Saint Paul. Et si feut le Seigneur de Hangest, qui estoit Maître des arbalestriers, déposé, & le Seigneur de Rambures mis en son lieu, & le Seigneur de Hely, fait Mareschal de France au lieu du Mareschal de Rieux.

Guerre se faisoit forte en beaucoup de lieux. Messire Guichart Daulphin, qui estoit vers le Gastinois, & en Solongne, meit largeau en l'obeissance du Roy, qui estoit vne place sur la riuiera de Loire, appartenant à l'Euesque d'Orleans. Enguerrand de Bournouille, qui estoit vn des principaux Capitaines du Duc de Bourgongne, lequel auoit grand compaignée de gens, estoit à Bonneual, & feit souuent des courses. Et adueint vne fois, qu'il en feit vne bien accompagnée de ses gens, & feut rencontré par ceux qu'on disoit Armaignacs, lesquels plusieurs en tuerent, & prindrent, Et feut chassé iusques aux portes de Bonneual, & là se retrahit. Et le Seigneur de Hely, print par composition Cisay en Poitou.

En ce temps, feurent ordonnez Reformateurs, & Commissaires, contre ceux qu'on tenoit fauoriser les Armaignacs, & ne falloir guieres faire information, & suffisoit de dire, C'estuy là l'est. Les riches estoient mis à finance par maniere de rançon: mais la finance payée, on ne leur faisoit plus de desplaisir. Ceux qui n'auoient de quoy, on ne scauoit qu'ils deuenoient.

On meit sus vn nommé Andry de Rouffeler, cōme vn Capitaine. Et luy bailla on le gouuernement des archers, & arbalestriers de Paris. Et esleua on plusieurs gens du peuple, qui guieres ne valoient, A scauoir Preuost des marchands, Pierre Gentien, & Escheuins, Maistre Jean de Troyes, Jean de Lolue,

Jean de Saint-Yon , & Robert de Beloy , & Robert Lamet, 1411.
clerc.

Gens d'armes d'un costé & d'autre couroient , & places se prenoient les vns sur les autres. Feu se boutoit en Eglises, & y ardoit on souuent hommes, femmes, & enfans. Et mesmement en l'Eglise des Sillieres, où le feu feut bouté, feurent bien arses quatre cents personnes, tant hommes, que femmes , & petits enfans.

Au mois de Mars, apres que le Roy eut veu, & considéré, & aussi son Conseil, les manieres de ceux qu'on nommoit Armaignacs, il delibera de tenir les champs en personne, & d'aller assieger son Oncle, qu'on appelloit Jean de Berry.

L'an mille quatre cents & douze, feut rencôtré par aucuns des gens du Roy, & prins vn Augustin , nommé frere Jacques le Grand, Docteur en Theologie, & bien notable clerc, qui auoit plusieurs lettres adressans à plusieurs Seigneurs d'Angleterre, lesquelles il portoit au dict pays de par ceux qu'on nom- 1412.
moit Armaignacs, en leur requerant aide. Et ne pouuoient pas bien croire aucuns, que les Anglois les aidassent. Car le Duc de Bourgongne pour auoir leur alliance, auoit preuenue, & de fait l'auoit eue. Veue que le Comte d'Arondel estoit venu à Paris, & à son aide à Estampes, comme dict est. Et delibera le Roy d'exécuter ce qui auoit esté conclud, d'aller deuant Bourges, où estoit son Oncle, Jean de Berry.

Le quatriesme iour de May, le Roy s'en alla à Saint Denys, ainsi qu'il est accoustumé de faire. Et print l'Oriflabe, & la baille à vn vaillant cheualier, nommé Messire Hutin, Seigneur d'Aumont, lequel receut le corps de nostre Seigneur Iesus-Christ, & feit les sermens, qu'on doit faire. Auec le Roy estoient les Ducs de Guyenne, de Bourgongne, de Lorraine, & de Bar, & des gens de guerre largement.

Le dixiesme iour de May, à Saint Remy des plains, se rencontrerent le Comte de Saint Paul, Connestable, & le borgne de la Heuse, d'une part, & le Seigneur de Gaucourt, qu'on disoit Armaignac, d'autre. Et frapperét les vns sur les autres, sans y auoir aucun dommaige, ou profit d'un costé, ne d'autre.

Le Roy de Sicile estant vers Belesme, se rendit au Roy.

Le Comte d'Alençon, qui estoit en son pays, enuoia demander à ceux qui estoient de par le Roy, trefues de quarante iours,

1412. & les obtint, sans ce qu'on luy feist aucun desplaisir.

Le vingt-sixiesme iour du dict mois, passa l'auantgarde à la Charité sur Loire. Et en auoient la cōduicte Messire-Guichard Daulphin, grand Maistre d'Hostel du Roy, le Seigneur de Rābures, Maistre des arbalestriers de France, le Seneschal de Hainault, le Seigneur de Crouy, & le Preuost de Paris. Et auoient six mille hommes d'armes, & douze cents hommes de trait, & gros varlets, & foison de gens de pied. Et le Vendredy, & le Sabmedy, passa le charroi. Et le Dimanche, vingt-neufiesme iour, le Roy passa. Et Dun le Roy, Mont-faulcon, & plusieurs autres places & chasteaux, se meirent en l'obeissance du Roy.

Processions se faisoient à Paris moult deuotes, & portoit on plusieurs relicques, où estoïent hommes & femmes nuds pieds, tenans chascun vn cierge en leur main, & priās Dieu qu'il voulust donner paix entre le Roy, & les Seigneurs, ou sinon donner victoire au Roy.

Le Seigneur de Bloqueaux, Robert le Roux, & Messire Clignet de Brebant, preindrent la ville de Vernon, & feirent plusieurs courses, & dommaiges au pays, & ne demeura en la place que Bloqueaux, & les autres s'en allerent. Les communes du pays, voians les maux que leur faisoient ceux qui estoient dedans, delibérerēt de les assieger. Et de fait, à l'aide d'aucuns Officiers du Roy, les assiegerent. Et trouua Bloqueaux moyen de soy eschapper, & se rendirent ceux de dedans. Et feut prins Simon de Banuion & six autres, qui feurent amenez à Laon, & là eurent les testes couppees.

Les ville & chateau d'Issouldun, qui sont pres de Bourges, se meirent en l'obeissance du Roy.

Et le neufiesme iour de Iuin, arriua le Roy deuant Bourges, & feurent dressees les tentes de luy, & des Seigneurs. Et apres suruint vne merueilleuse tempeste de grands vents & grosse grelle, qui abbatit les tentes, & feit plusieurs grands maux au pays. Les Seigneurs de Chateau-roux, & de Lignieres, qui estoient les plus grands Barons de Berry, se meirent du costé du Roy. Et estoit logé le Mareschal de Hely à Lignieres, lequel se meit sur les champs à bien grosse compaignée. Le Duc de Bourbon le sceut, & se meit aussi sur les champs, & rencontra le dict Hely, & le rua ius, & fallut que Hely bien hastiue-

mēt se retrahist à Lignieres. Et y eut de ses gēs plusieurs morts, 1412.
& prins.

Le Roy enuoia vn Herauld à son Oncle, le Duc de Berry, luy signifier sa venüe. Lequel respondit qu'il feust le tresbien venu, & autre responce ne feit. On le somma de rendre la ville au Roy, il respondit qu'il estoit seruiteur, & parent du Roy, & tenoit la ville toute rendüe à luy, & à Monseigneur le Daulphin. Mais il auoit en sa compaignée gēs, qu'il ne deust point auoir, & qu'il garderoit la Cité pour le Roy, le mieux qu'il pourroit. Le siege feut mis, & sembloit qu'il n'y auoit aucunes gens de guerre dedans la ville. Et y eut trois sieges mis, en trois diuers lieux. Ceux de dehors voians qu'il sembloit, qu'il n'y eust comme personne de guerre dedans la Cité, se doubtoient bien que cauteleusement on le faisoit. Si meirent vn guet hault, lequel pouuoit veoir dedans la ville. Lequel veid dedans la ville gens armez & habillez pres d'une poterne, & en aduertit les gens de l'ost, lesquels se teindrent sur leur garde. Ceux de dedans saillirent bien armez & habillez, aussi feurent ils grandement receus, & y eut tres-dure besongne, & plusieurs prins d'un costé & d'autre, & finalement ceux de dedans se retrahirent. Pource que la ville n'estoit pas assiegée de toutes parts, & que ceux de dedans pouuoient saillir par aucuns lieux, & de leger cheuaucher le pays, & prendre les marchands, aucuns se meirent sur les champs, c'est à sçauoir, le Seigneur de Rambures, Maistre des arbalestriers de France, & le Mareschal de Hely, afin que viures peussent venir, & spécialement de Niuernois, & de la Charité sur Loire. Et aucunesfois y auoit des récontres, qui ne portoient aucun domaige, ou peu d'un costé & d'autre. Il en y auoit en l'Ost du Roy, qui feurēt prins, & disoit on, qu'ils feurent trouuez chargez de vouloir bouter le feu es logis du Roy, & confesserent le cas, parquoy eurent les testes couppees. Aussi y en eut il des autres, qui faisoient sçauoir dedas la place, tout ce qu'ils pouuoient sçauoir de l'ost du Roy. Et se nommoient Gilles de Soisy, Enguerrand le Senne, & Maistre Geuffroi de Buillon, Secretaire du Roy, lesquels feurēt prins, & confesserent le cas, parquoy eurent les testes couppees.

En ce temps, la ville de Dreux feut prinse d'assault par le Mareschal de Longny, qui estoit en Normandie.

Le Roy qui estoit deuant Bourges, feit leuer le siege deuant

1412. l'vne des portes, & le feit asseoir à vne autre. Et la cause pour quoy il le feit, feut principalement pource que tous les viures du pays, tant pour les gens, que pour les cheuaux, estoient du tout consommez & gastez, & en l'Ost ne venoient de ce costé aucuns viures. Et supposé que les dictz de Hely, & Rambures, feissent grandement leur debuoir de garder les marchands, quand ils venoient: toutesfois comme nuls ne trouuoïent, pour ce qu'ils ne trouuoient qui iuste pris en donnast. Car combien qu'on feist de grandes exactions de finances, les gens de guerre estoient tresmal payez, & ne recepuoient aucun argent. Et le pays de deuant les autres portes, estoit encores assez garni de viures, & l'entretenoient ceux de dedans la ville, afin que viures veinssent à la ville.

Et feut enuoié le Preuost de Paris de par le Roy à Paris, pour auoir argent, lequel en trouua à bien grand peine & difficulté. Et y eut des Capitaines de ceux qu'on disoit Armagnacs, qui sceurent que argent venoit à l'ost du Roy, lesquels se méirent sur les champs, pour le cuider destrouffer. Et vint la chose à la congnoissance du Duc de Bourgogne, lequel enuoia au deuant le Seigneur de Hely bien accompagné. Et par ce les autres n'oserent mettre à execution leur volonté, & feut l'argent apporté seurement iusques à l'ost.

Processions se faisoient bien notables à Paris tant generales, que particulieres, par les Eglises, & nuds pieds alloit le peuple, portant cierges par les parroisses. Et en feit vne l'Vniuersité de Paris iusques à Saint Denys. Et quand les premiers estoient à Saint Denys, le Recteur estoit encores à Saint Mathurin.

Le Comte de Saint Paul, (comme dict est,) soy disant Connestable de France, vint mettre le siege deuant Dreux. Et la chose venüe à la congnoissance de Gaucourt, il assembla environ huit cents combatás, en intention de venir leuer le siege. Et de fait, se mit en chemin. Et y eut vn des gens de sa compagnie, pour cuider auoir profit, lequel hastiuement s'en partit, & s'en vint vers le dict Comte, & luy dit, comme le dict de Gaucourt, venoit pour frapper sur luy, & leuer le siege. Et lors le dict Côte print quatre cents archers, & les mit en vne embusche pres d'un estang, où il estoit aduertí, que le dict de Gaucourt, & sa compagnie debuient passer, & environ cent hommes

mes d'armes. Et se trouuerent les vns les autres, & au commencement y eut dure & aspre besongne. Mais assez tost se separerent les vns & les autres, & se retrahit le dict Comte sans autre chose faire, & le dict de Gaucourt, s'en retourna à Bourges. Et le dict Comte, apres son partement de deuant Dreux, print Sainct Remy, vn fort chasteau, Chasteauneuf, & Belesme. Lesquelles places ceux qui estoient dedans, rendirent assez legement, & en les rendant, leur feut promis par le dict Comte, qu'elles seroient au Roy, perpetuellement annexées à la Couronne. Et assez tost apres, les baillies mains du Roy de Sicile, & s'en partit du pays, & s'en alla en Picardie, pource qu'il estoit venu certaines nouuelles, que les Anglois y debuoiert descendre. Et laissa le Mareschal de Longny, le borgne de la Heuse, & Messire Antoine de Craon, & les chargea expressement, qu'ils feissent diligence d'auoir la ville & le chasteau de Dreux. Lesquels Seigneurs estoient vaillans, & bien accompagnez, & y meirent le siege, & enuoierent à ceux de Paris leur requerrir, qu'ils leur enuoiaissent des gēs garnis d'artillerie. Ce qu'ils firent, & y enuoierēt deux bourgeois de Paris, l'un nommé Andry Rousseau, & l'autre, Jeā de l'Oliue, accompagnez de cinq cents combatans, & veindrent deuant la place avec les autres. Et y auoit plusieurs gros engins, qu'on faisoit iecter iour & nuict. Ety eut vn des gros engins, lequel feit au mur vn bien gros trou. Et quād ceux de Paris apperceurent le trou, ils descendirent és fosses, & feirent tant qu'ils veindrent à l'endroi. Et combien qu'il y eust gens pour defendre qu'on n'y entrast: toutesfois ils rebouterent leurs ennemis à force, & y en eut plusieurs morts & blesez de ceux de Paris. Et par vne autre porte, assaillirent les gens de guerre, tellement que la ville feut gaignée. Et se retrahirent ceux de dedans au chasteau. Et estoit la dite ville bien garnie de viures, & de meubles, de plus grād valeur qu'on ne cuideroit, & en preindrent les assaillans, chacun ce qu'il peut, dont ils feurent moult enrichis. Et apres delibererent de meitre le siege deuant le chasteau Sainct Remy, & y feut mis en intention de l'aucir en brief temps. De vaillants gens estoient dedans, qui se defendoient, & souuent y auoit de belles armes faictes, & plusieurs blesoient & tuoient de traict de ceux de dehors.

Ceux de Sancerre, où il y auoit forte ville, & chasteau, aban-

Qq

1412. donnetent la ville, & s'en allerent à Bourges. Et ceux qui estoient dedans le chastel, par certaine compositiō le rendirent au Roy.

En ceste saison, Iacqueuille, & vn nommé Terbours, qui estoient Capitaines de gens d'armes, delibererent de meſtre le ſiege à Yenuille. Et de fait, luy meirent. Aucuns de ceux, qu'on diſoit Armaignacs, ſ'assemblerent pour cuider leuer le ſiege, & ſ'en retournerent à Thoury. Et là aſſez haſtiuement feurent aſſiegez par les dictz Iacqueuille, & Terbours. Et puis prindrēt & entrerent en la place, & y bouta Iacqueuille le feu, & y eut pluſieurs bonnes gens, femmes, & enfans ars, & brullez. Et les autres ſaillirent de deſſus les murs és foſſez, dont les aucuns ſe tuoient, les autres ſ'affoloient. Pluſieurs en y eut de prins de dedans la place, & menez à Paris, leſquels feurent pendus.

On ieſtoit dedans la ville de Bourges, par le moyen des engins, groſſes pierres, qui faiſoient du mal beaucoup aux habitans. Et comme deſſus ha eſté touché, le Duc d'Orleās, & ceux de ſon parti, enuoierent en Angleterre, pour ſçauoir ſils auroient aide & ſecours d'Anglois contre leurs aduerſaires. Leſquels y veindrent, & deſcendirent à la hogue de Saint Vaſt, le Duc de Clarence, Cornouaille, & autres Seigneurs d'Angleterre, accompagnez de deux mille hommes d'armes, & quatre mille de trait, & ſ'en venoient vers Bourges pour aider à leuer le ſiege, à l'aide de ceux qu'on diſoit Armaignacs. Le Duc de Sauoye, qui estoit au ſiege, ſe meſſa fort de trouuer paix, & pluſieurs tant du ſiege, que de dedans la ville, y trauailloiet diligemment, & en auoient grand deſir & volonte. Car dedans ils eſtoiet fort trauaillez de faire guet, & garde, & tous les iours on en bleſſoit. Et ſi n'auoir le Duc de Berry, plus rien de quoy il peult aider aux gens de guerre, qui estoient avec luy. Et combien que parauāt il euſt de beaux ioyaux, toutesſois tout eſtoit deſpendu, & les vaiſſeaux meſmes des reliques vendus, & aliezez, & ſi auoient viures bien eſcharchement, & aucunement on ſ'y commençoit à mourir. Et ceux de l'oſt, estoient preſques en pareil eſtat, au regard d'argēt, & viures, & ſi en bleſſoit on pluſieurs. Et qui pis eſtoit, il y couroit vne maladie de flux de ventre, fort merueilleuſe, dont pluſieurs mouroient. Et meſmement y moururent Meſſire Pierre de Nauarre, & Giles, frere du Duc de Bretagne. Parquoy & d'un coſté, & d'autre, eſtoit

necessité d'auoir paix ou traité. Et pour ouuir la matiere, ^{1412.}
 feut enuoïé par le Roy sauf cōduict à l'Archeuesque de Bour-
 ges, qui estoit vn bien notable Prelat, pour venir de la partie
 du Duc de Berry, duquel le dict Archeuesque estoit Chancel-
 lier. Lequel y veint, & proposa bien grandement, & notable-
 ment, en faisant salutations, recommandations, & reueren-
 ces treshumblement. Et feut fait certaine cedula de Traicté,
 contenant plusieurs articles. Et entre les autres, y auoit que le
 Duc de Berry, & ses adherens, mettroient leurs terres & pla-
 ces en la main du Roy, & pourroit mestre en icelles telles gens
 qu'il luy plairoit. Et que de chascune partie, on renonceroit à
 toutes alliances, qu'on pourroit auoir fait, ou promis avec les
 Anglois, & qu'on tiendroît la paix faicte à Chartres, & accom-
 pliroyt on ce qu'il plairoit au Roy d'ordonner. Et que les ter-
 res saisies seroient rendües à ceux ausquels elles estoient, &
 que toutes haines & rancunes s'osteroient, avec autres clauses.
 Laquelle cedula feut enuoïée à Bourges, & ne pleut pas bien
 aux Seigneurs de dedans. Tellement que le Roy delibera de
 faire assaillir la ville, laquelle estoit fort battüe en plusieurs
 lieux. Toutesfois depuis le Duc de Berry se aduisa, & delibera
 de tenir la cedula, & enuoia vers le Roy, & Monseigneur le
 Daulphin, dire qu'il en estoit contēt. Et feut aduisé qu'il estoit
 bon que seurement les Ducs de Berry, & de Bourgongne, par-
 lassent ensemble, & feut le lieu choisi, & les seuretez aduisées.
 Et issit le Duc de Berry, & le Duc de Bourgongne veint au de-
 uant de luy, & quand ils s'entreueirent, & feurent pres, ils s'em-
 brassèrent, & baisèrent. Et dit Berry à Bourgongne, Beau Nep-
 ueu, l'ai mal fait, & vous encores pis. Faisons & mettons pei-
 ne, que le Royaume demeure en paix, & tranquillité. Et l'aut-
 re respondit, Bel Oncle, Il ne tiendra pas à moy. Et tous ceux
 qui veirent la maniere, cōmencerent à larmoyer de pitié. Et de
 par Monseigneur le Daulphin, Duc de Guyenne, feurent faitz
 les articles de Traicté & de paix dessus dictz, qui contenoient
 en effect le Traicté de Chartres. Lesquels articles feurent ap-
 prouuez cōme dict est, par les dictz Ducs de Berry, & de Bour-
 bon, & Albret. Et ordonné iour que le Roy, & tous les Sei-
 gneurs, se trouueroient à Auxerre, & que là tout se confirme-
 roit. Et Dieu scait la ioye qu'on demenoit d'un costé & d'autre.
 Et lors issit le Duc de Berry bien accompagné, & veint deuers

1412. le Roy, & luy offrit, & bailla les clefs de la ville. Et à aller deuers le Roy, feut accompagné le dict Monseigneur de Berry, de Monseigneur le Daulphin, & de Monseigneur de Bourgogne. Et tres-joyeusement & benignement le Roy le receut, & feirent vne grand chere ensemble. En l'ost, & aussi en la ville on faisoit grand ioye, & non sans cause. Et entroir en la ville, qui-vouloit. Et ainsi se departir le siege.

Le Duc de Clarence, & les Anglois, faisoient maux innombrables, & tât que ennemis pourroient faire, & disoient qu'ils ne partiroient ia du Royaume, iusques à ce qu'ils feussent contentez & payez de leurs soultes. Or n'auoit le Duc d'Orleans, & le Duc de Berry riens. Auquel fallut à Bourges prèdre les reliquaires de sa sainte Chappelle, & autres Eglises, pour payer ces gens qui estoient dedans en garnison. Et pource le Duc d'Orleans leur bailla en gage, & en ostaige le Comte d'Engoulesme son frere, iusques à ce qu'on leur eust baillé certaine grosse somme d'argent, qui leur feut promise.

A Paris feirent grād ioye, de ce qu'il y auoit Traicté de paix, lequel se debuoit parfaire à Auxerre. Et feut deliberé que de la Court de Parlement iroit vn President, & certaine quantité des Seigneurs, & les Aduocats, & Procureur du Roy, & le Preuost des marchands, & aucuns Escheuins. Et de fait y feurent. Et le vingt-iesme iour du mois d'Aoust, y feurent le Roy, & tous les Seigneurs, excepté Orleā, & Berry. Et la cause pourquoy les dictz deux Seigneurs n'y voulurent aller, feut, que Messire Pierre des Essars, qui sçauoit du secret beaucoup du Duc de Bourgogne, & de ses alliez, les aduertit, qu'il auoit esté paroles, que s'ils y eussent esté, on l'auoit deliberé de les tuer tous deux. Mais quand Monseigneur le Daulphin feut à Melun, il les manda, lesquels en personne iurerent, & feirēt le fermēt comme les autres. Et print lors le dict Seigneur en son seruice Messire Jacques de la Riuere, & vn gentil-homme nommé le petit Mesnil. Et en effect feut la paix faicte à Chartres, confirmée, approuuée, & iurée par tous les Seigneurs, & feut publiée la paix à Paris, dont par toute la ville on demenoit grand ioye.

Les Anglois apres ce qu'ils eurent eu le Comte d'Engoulesme, tirerēt leur chemin vers Bordeaux, & prenoient petits enfans, tant qu'ils pouuoient en trouuer, & s'efforçoient de prèdre.

places, & pour cōclusion, faisoïēt maux innumerables. Et ardi-
rēt Beaulieu empres Loches, & pillerent Busançois. Et fina-
blement arriuerent vers le pays de Bordelois, & s'en allerent
par mer en Angleterre. 1412.

Le Roy veint à Paris, où il feut receu à grand ioye, & apres
y entra Monseigneur le Daulphin, puis le Comte de Vertus,
frere du Duc d'Orleās. Et apres eux estoïēt les Ducs de Bour-
gogne, & de Bourbon. Et fut derechef la paix publiée à Paris.
Et faisoit-on de plus fort en plus fort grands ioyes, cheres,
festes, & elbatemens. Et feut dict par Monseigneur de Guyen-
ne, que la mort de feu Messire Iean de Montaignu, grand Mai-
stre d'Hostel du Roy, luy auoit fort despleu. Et que ce feut vn
iugement trop soubdain, & mal fait, venant de haine, & de
volonté, plus que de raison. Et ordonna, qu'on allast au gibet,
& qu'il feust despendu, & baillé aux amis, pour mestre en terre
saincte, & ainsi feut fait.

Le Roy alla à Saint Denys, en grand deuotion, & feut bail-
lée l'Oriflambe en l'Abbaye, en la forme & maniere accoustu-
mée.

Le Roy Iacques qui estoit venu d'Italie, fait prendre son
frere le Comte de Vendosme, & longuement le tint en prison.
Et ne scauoit-on pas bien la cause. Et disoient aucuns que c'e-
stoit, pource qu'il auoit en son absence, prins les fruiets de ses
terres, lesquels il auoit despédu, sans en faire aucune restitutiō.

Le Roy scaichant que Concile se debuoit tenir en l'Eglise,
vers les marches de Rome, y enuoia bien grande & notable
Ambassade.

Il veint nouuelles, que les Anglois qui estoient en Guyen-
ne, faisoient forte guerre, prenoient places, & contraignoient
le peuple à leur faire fermés. Et pource fut deliberé que Mon-
seigneur de Hely, Mareschal de Guyenne, iroit accompagné
de gens de guerre, lequel feut iusques là. Mais il trouua qu'il
n'auoit pas assez gens pour y resister. Et pource il s'en retour-
na, & requit qu'on luy baillast gens suffisamment, & derechef
il iroit. Laquelle chose ne se pouuoit pas faire sans grand ar-
gent, dont on n'en auoit point. Et pource demeura la chose en
ce point.

Le Duc de Berry, apres veint, & entra à Paris en grand estat,
& feut honnorablement receu en la dicte ville, & en feir-on

1412. grandioye. Et apres veint, & entra le Duc de Lorraine. Or est vrai que le dict Duc auoit fait de grandes & des-honorables choses en la ville de Neufchastel en Lorraine. Et combien que l'on vueille dire, que la Duché de Lorraine, ne soit tenue en foy & hommaige du Roy, comme estant de l'Empire. Toutes-fois la dicte terre de Neufchastel, & bien trois cents villes que villaiges à clocher, sont tenües en foy & hommaige du Roy. Et enuoia l'on faire certain exploict au dict lieu de par le Roy. Dont le Duc de Lorraine feut mal content, & feut prendre des Officiers Royaux, qui faisoient le dict exploict, & de ceux à la requeste desquels il se faisoit. Et encores feit-il il pis. Car il y auoit des pennonneaux, & escussions aux armes du Roy en la ville, qu'on y auoit attachez en aucun lieu, en signe de Sauuegarde, lesquels il feut prendre, & lier à la queue de son cheual, & les trainoit. Laquelle chose venüe à la cognoissance des gens du Conseil du Roy, feut deliberé qu'on luy feroit son procez comme à crimineux de lese Majesté, & feut adiourné à comparoir en personne en la Court de Parlement. Et tant fut procedé, qu'il feut mis en quatre defaults crimineux. Et meurent deuers la Court les Aduocats & Procureur du Roy, leur profit de default, en requerant les conclusions estans en iceluy, leur estre adiugées, ce qui feut fait. Car il feut dict auoir encouru & comis crime de lese Majesté, & auoir forfait corps, & biens, & feut banni du Royaume de France. Et estoit venu à Paris, à la seureté du Duc de Bourgongne, lequel le debuoit presenter au Roy le lendemain à l'issüe de sa messe. Laquelle chose veint à la cognoissance de la Court de Parlemēt, laquelle ordōna aux Aduocats & Procureur du Roy, qu'ils allassent à la Court requerir au Roy, qu'il feist Iustice du dit Duc de Lorraine, ou qu'on le baillast à la Court de Parlemēt, pour en faire Iustice, & ce qu'il appartiendroit par raison. Et de ce le Duc de Bourgongne, & le Duc de Lorraine, n'estoiēt en rien aduertis, que les gens du Roy de Parlement y deussent aller. Lesquels y veindrēt, & y auoit des Seigneurs de la Court, avec les Aduocats & Procureur, & arriuerēt comme le Duc de Bourgongne presentoit au Roy le Duc de Lorraine. Et quād le Chācellier de France veid ceux de Parlemēt, il demanda qu'ils vouloient. Et lors se agenouilla, & parla Iuuenal, Seigneur de Traignel, lequel cōme dessus est dit, estoit Aduocat du Roy, qui recita les

cas dessus dictz, en requerât aussi ce que dict est. Et lors le dict 1412.
Duc de Bourgogne, dit, Iuuenal, ce n'est pas la maniere de faire. Et il respondit, qu'il falloit faire ce que la Court auoit ordonné, & requeroit que tous ceux qui estoient bôz & loyaux, veinssent & feussent avec eulx, & que ceux qui estoient au contraire, se tirassent avec le dict Duc de Lorraine. Lors le dict Duc de Bourgogne, laissa aller le dict Duc de Lorraine, qu'il tenoit par la maché. L'issue feut, que le Duc de Lorraine pria au Roy bien humblement, qu'il luy voulast pardonner, & qu'il le seruiroit loyaument. Et lors le Roy luy pardonna tout, & pardonna les bannissements & confiscations, & eut le Duc remission. Mais le Duc de Bourgogne, ne feut pas bien content du dict Iuuenal, combien que ce qu'il feut, ce feut comme bon, vrai, & loyal, & luy en deust le Duc de Bourgogne, auoir sceu tresbon gré, de foy estre si loyaument acquisé.

Il feut delibéré par le Roy, & les dictz Seigneurs, qu'il estoit expedient d'assembler les trois Estats, & le feurent. Et de tous pays veindrent gens, & feurent enuoiez à Paris, tant des gens d'Eglise, des nobles, que des bonnes villes. Et à la iournée proposa Messire Jean de Neelle, Chancelier de Monseigneur le Dauphin, & môstra en assez briebs termes, les maux qui estoient aduenus par le moyen de la guerre, & des diuisions, & le grand bien que c'estoit & pouuoit aduenir par l'vniion des Seigneurs, & par paix. Et qu'il estoit necessité de se pourueoir contre les Anglois, ennemis anciens du Roy, & Royaume de France. Laquelle chose ne se peut faire sans argent. Et pource requeroit aux trois Estats aide, qui estoit en effect vne bonne grosse taille. Apres ce ainsi fait, & dict, l'Vniuersité de Paris, & le Preuost des marchands, & Escheuins pour la ville de Paris, demanderent audience, Ce qu'ils eurent, & proposa Maître Benoist Gentien, & preint son theme, *Imperauit ventis, & mari, & facta est tranquillitas magna*. Et print deux vents qui dominoient fort au Royaume de France, c'est à sçauoir sedition, & ambition. Et monstra la pauureté du peuple, & les grands aides, qui estoient sus, comme quatriesmes, impositions, & gabelles, & la grande & excessiue mangerie des finances, qu'on y auoit fait. Et de ce, le dit Gentien n'auoir rien particularisé, ne nommé aucuns particuliers, lesquels auoient grands profits, & excessifs. Dereghefils demaderent audieçe,

1412. laquelle leur feut oſtroïée à certain iour. Auquel propoſa vn notable Docteur en Theologie, de l'Ordre des Carmes, nommé Maïſtre Eufſtache de Pauilly, lequel recita en bref ce qu'auoir dit le diſt Gentien. Et pour particulariſer, exhiba vn grâd roolle, qui feut baillé à lire à vn ieune Maïſtre és arts, lequel le leur bien grandemēt, & haultemēt. Et y eſtoient declarez les grâds & exceſſifs gaiges que aucuns Officiers prenoient, & n'y eut rien eſpargné iuſques à la perſonne du Chancellier, & autres perſonnes, & des eſtats & pompes qui ſe faiſoient, & le gouuernement tel qu'il eſtoit, & nommerent aucunes gens de finances particulieremēt, qui auoiēt eu pluſieurs grandes finances, & en auoient amendé exceſſiuement. Et requeroient qu'on les priſt, & leurs biens auſſi. Et quand le propoſant diſoit les paroles deſſus diſtes, ou ſemblables, le diſt de Neelle, Chancellier de Guyēne, vouloit parler, & les reprēdre. Mais le Chancellier de France, luy dit, qu'il les laiſſaſt dire ce qu'ils voudroient. Mais le diſt de Neelle, tres-arrogamment & haultemēt luy reſpōdit à vne fois par maniere biē orgueilleuſe, qu'il parleroit vouluſt, on non, avec pluſieurs autres paroles, dont les aſſiſtans feurent tres-mal contents, & ſe departirent ſans aucune cōcluſion. Et pour ceſte cauſe, Mōſeigneur de Guyenne, enuoia querir ſes ſeaulx, & le des-appointa d'eſtre Chancellier de Guyenne. Vn Aduocat de Parlement, nommé Maïſtre Iean de Vailly, ſans quelque eſlection, par le moyen de la Royne, à la requête de ſon frere le Duc de Bauiere, feut faiſt Chancellier de Guyenne. A la deliberation des trois Eſtats, y eut diuerſes imagination's & opinions. Entre les autres, ceux de la Prouince de Rheims bien notablement monſtrèrent, que les aides ordinaires ſuffiſoient bien à ſouſtenir la guerre, ſans meſtre tailles, veu la pauureté du peuple, & les pilleries, à cauſe des diuiſions, & pluſieurs à leur imagination ſe adhererent. L'Abbé du Mont Sainct Iean, qui eſtoit bien notable clerc, parla ſpecialement contre les gens des fināces, & ceux qui auoient eu dons exceſſifs du Roy. En monſtrant qu'on deuoit reprendre de ceux qui auoient trop eu, & que ce faiſt, le Roy auroit aſſez pour reſiſter aux ennemis, & ſouſtenir la guerre, en employant ce qui auoit eſté diſt par les diſts Gentien, & Pauilly.

En ce temps, mourut Henry de Lancaſtre, lequel on diſoit eſtre meſel, lequel ſe diſoit Roy d'Angleterre, par la maniere

niere dessus dicté. Et laissa quatre fils, C'est à sçauoir Henry, 1412.
Roy apres luy, le Duc de Clarence, le Duc de Bethfort, & le
Duc de Glocestre.

Et quelque paix qu'il y eust, tousiours regnoient les bouchers dessus nommez, & plusieurs pauures & mauuais gens. Et pource que Iuuenal, Seigneur de Traignel, auoit plusieurs Seigneurs tant de la Comté, que de la Duché de Bourgongne ses parens, & lesquels l'aimoient bien, & en luy auoient fiance, Ils veindrét vers luy en son Hostel de Paris, & luy dirent deux choses, qui leur desplaïoient fort, touchant Monseigneur de Bourgongne. L'une, qu'il estoit obstiné de maintenir, qu'il ne feist point mal, d'auoir faict tuer Monseigneur d'Orleans, & que si ce n'estoit que les maux qui en sont aduenus, si debuoit considerer qu'il auoit mal faict. L'autre, de ce qu'il se laissoit gouverner par bouchers, trippiers, escorcheurs de bestes, & foison d'autres meschans gens. Et requirent au dict Iuuenal, qu'il le voulust remôstrer au dict Duc de Bourgongne. Lequel respondit que volontiers il le feroit. Et feut le dit Iuuenal plusieurs fois en l'Hostel d'Artois, & l'attédoit iusques à my-nuict. Et aduint qu'une nuict, le Duc de Bourgongne le feist venir, & l'ouit assez patiemment. Et luy monstra que au môings ne pouuoit-il que dire qu'il eust failli, & que la paix estoit faicte, & qu'il la tiendrait. Et en tant qu'il touchoit les bouchers, que ce n'estoit pas son honneur. Et si luy dit outre, qu'il luy fineroit de cent notables bourgeois de Paris pour l'accompagner, & faire tout ce qu'il luy plairoit commander. Et si luy presteroient argent, quand il en auroit à faire. Au premier il respondit, qu'il ne cuidoit point auoir failli, & qu'il ne le confesseroit iamais. Au deuxiesme il dit, qu'il failloit qu'il ce feist, & qu'il n'en seroit autre chose. Et estoit pitié de veoir, & sçauoir ce que faisoient les dicts meschans gens, lesquels on nommoit Cabochiens, à cause d'un escorcheur de bestes, nommé Caboché, qui estoit l'un des principaux Capitaines des dicts meschans gens. Desquels, & de leur maniere de faire, toutes gens de bien estoient tresmal contents.

L'an mille quatre cents & treize, Ceux qui auoient le gou- 1413.
uernement des finances, feurent des-appoinctez, & autres mis en leurs lieux. Et si voulut-on des-appoincter le Chancelier: mais le Roy fort le soustint, tellement que pour lors il de-

R r

1413. meura, combien que depuis il feut desmis.

Messire Pierre des Essars, s'en alla & partit, aussi feirent plusieurs autres. Et la charge qu'on donnoit au dict des Essars, estoit qu'on debuoit faire vnes ioustes au bois de Vincennes, esquelles debuoit estre le Roy, & Monseigneur de Guyenne, Daulphin, & qu'il les debuoit prendre, & emmener, & les mettre hors des mains de Monseigneur de Bourgongne. On proceda contre ceux qui s'estoient absentez, à bannissement.

A la fin d'April, & au commencement de Mai, se mirent sus plus fort que deuant meschans gens, trippiers, bouchers, & escorcheurs, pelletiers, cousturiers, & autres pauvres gens de bas estat, qui faisoient de tres-inhumaines, detestables, & des-honnestes besongnes.

Et quād Messire Pierre des Essars, son frere, & autres, veirēt la maniere de faire, ils s'en allerent hors de Paris, Car ce moult luy desplaisoit. Les autres disoient que c'estoit, pource qu'il ne faisoit pas à son plaisir, cōme il auoit accoustumé. Et là vne fois où on parloit de recouurer argēt de ceux qui en auoient trop eu, Il dit que le premier duquel, ou sur lequel on deuoit recouurer, c'estoit du Duc de Bourgongne, Car il auoit eu biē deux mille lyons. Et de ce, le Duc de Bourgongne fut mal contēt, & aussi les Cabochiens. Et apperceut le dict des Essars, qu'il seroit en danger. Et pource s'en alla, combien que depuis il dit, que oncques n'en auoit parlé, ne fait les autres choses qu'on luy mettoit sus.

Les Cabochiens de Paris, voulurent auoir vn Capitaine. Et preindrent vn cheualier de Beauffe, nommé Messire Helion de Iacqueuille, qui estoit biē habile de son corps. Et le borgne de la Heuse, feut fait Prèuoist de Paris.

Des Essars, cuida prendre le pont de Charēton. Depuis à la feureté du Duc de Bourgōgne, veint à la bastille de Saint Anthoine. Et quand la chose veint à la congnoissance de Iacqueuille, luy, & vn nommé Robert de Mailly, veint biē à tout trois mille des gens dessus dictz, deuant la bastille, disans, comme que ce feust, qu'ils auroient Messire Pierre des Essars. Lequel toutesfois estoit venu à la feureté de Monseigneur de Guyenne, & de Monseigneur de Bourgongne. Et pource que lors on n'obtempera pas à leur requeste, ils veindrent bien vingt mille, avec les dictz Iacqueuille, & Mailly, en l'Hostel du Duc de

Bourgongne. Et lors le dict Duc voiant la grand commotion, 1413. leur dit, qu'il le prendroit, & auroit en sa main, & le garderoit bien, si le fait venir à luy. Lors le dict des Essars luy dit, Monseigneur, Je suis venu à vostre seureté, si l vous semble que ne me puissiez garder de la fureur de ces gens, laissez moy en aller. Et le dict Duc luy dit, Mon ami ne te soucie, car ie te iure, & assure par ma foy, que tu n'auras autre garde que de mon propre corps, & le print par la main, & luy fait la croix sur le dos de sa main, & l'emmena. Et puis veindrent à l'Hostel de Monseigneur de Guyenne, & fait vne proposition, Messire Jean de Troyes, en disant qu'il falloit qu'on eust aucuns qui estoient entour du dict Seigneur, & qu'ils estoient informez, qu'il y auoit des gens de tresmauuaise volôté, & firent vne tresgrande commotion & sedition. Et furent prins le Duc de Bar, le Chancelier Vailly, Messire Jacques de la Riuere, Messire Regnaud d'Angènes, Gilet de Vitry, & Michelet de Vitry, son frere, (lequel Madame de Guyenne, fille du Duc de Bourgongne, tenoit en ses bras,) & autres iusques à quinze. Et furent menez en l'Hostel d'Artois, où estoit le Duc de Bourgogne. Il y auoit vn nommé Vuetelet, qui estoit au Duc de Berry, lequel ils tuèrent, si firent-ils vn menestrier nommé Courtebote, & vn secretaire du Roy, nommé Maistre Raoul Brisoul. Plusieurs meurtres secretement se faisoient. Depuis les dessus dicts furent mis au Louure en prison, & le Duc de Bar, aussi en la grosse tour, & Messire Pierre des Essars, feut mené en Chastelet. Et preindrent les chapperons blâcs, & en eurent le Roy, Monseigneur le Daulphin, les Ducs de Berry, & de Bourgongne, & ceux du grand Coseil, & n'en auoit pas qui vouloit. Et ceux aux quels on les refusoit, c'estoit signe qu'on les tenoit pour Armaignacs, ou au moins estoient soupçonnez de l'estre. Ils alloient par Paris par tourbes, & delaissoient leurs mestiers. Et ainsi puis qu'ils ne gaignoient rien, il falloit qu'ils pillassent & robbassent, & aussi le faisoient-ils de leur auctorité pure priuée.

Et leurs manieres mesmes desplaisoient à aucuns, qui auoient esté consentans de les mettre sus, comme au Ministre des Mathurins, à Maistre Eustache de Paullly, Carme, & autres de l'Vniuersité, & delibererent de eulx assembler secretement aux Carmes, en la chambre du dict de

Rr ij

1413. Pauilly, pour imaginer à qu'elle fin ces manieres de faire pouuoient venir. Et pource qu'ils ſçauoient que le dict Seigneur de Traignel, estoit bien notable homme, & qui auoit eu le gouuernement de la ville de Paris, long temps, & auoit tousiours monſtré de ſon pouuoir auoir amour au Roy, & au Royaume, & à la choſe publique, luy prierent qu'il luy pleuſt d'y eſtre. Et ſ'assemblerent, & y eut pluſieurs imaginations, & veoient bien que les choſes tendoient à deſtruction finale de la Seigneurie. Et enquirent quelles perſonnes deuotes, & menans vie contemplatiue auoit à Paris, & trouverent des Religieux, & autres, & auſſi des femmes. Et alla Pauilly parler à eulx, en leur priant qu'ils vouluſſent prier Dieu, qu'il leur vouluſt reueler à quelle fin, & conſequence, ces diuiſions pouuoient venir. Et y en eut entre les autres trois, qui rapporterent trois diuerſes choſes. L'une feut, qu'il ſembloit à la creature, qu'elle veoit au ciel trois Soleils. La ſeconde, qu'elle veoit au ciel trois diuers temps, dont l'un estoit vers le midy, les marches d'Orleans, & de Berry, clair, & luisant, les deux autres aſſez près l'un de l'autre vers Paris, qui par fois encouroient des nées noires, & ombreuses. L'autre, eut vne viſion, qu'elle veoit le Roy d'Angleterre, en grand orgueil, & eſtat, au plus hault des tours de noſtre Dame de Paris, lequel excommunioit le Roy de France, qui estoit acompagné de gens veſtus de noir, & estoit aſſis ſur vne pierre emmy le paruiſ noſtre Dame. Et quand les deſſus dictz feurent aſſemblez par deux fois bien & longuement, & parlerent des choſes anciennes, ils conchirent que toutes les choſes qu'on faiſoit, & le gouuernement tel qu'il estoit, pouuoit ſignifier mutation de Seigneurie au Royaume. Et par ce moyen, le Roy d'Angleterre, qui pretendoit à auoir droit au Royaume de France, y pourroit paruenir, & que les choſes estoient bien dangereuſes & perilleuſes. Et y eut l'un d'eulx, qui dict, qu'il auoit veu pluſieurs Histoires, & que toutes fois que les Papes, & les Roys de France auoient eſté vnis enſemble en bonne amour, que le Royaume de France auoit eſté en bonne proſperité. Et doubtoit que les excommunications & maledictions que ſeit Pape Boniface huitieſme ſur Philippes le Bel, iuſques à la cinquieme generation, & depuis renouuellées comme l'on dict par Benedict, ne ſeuſſent cauſe des maux & inconueniens qu'on veoit. Car Phi-

lippes le bel delaiſſa trois beaux fils , leſquels moururent ſans hoirs maſles. Et Philippes de Valois , eut bien à faire. Et ſi eut le Roy Iean , qui feut prins en la bataille de Poitiers. Et eut vn fils, nommé Charles cinquieſme, dict le ſaige, qui eut de grandes guerres, & eut deux enfans, Charles, qui regne de preſent malade, comme il eſtoit notoire, & Louys, qui mourut piteuſement. Et que de preſent , qui meſtroit le tout en bon eſtat & gouuernement és enfans du Roy , tóut deburoit ceſſer. Laquelle choſe feut fort peſée & conſiderée par ceux de l'aſſemblée. Et le dict Seigneur de Taignel dit, que le remede ſeroit de trouuer vne bonne paix ferme entre les Seigneurs, & que chaſcun y deburoit trauailler. Et que ſi aucuns des Seigneurs auoient alliances, ou promeſſes aux Anglois, qu'on les meiſt au neant, & qu'on y renonçaſt. Ce que aucuns des preſens imaginerent qu'il le diſt pour le Duc de Bourgogne , qui auoit eſté à Calais , & auoit faiſt aucunes promeſſes & confederations. Mais il le diſoit priuément, & ſecretement , pource qu'il ſçauoit que ceux qu'on diſoit Armaignacs , auoient faiſt venir le Duc de Clarence, qui ne ſe pouuoit faire ſans aucunes promeſſes. Et pareillement le Duc de Bourgogne, auoit eſté à Calais, & amena le Comte d'Aródel, qui ne feut mie ſans aucunes paſſions, ou conuenances. Et il doubtoit que telles choſes, ioinctes les diuiſions, ne donnaſſent couraige aux ennemis d'entreprendre ſur le Royaume. Et ſe departit ainſi l'aſſemblée. Toutesfois le dict Miniſtre, & autres preſens, confeſſerét, que le droit remede ſi eſtoit, d'entendre à bonne paix. Ce que le dict Miniſtre deſiroit en faueur de Meſſire Pierre des Eſſars, dont il eſtoit ſeruiteur. Lequel eſtoit en Chaſteller , & en danger de ſa perſonne. Mais le dict de Pauilly, qui tendoit fort au profit de ſa bourse, & ſe hubiſſoit avec les Gois, Saintyons, & leur allies, feit vne propoſition , en voulant monſtrer que la prinſe des perſonnes , dont deſſus eſt faiſt mention , eſtoit bien deuëment faiſte , & qu'il falloir ordonner Commiſſaires pour faire leurs procès , & qu'ils euſſent puissance d'en prendre des autres , & de faire du criminel ciuil , & de emprunter argent de ceux que bon leur ſembleroit. Et ainſi feut faiſt, & ordonné, & y eut Commiſſaires ordonnez, ausquels on bailla la puissance deſſus dicté, & à chaſcun d'eulx, à leurs greffier, & ſergens, à chaſcun vn chapperon blanc.

L413.

Quand le Comte de Vertus, frere du Duc d'Orleans, veid ces manieres de faire, & qu'on auoit prins le Duc de Bar, & autres, & que de iour en iour on en prenoit, il feut conseillé de s'en partir, & s'en alla à Orleans vers son frere. Et feut Capitaine de Paris, Iacqueuille, Denisot de Chaumont, du pont de Saint Cloud, & Caboche du pont de Charenton.

On prenoit gens ausquels on impoisoit auoir fait quelque chose, dont il n'estoit riens, & failloit qu'ils composassent, feust droict, feust tort, à argent, lequel il failloit qu'ils baillassent.

Le Comte de Charrolois, fils du Duc de Bourgongne, & Madame sa fême, fille du Roy, aussi s'en allerent, & leurs gens, à tout leurs chapperons blancs. Et disoit on, que c'estoit à la requeste de ceux de Gand, & que de ce, auoient requis le Duc de Bourgongne. Mais aucuns imaginoient, que ce n'estoit que vne fiction, & qu'ils s'en alloient, pource que les choses estoient trop merueilleuses, & le pere, & le fils, n'estoient pas conseil-lez de eulx trouuer ensemble, en vn mesme lieu.

Derechef le Carme de Pauilly, feit vne propositiō à Saint Paul, deuant la Royne, Monseigneur le Daulphin, & autres Seigneurs. Et preint sa matiere sur vne fiction d'un Iardin, où il y auoit de belles fleurs, & herbettes, & aussi il y croissoit des orties, & plusieurs herbes inutiles, qui empeschoient les bonnes herbes de fructifier, & pource les failloit sarcler, oster, & nettoyer. Et que au Iardin du Roy, & de la Royne, y auoit de tresmauuaïses herbes, & perilleuses, c'est à sçauoir, quelques seruiteurs, & seruantes, qu'il failloit sarcler, & oster, afin que le demeurant en vallust mieux.

Et estoit Monseigneur le Daulphin à vne fenestre tout droict, & auoit son chapperon blac sur sa teste, la patte du costé dextre, & la cornette du costé fenestre, & menoit la dicte cornette en venant dessoubz le costé dextre, en forme de bande. Et laquelle chose apperceurent aucuns des bouchers, & autres de leur ligue, & y eut aucuns qui dirent lors, Regardez ce bon enfant Daulphin, qui met sa cornette en forme que les Armaignacs le font, il nous courroucera vne fois.

Les mauuaïses herbes feurent ostées des iardins du Roy, & de la Royne, c'est à sçauoir le Duc de Bauiere, frere de la Royne, & feut mis en vne tour deuant le Louure. Et plusieurs autres Officiers, les vns mis en Chasteller, & les autres en la con-

ciergerie du Palais, & y en auoit de clerks, qui feurent rendus à l'Euesque. Et si print on enuiron quatorze ou quinze Dames, que Damoiselles, de l'Hostel de la Roynie, lesquelles feurent menées en la conciergerie du Palais, comme en prison.

Et afin que parmy le Royaume, on cuidast que ce qu'on faisoit, estoit pour le biē du Royaume, ceux du Cōseil des dessus dictz, feirent cercher, & querir és Chambres des comptes, & du Thresor, & au Chastellet, toutes les Ordōnances Royaulx anciennes, & sur icelles en formerent vnes longues & prolixes, où il y auoit de bonnes, & notables choses prinſes sur les anciennes. Et feirent venir Monseigneur le Daulphin, Duc de Guyenne, en la Court de Parlement, tenant comme vn liē de Iustice. Et les feit lire, & publier à haulte voix. Et les leut le Greffier de Chastellet, nommé Maistre Pierre de Fresnes, qui auoit vn moult bel langage, & hault. Et feurent les dictes Ordōnances decretées estre gardées, & sans enfreindre.

Or est vray, comme dessus ha esté touché, que Messire Helion de Iacqueuille, estoit Capitaine de Paris, & des dictz bouchers, & en effect disoit on qu'il gouernoit tout. Et vn iour alla avec autres veoir Messire Iacques de la Riuiere, & petit Mesnil, non mie pour bien qu'il leur voulust, & entrerent en aucunes paroles. Et tousiours le dict de la Riuiere, respondoit le plus gracieusement qu'il pouuoit, & veoit bien que bō mestier luy en estoit, & qu'il estoit en grand danger de sa personne. Et en parlant, le dict de Iacqueuille luy dit, qu'il estoit faux, traistre, & desloyal. Et lors le dict de la Riuiere, qui se sentoit si grandement iniurié, & que la chose touchoit si grandement son honneur, respondit au dict de Iacqueuille, qu'il auoit faulſement, & mauuaisement menti, & que s'il plaſoit au Roy, il le combattroit. Et lors le dict Iacqueuille, qui auoit vne hachette en son poing, la haulsa, & frappa tellement le dict de la Riuiere sur la teste, qu'il le tua. Les aucuns dient, que ce feut d'vn pot d'estain. Qui feut vn bien merueilleux cas, de tuer vn hōme és mains de Iustice, mais plus n'en feut. Et le lendemain, on trainna le dict de la Riuiere tout mort en vne charrette, aux halles, & sur l'escharfault on luy couppa la teste. Et si feut aussi mené en sa compaignée le dict petit Mesnil, & pareillement on luy couppa la teste, sans ce qu'on dict aucune cause, ou raison, sinon la volenté de Iacqueuille.

1413.

Et pource qu'il sembloit à ceux, qui faisoient les exploits dessus dictz, que le bon homme, Messire Arnould de Corbie, qui auoit esté long temps premier President de Parlement, & depuis bien vingt ans, Chancelier de Frâce, ne leur estoit pas bien propice, il feut desappoincté, & en son lieu mis vn nommé Maistre Eustache de Laitre.

Et combien qu'on eust ordonné Commissaires contre ceux, qu'on maintenoit estre Armaignacs : toutesfois en ordonnerent ils encores d'autres, de ceux qu'on nommoit Cabochiës, pour auoir & exiger argent en maniere d'emprunt, de tous ceux qui auoient renommée d'auoir argent, & les faisoient venir deuers eulx, tant de Parlement, que des marchâds, & bourgeois de Paris, & leur demandoient à emprunter. Et s'ils ne prestoient promptement, on les enuoioit en diuerses prisons, & mettoit on sergens en leurs maisons, iusques à ce qu'ils eussent payé ce qu'on leur demandoit. Et entre les autres, ils demanderent au dict Maistre Iean Iuuenal deux mille escus. Et pource qu'il les refusa aucunement, on commanda qu'on le menast en prison au petit Chastellet, dont il appella en Parlement. Et ce nonobstant feut enuoïé au dict petit Chastellet, & auant qu'il partist, fallut qu'il baillast partie de ce qu'on luy demandoit, & le demeurant promet de payer à vn terme, dõt il ne feut pas bien content, & non sans cause, car il le monstra bien apres.

Il y auoit vn notable Docteur en Theologie, & de grande reputation, nommé Maistre Iean Iarson, lequel estoit Chancelier de nostre Dame de Paris, & Curé de Saint Iean en greue, lequel auoit accoustumé de soy acquiescer loyaument. Et pource que en cōpaignée, où il estoit, il deut dire, que les manieres qu'on tenoit, n'estoient pas bien honnestes, ne selon Dieu, & le disoit d'vne bonne amour, & affection, on le voulut prendre, mais il se bouta és haultes voutes de nostre Dame de Paris, & feut son hostel tout pillé, & robbé.

Le Seigneur de Hely, qui estoit Marechal de Guyenne, & vaillant cheualier, demanda gens, & argent, & qu'il iroit en Guyène, laquelle chose luy feut octroïée. Et luy bailla on vne biē grosse somme d'argēt, & luy sembloit qu'il feroit merueilles. Et s'en alla en Poictou, & assembla gēs de toutes parts, & de là tira vers les marches de Saintonge, & auoit intention d'asieger

sieger, & prendre Soubise. Mais la chose alla bien autrement. 1413.
Car le Capitaine de Soubise bien accompagné, frappa sur son logis, & print le dict Seigneur de Hely. Duquel par ce moyen l'entreprinse & l'armée feurent rompues.

Les Anglois estoient ioyeux de la diuision, qu'ils veoient estre entre les Seigneurs de France. Et feut le Roy d'Angleterre conseillé de faire aucune armée, & de l'enuoier vers la coste de Normandie, sçauoir s'ils pourroient auoir quelque entrée, & place. Et de fait il enuoia vne armée vers Dieppe, qui y cuidèrent descédre. Mais les nobles, & le peuple du pays, s'assemblerent sur le riuage de la mer, & combattirent les Anglois tellement, qu'ils les desconfeirent. Et feut le Capitaine des Anglois tué, & pource se retrahirent en Angleterre. Et quand le Roy d'Angleterre sceut l'aduenture, il en feut bien desplaisant, & ordonna vne plus grande armée à faire. Et de fait le feit, & preindrent terre. Le borgne de la Heuse y alla, & print des gens ce qu'il peut. Et cuida defendre la descète des dicts Anglois : mais il feut bien lourdement rebouté, & y eut plusieurs cheuaux morts de trait, & aussi de ses gens prins, & feut contrainct de se retourner. Les Anglois cuidèrent trouuer maniere d'auoir Dieppe : mais ils faillirēt. Et veindrēt vers le Tresport, & entrerent dedans, & en l'Abbaye, & y bouterēt le feu, & ardirent tout, & vne partie des religieux. Plusieurs gens tuerent, & naurerent, & si en preindrent, & s'en retournerent en Angleterre, à toute leur proye.

La chose venüe à la congnoissance des Seigneurs d'Orléans, Bourbon, Alençon, & autres, & la maniere qu'on tenoit à Paris à la descente des dicts Anglois, ils enuoierent vers le Roy, en eux offrans à son seruice. En requerant, que les Traictez de paix, qui auoient esté faicts, accordez, promis, & iurez, feussent entretenus, gardez, & obseruez. Et que au regard d'eulx, il ne se trouueroit point, qu'ils eussent faict chose au contraire. Et que en la ville de Paris, plusieurs choses horribles, & detestables se faisoient, contre les Traictez de paix.

Mais les bouchers, & leurs alliez, en tenoient bien peu de compte. Et feirent faire le proces du dict Messire Pierre des Essars. Et luy imposoit on plusieurs cas, & choses qu'on disoit qu'il auoit commis, & perpetré, dōt des aucunes dessus est faict mention. Et feut condāné à estre trainné sur vne claye du Pa-

Sf

1413. lais iufques en Chastellet, & puis l'auoir la teste couppée aux halles. Laquelle Sentence qui estoit bien pitueuse, & à la requeste de ceux qu'il auoit premierement mis sus, & elleuez, feut executée. Et le meit on au Palais sur vne claye attachée au bout de la charrette, & feut trainné les mains liées iufques au Chastellet. Et en le menant, fousfrioit, & disoit on qu'il ne cuïdoit point mourir, & qu'il pensoit que le peuple dont il auoit esté fort accointé, & qui encores l'aimoit, le deust rescourre. Et fil y en eust eu vn, qui eust commecé, on l'eust rescous. Car en le menant, ils murmuroient tresfort de ce qu'on luy faisoit. Outre qu'il auoit esperance, que le Duc de Bourgongne, luy teint la promesse qu'il luy auoit fait, en la bastille Saint Antoine, qu'il n'auoir mal non plus que luy. Mais il feut mis deuant le Chastellet dessus la charrete, & mené aux halles, & là eut la teste couppée, & le corps mené au gibet, & mis au propre lieu, où feut mis Montaigu. Et disoient aucuns que c'estoit vn iugement de Dieu de ce qu'il mourut, comme il auoit fait mourir le dict Montaigu.

Au dict mois aduint que Iacqueuille, & ses souldoyers, qui estoient orgueilleux, & haultains, virent vn iour de nuict entre onze & douze heures au soir, en l'Hostel de M^{seigneur} de Guyenne, où il s'esbatoit, & auoit on dansé. Et vint iufques en la chambre du dict Seigneur, & le commença à haultement tençer, & le reprendre des cheres qu'il faisoit, & des danses, & despenfes. Et dit plusieurs paroles trop fieres, & orgueilleuses contre vn tel Seigneur, & qu'on ne luy souffreroit pas faire ses volonteiz, & s'il ne se aduisoit, qu'on y mettroit remede. Et à ces paroles estoit present le Seigneur de la Trimouille, qui ne se peut taire, qu'il ne respondist au dict Iacqueuille, que ce n'estoit pas bien fait de parler ainsi du dict Seigneur, ne à luy à faire, & que l'heure estoit bien impertinente, & les paroles trop fieres, & hautaines, veu le petit lieu dont il estoit. Et sur ce meurent paroles, tellement que de la Trimouille desmentit Iacqueuille, & aussi Iacqueuille, la Trimouille. Monseigneur de Guyenne, voiant la maniere du dict Iacqueuille, tira vne petite dague qu'il auoit, & en bailla trois coups au dict Iacqueuille par la poitrine, sans ce qu'il luy feist aucun mal, car il auoit bon haubergeon deffoubz sa robbe. Et le lendemain matin, le dict Iacqueuille, & ses Cabochiens, s'esmeurent en in-

rention d'aller tuer le dict Seigneur de la Trimouille. Et de fait, eussent accompli leur mauuaise volonte, si ce n'eust esté le Duc de Bourgogne, qui les appaisa tellement, qu'ils laisserent leur fureur, & se refroidirét. Mais du courroux qu'en eut Monseigneur de Guyenne, il feut trois iours qu'il iectoit & crachoit le sang par la bouche, & en feut tresbien malade. 1413.

Le Roy feut guairi, & reueint à bonne santé. Laquelle chose venüe à la cognoissance des Seigneurs d'Orleans, & autres dessus nommez, enuoierent deuers le Roy vne Ambassade, en luy requerant, qu'il voulust faire entretenir la paix, ainsi qu'elle auoit esté iurée & promise. Et le Roy enuoia vers eulx l'Euesque de Tournai, l'hermite de la Faye, Maistre Pierre de Marigny, & vn Secretaire, lesquels Seigneurs estoient à Vernueil, & parlerent longuement ensemble. Et s'en retourna la dicte Ambassade arriere vers le Roy à Paris, & rapporterent plainement, comment les dicts Seigneurs vouloient paix, & ne demandoient autre chose, & que hors la ville en quelque lieu leur ils peussent parler ensemble. Et si rapporterent les dicts Ambassadeurs, que les dicts Seigneurs se plaignoiēt fort, de ce qu'on ne leur rendoit leurs places prinſes, durāt la guerre, ainsi qu'il leur auoit esté promis. Et aussi des mutatiōs qu'ō auoit fait des Officiers des Maisons du Roy, de la Roynne, & de Monseigneur de Guyenne, & des Capitaines es places du Roy, & des prisonniers, tant des Seigneurs, & Officiers, que des fēmes, & des manieres qu'on tenoit es choses qu'on faisoit.

Et quand ceux qu'on nommoit Cabochiens, sceurent que les matieres se dispoſoient à paix, ils feurent moult troublez, congnoissans que ce qu'ils auoient fait par leur puissance, qui gisoit en cruauté, & inhumanité, cesseroit, de tout leur pouuoir trouuerēt bourdes, & choses non veritables, ne apparentes, pour cuidoer empescher la paix. Toutesfois ils deliurerent de prison les Dames, & aucuns des prisonniers.

Or estoit le Duc de Berry, à tout son chapperon blāc, logé au cloistre de nostre Dame, en l'hostel d'un Docteur en Medecine, nommé Maistre Symon Allegret, qui estoit son Physicien. Et presques tous les iours il vouloit, que le dict feu Maistre Iean Iuuenal des Vrsins, Seigneur de Traignel, allast deuers luy. Et conféroient ensemble du temps qui couroit, & des choses qu'on faisoit, & disoit. Le dict Seigneur dit au dict Iu-

S f ij

1413. uenal, Serons nous tousiours en ce poinct, que ces meschans gens aient auctorité, & domination? Auquel le Seigneur de Traignel respondit, Ayez esperance en Dieu, car en brief temps vous les verrez destruits, & venus en vne grande confusion. Et tous les iours ne pensoit, ne imaginoit, que la maniere cōme il pourroit faire, & delibera d'y remedier. Il estoit bien noble homme, & de hault couraige, saige, & prudent, & qui auoit gouuerné la ville de Paris douze ou treize ans, en bonne paix, amour, & cōcorde. Et estoit en grand foucy, comme il pourroit sçauoir, si aucuns de la ville seroient avec luy, & de son imagination. Et ne s'osoit descouurir à personne, cōbien que plusieurs de Paris des plus grands & moyens, estoient de sa volonté. Et luy estant en ceste pensée, & grande perplexité par trois nuits, comme au poinct du iour luy sembloit, qu'il songeoit, ou qu'on luy disoit, *Surgite cūm federitis, qui manducatis panem doloris*. Et vn matin, Madame sa femme, qui estoit vne bonne & deuote Dame, luy dit, mon Ami, & Mari, l'ay oui au matin, que vous disiez, ou qu'on vous disoit ces mots, contenus en mes heures, où il y ha, *Surgite cūm federitis, qui manducatis panem doloris*. Qu'est-ce à dire? Et le bon Seigneur luy respondit, M'amie, nous auons onze enfans, & est bien mestier, que nous prions Dieu, qu'il nous doint bonne paix, & aions esperance en luy, & il nous aidera. Et en la Cité, auoit deux quarteniers drappiers, L'vn, nommé Estienne d'Ancenne, l'autre, Geruaïot de Merilles, qui souuent conuersoient avec leurs quarteniers, & dixeriers, & sentoient bien par leurs paroles, qu'ils estoient bien mal contents des Cabochiens. Et vn soir, veindrent deuers Monseigneur de Berry, & se trouuerent d'adventure ensemble, & le dict uenal avec le dict Duc de Berry. Et là conclurent, qu'ils viuroient & mourroient ensemble, & exposeroient corps, & biens, à rompre les entreprinſes des dicts bouchers, & de leurs alliez, & rompre leur faict. Et le plus expedient estoit, de trouuer moyen de esleuer le peuple contre eulx. Et en ceste pensée, & volonté, estoient plusieurs gens de bien de Paris, de diuers quarteniers. Et grommeloit fort le peuple, pource qu'ils veoient que les dicts bouchers, & leurs alliez, par leur langage ne vouloient point de paix. Car ils feirent faire lectres au Roy tres-seditieuses cōtre les Seigneurs, c'est à sçauoir Sicile, Orleans, Bourbō,

Alençon, & autres, & les faisoient publier par Paris, disans, que les diëts Seigneurs vouloient destruire la ville, & faire tuer des plus grands, & prendre leurs femmes, & les faire espouser à leurs varlets & seruiteurs, & plusieurs autres langaiges non veritables. Et nonobstât leurs langaiges, & paroles, le Roy & son Conseil delibererent d'entendre à paix. Et enuoia le Roy bien notable Ambassade au pont del' Arche, où estoient les diëts Seigneurs, Lesquels responderent, qu'ils ne demandoient que paix. Et vint à Paris de par les diëts Seigneurs, vn bien notable homme, & vaillant clerc, nommé Maistre Guillaume Signet. Lequel deuant le Roy, en la presence de Mōseigneur le Dauphin, Berry, Bourgongne, & plusieurs des diëts Cabochiens, fait vne moult notable propositiō. Monstrât en effect le grand inconuenient au Roy, & Royaume, par les diuisions qui auoient couru, & couroient. Et que les Anglois soubz ombre des diëtes diuisions pourroient descendre, & faire grand dommaige au Royaume, & qu'il n'y auoit remede que d'auoir paix. Et pour abbreger, feut deliberé & conclud par le Roy, qu'il vouloit paix. Et pour ceste cause allerēt à Pontoise, les diëts Ducs de Berry, & de Bourgongne, & y eut articles faicts beaux, & bons, lesquels pleurent à toutes les parties. Et s'en retournerent les diëts Ducs de Berry, & de Bourgongne, à Paris.

Le premier iour d'Aoust, qui feut à vn Mardy, les articles de la paix feurent leus deuant le Roy, Monseigneur de Guyenne, & plusieurs Seigneurs presens. Et ainsi qu'on vouloit deliberer, Maistre Iean de Troyes, les Saintyons, & les Gois, & Cabochie, veindrent par vne maniere assez impetueuse. En requerant qu'ils veissent les articles, & qu'ils assembleroient sur iceux ceux de la ville, car la chose leur touchoit grandement. Aufquels feut respondu, que le Roy vouloit paix, & qu'ils orroient lire les articles, s'ils vouloient, & qu'ils n'en auroient aucune coppie. Et le lendemain, qui feut Mercredy matin, ils s'assemblerent en l'Hostel de la ville, iusques à bien mille personnes. Plusieurs en y auoit de diuers quartiers, qui y estoient à bonne intention allez, pour contredire aux diëts Cabochiens. Et à la dicte assemblée, proposa vn Aduocat en Parlement, nommé Maistre Iean Rapiot, bien notable homme, qui auoit belle parole, & haulte, & en sa proposition, n'entendoit pas à rompre le bien de paix, & dit, que le Preuost des marchands, & les

1413. Escheuins la vouloient. Mais les Cabochiens dirent qu'il estoit bon que prealablement, voire necessaire, qu'on monstrast aux Seigneurs d'Orleans, Bourbon, & Alençon, & à leurs alliez, les mauuaisez & trahisons qu'ils auoient fait, ou voulu faire. Afin qu'ils congneussent qu'elle grace on leur faisoit d'auoir paix à eulx, & aussi qu'on leur monstrast, & leust les articles au dict lieu. Et les tenoit Maistre Iean de Troyes en vne feuille de papier en sa main. Et lors feut par vn de la ville dict que la matiere estoit grande, & haulte, & que le meilleur seroit que elle se deliberast par les quartiers. Et que le lendemain, qui estoit leudy, que les quarterniers qui estoient presens, assemblassent les quartiers, & que là pourroit-on lire ce que tenoit le dict de Troyes, au lieu où les assemblées des quartiers se faisoient. Et apres, tous ceux qui estoient presens, excepté ceux de la ligue du dict de Troyes, commencerent à crier, Par les quartiers. Et lors vn de ceux de Saintyon, qui estoit armé, & au bout du grand banc, va dire, qu'il le falloir faire promptement, & que la chose estoit hastiue. Et lors derechef la plus grand partie des presens, commença derechef à crier, Par les quartiers. L'un des Gois, qui estoit armé, dict haultement, que quiconque le voulust veoir, il se feroit promptement au dict lieu. Et lors vn Charpentier du cimetiere Saint Iean, nommé Guillaume Cirace, qui estoit quarternier, se leua, & dict, que la plus grand partie estoit d'opinion, que il se feist par les quartiers, & que ainsi le falloir-il faire. Et les dicts Saintyons, & les Gois, bien arrogamment luy contredirent, en disant que maulgré son visaige, il se feroit en la place. Lequel Cirace d'un bon couraige & visaige va dire, que il se feroit par les quartiers. Et que s'ils le vouloient empescher, il y auoit à Paris autant de frappeurs de coignées, que de assommeurs de boeufs, ou vaches. Et lors les autres se teurent, & demeura la conclusion, qu'il se feroit par les quartiers, & s'en alla chascun en son hostel.

Et le leudy matin, Maistre Iean de Troyes, qui estoit Conciierge du Palais, & y demouroir, feut grande diligence, d'assembler les quarterniers de la Cité, au cloistre de Saint Eloy, pour les induire à sa volonté, & estoient assemblez auant qu'on appellast Aduocats en Parlement, où estoit le dict Seigneur de Traignel, Aduocat du Roy. Auquel les dicts quarterniers Guil-

Jaume d'Ancenne, & Gervaisot de Merilles, seirent à sçavoir 1413.
l'assemblée soudainement faicte. Et s'en veint à Saint Eloy, &
n'y sceut si tost venir, que le dict Maistre Jean de Troyes, n'eust
commencé son sermon. Et quand il veid ledict Seigneur de
Traignel, il luy dit, Qu'il feust le tresbien venu, & qu'il estoit
bien ioyeux de sa venüe. Et tenoit la dicte cedula, dont dessus
est faict mention, en sa main, contenant merueilleuses cho-
ses contre les dicts Seigneurs non veritables, laquelle feut
leüe. Et demanda au dict Seigneur de Traignel, qu'il luy en
sembloit, & s'il n'estoit pas bon qu'on la monstrast au Roy, &
à ceux de son Conseil, auant qu'on accordast aucurement les
articles de la paix. Lequel de Traignel respondit, qu'il luy
sembloit, que puis qu'il plaïsoit au Roy, que toutes les choses
qui auoient esté dictes, ou faictes au temps passé, feussent ou-
bliées, & abolies tant d'un costé que d'autre, sans que iamais
en feut faict mention, que rien ne se debuoit plus ramente-
uoir. Et que les choses contenües en la dicte cedula estoient
toutes seditieuses, & taillées d'empescher le Traicté de paix, la-
quelle le peuple debuoit desirer. Et sans plus demander à au-
tres opinion aucune, tous à vne voix dirēt, que le dict Seigneur
disoit bien, & qu'il failloit auoir paix, en criant tous à vne voix,
la paix, la paix. Et qu'on debuoit deschirer la dicte cedula,
que tenoit le dict de Troyes. Et de faict luy feut ostée des
mains, & mise en plus de cent pieces. Tantost par la ville feut
diuulgué ce qui auoit esté faict au quartier de la Cité, & tout
le peuple des autres quartiers, feut de semblable opinion, ex-
cepté les deux quartiers de deuers les halles, & l'Hostel d'Ar-
tois, où estoit logé le Duc de Bourgogne. Et tantost apres
dîner, le dict Iuuenal accompagné des principaux de la Ci-
té, tant d'Eglise, que autres, iusques au nombre de trente
personnes, se meit en chemin pour aller à Saint Paul deuers
le Roy. Et en y allant, plusieurs autres notables personnes de
diuers quartiers le suiurent, & trouuerent le Roy au dict Ho-
stel, & en sa compaignée le Duc de Bourgogne, & autres
ses alliez. Et en brief luy exposa le dict Iuuenal leur venüe,
en monstrant les maux qui estoient aduenus par les diui-
sions, & que la paix estoit necessaire. Et luy supplioient
les bons bourgeois de Paris, qu'il voulust tellement enten-
dre, & faire, que bonne paix, & ferme, feust faicte. Et

1413. pour paruenir à ce, qu'il en voulust charger Monseigneur de Guyenne, son fils. Et le Roy respondit en brieſ, que leur requeſte eſtoit raiſonnable, & que c'eſtoit bien raiſon, que ainſi feult faiſt. Et lors le Duc de Bourgongne, dit au dict Seigneur de Traignel, Iuuenal, Iuuenal, Entendez vous bien, ce n'eſt pas la maniere de ainſi venir. Et il luy respondit, que autrement on ne pouuoit venir à conſluſion de paix, veües les manieres que tenoient les diſts bouchers, & que autres fois il en auoit eſté aduertí, mais il n'y auoit voulu entendre. Et apres ces choſes, ils ſ'en allerēt vers Monſeigneur le Daulphin, Duc de Guyenne. Et ſe meit le dict Seigneur à vne fenestre accouddé, & ſur ſes eſpaules eſtoit vn des Saintyons. Et luy feurent dictes les paroles, qu'on auoit deuant dictes au Roy. Lequel Seigneur dit, qu'il vouloit paix, & y entendroit de ſon pouuoir, & le monſtreroit par eſſeſt. Si luy feut requis pour eüiter toutes doubts, qu'il meist la baſtille de Saint Antoine en ſa main, & qu'il feist tant qu'il en euſt les clefs. Pour laquelle choſe, il enuoia vers le Duc de Bourgongne, qui en auoit la garde, ou autres de par luy. Lequel enuoia querir ceux de dedans la dicté baſtille, & feit deliurer la place au dict Seigneur, lequel la bailla en garde à Meſſire Regnault d'Angennes, lequel depuis trois ou quatre iours auoit eſté deliuré de priſon. Et au ſurplus, feut requis & ſupplié au dict Seigneur, qu'il luy pleuſt le lendemain matin, qui eſtoit Vendredy, ſe meſtre ſus, & cheuaucher par la ville de Paris, lequel promet de ainſi le faire. Et ſ'en retournerent les diſts Seigneurs de Traignel, & ceux de ſa compaignée. Et en eulx retournant, trouuerent le Recteur, accompagnē d'aucuns de l'Vniuerſité, qui alloient deuers le Roy, & Monſeigneur de Guyenne, pour pareille cauſe. Leſquels y alerent, & eurent pareille reſponſe que deſſus.

Le peuple de Paris, eſtoit ja tout eſmeu à la paix. Et eſtoient principalement aucuns, qui ſe meſtoient ſus, C'eſt à ſçauoir, Pierre Oger, vers Saint Germain de l'Auxerrois, Eſtienne de Bonpuiſ, vers Saint Opportune, Guillaume Cirace, au cimetiere de Saint Iean, & en la porte baudeloier, & tous ceux de la Cité, en la compaignée du dict Seigneur de Traignel, pour ſçauoir qu'on auroit à faire. Et le Vendredy matin, alla ouyr meſſe à la Magdelaine, qui eſt iouxte ſon Hoſtel. Et l'enuoia querir le Duc de Berry, & y alla. Lequel Duc luy demanda, qu'eſt

qu'est-ce cy Iuuenal, que voulez faire, dictes moy que ie ferai. 1413.
 Par lequel feut respondu, Monseigneur, passez la riuere, & faictes mener vos cheuaux au tour, & allez à l'Hostel de Monseigneur de Guyenne, & luy dictes qu'il monte à cheual, & s'en vienne au long de la rue de Saint Antoine vers le Louure, & deliurera Messeigneurs les Ducs de Bauiere, & de Bar. Et ne vous souciez. Car aujourd'huy j'ai esperance en Dieu, que tout se portera bien, & que serez paisible Capitaine de Paris. Et ie irai avec les autres, & nous rendrons tous à Monseigneur le Daulphin, & à vous. Et lors le dict Duc de Berry fit ce que dict est. Et le dict Iuuenal s'en veint, & tous ceux de la Cité, à Saint Germain de l'Auxerrois, où estoit Pierre Oger, afin que ensemble ils feussent plus forts. Car les Preuost des marchands, & Escheuins, les archers, & arbalestriers de la ville, & tous les Cabochiens, estoient assemblez en greue, de mille à douze cents bien ordonnez, doubtrant qu'on ne leur courust sus, prests de eulx defendre. Le Duc de Bourgongne, faisoit grande diligēce de rompre l'embusche du dit Seigneur, laquelle estoit ja mise sus, & cheuauchoit par la ville au long de la rue de Saint Antoine. Et quand il feut à la porte baudes, le dict Iuuenal luy sixiesme seulement, print le chemin à venir par deuant Saint Iean en greue, où il trouua belle & grande compaignée des autres, & passa par le milieu d'eulx. Et en passant, Laurens Calot, nepueu de Maistre Iean de Troyes, print Maistre Iean, fils du dict Iuuenal, par la bride de son cheual, & luy demanda qu'ils feroient. Et il luy respondit, Suiuez nous, avec Monseigneur le Daulphin, & vous ne pourrez faillir. Et ainsi le feirent, & preindrent leur chemin par deuers le pont de nostre Dame, & en allant par Chastellet, au long de la riuere. Et estoit ja Monseigneur le Daulphin deuant le Louure. Et avec luy estoient les Ducs de Berry, & de Bourgongne. Et deliura les Ducs de Bauiere, & de Bar, qui se meirent en sa compaignée. Et quand les dictz de Troyes, & les Cabochiens, feurent en vne vallée sur la riuere, pres de Saint Germain de l'Auxerrois, vn nommé Geruaisot Dyonnis, tapissier, qui auoit en sa compaignée aucuns compaignons, veid, & apperceut le dict Maistre Iean de Troyes, qui luy auoit fait desplaisir, il tira son espée, en disant, Ribault traistre, à ce coup ie t'aurai. Et tout soubdainement, on ne

T t

1413. sceut que tous deueindrent , & s'enfuirent. Et enuoia l'on demander au dict Lutual, si on iroit fermer les portes, afin qu'ils ne s'en allassent. Et il respondit qu'on laissast tout ouuert , & s'en allast qui voudroit , & qui voudroit demeurer , demeurast , & que on ne vouloit que paix , & bonne amour ensemble. Mais ils s'en allerent , & preindrent de leurs biens ce que ils voulurent , & les emporterent. Et preindrent les dicts Seigneurs leur chemin en greue, où il y en auoit qui auoient grand desir de frapper sur le Duc de Bourgongne , dont il se doubtoit fort. Parquoy il enuoia demander au dict Seigneur de Traignel, fil auoit garde. Et il respondit que non , & qu'il ne s'en doubraft , & qu'ils mourroient auant tous , que on luy feist desplaisir de sa personne. Et quand ils feurent deuant l'Hostel de la ville, ils descendirent , & monterent en hault en vne chambre les dicts Seigneurs , les Preuost des marchands, & Escheuins, & le dict Seigneur de Traignel. Monseigneur le Daulphin, dit au dict Seigneur de Traignel, Iuuenal, dictes ce que nous auons à faire, comme ie vous ai dict. Et lors il commença à dire , comme la ville auoit esté mal gouuernée, en recitant les maux qu'on y faisoit. Et dit au Preuost des marchands, nommé Andriet de Pernon, qu'il estoit bon preud'homme , & que le dict Seigneur vouloit qu'il demeurast , & aussi deux Escheuins , & que les dicts de Troyes, & du Belloy, ne le seroient plus, & au lieu d'eulx, on meist Guillaume Cirace, & Geruaisot de Merilles. Et que Monseigneur de Berry, seroit Capitaine de Paris. Et que Monseigneur de Guyenne, prendroit la bastille de Saint Antoine en sa main , & y mettroit Monseigneur de Bauiere son Oncle, pour son Lieutenant, & le Duc de Bar, Capitaine du Louure. Lesquels deux Seigneurs, on venoit de deliurer de prison, & estoit commune renommée, que le lendemain, qui estoit Sabmedy, on leur debuoit couper les testes. Et au gouuernement de la Preuosté de Paris, Messire Tanneguy du Chastel, & Messire Bertrand de Montauban, deux vaillants cheualiers. Et depuis le dict Messire Tanneguy, eut seul la Preuosté. Et apres ces choses ainsi faictes, les dicts Seigneurs, & le peuple, se departirent , & allerent prendre leur resfection. Et est vne chose merueilleuse, que oncques apres la dicte mutation, ne en icelle faisant, n'y eut personne frap

pée, prinse, ne pillée, ne oncques personne n'entra en maison. Toute l'apres disnée, on cheuauchoit par la ville, & estoit le peuple tout resioüi.

Et le lendemain, qui feut Sabmedy, le Duc de Berry, comme Capitaine, cheuaucha par la ville, & le veoit-on tres-volontiers. Et disoient les gens que c'estoit bien autre cheuaucherie, que celle de Iacqueville, & des Cabochiens.

Le Duc de Bourgongne n'estoit pas bien content, ne aucuns de ses gens. Et le Dimanche, disna de bonne heure, & s'en veint deuers le Roy, à son disner, qui estoit comme en transe de sa maladie. Et ce iour, faisoit moult beau temps, & dist au Roy, que s'il luy plaisoit aller esbatre iusques vers le bois de Vincennes, qu'il y faisoit beau, & en feut le Roy content. Mais l'esbatement qu'il entendoit, c'estoit qu'il le vouloit emmener. Et en veindrent les nouuelles au dict Seigneur de Traignel, lequel enuoia tantost par la ville, faire monter gens à cheual, & se trouuerent promptement de quatre à cinq cents cheuaux, hors de la porte Saint Antoine. Et y estoit le Duc de Bauiere, auquel le dict Seigneur de Traignel dist, qu'il allast deuers le pont de Charenton, & luy bailla Maître Arnould de Marle, accompagné d'environ deux cents cheuaux, & y allerent. Et le dict de Traignel, alla tout droit vers le bois, & là trouua le Roy, & le Duc de Bourgongne. Et dit le dit Traignel au Roy, Sire, Venez vous-en en vostre bonne ville de Paris, le temps eit bien chauld, pour vous renir sur les champs. Dont le Roy feut tres-content, & se meit à retourner. Et lors le dict Duc de Bourgongne, dit au dict Seigneur de Traignel, Que ce n'estoit pas la maniere, de faire telles choses, & qu'il menoit le Roy voler. Auquel il respondit, qu'il le menoit trop loing voler, & qu'il veoit bien que toutes ses gens estoient houssez. Et si auoit ses trompettes, qui auoient leurs instrumens és fourreaux, & s'en retourna le Roy à Paris. Et le trouua l'on que veritablement il menoit le Roy à Meaulx, & outre. Et le lendemain, le Duc de Bourgongne, voiant qu'il ne pouuoit venir à son intention, s'en alla bien soubdainement de la dicte ville. Dont les Seigneurs, & ceux de la ville, feurent bien desplaisans. Car ils auoient bonne esperance que la paix se parferoit, & que les Seigneurs d'Orleans, & autres, viendroient à Paris, & que tous ensemble fe-

T t ij

1413. roient tellement, que jamais guerre n'y seroit. Et les aucuns disoient, que le Duc de Bauiere, frere de la Royne, auoit laschement fait, (puis qu'il auoit esté acertené, ainsi qu'il disoit, que le Sabmedy on luy debuoir couper la teste,) qu'il n'auoit tué le Duc de Bourgogne soudainement, & s'en estre allé en Allemagne, & il n'en eust plus esté.

Le Sabmedy, feut faite vne grande assemblée à Saint Bernard de l'Vniuersité de Paris. Et là enuoierent Monseigneur de Guyenne, & les Seigneurs, remercier l'Vniuersité de ce qui auoit esté fait, & de ce qu'ils sy estoient grandement, & notablement conduicts, en montrant la grande affection que ils auoient eu au bien de paix. Et firent ceux de la dicte Vniuersité, vne biē notable processon à Saint Martin deschamps, et y eut du peuple beaucoup. Et feit vn bien notable sermon Maistre Jean Iarson, qui estoit vn bien notable Docteur en Theologie, & print son theme, *In pace in id ipsum*, lequel il deduisit bien grandement & notablement, & tellement que tous feurent trescontents.

Il y eut vne mutation d'Officiers faite par le Roy en son grand Conseil. Et feut esleu Chancelier de France, Maistre Henry de Marle, premier Presidēt de Parlement, & le dict Seigneur de Traignel, Chancelier de Monseigneur le Daulphin, & Maistre Robert Mauger, premier Presidēt, & Messire Tāneguy du Chastel, seul Preuost de Paris, & Maistre Jean de Vailly, President en Parlement. Et pour abbreger, tous les Officiers qui auoient esté ordonnez à la requeste de ceux qu'on nommoit Cabochiens, feurent müez & ostez.

Il y auoit vn nommé Jean de Troyes, qui estoit Seigneur de l'huys de fer à Paris, qui auoit esté bien extrême es maux qui festoient faits au temps passé, lequel feut prins, & mis en Chastellet, lequel confessa plusieurs tresmauuais cas que faisoient les bouchers, & ceux de la ligue, comme meurtres secrets, pilleries, & robberies, dont des aucuns il auoit esté consentant. Et pour ce eut le colcouppé es halles.

Et feut trouué vn roolle, où estoient plusieurs notables gēs, rāt de Paris, que de la Court du Roy, & de la Royne, & des Seigneurs. Et estoient signez en teste les vns T. les autres, B. & les autres R. Desquels les aucuns deuoient estre tuez. Et les eust on esté prédre de nuit en leurs maisons, faisant sēblant de les me-

ner en prison: mais on les eust iectez en la riuere, & fait mou- 1413.
rir secretemēt. Et ceux là estoient signez en teste T. Les autres
on les debuoit bannir, & prendre leurs biens, & estoient signez
B. Et les autres qui debuoient demeurer à Paris, mais on les
debuoit rançonner à grosses sommes d'argent, estoient signez
en teste R. Et s'ils eussent plus regné, ils eussent mis leur mau-
uaise volonté à execution.

A Paris feut faicte vne liurée de huques de deux violets de
diuerfes couleurs, & y auoit en escript, le droit chemin, & vne
grande croix blanche.

Le Roy, & Monseigneur de Guyenne, mandèrent les Ducs
d'Orleans, & de Bourbon, & le Côte d'Alençon, & autres Sei-
gneurs, qu'ils veinssent à Paris. Et y veindrent, & feurent re-
ceus à grand ioye. Et estoient en bien humbles habits, & ius-
ques alors le Duc d'Orleans, auoit tousiours esté vestu de
noir. Mais Monseigneur de Guyenne voulut qu'il le laissast, &
feirent faire robes pareilles, & par aucun temps feurent tous-
iours vestus tout vn.

Assez tost apres, le Roy assembla ceux de son sang, & de son
Conseil en grand nōbre, en la salle verte du Palais. Et par grā-
de & meure deliberation, cassa, & annulla les Ordonnances
dont dessus ha esté fait mention, combien qu'il y eust de bon-
nes choses. Mais pource qu'elles feurent faictes à l'instigation,
& pourchas des bouchers, & de leurs adherēs qu'on nommoit
Cabochiēs, & que à les publier en Parlemēt, estoient les prin-
cipaux presens & armez, & pour plusieurs autres raisons, feurent
cassées. Et aussi que les anciennes fussioient bien, & n'en
failloit aucunes autres.

Et si desappoincta on plusieurs Officiers, qui auoient esté in-
stituez au temps passé, dont aucuns des plus notables gens de
Paris n'estoient pas bien contents. Car il n'en pouuoit venir
que haines particulieres, & tout mal, ce leur sembloit. Mais les
aucuns aussi disoient, que ceux qu'on desappoinctoient, en a-
uoient desappoincté d'autres.

En cetéps vint de par le Roy d'Angleterre, le Duc d'York
à Paris, qui grandement & honnorablement feut reçu, & fe-
stoyé. Et venoit semblablement comme on disoit, pour veoir
Madame Catherine, fille du Roy, en intention de traicter le
mariage du Roy d'Angleterre, & d'elle, & d'entendre à paix.

T t iij

1413. Et sur la matiere, y eut aucunes paroles ouuerres entre Monseigneur de Berry, & aucuns du Conseil du Roy. Et feurent accordées trefues dès la Chandeleur en vn an. Et doubtoient aucuns, qu'il ne feust venu pour sçauoir l'estat & gouuernement, sur le faict des diuisions qui couroient.

Et pource que durant le gouuernement, qui estoit auant à Paris, le Roy auoit donné, & octroyé plusieurs mandemens au deshonneur du Duc d'Orleans, & de ceux qui l'auoient serui, le Roy reuocqua tous les dicts mandemens, & le contenu en iceux, & les cassa, annulla, & abolit du tout.

Le Duc de Bourgogne enuoia à Paris vne bien notable Ambassade, pour soy excuser de son soubdain partement de la ville de Paris. Et feut en effect son excusation, de ce que ceux qui s'en estoient partis, & qui l'auoient serui, estoient separez deça & delà. Et il les vouloit bien recueillir, & confirmer l'amour qu'ils auoient eu à luy, & aussi l'amour que auoient eu aucuns de Paris à luy. En monstrant, qu'il ne les auoit pas oubliez.

Et apres ces choses, feut deliberé que ceux qui auoiēt faict en la dicte ville de Paris, les maux & delits dessus declarez, que on appelloit Cabochiens, seroient bannis du Royaume de France. Et ainsi feut faict, & leurs biens declarez confisquez. Et y eut Commissaires ordonnez sur ces matieres, qu'on nommoit Reformateurs.

Ceux qui auoient serui les Seigneurs, & qui leur auoient porté aide, & faueur, feurent mis és notables Offices, & remunererez, & la querelle, ou le faict de Bourgogne, mis au bas. Combiē que tousiours y en auoit-il qui secretement grōme-loient, & murmuroient. Et quand on les sçauoit, punis estoient.

Le Duc de Bourgogne, auoit tousiours avec luy gens de guerre, & en assembloit, en intention de trouuer moyen de retourner à Paris, & de faire guerre. Et pource le quatorziesme iour de Nouembre, feurent faicts mandemens, & enuoiez aux bonnes villes, & à ceux qui auoient la garde des ponts, ports, & passaiges, qu'on ne luy donnast aucun passaige, ne à ses gēs. Et la ville de Paris escripuit aux autres bonnes villes, les maux qui auoient esté faicts à Paris, durant que le Duc de Bourgogne y estoit, & qu'ils auoient euiuste cause de aider à remedier aux dicts maux. Pour les mouuoir & induire, de non en

aucune maniere aider à luy, ne à ses gens, ne à i ceux fauoriser. 1413.

En ce temps, le Duc de Bourbon, qui estoit vn vaillant Prince, estoit contre les Anglois, vers Sainct Iean d'Angely, lesquels faisoient forte guerre, & specialement d'une place, qu'on nommoit Soubise, où il y auoit foison de vaillants Anglois tât Guascôs, que autres. Et delibera le dict Duc de Bourbon de assieger la diète place. Et en venant deuant, les Anglois faillirent dehors par maniere d'escarmouche, & tref-vaillement se porterent. Aussi feurent vaillamment reboutez en leur place, & y en eut de morts, & de prins. Et apres peu de temps, par l'ordonnance du dict Duc, les François assaillirent la place, & feut prinse d'assault, & y eut plusieurs Anglois morts, & prins.

Enuiron le quatorziesme iour de Ianuier, le Duc de Bourgogne feit faire lectres adressans aux bonnes villes, comme Monseigneur le Daulphin estoit detenu prisonnier au Louure, lequel luy requeroit sur toute l'amour qu'il auoit à luy, qu'il veinst à Paris, & qu'il le veint deliurer. Et qu'on luy menoit la plus mauuaise vie, & ne auoit aucun passe-temps que de iouer des orgues, Auec autres plusieurs choses. Lesquelles choses venües à la congnoissance du Roy, & de Monseigneur le Daulphin, ils en feurent tresmal contents. Et sembloit bien que le dict Duc de Bourgogne, ne vouloit rendre que à sedition, & commotion de peuple. Et pource qu'on en scauoit aucuns, qui estoient extresmes en son party, on leur dit qu'ils s'en allassent, & partissent de Paris, sans leur faire autre desplaisir. Et escripirent le Roy, & Monseigneur le Daulphin, autres lectres au contraire aux bonnes villes, en monstrant que le Duc de Bourgogne ne le faisoit, que pour faire commotions, comme dict est, & que ce n'estoit pas leur intention qu'il veinst deuant Paris, ne en la ville. Et estoient de date du dernier iour de Ianuier. Ce nonobstant, le huitiesme iour de Februrier, il veint deuant Paris, du costé de la porte de Sainct Honoré, cuidant que le peuple se deust esmouuoir, à luy aider à entrer dedans. Mais oncques n'en firent semblant, mais feirent diligence de luy resister en toutes manieres, & s'en alla honteusement sans rien faire. Et enuoia à Sainct Denys requerir, qu'on le laissast entrer en la ville; & il n'y feroit ne ses gens aucun desplaisir. Et les re-

1413. ligieux & habitans en feurent contents : mais qu'il promeist ce qu'il disoit. Et de fait, iura & promet que luy & ses gens, payeroient leur escot, & n'y feroient chose qui leur deubst desplaire. Mais le contraire aduint. Car les viures de la ville, & des religieux, feurent prins & consommez par ses gens & seruiteurs, sans ce que oncques en payassent vn denier, qui estoit contre son serment. Et lors, quand le Roy veid sa maniere de faire, & la volonté qu'il auoit, il le declara, decreta, & ordonna estre reputé pour son ennemi mortel. Et de ce, ordonna ses lettres patentes estre faictes du douziesme iour de Februrier. Et en outre manda gens de guerre, pour venir vers luy. Et plusieurs gens de diuers estats, qui auoient eu amour au dict Duc de Bourgongne, feurent bien mal contents de la maniere qu'il tenoit. Car s'il eust esté aussi bien tendu à bonne paix, on eust esté bien content d'y entendre, ne on ne demandoit autre chose.

En ce temps, l'Euesque de Paris assembla plusieurs notables clerics, tant Theologiens, que Legistes, & Canonistes. Et feit visiter la proposition que feit Maistre Iean Petit, pour iustifier la mort du feu Duc d'Orléans, en laquelle le dict Petit voulut monstrier, que le Duc de Bourgongne auoit iustement faict de le faire tuer, & mourir, & que en ce faisant, il n'auoit de rié mespris. Et la chose veüe, & visitée, & diligemment examinée, feut le vingt-quatriesme iour de Februrier, la dicte proposition condamnée, & dict, & prononcé par le dict Euesque, qu'elle n'estoit pas recepuable, ne apparente.

Alliance auoit esté faicte entre le Roy de Sicile, & le Duc de Bourgongne, & debuoit prendre en mariage sa fille. Et de fait, feut baillée, & deliurée au dict Roy de Sicile, & l'emmena. Et quand il sceut, & veid les choses que les bouchers faisoient au temps passé à Paris, & comme il s'en estoit parti de Paris, & les manieres qu'il tenoit, & que le Roy le tenoit son ennemi, il luy renuoya sa fille, bien grandement accompagnée.

Et pource que iceluy Duc de Bourgongne assembloit gés, feurent ordonnées lettres adressans à tous Capitaines, Baillifs, Lieutenans, & Gouverneurs de villes, que sur bien estroictes peines, ils ne donnassent aucun passaige au Duc de Bourgongne, ne à ses gens, voulans venir par deça en armes, ne autres du sang, sans mandement expres de date subsequente, & qu'ils
ne

ne souffrissent en leurs villes, ou places, faire armées, ou assem- 1413.
blées sans leur congé, & sceu, sur peine de confiscation de
corps, & de biens. En voy-cy les mots,

Charles, &c. Au Capitaine de tel lieu, ou à son Lieutenant,
& aux bourgeois, manans, & habitans d'icelle ville, Salut. Com-
me dernièrement que nous feusmes à Auxerre, Nous, par le
plaisir de nostre Seigneur, & par la grande, & meure delibera-
tion de bon conseil sur ce eu, Ayons ordonné bonne paix en-
tre les Seigneurs de nostre sang, & lignaige, & autres, nos sub-
iets, & icelle depuis confirmée en nostre bonne ville de Paris.
Laquelle paix, ils ont promis, & iuré de tenir, sans aller, faire,
ne souffrir aller encontre en aucune maniere. Et outre, pour la
conseruation, & le bon entretenement d'icelle paix, & aussi
pour le bien de nous, & de nos Royaume, Seigneuries, & sub-
iets, & pour obuier aux tresgrands maux, inconueniens, & dô-
maiges, qui pourroient aduenir, si la dicte paix, n'estoit bien
entretenuë, Ayons tant par nos autres lettres patentes, com-
me autremēt, defēdu aux dicts de nostre sang, & autres quel-
conques, de quelque estat qu'ils soient, tous mandemens, & as-
semblées de gens d'armes. Et au preiudice de la dicte paix, &
de la seureté publique, Nous ayons entendu, que nostre tref-
cher, & tref-amé Cousin, le Duc de Bourgongne, qui ha iuré
de tenir la dicte paix, fait presentement sans nostre congé, li-
cence, & auctorité, & par dessus les defences dessus dictes, cer-
tain grand mandement de gens d'armes, & de trait, en inten-
tion & propos, de venir par deça à puissance, qui est venir con-
tre la dicte paix, & dont elle pourroit estre enfraincte, au tref-
grand preiudice, & dommaige de nous, & de nos dicts Royau-
me, Seigneurie, & subiets. Nous, ce consideré, & voulās pour-
ueoir à ce que dict est, & aussi pour certaines autres iustes, &
raisonnables causes, & considerations, à ce nous mouuans,
Vous mandons, & defendons tref-estroitement, & à chascun
de vous, 'sur les sermens', foy, & loyauté, en quoy vous nous
estes tenus, & sur peine d'estre reputéz rebelles, & desobeis-
sans enuers nous, & de perdre corps, & biens, Que au cas que
nostre dict Cousin de Bourgongne, ou autres de par luy, ou
autres quelconques, soit de nostre lignaige, ou autres, vou-
droient venir par deça en armée, & puissance. Et pource en-
trer, passer, & repasser en & parmy la dicte ville, en quelque

Vu

1413. maniere que ce soit, (S'il ne vous appert par nos lettres patentes, seellées de nostre grand seal, & passées en nostre grand Conseil par la deliberation d'iceluy, Nous present, & de datte subsequente ces presentes, qu'ils soient mandez pour venir deuers nous,) vous ne le souffriez aucunement. En faisant pour ce, soigneusement, & diligemment garder la dicte ville, & y faire guet & garde de iour, & de nuict. Et en contraignant, ou faisant contraindre, tous ceux qui pour ce seront à contraindre, de quelque estat, ou condition qu'ils soient, nos Officiers, ou autres, par toutes voyes deües, & raisonnables, & comme il est accoustumé de faire en tel cas. Et tellement, que la dicte ville soit seure, & puisse estre defendüe des dicts gens d'armes, & de tous autres quelconques, qui voudroient aucune chose faire contre, ne au preiudice de la dicte paix, & que aucuns inconueniens, ne s'en pussent, ou doibuent ensuiuir à nous, à nos dicts Royaume, Seigneuries, & subiets. Et aussi que vous, Capitaine, bourgeois, manans & habitans dessus dicts, ne faires, ne souffriez faire en quelque maniere que ce soit en la dicte ville aucunes assemblées, soit de gens d'armes, ou autres, en quelque maniere que ce soit, sans congé, ou licence de vous Capitaine. Et s'il aduenoit, que aucuns feissent autrement que dict est, que vous Capitaine en fachiez alencontre des delinquans, telle punition & iustice, que au cas appartiendra, & que ce soit exemple à tous autres. Et gardez bien chascun de vous endroit soi, sur les peines dessus dictes, que en ce n'ait default. Et de la reception de ces presentes, nous certifiez suffisamment, ou nostre amé & feal Chancelier, par le porteur d'icelles; sans aucun delai. Donnée à Paris, le quatorziesme iour de
1413. Nouembre, l'an de grace mille quatre cēts & treize; & de nostre Regne, le trente quattiesme. Par le Roy en son Conseil, où estoient presens le Roy de Sicile, Messieurs les Ducs de Guyenne, de Berry, & de Bauiere, les Comtes d'Eu, & de Vendosme, & autres. Ferron.

Pareillement la ville de Paris, en escripuit vnes, à toutes les bonnes villes, lesquelles contredisoient par certains points bien euidens & veritables, aux lettres du Duc de Bourgogne, esquelles il faisoit mention comme Monseigneur de Guyenne, luy auoit mandé expressément, qu'il veinist deuers luy à Paris, pour le tirer hors du Louure, où il disoit le

dict Seigneur estre prisonnier. En les enhortant, qu'ils ne le creussent pas, & qu'il ne le faisoit, que afin de rompre le bien de paix. Et ce, en la maniere qu'il s'ensuyt.

A nos treschers, & bons Amis, les Mayeur, Escheuins, bourgeois, manans, & habitans d'icelle ville,

Treschers, & bons Amis, Pource que puis aucun temps en ça, plusieurs ont semé paroles, & nouuelles, autrement que à point, de l'estat du Roy, & de la Roynie, nos souuerains Seigneur, & Dame, de Monseigneur de Guyenne, leur aîné fils, & de nos Seigneurs de leur sang. Et que nous sçauons, que moult desirez sçauoir au vrai, l'estat des besongnes, & choses dessus dictes. Nous, qui de tous nos cœurs, désirons la verité estre notoire, & manifeste, afin que nul ne donne foy à faulx rapports, qui pourroient estre faicts, pour mettre diuision entre ceux du sang du Roy, nostre dict Seigneur, sommes meus de vous icelle verité signifier à nostre pouuoir. Et vous signifier & communiquer amiablement, comme à ceux que reputons sans doubte estre vrais, & loyaux enuers le Roy nostre dict Seigneur, & la Couronne, & qui de son bien, & honneur, auez consolation & plaisir. Si vueilliez sçauoir, treschers, & bons Amis, que iacoit comme vous sçaez, que le Roy nostre dit Seigneur par le plaisir de Dieu, & par l'aduis, & conseil de nos dicts Seigneurs de son sang, & lignaige, de ceux de son grand Conseil, de l'Vniuersité de Paris, & autres preudhommes de ce Royaume, eust ordonné à Auxerre bonne paix entre les Seigneurs de son sang, & lignaige. Laquelle les dicts Seigneurs de son sang, de son grand Conseil, & plusieurs autres, & nous, auons iuré en sa presence tenir & garder fermement à tousiours, sans aucun malengin. Neantmoins aucuns seditieux, & perturbateurs de paix, obstinez en leurs malices, & qui ne se peuuent abstenir de machiner, comment ils pourront icelle du tout violer à leur pouuoir, ont fait, & traité secretement certaines conspirations contre le bien d'icelle paix, & contre le bien publicque de ce Royaume. En eulx efforçant de faire esmouuoir grand tumulte de peuple de la ville de Paris, & de mettre diuisions & discords entre nos dicts Seigneurs du sang du Roy, (qui la mercy Dieu sont, & seront en bonne amour & vnion ensemble,) & de faire plusieurs autres.

V u ij

1413. nouuelleretez moult perilleuses, & dommageables à ce Royaume. Dont sans doubte se feussent ensuiuis tresgrands maux, & inconueniens irreparables contre le Roy nostre dict Seigneur, sa Seigneurie, & route la chose publique. Et mesmement, estoit vraisemblablement à doubter la subuersion, & totale, & entiere destruction de cedit Royaume, si icelles machinations eussent esté mises en effect. Mais Dieu qui congnoist les secrets des hommes, n'ha pas voulu souffrir la perdition & defolation de ce tres-chrestien Royaume. Ainsy ha pourueu de sa grace, tant que la sienne mercy, & par le moyen de la grande diligence, & bon œuure de nostre tresredoubtée Dame la Roynie, & de nos autres Seigneurs du sang de France, & leurs Conseillers, les peruerces, & damna-
bles entreprinſes des dicts seditieux, ont esté descouuertes. Et pour ces causes, le Roy mon dict Seigneur, par l'aduis & deliberation de la Roynie, & de nos dicts Seigneurs de son sang, & de ceux de son grand Conseil, pour le bien, & seurété de sa dicte Seigneurie, & de tous ses bons subiects, & obuier aux maux & inconueniens dessus dicts, & autres, qui par ce peussent estre aduenus, ha fait prendre & saisir par ses gens, & Officiers ordonnez à l'exercice de sa Iustice ordinaire à Paris, plusieurs d'iceux seditieux & perturbateurs de paix. Et apres ce qu'ils ont esté interrogez, les aucuns ont esté courtoisement enuoiés à leurs hostels, & les autres plus coupables, détenus prisonniers, pour plus auant ſçauoir la verité des choses, & la fin à quoy ils tendoient, & leur ont fait leur procez, en intention de leur faire Iustice & raison selon les cas. Et en verité, tres-chers, & bons Amis, Il est moult à merueilles, que personne quelconque, quelle qu'elle soit, ose ou presume de entreprendre à faire chose aucune contre la dicte paix, qui tant est bonne, & profitable à la chose publique de ce Royaume, & par le moyen de laquelle, chascun ha vescu, & vit en grande tranquillité, & Iustice. Vous certifions pour vrai, que passé ha long temps, que l'on ne veid en ceste bonne ville de Paris, Iustice ainsi liberalement regner. Les gens y viuent paisiblement, & en grand concorde, & vnion, sans noise, diuision, ou rumeur, comme ils ont fait depuis le mois d'Aoust dernier passé, & font encores à present, & au plaisir de Dieu, feront encores d'oresnauant, qui sont choses

de grande recommandation & louenge. Attendu mesmement ^{1413.} la disposition du temps passé, & que en ceste ville, ha gens de diuerses nations en grand nombre, que nos Seigneurs du sang du Roy y sont, & que de iour en iour y affluent autres gens de diuers estats & conditions. Et si n'est pas aduenu, que durant le dict temps, y ait personne aucune, qui ait faict, ne dict chose, dont soit issu riote, ou debat, ne dont soit venu plainte aucune à Iustice, ne autrement, ainçois y va & vient chascun seurement, les portes sont ouuertes, on y marchande, & faict-on tous autres faicts publics liberalement & seurement, tout ainsi que si les pestilences & tribulations, qui depuis six ou sept ans en ça ont couru, n'y eussent oncques esté. Combien que l'ennemi aduersaire de paix, qui ne cesse de semer discordes entre les creatures, & de machiner comment il pourra mettre dissention entre eulx, ait mis és cœurs des dicts seditieux, de conspirer contre la dicte paix, & d'entreprendre dānablement contre icelle, & le bien publicque de tout le Royaume. Ce que ils n'ont pas, la mercy Dieu, peu accomplir, comme dict est. Vous signifiions en outre, que le Roy, la Royne, mon dict Seigneur de Guyenne, tous nos dicts Seigneurs de leur sang, ensemble tous ceux du Conseil du Roy, l'Vniuersité, & nous, sont tous vrayement fermes, & d'un commun accord ont proposé, & conclud entretenir, & faire entretenir, & garder inuiolablement la dicte paix, & de resister, & pourueoir par toutes manieres, que aucune chose ne soit faicte au cōtraire. Tous lesquels vnanimes, & d'une grande, & bonne volonté, se sont offerts & presétez au Roy, à la Royne, & à mon dict Seigneur de Guyenne, pour eux employer à soustenir ce que dict est, & à les seruir loyaument comme bons & loyaux parens, vassaux, & sujets, deuient faire leur droiturier & souverain Seigneur. Lesquelles offres, & presentations, le Roy, la Royne, & mon dict Seigneur de Guyenne, ont gracieusement, & à grand ioye & plaisir receu, dont ceste bonne ville est moult resiouye. Outre plus, tres-chers & bons Amis, pource que aucuns pourroient auoir dict, semé, & publié contre verité, que les prinfes dont dessus est faict mention, auroient esté faictes à l'instigation, & pourchas d'aucuns Seigneurs, en les confortant au prejudice de l'autre partie. Pour occasion desquelles prinfes, ils desplaisoient au dict Monseigneur de Guyenne, le auoient

1413. detenu, & detenoient iceluy Monseigneur de Guyenne à destroit outre sa volontré. Voulans iceux rapporteurs innüer, & donner à entendre ces choses estre faictes, en venant contre la dite paix. Nous vous affirmons que de ce il n'est riens. Mais ha esté dès le temps dessus déclaré, & encores est le dict Monseigneur de Guyenne, aussi liberalement que oncques feut, sans que par deça ait eu, ne encores ait de present, personne qui ait voulu, ne vueille faire, ou procurer chose à luy desplaisante. Et qu'il soit vrai, & à chascun notoire, le iour de hier feste de Monseigneur Saint Vincent, mon dict Seigneur de Guyenne, pour consolation de sa natiuité aduenüe à semblable iour, & ainsi que ont accoustumé faire nos Seigneurs de France, teint Court plainiere, & feste tres-notable au Louure à Paris. A laquelle feste nos Seigneurs du sang Royal, nos autres Seigneurs du Conseil du Roy, les notables personnes de la dite Vniuersité, nous Preuost, & Escheuins, & les bourgeois de ceste ville de Paris en grand nombre, & par mandement du dit Monseigneur de Guyenne, feusmes receus tresnotablemēt, & feusmes en tresgrand ioye & consolation, pour la tresgrande & ample chere, que voyös faire à celuy Mōseigneur de Guyenne. Et ainsi à rapporter, ou dōner par aucuns à entēdre le cōtraire, apperroit de leurs mensonges euidēs. Et quār au regard des dites prinſes, nous vous affirmös cōme dessus, icelles auoir esté faites par l'ordonnāce, aduis, & deliberation que dit est, & non pas par faueur, ou haine quelconque: mais pour le bien, & entretenemēt d'icelle paix tant seulement. Si vous signifiions ces choses, afin que vous sçaichiez la pure verité d'icelles, & que si autremēt vous estoiet aucuns rapports sur ce faits, vous n'y adioustiez aucune foy. En vous priant, & requerant, treschers & bons Amis, tres à certes, & de cœur, que semblablement de vostre part vueilliez auoir vos cœurs, & affections droitēemēt au Roy, à sa Seigneurie, & à la cōseruation de la dite paix, ainsi que rousiours auez eu, & resister de tous vos pouuoirs, à tous ceuz qui voudroiet aucunemēt enfraindre icelle paix. Et au surplus, nous mandez de vos nouuelles, cōme nous ferons à vous semblablement, si aucunes en suruiennent par deça. Treschers, & bons Amis, nostre Seigneur vous ait en sa sainte garde. Escript à Paris, le vingtquatriesme iour de Ianuier, mille quatre cents
1413. & treize. Les tous vostres, les Preuost des marchands, Esche-

uins, bourgeois, manans, & habitans de la ville de Paris.

1413.

Et en approuuant icelles lectres, le Roy feit faire vn mandement qui faisoit mention, comme ce n'estoit que toute menfonge, & que luy, la Roynie, Monseigneur de Guyenne, le Roy de Sicile, Messeigneurs les Ducs de Berry, d'Orleans, & de Bauiere, les Comtes de Vertus, d'Eu, de Richemont, & de Vendosme, & plusieurs autres estoient en leur pure liberté, & franchise. Parquoy il leur defendoit derechef, qu'ils ne laissassent passer, ne repasser aucuns gēs d'armes en faueur dudit Seigneur.

Charles, &c. Au Capitaine de telle ville, ou à son Lieutenant, & aux bourgeois, manans, & habitans d'icelle ville, Salut. Il est venu à nostre cōgnoissance, que nostre Cousin le Duc de Bourgongne, ha naguieres escript, & fait sçauoir à vos bourgeois, & habitans, certaines choses qu'il dict estre infractiues de la paix par nous faicte à Auxerre, entre ceux de nostre sang & lignaige, & depuis confirmée, & par eulx en nos mains iurée en nostre bonne ville de Paris. Et que jaoit ce que la dite paix il ait bien & entierement gardée, sans faire, ne souffrir estre faicte aucune chose alencontre de son costé. Neantmoins on luy ha bien fait le contraire, ce qu'il ha patiemment enduré: Combien que dur luy ait esté à souffrir, & encores pour l'observation d'icelle paix, l'eust voulu endurer. Iusques à ce que nostre tresamé, & trescher fils le Duc de Guyenne, luy ha fait sçauoir, si comme il dict, que l'on l'auoit enfermé, & tenoit à pont leué comme prisonnier en nostre chastel du Louure. Et que par plusieurs fois, comme par lectres & par messaiges, luy ha requis nostre dict fils aide, & secours, pour estre deliuré du danger où il estoit. Pour lesquelles causes, nostre dict Cousin fest deliberé de venir incontinent vers nostre bonne ville de Paris, à tout le plus de gens qu'il ha peu finer, pour iecter hors nostre treschere & tresamée compaignie la Roynie, & nostre dict fils de danger, où il nous dict estre, & nous mettre en nostre liberté & franchise, en vous requerant en ce tresinstantement aide, le plus hastiuement que vous pourrez.

Desquelles choses, si tost qu'elles sont venües à nostre cōgnoissance, nous auons eu tresgrand desplaisir, & en auons esté, & sommes tresmal contents, & non sans cause. Pource qu'elles sont seditieuses, & non veritables. Car depuis que nostre dict Cousin, fest dernièrement parti de nostre dicte ville de Paris.

1413. Nous, nostre dict^e compaignie, & nostre dict^s fils, auons esté & sommes de present, en nostre plaine & franche liberté, & en aussi grâde amour & vnion avec ceux de nostre sang, & lignaige, & nos autres subiects, cōme nous feusmes oncques. Comme il peut à vn chascun clairement apparoir, qui veut en veoir, & sçauoir la verité, & aussi le vous assermons par ces presentes. Et fait^t nostre dict^s Cousin, quelque chose qu'il donne à entendre, la dict^e armée à nostre tres-grande desplaissance, & à la tres-grande charge & dommaige de nostre peuple, pour les mandemens & assemblées de gens d'armes, qu'il conuient que nous facions pour obuier à luy. Et contre les defenses sur ce faictes, tant par nos Ambassadeurs solēnels, par lesquels auōs fait^t des pieçā defendre tous mandemens & assemblées de gēs d'armes, comme par nos leſtres patentes, que par plusieurs fois, & de nouueau, luy auons sur ce principalement enuoyé. Et par lesquels nos Ambassadeurs aussi, & par nos leſtres defſus dictes, l'auons instamment ſommé & requis, que nos chasteaux de Caē, & de Crotoy, que outre nostre gré, plaisir & vōlōté il detient ou par les ſiens, il fait^t detenir, il nous rendist & restituast. Et aussi que plusieurs mal-faict^{rs}, & crimineux de lese Majesté, lesquels contre nostre honneur il detient, & ſouſtient en ſa compaignée, & en ſes pays, terres, & Seigneuries, & dont les aucuns ſōt par leurs demerites bannis de nostre Royaume, il nous enuoiaſt pour en faire punition telle, que par raiſon il appartiēdroit. Dont du tout il ha eſté defaillāt, delayant, & en demeure. Parquoy il eſt vraiſemblable à croire, par ce que dict^t eſt, que par mauuais conſeil, & enhortement par luy, & non par autre, quoy qu'il face dire, & publier, ſoit faicte choſe, qui ſoit à la perturbation & rōupture de la dict^e paix. Et pource que nostre intention ha touſiours eſté, & eſt, de entretenir, & faire entretenir la dict^e paix. Et que par l'aduiz & deliberation de nostre dict^s fils, & de plusieurs autres de nostre sang & lignage, de nostre grand Conſeil, & de nostre Court de Parlement, & de nostre fille l'Vniuerſité, & des Preuoſt des marchands, Eſcheuins, & autres notables bourgeois de nostre dict^e ville de Paris, Auons conclud à contreſter & reſiſter de toute nostre puiſſance à nostre dit cousin de Bourgongne, & à tous autres quelsconques, qui ſoubz couleurs ſaintes exquiſes, autrement voudroient faire, ou entreprendre choſe, dont
ladite

la dicte paix pourroit en aucune maniere estre enfreinte, ou ^{1413.}troublée. Et que par nos autres lettres vous ayons naguieres defendu, que en nostre dicte ville vous ne souffriez, on ne laissez entrer aucunes gens d'armes, soit qu'ils soient de nostre sang & lignaige, ou autres quelsconques, sans nostre expres commandement, & par nos lettres patentes passées en nostre grand Conseil, & de date subsequnt nos dictes lettres de defense.

Nous vous mandons derechef, & expressément defendons sur l'obeissance que nous debuez, & sur peine d'estre reputes rebelles, & desobeissans, & de forfaire corps, & biens enuers nous, que en nostre dicte ville ne souffrez ne laissez entrer, demeurer, seiourner, passer ne repasser nostre dit cousin de Bourgogne, ou autre de par luy, ou à luy fauorisans, quels qu'ils soiēt, qui en armes voudroiet venir par deça, cōme dit est, & ne leur donnez conseil, confort, ne aide, en quelque maniere que ce soit. Et avec ce, que à telles lettres, ne escriptures, ainsi seditieusement faictes, & controuuées, vous ne adioustez dorefnauant foy, ne creance aucune, ne faictes d'icelles publications. Mesmement que par telles choses exquises, nostre peuple ha esté au temps passé mauuaiselement seduit, comme ce est à vn chascun notoire. Ainçois toutes telles lettres & escriptures, si aucunes vous en sont desorésmais enuoiées, nous enuoiiez, si tost que receües les auez. Et ne faictes aucune response soit par escript ou autrement, sans auoir sur ce premierement nostre congé & licence. Sçaichans que si de ces choses, vous, ou aucun de vous, faictes le contraire, nous vous en ferons si griefuement punir, & en brief, que ce sera exemple à tous autres. Et ces presentes faictes publier tantost, & sans delay, à haulte voix, par tous les lieux accoustumez à faire cris en la dicte ville. A ce que aucun n'en puisse pretendre aucune cause d'ignorance. En nous certifiant par le porteur d'icelles, de leur reception & publication, avec vostre volonté & intention sur ce. Donné à Paris, le dernier iour de Ianuier, l'an de grace mille quatre cents & treize, & de nostre Regne, le ^{1413.}trente quatriesme. Par le Roy, à la relation de son grand Conseil, tenu du commandement de la Roynie, & de Monseigneur le Duc de Guyanne, auquel le Roy de Sicile, Messieurs les Ducs de Berry, & d'Orleans, Louys Duc de

1413. Bauiere, les Comtes de Vertus, d'Eu, de Richemont, & de Vendosme, plusieurs du grand Conseil, & de Parlement, le Recteur, & plusieurs de l'Vniuersité, les Preuosts de Paris, & des marchands, les Escheuins, & plusieurs des bourgeois de Paris, estoient, Naucion.

1414. L'an mille quatre cents & quatorze, il y auoit eu trefues faictes auec les Anglois, le Duc d'Yorck estât à Paris, dès la Châdeleur iusques à vn an, lesquelles ne durerent guieres. Car sur la mer tousiours pilleries, & robberies se faisoient, tant d'un costé, que d'autre, & spécialement de la partie des Anglois. Es mois de Februrier, & de Mars, se leua vn vent merueilleux, puant, & tout plain de froidures. Pour occasion duquel, plusieurs gens, tant d'Eglise, nobles, que du peuple, feurent tellemēt enreumez & entouffez, que merueilles. Et en feurent aucuns malades au liêt, tellement que par aucun temps les Iurisdicciōs de Parlement, & de Chastelet, cessierent, & n'y alloit personne. Peu en moururent. Toutesfois le Seigneur d'Aumont, bien vaillant cheualier, & qui auoit eu la charge de porter l'Oriflambe, alla de vie à trespassement.

Plusieurs villes & places, se teindrent de la partie du Duc de Bourgongne, & luy obeïssioient.

L'Archeuesque de Pise, de la partie du Pape Iean veint à Paris, pour le faict des graces expectatiues, & promotiōs à Prelatures. Car les Ordonnances Royaux, par lesquelles toute la disposition estoit aux Ordinaires, regnoient, & duroient. Et luy estant à Paris, on luy enuoia le chapeau, & feut faict Cardinal. Les dictes Ordonnances Royaux, feurēt en effect annulées. Car le Roy, la Royne, & Monseigneur le Daulphin, eürēt nominatiōs pour leurs gens, & seruiteurs, & pareillement l'Vniuersité, & grandes prerogatiues. Et le Roy, & les Seigneurs, au regard des Prelatures, estoient Papes. Car le Pape faisoit, ce qu'ils vouloient, & ne renoit pas à argent, & se bailloient les Eglises au plus offrant, & dernier encherisseur. Et y auoit Lombards à Paris, qui faisoient deliurer argent à Rome, à grand profit. Et ce qui meut le Roy, & son Cōseil, à non vser des dictes Ordonnāces, ce feut, pource qu'on disoit communément que les Ordinaires, vsoient tresmal de la collation des benefices, & les donnoient à leurs parens, & seruiteurs, sans en faire prouision aux gens notables clerics graduez, ou nobles. Et que

si des dictes Ordonnances on eust bien vſé, elles estoient bonnes & saintes. Et specialement que par le moyen d'icelles, l'or, & l'argent de ce Royaume demeueroit, & il se vuidoit par l'abolition d'icelles merueilleusemēt. Car il n'y auoit si petit laboureur, qui ne voulust faire son fils homme d'Eglise, & bailler argent, pour auoir vne grace expectatiue.

La ville de Compiègne, qui est bien assise, forte, & belle place de guerre, tenoit le parti du Duc de Bourgongne, & y auoit de vaillants gens dedans, qui faisoient des courses, & maux beaucoup sur le peuple. Et delibererēt le Roy, & Monseigneur de Guyenne, de y mettre le siege. Et dedans estoient Messire Hue de Lannoi, Marteler du Mesnil, Guillaume Soret, le Seigneur de Sainct Leger, & Messire Hector de Saueuses, accōpaignez de cinq cents hommes d'armes, & de gens de trait, qui faisoient maux innumerables.

Le Roy, & Mōseigneur le Daulphin, apres qu'ils eurent esté à l'Eglise de nostre Dame de Paris, faire leurs offrandes, & deuotions, partirēt de Paris. Et estoit Monseigneur le Daulphin, biē ioly, & auoit vn moult bel estādart, tout bartu à or, où auoit vn κ. vn signe, & vne l. Et la cause si estoit, pource qu'il y auoit vne Damoiselle moult belle en l'Hostel de la Roïne, fille de Messire Guillaume Cassinel, laquelle vulgairement on nōmoit la Cassinelle. Et si elle estoit belle, si estoit elle tresbonne, & en auoit la renōmée. De laquelle, cōme on disoit, le dict Seigneur faisoit l'amoureux, & pource portoit-il le dict mot. Et en leur compaignée estoient les Ducs d'Orleans, de Bar, & de Bauiere, & les Comtes de Vertus, d'Eu, d'Alençon, & de Richemont, le Connestable, & le Comte d'Armaignac, en volonté, & imagination de reduire, & mettre en la bonne obeissance, & subiection du Roy, le Duc de Bourgongne, & ses adherens, lesquels en plusieurs & diuerſes manieres auoient delinquē contre le Roy, & sa Majesté Royale. Et s'en allerent à Sainct Denys ainsi qu'il est accoustumé. Et pource que le Seigneur d'Aumōr, qui auoit accoustumé de porter l'Oriflabe, estoit mort, le Roy auoit assemblé son Conseil, pour sçauoir à qui on la bailleroit. Car on auoit de tout tēps accoustumé, la bailler à vn cheualier loyal, preud'homme, & vaillant. Et par eslection fut esleu Messire Guillaume Martel, Seigneur de Bacqueuille, Auquel feut baillé l'Oriflambe, & se confessa, & ordonna, & feit les ser-

1414. mens accoustumez, lequel fort s'excusa pour son vieil aage. Et pource luy feut baillé en aide & confort son fils aîné, & vn beau gent cheualier, nommé Messire Iean de Betas, Seigneur de Saint Cler, qui feurent ordonnez comme coadiuteurs du dict Seigneur.

Le Roy, & Monseigneur de Guyenne, laisserent à Paris le Roy de Sicile, & Monseigneur de Berry, qui eurent le gouuernement..

Le Roy enuoia sommer ceux de Compiengne, qu'ils se meissent en son obeissance. Et feirēt faire respōse les gens de guerre, qu'ils ne se rēdroient point, ny ne feroiēt obeissance. Aucuns de la ville n'en estoient pas bien contēts: mais ils feurēt rappaisez par les Capitaines, & enhortez à eux tenir cōtre le Roy, en disāt plusieurs paroles deceptiues, & frauduleuses. Le Roy derechef à feureté enuoia deux de ses Conseillers, c'est à sçauoir, vn des Maistres des Requestes de son Hostel, nommé Maistre Guillaume Chanteprime, & Maistre Oudart Genciĉ, son Conseiller en sa Court de Parlement. Et les receurent à Cōpiengne seulement à la barriere, & leur dirent la creance, qu'ils auoient au Roy. Et la responce de ceux de Cōpiengne, fut bien briefue, c'est à sçauoir, qu'ils ne feroient quelque obeissance. Si y feut le siege mis. Toutesfois le Roy passa outre, & veint au pont à Soisy. Et la nuit qu'il y arriua, feut le feu bouté au villaige & pont. Et ne peut-on oncques sçauoir qui ce fait. Et disoient les aucuns, que c'estoit feu d'aduenture, & les autres, qu'il auoit esté mis d'aguet appensé.

Le Roy enuoia à Noyon, les sommer qu'il luy feissent obeissance, & y enuoia ses fourriers, pour prendre logis. Mais ils les refuserent plainemēt, & y en eut, qui dirent diuerſes paroles, & feurent vn iour en ceste volonté. Toutesfois le Roy delibera venir deuāt, & de fait y veint, & luy feurent les portes ouueres, & y entra dedans la ville à son plaisir. Et fait faire information de ceux qui estoient cause de la premiere desobeissance, & feurent prins. Et le Roy lequel auoit tousiours esté, & estoit de foy misericors, feut conseillé de conuertir la peine criminelle en ciuile, & payerent amendes pecuniaires assez legieres, connoissans que on leur faisoit grande courtoisie.

Le Roy apres enuoia à Soissons, les sommer aussi qu'ils luy feissent obeissance, & le receussent. Et Enguerrand de

Bournonuille, qui estoit dedans la ville, pource que le herault en les sommant, les requit, qu'ils se montraissent bös & loyaux enuers leur souuerain Seigneur, respondit, que il, & ceux de sa compaignée, estoient plus loyaux au Roy, & ceux de la ville, que ceux qui estoient avec le Roy. Et que en la compaignée où le Roy estoit, ne feroient aucune obeissance. 1414.

Au regard de ceux qui estoient dedans Compiengne, ils faisoient de beaux faicts d'armes, & souuent failloient. Aussi les recepuoit on le mieux qu'on pouuoit, & y en auoit souuent d'un costé & d'autre de morts, & prins, ou de blesez. Et entre les autres saillies qu'ils feirent, le vingt & vniésme iour d'April, ils saillirent & bruslerent les faux-bourgs, qui feut grand dommaige. Et passerent outre, iusques au lieu, où on auoit assis les canons, & au plus gros canon, nommé bourgeois, meirent au trou par où on boutoit le feu, un clou, tellement que deuant la dicte ville oncques ne peut iecter. Et si feirent tant qu'ils trainnerent trois vulgaires, & les meirent dedans la ville, & tuerent aucuns des canonniers. Et ceux qui estoient au siege, s'assemblerent, & se meirent entre la ville, & eulx, pour empescher qu'ils ne peussent entrer dedans. Les gens du Roy, auoient fait un pont de bois, pour passer par dessus la riuere ceux du siege les vns aux autres. Et selon ce qu'on sceut, ceux qui estoient issus, auoient intention de repasser par dessus le dict pont, & cuiderent faire grand dommaige aux gens du Comte d'Armaignac, & du Seigneur d'Albret, lesquels estoient de là le pont, & ne les trouuerent point esbahis, car ils les receurent vaillamment, & tellement qu'ils les rebouterent iusques dedans leur ville. Et y en eut grand foison de morts, & plusieurs prins. Apres ceste escarmouche, on escripuit au Roy, qu'il luy pleust venir deuant la ville, & qu'il sembloit qu'on l'auroit d'assault. Et pource le Roy y veint, & passa par dessus le dict pont de bois. Et à sa venue, y eut plusieurs escarmouches. On iectoit canons contre la ville, ceux de dedans aussi en iectoient, & de gros trait d'arbalestres. Et fait on semblant diuerfes fois de les assaillir : mais vaillamment ils se defendoient, & blesoient souuent de ceux de l'ost. On ouurit aucuns traictez de paix, & y feut on bien trois ou quatre iours à parlementer. Le Comte d'Armaignac n'estoit point d'opinion de paix, ou de traicte avec eux, veües les inobediencies qu'ils

1414. auoient faict, & leurs manieres & mauuaises volontez. Et si lui sembloit, & monstroit euidemment, que en peu d'heures, on l'auroit d'assault. Mais son opinion ne feut pas tenüe, & y eut traicté, faict, C'est à sçauoir, que les gens de guerre s'en iroient, faulues leurs vies, harnois, & cheuaux. Et crieroyent mercy au Roy, en luy suppliant & requerant qu'il leur voulust pardonner. Ce que le Roy feit benignement, & promeirent qu'ils ne s'armeroyent plus contre luy. Et en tant qu'il touchoit ceux de la ville, où il y en auoit de par trop extremes, le Roy leur pardonna, en faisant du criminel ciuil, & payerēt aucune moyenne finance. Puis y entra le Roy, & luy feut la dicte ville rendüe, & obeissance faicte, & feut durant le siege la dicte ville fort dommaigée.

Le Comte d'Armaignac, le Duc de Bar, & le Seigneur d'Albret, Conestable de France, & leurs gens, allerent deuāt Soissons, & les enuoierēt sommer, qu'ils rendissent la ville au Roy, & à Monseigneur le Daulphin. Enguerrand de Bournouille, qui estoit dedans, respondit qu'il estoit au Roy, & pour luy tenoit la Cité. Et que si luy, & Monseigneur de Guyenne, son fils, y vouloyent entrer à leur estat, que on leur ouureroyt les portes, & y entreroient. Et apres la dicte response, escarmouches se leuerent, & saillirent ceux de la ville, pour aüssi escarmoucher bien souuent. Et tresuaillement se portoient, & y eut de beaux faicts d'armes faicts d'un costé & d'autre. Les bombardes feurent assises, & canons, & tiroit on fort dedans la ville, & feut batüe en plusieurs endroicts, & mesmement en vn lieu, où auoit vn grosse tour, & vn ange paint. Et là estoit assise vne bombarde nommée bourgeoise, qui estoit grosse, & comme bien que deuant Compiengne elle auoit esté dommaigée, toutesfois on y auoit mis tel remede, qu'on en ouuroit tresbien. Et si y auoit d'autres gros canons. Et sembloit aux chefs de guerre, que la dicte Cité estoit prenable d'assault. Et entre les autres vaillants Capitaines, & Chefs de guerre, y auoit vn nommé le bastart de Bourbō, qui alloit par dehors autour des fosses de la ville, pour veoir par quel lieu, on la pourroit plus aisément assaillir. Et estoit comme desarmé, & quoy qu'il en soit, luy failloit il plusieurs pieces de son harnois. Vn arbalestrier de dedans la ville l'apperceut, & luy tira de son arbalestre vn viretō, & le frappa en la gorge, dōt il cheut tout nauré. Si feut

hastiuement apporté à son logis. Les chyrurgiës le veirent, & trouuerent qu'il n'y auoit remede. Parquoy il feut confessé, & ordonné, & receut tous ses Sacremens, & alla de vie à trespassement, & feut fort plaint de toutes gens. Car il estoit ieune homme, doux, & humble en maintië, parole, & gouuernemēt, & ses ennemis mesmes le plaignoient. Ceux de dedans voians qu'ils auoient fort à faire, & que les gens de dehors estoient puissans, meirent hors vn compaignon, qui se faisoit fort de passer. Et escripuoit Enguerrand vne cedula au Duc de Bourgogne qu'il leur enuoiaist secours, ou sinon, il ne se pourroiet plus tenir, & fauldroit qu'ils rendissent la ville, & que leurs personnes feussent en danger. Et feut le dict compaignon pris, & feurent trouuées les dictes lectres. Le dict Enguerrand mesmes, cuida istre hors, faignant qu'il iroit querir secours. Mais vn surnommé Craon, & Messire Iean de Menon, l'empeschèrent, en disans qu'en tel hanap qu'ils beuuroient, qu'il buiroit. Et quelque promesse qu'il feist de retourner, ils ne l'en croioiet point, & demeura voulust, ou non. Car il y auoit durs sieges en diuerses parties. Et delibererent ceux de dedans d'entendre à traité, & trouuer expedient, combien que c'estoit bien tard. Car la ville estoit fort batüe. Et du costé où estoit Mōseigneur de Guyenne, ceux de dedans feirent signe de parlemeter, & de faict commencerent à parlementer. Et auoient les gēs de bien du Conseil du Roy, grand desir, & affectiō de trouuer Traicté. Et les gens de guerre, specialement de l'auant-garde, queroiet tous les moyens d'entrer dedans par assault, & feirent toutes apparences d'assaillir, voire tous ceux de l'Ost. Et en plain midy, ceux de l'auantgarde passerent par vn endroiēt de la riuie de Aisne, que on ne cuidoit pas estre passable. Et veindrent à vne poterne, qui estoit sur la riuie, laquelle ils gaignerēt, & par là entrerent dedans la ville. Ceux qui y estoient en garnison, les cuiderent rebouter, & y eut de grandes armes faictes, & estoit enuiron midy. Et ceux de l'ost, qui veirent & ouyrent le bruit, assaillirent tresfort du costé où estoit bourgeoise, où les murs estoient fort batus, & entrerent dedans. Et ne scauoient ceux de la ville, auquel endroiēt entendre. Et finalement les gens du Roy y entrerent. Qui feut vne piteuse entrée, car ils feirent maux infinis. Plusieurs en tuerent, pillerent, robberent, & les Eglises mesmes, efforçerent femmes,

1414. & filles, comme l'on disoit, & y eut de bien piteux cas commis & perpetrez en la chaleur de l'entrée, & le lendemain. Et disoit on qu'on n'y eust sceu mestre remede. Si en faisoient les Chefs de guerre, & Capitaines, le mieux qu'ils pouuoient. Et le lendemain, la fureur aucunement refroidie, feurēt faictz cris de par le Roy, & y eut de gracieuses compositions faictes, tant de biens, que de maisons. Grande occision y eut de ceux qui se meirent en defense, & si y eut plusieurs personnes prins. Et entre les autres le dict Enguerrād de Bournouille, lequel auant qu'il feut prins, vaillamment se defendoit, & feut nauré, & blessé, & mesmement au trauers du visaige. Et se vouloit mestre à finance: mais il eut la teste couppee. Et pareillement vn cheualier nommé Messire Iean de Menon, & autres aussi. On en mena plusieurs à Paris, & feurent pendus au gibet. Et si y en eut de prins & mussiez par les gens de guerre, & mis à finance. Et combien que ceux de la ville eussent forfait, & confisqué corps & biens, toutesfois il y feut donné honorable prouision. Et iacoit que iceux de la ville doubtans de ce qui leur aduint, eussent faict plusieurs musses, toutesfois aucunes feurēt trouuées, où ils perdirent moult. Et si y eut aucuns des plus riches, qui feurent mis à grosses finances, lesquelles ils payerent à bien grand peine.

Le Roy veint à Laon. Et là veint à luy le Comte de Neuers, frere du Duc de Bourgongne. Et luy cria mercy, en luy requerant qu'il luy voulust pardonner ce qu'il auoit esté deuant Paris avec son frere. Et feit plusieurs grandes promesses tant de le seruir, que autrement. Et meit toutes ses terres en sa main & subiection. Le Roy, & Monseigneur de Guyenne, biē & doucement luy pardonnerent.

Le Duc de Bourgongne faisoit diligence de toutes parts d'assembler gens. Et tellement, que de Bourguignōs, Picards, & Sauoisiens, ils se trouuerent bien quatre mille combatars, desirans trouuer les gens du Roy pour les combattre, aussi estoient ils belle & grande compaignée, & gens bien habillez & montez. La chose veint à la cognoissance du Roy. Et feut ordonné à l'auantgarde le Duc de Bourbon, & le Comte d'Armaignac, à tout deux mille combatars. Et en l'arrieregarde des Bourguignōs, estoit le Seigneur de Hannette, à tout huit cents cōbatans, & se maintenoient bien & grandement, com-
me

me gens de guerre. Les dictz deux Seigneurs enuoierent leurs coureurs deuant, assez largement, lesquels veirent & apperceurent les gens du Duc de Bourgongne emmy les champs, en belle Ordonnance, (& lesquels coureurs les dictz deux Seigneurs à toutes leurs bannieres desployées suiuiroient,) & estoient les dictz coureurs en grande perplexité, s'ils frapperoient dedans, ou non. Car il sembloit à aucuns, qu'on debuioit attendre les dictz Seigneurs, & si n'estoient pas autant des deux parts, comme les autres. Toutesfois ils doubtoient deux choses. L'une, que les dictz aduersaires se pourroient bien retraire, sans coup frapper, quand ils verroient la compaignée des dictz deux Seigneurs. L'autre, que s'ils ne frapportoient dedans leurs ennemis, il leur seroit imputé à vne lascheté de couraige, ce qui leur seroit vn grand reproche. Peu de gens estoient, mais vaillants, bien montez, & armez. Et de fait, delibererent de leur courir sus, & ainsi le firent, & feurent aussi bien reueus. Et y eut vne bien dure besongne, & bien combatüe d'un costé & d'autre. Et aucuns des gens du Duc de Bourgongne, veirent venir, & approcher les dictz Duc de Bourbon, & Comte d'Armaignac, avec leurs bannieres desployées, & leurs gens, qui venoient diligemment pour aider à leurs gens. Et auât qu'ils approchassent de leurs ennemis, ils se mirent en fuite. Mais on les suiuit diligemment, tellement que en la place y en eut soixante & dix morts, & bien cinq cents prins, & entre les autres le veau de Bar. Et y en eut grand foison, cuidans passer les riuieres, qui se noierent. Et firent les gens du Roy longue chafse, tellement, que les aduersaires feurent contraincts de eulx bouter es dictes riuieres. Et les aucuns se retrahirent en Liege, & Hainault, lesquels pourtant ne se sauuerent pas tous. Car où les Liegeois, & Hainauliers les trouuoient, ils les tuoient. Le veau de Bar, feut en grand danger, qu'on ne luy couppast la teste. Mais il eut des amis, & paya grand finance à celuy qui l'auoit prins.

Le Roy sen vint en la chappelle en Tierache, & à Saint Quentin. Et là vindrent vers luy la Comtesse de Hainault, & le Duc de Brabant, prians & requerans, qu'il ne voulust pas proceder si rigoureusement contre leur frere. Le Roy feit response, que quand son cousin le Duc de Bourgongne, voudroit venir vers luy, Il lui bailleroit feufeté telle, qu'il debuioit estre

1414. contēt. Et s'il vouloit Iustice, il l'auroit. Si misericorde, il estoit prest de luy faire si grande, & si abondamment, qu'il deburoit suffire. Et à toute la dictē response, ils s'en retournerent. Et disoit on communément, que le dict Duc de Bourgongne, auoit enuoié deuers le Roy d'Angleterre, & les Anglois, pour auoir secours. Et offrit grandes alliances, & faisoit plusieurs promesses. Et de fait, feurent aucunes choses accordées & fermées. Mais les Anglois n'y voulurent pas bien entendre, à luy bailler gens. Car le Roy d'Angleterre, faisoit ses preparatoires, pour descendre en Normandie, ainsi qu'il feit. Et si estoient les Princes mesmes en Angleterre, diuisez pour la querelle de Bourgongne, & d'Orleans. Et estoient les Ducs de Clarence, & de Clocestre, & avec eulx le Duc d'Yorck, fauorisans la partie du Duc d'Orleans. Et le Roy, & le Duc de Bethfort, celle du Duc de Bourgongne.

Le Roy se meit en chemin vers Perōne, & luy feir on obeissance. Les Seigneurs de son auantgarde, allerent deuant Bapaulmes, & y eut de grandes escarmouches, & plusieurs cheuaux tuez. Et y auoit dedans de vaillants gens, & specialement y auoit fort traict. Mais quand ils veirent, qu'ils seroient assiegez, ils se rendirent. Et y en auoit en la place qui estoiet de Paris, & aucuns, qui auoient esté dedans Compiengne, aux vns desquels on couppa les testes, & les autres on les pendir.

Quand le Duc de Bourgongne, veid qu'on le chassoit de pres, & qu'on s'approchoit de la Cité d'Arras, il y enuoia garnison, & y meit bien quinze cents combatans, dōt estoit Chef principal Messire Pierre de Luxembourg. Lequel, & toutes les gens de guerre, & aussi ceux de la ville, delibererēt de eulx tenir, & resister à l'entreprinse de ceux qui les vouloient assieger. Et d'assiette, bruslerent tous les faux-bourgs, & ardirēt les Eglises, hostels Dieu, maladeries, & aumosneries. Dont il y auoit de moult belles Eglises, qui feut grand pitié.

Le huitiesme iour d'Aoust, le Roy d'Angleterre enuoia bien notable Ambassade à Paris, offrant paix, & alliance; C'est à sçauoir l'Euesque de Curesme, & l'Euesque de Noruic, deux notables Prelats, le Comte de Salbery, le Seigneur de Gray, Messire Iean Pheletin, & autres. Et estoient bien cinq cents cheuaux, bien pompeusement habillez, & ordonnez, & yeindrent à Paris. Et pource que le Roy, & Monseigneur le

Daulphin, n'y estoient pas, ils s'adresserent à Monseigneur le Duc de Berry, lequel les receut grandement & honorablement, cōme il le sçauoit bien faire, & les festoya plusieurs fois. Et voulurent estre ouys, ce que leur oſtroia le Duc de Berry, & feurent ouis. Et proposa le dict Euesque de Noruic, qui estoit vn bien notable clerc. Et en effect disoit, faites nous Iustice, nous offrons paix, & alliance. Pour alliance, ils demandoient Madame Catherine de France, la Duché de Guyenne, & la Comté de Ponthieu, sans foy, hommaige, ne ressort, & autres demandes. Et feut la proposition moult notable, & monstra biē l'Euesque, qu'il estoit clerc. Au cōmencemēt loia fort le Roy, & les Seigneurs de France, de la bonne volonté qu'ils auoient à la paix, & que leur Roy d'Angleterre en estoit tres ioyeux. Et pour venir à sa matiere, print son theme, Iosue 20. cap. *Venimus vobiscum facere pacem magnam.* Et monstra bien grandement, & notablement les biens qui viennent de paix, & les maux qui viennent par faulte de paix, & que Iustice, sans paix ne peut estre, ne aussi paix sans Iustice. Et mōstra deux moyēs, par lesquels paix se conclud ferme, & stable. C'est à sçauoir, l'œuvre de Iustice, & l'alliance d'amitié. L'œuvre de Iustice, est reformatif de toutes iniures, & y met la douceur, & suauité de paix. L'alliance d'amitié, cause d'amour ferme establement la paix. Et ces deux choses, deduisit bien grandement, excellemment, & notablement, & longuement. Et par l'œuvre de Iustice, demandoit raisiblement les choses dessus dictes. Et par alliance, dont se pouuoit ensuiure amour ferme, demandoit Madame Catherine. Laquelle proposition feut faite en Latin, & la bailla par escript.

Le Duc de Berry, leur feit responce, que le Roy, ne Monseigneur le Daulphin n'estoient en la ville, ne au pays, & que sans eulx on ne leur pourroit faire aucune responce. Tāt comme ils feurent à Paris, ils alloient esbatre, où ils vouloient, & estoient bien contents de la chere qu'on leur faisoit, & s'en retournerent à Calais, sans autre chose faire pour lors.

Au siege d'Arras auoit vn canonnier lequel se bouta dedans la ville, & dit tout l'estat de l'Ost, & le gouuernement; en les enhortant qu'ils se teinssent bien, & se defendissent. Et aussi faisoient ils. Et souuent failloient, & auoient belles retraites, & lieux propices à eulx retraire. Et routes fois qu'ils

1414. failloient dehors és dicts lieux, y auoit bonnes arbalestres, & archers, & canons à main, pour les recepuoir. Mais en toutes les issues qu'ils feirent, ils feurent reboutez à leur grand dommage.

Le Duc de Bourgongne, faisoit de grandes diligéces de assembler gens, pour leuer les sieges, ou au moins vn d'eulx, & en auoit bien largement. Et pour veoir l'estat de l'Ost, & scauoir, il enuoia quatre cents cobatans, explorateurs. Et auoient deliberé de mestre en vn lieu leur embusche, & enuoier aucuns coureurs deuant, pour veoir si aucuns compagnons iustroient, en les cuidant tirer en escarmouchant, iusques à l'embusche qu'on debuait mestre. Mais la chose veint bien autrement. Car les gens du Roy estoient ailleurs assez grosse compaignée en embusche, qui veirent venir les gens du Duc de Bourgongne, qui ne s'en donnoient aucunement de garde, & frapperent dessus vaillamment. Et y eut assez dure besongne, & assez tost les Bourguignons se retrahirer, & y en eut de morts, de naurez, & de prins. Et entre les autres, feut prins Messire Daud de Brimeu, vn vaillant cheualier de Picardie, lequel s'estoit porté vaillamment. Et auoient volonté les dicts Bourguignons de entrer dedans la ville, pour donner aide & confort à leurs gens. Et ainsi le Duc de Bourgongne, feut fraudé de son intécion. Et veid bien qu'il n'estoit mie taillé, qu'il peust bailler secours à ceux de dedans, qui estoient grand peuple. Car tout le pays s'estoit retraict dedans, & les viures appetissoient fort, & commençoit le peuple à murmurer.

Et ce considerans la Duchesse de Hainault, & le Duc de Brabant, retournerent deuers le Roy en grande humilité, gemissemens, & pleurs, & mesmemēt la Duchesse, & supplierent au Roy, qu'il voulust tout pardonner au Duc de Bourgongne, leur frere, & il feroit obeissance de sa Cité, & la mettroit en ses mains, & qu'on voulust trouuer moyen de paix finale. Et à ceste requeste, le Roy fort entendit, & de son mouuement, dit en plain Conseil, que leur requeste estoit raisonnable, & qu'il vouloit qu'on y aduisast. Et là eut plusieurs opinions, & imaginations. Et plusieurs en y auoit, qui eussent volontiers empesché paix & traicté. Et mesmement les Bretons, & Guascons, ausquels il sembloit que la dicte ville estoit prenable d'affault, & mesmement la Cité. Et si en auoit, qui

eussent bien voulu la destruction totale du Duc de Bourgogne, qui n'estoit pas chose aisée à faire. Et y eut vn grand Seigneur, qui à vn matin veint deuers le Roy luy estât en son liēt, lequel ne dormoit pas, & parloit en soy esbatant à vn de ses varlets de chābre, en soy farsant. Et le dict Seigneur veint prendre par dessoubz la couuerture, le Roy tout doucemēt par le pied, en disant, Monseigneur, vous ne dormez pas. Non beau Cousin, luy dict le Roy, vous soiez le bien venu, voulez vous rien, y ha il aucune chose de nouueau. Nenny Mōseigneur, luy respondit-il, sinon que vos gens qui sont en cēsiege, dient que tel iour qu'il vous plaira, verrez assaillir la ville, où sont vos ennemis, & ont esperāce d'y entrer. Et lors le Roy dit, que son Cousin le Duc de Bourgogne, vouloit venir à raisē, & mētre la ville en sa main, sans assaut, & qu'il falloit auoir paix. Et le dict Seigneur respondit, comment Monseigneur, voulez vous auoir paix avec ce mauuais, faux, traistre, & desloyal, qui si faulsement & mauuaisement ha fait tuer vostre frere? Et lors le Roy aucunement desplaisant luy diz, du consentemēt de beauz fils d'Orleans, tout luy ha esté pardonné. Helas Sire, replicqua le dict Seigneur, vous ne le verrez iamais vostre frere. Et sembloit que le dict Seigneur voulust encōres dire aucune chose. Mais le Roy luy respondit assez chaudement, Beau Cousin, allez vous en, le le verrai, au iour du iugement. Et le matin mesmes, Monseigneur le Duc de Guyenne, & Daulphin, enuoia querir le dict Seigneur de Taignel, son Chancellier, & luy dit, qu'il vouloit qu'il y eust paix & traictē avec son beau pere, le Duc de Bourgogne. Et que la Duchesse de Hainault, & le Duc de Brabant, offroient tresbon traictē, & expedient, & que il feist le mieux qu'il pourroit. Et feut le matin, le Conseil assemblē, où estoient le Roy, Monseigneur le Daulphin, & tous les Seigneurs de leur sang, gens de Conseil, & Capitaines, & y eut diuerses bendes, opinions, & imaginatiōs. Mais le dict Seigneur de Taignel mōstra euidemment que la paix, & l'accord estoient necessaires. Et que tous d'une bōne amour, debuient entendre à resister aux ennemis anciens du Royaume, les Anglois, lesquels on sçauoit faire armée pour descendre en France, & mesmemēt que finance failloit à payer les gēs de guerre, & tout à l'environ, tout estoit si bien pillē, qu'il n'y auoit plus de fourraige pour les cheuaux, ne viures, pour les personnes.

1414. Et à qui qu'il en despleust, feut conclud, que on entendroit à paix, & accord. Et feurent mandez la dicte Duchesse de Hainault, & le dict Duc de Brabant, & leur feut respondu de par le Roy, qu'on estoit content d'y entendre. Et feut vne Cedula de Traicté faicte, de laquelle on enuoia hastiuement la coppie au Duc de Bourgongne, lequel en feut content, & feut la paix conclüe. Et ouuerture faicte de la ville au Roy, non mie qu'on y entraist à puissance. Mais de par le Roy, on meit les bannieres du Roy, sur la porte, & desappointa-on les Officiers. Et crioit-on par la ville, Viue le Roy. Et entra dedans avec les Mareschaux le dict Seigneur de Traignel, & feit faire les sermens, tant aux gens de guerre de la ville, que autres, d'estre bons, & loyaux au Roy. Et desappointa le dict de Luxembourg, d'estre Capitaine, & les Officiers que le Duc de Bourgongne y auoit mis, & y en commit de par le Roy. Et ainsi se partit le siege de deuant la ville d'Arras. Et s'en veindrent le Roy, & les Seigneurs, à Paris. Et y entra le Roy, le premier iour d'Octobre, dont ceux de la ville feurent bien ioyeux.

Les gens du Roy qui auoient esté deuant Arras, estoient sur les champs, & pareillement se meirent aussi ceux du Duc de Bourgongne, qui estoient dedans la place, & autres qu'il auoit autour de luy, lesquels pilloient, robboient, & faisoient maux innombrables en diuers lieux & pays. Plusieurs gens s'assemblerent, eux disans au Duc de Bourgongne, & faisoient guerre à Messire Louys de Chaalon, Comte de Tonnerre, & auoient assiegé la ville de Tonnerre. Laquelle chose veint à la congnoissance du Seigneur de Gaucourt, qui print en sa compaignée aucuns cheualiers & esquiers de la compaignée du Roy. Et frappa sur eulx tellement, qu'il leua le siege, & en y eut plusieurs de morts, & la plus grand part de prins. Autres gens auoit aussi sur les champs, qui pilloient, & le rapporta on au dict Seigneur de Gaucourt. Lequel y alla, & frappa sur eulx. Si se meirent en fuite, mais ils ne sceurent si bien fuyr, que le dict Seigneur de Gaucourt, ne les ruaist jus, & en print plusieurs, lesquels il feit pendre.

En ce temps, se teint le Concile de Constâce, qui fent moult notable, & estoient assemblez tous les plus notables clerks de Chrestienté, de toutes sciences. Et puis que est fait mention du dict Concile de Constance, est à sçauoir que de la condem-

nation qu'auoit fait Montraigu, Euesque de Paris, de la proposition de Maistre Iean Petit, feut appellé de la partie du Duc de Bourgongne. Et feut la cause commise par le Cōcile à deux Cardinaux, & feut la matiere discutée, & ouuerte Et pour môstrer que iustement elle auoit esté cassée, estoient Maistre Pierre d'Ailly, Maistre Iean Iarson, & Maistre Iordain Morin, lesquels il faisoit bel ouyr. Aussi estoient ils grands & notables clerks. De l'autre part estoit l'Euesque d'Arras, qui leur respondit par escript, & lisoit les responses en vne cedula, à chascune fois qu'il falloit respôdre & replicquer. Et apres plusieurs propositions, les Cardinaux dient par leur Sentence, qu'il auoit esté bien appellé par les gēs du Duc de Bourgongne. Car premierement ils disoient, que l'Euesque de Paris n'estoit pas Iuge competent, & sur ce alleguerent plusieurs raisons. Secondement, que la partie principale, c'est à sçauoir le Duc de Bourgongne, n'auoit point esté appellé. Fiercement, qu'en la maniere qu'on auoit tenu, & par les raisons qu'on auoit allegué, c'estoit faire vn nouuel article de foy. Et y eut derechef grandes disputations, & allegations. Et apres plusieurs debats de la partie du dict Iarson, & de ses adherens, feut appellé des dicts Cardinaux. Et par ce moyen, demeura la matiere indiscusse.

Or est-il ainsi que le dict Seigneur de Traignel, qui estoit Chancelier de Guyenne, considerant les grands incōueniens, qui pouuoient aduenir, si la paix ferme & stable ne se faisoit, & que les articles autresfois faicts, confirmez, & approuuez ne se teinsent, pourchassoit tant qu'il pouuoit, l'accomplissement d'icelle. Et luy feirent sçauoir la dictē Duchesse de Hainault, & le dict Duc de Brabant, qu'ils viendroient à Saint Denys pour la matiere.

Tailles grandes & excessiues se faisoient, & leuoit-on argent excessiuemēt sur le peuple, lequel n'estoit point employé au bien de la chose publique: mais en bourses particulieres de seruiteurs, specialement de Monseigneur de Guyenne, & de Monseigneur de Berry. Et rellemēt que le dict Monseigneur de Guyenne, donnoit à ses gēs aux vns dix mille escus, & aux autres six ou sept mille. Et en vn matin on apporta biē des mādemens à sceller de par Monseigneur de Guyenne; montans à la somme de soixāte à quatre vingts mille escus. Lesquels le dict

1414. Seigneur de Traignel ne voulut sceller, & respondit qu'il parleroit à son maistre, Monseigneur de Guyenne. Et aussi feit-il, en luy monstrant la necessité qu'on pourroit auoir à faire d'argent. Lequel en feut tres-content, & luy defendit, qu'il ne sceust aucun mandement, s'il passoit mille escus, dont ceux qui estoient autour de luy, feurent mal contents. Et à ce les induisoit vn nommé Maistre Martin Gouge, Euesque de Chartres, pource qu'il doubtoit que son maistre le Duc de Berry, aussi se restraingnist des dons excessifs qu'il faisoit. Et feirent tant de rapports, que le dict Duc de Berry, traicta de faire desappoincter le dict Seigneur de Traignel. Et à vn matin enuoia à son nepueu Monseigneur de Guyenne, par le dict Euesque de Chartres, deux belles grosses perles, Avec lequel Euesque auoit vn cheualier. Et à chascun d'eulx, donna mille escus. Et pour sceller le mandement, enuoia vers le dict Seigneur de Traignel, querir ses seaux, lesquels il bailla volontiers. Et feurent baillez au dict Euesque de Chartres, qui estoit bien habile sur le fait des finances. Et ainsi le dict Seigneur de Traignel, pour auoir loyaulment serui son Maistre, feut desappointé. Et disoit-on que le dict Seigneur de Guyenne, depuis print conditions estranges.

Le premier iour de Ianuier, le Comte d'Alençon, qui estoit vn moult beau Seigneur, & vaillant en armes, feut fait Duc. Et disoit-on, que c'estoit par enuie du Duc de Bourbon, qui alloit deuant luy. Et toutesfois il estoit plus pres de la Couronne, & comme le plus pres, quand il feut Duc, il alla deuant.

La Duchesse de Hollande, & le Duc de Brabant, veindrent à Saint Denys pour le fait du Traicté, qui auoit esté pourparlé deuant Arras. Et y enuoia le Roy. Et feut de toutes les deux parties le Traicté approuué, & confirmé, dont auoient aucuns esperance, qu'il y auroit bonne paix, mais elle ne dura guieres.

Quand le retour du Roy feut venu à la congnouissance des Anglois, ils retournerent à Paris, pour auoir response des offres qu'ils auoient fait, d'auoir Madame Catherine pour leur Roy, & demandoient Guyenne, & Poictieu, & en effect que le Traicté de Breigny se teint. Et l'Euesque mesmes, lequel autresfois auoit proposé si bien & si notablement; derechef feit la proposition. En disant, que le Roy son maistre, & son souverain Seigneur, auroit esté moult esioy, quand il auoit sceu la
bonne

bonne volonté que auoient le Roy de France, & ses parens, à 1414.
 auoir bonne paix. A laquelle chose son Roy de tout son pou-
 uoir tendoit, & auoit desir, & affection : mais qu'on luy feist
 Iustice, & que la liberté de sa Couronne, à laquelle il auoit le
 serment, ne feust blessée. Et que entre paix & Iustice y auoit si
 grande connexité, que sans Iustice, paix ne pouuoit estre, ne Iu-
 stice sans paix. Et print son theme, les paroles que dit ce no-
 ble Roy Ezechias. Isaïx 29. cap. *Fiat pax, & veritas in diebus ve-*
stris. Lequel theme il diuisa en plusieurs parties, toutes lesquel-
 les estoient induictes à auoir paix. Et allegua plusieurs & diuer-
 ses auctoritez, seruans à la matiere, & mesmement des reuela-
 tions de Sainte Brigide, où estoit contenu, que par les prie-
 res & Oraisons de Monseigneur Saint Denys, patron des
 François, les Princes des ferocissimes gens de France, & An-
 gleterre, par lien de mariage debuient auoir paix ferme & sta-
 ble ensemble. Et declara les biens qui pouuoient venir par la
 paix des deux Royaumes. Et fort sarrestoit sur les dictes re-
 uelations de Sainte Brigide. Et à la fin tousiours venoit que
 paix ne se pouuoit faire, sinon qu'elle feust dirigée & condui-
 tée par vérité, & par Iustice. Et sur ce y eut plusieurs conseils
 tenus, & leur faisoit-on des offres : mais de nulles n'estoient
 contents. Et pource finablement leur feut respondu, que le
 Roy enuoieroit de ses gens en Angleterre, deuers son cousin
 le Roy Henry, avec plainiere puissance. Et qu'il seroit bien
 ioyeux, si Traicté se pouuoit trouuer. Et feut faite gran-
 de chere & reception aux dicts Anglois, & feurent grande-
 ment festoiez, & eurent beaux presens, & s'en allerent en leur
 pays.

Et iceux Anglois estans à Paris, avec eux auoit des Portuga-
 lois, qui auoient grande volété de faire armes, pour l'amour de
 leurs Dames, cōbien que taisiblement la querelle principale y
 estoit des Anglois, & François, Car ils estoient alliez ensemble avec
 les Anglois. Et y eut vn gaige entre vn de Portugal, & vn gētil-
 homme de Bretagne, nommé Guillaume de la Haye. Et feut
 iour prins, auquel les parties comparurent en la presence du
 Roy, & des Seigneurs, rant de France, que d'Angleterre, en
 champ, & estoit le Portugalois accompagné des Anglois. Et
 feut conseillé au dict Guillaume de la Haye, qu'il ne se feist
 que defendre. Et estoient les armes du Portugalois routes rou-

1474. ges. Et veindrēt les parties bien habillēes, & armēes au champ, à trompettes, & menestriers, & auoient chascun leur chaire. Et apres que le herault eut crié, Faictes debuoir, se leuerent, & veindrent l'un contre l'autre, chascun garni de lance, hache, espée, & dague. Et quand ils feurent assez près, jectērent leurs lances, desquelles ils ne se attoucherent oncques, & prindrent les haches, & veint le Portugalois bien baudement, cuidant frapper son aduersaire, Mais tousiours il lui rabatoit ses coups, sans faire autre chose. Donc plusieurs s'esbahissoiēt; mais il luy auoit esté, comme dict est, conseillé, qu'il ne se feist que defendre. Et tres-souuent le Portugalois leuoit sa visiere, en faisant signe à l'autre, qu'il leuast la sienne. Aussi le faisoit-il. Et quand ils eurent par aucun temps faict en la maniere dessus dictē, le Portugalois leua sa visiere, & Guillaume de la Haye, sans leuer la sienne, luy voulut bailler de la pointe de sa hache au visaige. Et lors le Portugalois, commença aucunement à desmarcher. Et quand on veid la maniere, on cria, Ho, Ho, Ho, & les veint en diligemment prédre. Et disoit-on, que le Portugalois auoit bien courre haleine, & si de la Haye, eust voulu & peu l'approcher, il l'eust jecté à terre à la luiete. Car c'estoit vn des mieulx luiētans, qu'on peust trouuer. Et à tous deux on feit honneur, & bonne chere.

Il y eut trois autres Portugalois, qui requierent faire armes contre trois François, & estoit vn chevalier, & deux escuiers. Et auoit nom le chevalier, Messire François de Grignaux, l'un des escuiers, Archambauld de la Roque, & l'autre, Maurignon, qui tous trois estoient Gascons. Lesquels feirent scauoir aux dicts Portugalois, qu'ils estoient prests, s'ils leur vouloient rien demander, ou requesir, de leur defendre. Adonc les Portugalois les remercierent, & y eut lieu, iour, & heure prins, où, & quand la besongne se deuroit faire. Et cependāt chascun feit ses prouisions, le mieulx qu'il peut. La iournée ventüe, les Seigneurs à ce commis, veindrent aux escharfaulx, à ce ordonnez, & y eut mis grandes gens à garder le champ. Les Anglois estoient à conseiller, & à accompagner les Portugalois. Et y eut auonne difficulté, lesquels entreroient les premiers au champ. Mais il feut dict, que les Portugalois y entreroient les premiers, & que ce, estoit raisonnable, pource que en effect ils estoient demandeurs. Et ainsi le feirent en bien grand

pompe, accompagnez des Seigneurs d'Angleterre, & de leur pays. Et comme en vn moment entrerent les François, aussi bien, & honnorablement accompagnez. Et d'un costé & d'autre, trompettes sonnoient fort. Et veindrent tous au champ, monstrans semblant, & atalentz chascun de faire son deuoir. Et apres les cris faicts, & en tels cas accoustumiez, les parties se leuerent, garnies de leurs armeures, & bastons, en tel cas appartenans. Et selon ce qu'on peut apperceuoir, les Portugalois choisirent chascun son François. Et alla le chevalier, qui estoit vaillant homme, & s'aduança, & presenta à Messire François. Et selon ce qu'on disoit, le plus vaillant de tous, & le plus renommé de guerre, s'adressa à la Roque, & l'autre à Maurignon. Et quand ce veint aux haches, celui qui combattoit la Roque, le enferra au dessus du hault de la piece. Et quand il sentit, que le fer de la hache, auoit prins dedans le harnois, il commença fort à bouter, pour euidet entamer le harnois. Et s'en apperceuoit bien la Roque, lequel se tenoit ferme, en intention de faire ce qu'il feist. Car quand il apperceut, que le Portugalois se baissoit deuant, pour plus fort bouter, tout à coup de legereté de corps, dont il estoit moult habile, il recula tellement, que le Portugalois cheüt, & emporta la teste le corps. La Roque, luy bailla deux coups de sa hache sur la teste, d'ot il l'estona tout. Et tira son espée, pour luy bouter au fondement. Les autres dient, qu'il luy leua la visiere, & le voulut frapper par le vifage. Et quelque chose qu'il en feust, le Portugalois se rendit, & feut desconfit, & prins par les gardes. Et apres ce, la Roque regarda que ses compaignons auoient bien à faire, & s'en veint à tout sa hache, & bailla tel coup à celui qui auoit à faire à Maurignon, qu'il le feist chancelier, & Maurignon d'un autre coup le feist cheoir à terre, & se rendit. Et puis les deux, c'est à sçauoir la Roque, & Maurignon, allerent aider à Grignaux, qui estoit fort trauaillé, & blessé, & mesmement en la main fenestre, qui estoit percée tout outre, & ne s'en pouuoit aider. Et quand le chevalier, veid les deux autres venir sur luy, il veid bien qu'il ne pouuoit resister, & dit tout hault, Je me rends à vous trois. Et feut dict que tous auoient tresuaillement faict. Les François s'en allerent par Paris, les trompettes sonnans, & estoit le peuple ioyeux, de ce qu'ils auoient eu l'honneur.

1414. La paix faicte deuant Arras, feut confirmée à Paris à l'honneur du Roy. Et y eut abolition generale à tous, & de tous cas, excepté à cinq cents, qu'on debuoit bailler par escript. Et feut criée & publiée à grand ioye parmy la ville de Paris, & enuoiée par toutes les bones villes de ce Royaume. Tous les Seigneurs s'en allerent, excepté Monseigneur de Berry, lequel demeura en la compaignée du Roy, de la Royne, & de Monseigneur le Daulphin.

En ce temps, Pape Iean feut prins par l'Empereur, & par le Concile, & en effect fut desappoincté du Papat.

C'estoit grand pitié des exactions, qu'on faisoit lors, à cause des benefices, tât prelatures, graces expectatiues, que autres.

Le Comte d'Armaignac, en s'en retournant à son pays, passa par Murat, qui est vne belle place, & la preint, & bouta hors les vrais heritiers, & ausquels la place, & la terre, auoient esté adiugez par Arrest.

1415. L'an mille quatre cents & quinze, le gouuernement alloit tousiours aucunement mal, au regard des exactions d'argent sur le peuple, non distribué au profit de la chose publique.

Le Roy d'Angleterre, ne feut pas seulement contēt d'auoir enuoié Ambassade deuers le Roy, mais par deux fois luy escriuit bien gracieusement, qu'il luy voulust faire Iustice. Et de ce, le sommoit en paroles doulces & humbles, & il offroit à faire bonne & ferme paix, & concorde, & alliance, en ensuiuant les offres faictes par ses Ambassadeurs. Et quand le Roy, & son Conseil veirent la douce maniere d'escrire, ils conclurent qu'on enuoiéroit vers luy vne notable Ambassade. Et sçauoit on bien les preparatoires, qu'il faisoit pour descendre en France. Et y feurent enuoyez l'Archeuesque de Bourges, surnomé Bourretier, bien notable homme & bon clerc, ayant beau langage, l'Euesque de Lisieux, le Comte de Vendosme, le Baron d'Iury, & autres. Et arriuerent en Angleterre, le dixseptiesme iour de Iuin, & là feurent grandement & honorablement receus. Et le lendemain, qu'ils feurent arriuez, feurent menez deuant le Roy d'Angleterre, qui estoit bien grandement & honorablement accompagné de Princes, Prelats, & gens de Conseil. Et presenterent les lettres du Roy au Roy d'Angleterre, lequel les receut, & en les ouurant, les baïsa, & leut.

Lequel dit, qu'elles contenoient creance, & qu'ils dissent, ce 1415. qu'ils voudroient. Et lors l'Archeuesque de Bourges cōmença à parler, & print son theme, *Pax tibi, & domui tue.* 1. Reg. 19. Lequel il deduisit bien grandement & honnorablement, en exposant la bonne volonté du Roy, d'auoir paix, & alliance, & que de tout son pouuoir, il estoit prest d'y entendre, & de s'y employer, & auant laisser aller du sien. Et feit tant, & tellemēt, que le Roy d'Angleterre, & les assistans feurent trescontents. Mais le fort feut à traicter particulièrement, sur la matiere des demandes & requestes que faisoient les Anglois, & offres que faisoient les gens du Roy assez largement en Guyenne. Desquelles les Anglois, n'estoient pas contents, & disoient, & maintenoient qu'ils auoient droit és Duchez de Normandie, & de Guyenne, & és Comtez d'Anjou, de Poitou, du Maine, de Touraine, & de Ponthieu, voire auoient droit à la Couronne de France. Et pour abbreger, ne feurent aucunement contents des offres des François. Et appellerent, & inuocquerent Dieu, & tous les Saints de Paradis, & le ciel, & la terre, qu'ils se mettoient en leur debuoir. Et dit le Roy d'Angleterre, qu'il estoit vrai Roy de France, & qu'il conquerreroit le Royaume. Et lors l'Archeuesque de Bourges, luy dit, Sire, s'il ne vous desplaisoit, ie vous respondroie. Et lors luy feut dict par le Roy d'Angleterre, qu'il respondiſt hardiment, & dist ce qu'il voudroit, & que ia mal ne luy en viendroit. Parquoy sembla au dict Archeuesque, qu'il pouuoit parler seurement. Si luy dit tout plainement, Sire, le Roy de France, nostre souuerain Seigneur, est vrai Roy de France, ne és choses esquelles dictes auoir droit, n'avez aucune Seigneurie, non mie encores au Royaume d'Angleterre. Mais compete aux vrais heritiers du feu Roy Richard, ne avec vous, nostre souuerain Seigneur, ne pourroit seurement traicter. Desquelles paroles, le Roy Héry feut tant mal content que merueilles, & dit plusieurs haultes paroles biē orgueilleuses, & leur dit qu'ils s'en allassent, & qu'il les suiuroit de pres, & les feit conduire seurement. Et y eut aucuns des François, qui enquirent secretemēt, s'il y auoit aucunes alliances entre le Roy d'Angleterre, & le Duc de Bourgogne, & trouuerent que ouy, bien grandes & secretes.

Or s'en retournerent les Ambassadeurs de France, & feirēt leur Relation. En disant, comme l'armée des Anglois, auoit

1415. esté faicte, & presté, & estoit bien grande, & puissante. Et que sans faulte ils descendroient, & qu'il estoit necessité d'y remedier. Et escripuit le Roy de France au Roy d'Angleterre vnes lèstres en Latin, dont l'exposition s'ensuyt en François.

A treshault Prince, Charles nostre Cousin, & aduerfaire de France, Henry par la grace de Dieu Roy d'Angleterre, & de France, esprit de plus sain conseil, & à chascun rendre ce qui est sien.

Treshault Prince, nostre Cousin, & aduerfaire, les resplendissans Royaumes d'Angleterre, & de France, iadis venus & descendus d'un mesme ventre, & à present diuisez, auoient accoustumé le temps passé, eulx, & leur renommée esleuer en sauueraine haultesse, par leurs nobles triumphes & victoires. Et à eulx feut vne seule vertu, pour orner & embellir la Maison de Dieu, A laquelle appartient sainteté, & mestre paix es termes & fins de l'Eglise. Et par vn mesme escu accordé entre iceux Royaumes, subiuguer les publicques ennemis, par bien heureux contract ou marché. Mais las, ceste germaine foy, la mort fraternelle ha peruersti, si comme Loth persecuta Abraham, & par enuahissement inhumain, la gloire de l'amour fraternelle, est commise à sepulture. Et l'ancienne condition de l'humain lignaige, c'est à sçauoir dissention, mere de ire, & de riotes, est resuscitée des morts. Mais nous appellons en tesmoing de nostre conscience le souuerain Iuge, lequel ne fleschit point pour prieres, ne pour thresor, que nous auons fait procurer les moyens de paix, par la plus nette & pure amour de paix, que nous auons peu. Si nous n'eussions par l'esprit de mauuais Conseil, laissé aller le iuste tiltre de nostre heritaige, au preiudice de nostre posterité perpetuelle. Ne tel auenglement de pusillanimité ne nous tient, que nous ne vueillions de tout nostre pouuoir iusques à la mort combattre pour la Iustice. Mais pource que tout homme, qui va pour cōbatre quelconque Cité, il luy doibt premierement offrir la paix, comme l'auctorité de la Loy au Deuteronome l'ordonne. Et si par lōg temps & diuers siecles, violēce, romperesse de Iustice, ha soustraiēt les armes de nostre Couronne, & les droicts, & heritaiges d'icelle, pour le rencorporement & ramenement au premier estat desquels, charité ha fait pour nostre partie iusques icy, ce qu'elle ha peu, Nous pouuons par le default de Iustice

à nous deliè, courir au refuge de main armée. Neantmoins a- 1415.
fin que le tesmoing de nostre conscience, soit nostre gloire
maintenant, par peremptoire requisition, au passaige de nostre
chemin, auquel le dict default de Iustice, nous attraiët, vous en-
hortons par les entrailles de Iesus-Christ, & seulement à ce
que la perfection de l'Euangile exhorte, qui dit, Ami, Rends ce
que tu dois. Laquelle chose nous desirons à nous estre faicte
par le vouloir de Dieu. Et afin qu'il soit pardonné à l'effusion
du sang humain, qui selo Dieu est créé, vous priôs & requerôs
que restitutio deuë nous soit faicte de l'heritaige, & des droicts
à nous inhumainement soubstraiët, ou au moins de ceux
que par nos Ambassadeurs & messaigers auons plusieurs fois
demandez & requis, & desquels la souueraine reuerence de
Dieu le tout puissant, & le bien de paix seulemēt, nous en faicte
estre contents. Et nous de nostre part, en tant qu'il touche la
cause de mariage, serons contents de defalquer & rabbatre la
somme de cinquante mille escus, à nous dernièrement offer-
te, comme cultiueurs de paix que nous sommes, & non mie
remplis d'auarice. Et eslisons pour le meilleur, les droicts pa-
ternels, desquels la venerable ancienneté de nos progeniteurs
& parens, nous ont laissé Seigneurs, avec vostre tres noble fil-
le Catherine, nostre treschere Cousine, que multiplier les de-
testables tresors, avec auarice, idole de iniquité, plustost que
desheriter la perpetuelle Couronne de nostre Royaume, au
scrupule de nostre conscience, que Dieu ne vueille. Donné
soubz nostre priué Seel, en nostre chasteau de Hantonne, sur
la riue de la mer, le vingt-huictiesme iour de Iuillet.

Responſe du Roy de France, aux lectres du Roy d'An-
gleterre.

A tresbault Prince, Henry, nostre Cousin, & aduersaire
d'Angleterre, Charles, par la grace de Dieu, Roy de France,
Volonté de nul opprimer, ne entreprendre contre raison, le
bien de paix, aimé de Dieu, & de nature. Laquelle nous, à l'e-
xemple de nostre Saulueur Iesus-Christ, qui à ses disciples la
laissa, & donna en testament, auons tousiours requise & desi-
rée, par toutes les manieres qu'auons peu. Et icelle pour l'hon-
neur de Dieu, voulu moult grandement achepter, pour les
biens qui s'en ensuiuent, & pour euitier effusion de sang hu-
main, & innumerables inconueniens qui aduiennēt par guer-

1415. res. Comme ces choses, tenons à vous, vostre Cōseil, & autres, estre claires, & manifestes, Nous donnez occasion de grandement esmerueiller, & non sans cause, comme apres si grandes ouuertures, & autres choses pourparlées entre nos gens, & les vostres, à ferme intention de venir à paix, vous estes descēdu par hostilité à main armée en nostre Royaume, en rompant l'esperance de paix, à la tresgrand coulpe de vostre partie. Et pource que oncques nous ne feusmes refusans, ne serons si Dieu plaist, de rendre Iustice à vn chascun, qui nous en ha requis. Et qu'il loist à vn chascun Prince, mesmement en sa iuste querelle, soy defendre & repeller force par force. Attēdu que aucun de vos predecesseurs, n'eut oncques droict, & vous encores moins, de faire les demandes contenūes en certaines vos lettres, & responses à nous presentées par Chestre, vostre herault, ne de nous troubler. Est nostre intention à l'aide de nostre Seigneur, en qui nous auons singuliere fiance, par especial en nostre claire Iustice & defense, & aussi à l'aide de nos bons parens, amis, alliez, & subiets, vous resister, par maniere que ce sera à l'honneur & gloire de nous, & de nostre Royaume, & confusion, dommaige, & deshonneur de vous, & de vostre partie. Et quant au mariage, dont nous escripuez en la fin de vos lettres, Il ne semble point que ce que faictes requeste ou demande, par especial d'affinité ou mariage, par la voye que vous tenez, soit maniere conuenable, honorable, ne accoustumée en tel cas. Et pource ne vous en escripuons autre chose quant à present. Mais vous enuoions ces lettres, pour respōse à celles que escriptes nous auez par le dict Chestre. Donnē à Paris, le vingt quatriesme iour d'Aoust, l'an mille quatre cents & quinze.

Et tantost apres veindrent nouuelles, qu'ils estoient descendus vers Harfieu. Et y estoit le Roy d'Angleterre en personne, accompagné de ses freres, & d'autres Princes d'Angleterre, de six mille hommes d'armes, de trente à quarante mille archers, & d'autre peuple sans nombre, & d'autre grosse artillerie, bombardes, & canons, de gens eulx congnoissans en armes. Et estoit moult grande chose, des appareils qu'il auoit, & du grand couraige aussi. Dedans la ville de Harfieu, estoient Messire Lyonnet de Braquemont, les Seigneurs d'Estouteuille, & de Bacqueuille, & le Chastellain de Beauuais. Et depuis y

entrerent

entrerent le Seigneur de Gaucourt, & Mignet de Coutes, tous Seigneurs de haults & vaillants couraiges. Et le monstrerent, car ils feirent plusieurs saillies, où ils porterent aux Anglois moult grands dommaiges. Et y eut de grâdes armes faictes, & specialement és mines qu'auoient faict les Anglois.

En ce mesme temps, & mois, feut appoincté & ordonné par le Conseil du Roy, que Messire Charles d'Albret, Connestable de France, auroit en ceste guerre toute puissance, comme le Roy, à ordonner & disposer à sa plaine volonté, pour mander, & contremander, ce que bon luy sembleroit, & abbatre forteresses, & chasteaux, si mestier estoit. Et feut appoincté que tous les Seigneurs du sang seroient mandez. Mais on leur manderoit à chascun d'eux, qu'il enuoiaist cinq cents laces des meilleurs qu'ils eussent. Et feut enuoïé Messire Jean Pioche, cheualier, deuers le Duc de Bourgogne, & deuers le Comte de Neuers, le premier iour de Septembre, Et vn autre, deuers le Duc d'Orleans. Et Messire Boucicault, feut faict Capitaine de Normandie, & s'en alla à Roüen avec le Connestable, dont le Duc d'Alençon, feut moult dolent. Et Clignet de Brabant, feut faict Gouverneur de Picardie.

Les Anglois à leur venüe coururent par le pays de Caulx, & prindrent grand nôbre de bestail. Car le peuple cuidoit qu'ils deussent descendre ailleurs en la basse Normandie. Et prindrēt aussi plusieurs prisonniers, & les amenerent à leur Roy, lequel les prescha, en disant, qu'il scauoit bien comme ils auoient esté long temps en oppression & trauail. Et qu'il estoit venu en sa terre, en son pays, & en son Royaume, pour les meïtre en franchise & liberté, & en telle, que le Roy Saint Louys auoit tenu son peuple. Et leur cōmanda qu'ils labourassent. Neâtmoings apres les Anglois les traicterent à rançon, & leur faisoient moult de maux.

Enuiron le premier iour de Septembre, ceux de Harfieu, qui estoient en grand trauail, & peine, de veiller nuit & iour, & des assauls que leur donnoient les Anglois, qui leur auoient ia abbatu deux portes de la ville, & vn pan de mur, enuoierent deuers le Roy vn homme, qu'ils descendirent de nuit par dessus les murs, pour auoir secours. Et trouua le dict messaige Monseigneur de Guyenne à Saint Denys, le Mardy troisieme iour de Septēbre. Lequel estoit partile premier

1415. iour de Paris pour aller à Rouen. Et feit on aduancer les gens d'armes pour aller au secours.

La paix feut faicte entre le Comte de Foix, & le Comte d'Armagnac. Et feurent tous deux mandez, pour venir contre les Anglois.

En ce contemple, estoient à Paris les Ambassadeurs du Duc de Bourgongne, qui pourchassoient plainhe abolition des banis, & reparatiō de l'honneur du Duc de Bourgongne, sur les lettres contre luy données par le Roy l'an mille quatre cents quatorze, le vingtsseptiesme iour de Decembre, qui feurēt enuoiées à Constance au Concile de l'Eglise, & en plusieurs parties du monde. Par lesquelles lettres, le Roy declaroit le Duc de Bourgongne estre son ennemi, pour la mort de son frere, & la proposition de Maistre Jean Petit, auoir esté iustement condamnée à Paris par l'Euesque du dict lieu, & l'Inquisiteur de la foy. Et lors arriua à Paris Maistre Jean de Montleon, Armosnier du Duc de Bourgongne, qui apporta à la nation de Picardie, lettres de creance de son maistre, lequel exposa sa creance, & expliqua premierement la bonne affection que son dict maistre auoit à tenir la paix entre luy & les Seigneurs de France, laquelle il auoit desiré tousiours, & vouloit tenir de toute sa force, conseruer, & defendre, en exhortant icelle nation à tenir, & maintenir icelle paix, & obier à tous ceux qui la voudroient perturber. Secondement il dit, que son dict Seigneur auoit sceu que aucuns menteurs s'estoient efforcez de publier qu'il auoit fait alliances aux Anglois, & qu'il les auoit fait venir en France. Et de ce il l'excusa, en montrant la bonne volonté qu'il auoit tousiours au Roy, & à son fils, & au Royaume. Et qu'il estoit tout prest de venir au mandement du Roy, avec toute sa cōpaignée, pour combattre iceux Anglois. Tiercement, il exposa que aucuns ses malvueillans, auoient composé libelles diffamatoires, contenans les deffiances de l'Empereur, qu'il auoit naguieres enuoié à son dict maistre, en foy excusant qu'il n'auoit peu passer par Bourgongne, en allant deuers le Roy d'Arragon, & Pierre de la Lune. Mais en son retour il auoit intentiō de retourner par Bourgogne, & le veoir, & visiter. Quartement, exposa qu'aucuns de la secte de l'arsen, auoient diuulgué, que la proposition de Maistre Jean Petit auoit esté condamnée, & arse au Concile de Constance. Et

que ce, auoit esté pour occasion d'une proposition, forgée & 1415.
composée par Maistre Jean de Iarson, qui auoit esté là con-
damnée. Et monstra le dict Aumosnier, que ce n'auoit pas esté
la proposition de Maistre Jean Petit: mais la propositiō du dict
Iarson. Et que celle condamnation tournoit au grand diffame
du Royaume de France, pource qu'on ne trouuoit pas, qu'elle
eust esté confirmée par aucun, parquoy on publioit commu-
nément à Constance, que l'heresie de France estoit condam-
née. Parquoy le dict Aumosnier requeroit, que le dict Iarson
Chancelier feust desaduoué, & reuocqué de son Ambassade.
Et que icelle Nation allast deuers Monseigneur de Guyēne, &
qu'elle monstrast l'iniure faite au Royaume de France, par la
dicte publicatiō. Et le requérir, qu'il voulust pourueoir & res-
crire au dict Cōcile, & que le Royaume de France, ne feust au-
cunemēt en ce vituperé, lequel par la grace de Dieu, ne le feut
oncques, & ainsi l'oſtroya, & le feit Monseigneur de Guyēne.

*Sequens Cedula missa fuit à Constantia per Magistrum Iohannem de Iarsonno,
Parisius, contra Ducem Burgundie, & eius fautores, mense Augusto,
Anno M. CCCC. XV.*

*Præstans scienter impedimentum, commissiue, vel omissiue, consilio, vel au-
xilio, ne Dux Burgundie recognoscat publicè, & absolue, quodd peccauit in fide,
& bonis moribus, iustificando, aut iustificari faciendo notoriè, & scandalosè in-
terfectionem Ludolphi quondam Ducis Aurelianensis, & circumstantiam necis
illius, omnis talis est inimicus dicti Ducis Burgundie, & salutis sue, & peccat
adeò taliter, quod si n hoc sit pertinax, condemnandus est vt fautor hereticæ
prauitatis. Pediturus est insuper rationem de omnibus damnis, tam spirituali-
bus, quam temporalibus, inde prouenientibus, vel futuris. Recogitet idcirco qui-
libet siue Doctor, siue Prelatus, aut alius, quemadmodum dissimulauit in hac
materia, vel dissimulabit, fauore, timore, vel negligentia, pro ut quilibet scit,
aut scire debet, qualiter obligatur ad correctionem fraternam, vel doctrinalem,
aut iudicalem, præcipue summus Pontifex cum sacro Cardinalium Collegio, aut
etiam generali Concilio. Atteno, quod euidentia patrati sceleris, clamore non
indiget accusantis. Denique talis, qualis prædictus, est censendus impedi-
tor pacis, & boni tractatus in hac parte, quoniam circa hunc errorem versa-
tur principalis ratio debati scilicet belli in Franciæ Regno.*

Le Roy d'Angleterre, faisoit de grandes diligences, & mon-
stroit bien qu'il estoit de hault couraige, & y eut plusieurs as-

1415. faulx faicts, lesquels ne proffiterent guieres aux Anglois. Car ceux de dedans, se defendoient fort, & auoient bonne volonte de eulx tenir. Mais leurs viures appetissoient fort, & qui pis estoit, de la peine qu'ils auoient eulx, & leurs gens, la plus grand part estoient malades, & si veint vne mortalité. Et feirent vn Traicté, que au cas que dedans le dix-huictiesme iour de Septembre, ils n'auoient secours, qu'ils rendroient la place, saulues leurs vies, & n'eurent aucun secours. Et de la maniere de la prinse de la place, & de la reddition d'icelle, & de ceux qui estoient dedans, on en disoit en diuerses manieres. Car les aucuns disent ce que dict est, C'est à sçauoir, qu'ils se rendirent saulues leurs vies, & entendoient la plus grãd partie, qu'ils s'en iroient saulues leurs vies, vn baston en leur main, où ils voudroient. Ce qui ne feut pas faict. Mais feurent prins, & mis à finance, & les aucuns menez en Angleterre. Et que cōbien qu'il feust ouuert que s'ils n'auoient secours dedas le dict iour, qu'ils se rendroient, & s'en iroient saulues leurs vies, qu'il n'y eut oncques promesses faictes ne d'un costé, ne d'autre, ne ostaiges baillez, & que ce n'estoient que paroles narratiues, & non dispositiues, ne effectuelles. Et que le Roy, & Monseigneur de Guyenne, s'estoient partis de Paris, & venus à Roüen. Et de ce, feurent aduertis ceux de dedas, lesquels cuidas auoir secours, firent des saillies, & y eut des armes faictes de costé & d'autre. Et ainsi ceste forme de Traicté cessa. Les autres dient, que le Roy d'Angleterre, voyant la ville fort abbatüe, delibera de l'assaillir. Et de faict, il y feit liurer vn gros & merueilleux assault, du costé où estoient les Seigneurs de Gaucourt, & de Touthuille, & dura plus de trois heures. Lesquels vaillamment & leurs gens se defendirēt, & y eut des Anglois plusieurs morts, & aucuns biē bleſsez. Et durāt le dict assault, vne autre partie des Anglois, estoit deuers vne autre porte, laquelle par aucunes mauuaises gēs feut ouuerte, & entrerēt dedas. Et ainsi les dictz vaillants François, qui estoient dedans, feurent prins par leurs ennemis. Et y en auoit plusieurs des François biē malades, lesquels le Roy d'Angleterre voulut & ordōna qu'on les laissast aller sur leur foy, & les aucuns simplement, & moururēt la plus grãd partie, quād ils feurent hors. Aucuns qui sçauoient la façon de la redditiō de la ville, & de ce qui feut faict, diēt que enuiron le quinziesme iour du dict mois de Septēbre, le Seigneur de Bacqueuille, & autres en sa cōpagnée, furēt enuoyez de ceux de Har-

fleu, qui encores estoient assiegez, par deuers le Roy à Mante, 1415.
 pour auoir secours, & par deuers Mōseigneur de Guyenne, qui
 estoit à Vernō, & ne firēt rien. Car les gēs d'armes de Frāce n'e-
 stoiet pas assez forts, pour leuer le siege. Et pource cōuint à ceux
 de Harfieu, faire traité aux Anglois, que s'ils n'auoiēt secours
 dedās le Dimāche 22. iour de Septēbre dessus dit, heure de mi-
 dy, ils rendroiet la ville, & leurs corps, à la volōté du Roy d'An-
 gleterre. Et pource qu'ils ne pouuoiet auoir aucū secours, ils rē-
 dirēt la ville iceluy Dimāche. Mais vrai fut, que la sepmaine de
 deuāt, vn cheualier, nōmé Gaucourt, & aucuns autres avec luy,
 furēt deux ou trois fois parlemēter aux Anglois. Et tāt ils parle-
 menterent, que la dernière fois, à leur retour, ils dirent au Sei-
 gneur de Touthuille, & autres qui estoiet dedās, qu'ils auoient
 accordé de bailler ostaiges, de rēdre la ville à certain iour, s'ils
 n'auoiēt secours dedās ce iour. Disant le dit Gaucourt, que luy,
 ne les siens, iamais ne s'armeroiēt pour tenir la ville. Pourquoi
 ledit Seigneur de Touthuille, & les autres, voyās qu'ils ne pou-
 uoiēt pas resister, souffrirēt ce qu'ils voulurēt faire. Toutesfois
 combiē qu'ō eust assez publié en Frāce, que la ville estoit toute
 froissée, & cassée d'engins, & que les murs de la ville estoiet rā-
 sez, & pareillemēt les maisons, & qu'ils auoiēt faulte de viures,
 & que tous ceux qui estoient dedans, estoient si fōrt trauaillez,
 batus, & blesez de canōs, & de traité, que plus n'en pouuoient,
 & tellement qu'ils ne se pouuoiet plus tenir, de tout ce n'estoit
 riens. Car il y auoit aussi bon marché de tous biens, comme de-
 uant le siege, & se feussent longuemēt tenus, qui eust bien vou-
 lu. Mais ainsi fut faite la besongne, que à certain iour, l'Eues-
 que de Noruic, entra dedans la dicte ville de Harfieu, vestu
 en Pontificat, & en sa compaignie, auoir trente deux Chappel-
 lains, vestus de surplis, d'aulmusses, & de chappes. Et estoient
 les dictes chappes, toutes de soye, & d'une mesme couleur, &
 y auoit trente deux escuiers, tous vestus d'une liurée; & de-
 uant chascun Chappellain, auoit vn d'iceux escuiers, portant
 vne torche allumée. Et print iceluy Euesque le serment des
 ostaiges que ceux de la ville debuoiēt bailler, pour rendre la
 ville au dict iour. Et disoient les Anglois aux bonnes gens de
 Harfieu, N'ayez peur, ne vous doubtez, on ne vous fera mal,
 nostre Seigneur le Roy d'Angleterre, ne veut pas gaster son
 pays. On ne vous fera pas comme on fit à Soissons, nous som-
 mes bons Chrestiens. Et lesdits sermens prins, ils s'en partirent.

1415. Et pource qu'ils n'eurent point de secours, le Dimanche dessus dit, à l'heure prinse, ceux qui debuoiert liurer la ville, ne voulurent pas ouurir aucunes portes de la ville, pour y mettre les ennemis. Mais les firent monter par dessus les murs, à échelles, A fin que le commun, qui riens ne scauoit qu'elle deust estre liurée à celle heure, ne s'esmeust. Et quand ils en eurent mis dedans enuiron cinq cents, ils ouurirent vne porte, & y entrèrent aucuns Capitaines avec le dict Eueque, & se logerent là. Et ordonnerent l'estat, & les logis de tous les Seigneurs, & disoient aux bonnes gens de la ville, qu'ils ne se effrayassent riens, comme dessus est dict, & qu'ils estoient bons Chrétiens.

Le Lundy, l'un des freres du Roy y entra en grande pompe, & fait mener tous les hommes, qui ne luy voulurent faire serment de feaulté, en Angleterre. Et alla de hostel en hostel, monté sur vn petit cheual, commandant que tout luy feust reuelé, & baillé par declaration ce qu'on trouueroit, sur peine de la hart. Aussi il ne demanda rien à tout homme, qui ne feut point trouué armé. Et donna congé à tous les hommes d'Eglise, & à toutes les femmes, de eulx en aller vestus de leurs meilleures robbes, & ce qu'ils pourroient emporter, sans fardeler. Et feut defendu, que les gens d'Eglise ne feussent point chercher, ne les femmes au sein, ne en la teste. Et en partit plus de mille & cinq cents femmes. Et quand ils furent hors de la ville, vers Saint Aubin, ou pres de là, on leur porta du pain, du vin, & des fourmaiges, & beut, qui voulut boire. Et les conuoierent les Anglois iusques à Lillebonne. Et à Lillebonne estoit le Mareschal Boucicault, qui les fait loger, & donner à boire, & à menger, & le lendemain les fait mener à Roiten par eaüe. On disoit lors, que la ville auoit esté vendue & trahie, & aussi tout le pays. Et disoit-on que la sepmaine de deuant l'accord, feut le Connestable de France, avec plusieurs autres, entre lesquels estoit le bastart de Bourbon, qui s'estoit mis sur les champs à grand compaignée, pour aller sur les Anglois. Et quand ils furent pres de Harfleu, ils rencontrèrent grande compaignée d'Anglois, entre lesquels estoit le Connestable d'Angleterre. Et eurent les François grand ioye de celle rencontre, & leur voulurent courir sus. Mais le Connestable de France, fait sonner la retraite, & s'en retourna honteusement,

dont plusieurs feurent mal contents. La sepmaine & dés le 1415. Mardy, deuant, qu'elle feust rendüe, feut ordonné, que le Ieudy d'icelle sepmaine, on feroit faire par toutes les Eglises de la ville de Paris, chanter messes du saint Esprit, & de nostre Dame, que Dieu voulust aider à nos gés, & sauluer icelle ville, & que nos gens, & l'aide de ceux de Rouen, debuoiert aucun des trois iours, ou le Ieudy, ou le Vêdredy, ou le Sabmedy, faire aucune bonne besongne, pour secourir Harfieu. Et pource feut ordonné que iceluy Vendredy, & Sabmedy, voire le Dimanche ensuiuant, on feroit processions. Ce qui feut fait bien solennellement à chapes, & reliques, le plus honnorablement qu'on peut. Et iceluy Dimanche, elle feut reduicte en la maniere que dict est. Quand le Roy, qui estoit à Mante, en ouit la nouvelle, laquelle il sceut le plus tard qu'on peut, (Car à Paris l'un disoit, il est rendu, & l'autre disoit non, par plus de huit iours entiers,) il'en feut moult dolent. Et descendit à Vernon, le Lundy, septiesme iour d'Octobre, & le Sabmedy ensuiuant, il feut à Rouen, & Monseigneur de Guyenne.

Celle sepmaine adueint, que vn nommé Colin, seigneur du boisseau, à la porte du Temple, lequel estoit dehors, pource qu'il estoit des bannis, escripuit à sa femme à Paris, que elle veinst à luy, le vingtiesme iour d'Octobre, en certaine ville nommée es lectres, & qu'elle luy feist finance de vingt escus, & que en ce iour le Duc de Bourgogne seroit en ces parties là, pour venir deuers le Roy, en très-grande compaignée. La femme, qui estoit parente d'Alexandre le Boursier, bourgeois de Paris, luy porta icelles lectres, en luy priant qu'il luy voulust prester la dicte somme, & retenir les lectres, lesquelles il monstra comme on dict, à plusieurs personnes. Et pour celle cause comme on disoit, feurent changez celle sepmaine les Preuost des Marchands, & Escheuins, & faits nouveau Preuost des Marchands & Escheuins, & les portes de Paris, murées, qui moult de fois l'auoient esté. Et disoit-on communément, que c'estoit contre le Duc de Bourgogne, afin qu'il n'entrast à Paris.

Icelle sepmaine, le Roy d'Angleterre laissa grosse garnison à Harfieu, & s'en alla en l'Abbaye de Fescamp, en laquelle auoit gens d'armes en garnison, qui auoient ars la ville, & les habitans s'en estoient allez pour la plus grand partie, & les au-

1415. tres estoiet en l'Abbaye, retraicts pour leurs biés qu'ils auoiet. Et estoient logez leurs cheuaux iusques au grand autel de l'Eglise, & par toutes les chappelles, sans honneur, & reuerence porter à l'Eglise par iceux gens d'armes. Lesquels, comme on disoit, auoient rompu les coffres des bonnes gens, & emporté les biens, & tiré les femmes hors de l'Eglise, & là les violé à force. Et passa outre, & s'en veint à Dieppe.

En icelle sepmaine, le Duc de Bourgongne, enuoia lettres au Roy, dont la teneur s'ensuyt,

Mon tres-redoubté Seigneur, Pour la conseruation de vostre Seigneurie, & Couronne de France, dont vous estes Seigneur souuerain, (que Dieu par sa sainte pitié, vueille mestre & maintenir en si vertueuse prosperité, comme elle feut oncques,) entre les autres Estats & biens qui y sont, l'Estat des Nobles y est, qui tous sont tenus & obligez tant par serment, que autrement, de vous loyaulment seruir, sans espargner leurs corps, ne cheuâces. Auquel Estat, sont Ducs, Comtes, Barons, & autres de grande vertu, qui tous chascun endroict soy sont tenus de garder leur fidelité enuers vous, & vostre dicte Seigneurie, comme à leur souuerain Seigneur. Et de tât plus, que l'un du dit Estat, est plus prochain de lignaige, & tenât de vous plusieurs notables Seigneuries, de tant est-il plus astrainct, de plus loyaulment seruir, & auoir l'œil à la conseruation & augmentation de vostre Estat. Et croy que bon iugement dicteroit, que à vous faire le dict seruice, nul ne deburoit en cas de necessité, & de eminent peril, attēdre d'estre mandé. Mais deburoit chascun des dessus dictz, s'en aduançer le plus diligement qu'il pourroit, pour obuier aux perils, qui y peuuent aduenir par lōgue demeure en temps de guerre, posé ores, qu'il y eust defense au contraire. Ainsi le feirent certains estrangers d'une Cité, comme il est trouués Histories antiques. Car jacoit qu'on leur eust defēdu sur peine de la mort, qu'ils ne montassent sur les murs de la Cité, neantmoings quand ils veirent que la Cité se perdoit, s'ils ne mectoient la main à la besongne, ils monterent sur les murs, en venant contre la defense à eulx faite, & sauluerent la Cité, dont ils feurent moult grandement loiez. Et en la sainte Escripiture aussi, au liure des Roys, est recité en la louēge d'un, qui s'appelloit Ethey, que le Roy David, quand Absalon son fils, s'ellēua contre luy, commanda

au dict

au dict Ethey, qu'il s'en allast de sa compaignée, & remmenast avec luy ses freres, pource qu'il estoit estranger, Et luy dit, Auiourd'huy tu es venu, & demain seras contrainct de departir de nous. Et lors le dict Ethey iura à Dieu, que en quelque lieu que seroit le Roy Dauid, il seroit son seruiteur. Dont le dict Ethey, en venant contre la defense du dict Roy Dauid, n'est aucunement blasme en la dicte sainte Escripiture, mais prisé & honoré, & reputé homme de bonne foy. Puis que le dict Ethey, qui estoit estranger, est prisé & loué, destre venu contre la defense du dict Roy, par plus forte raison, celuy qui est parent & subiet du Roy, en allant en vostre seruice, contre vostre defense, ne deburoit estre reprins, ne blasme, mais prisé & honoré. Et qui en tel cas, veut passer le temps par dissimulation, ie ne fais point de doubte, qu'il n'en acquiere blasme, & des-honneur, & qu'il ne face contre bonne Loy. Chascun veoid bien, que selon l'enseignement de nature, qui procede selon l'Ordonnance diuine, si le chef d'aucun corps humain est assailli, pour estre blessé & greué de son aduersaire, tantost les membres du dit corps se drescent, & meitent au deuant, pour la defense & garde de leur chef. Et tant qu'ils sont plus prochains de leur chef, se exposent-ils plus prestement. Et aussi ne fais-je point de doubte, que si vous laissez d'appeller les dicts Ducs & Comtes, ou autres vos prochains, que ce ne redonde à leur charge, telle qu'il semble, qu'il ne se doibt fier en eulx.

Or est-il ainsi, mon tres-redoubté Seigneur, qu'il est venu à ma congnoissance, que par vos lettres patentes, données le vingt troisieme iour d'Aoust dernièrement, vous auez signifié à vos Baillifs, & Seneschaux, que vostre aduersaire, d'Angleterre est descendu en vostre Royaume, à toute puissance de gens d'armes, & de traict, & de tous autres habillemens de guerre, & ha mis le siege de toutes parts deuant & alencontre de vostre ville de Harfieu, qui est chef du pays de Normendie, & en laquelle ha port de mer. Et que pour resister à l'entreprise de vostre dict aduersaire, preseruer, garder, & defendre vostre dict Royaume, & sujets, vous auez enuoïé à vostre dit pais de Normendie, ou ailleurs, quelque part que sera vostre dict aduersaire, mon tres-redoubté Seigneur, & fils, Monseigneur de Guyène, vostre aîné fils, Dauphin de Vienne, côme vostre

B b b

1415. Lieutenant, & Capitaine general, à toute la puissance. En mandant à vos dicts Baillifs, & Seneschaux, ou à leurs Lieutenans, qu'ils feissent de par vous commandement, tant par cris, & publications, en tous les lieux accoustumez à faire cris, en leurs Baillages, Seneschauffées, & ressort d'iceux, comme autrement, à tous les nobles, & gens qui ont puissance de eulx armer, demeurans és metes de leurs Iurisdicções, & ressorts, qu'ils voissent, toutes excusations cessans, en leurs personnes, le mieux accompagnez de gens d'armes, tant qu'ils pourront, montez & armez suffisamment, par deuers mon tres-redoubté Seigneur, & fils, vostre aîné fils Monseigneur de Guyenne, à Roüen, ou ailleurs, quelque part qu'il sera, le plus hastiue-ment qu'ils pourront.

Et toutesfois, mon tres-cher Seigneur, cōbien que ie soye vostre tres-humble prochain parent, vassal, subiet, Cheualier, Baron, Comte, Duc, & deux fois Per de France, & non pas seulement Per de France, mais Doyen des Pers, qui est la premiere prerogatiue, noblesse, & Dignité, qui à cause de Seigneurie soit en ce Royaume apres la Couronne. Et en outre, m'ayez tant faict d'honneur, que ie suis pere en loy de mariage de mon dict tres-redoubté Seigneur, & fils, mon dict Seigneur le Duc de Guyenne, vostre aîné fils, & heritier vniuersel, à cause qu'il ha espousé mon aînée fille, & aussi de Madame Michelle, vostre fille, à cause du mariage celebré entre elle, & mon fils vnicque & heritier vniuersel, lesquelles choses me rendent autant, & plus obligé à vous, & à vostre Royaume, que subiect que vous ayez. Neantmoins vous ne m'avez rien mandé en ceste parrie. Excepté depuis vn peu, que m'avez mandé par Messire Jean Pioche, cheualier, & Maistre d'Hostel de mon dict Seigneur & fils, que ie vous enuoye cinq cents hommes d'armes, & trois cents de trait. Et que vous ne voulez pas que i'y voise en persōne, & aussi beau cousin d'Orleans: pource que la paix par vous faicte entre nous, est encores bien nouuelle. Et par ainsi on me tresmue mon premier Estat en Parrie, dont s'ensuit diminution de mon auctorité. Et me veult-on soubz couleur bien legere, priuer du seruice que ie doibs, & suis obligé de faire, sur la peine de mon honneur, qui me lie, & que ie veux garder plus que chose terrienne. Et en outre il semble, que l'on ne doit auoir fiance en moy. La-

quelle chose m'est, & doibt estre griefue, & desplaissante, tant pour les obligations dessus dictes, que aussi par le temps passé ie me suis employé le plus loyaulment que j'ai peu, en vostre seruice, accompagné de nobles, cheualiers, & escuiers, qui ont cōgneu & congnoissent ma bonne intention, & ne vous vouldroie faire aucune faulte, & dont aussi, la Dieu grace, vous pouuez estre bien & loyaulment serui soubz ma compaignée. Ce nonobstant mon tres-redoubté Seigneur, ie plains les dommaiges que l'on vous porte, & à vostre Royaume, ie plains la petite resistance qui y est mise, ie plains le grand inconuenient qui est taillé d'en ensuiuir, si bon remede n'y est mis. Et aussi ie considere l'estat en quoy ie suis soubz vostre Souueraineté, qui est moult grand & honorable, comme dict est. Je considere en outre, que ie veux, & doibs aussi bien garder paix nouuelle, comme si elle estoit ançienne de cent ans, & plus. Et que de tant plus, qu'elle est fresche & nouuelle, de tant plus doibt auoir chascun bonne memoire de la bien garder, & seroit plus grand faulte de l'enfreindre. Et ne doibt-on point imaginer que mon dict beau cousin d'Orleans, ne moy, ne autre quelconque, voulussions faire si grand faulte enuers Dieu, enuers vostre Majesté, & enuers vostre Royaume, à la confusion, & desolation de nous mesmes, qui par vostre felicité sommes en voye de toute prosperité, & par vostre aduersité, sommes du tout abbaissez & descheus. Et doibt auoir ce regard toute bonne Imagination, que en tel temps, qui est si perilleux, vers vous & vers vostre Royaume, supposé que aucune paix ne feust entre vos subiets, on deuroit pour loyaument faire son debuoir enuers vous, & euitier le péché de felonnie, faire abstinence de guerre, & venir d'un commun accord à la soustenance & defense de vous, & de vostre dict Royaume. Et quant est de moy, ie tiens que ainsi le ferions nous, si nous estions en tels termes, ce que nous sommes la Dieu mercy, & vostre bonne ordonnance. Et en outre, ne fault point doubter, veu la grande entreprinse faite contre vous, que la dicte prouision ne soit trop petite que vous me demandez. Et tout ce considéré, chascun peut assez sçauoir, que ie ne doibs pas laisser perdre ce Royaume: mais doibs employer ma loyauté, sans auoir regard à ce qu'aucuns vous pourroient dire au contraire. Et pource mon

1415. tres-redoubté Seigneur, ie vous escriis presentemēt, vous suppliant tres-humblement que à ce que dict est, vous plaise aduiser, & considerer au bien & honneur de vous & de vostre Royaume, & aussi de moy, qui n'ai pas intention de laisser perdre vostre Seigneurie, là où ie pourrai loyaulment employer mon seruice. Et sur ce mon tres-redoubté Seigneur, vous plaise à moy enuoyer responce par le porteur de cestes, & par vos bonnes & gracieuses leſtres. Car par vertu des obligations dessus dictes, ie suis contrainct & obligé au salut de vous, & de vostre Royaume, dont le mien Estat despend. Et ie tiens que les autres nobles de vostre Royaume, feront ce qui leur appartient. Quant est de moy, au plaisir de Dieu, ie ne laisserai point tousiours à faire mon debuoir, en gardant la profession de mon Doyenné des Pers, à la fin desirée & glorieuse que vous demandez alencontre de vostre aduersaire. Tesmoing le tout puissant, lequel mon tres-redoubté Seigneur, ie prie que il vous ait en sa sainte garde, & vous doint bonne vie & longue, en toute vnité & bonne paix. Escrypt à Argilly, le vingt-quatriesme iour de Septembre, mille quatre cents & quinze.

Enfuyt la coppie des leſtres Royaulx en double queüe, que le Sire de Moreuil, cheualier, & Maistre Iean de Vailly, President en Parlement, Ambassadeurs du Roy, & de Monseigneur de Guyenne, ont apporté à Monseigneur le Duc de Bourgogne, pour la reparation de son honneur.

Charles par la grace de Dieu Roy de France, A tous ceux qui ces presentes leſtres verrōt, Salut. Comme pour plusieurs considerations, nous nous feussions traictés à grande assemblée de gens d'armes deuant la ville d'Arras. Et illec par deuant nous feussent venus de par nostre tres-cher & tres-ame cousin, le Duc de Bourgogne, en grande reuerence, & humilité, nos tres-chers & tres-amez cousin & cousine, le Duc de Brabant, la Comtesse de Hainault, & nos bien-amez les deputez de par les trois Estats du pays de Flandres, ayans procuracion & puissance de nostre dict cousin de Bourgogne. Et nous exposèrent les excusations, & aussi les grande & entiere affection & volonté qu'il auoit enuers nous,

& nous feirent telle obeissance, que en feusmes contents. Et 1415. deslors eussions nostre dict cousin receu en nostre bonne amour & bonne grace. Et avec ce, ayons ordonné estre paix entre tous nos subiets. Laquelle paix iceluy nostre cousin de Bourgongne, ha solemnellement sur la vraye croix, & saincts Euangiles de Dieu iuré, & de ce baillé ses lectres patêtes, seellées de son grand seel. Sçauoir faisons, que iceluy nostre dict cousin de Bourgongne, nous voulons & reputons, & voulons estre tenu, & réputé par tout pour nostre bon & loyal parent, vassal, subiect, & bien vueillant. Nonobstant quelscôques nos lectres, que ayons fait publier au contraire, lesquelles nous ne voulons estre d'aucun effect cõtre la teneur de ces presentes, ne preiudicier à icelles. Et defendons à tous nos subiets quelsconques par ces presentes, sur peine d'encourir nostre indignatiõ, que pour occasiõ de nos dictes lectres, par paroles, predications, sermons, ne autrement, ils ne dient, ne fassent aucune chose à la charge, ou deshonneur de nostre dict cousin de Bourgongne, en quelque maniere que ce soit. Si donnons en mandement à nos amez & feaux Conseillers, les gens tenans & qui tiendront nostre Parlement à Paris, au Preuost de Paris, & à tous nos Seneschaux, Baillifs, Preuosts, & autres nos Iusticiers, & Officiers quelsconques, & leurs Lieutenans, & à chascun d'eulx, si comme à luy appartiendra, que cõtre ce que dict est, ils ne fassent, ou souffrent aucune chose estre faite. En punissant chascun endroiẽt soy les transgresseurs de telle punition selonc le meffait, que ce soit exemple à tous autres de eulx en garder. Et en outre fassent publier ces presentes par tout où il appartiẽdra. Au vidimus desquelles, fait soubz seel Royal & autentique, nous voulons soy estre adioustée cõme à ce presẽt original. En tesmoing de ce, nous auõs fait meẽtre nostre seel à ces presẽtes. Donné à Paris le dernier iour d'Aoust, l'an de grace mille quatre cẽts & quinze, & de nostre Regne, le trente cinquiẽme. Ainsi signé par le Roy, à la relation du grãd Conseil, tenu par Monseigneur de Guyenne. Mauregard.

Lectres sur l'Abolitiõ, apportées à Monseigneur de Bourgongne, par les dicts Ambassadeurs.

Charles, &c. A tous ceulx, &c. Salut, Comme nous ayons

Bbb iij

1415. pitié & compassion des grandes oppressions, pertes, & dom-
 maiges, que nostre peuple ha eu & soustenu au temps passé, à
 l'occasion des guerres & armées faictes en nostre Royaume,
 voulans nos subiets garder, releuer, & preferuer d'icelles op-
 pressions. Et pour autres causes & considerations à ce nous
 mouuans, ayons faict, voulu, ordonné, & commandé paix fer-
 me & stable en nostre Royaume, & entre nos subiets. Et auec
 ce, ayons faict & ordonné certaine abolition de ce qui ha esté
 faict depuis la paix de Pontoise, De laquelle feurent exceptées
 cinq cents personnes, lesquelles debuoient estre nommées de-
 dans la feste de Saint Iean Baptiste, dernièrement passée. Ex-
 ceptez aussi ceux, qui par nostre Iustice auoient esté bannis de-
 puis le temps dessus dict. Eussions en outre voulu, que ceux
 qui auoient esté eslongnez de nostre ville de Paris, & des au-
 tres villes de nostre Royaume, ou qui de leurs volonteiz s'es-
 toient absentez de leurs demeurances par suspicion, demeu-
 rassent eslongnez & absentez hors de nostre ville de Paris, &
 des autres villes & lieux, dont ils auoient esté eslongnez ius-
 ques à deux ans. Sçauoir faisons que pour consideration de ce
 que dict est, & autres causes & considerations à ce nous mou-
 uans, voulans estendre nostre liberalité, au faict de la dicté A-
 bolition, Auons voulu, ordonné, & octroyé, voulons, ordon-
 nons, & octroyons de nostre plaine auctorité & puissance
 Royale par ces presentes, que les cinq cents personnes eslon-
 gnez & bannis, soient comprins en la dicté Abolition, & que
 d'icelle ils iouyssent & vsent, comme s'ils n'eussent aucune-
 ment esté exceptez de la dicté Abolition. Exceptez toutesfois
 Helyon de Iacqueuille, & Robinet de Mailly, cheualiers, Mai-
 stre Iean de Troyes, Maistre Henry de Troyes, Iean Parét, Sy-
 mon Caboche, Deniset de Chaumont, Maistre Laurens Ca-
 lot, Thomas le Goix, Iean le Goix, Guillaume le Goix, Colin
 de la Vallée, Ieā Bouyn, Maistre Guillaume Barault, & sa fem-
 me, Iean Paumier, Maistre Felix du Bois, Maistre Iean Ra-
 piout, Maistre Toussains Barat, Guillaume Goute, Ieā du bois
 auron, Iean Errault, Iean Bourdon, dit Rousselet, battellier,
 Guillaume Baillet, Dauid du Conseil, Antoine de Forest, Mai-
 stre Nicole du Quesnoy, Iacques de Sarcy, Iean Maille, Or-
 febure, Iean de Rouen, fils de la trippiere du puis nostre Da-
 me de Paris, Iean Maillart, Iean Tillart, Procureur en Chastel-

Iet, Jean de Saintyon, boucher, Jean le Fort, Thomas le Sueur, 1415.
 Preuost de Saint Denys, Jacques le Sueur, François Lorfene,
 chaufferier, Mahiet Boileau, poissonnier, Jeá de Poligny, dict
 Chastelain, Colin le mauuais, Jean Paste, Jean le Coq, Jean le
 Clerc, dict, petit Preuost, Thomas Quillet, & Maistre Jacques
 Cadot, Lesquels pour consideratió de plusieurs excès par eulx
 commis, & perpetrez au desplaisir de nous, de nostre tresche-
 re & tresamée compaignie la Royne, & de nostre trescher, &
 tresamé fils, le Duc de Guyenne, Daulphin de Viennois, nous
 ne voulons estre comprins en icelle Abolition. En tesmoing
 de ce, nous auons fait mettre nostre seal à ces presentes. Dóné
 à Paris, le dernier iour d'Aoust, l'an de grace mille quatre
 cents & quinze. Mauregart.

Responſes faites par le Duc de Bourgongne, aux Requestes
 des dessus dicts Ambassadeurs, au mois de Septembre
 l'an mille quatre cents & quinze.

Premier Article d'icelles Requestes, contenant au premier
 point que Monseigneur de Bourgongne se deportte des pro-
 testations qu'il feist, en faisant le serment de la paix, le penul-
 tiesme iour de Iuillet, dernier passé. Respond mon dict Sei-
 gneur de Bourgongne, que pour complaire & obeir au Roy,
 & à Monseigneur de Guyenne, & pour la grande affectiõ qu'il
 ha d'entretenir la paix, pour le bien du Roy, & du Royaume,
 Il se deportte des dictes protestations. Combiẽ que son inten-
 tion est, de requerer, & supplier au Roy, & à mon dict Seigneur
 de Guyenne, que les reseruez & exceptez en l'Abolition der-
 nièrement faite par le Roy, (De laquelle il luy ha enuoié ses
 lettres patentes par ses Ambassadeurs dessus dictes,) soient com-
 prins en icelle; ou au moins iouysſent d'icelle.

Item, Au second point contenu audict Article des dictes
 Requestes, contenant que des lettres du dict serment fait par
 mon dict Seigneur de Bourgongne, soit ostée la modification
 contenue en la fin d'icelles lettres, qui se commence, *Pournen
 que semblable serment fagent, &c.* & que les dictes lettres soient pu-
 res & absolues. Respond mon dict Seigneur de Bourgongne,
 qu'il veult, & consent les dictes lettres estre pures & absolues,
 au regard de ceux qui tiendront la paix. Et quant aux autres, &

1415. aucuns en y auoit , qui ne teinsent la dicte paix, mon dict Seigneur de Bourgongne, ne veult ne entend point, que son dict serment le lie, au regard d'iceulx.

Item, Au tiers poinct contenu au dict Article, contenant que semblable serment fassent les Officiers & principaux Conseillers de mon dict Seigneur de Bourgongne, estans deuers luy. Respond mon dict Seigneur de Bourgongne, qu'il luy plaist bien.

Item, Al' Article des dictes lettres contenant, que c'est l'intention du Roy, & de mon dict Seigneur de Guyenne, que le Roy de Sicile soit compris en la dicte paix &c. Et que pour quelque chose faicte au temps passé, mon dict Seigneur de Bourgongne, ne luy face aucun destourbier ou empeschement &c. En luy offrant par le Roy, que s'il deult aucune chose du dict Roy de Sicile, que le Roy, & Monseigneur de Guyenne, luy en feront faire raison. Respond mon dict Seigneur de Bourgongne, qu'il ha bien cause de soy douloir du dict Roy de Sicile, pource que sans cause raisonnable, il luy renuoya sa fille, &c. Et à la grand charge de l'honneur de mon dict Seigneur de Bourgongne, & de tout son lignaige. Et que aussi le Roy de Sicile retient grande somme de deniers, que mô dict Seigneur de Bourgongne luy auoit payé pour sa dicte fille, avec ioyaux, vaisselle, & autres choses. Et aussi se deult pour deux autres causes, à declarer quand temps fera. Neantmoins mon dict Seigneur de Bourgongne, se deportte de faire aucune poursuite par voye de fait contre le dict Roy de Sicile. Pourueu que le Roy, & Monseigneur de Guyenne, luy ferôt raison des choses dessus dictes, sommairement, & de plain, sans figure de iugement, dedans six mois apres qu'ils en seront requis par mô dict Seigneur de Bourgongne. Autrement, que mon dict Seigneur dès lors en auant se puisse pourueoir de remede, selonc ce que bon luy semblera.

Item, A l'autre Article des dictes Requestes, contenant que le Roy & mon dict Seigneur de Guyenne, defendent à mon dict Seigneur de Bourgongne, qu'il ne face aucun grief ou dommaige au Duc de Bar, pour cause de la deliurace des Ambassadeurs du Roy venans du saint Concile, & pour la demolition du chastel de Saucy. Respond mô dict Seigneur de Bourgongne, que son intention n'est, ny ne feut oncques, de dommaiger

maiger le Duc de Bar, ny ne fera au temps aduenir, pour oc- 1415.
casion des choses dessus dictes.

Item, A l'autre Article des dictes Requestes contenant, que mon dict Seigneur de Bourgongne face mestre au deliure, & hors de ses mains, toutes les terres, rentes, & reuenus du Comte de Marle, du Comte de Tonnerre, & de ses freres, du Seigneur de Rouffay, du Seigneur de Gaucourt, & autres, &c. Respond mon dict Seigneur de Bourgongne, qu'il le fera volontiers, C'est à sçauoir les rêtes, terres, & reuenus qui ont esté par luy empeschez, pour cause des diuisions & discords aduenus en ce Royaume, depuis la paix de Pôtoise. Et de ce, baille-
ra ses lettres patentes, à ceux à qui il appartiendra. Toutesfois l'intention de mon dict Seigneur de Bourgongne est, que le Roy & les autres Seigneurs, le fassent pareillement à ceux qui ont soubz eulx leurs terres empeschées, selon la forme & ten-
neur de l'Ordonnance du Roy sur ce faicte.

Item, A l'Article d'icelles Requestes, contenât que mon dict Seigneur de Bourgongne, eslongne, & mette hors de sa compaignée, & de ses terres & pays, ceux qui par la reseruatiō der-
niere sont deüement bannis. Respond mon dict Seigneur de Bourgongne, qu'il les eslongnera de luy, & de ses pays, estans en ce Royaume.

Item, A l'autre Article des dictes Requestes, faisant mention des canons &c. Respond mon dict Seigneur de Bourgongne, qu'il escripra volontiers par ses lettres au Gouverneur d'Ar-
ras, qu'il baille & deliure aux gens du Roy, tout ce qu'il trou-
uera des dictes canons, & autres habillemens de guerre, estans en la dicte ville d'Arras, & ailleurs, à son pouuoir.

Item, A l'Article contenant que Monseigneur de Bourgongne, face deliurer les prisonniers. Respond mon dict Seigneur de Bourgongne qu'il le fera pour obeir au Roy, & à Monseigneur de Guyenne. Iasoit qu'il luy soit bien grief de deliurer
Maistre Henry de Betisy, pour les causes qui ont esté dictes &
proposées à mon dict Seigneur de Guyenne. Et aussi est l'in-
tention de Monseigneur de Bourgongne, que le Vicomte de Murat, & autres, qui ont esté prins, soient mis à plaine deli-
urance.

Item, A la premiere partie del' Article contenant que Mon-
seigneur de Bourgongne enuoie cinq cents hommes d'armes,

Ccc

1415. & trois cents hommes de trait. Respond mon dict Seigneur de Bourgogne, qu'il en fera bonne & briefue diligence, & nō pas seulement du dict nombre, mais de plus grand, attendu la necessité qui est.

Item, A la seconde partie du dict Article, contenant que par le plaisir & licence du dict Monseigneur de Bourgogne, Monseigneur le Comte de Charrolois, son fils, voise en l'armée, que le Roy fait maintenant. Respond le dict Duc de Bourgogne, qu'il mandera au dict Monseigneur de Charrolois, qu'il se mette fus à puissance, pour y aller le plus grandement accompagné qu'il pourra.

Item, A la tierce partie du dict Article, contenant que pour auoir du nauire à l'Escluse, mon dict Seigneur de Bourgogne, vueille donner aide & confort. Respond mon dict Seigneur de Bourgogne, qu'il fera assembler le plus grandement qu'il pourra de nauire, pour estre prest au seruice du Roy, & de ce, escripra à son dict fils Monseigneur de Charrolois.

Item, A l'Article des dictes Requestes, contenant que mon dict Seigneur de Bourgogne face vuidier les gens d'armes estrangers, qui sont sur le pays. Respond mon dict Seigneur de Bourgogne, qu'il le fera.

Item, A l'Article contenant que Monseigneur de Bourgogne, consente que les Aides dernièrement mises sur ce Royaume, pour resister alencontre des Anglois, ayent cours, & soiēt leuez en ses terres & pays, és lieux & terres où on les ha accoustumé leuer. Respond mon dict Seigneur de Bourgogne, que son pays d'Artois, est pais de frontiere. Et comme il ha entendu, desia les Anglois sont descendus à Calais, pour dommaiger ses pays de par de là. Parquoy considéré que mon dict Seigneur de Bourgogne ha intention d'auoir gens d'armes par delà en grād nombre, pour defendre ses pays, & defendre l'entrée aux dicts Anglois. Et pource aussi que son dict pays est moult foulé, tant pour les gens d'armes qui y feurent l'année passée, comme pour reparations & gardes qu'il conuient faire és bonnes villes du dict pays. Supplie mon dict Seigneur de Bourgogne au Roy, & à Monseigneur de Guyenne, qu'ils s'en vueillent deporter, & les laisser à mon dict Seigneur de Bourgogne.

Item, A l'Article contenât que mon dict Seigneur de Bourgongne vueille mander par ses lettres patentes en ses terres, & Seigneuries de Flandres & d'Artois, qu'il laisse cueillir & lever par les commis du Roy, vn subside equivalent à vn dixiesme, que le Clergé de France, & du Daulphiné, ha oûtroyé au Roy. Respond mon dict Seigneur de Bourgongne, que ce n'appartient point à luy, cōsideré que c'est faict d'Eglise. Toutesfois mon dict Seigneur de Bourgongne, n'y bouterà point d'empeschement.

Item, Au dernier Article, contenant que mon dict Seigneur de Bourgongne remedie sur ce que Iacqueuille, ha deffié de feu & de sang, les villes de Sens, de la Neuville le Roy, de Brayne l'Archeuesque, & de saint Iulien du fault &c. Respond mon dict Seigneur de Bourgongne, que de ce que Iacqueuille en ha faict sans son sceu, il luy en ha bien despleu. Parquoy il fera que le dict Iacqueuille escripra aux dites villes lettres, par lesquelles il se deportera des dites deffiances.

Ce sont les Requestes & Supplications, que Monseigneur de Bourgongne faict humblement au Roy, & à son tres-redoubté Seigneur Monseigneur de Guyenne, baillées par mon dict Seigneur de Bourgongne au Seigneur de Moreuil, & à Maistre Jean de Vailly, President en Parlement.

Premierement qu'il plaïse au Roy, & à mon dict Seigneur de Guyenne, oûtroier lettres à mon dict Seigneur de Bourgongne, Par lesquelles quarante cinq personnes, exceptées en l'Abolition generale dernièrement faicte, & enuoïée par le Roy à mon dict Seigneur de Bourgongne, soient compris en la dicte Abolition, nonobstant la dicte exception. Et s'il ne plaïsoit au Roy oûtroier si ample Abolitiō, qu'il luy plaïse d'estre content d'excepter iusques à sept, qui feurent nommez deuât Arras, lesquels luy ont esté nōmez par les Ambassadeurs du dict Seigneur de Bourgongne, qui dernièrement ont esté deuers luy, & mon dict Seigneur de Guyenne.

Item, que le Roy & mon dict Seigneur de Guyenne, façēt abolir, & mētre au neant tous procès qui sont meus tant

1415. en la Court de Parlement, que autres, tant d'Eglise, comme seculiers, contre les Traictez de la paix d'Auxerre, de Pontoise, & de ce present dernier Traicté, specialemēt du Sire de Saint Brix, de la veufue Messire Guy d'Aigreuille, de Robinet le Vicomte, prisonnier de l'Archeuesque de Sens, de Messire Iean Macelier, dict Catat, chappellain de l'Eglise de Laon, prisonnier es prisons de l'Euesque de Paris, & d'autres. Et que de ce, le Roy baille lectres conuenables.

Item, que le Roy, & mon dict Seigneur de Guyenne, metēt à plaine deliurance tous prisonniers, qui sont prins ou empeschés avec leurs biens, pour occasion des discords & debars aduenus depuis les dicts Traictez de paix d'Auxerre, & de Pontoise. Attendu que Abolition generale ha esté faicte sur ce par le Roy, de laquelle ils doibuent iouyr.

Coppie des lectres patentes que Monseigneur de Bourgongne, ha baillé aux Ambassadeurs, du departement qu'il faict des protestations, dont dessus est faict mention.

Iean Duc de Bourgongne, Comte d'Artois, de Flandres, & de Bourgongne, A tous ceux qui ces presentes lectres verrōt, Salut. Comme en faisant le serment que nous feismes le premier iour de Iuillet, dernier passé, sur le faict de la paix ordonnée par Monseigneur le Roy en son Royaume, nous eussions protesté que nous faisons le serment, soubz esperance, & confiance, que mon dict Seigneur le Roy, & mon tres-redoubté Seigneur, & fils, Monseigneur le Duc de Guyenne, ayant le gouuernement de ce Royaume, nous passassent, & accomplissent certaines Requestes que parauāt leur auons faict par nos Ambassadeurs, à eulx sur ce enuoiez, Tant pour auoir lectres Royaulx patentes sur la reparatiō de nostre hōneur, au regard d'autres lectres Royaulx, qui parauant auoient esté publiées a lencontre de nous, & sur lectres d'Abolition generale que demandions, comme d'autres nos Requestes, & que autremēt ne vouliōs estre liez de nostre dict serment. Sur quoy mō dict Seigneur le Roy, & aussi mon dict Seigneur de Guyenne, ont enuoie par deuers nous Messire Thibault de Soissons, cheualier, Seigneur de Moreuil, & Maistre Ieā de Vailly, Presidēt en Parlement, leurs Ambassadeurs, qui nous ont requis que des dictes

protestations, nous nous voulussions deporter. Sçauoir faisons 1415.
 que pour obeïr à M^{on}seigneur le Roy, & à mon dit Seigneur de
 Guyenne. Et aussi pource que nous auons receu les dictes lec-
 tres Royaulx, sur la reparation de nostre h^{on}neur, & autres lec-
 tres d'Abolition generale, contenās aucune reseruacion, nous
 nous sommes deportez & deportons par ces presentes du tout
 en tout d'icelles protestations, & icelles mettons au neant. Et
 neantmoins est nostre intention, de poursuiure par humble
 Requête, par deuers Monseigneur le Roy, & mon dict Sei-
 gneur de Guyenne, l'accomplissement de l'enterinement de
 nos dictes Requestes, à eux faictes de par nos dicts Ambassa-
 deurs, en ce qui reste à enteriner & accomplir d'icelles Re-
 questes. En tesmoing de ce, nous auons faict mettre nostre
 seal à ces presentes. Donnē en nostre chastel d'Argilly, le vingt
 quatriesme iour du mois de Septembre, l'an de grace mille
 quatre cents & quinze. Ainsi signé, par Monseigneur le Duc,
 en son grand Conseil. Bordes.

Responſes faictes par le Duc de Bourgongne, au mois de Sep-
 tembre, l'an mille quatre cents & quinze, à Messire
 Iean Pioche, à luy enuoïé de par le Roy auant
 les Ambassadeurs dessus dicts.

Premierement, A ce que le Roy, & Monseigneur de Guyen-
 ne, ont fait sçauoir par le dict Pioche au dict Seigneur de Bour-
 gongne leur bon estat, la descendue des Anglois au Royaume,
 enuoïé les coppies des lettres du Roy d'Angleterre, & de la
 Responſe qui luy ha esté faicte, & aussi des nouuelles de par de
 là, mon dict Seigneur de Bourgongne les en remercie tant
 humblement, comme il peut.

Item, Quant à ce que le dit Pioche ha dict de par le Roy, &
 mon dit Seigneur de Guyenne, qu'il se tiennē en ses pays, mon
 dit Seigneur de Bourgongne, en escripra bien à plain son in-
 tention au Roy, & à mon dict Seigneur de Guyenne.

Item, A ce que le dict Pioche ha dict, que Monseigneur de
 Bourgongne, enuoie par de là cinq cents hommes d'armes, &
 trois cents hommes de trait. Respond mon dit Seigneur de
 Bourgongne, qu'il en fera bonne & briefue diligence, & non
 pas seulement du dit nombre, mais de plus grand.

1415. Item, A ce que le dict Pioche ha dict, que mon dict Seigneur de Bourgongne escripue à Monseigneur de Charrolois, que toutes choses necessaires au faict de la guerre du Roy, contre ses aduerfaires d'Angleterre, tant de nauire à l'Escluse, comme ailleurs és marches de Flandres, comme en pouldres, canons, artillerie, & autres habillemens de guerre, face deliurer, Respond mon dict Seigneur de Bourgongne, qu'il en escripra au dict Monseigneur de Charrolois, son fils, & luy mandera que il assemble & appreste le plus largement de nauire & artillerie qu'il pourra, pour estre prest au seruice du Roy.

Item, A ce que le dict Pioche ha dict, que la deffiance de Lacqueuille contre ceux de Sens, & autres, luy desplaist. Respond mon dict Seigneur de Bourgongne, que ce que le dict Lacqueuille en ha faict, ha esté faict sans son sceu, & luy en ha despleu, quand il est venu à sa congnoissance, & fera que le dict Lacqueuille escripra leîtres aux dictes villes, par lesquelles il se deportera des dictes deffiances.

Coppie des leîtres que les Nobles de la Duché de Bourgongne, escripuent au Roy.

Nostre tres-cher, & souuerain Seigneur, Apres tres-humble recommandation, Plaisé vous sçauoir qu'il est venu à nostre congnoissance que par vos leîtres patentes données à Paris le vingt-huictiesme iour d'Aoust, dernier passé, vous auez signifié à vos Baillifs & Seneschaux, la descendue du Roy d'Angleterre en vostre Royaume. En mandant à vos Baillifs & Seneschaux, & à leurs Lieutenans, qu'ils feissent de par vous commandemens, tant par cris & publications, en tous les lieux accoustumez à faire cris en leurs Bailliaiges & Seneschaussées, & ressorts d'iceux, comme autrement, A tous les gens & nobles, qui ont puissance de eulx armer, demeurans és metes de leurs Iurisdicions & ressorts, qu'ils voient toutes excusations cessans, en leurs personnes, le mieux accompagniez de gens d'armes qu'ils pourront, montez & armez suffisamment, par deuers nostre tres-redoubté Seigneur Monseigneur de Guyenne à Roüen, ou ailleurs, quelque part qu'il sera, le plus tost & hastiuement qu'ils pourront. Et aussi auons entendu que de ceste matiere qui tant touche l'estat de vous,

& de vostre Royaume, vous n'avez rien mädé à nostre trefredoubté & naturel Seigneur, Mōseigneur de Bourgongne. Excepté que depuis vn peu luy auez mandé par vn cheualier, que il vous enuoye cinq cents hōmes d'armes, & trois cents hommes de traict, & luy mandez qu'il se tienne en ses pays, pource que la paix par vous faicte & ordonnée, est encores bien nouvelle. Sur quoy nostre tres-redoubté & souuerain Seigneur, plaïse vous sçauoir que du grief que vos dicts aduersaires vous font, & ont entrepris de faire, il nous desplaist comme à ceux qui sommes vos tres-humbles & loyaux, feaulx, & subiects. Mais nous nous donnons grand merueille, de ce qu'on ha tant delayé de le signifier à nostre trefredouté & naturel Seigneur, attédu que par plusieurs fois, & en vos gräds affaires, il nous ha tousiours mené à vostre seruice, & l'auōs tousiours veu autant & plus soingneux de vos besongnes, que des siennes propres. Et aussi l'auōs sceu & congneu, sçauons, & cōgnoissons auoir esté, & estre tresloyal enuers vous & vostre Seigneurie. Et d'autre part, il est assez notoire comme il est tenu à vous par lignaige, hommaige, & affinité, & comme il peut finer de tres-noble compaignée, cōme de nobles, cheualiers, & escuiers, & d'autres gens de traict & de guerre, tant de vostre Royaume, comme d'ailleurs. Dont vous pouuez estre tresgrandement & loyaument serui, & sans lesquels vostre dict affaire pourroit tourner à grand danger, dommaige, & desolation, que Dieu ne vueille. Et pource nostre trefredouté & souuerain Seigneur, que nous considerons le hault appareil qui est commençé alencontre de vous, par puissante cōpaignée. Et que nous auons en memoire que pour le tēps de ses predecesseurs Ducs, & aussi de nous, leur coustume, & la nostre ha esté tousiours, de vous loyaumēt seruir soubz & en la compaignée de nostre dict Seigneur de Bourgogne, & de ses predecesseurs Ducs, il nous seroit biē dur d'autrement faire, & de changer nostre dicte coustume, mōsmemēt que nous sommes tous asseurez de la loyauté de nostre dict naturel Seigneur, & aussi tenons nous, que aussi estes vous. Si vous supplions nostre tres-redoubté & souuerain Seigneur, que il vous plaïse aduiser & considerer au bien & honneur de vous, & de vostre Royaume, & aussi à l'hōneur de nostre dict naturel Seigneur, & de nous. Car il nous semble, & à plusieurs autres, que à venir à fin de ceste matiere, il est bien.

1415. besoing que tous vos bons amis & subiets, meſtent la main à la besongne, ainsi comme il & nous en la compaignée auons intention de faire. Nostre tres-redoubté & souuerain Seigneur, nous prions au benoist Sain& Esprit, qu'il vous ait en sa sainte garde, & vous doint bonne vie & longue. Escrypt à Argilly, le vingt quatriesme iour de Septembre, mille quatre cents & quinze, soubz les seaulx de six de nous.

Vos tres-humbles seruiteurs, & obeïſſans subiets, les Nobles de la Duché de Bourgongne.

Ceux aussi de la Comté de Bourgongne, escripirent sur ce pareillement au Roy, & tout en la forme & maniere, sans varier en rien du sens, ainsi qu'il s'ensuyt.

Tres-hault & puissant Prince, & nostre tres-redoubté Seigneur, Nous auons entendu que vostre aduerſaire d'Angleterre, est descédu en vostre Royaume, & que pour resister à son entreprinſe, vous faites tresgrands mandemens de vos ſujets, sans auoir ſignifié ladite matiere, qui tât touche vostre hōneur, à nostre tref-redouté & souuerain Seigneur, le Duc & Comte de Bourgongne, Excepté que depuis vn peu luy auez mandé, qu'il vous enuoie cinq cens hōmes d'armes, & trois cēts hōmes de trait&, & luy mandez, qu'il se tienne en ſes pays: Pource que la paix par vous faicte, & ordonnée, est encores bien nouuelle. Sur quoy tres-hault & trespuissant Prince, & nostre trefredouté Seigneur, plaie vous ſçauoir, que du grief que vos dict& aduerſaires vous font, & ont intention de faire, il nous deſplaist, comme à ceux qui ſont vos tres-humbles amis, & bien vueillans. Mais nous nous donnons grand merueille, de ce qu'on ha tant delayé de le faire ſçauoir à nostre tres-redoubté & souuerain Seigneur. Attendu que par pluſieurs fois, & en vos grands affaires, il nous ha menez en vostre ſeruice, & l'auons tousiours trouué autant ou plus ſoingneux de vos besongnes, que des ſiennes propres. Et aussi l'auons ſceu & congneu, ſçauons & congnoiſſons auoir eſté & eſtre trefloyal enuers vous, & vostre Seigneurie. Et d'autre part, il eſt aſſez notoire, comme il eſt tenu à vous par lignaige, hommaige & aſſinité, & comme il peut ſiner de tres-grand compaignée de nobles cheualiers, & eſcuiers, & autres gens de trait&, & de guerre, tant
de

de vostre Royaume, que d'ailleurs, dont vous pouuez estre 1415.
 tres-grandement & loyaulment serui. Et pour ce tres-hault &
 puissant Prince, & nostre tres-redoubté Seigneur, que nous
 considerons le hault appareil, qui est commençé alencontre
 de vous par puissante compaignée, & aussi la grande loyauté
 de nostre souuerain Seigneur, Nous, qui par contemplation de
 luy, aimons mieux vostre parti, que celuy de vostre aduersaire
 d'Angleterre, Vous supplions qu'il vous plaise aduiser & con-
 siderer au bien & honneur de vous, & de vostre Royaume, &
 aussi à l'honneur de nostre dict souuerain Seigneur. Car il nous
 semble selon ce que nous auons oui parler de ceste matiere,
 qu'il est bien besoing que tous vos bons amis & subiets, mec-
 tent la main à la dicté besongne, Ainsi comme il ha intention
 de faire, & nous aussi en sa compaignée, que vous pouuez
 inectre & tenir au nombre de vos bons amis & voisins. Tres-
 hault, & puissant Prince, & nostre tres-redoubté Seigneur,
 nous prions au benoist fils de Dieu, qu'il vous ait en sa sainte
 garde, & vous doint bonne vie & longue. Escript à Argilly, le
 vingt-quatriesme iour de Septembre, l'an mille quatre cents 1415.
 & quinze, soubz les seaulx de six de nous.

Vos tres-humbles & bien vueillans, les Nobles de la
 Comté de Bourgogne.

Durant le siege de Harfieu, y auoit à Montiuillier, & en
 autres places pres du dict lieu de Harfieu, plusieurs garnisons
 de François, qui porterent granddommaige aux Anglois, dont
 il y eut foison de morts, & de prins.

Le Roy d'Angleterre, apres qu'il eut prins la dicté vil-
 le de Harfieu, & qu'il feut dedans, il delibera de s'en re-
 tourner en Angleterre, & prendre son chemin vers Calais.
 Et laissa le Comte d'Orset en la place, acompaigné de foi-
 son de gens de guerre, sans y laisser quelque bagaige, lequel
 il ordonna estre mis és vaisseaux, & enuoie en Angleterre, &
 ainsi feut fait. Et le dict Roy d'Angleterre, se partit accompa-
 gné de quelque quatre mille hommes d'armes, & bien de
 feize à dix-huict mille archers, à pied, & autres combatans,
 & print son chemin vers Gournai, & vers Amiens, en fai-
 sant maux innumerables, de bouter feux, de tuer gens, &

D d d

1415. de prendre enfans, & les emmener. Et quand les François sceurent le partement, d'autre part ils assemblerent tant gens de guerre, que d'autres. Et mesmement on assembla grande quantité de communes, tant de Paris, que d'ailleurs, armez & embastonnez de haches, & maillets de plomb, qui auoient grande volonté de eulx employer. Mais les gens de guerre les vilipendoient & mesprisoient, côme on feit aux batailles de Courterai, de la prinse du Roy Iean à Poitiers, & de Turquie, esquelles par ce, comme on disoit, les François & Chrestiens furent desconfits. On ordonna le Mareschal Boucicault, Messire Clignet de Brebant, & vn bastard de Bourbon, pour les cheuaucher. Ce qu'ils faisoient diligemment, & porterent grand dommaige aux dicts Anglois, & en tuerent plusieurs, & ne se osoient eschapper. Et en passant par aucuns bois & forests, les gens de pied François, en firent mourir plusieurs, & ceux que on prenoit, n'estoient pas mis à rançon, ou finance. De Calais, partirēt enuiron trois cents cōpaignons Anglois, qui venoient au deuant de leurs gens, lesquels feurent rencontrez par aucuns vaillants gens de Picardie. Et là en y eut plusieurs morts & prins, & les autres qui demeurèrent, feurent contraincts de eulx retraire au dict lieu de Calais.

Quand les Anglois veirent qu'ils estoient fort pressez, ils se tenoient iour & nuict serrez emmy les champs, & feirent plusieurs grâdes offres, à ce qu'on les laissast passer. Et mesmement offroient, comme on dit, à delaisser la place de Harfieu, & mettre es mains du Roy, & rendre les prisonniers sans finance, ou à faire paix finale, & bailler ostaiges à tenir tout ce que ils promettoient. Les Seigneurs & Capitaines feurent assemblez, pour sçauoir ce qu'on feroit. Et des-jà auoit-on enuoié diligemment querir le Duc d'Orleans, le Duc de Brabant, le Comte de Neuers, & autres. Et y eut diuerses opinions & imaginations. Car les vns disoient, qu'on les laissast passer sans combatre, & que à faire bataille, estoit chose bien dangereuse. Car combien qu'on voulust dire que la compaignée des Seigneurs, feust grande & puissante, & gens bien armez & habillez, & gentils-hommes qui ne daigneroient faire faute. Et que les Anglois estoient fort foulez, leurs harnois mal à point, & les jaques des archers vsées & deschirées. Toutesfois veu qu'ils estoient hors de leur pays, & en dan-

ger, ils se venderoient bien, auant qu'ils fussent descōfits, ou au 1415.
 moins qu'ils ne feissent leur debuoir. Et supposé que Dieu en
 donnast la victoire aux François, si ne seroit-ce pas sans grand
 dommaige. Et si estoit la chose bien douteuse, & sont souuent
 les euenemens des batailles en grand danger & peril. Et si vne
 fois les archers Anglois, ioingnoient aux hōmes d'armes Fran-
 çois, qui estoient fort pesammēt armez, & qu'iceux hōmes d'ar-
 mes, feussēt mis hors de haleine, la descōfiture pourroit cheoir
 sur eux. Et qu'il ne failloit que aller assieger Harfieu, & que de
 leger on l'auroit. Et que si on deliberoit de cōbatre, qu'on em-
 ploiaist les cōmunes, & qu'on s'en aidast. Et disoit on que le Cō-
 nestable d'Albret, le Mareschal Boucicault, & plusieurs autres
 anciens cheualiers & escuiers, qui auoient veu & frequenté les
 armes, estoient de ceste opiniō. Les Ducs de Bourbon, d'Alçon,
 & autres, furent de contraire opinion, disans, que veu les offres
 que faisoient les Anglois, qu'ils estoient ja à demy desconfits, &
 qu'ils n'arresteroient point. Et qu'ils auoient assez de puissance
 sans les communes, & ne les failloit ja appeller. En disant, que
 ceux qui estoient de cōtraire opinion, auoient peur. Et à ce fut
 bien respondu par les autres, lesquels monstrerent bien par ex-
 perience qu'ils n'estoient pas paoureux. Et feut conclud, qu'on
 les combattreroit. Et feut ordonné qu'il y auroit gens à cheval,
 qui frapperoient sur les archers Anglois, pour leur rōpre leur
 traitt, C'est à sçauoir, Messire Gauluet, Seigneur de la Ferté
 Hubert en Soulongne, Messire Clignet de Brebant, & Messire
 Louys du bois bourdon, tous renommez d'estre vaillants,
 & lesquels de tout tēps auoient frequēté les armes. Nobles ar-
 riuoient de toutes parts. Et quād le Roy d'Angleterre, veid qu'il
 failloit combatre, & qu'il luy sembloit qu'il s'estoit mis en son
 deuoir, Il parla bien & grandement à ses Princes, cheualiers, &
 escuiers, & gens de traitt, & les animoit à bien eulx defendre,
 en leur donnāt grand couraige. Et delibera d'attēdre les Fran-
 çois, s'ils le vouloit assaillir. Et fut tāt cheuauché par les Fran-
 çois, que d'un costé & d'autre, ils s'entreueirēt. Et veindrent en
 vn champ bien mol, car il auoit longuement pleu, & meirent
 pied à terre. Les François estoient pesamment armez, & es-
 toient en la terre molle iusques au gros des jambes, qui leur
 estoit moult grand trauail. Car à grand peine pouuoient-ils
 auoir leurs jambes, & tirer de la terre. Et commencerent à

1415. marcher iusques que le traict cheoit biē dru d'un costé & d'autre. Et lors les dicts Seigneurs de cheual bien hardimēt & vaillamment voulurent venir sur les archers, lesquels commencerent à eulx adresser cōtre ceux de cheual, & leurs cheuaux, bien chauldement. Et quand les dicts cheuaux se sentirent ferus des flesches, il ne feut oncques en la puissāce des hommes d'armes de passer outre. Mais retournerēt les cheuaux, & sembloit que ceux qui estoient dessus, s'enfuissent, & aussi feut l'opinion & imagination d'aucuns, & leur en donnoit-on grand charge. Les François n'eurent guieres de dommaige du traict des Anglois, car ils estoiet fort armez. Aussi les François à l'approcher, ne nuisirent comme point aux Anglois. Mais quand veint au joindre, les François estoient comme ja hors de haleine, par le moyen du dict mauuais chemin qui y estoit. Et y eut de grandes vaillances d'armes. Et mesmement disoit-on que le Duc d'Alençon feit merueilles de son corps. Finablement les archers d'Angleterre legerement armez frapportoient & abbattoiet les François à tas, & sēbloit que ce feussent enclumes sur quoy ils frappassent. Et y en eut qui se retrahirēt ou enfuirent. Et cheurēt les nobles François les vns sur les autres, & plusieurs feurent estouffez, & les autres morts, ou prins. Et apres la desconfiture, veint un bruit, que le Duc de Bretaigne grandement accompagné venoit, dont les François se rallierent, qui fut un bien grand mal. Car la plus part des Anglois tuerent leurs prisonniers. Et y feurent morts les Ducs d'Alençon, de Bar, & son frere, le Duc de Brabant, les Comtes de Neuers, & de Marle, le Seigneur d'Albret, Connestable de France, l'Archeuesque de Sens, & de cheualiers & escuiers, iusques au nombre de bien quatre mille. Et y eut de prisonniers, bien quatorze mille, Entre lesquels estoient les Ducs d'Orleans, & de Bourbon, les Comtes de Vendosme, & de Richemont, & le Marechal Boucicault. Et sur tous ceux qui se porterent bien vaillamment, & fort combatirent, & Anglois, & François, donnerent l'honneur au Duc d'Alençon, & estoit fort plainct d'un costé & d'autre, car il s'y estoit si vaillamment porté, qu'on ne pourroit guieres mieux. Des Anglois y en eut aussi de morts : mais non mie à comparaiger. Et entre les autres, y mourut le Duc d'Yorck. Plusieurs des prisonniers François s'en reueindrent, les vns sur leur foy, les autres pleigez par ceux qu'on me-

noit en Angleterre. Et si y auoit vn gentil-homme Baillif de Boulongne, qui y feit grand bien. Car aucuns des Anglois le congnoissoient estre preudhomme, dont à sa caution en deliurerent grand foison. Les seruiteurs des morts apres la bataille, allerent veoir les morts, pour cuider trouuer leurs maistres. Aucuns feurent recongneus: mais bien peu. Plusieurs Eglises & cimetieres auoit alenuiron, où on enterra vne partie des dicts morts, & les autres és fossez parmy les champs. Et estoit grand pitié, de veoir les gens faisans dueil de la dicté desconfiture sur les François, & monstroient on au doigt ceux qui s'en estoient retournez, & fuis de la bataille. En plusieurs lieux de ce Royaume auoit Dames & Damoiselles veufues, & pauvres orphelins. Et s'esbahissoient plusieurs, que le Duc de Bourgogne, qui estoit assez pres des marches où la bataille auoit esté faite, qu'il n'y auoit esté, ou enuoié. Et disoit on communément, qu'il ne faisoit semblant d'en auoir courroux. Et se fermoient plusieurs & diuerses paroles, & en disoit chascun ce qu'il pensoit, sans ce que de vrai on en sceust rien. A Paris mesmes, y en eut qui parlerent à leur plaisir, en montrant signe de ioye. En disant, que les Armaignacs estoient desconfits, & que le Duc de Bourgogne à ceste fois viendrait au dessus de ses besongnes, Dont les aucuns feurent punis par Iustice. Les gens de bien disoient, que c'estoit vne punition diuine, & que Dieu vouloit abbatre l'orgueil de plusieurs.

En ceste matiere aucuns autres ont escript, en la maniere qui sensuyt.

Après que le Roy d'Angleterre feut parti de Harfieu, il print son chemin par deuers Fescamp, & s'en alla droit à Arques, & ne trouua aucun empeschement. Et de là s'en alla sur la riuere de Sôme, & trouua empeschement de pôts brisez en aucuns lieux. Finablement il passa sans aucun destourbiet, ne sans aucune defense, & alla droit vers Saint Paul en Artois. Nos gens, & tous nos Seigneurs de France, estoient sur les champs. Et auoient laissé à Rouën, le Roy, & Monseigneur de Guyenne, le Duc de Berry, le Roy de Sicile, & petit de gens avec eulx. Et auoit esté faite l'Ordonnance à Rouën, pour liurer la bataille aux Anglois, en la maniere qui sensuyt. Premierement en l'auantgarde estoient ordonnez le Duc de Bourbon, le Marechal Boucicault, & Messire Guichard Dauphin. En la ba-

D d d iij

1415. taille, le Duc d'Orleans, chef, le Duc d'Alençon, le Connestable, & le Duc de Bretagne. Toutesfois il s'excusa, disant, qu'il n'y meistroit ia le pied, si le Duc de Bourgongne son cousin, n'y estoit. Ce que les autres Seigneurs ne vouloient pas, mais le faisoient contremâder par le Roy, & defendre qu'il ne veinst, tant comme ils pouuoient. Et auoit dict le Duc de Bretagne, qu'il estoit bien besoing, que le Duc de Bourgongne y feust. Car quand tous les subiets du Roy, & ses bien vueilans & allies y seroient, on auroit assez à faire à desconfire ses ennemis, qui estoient moult forts. Et est vrai, que le Roy d'Angleterre descendit en France, accompagné de quatre mille hommes d'armes, de quatre mille gros varlets, armez de cappelines beruieres, haubergeons, grosses iaques, & grandes haches, & de trente mille archers, qui auoient chascun haches, espées, & dagues. En l'arrieregarde des François, estoient le Duc de Bar, le Comte de Neuers, le Comte de Charrolois, & Messire Ferry, frere du Duc de Lorraine. Et és ailles, le Comte de Richemôr, & Messire Tanneguy, Preuost de Paris. Et ceux de cheual, pour rompre la bataille des Anglois, estoient Monseigneur l'Admiral, & le Seneschal de Hainault. Et de toute icelle Ordonnance, rien ne se feit. Car le Duc de Bretagne, demeura à Amiens, & les autres Seigneurs allerent outre vers le dict Sainct Paul, & par delà.

Le Dimanche vingtiesme iour d'Octobre, ils feirent scauoir aux Anglois, qu'ils leur liureroient bataille, le Sabmedy ensuiuant. Dont le Roy d'Angleterre feut moult ioyeux, & donna au herault, qui luy apporta la nouuelle; deux cents escus, & vne robbe. Nos gens, & les Anglois, estoient pres les vns des autres.

Le leudy ensuiuant, vingtquatriesme iour d'Octobre, nos gens delibererent de combatre le lendemain à la requeste des Anglois, lesquels auoient eu faulte de viures par trois iours, & requeroient qu'on leur liurast bataille, ou viures, ou passaige. Et ne feirent les François de toutes leurs gens que deux batailles. En la premiere bataille voulurent estre tous les Seigneurs, afin que chascun eust autant d'honneur l'un que l'autre, car autrement ils ne se pouuoient accorder. Et estoient par nombre en icelle premiere bataille cinq mille cheualiers & escuiers, lesquels ne ferirent oncques coup. Et en la seconde,

trois mille, sans les gros varlets, & les archers & arbalestriers. Et quand les Anglois le sceurent, ils esleurent vne belle place & herbüe entre deux bois. Et au deuant d'eulx vn peu loing, auoit vn autre bois, auquel ils meirent grande embusche de leurs archers. Et à l'vn des bois, qui leur estoit à costé, meirent grande embusche de leurs gens d'armes à cheual.

Et quand veint le lendemain au matin, qui feut le vingt cinquieme iour d'Octobre, mille quatre cents & quinze, feste des benoïsts corps saincts Crespin & Crespinië adorez à Soissons. Nos gens s'approcherent aux Anglois, & en leur chemin trouuerent terres labourables molles, pour la pluie qu'il auoit fait celle sepmaine; pourquoy ils ne pouuoient pas bien aller auât. Et quand ils cuiderent trouuer quatre cents hommes de cheual, qu'ils auoient ordonnez le iour de deuant, pour rompre la bataille des Anglois, ils n'en trouuerent pas quarante. Et quand veint à l'approcher, oncques les archers, & arbalestriers de nos gens, n'y tirerent fiesche ne vire. Et feut apres huit heures du matin. Et auoient nos gens le soleil en l'oeil, lesquels pour mieux endurer & passer le trait des Anglois, se baïsserent, & enclinerent vers terre les testes. Quand les Anglois les veirent en tel estat, ils s'approcherent d'eulx, tellement que nos gens ne le sceurent oncques, iusques à tant qu'ils frapperent sur eulx de bonnes haches. Et les archers, qui estoient derriere en embusche, les assaillirent de trait par derriere. Et les gens à cheual, que les Anglois auoient mis au bois dessus dict, saillirent dehors en flote, & veindrent par derriere sur la seconde bataille de nos gens, qui estoient pres des premiers, de deux lances. Et feirent iceux Anglois à cheual, vn si grand & merueilleux cry, qu'ils espouenterent tous nos gens, & tellement, que nos gens d'icelle seconde bataille s'enfuirent. Et tous ceux qui estoient en la premiere bataille, Seigneurs, & autres, feurent deſcônſits, & tous morts, ou prins. Et eut victoire en icelle iournée le Roy d'Angleterre. Laquelle besongne feut la plus honteuse, qui oncques adueint au Royaume de France.

De là s'en alla le Roy d'Angleterre à Calais, & emmena tous les prisonniers, entre lesquels estoient des Seigneurs, le Duc d'Orleans, le Duc de Bourbon, le Côte d'Eu, le Comte de

1415. Vendosme, le Comte de Richemont, & le Marechal Boucicault. Et leur donna à dîner le Dimenche ensuiuant, & à chacun d'eulx vne robbe de drap de damas. Et leur dit qu'ils ne fesmerveillassent pas, s'il auoit eu la victoire contre eulx, de laquelle il ne s'attribuoit aucune gloire. Car c'estoit œuvre de Dieu, qui leur estoit aduersaire pour leurs pechez. Et que c'estoit grand merueille, que pièce ne leur estoit mescheu. Car il n'estoit mal, ne peché, à quoy ils ne se feussent abandonnez. Ils ne tenoient foy ne loyauté à creature du monde en mariages, ne autrement. Ils commettoient sacrileges en destrôbat & violant Eglises. Ils prenoient à force toutes manieres de gens, femmes de Religion, & autres. Ils desfroboient tout le peuple & destruisoient sans raison. Et pource il ne leur pouuoit bien venir. Et ces choses rapporta comme on disoit vn nommé Tromagon, varlet de chambre du Roy. Lequel auoit esté prisonnier, & estoit venu querir sa rançon, qui se montoit à deux cēts francs, & l'auoit pleigé le Duc d'Orleans, comme on disoit. Le Preuost de Paris ne feut pas à la iournée, pource qu'il y veint trop tard. Le Connestable, le Duc de Bar, & le Comte de Neuers y moururent, comme encores l'Archeuesque de Sens, qui feut peu plainct, pource que ce n'estoit pas son office. Du Comte d'Alençon, ne sçauoit on nouuelles: mais il feut depuis trouué mort. Le Comte de Charrolois, estoit demeuré à Aire, par le conseil du Seigneur de Hely, lequel mourut en la place, & ne le voulurēt faire prisonnier les Anglois, pource que dernièrement il auoit rompu la prison en Angleterre. On dit en outre, que quand le Duc de Brabant, frere du Duc de Bourgogne, ouit parler des preparatifs que le Roy faisoit, il enuoia deuers luy vn sien notable Officier, & Baillif, lequel de par ice-luy Duc de Brabant, offrit au Roy, present le Conseil, de le venir seruir à tout quatorze cents cheualiers & escuiers, & six cēts hommes de traict, sans ses amis & alliez. Auquel feut dict qu'on luy auoit pièce escript, qu'il amenaist certain nombre de gens, & le dict Baillif respondit, que son dict Seigneur n'en auoit eu aucunes nouuelles. Adonc luy feut dict, que si le Connestable, & le Duc de Bourbon, le mandoient, qu'il veinst. Et le dict Baillif respondit, qu'il se doubtoit qu'il ne veinst pas, si le Roy mesme ne le mandoit. A quoy feut respōdu, qu'on luy manderoit assez à temps. Et à tant sen retourna le dict Baillif.

Si

Si adueint, qu'on fait sçauoir la iournée au dict Duc de Brabant bien tard, parquoy il n'eust peu auoir ses gens. Mais luy mesmes de grand couraige y vint luy douziesme, & se trouua à la bataille. Si se fourra dedans, & là demeura mort avec son frere le Comte de Neuers.

Deslors que le Roy d'Angleterre feut acertené de la bataille estre le Sabmedy dessus dict, és iours precedens icehuy Sabmedy, il manda tous ses Capitaines, & les gens par parties. Et leur monstra, comme on dict, que de toute ancienneté ses predecesseurs auoient maintenu auoir droict au Royaume de France. Et que à bon & iuste tiltre il y estoit venu pour faire son pouuoir de le conquerre, & n'y estoit pas venu comme ennemi mortel. Car il n'auoit pas consenti de bouter feux, ne raiuir, violer, ne efforcer filles & femmes, comme on auoit fait à Soissons: mais tout doucement vouloit cōquerir ce qui estoit sien, non pas le destruire du tout. Parquoy leur disoit, qu'il auoit vraie esperance en Dieu, de gaigner la bataille, pource que ses aduersaires estoient tous plains de pechez, & ne craignoient point leur createur. Et leur commanda que si aucuns auoient rancune les vns contre les autres, qu'ils se meissent en paix & concorde. Et que tous se confessassent & reconcilias-sent aux prebstres, qui estoient en la compaignée, ou autrement bien ne leur pourroit venir. En les enhortant d'estre bonnes gens à la iournée, & de faire bien leur debuoir. Et afin que chascun feust bon homme, il leur accorda que tous les prisonniers, que chascun d'eulx pourroit prendre, seroient à eulx franchement, & auroit chascun d'eulx de ses prisonniers tout le profit, sans qu'il en eust aucune chose, s'ils n'estoient Ducs ou Comtes prisonniers. Et avec ce il leur accorda, que tous ceux de la compaignée qui n'estoient nobles, il les annoblirait, & leur en donnerait lettres, & vouloit que dès lors ils iouyssent de telles frâchises, comme les nobles d'Angleterre. Et afin qu'on les congneust, il leur donna congé de porter vn collier semé de lettres S. de son Ordre. Et deuant l'heure qu'ils entrerent en bataille, il les feit mettre à genouils, les mains leuées au ciel par grand espace. Et leur donna la benediction l'un des Euesques de la compaignée.

Après celle iournée & desconfiture, pource qu'on se doubtoit que le Duc de Bourgogne, qui estoit à Dijon, quand il

E e e

1415. ſçauoit la mort de ſes freres, ne vouluſt venir deuers le Roy, accompaigné de gens d'armes, dont il auoit grand nombre, on diſoit communément qu'on auoit aduiſé, afin qu'il ne veinſt point, qu'on luy feroit à ſçauoir que le Roy luy donneroit par chaſcun an de penſion quatre vingts mille eſcus. Son fils le Comte de Charroſois, ſeroit Gouverneur de Picardie. Et il enuoiroit quatre de ſes meilleurs, & plus priuez cheualiers deuers le Roy, qui ſeroient continuellement au Cōſeil du Roy, afin qu'on ne feiſt aucune choſe contre l'honneur de luy Duc de Bourgongne. Et feut ordonné, que Monſieur de Guyenne, luy eſcriproit vnes lettres de ſa main, qu'il n'eũt aucune deſplaiſance, ſ'il ne venoit deuers le Roy iuſques à Noel, & que à Noel il viendroit. Mais on diſoit, que ce n'eſtoit que pour luy rōpre ſon coup de ſes gens d'armes, & pour le trauailler, & luy faire faire deſpēſes. Et pource on feut publier de par le Roy par toutes les bonnes villes, & premierement à Paris, en defendāt que aucun du ſang Royal ne veinſt, ne entraſt dedās Paris. Et diſoit on que ce faiſoient faire ceux qui gouernoient la ville de Paris, doubtans que ſi le Duc de Bourgongne y venoit, qu'il n'y feiſt deſplaiſir. Et eſtoit choſe publique parmy Paris, que les dicts Gouverneurs de la ville de Paris, auoient faiſt faire quatre mille haches bien trenchans, & noirçirēt les fers, qu'on ne les apperceuſt ſi toſt. Et les debuoit on distribuer par pluſieurs dixaines parmy Paris à gens ordōnez à ce, leſquels ſi le Duc de Bourgongne approchoit de Paris, debuoiēt tuer tous ceux qu'ils ſçauoient eſtre ioyeux de ſa venue. Mais cōme on diſt, aucuns en aduiſerent le Preuoſt de Paris, qui meit empeschement en la beſongne. Et encores afin que le diſt Duc de Bourgongne ne veinſt ſi toſt à Paris, feut ordonné cōme on diſoit, que le Duc de Guyenne, le Duc de Berry, & le Duc de Breraigne, iroient à Meaulx, le onzieme iour de Decembre enſuiuāt, & là parleroient au Duc de Bourgongne, & le Roy viendroit à Paris. Et cōme deſſus eſt diſt, le treizieme iour de Novembre feurent publiées les lettres d'Abolition, cōme le Roy remedioit tous cas perpotrez en faueur du Duc de Bourgongne. Et qui ſi aucuns à cauſe de ce eſtoient detenus priſonniers, ou en proces, tant en Court d'Eglise, qu'en Court laye, il vouloit qu'on les deliuraſt à pur, & à plain, nonobſtant les deſſus nommez. Leſquelles ſembloient à pluſieurs eſtre biē captieu-

ses, pource que les exceptez n'y estoient point nommez. Et que ^{14 15.}
 soubz ombre de ce, à tous ceux qui retourneroient, on pour-
 roit dire, qu'ils seroient des exceptez. Et encores nonobstât ce,
 le leudy vingt & vniesme iour de Nouembre, on cria & publica
 de par le Roy par ses lettres patentes, qu'on ne laissast passer
 par nul passaige aucuns Seigneurs, ne aucuns gens d'armes du
 sang Royal, ne autres. Et qu'on rompist les ponts, & effondrast
 les bacs & grands bateaux au deuant de ceux qui voudroient
 venir deuers Paris, & autre part, où le Roy seroit. Et tout ce, se
 faisoit comme on disoit, pour empescher la venue du Duc de
 Bourgogne deuers le Roy.

Quand les nobles, & autres Estats d'Angleterre, sceurent
 la victoire que le Roy d'Angleterre auoit eu, ils enuoierent de-
 uers luy vne bien noble compaignée à Calais, & feirent deuant
 luy vn bien notable propos. En remerciant & louant Dieu d'i-
 celle victoire, & en l'exhortât qu'il voulust cōtinuer son entre-
 prinse, sans desister aucunement. Et ils luy offroient de par tout
 son Royaume toute leur cheuance, & leurs corps, à y aider.

Et le Sabmedy, vingt neufiesme iour dudit Nouembre, il
 entra en mer pour aller en Angleterre, & emmena avec luy
 tous les plus gros prisonniers, & des autres, il en meit aucuns
 à rançon, & leur dict, qu'ils luy portassent leur rançon au chap-
 du Lendit, le iour de la Saint Iean d'esté, & s'il n'y estoit, ils
 estoient quités de leur rançon.

Celle sepmaine, le Roy estant à Roüen, & avec luy le
 Roy de Sicile, le Duc de Berry, & le Duc de Bretaigne, la gar-
 nison de Harfleur, vint courir iusques à deux lieues de Roüë,
 & emmenerent plus de cinq cents prisonniers: mais non pas
 loing, car ils feurent tous rescous, & grand nombre d'An-
 glois tuez.

Or est-il vrai, qu'il estoit commune renommée, que pour
 lors à la iournée de la bataille, à l'heure que les Anglois se cō-
 batoient à nos gens, aucuns qui s'en aduiserent, allerent piller
 les sommiers au Roy d'Angleterre, & feurent menez les aucuns
 d'eulx à Hesdin, & là feurent trouuez plusieurs ioyaux, & au-
 tres choses de grand valeur.

L'an mille quatre cents & quinze, le treiziesme iour de No- ^{1415.}
 uembre, feurent publiées en Parlement lettres touchant le
 faict de l'Abolition, de laquelle mention est faicte cy dessus.

E e e ij

1415.

Charles par la grace de Dieu Roy de France, A nos amez & feaulx Conseillers, les gens qui tiendront nostre prochain Parlement, Salut, & dilectiō. Comme par certaines nos lettres contenans l'Ordonnance de paix, nous ayons fait, donné & octroïé Abolition à tous, de quelque estat, auctorité, ou condition qu'ils soient, de tout ce qui ha esté fait à nostre desplaisir, & contre nostre volonté, pour auoir aidé, serui, & fauorisé nostre trescher & aimé cousin le Duc de Bourgongne, depuis le Traicté de la paix faite à Rontoise. Et depuis par nos autres lettres, & pour les causes & considerations contenües en icelles, Nous, de nostre plus ample grace, plaine puïssance, & auctorité Royale, ayons ordonné, voulu, & octroïé la dicte Abolition estre generale. Et que en icelle soient comprins tous de quelque estat qu'ils soient, excepté quarante cinq personnes nommées en icelles lettres, qui estoient, & sont de ceux qui par nostre Iustice ont esté bannis pour la cause dessus dicte. Et neantmoins ayons entendu que plusieurs Ingertât seculiers comme d'Eglise, detiennent prisonniers, & en proces, pour la cause dessus dicte, & les deppendées, plusieurs qui sont comprins en la dicte Abolitiō, qui ne sont pas du nombre des dicta quarante cinq reservez. Nous qui voulons les dictes Ordonnances, & Abolition, auoir, & sortir leur plain effect, Vous mandons, & expressement enuoyons, que tous ceux qui sont, ou seront detenus prisonniers, ou en proces, pour la cause dessus dicte, & les deppendances, par deuant aucuns Iuges seculiers, ou d'Eglise, dont il vous apperra, vous faires deliurer, & mettre hors de prison & de proces, en tant qu'il pouche nous & Iustice. En imposant sur ce filée à nostre Procureur, & à tous autres Procureurs d'Office. Et contraingnez à ce faire, tous ceux qui pour ce seront à contraindre, par toutes voyes deües & raisonnables. Si pour autre cause que pour celle dessus dicte, aucuns d'eux n'estoient empïsonnez, ou tenus en proces, sans toutesfois aucunement toucher à ce qui touche nostre foy, ne aux proces qui en dependent. Aufquels proces nous ne voulons aucunement toucher, ne iceux empïcher. En faisant icelles Ordonnances, & Abolition, tenir, & garder, selon leur forme & teneur. Mandons & commandons à tous nos Iusticiers, Officiers, & subiects, que à vous en ce faisant, obéissent & entendent diligemment. Donné à Reuen, le septiesme

jour de Novembre, l'an de grace mille quatre cents & quinze, 1415. & de nostre Regne le trente-sixiesme, Ainsi signé, Par la relation du grand Conseil, duquel Vous l'Archeuesque de Bourges, le Chancelier de Guyenne, les Euesques de Lisieux, & d'Eureux, les Maistres des Requestes, & autres du Conseil, estoient. Contier.

Coppie de la lēstre Royale, qui defend que nul Seigneur du sang Royal n'entre à Paris, & commande que on rompe les ponts.

Charles, &c. Au Preuost de Paris, ou à son Lieutenant, & au Preuost des Marchands, Escheuins, bourgeois, & habitans de nostre dite ville, Salut. Comme par le commandement que nous auons dernièrement fait, pour resister à nostre aduersaire d'Angleterre, qui estoit descendu en nostre Royaume à grand Ost. Et soubz couleur de nostre dict mandement, plusieurs gens d'armes, & de trait se soient mis-fus, lesquels ont sejourné & sejourner en grandes routes & compaignées en plusieurs parties de nostre Royaume, au grand grief, charge, & dommaige de nostre peuple. Nous pour releuer nostre dict peuple d'icelles charges, & dommaiges, considerans que nostre dict aduersaire est retiait à Calais, & que nous auons connoissablement pourueu aux frontieres d'iceluy nostre Royaume. Pourquoy il ne nous est pas besoing de present auoir autres gens, que ceux qui sent ordonnez & establis es dites frontieres, par l'aduis, & deliberation de nostre tres-cher & tres-ami filz le Duc de Guyenne, Daulphin de Viennois, & de nostre grand Conseil, Vous mandons, & expressément defendons, & à chacun de vous sur toute l'obeissance que vous nous debuez, & sur tant que pouvez mesfaire enuers nous, que par la dite ville de Paris, vous ne souffriez ne laissez passer, ne entrer aucuns de nostre sang, ne autres accompaigniez de gens d'armes, quels qu'ils soient, ne à quelque occasion qu'ils se dient venir, si par nos lettres patentes, sceillées de nostre grand seel, subsequans en date ces presentes, il ne vous appert, que nous les mandons venir par deuers nous. Auxquels de nostre sang, & autres, nous mandons & defendons sur les peines dessus dites, que autrement que

E e e iij

1415. que dict est, ne s'efforcent d'y entrer. Et avec ce, faites rompre tous les ponts esquels n'y ha garde suffisante, & retraire en lieux seurs tous les bacs, basteaux, & autres vaisseaux, estans sur les riuieres de vostre Preuosté. En telle maniere, que par le moyen d'iceux ponts & vaisseaux, aucuns des dicts gens d'armes, ne puissent par les dictes riuieres passer, ne repasser, contre nostre Ordonnance dessus dicte. Sçaichans, que si vous faites le contraire, nous vous ferons punir côme transgresseurs de nostre Ordonnance & commandement, & si griefuement, que ce sera exemple à tous autres. Donnée à Rouën, le quizieme iour de Nouëbre, l'an de grace, mille quatre cents & quinze, & de nostre Regne, le trêtesixiesme. Ainsi signé, Par le Roy, à la relation de Monseigneur le Duc de Guyenne, Mailliere. Publiées en Chastelet, le leudy, vingt & vniésme iour de Novembre, l'an mille quatre cents & quinze.

Quand le Duc de Bourgongne, feut acertené de la desconfiture de la bataille dessus dicte, & de la mort du Duc de Brabant, & du Comte de Nevers, ses freres, luy moult dolent & courroucé, enuoia tâtost deuers le Roy d'Angleterre à Calais, son herault. Lequel porta au Roy d'Angleterre le gantelet du Duc de Bourgongne de par luy. Et quand le herault feut deuant le Roy d'Angleterre à Calais, il luy dit de par le Duc de Bourgongne, qu'il auoit tué, ou fait tuer son frere le Duc de Brabant, le plus noble escuier du Royaume de France, lequel ne tenoit rien du Royaume de France, ne auoit en iceluy Royaume, sinon vne petite maison à Paris, dont il ne faisoit pas grand compte. Et pour ce il le deshoit de feu & de sang, & luy enuoioit son gantelet, & luy prmestoit que, en quelque part qu'il le pourroit trouuer, il l'iroit querir à l'aide de les Flamends, Brabançons, & Liegeois. Et quant estoit du Comte de Nevers, il estoit armé pour le Roy, & estoit homme du Roy, S'il festoit entremis de le combattre, & il y estoit mort, il ne luy en scauoit point de mauuais gré. Le Roy d'Angleterre respondit, Je ne receurai point le gantelet de si noble & puissant Prince, comme est le Duc de Bourgongne, car ie ne suis que peu de chose enuers luy. Et si j'ai eu victoire contre les nobles du Royaume de France, ce n'ha pas esté de ma proüesse, ne de ma force, ne de mon sens, mais ha esté de la grace de Dieu. Et quât est de la mort du Duc de Brabant, il m'en desplaist. Mais ie te

promets, ne moy, ne mes gens ne l'ont point fait mourir, ne le Comte de Nevers aussi. Et pource ie te prie que tu luy rapportes son gantelet, & ie luy rescriurai, comme s'il luy plaist estre à Boulongne, au quinziesme iour de Ianuier, ie luy monsterrerai par les confessions des prisonniers que j'ai, & que aucuns de mes amis ont, que ceux de France les ont tué & meurtri. Parquoy le herault par conseil reprint le gantelet, & le rapporta au Duc de Bourgongne.

Le leudy, vingt & vniesme iour de Novembre, le Duc de Bourgongne entra en la ville de Troyes. Et auoit en sa compaignée moult grand gent. & grand charroi. Et disoit-on qu'il feroit à Meaux le onziemesme iour de Decembre, & que à ce iour y seroient Monseigneur de Guyenne, & Monseigneur le Duc de Berry, pour traicter la paix du Roy Louys, & du Duc de Bourgongne. Et toutesfois autres disoient, qu'il ne iroit plus auant, ne à Paris n'entreroit point: pource que plusieurs doubtoient qu'il ne preinst vengeance d'aucuns desplaisirs, que ceux de la ville luy auoient fait.

Le Vendredy, vingtneufiesme iour de Decembre, le Roy retourna de Rouen, & arriva à Paris à petite compaignée, & entra par la porte de Saint Honoré. Et estoient plusieurs bié mal contens, de ce qu'on auoit autresfois fait plus grand honneur aux ennemis du Royaume, c'est à dire, aux Anglois, quand ils estoient venus à Paris, qu'on n'auoit fait au Roy. Lequel come on disoit auoit vestu la robbe, qu'on luy auoit veu porter continuellement plus de deux ans, & le chapperon aussi, & auoit ses cheueux iusques aux espaulles. Car pour les Anglois, qui dernièrement estoient entrez à Paris, on auoit fait nettoier les rues, cesser Parlement, & les autres Courts, & aller tout homme au deuât. Et de tout ce, ne feut rien fait à la venue du Roy. Combien que autres disoient bié que pour la perte de ses gens, il n'y failloit pas faire si grande solemnité. Le Duc de Berry, ce iour au vespre arriva à Paris par caüe, & Monseigneur de Guyenne, le Sabmedy ensuivant, iour de Saint André. Le Roy Louys arriva aussi ce iour, & vint par caüe, car il estoit malade.

Depuis le retour du Roy, pource que le Duc de Bourgongne, qui vint iusques à Prouins, & feut passer en aucuns lieux à ses gens la riuieré de Marne, tédloit fort à venir à Paris, & auoit moult grosse gent, grand train, & grand charroi. On disoit

1415. tout communément parmy Paris, que ceux qui gouuernoient pour lors la ville, comme les Preuost des Marchands, & Escheuins, auoient intention de faire mourir tous ceux de Paris, qui pourroient fauoriser le Duc de Bourgongne, s'il vouloit entrer dedans la ville. Et pour ce faire, on disoit qu'ils auoient fait faire quatre mille haches, les fers vernis, qu'on ne les congneust de nuit, & quatre mille jaques noires, & les auoient departi en plusieurs lieux de la ville, & auoient mis gros gens d'armes dedans la ville, pour ouïr aider comme on disoit à exploïter leur mauuaïse volôté. Et tant, que par plusieurs nuits de la dernière sepmaine du mois de Novembre, toute la ville estoit en doubte, & en aguet, & ne dormoit pas chacun toute la nuit. Et le plus fort, feut le Mercredy au soir, quatriesme iour de Decembre, qu'on tenoit certainement que celle nuit ils deussent faire leur entreprinse. Et tant, que les religieux de Saint Martin des champs, comme il feut dict, les Bernardins, & plusieurs autres Colleges de Paris, feirent feux toute la nuit en leurs maisons. Mais Dieu mercy il n'y eut nul mal. Et aussi ce n'estoient que toutes bourdes controuuées qu'on semoit, pour cuidoier faire vne grande commotion, & tuer ceux qui lors estoient entour du Roy.

Le Mercredy apres disner, tout le Conseil feut assemblé en l'Hostel de Bourbon, où M^{seigneur} de Guyenne estoit logé. Mais pource que mon dict Seigneur de Guyenne disna trop tard, on ne fit rien.

Le leudy ensuiuant, on y retourna. Et là proposa le premier President nommé Maistre Robert Mauger, sur le fait du gouuernement de ce Royaume. Et monstra que le Roy n'auoit que trois amis, puissans à le secourir cōtre la fureur de ses ennemis. C'est à sçauoir le Duc de Touraine, son fils, qui estoit en Hainault, le Duc de Bourgongne, & le Duc de Bretagne. Et feurent publiées aucunes Ordonnances qu'on auoit fait en Parlement sur le gouuernement de ce Royaume. Et feurent ordōnez tous les Officiers de la Court du Roy à auoir gaiges, & de la Court de la Roïne aussi, & de Monseigneur de Guyenne. Et ne mengeroient plus nuls à la Court, sinon qu'ils seroient ordonnez à servir iceluy iour.

A ce leudy apres disner, arriuerent à Paris les messagers du Duc de Bourgongne, c'est à sçauoir, Maistre Regnier Pot,
Chouffac,

Chouffac, & autres. Et entrèrent dedans Paris à grande difficulté, & en conueint auoir congé du Preuost, & feurent au dict Conseil. Lequel fini, ils feirent la reuerence à Monseigneur de Guyenne. Et exposerent entre les autres choses, qu'il pleust au Roy, donner ses lectres patentes à ceux de Meaulx, pour laisser entrer le Duc de Bourgongne dedans la ville. Et Monseigneur de Guyenne respondit, qu'ils n'auroient point de congé, & qu'il n'y entreroiét point, car il ne luy plaisoit pas. Et qu'il conuenoit qu'il renuoiait ses gens d'armes. Et qu'il n'entreroit point à Paris, sinon qu'il y veint comme sujet & obeïssant, & en l'estat de son Hostel tant seulement. Et lors le dict Messire Regnier dict, que le Duc de Bourgongne scauoit bien, qu'il y en auoit plusieurs entour le Roy, qui se doutoient de luy, qu'il ne leur feist perdre leurs Offices, & requist d'eulx vengeance s'il venoit. Et pour les appaiser & asseurer, il offroit à bailler bonnes lectres, qu'il ne rendroit à aucunes de ces fins. Et si ces lectres ne suffisoient, il offroit à bailler, & bailleroit son fils, le Comte de Charrolois, en ostaige. Mais tout ce feut refusé. Et dict Monseigneur de Guyenne, comme on disoit, que au Duc de Bourgongne n'appartenoit pas à bailler la seureté, mais à luy qui estoit Seigneur par dessus luy, appartenoit de bailler la seureté. Et ainsi se departirent.

Et le Vendredy ensuiuant, iour de Saint Nicolas d'hyuer, furent enuoiez de par le Roy l'Euesque de Chartres nouuel, Maistre Simon de Nanterre, President en Parlement, Maistre Iean de Vailly, Maistre Guillaume le Clerc, & autres, vers le Duc de Bourgongne, pour luy faire defense de non venir plus auant, & commandement qu'il renuoiait ses gens d'armes, & y allerent. Le Vendredy apres disner, le Duc de Guyenne, alla veoir la Roynne sa mere, qui estoit malade à Saint Paul, & retourna au giste à l'Hostel de Bourbon, & le lendemain il accoucha malade.

Le Mardy, dixiesme iour de Decembre, à cinq heures du matin, se partit le Roy Louys de Sicile de Paris, & s'en alla en son pays d'Anjou.

Ce Mardy au soir, feut prins en son hostel, à la porte de Paris, Robin Copil, pastissier, & fut dict qu'il estoit banni. Aucuns diét qu'il estoit nouuellement venu de l'Ost du Duc de Bourgongne, & qu'il auoit escript à ses amis, qu'on diét au Duc de Bour-

Fff

1415. gongne, qu'il s'aduançast de venir, & qu'ils estoient plus de quatre mille dedans Paris, qui luy ouuriroiēt vne porte. Pourquoy le dict patissier feut decapité és halles le Mercredy ensuiuant, & porté le corps de nuict au gibet.

La nuict du dit Mercredy, on print de par le Roy grād nombre de gēns à Paris, & disoit-on qu'on les prenoit seulement pour les garder, qu'ils ne feissent aucune cōmōtion en la ville, contre ceux qui ne vouloient pas que le Duc de Bourgongne y entraist.

Celle sepmaine comme le Dimanche de deuant le dict Mardy, les messaigers du Roy qui estoient allez deuers le Duc de Bourgongne, le trouuerent à Coulommiers en Brie. Et en l'exposition de leur legation, luy feirent defense de par le Roy, & à tous ses Capitaines, qu'il ne veinst plus auant. Laquelle parole ouie, il feut tant courroucé & indigné, que ce feut grand merueille. Et respondit, Je obeirai en tant que ie sçaurai & verrai que ce fera le bien, l'honneur, & le profit du Roy, de Monseigneur de Guyenne, & du Royaume. Et autre response ne feist, & plus ne voulut parler aux dicts messaigers, & ainsi s'en retournerent. Et veint loger le Duc de Bourgongne à Laigny sur Marne, & son auant garde cheuaucha iusques au Bourget. Et les dicts messaigers du Roy, feirent defense à tous les Cheualiers & Capitaines du dict Duc de Bourgongne, qu'ils ne veinssent plus auant, sur peine d'estre reputez pour traistres. Adonc le Duc respondit, qu'il ne failloit point vler de tel langage, & qu'ils estoient bons & loyaux, & auoient en tout temps serui, & seruiroient, & estoient venus pour le bien du Roy, & pour le seruir bien & loyaumēt avec luy, & en sa compaignée. Et puis dit, qu'il enuoieroit deuers le Roy ses messaigers, pour faire response aux defenses qu'ils faisoient, Pourquoy les messaigers du Roy incontinent se partirent de la Court du dict Duc, en laquelle ils trouuerent peu de belle chere, & s'en retournerent à Paris, le dict Mardy dixiesme iour de Decembre.

Et le Mercredy au soir ensuiuant, on print parmy Paris grand nombre de nobles hōmes, par especial ceux qu'on sçauoit qui pouuoient fauoriser, ou auoiēt au temps passé aucunement fauorisé le Duc de Bourgongne. Pour laquelle prinse, quand il veint à la cōgnoissance des messaigers du Duc de Bourgongne, qui estoient ordonnez pour venir à Paris deuers le Roy, ils n'y

osèrent pas bonnement venir. Et ceux du Conseil du Roy, qui 1415.
 sçauoient que les dicts messaigers deuoient venir, voians qu'ils
 ne venoient point, enuoierent par deuers le Duc de Bourgongne
 vn nommé Iean de Piccy, pour sçauoir à quoy il tenoit, que
 les messaigers ne venoient à Paris. Et pource iceux messaigers,
 c'est à sçauoir le Prince d'Orenge, le Sire de Chalon, le Sire de
 Saint George, Messire Iean de Luxembourg, le Sire de Vergy,
 Messire Regnier Pot, Monseigneur d'Autry, Monseigneur de
 Thoulonjon, Maistre Eustache de Laistre, Iacques Lambon,
 & Maistre Iean Choufac, tous Conseillers, & Iean de Rosai, Sec-
 retaire du dict Duc, partirent le Dimanche, quinzième iour
 du dict mois, bien matin de Laigny, pour venir à Paris, & en-
 uoierent deuant leurs gens, pour appareiller à disner en l'Hos-
 tel d'Artois, où le Duc de Bourgongne leur auoit comman-
 dé qu'ils se logeassent. Et quand ils feurent à la porte de Saint
 Antoine, on ne les voulut laisser entrer : pource qu'ils dirent
 qu'ils s'en alloient loger en Artois, & que leurs maistres auoient
 bien quatre cents cheuaux. Pourquoi iceux gens retourne-
 rent à Saint Antoine des champs, & attendirent là leurs mai-
 stres, lesquels vindrent sur le disner, & n'entrèrent point en la
 ville, sinon Messire Regnier Pot, & Choufac, lesquels vein-
 drent parler au Duc de Berry, & ne peurent parler à Monsei-
 gneur de Guyenne, qui estoit malade. Lequel Messire Regnier
 retourna à Saint Antoine, mais les autres s'en estoient retour-
 nez par deuers le Duc de Guyenne, pource qu'on les auoit trop
 fait muser. Si s'en alla le dict Messire Regnier apres, & les feit
 retourner le Mardy ensuiuant, dixseptiesme iour du dict mois,
 lesquels feurent tous logez en la rue de la harpe, & exposerent
 leur legation le Mercredy ensuiuant apres disner, deuant Mon-
 seigneur de Berry, & le Conseil. Et debuoiert auoir le Mer-
 credy ensuiuant responce.

Ce Mercredy au soir, trespassa le Duc de Guyenne. Et le Ieu-
 dy matin, feut fait par toutes les Eglises de Paris solennelle son-
 nerie pour le salut de son ame, que Dieu par sa grace vueille
 mestre en sa gloire, & tous les trespassez aussi. Puis feut porté
 enterrer bien honnorablement à nostre Dame de Paris.

Le Dimanche ensuiuant, On disoit cōmunément que les Amba-
 sadeurs du Duc de Bourgongne, n'eurent aucune respōse. Mais
 leur dit-on, qu'on enuoieroit deuers le Duc faire la responce.

F f f ij

1415. Et pource le Vendredy matin ensuiuant, il cuiderent partir, & feurent iusques à la porte de Saint Antoine, & aucuns d'eulx dehors. Mais le Preuost de Paris veint hastiuement apres eulx, qui leur dit, qu'ils retournassent tous, & que au plaisir de Dieu, on auoit aduisé vn bon appoinctement. Et pource ceux qui estoient ja dehors, retournerent avec ceux qui estoient dedans, & s'en veindrent enséble loger à la rue de la harpe, où ils auoient esté logez, & dont ils estoient partis au matin. Et quand ils feurent tous dedans la ville en la grand rue Saint Antoine, le Preuost de Paris meit la main à eulx de par le Roy. Et quād ils feurent logez, on leur dist qu'ils estoient arrestez, pource que les gens du Duc de Bourgongne auoient rompu la paix, & qu'ils auoient prins d'assault Brie Comte Robert, qui estoit au Duc d'Orleans, & qu'on y auoit tué des gens de la ville. Toutestois on y enuoia, & trouua-on que c'estoit bourde. Et pource le Dimanche ensuiuant au matin, iceux Ambassadeurs s'en allerent deuers leur Seigneur.

Ce Dimanche apres disner, feut apporté le Duc de Guyenne en l'Eglise de nostre Dame de Paris, & le soir, & le Lundy matin, feut fait son seruice solemnel.

Le Védredy d'apres Noel, iour Saint Iean, retourna à Paris, Messire Regnier Pot, & autres, de par le Duc de Bourgongne. Et requirēt au Conseil du Roy, que Madame de Guyenne leur fust deliurée, & baillée, pour deliurer & enuoier à son pere. Secondement, que son douaire luy feust assigné. Tiercement, que elle eust la moitié des meubles de son mari. Au premier point, leur feut respondu, qu'il plaisoit bien au Roy, qu'elle allast deuers son pere. Quant au second, On ne luy en pouuoit rien faire de présent, pource que le Roy n'estoit pas en point. Quant au tiers, le Roy auoit bien à faire des meubles.

Le Dimanche ensuiuant, entra le Comte d'Armaignac à Paris, à petite compaignée de ses gens, mais à grand compaignée de la ville. Et alla à Saint Paul, faire la reuerence au Roy, & à la Royne, & puis veint soupper à Neelle, chez Monseigneur de Berry, son Sire. Le Lundy ensuiuant, le Roy luy ceingnit l'épée. Et celle sepmaine, plusieurs de la compaignée du Duc de Bourgongne, qui auoient amis dedans Paris, enfans à l'eschole, & autres bien prochains, les feirent aller hors de Paris, doubans diuision, & commotion de peuple, & aussi que le Duc de

Bourgogne ne assiegeast Paris.

Le Vendredy deuant la Tiphaine, feurent enuoiez derechef ^{1415.} les Ambassadeurs dessus dictz deuers le Duc de Bourgogne, pour luy faire commandement qu'il s'en retournaist & renuoiaist ses gens, sur peine d'estre reputé pour traistre, & abandonné. Et quand ils feurent à Laigny, on les logea ensemble, & y feurent plusieurs iours, sans parler au Duc, & ne pouuoïent parler à personne, ne leurs gens aussi, car on les en gardoit.

Le iour de la Tiphaine au soir, feut rendüe à Laigny au dict Duc de Bourgogne, Madame de Guyenne sa fille.

Le Vendredy ensuiuant, il enuoia à Paris l'Euesque de Chartres, & Maistre Iean de Vailly, qui estoient des Ambassadeurs du Roy, & retint Maistre Simon de Nanterre, Maistre Guillaume le Clerc, & Messire Oliuier de Mauny. Et apres, il enuoia à Paris Maistre Eustache de Laitre, & Messire Iean dict le borgne de Thoulangeon, cheualier, lesquels feurent logez à la seraine en la rüe de la harpe, & feurent gardez que personne ne parlaist à eulx sans leurs gardes. Et leur feut dict, que de là ne partiroyent, ne ouis ne seroient, ne responce n'auroient, iusques à ce que les dessus dictz que le Duc auoit retenu, feussent retournez à Paris.

Les prisonniers de la ville, feurent tous eslargis, & leur feut commandé qu'ils se teinssent en leurs maisons, sans en partir.

Et le Lundy, treiziesme iour de Ianuier, la Roynes veint à la messe à nostre Dame de Paris. Et ce iour, tous les dictz prisonniers eslargis, feurent remprisonnez. Et de notables hommes, iusques au nombre de dixhuiet, comme on disoit, feurent mis hors du seruice du Roy, & de son Hostel.

Le Conneftable, & le Conseil, enuoierent celle sepmaine grosses garnisons à Senlis, & à Saint Denys, à Chasteau-thierry, à Meaulx, à Melun, à Corbeil, à Saint Cloud, & en tous les lieux enuiron & pres du Duc de Bourgogne, pour faire serer, & tenir ses gens ensemble, & leur defendre les viures, & le fourraige.

Le Sabmedy ensuiuant, au dict mois de Ianuier, feut publié parmy Paris l'abandonnement de toutes gës d'armes, qui seroient trouuez sur les champs, qui ne seroient aux gaiges du Roy. Et disoit on, que c'estoit contre le Duc de Bourgogne, & ses gens.

1415. Le Mardy ensuiuant, quatorziesme iour du dict mois, le Roy veint loger au Palais. Et ce iour, arriua à Paris le Duc de Bretagne, & descendit au Palais, où le Roy estoit, pour luy faire la reuerence. Et feut apres logé en l'Hostel de Bourbon, & depuis en celuy d'Alençon.

Le Vendredy, dixseptiesme iour de Ianuier, retournerēt de Laigny les Ambassadeurs du Roy dessus nommez, qu'on disoit que le Duc de Bourgongne auoit retenu.

Et le Sabmedy matin ensuiuant, s'en allerent de Paris Maistre Eustache de Laistre, & le borgne de Thoulangeon, Ambassadeurs du dict Duc, qu'on auoit retenu à Paris, iusques à ce que ceux du Roy feussent retournez.

Celle sepmaine, les gens du Conestable allerent vers Cōpiengne, & destroussierent là Messire Martelet du Mesnil, cheualier, qui estoit au dict Duc, & toutes ses gens en grand nombre. Et feurent tous morts, ou prins, fors Hector de Saueuse, qui se sauua. Et disoit on, que les gens du dict Duc de Bourgongne, auoient prins par force Tournant en Brie. Pour lesquelles deux besongnes, les choses n'en estoient pas en bons termes, ne aisées à appaiser. Toutesfois le Duc de Bretagne, s'efforçoit avec le Cardinal de Bar, de trouuer aucun bon accord.

Le Lundy, vingtiesme iour de Ianuier, s'en allerent à Laigny les Ambassadeurs & le Maistre d'Hostel du dict Duc de Bretagne. Quoy faire, on ne scauoit. Et estoit iceluy Duc de Bretagne, indigné de deux choses. L'une, que on luy auoit tenu le passaige au pont de Saint Cloud, & ne peut entrer à Paris sans lectres du Roy. La seconde, de ce que le Vendredy dessus dict, on empescha le passaige par deux fois à la porte de Saint Antoine à ses gens, par lesquels il enuoioit au Duc de Bourgongne deux barils plains de lamproyes, & conuint que par deux fois il eust congé, auant qu'ils peussent passer.

Le Sabmedy ensuiuant, le Recteur, & les Deputez de l'Vniuersité, feirent la reuerence au dict Duc de Bretagne. Et luy parlerent de recouurer Harfieu, & soustenir leurs priuileges. Et quand ils eurent tout dict, il les reprit de ce qu'ils ne parloient aucunement de la paix de ce Royaume, & de l'vniō des Seigneurs. Dont ils eurent grand honte. Car il leur dit, que c'estoit à faire à eulx de procurer la dicte vniō des Seigneurs,

& de trouuer les moyens de paruenir à paix. Et leur pria, que ainsi le voulussent faire.

Celle sepmaine, arriuerent à Paris ceux qu'on auoit enuoié en Hainault de par le Roy, Gaucourt, Philippes de Corbie, & autres. Et disoit on, qu'ils n'auoient pas eu bonne responce. Et disoit on, que quand ils arriuerent par delà, ce iour y arriuerēt les Ambassadeurs du Duc de Bourgogne, le Sire de Saint George, & autres. Et feurent presens à la responce, qu'on feit à Gaucourt. Mais Gaucourt ne feut pas present à la responce qu'on feit au Sire de Saint George, dont les autres estoient mal contents.

Le Mercredi, vingt-neufiesme iour de Ianuier, ceux de l'Vniuersité qui autresfois auoient esté deuers le Duc de Bretagne, comme dessus est dict, feirent leur Relatiō. Laquelle ouie, veu la bonne affection que iceluy Duc auoit à la paix, feut mis en deliberation, s'il seroit bon de l'aller remercier de la bonne affection qu'il auoit à la paix, & de le prier, & requerir, qu'il y voulust tousiours tenir la main, & non partir, iusques à ce qu'il y eust aucun bon appoinctement. Et de ce feurēt d'accord la Nation de Picardie, la faculté de Decret, & plusieurs Docteurs en Theologie, & grād nombre d'autres de diuerses Nations & facultez. Mais le Recteur ne voulut oncques cōclurre sur ce, & se departirent de leur congregation, sans rien faire. Neantmoins ceux qui estoient esleus d'aller deuers le Duc de Bretagne, retournerent apres disner deuers le Recteur, pour l'induire à ce faire. Mais ils ne peurent. Et pource appellerent deux bedeaux de l'Vniuersité avec eulx. Et veindrēt à l'Hostel d'Aléçon deuers le dict Duc de Bretagne, & estoient biē quatre vingts. Et feirent proposer par le Ministre des Mathurins, qui proposa notablement, conclüant à celle fin qu'il ne s'en alast point, iusques à ce qu'il y eust aucun appoinctement mis en ce pourquoy il estoit venu, & qu'en ce il seroit grand bien & grand honneur à l'Vniuersité. Et vn qui feut là, qui se disoit Procureur de la Nation de France, du College de Nauarre, dit haultement que ce que le Ministre auoit proposé, n'estoit pas de par l'Vniuersité, & qu'on n'auoit cure de la paix qu'ils demandoient. Car c'estoit la paix Cabochienne. Et ce voiant le Duc de Bretagne, feut moult esbahi, & leur dit, vous n'estes pas d'accord, vous estes diuisez, c'est mal fait. Mais

1415. neantmoins ie ne laisseray pas la chose ainsi. Ou ie parlerai à vous vne autre fois plus à plain de ceste matiere, ou ie vous enuoierai mes messaigers pour ceste cause. Et ainsi print congé d'eulx. Et pource que le Recteur, & ses adherens, qui n'auoient pas esté d'accord de venir deuers le dict Duc de Bretagne, eurent desplaisance de ce que les autres y estoient venus, ils brassèrent tant, tandis qu'ils estoient deuers le Duc, que quand ils feurent deuant le Chastellet à leur retour de l'Hostel d'Alençon pour venir en la Cité, ils trouuerent Raimonnet de la Guerre, & bien quarante lances deuant le Chastellet, & le Preuost de Paris. Lequel Raimonnet par le commandement du dict Preuost de Paris, print le dict Ministre, & vn Docteur en Decret, nommé Maistre Lyeuin, qui estoit de Flandres, bien solemnel clerc, & les feit mestre en Chastellet. Duquel Preuost le dict Ministre appella, & protesta de releuer son appel en temps, & lieu. Toutesfois ils n'y feurent guieres, & le feist on à sçauoir au dict Duc de Bretagne, lequel manda tantost au Preuost, que incontinent ils feussent mis hors, & ainsi feut faict.

Le Ieudy ensuiuant, le dict Duc s'en alla hors de Paris, pour aller en son pays, comme on disoit.

Et le Mardy de deuant, le Duc de Bourgongne partit de Laigny, & s'en alla à Nantouillet. Et auoit perdu à Crecy en Brie, bien quatre cents de ses hommes, que les autres auoient trouué à descouuert, tous despourueus de gardes, lesquels ne feurent guieres plaincts.

Celle sepmaine, les gens du Duc de Lorraine, & les Sauois, donnerent assaut à Dampmartin, dont ils gaignerent la basse court, & n'y demurerent guieres. Et ceux de dedans le chastel, bouterent apres le feu en la dicte basse court.

Les Ambassadeurs de Monseigneur de Touraine, requirer que toutes gens d'armes d'un costé & d'autre, vuidassent. Et pour celle cause le Duc de Bourgongne s'en alla en Artois, & ceux qui estoient venus au mandement du Roy, s'en allerent en leur pays, & disoit on qu'on les enuoioit en Guyenne.

Celle sepmaine, Monseigneur de Berry demanda au Preuost de Paris, qu'il auoit faict des prisonniers de Paris. Le Preuost de Paris respondit, qu'il les auoit deliuré, pource que par information il ne les auoit aucunement trouué chargez, parquoy

quoy on les deust tenir. Et le Duc de Berry, non content de leur deliurance, respondit qu'il feroit vne fois Preuost de Paris à son tour. Laquelle parole, feit grand peur à beaucoup de gens.

Aucuns de Constance, eulx doubtrant que la Sentēce de l'Euesque de Paris, pieça donnée au deshōneur du Duc de Bourgogne, pour laquelle iceluy Duc de Bourgogne appella en Court de Rome, du temps du Pape Iean, lequel auoit commis la cause d'appellation à trois Cardinaux, A ce qu'elle ne feust cassée & dictē nulle, auoient escript à aucuns de l'Vniuersité, qu'ils feissent tant que l'Vniuersité s'adioingnist avec l'Euesque de Paris, & l'Inquisiteur de la foy. Mais ils ne peurent rien faire, pour aucuns presens qui les pouuoient empescher. Et ceux de Paris, comme le College de Nauarre, & les adherens de Maistre Iean Iarson, & à l'Euesque de Paris, feirent tant, que le Mercredy, douziesme de ce mois, on feit commandement de par le Roy, à plus de quarante notables hommes de l'Vniuersité, que ce iour ils vuidassent la ville, sur peine de perdre corps, & biens. Et la sepmaine de deuant, estoit apportée à Paris la coppie de la Sentence donnée à Constance par iceux trois Cardinaux, en cassant la dictē Sentence de l'Euesque de Paris.

Le Roy d'Angleterre, faisoit en icelle saison plus grand mādement, que oncques mais n'auoit fait. Et mādait à ceux qu'il requeroit en son aide, qu'ils veinssent seurement, & qu'ils seroient biē salariez, & leur dōneroit vingt cinq escus pour mois. Et les faisoit certains qu'ils verroient la plus haulte, la greigneur, & la plus profitable conqueste, qui oncques feut faicte en ce monde.

Celle sepmaine du dict Mercredy douziesme iour de Fevrier, le Conneſtable, feut fait general gouuerneur des finances de ce Royaume, & general Capitaine de toutes les forteresses de ce Royaume, pour meſtre Capitaines, & garnisōs par tout à son plaisir. Et meit en plusieurs lieux ses seruiteurs Capitaines és forteresses, & és frōtieres. Et feit Seneschal de Carcassonne, vn cheualier de son Hostel.

En ce temps, par l'ordonnance du Conseil feurent mis en escript tous les mesnagers de Paris de tous estats clerics, lais, & religieux, & autres, & les personnes de chascun hostel.

1415. Et apres, le Mercredy dix-neufiesme iour de Februrier, le Roy enuoia à l'Vniuersité vnes lettres, contenâs qu'ils ne s'esmerueillassent pas si on auoit mis hors de Paris plusieurs notables personnes de l'Vniuersité, & si on en mestoit encores aucuns autres dehors. Car c'estoit pour le bien de la paix, & de leurs personnes, & que ainsi feroit on de plusieurs lais de la ville de Paris. Et autres lettres cōtenans, que le Roy de sa volonte éauoit tenu le tēps passé le Clergé en souffrance, de nō payer aucuns subsides, ou tailles, mais de present, pour ses grandes affaires soustenir, il conuenoit, & vouloit que chascun payast sans rien espargner, & ne vouloit que aucun plaintif en allast deuers luy pour ceste cause. Et leur feut defendu, qu'ils ne feissent plus nulles assemblées ne congregations, & au Recteur present qu'il ne feist aucune assemblée ou congregation, sur peine d'encourir l'indignation du Roy.

Le premier iour de Mars, l'Empereur d'Allemagne veint & entra à Paris. Et feurent au deuant de luy le Duc de Berry, Prelats, nobles, & ceux de la ville en grand nombre. Et veint descendre au Palais, où le Roy estoit, lequel veint au deuant de luy iusques au hault des degrez du beau Roy Philippes. Et là s'entraccollerent, & feirent grand chere l'un à l'autre. Et auoit en sa compaignée vn Prince, qu'on appelloit le grand Comte de Hongrie, le Comte Bertold des Vrsins, vn bien saige & prudent Seigneur, & autres Princes & Barons. Et sembloit qu'il auoit grand desir de trouuer accord ou expedient entre les Roys de France, & d'Angleterre. Il feut grandement & honnorablement receu, & souuent festoié par le Roy, & les Seigneurs. Et ses gēs encores plus souuent. Et mesmement le dict Iean Iuuenal des Vrsins, Seigneur de Traignel, festoia le dict grand Comte de Hongrie, le Comte Bertold, & tous les autres, excepté l'Empereur. Et feit venir des Dames & Damoiselles, des menestriers, ieux, farfes, châtres, & autres esbatemens. Et cōbien qu'il eust accoustumé de festoier tous estrangers, toutesfois specialemēt il les voulut grandemēt festoier, en faueur du dict Côte Bertold des Vrsins, pource qu'ils estoient d'un nom, & armes. Et du festoient & reception, feurent bien contents le Roy, l'Empereur, & les Seigneurs.

Le dict Empereur voulut sçauoir que c'estoit de la Court de Parlement. Et vn iour de plaidoirie veint à la Court, laquelle

estoit bien fournie de Seigneurs, & estoient tous les Sieges d'enhaut plains, & pareillement les Aduocats, bien vestus, & en beaux manteaux, & chapperons fourrez. Et se assit l'Empereur au dessus du premier President, où le Roy se asseeroit, si l'y venoit, dont plusieurs n'estoient pas bien contents. Et disoient qu'il eust bien suffit, qu'il se feust assis du costé des Prelats, & au dessus d'eux. Il voulut veoir plaider vne cause qui estoit commencée touchant la Seneschaussée de Beaucaire, ou de Carcassonne, en laquelle vn cheualier pretendoit auoir droit, & vn nommé Maistre Guillaume Signet, qui estoit vn bien notable clerc, & noble homme. Et entre les autres choses qu'on alleguoit contre le dict Signet, pour monstrier qu'il ne pouuoit auoir le dict Office, estoit, qu'on luy imposoit qu'il n'estoit point cheualier, & que le dict Office estoit accoustumé d'estre baillé à cheualiers, laquelle chose le dict Empereur entendoit. Et lors il appella le dict Maistre Guillaume Signet, lequel deuant luy s'agenouilla. Et tira l'Empereur vne bien belle espee qu'il demanda, & le fit cheualier, & luy fit chauffer ses esperons dorez. Et lors dit, la raison que vous alleguez cesse, car il est cheualier. Et de cest exploit gens de bien furent esbahis, comme on luy auoit souffert, veu que autresfois les Empereurs ont voulu maintenir droit de Souueraineté au Royaume de France contre raison. Car le Roy est Empereur en son Royaume, & ne le tient que de Dieu & de l'espee seulement, & non d'autre.

L'Empereur eut en volôté de veoir des Dames & Damoilles de Paris, & des bourgeois, & de les festoier. Et de fait, les fit semondre de venir dîner au Loure, où il estoit logé. Et y en vint iusques à enuiron six vingts. Et auoit fait faire bien grand appareil selon la maniere & coustume de son pays, qui estoit de brouets & potaiges forts d'espiçes. Et les fit seoir à table, & à chascune on bailla vn de ces cousteaux d'Allemagne qui valloient vn petit blanc, & le plus fort vin que on peut trouuer. Et y en eut peu qui mengeassent pour la force des espices. De viandes furent elles seruies grandement, & largement menestriers y auoit. Et apres dîner dansoiēt, & celles qui scauoient chanter, chantoiēt aucunes chansons, & apres preindrent cōgé. Et au partir, donna à chascune vn anneau ou verge d'or, qui n'estoit pas de grand pris, mais de peu de valeur.

G g g ij

1415.

Après ces choses, il parla au Roy, & à son Conseil, en disant qu'il s'emploieroit volontiers à trouuer accord, ou expedient, au faict dela guerre cōmençee. Et que pour ceste cause, il auoit deliberé d'aller le plus tost qu'il pourroit en Angleterre, pour ceste matiere. Et assez tost apres print congé du Roy, & des Seigneurs. Et feut deffrayé du tout, & si luy donna on des dons, & aux principaux de ses gens. Et ouurit le dict Comte Bertold son opinion & imagination, & dit qu'on feist vnes trefues de quatre ou de cinq ans, & que cependant les enfans & amis de ceux qui estoient morts, croistroient, & pourroit on faire prouision de finances, & habillemens de guerre, ou trouuer paix, & traicté final.

Et s'en alla le dict Empereur en Angleterre, & ouurit aux Anglois aucunes manieres de entendre à paix. Et pour ce faire, les Anglois estoient prests d'y entendre, & de faire aucunes trefues. Si le feist sçauoir au Roy, & à son Conseil, mais on n'y voulut entendre. Et sembloit à aucuns que à l'aide des Ducs de Bourgōgne, & de Brétaigne, & d'autres Princes du Royaume de France, que Harfieu se pourroit recouurer aisément. Le Comte d'Orset, estoit demeuré à Harfieu, avec grosse compaignée d'Anglois, tant de hommes d'armes, que de gēs de traict, & autres hommes de guerre. Et à tout quatorze cents combatans hommes d'armes, & bien deux mille archers, saillit de Harfieu, & tenoit les chāps, & luy sembloit biē que les François au dict pays, n'estoient pas puissans de le cōbatre. Laquelle chose veint à la congnoissance du Comte d'Armaignac, lequel cōme il luy sembloit pouuoit bien finer enuiron dixhuiēt cents cōbatans, tant hommes d'armes, que gens de traict. Et delibera de combatre le dict Comte d'Orset, qui estoit pres d'un lieu, nommé Vaulmont. Et assembla ses gens, auxquels il parla moult grandement & honorablement, en leur donnant couraige, & monstrāt, que combiē que les Anglois feussent plus deux fois, que la multitude n'y faict rien, & n'y ha que bonne volonté de combatre. Et que la querelle du Roy, & d'eulx aussi, estoit iuste & sainte, & debuoiēt auoir esperance en Dieu, qui leur aideroit, & delibererent luy & ses gens de combatre, & d'approcher de leurs ennemis, & ainsi le feirent. Et quand ledict Comte d'Orset veid qu'ils l'approchoient, il feit mestre ses gens à pied, en intentiō de combatre. Et ainsi comme ils descendoient,

le Marechal de Longny d'un costé frappa sur eux, & d'autre costé, le Côte d'Armaignac. Tellemēt que les Anglois se mirent en fuite, & es bois se retrahirent, tous serrez, & en bonne ordonnance, & en y eut de morts & de prins. Et feut aduisé que les diēs Anglois ne pouuoient pas legerement passer, sinon par certain pas. Si feut ordonné que le Marechal de Longny, & ses gens, garderoient le diēt pas. Et le Conneſtable d'Armaignac trouueroit moyen d'auoir chemin pour entrer à eulx par ailleurs. Laquelle chose le diēt de Lōgny ne fit pas: mais passa outre apres les Anglois, cuidant les chasser, & trouuer hors d'ordonnance. Mais la chose estoit bien autrement, car ils estoient mis en belle ordonnance, & serrez, parquoy ils receurent le diēt de Longny tellement, qu'il y eut bien grand dommage de ses gens. Et si ce n'eust esté le Conneſtable qui y suruint, la besongne du diēt Marechal de Longny eut esté tresmal appointée. Les Anglois prindrent leur chemin au long, & par la riuere de Seine, & s'en retournerent à Harfleu, & de leurs gens y eut plusieurs morts, & prins. Le diēt Conneſtable faisoit bone Iustice. Et pource que plusieurs de la compaignée du diēt Marechal s'en estoient fuis de la besongne moult laschement, & deshonestement, il en fit plusieurs pendre, dont les aucuns estoient de bonne Maison.

A Paris, se faisoient emprunts & tailles, & tellement, que plusieurs de la ville en estoient tresmal cōtents, & desplaisans, & en murmuroit on fort.

L'an mille quatre cents & seize, comme dessus ha esté touché, plusieurs estoient mal contents à Paris, de la grande exaction des finances, & y en auoit plusieurs qui desiroient fort la venue du Duc de Bourgogne. 1416.

Et le iour de Pasques, le Roy estoit au Palais, & en sa compaignée le Roy de Sicile, le Duc de Berry, & plusieurs autres. Et quand ce veint au soir, s'en allerent soupper. Et en l'Hostel du Duc de Berry, auoit vn gentil-homme surnommé de Montigny, qui estoit en la grace du Duc de Berry, & auoit accointance aucune en l'Hostel du Seigneur de Treignel, où auoit chevaliers & escuiers de la Court du Roy, qui y souppoient, & venoit à cheual au long de la rue aux febues, & en passant au coing où auoit vn hostel, auquel pēdoit pour enseigne la croix d'or, & y demouroit vn bourgeois nommé Colin du Pont.

G g iij

1416. qui estoit assez riche homme, Il veid par vne fenestre trois compaignōs tous armez, desquels estoit le dict Colin du Pont, & vn surnommé Courtellier, changeur. Et s'en veint le dict de Montigny, en l'Hostel du dict Seigneur de Traignel, & luy dit ce qu'il auoit veu. Et lors il dit à ceux qui estoient de l'Hostel du Roy, Allez vous en bien tost vers le Roy, & vous armez, & fait armer ses gens, & avec ce se habilla. Et y eut tantost en la Cité grand bruit, lequel les dessus dicts ouïrent, & apperceurent que aucunement leur faict estoit descouuert. Si s'enfuirent, & les aucuns feurent prins, & tantost examinez, & trouua-on qu'ils vouloient faire vne commotion. Et en estoient les principaux Maistre Nicole d'Orgemont, nommé le boiteux d'Orgemont, chanoine de Paris, & Maistre en la Chambre des comptes, Robert de Belloy, drappier, & autres. Et le lendemain feurent prins, & confessa le dict de Belloy, qu'ils auoient intention de tuer le Roy de Sicile, le Duc de Berry, & ceux qu'on soupçonnoit estre ou auoir esté du parti du Duc d'Orleans. Et feut son proces faict, & mené aux halles, & là eut la teste couppée. Mais à la requeste du dit Seigneur de Traignel, le Roy ne voulut point qu'on print ses biēs meubles, ne immeubles, & les donna à la femme, & aux enfans. Et au regard du dit d'Orgemont, pource qu'il estoit chanoine de Paris, & diacre, il fut rendu au Chapitre de Paris, lesquels feirent son proces. Et par Sentence, feut priué de tous ses benefices, & estre mené en vn tōbereau par la ville de Paris en aucuns carrefours, mitré, & condamné en chartre perpetuelle au pain, & à l'eau. Et pource qu'on doubtoit qu'il n'eust plusieurs amis à Paris, & aussi auoit-il, on le mena en l'Euesché d'Orleans à Mehun sur Loire, en vne mauuaise & dure prison, & là mourut. C'estoit l'un des hommes du Royaume de France d'Eglise sans Prelature, le mieux beneficié, & bien garni de beaux meubles. Et trouua-on en vn tas d'auoine en son hostel seize mille vieux escus, & estimoit-on ses biens meubles bien de soixante à quatre vingts mille escus. Et eut le Roy tout. Car pour le cas priuilegié, les gens du Roy le condempnerent en cent mille francs. Et combien que les meubles suiussent le corps en tous cas, & feust de crime de lese Majesté, & les deust auoir eu la Iurisdiction Ecclesiastique. Toutesfois tout feut prins par les Officiers du Roy, sans ce que oncques le Chapi-

tre en eut aucune chose. Et au regard des autres qui feurent trouuez coupables, les vns feurent punis corporellement, & leurs biens confisquez. Et aux autres on leur disoit, qu'ils s'en allassent sans prendre aucune chose de leurs biens. Et au regard de ceux qui s'estoient absentez de leur auctorité, leurs biens feurent confisquez, & les personnes declarées bannies. Et pource qu'on veoit euidemment que la plus grand partie du peuple estoit enclin & affecté au Duc de Bourgogne, on feit oster les chaînes des rues de la ville de Paris, & les armeures & harnois au peuple, & leur feit-on commandement qu'ils portassent leurs harnois & bastons au Louure. On feit aussi abbatre les boucheries de Paris, & en feit-on de nouvelles en diuers lieux. Et pource que les bouchers auoient vne Communauté, qui estoit cause de eulx assembler, elle feut condamnée, & abolie. Et toutes les rudesses & autres choses dessus dictes, animoient plus le peuple à aimer le Duc de Bourgogne, & desiroient sa venue. Mais on n'en osoit monstrier semblant.

Le Roy trouua par conseil, que la maniere par laquelle il pourroit plus greuer les Anglois, estoit sur mer. Mais qu'il eust puissance pour ce faire. Et pour ceste cause, il enuoia Ambassades en Espagne, & aussi à Gennes, pour auoir gens, & vaisseaux. Et de Gennes veindrent mille arbalestriers à pied, & estoient neuf Capitaines, dont les Grimaldes estoient les principaux. Et auoit Messire Baptiste de Grimalde, deux cents arbalestriers soubz luy, & en son estandart portoit, *Respecte finem*. Et les autres huit Capitaines, chascun cent. Et n'auoit chascun Capitaine que trois ou quatre cheuaux, & leurs gens à pied, armez de bonnes brigandines, salades, & arbalestres, bien garnies de viretons. Et entrerent à Paris deux à deux, en belle ordonnance, & les faisoit beau veoir. Et feit on tellement que grands nauires venoient tant d'Espagne, que de Gennes, & y auoit de grands vaisseaux, nommez caraques. On les equippa, & garnit-on de gens le mieux qu'on peut. Et voguerent par la mer par aucun temps, & faisoient grand dommage aux Anglois. Et prindrent à diuerses fois plusieurs vaisseaux, dont comme nuls n'estoient prins à rançon, mais les jectoit-on dedans la mer.

1416. En ce temps, l'Empereur estoit encores en Angleterre. Et s'employoit, & faisoit le mieux qu'il pouuoit, pour trouuer paix entre les Roys. Et plusieurs fois enuoya en France pour la matiere, & y eut plusieurs articles faicts à diuerses fois, & en diuerses manieres, & formes. Et finalement accord ou paix ne se peut trouuer. Et conseilloit fort l'Empereur au Roy de France, que on feist trefues de trois ou quatre ans. Et sembloit comme dict est, que les Anglois en eussent esté contents. Mais le Roy de ce ne feut pas cōseillé, veu que de toutes parts venoient secours. Et si auoit-on esperance que le Duc de Bourgogne se aduiferoit, & viendroît pour faire guerre aux Anglois.

Après que les nauires dessus dicts eurent esté par aucun temps sur la mer, ils se retrahirent vers Dieppe, & en autres diuers lieux. Les Anglois voians & considerans qu'ils auoient grand dommaige sur la mer, delibererent d'y resister, & feirent finance de bons & grands vaisseaux, & en intention de distraire les vaisseaux des François, & de leurs alliez. Et de faict, se meirent sur mer. Or estoient les François descendus de leurs vaisseaux à terre, & s'en veindrent en leurs marches. Les nouuelles veindrent que les Anglois estoient sur mer, & que les Ducs de Bethfort, & de Clocestre, freres du Roy d'Angleterre, y estoient en leurs personnes. Si fallut necessairement y pourueoir. Et enuoya-on deuers le Duc de Bourgogne, pour auoir gens à y aider. Mais il n'en voulut rien faire. Et estoit voix & commune renommée qu'il estoit allié aux Anglois. Le Roy auoit neuf grands vaisseaux esquels se meirent le Vicomte de Narbonne, les Seigneurs de Montenai, & de Beaumanoir, le bastart de Bourbon, & autres, accompagnez de bien peu de gens, veu la grandeur des vaisseaux. Et y auoit vne partie des gens, qui estoient des arbalestriers venus de Gênes. Et en c'est estat cinglerent par mer, & trouuerent les Anglois en bel estat & ordonnance, & s'assemblerent & combaterent fort, & faisoient les Geneuois merueilles d'armes. Et si le nauires des François eut esté bien garni de gens, comme il n'estoit pas à moitié, les Anglois n'eussent point arresté. Et en effect les François feurent desconfits, & eurent deux de leurs vaisseaux peris en la mer, & deux prins. Et si les Anglois eurent l'honneur, routesfois y eurent-ils grand perte de gens. Les autres vaisseaux des

des François, & ceux qui estoient dedans, se retrahirent à Brest. 1416.
en Bretagne.

Ceste année, mourut le Duc de Berry, qui feut grand dommage pour le Royaume. Car il auoit esté en son temps vaillant Prince, & honorable. Et se delectoit fort en pierres pretieuses. Festoitioit tresuolontiers les estrangers, & leur donnoit du sien largement.

* Apres la mort de feu Monseigneur de Guyenne, fils aîné du Roy, & Daulphin, estoit le second fils Iean, qui auoit espousé la fille du Comte de Hainault. Lequel feut tenu & réputé Daulphin, & ainsi le nommoit-on. Et estoit en Hainault, quand il sceut la mort de son frere Louys. Si delibera de s'en venir à Paris, & aussi le Roy l'auoit mandé. Et s'en veint à Compiengne, & en la dicte ville, luy print vne maladie, dont il alla de vie à trespassement, qui feut bien grand dommage. Car le Comte de Hainault, estoit bien saige Seigneur, & auoit intention que par son bon moyen paix se trouueroit avec le Duc de Bourgongne.

Apres la mort de Iean, feut Daulphin Charles, qui auoit espousé la fille du Roy de Sicile. Lequel Monseigneur le Daulphin, combien qu'il feust ieune d'aage, toutesfois il auoit bien bon sens & entendement. Et auoit à Chancelier, vn bien prudent & saige clerc, nommé Maître Robert le Masson.

Les gens du Duc de Bourgongne autour de Paris faisoient maux innumerables. Et prindrent Beaumôt, qui estoit au Duc d'Orleans. En la terre duquel Seigneur, ils faisoient guerre mortelle, combien qu'il feust prisonnier des Anglois, qui estoit bien piteuse chose. Aucuns se voulurent entremettre d'y mettre paix: mais rien ne feut parfait. Car tousiours le dict Duc vouloit venir à Paris deuers le Roy, & Monseigneur le Daulphin, & que plusieurs notables gens vuidassent, & que les bouchers & autres, qui auoient fait les maux dessus dicts, retournaissent. Ce que iamais on n'eust accordé.

Au mois d'Aoust, le Roy d'Angleterre descendit à Touques en Normandie, à bien trente mille combatans. De laquelle place estoit Capitaine Messire Iean d'Angennes. Et y auoit commis vn, qui s'appelloit Bonenfant, lequel rendit la place sans coup ferir bien laschement, & s'en veint. Et aussi il eut la teste couppée à bone cause, & raison, & vn sien cōpaignō aussi.

H h h

1417.

L'an mil quatre cents & dixsept, Il y auoit grandes guerres & terribles diuisions par le Duc de Bourgongne, cuidant tousiours venir à sa fin, d'auoir le gouuernement du Royaume. Et ne luy portoiēt les Anglois aucun dommage. Car, aussi disoit-on publiquement, qu'il auoit alliance avec eux. Et y auoit bien grande apparence. Et auoit gens sur les chāps, qui faisoient tous les maux qu'on pourroit faire, comme pilleries, robberies, meurtres, & tyrannies merueilleuses, violōces femmes, & prenoient à force, entroient par force, & autrement, dedans les Eglises, les pilloient & robboient, & en aucunes boutoient le feu, & en icelles faisoient ords & detestables pechez.

Aucune renommée estoit, que en l'Hostel de la Roïne, se faisoient plusieurs choses deshonestes. Et y frequentoient le Seigneur de la Trimouille, Giac, Bourrodon, & autres. Et quelque guerre qu'il y eust, tempestes, & tribulations, les Dames, & Damoiselles menoient grands & excessifs estats, & cornes merueilleuses, hautes, & larges. Et auoit de chascun costé, en lieu de bourlées, deux grandes oreilles si larges, que quand elles vouloient passer l'huis d'une chambre, il failloit qu'elles se tournassent de costé, & baissassent, ou elles n'eussent peu passer. La chose desplaisoit fort à gens de bien. Et en firent aucuns mis hors, & Bourrodon prins, & pour aucunes choses qu'il confessa, feut jeté en la rivière, & noié. Et feut deliberé pour plusieurs causes, que la Roïne s'en iroit à Blois, pour estre loing de la guerre, & y feut enuoiée.

On exigeoit argent, où on le pouuoit trouuer à Paris, iusques à la prise des reliques de Saint Denys. Et mesmement feut desgarnie la chasse de Saint Louys, qui estoit toute couuerte d'or, & en feit-on des moutons, vallants vn escu la piece, iusques à trentemille. Et selon ce qu'on disoit, cela ne porta aucun profit, ou bien petit.

Le Duc de Bourgongne, feut faire lectres à plusieurs bonnes villes, où il disoit, & meetoit ce que bon luy sembloit, pour icelles subuertir, & mettre hors de l'obeissance du Roy, bien feditieuses. Et en enuoia à Rouen vnès, lesquelles feurent receues par ceux la ville, & leues. Et soudainement se meirent en l'obeissance du Duc de Bourgongne. Le Baillif, qui estoit Seigneur de bien, y cuida remedier. Mais ils le tuerent mau-

uaifement, mais tousiours le chastel se teint en l'obeïssance du Roy. La chose venüe à la congnoissance de Monseigneur le Daulphin, il y alla incontinent, & entra dedans le chastel. La ville se reduisit, & feurent prins les principaux, lesquels eurent les testes trenchées. Et s'en retourna le dict Monseigneur le Daulphin à Paris. Les villes de Rheims, Chaalons, Troyes, & Auxerre, à grand ioye se meirent en l'obeïssance du Duc de Bourgongne, & preindrent la croix de Sainct André, en disant, Viue Bourgongne. Apres la redditiō d'icelles, par tout on prenoir les gens du Roy, qui au temps estoient Officiers, & leur couppoit-on les testes, & pilloit, & robboit-on leurs biens. Et pour faire tuer vn homme, il suffisoit de dire, Cestuy là est Armagnac. Aussi pareillemēt quand on pouuoit sçauoir, ou trouuer quelques vns qu'on sçauoit tenir le parti du Duc de Bourgongne, ils estoient punis, & leurs biens prins. Et estoit grand pitié à gens d'entendement, de veoir les choses en l'estat qu'elles estoient. On se doutoit fort que à Paris il y en eust, qui auoient grand desir que le Duc de Bourgongne y entrast. Et cōbien qu'il y eust assez matiere d'en prendre aucuns, & leur faire desplaisir de leurs personnes, & prendre de leurs biens: toutesfois on ne le voulut pas faire. Et à ceux qu'on sçauoit euidentement estre trop extremes, on leur disoit gratieusement, qu'ils s'en allaissent, & au regard des biens, qu'ils en feissent à leur plaisir. Et y en eut plusieurs tant de Parlemēt, que de l'Vniuersité, & plusieurs notables bourgeois, & marchands, lesquels à grād regret s'en allerent. On ordonna certains Capitaines à Paris, tant de guerre, quē autres, qui auoient les garde & gouuernement des portes. Les villes de Beauuais aussi, & de Senlis, se meirent en l'obeïssance du Duc de Bourgongne.

Le Comte d'Armagnac, Connestable de France, estant à Paris, le Seigneur de l'Isle-adam enuoia vers luy, en luy escriuant que s'il luy vouloit bailler charge de gens d'armes, iusques à cent cheualiers, & escuiers, qu'il les fineroit pour employer au seruice du Roy. Lequel Connestable luy manda qu'il auoit assez de gens. Plusieurs nobles aussi s'offroient, lesquels il refusa, dont grand mal en veint. Car ils se meirent en l'obeïssance du Duc de Bourgongne.

Beaumont, qui auoit esté prins par les Bourguignons, feut recouuert par les gens du Roy, & y eut de ceux de de-

H h h ij

1417. dans plusieurs morts, & prins. Le Seigneur de Viepont, auoit charge de gens d'armes de par le Duc de Bourgogne, & auoit le gouuernement de Champaigne. Il estoit sur les champs avec certaine quantité de ses gens, & recontra des compagnons, qui portoient la croix droïte, lesquels il print, & les voulut amener à Beaumôt, cuidant, qu'il feust encores en l'obeïssance Duc de Bourgogne. Et feut rencontré par ceux qui estoient dedans, & les François qu'il auoit prins, rescous. Et le dict Seigneur de Viepont prins, & mené à Paris, & là eut la teste couppee.

En l'Isle de Frâce és forests de Hallate, de Senlis, & de Montmorency, brigands se meirent sus, qui faisoient maux innombrables. Et tous ceux qu'ils prenoient, tuoient, & spécialement ceux qui portoient la croix droïte. Mais aussi bien couroient-ils sus presques à tous autres.

Aucuns dient que en ce temps feut la bataille sur mer des François & Anglois, où estoit le bastard de Bourbon, dont dessus est fait mention, où les François par default de leurs vaisseaux mal equippez de gens, feurent desconfits. Et selon ce que disoient mesmes les Anglois, ce feut merueilles de la bataille des François, & des armes qu'ils feirent. Et y eut le Roy bien grand dommaige.

Le Roy d'Angleterre, accompagné de bien cinquante mille combatans, comme on disoit, vint mettre le siege deuant Honnefleu en Normendie. Et ordonna ses gens, & son artillerie. Et y feut bien trois semaines. Ceux de dedans la place se defendirent fort. Et y eut de vailhantes armes faictes, & de traict y auoit assez, lesquels spécialement porterent grand dommaige aux Anglois. Le Roy d'Angleterre, voyant que pour lors il ne les pourroit aisément auoir, s'en partit, & s'en vint deuant Caen, où estoit le Seigneur de Montrenai, qui devoit auoir en sa compaignée quatre cents combatans, & pour tel nombre feut-il payé, & contenté, lequel n'en auoit pas deux cents. Et apres que le Roy d'Angleterre y eut esté par aucun temps, il entra dedans. Du chastel de Toncques, & de Caen, s'en alla le dict Roy, & vint passer par deuant Falaise, qui estoit bien garnie de gens de guerre, & alla deuant Argenten, de laquelle estoit Capitaine vn nommé Larconneur lequel assez aisément la rendit. Et d'Argenten, vint deuant la ville, & chastel d'Alençon, dont estoit Capitaine le Galois.

d'Ache,cheualier,& n'y feut le dict Roy d'Angleterre, que vn iour,& vne nuit,qu'il ne la rendist. D'Alençon enuoia iceluy Roy d'Angleterre deuant Fresnoy, & plusieurs autres places, lesquelles se rendirēt. Et auant qu'il se partist du dict lieu d'Alençon,le Duc de Bretagne veint deuers luy.Et disoit on que le Duc s'agenouilla,& feut assez longue piece à genouils deuant luy,auāt qu'il luy dist, leuez vous. Et y eut plusieurs parlemēs, & finalement on disoit que le dict Duc traicta pour son pays de Bretagne,& auoit faict certains sermens bien grands, contre la loyaulté qu'il debuoit au Roy son souuerain Seigneur. Le Roy d'Angleterre auoit en sa cōpaignée les Ducs de Clarence, & de Glocestre, ses freres, & les Comtes de la Marche, d'Orset, Vuaruic, Arondel,Salbery, Suffolc, Quent, & plusieurs autres Barōns. Et quand il veid qu'il ne trouuoit aucune resistance, il enuoia mettre le siege deuant plusieurs places fortes, Comme le Comte d'Orset, deuant Cherbourg, Messire Henry Philizen,grand Chambellan,deuant Danfront, le Côte de Vuaruic,& le Seigneur de Talbot,deuant Bayeux, Cōstances,Carenten,&autres places.Et ne trouua resistance,sinō à Cherbourg,où il y eut plusieurs beaux faicts d'armes, & seulement sy reindrent trois mois. Et ne trouuoiet personne qui resistast, sinon aucuns de ceux du pays, qui estoient retraicts dedans les bois,dont estoit Capitaine vn qui se nommoit Mixrondin, & tous ceux qui faisoient guerre, se nommoient à luy. Et feut la ptemiere resistance, qu'ils trouuerent en Normen-
ie.

En ce temps,es Dioceses de Chaalons,& de Troyes, se leua vne fouldre,ou tonnerre, & merueilleuse tempeste de gresle. Et bien par quatorze heures feurent tous les bleds, vignes, & autres fructs destruits, fouldroiez, & batūs, mieux que de fieux, & tua plusieurs personnes. Et en aucunes des personnes qui feurent tuées, feut trouué que leurs os estoient tous comminuez & desrompus, sans ce que la peau & la chair feussent aucunement entamez.

La fouldre cheut à nostre Dame de Essonne, & se assit vers le crucifix, & en rompit les bras, & les iecta à terre, & laissa le demeurant aussi noir que charbon. Et toutes les imaiges, qui auoient aucune representation de la passion de nostre Sauueur Iesus-Christ,feit tous noirs comme le crucifix. Et s'en al-

1417. la, & demeura vne puanteur si merueilleuse, que par aucun temps il n'y auoit personne qui peust demeurer en l'Eglise.

Le Duc de Bourgongne voyant que le pont de Beaumont luy seroit bien seant, veint deuât la place, & l'assiegea. Et par le moyen du Seigneur de Lille-adam luy feut rendue, & vendue. De là s'en alla à Beauuais, & meit de toutes parts garnisons autour de Paris, lesquels faisoient tous les maux. qu'ils pouuoient & scauoient.

Le Roy delibera d'enuoier vne Ambassade vers le Roy d'Angleterre. Et y feut l'Archeuesque de Rheims, qui lors estoit, & plusieurs notables gens de diuers estats. Et les receut le Roy d'Angleterre bien gratieusement, & y eut plusieurs matieres ouueres d'auoir paix. Mais il voioit les diuisions qui estoient, & luy sembloit bien qu'il auroit tout. Et n'y feirent rié les dicts Ambassadeurs, parquoy s'en reueindrent à Paris. Ils sceurent par aucuns Normands, qui estoient ia avec le Roy d'Angleterre, les alliâces & promesses qui estoient entre luy, & le Duc de Bourgongne. Esquelles toutesfois il ne se fioit pas trop, & luy sembloit que son alliance n'estoit pas seure, veu les manieres qu'il tenoit contre le Roy son souuerain Seigneur.

La ville de Pontoise, se meit, rëdit, & obeit au Duc de Bourgongne, De laquelle estoit Capitainë vn gentilhomme nommé Maurigō, qui ne s'en doubtoit point, n'y n'en voioit aucune apperceuance. Et soudainement preindrēt la croix de Saint André, & bouterent hors les gens du Roy, & veindrent les gēs du Duc de Bourgongne, pour entrer dedans. Et auant qu'on les laissast entrer, iurerent, & promeirent que aucuns desplaisirs, ne dommaiges ne seroient faicts aux habitans. Mais les cōserueroient & garderoient en leurs personnes, corps, & biens meubles, & immenbles. Et apres les promesses ainsi faictes, entrèrent dedans, & pillerent & robberent vne partie des bourgeois de la ville, & mesmement des plus riches. Et en ce temps quiconque estoit riche, il estoit reputé Armaignac, & pillé, robbé, ou tué.

Le Duc de Bourgongne auoit intention d'aller deuât Saint Denys. On le sceut, & pource on enuoia dedans deux vaillāts cheualiers, l'vn nommé Messire Guillaume Bataille, & l'autre, Messire Hector de Pere, bien accompagnez de gens de guerre. Et quand le Duc le sceut, il se deporta d'y aller, & s'en alla

vers Saint Germain en laye. Et le pont de Poissy, Meulant 141 7.
Mante, & Vernon, se rendirent & meirent en son obeissance.
Et par tout, les nobles, & specialement les riches, estoient pillés,
& robbez, ou rançonnez, & les aucuns mis & boutez dehors.

Le Duc de Bourgongne veint deuant le pôt de Saint Cloud,
& sembloit à ses Capitaines, qu'ils l'auroient legierement, &
enuoia incontinent sommer celuy qui en auoit la garde, nom-
mé Adenet Trochelle, qu'il luy rendist la place. Lequel respō-
dit que le Roy lui auoit baillé la Capitainerie, & luy auoit faict
faire le serment, qu'il ne la renderoit qu'à luy, ou à Monsei-
gneur le Daulphin, & que autrement il ne la bailleroit. Et lors
on feit approcher les canons & bombardes, & iecterent les
dicts engins, & feit on plusieurs essais par plusieurs fois pour
l'auoir, mais rien n'y profitoit. Et auoient les Capitaines de
dedans bonne volonté de eulx defendre, & si estoient garnis
de bon traict, & portoient grand dommaige aux gens du Duc
de Bourgongne, & plusieurs en tuoient & nauoient. Et fina-
blement si vaillamment se porterent, que les Bourguignons à
leur grand honte & confusion s'en allerent. Et les aucuns s'en
allerent bouter le feu en vne maison, qui estoit au dict Sei-
gneur de Traignel, assise en vn villaige, nommé Rueil, qui
estoit l'un des plaisans lieux & delectables, qu'on peust trou-
uer. Ery auoit de moult belles fontaines, dont ils rompirent
& despecerent les pierres moult belles. Et si y auoit vne chap-
pelle moult plaisante, qui feut toute arse.

Au partir de Saint Cloud, le Duc de Bourgongne s'en veint
deuant Paris à Montrouge, Vaugirard, Meudon, Vanues, & en
tout ce pays du costé des portes de Saint Iacques, & de Saint
Michel, & bourdelles, & faisoit maux innumerables. Et mon-
stroit euidemment qu'il taschoit à assieger Paris, & y cuider
entrer par force, ou par quelque trahison. Mais ceux mes-
mes qui auoient à luy affection, estoient tresmal contents. Car
il voioit les Anglois conquerir en la Duché de Normandie,
Auquel il se deust estre employé à y resister, & en ce faire son
debuoir. Et il faisoit guerre en effect au Roy, & destruisoit
le pays, dont le Roy se pouuoit aider. Parquoy on imagi-
noit, & faisoit conclurre, qu'il estoit allié aux Anglois. Car
en effect il leur aidoit tant comme il pouuoit, ou au moins
empeschoit que les gens du Roy ne s'employassent à defen-

1417. dre le Royaume contre les anciens ennemis. On meit gens tant de guerre, que autres, à la garde des portes, spécialement à celles de Saint Iacques, & de bourdelles, car les autres estoient fermées. A celle de Saint Iacques estoient commis Messire Robert de Loire, Pelisson, bourgeois, & Messire Baptiste de Grimalde avec les Genevois, & tous les iours deux dixaines de Paris. Et de iour & de nuict auoit gens de guerre, & des arbalestriers, qui gisoient dedans le bouleuuant, & defendit on qu'on ne laissast istre personne. Et à la porte bourdelles, auoit des Gualcons soubz vn cheualier nommé Messire Daudonnet, & des gens de Paris. Ceux de dehors faisoient escrire à aucuns de Paris plusieurs lettres, pour cuider faire aucunes commouions & seditions. Mais ceux qui les receuoient, les apportoint au Conseil du Roy. Et entre les autres, vn cheualier nommé Messire Iean de Neufchastel, Seigneur de Montaigu, enuoia vnes lettres par vn poursuuant au dict Seigneur de Traignel. Car ils estoient parens, & au temps passé bons amis, lesquelles estoient bien sedicieuses, & furent monstrées au Conseil du Roy, & n'en teint on compte. Et vint le dict Seigneur de Traignel à la barriere parler au dict poursuuant. Et luy demanda, s'il diroit au Duc de Bourgogne, ce qu'il luy diroit, lequel respondit que ouy. Et lors le dict Seigneur de Traignel luy dit, Dictes à Monseigneur de Bourgogne, que ce n'est pas honneur à luy, que ses gens ardent les maisons, & que c'est petite vengeance, & qu'on ha bouté le feu en ma maison de Rueil, & que si luy ou ses gens luy vouloient rien demander, on le trouueroit à la barriere. Lequel poursuuant, après ce qu'il l'eut dict au dict Duc de Bourgogne, il fait crier, qu'on ne boutast aucuns feux. Peu d'escarmouches y auoit, car on auoit defendu que personne ne faillist. Toutesfois les arbalestriers de Gennes, failloient auoues fois à pied, tous armez, à tout leurs arbalestres & leurs carquois garnis de viretons, & se embuscherent és vignes, & maisons, & tuoient des cheuaux, & des gens du Duc de Bourgogne, & amenoient leurs bagues à Paris. Et vne fois adueint que les gens du Duc de Bourgogne, delibererent de les prendre, ou tuer, & meirent vne bien grosse embusche derriere les chartreux, & y eut vne partie, qui veindrent vers nostre Dame des champs, pour les cuider enclore, & se leua vne escarmouche. Messire Guichart de Loire, monta

monta à cheual, & avec luy de trente à quarante lāces, & vein- 1417.
drent vers le chemin de Montrouge. Et commencerent gens
d'armes des villaiges à faillir, & l'embusche des chartreux, se
meit entre eulx, & la ville. Et le dict de Loire, & ses gens, voīas
qu'ils estoient comme enclos, frapperent par le milieu, & pas-
serent outre, & s'en veindrēt bouter à nostre Dame des chāps,
par la porte qui va aux chartreux. Et y perdit vn homme d'ar-
mes, & feut suiui iusques à la dictē porte, où il y auoit des Ge-
neuois, & y en eut de vingt à vingt quatre de morts, & des
Bourguignons aussi en demeurail. Et y eut à Paris vne gran-
de alarme. Et veint le Comte d'Armaignac, & vne grande par-
tie de ses gens tous armez iusques à la porte, & s'estoient les
François la tous retraicts en la ville, & feut tresmal content de
ce qu'on estoit issu, veu les defenses qui auoient esté faictes
qu'on ne laissast personne issir, & dit qu'il feroit couper les
testes à ceux par lesquels ce auoit esté faict. Mais il feut rap-
paifé.

Les gens du dict Duc de Bourgongne meirent le siege à
Ourfai, vn chastel qui estoit de nouueau faict vers Marcouffis.
Et en estoit chef vn Sauoisien, nommé Messire Vuatelier Vast,
qui auoit grand charge de gens. Et ce veint à la congnoissance
du dict Messire Dandonnet, qui estoit à la porte bourdelles.
Lequel assembla des gens, & à vn soir partit de Paris. Et à vn
point du iour veint frapper sur ceux qui tenoient le dict sie-
ge, lesquels ne s'en donnoient de garde, & leua le dict siege, &
plusieurs en tua, & en amena aucuns prisonniers à Paris, au-
squel il feit bonne compaignée, & les renuoia en payant vne
legere finance.

Ceux de Prouins, auoient vn Capitaine bien homme de
bien, nommé Pierre de Chailly, qui auoit esté à Madame de
Guyēne, fille du Duc de Bourgogne, lequel les gouuernoit le
plus doucement qu'il pouuoit. Et au pays, auoit vn Capitaine
nommé Cablot de Duilly, Lorrain, qui auoit grande compai-
gnée, & gēs de toutes nations en la compaignée. Lequel ceux
de la ville à vn matin meirent dedans, & luy ouurirent la por-
te. Mais premierement luy feirent iurer & promestre, qu'il ne
pilleroit ou robberoit personne en la ville, & se gouuérneroit
bien & doucement, sans faire desplaisir à personne. Et moyen-
nant la dictē promesse, luy & ses gens entrerent en la dictē vil-

1417. le. Et n'y peut le dict de Chailly remedier, & luy mesme feut prins, & l'enuoia on dehors, luy, & ses seruiteurs, & cheuaux. Et quand le dict Cablot y eut esté par aucun temps, il en pillà & robba ainsi, & de tels que bon luy sembla, specialement de ceux qui auoient argent, ou renommée d'estre riches. Et commença à courre le pays, piller, & robber, & bouter feux, selon ce qu'on ha accoustumé de faire en Lorraine. Et pour abbreger, faisoient luy & ses gens maux innumerables.

En la Brie, brigans se meirent sus, specialement emmy les bois, & sy estoient assemblez bien de cinq à six cents vers Motaigu. Le Baillif de Meaulx se meit sus pour y remedier, & en feit pendre que tuer en la place bien quatre cents. Et ainsi le pays fort se depeuploit, les vns s'en alloient en pays loingtains, ou il n'y auoit point de guerre, & les autres on les tuoit, ou mouroient de faim.

Vn Capitaine de gens d'armes estant au Comte d'Armaignac, print Beaumont sur les gens du Duc de Bourgogne. Lequel Duc delibera de mestre le siege à Corbeil, & luy sembloit qu'il l'auroit aisément. Mais depuis qu'il l'eut assiegé secretement, le Seigneur de Barbasan, & Bertrand de la Tour, entrerent dedans la ville du costé de delà. Et y feut le dict Duc, & son Ost deuant. Mais il apperceut bien qu'il perdoit ses peines, & s'en partit, & delaisa son siege. Car il y perdoit de ses gens, tant par les faillies que faisoient ceux de dedans, comme aussi des canons, & traict, dont ils estoient bien garnis.

Le Duc s'en veint apres vers Montlehery, & se rendirēt ceux de dedans par certaine composition, sans coup ferir.

Les villes de Troyes, & de Chartres, se meirent en l'obeissance du Duc de Bourgogne. Et y eut des Officiers du Roy, & des gens riches, reputez Armaignacs; pillez, & robbez, & aucuns executez. Les autres s'absentoient, & abandonnoient tout, dont plusieurs estoient moult gens de bien.

Et comme dessus ha esté dict, on enuoia la Royne hors de Paris, pour estre plus seuremēt, & hors de la guerre, vers Blois, & Tours, dont elle estoit tref-mal contente. Car on luy osta aussi le gouuernement des finances, & luy diminua on son estat, tant de gens, que d'argēt. Et quand le Duc de Bourgogne sceut qu'elle estoit ainsi indignée, il enuoia secretemēt vers elle: luy parler de bouche. Et par l'issüe qu'on veid depuis, il y eut:

conclusion prinse entre la Roynie & le Duc, qu'elle s'en iroit ^{1417.} en pelerinaige à Marmontier, & que là il veinft. Et le deuxiesme iour de Nouembre, sans ce qu'on s'en donnast garde, sans grande quantité de ses gens soubdainement s'en veint à Marmontier, & là trouua la Roynie, & s'entrefeirent tresbonne chere. Et quelques dissentions qu'il y eust eu au temps passé, touchant les desplaisirs que le Duc luy auoit faict au temps passé, tout feut pardonné, & feut la paix faicte. Ety eut des gens de la Roynie prins, & mis à finance comme ennemis. Et mesmement Maistre Guillaume Toucheau, son Chancelier, & Maistre Iean Picart, son Secretaire. Et se rendit la ville de Tours au Duc de Bourgongne, & y en eut de prins, & pillez, & les autres boutez hors, & faict comme aux autres villes. Et de là s'en alla à Ioungny, & emmena la Roynie avec luy.

Le Duc de Bourgongne auoit laissé gens dedans Montlehery. Messire Tanneguy du Chastel, Preuost de Paris, alla deuant, & recoura la place, & la mit en l'obeissance du Roy. Et feut par composition, que ceux de dedans s'en allerent saulues leurs vies.

Et pource que plusieurs saincts Peres auoient au temps passé donné & octroïé aux Roys de France Bulles, par lesquelles ils vouloient & declaroient excommuniez tous ceux qui feroient assemblées de gens d'armes sans le congé & licence du Roy, & mesmement telles, & en la forme, & maniere, que faisoit le Duc de Bourgogne, Il feut aduisé par notables clerics, & conclud, que le dict Duc de Bourgogne, & tous ses adherens, fauorisans, & complices, estoient excommuniez, & tels on les debuoit denoncer & publier, & ainsi feut faict.

Et comme dict est, le Duc de Bourgogne, & ses adherens, taschoient tousiours à trouuer maniere qu'il entraist dedans Paris. Et y eut vne bande d'un homme d'Eglise, & aucuns meschants mesnaigers de Paris, qui entreprendrēt certain iour pour le faire entrer par la porte bourdelles. Et feirent leur conspiration en vne maison estant pres des murs és marches de la dicté porte. Et dict aucuns que vn ferrurier de leur ligue auoit contrefaict des clefs, & si auoient limes, & sies sourdes, & grosses turquoises, & habillemens, pour legerement ouurir la dicté porre. Et preindrent iour, & heure, pour ce faire.

Iiiij

1417. Ce qu'ils feirent ſçauoir au Duc de Bourgongne, & l'un d'eulx meſmes eſtoit allé vers luy, & promet de amener ou enuoier gens au iour & heure. Et que luy meſmes ſ'approcheroit, ce qu'il n'oublia pas. Et enuoia au iour, & heure, & approcha. Et entre les autres Capitaines de guerre, il y enuoia Meſſire Hector de Saueuſe, vaillant cheualier. Or eſt vray qu'il y auoit en la rue de Saint Iacques, vn pelletier, qui en eſtoit conſentant, lequel aduiſa & conſidera le grand inconuenient qui ſ'en pouoit enſuiuir. Et ſ'en veint le ſoir, dont l'entreprinſe en la nuit ſe debuoit faire, vers Meſſire Tanneguy du Chaſtel, Preuoſt de Paris, en luy priant qu'il luy vouluſt faire pardonner ce qu'il auoit meſprins, & il luy diroit vne grande mauuaiſtié d'une conſpiration faiſte contre la ville. Lequel Preuoſt luy promet ce qu'il requeroit, & encores qu'il ſeroit remuneré. Et lors il luy va déclarer, ce que dict eſt. Et que ceux qui le debuoient faire, ſ'il vouloit, enuiron dix heures au ſoir il les trouueroit en la dicté maiſon tous assemblez, laquelle eſtoit à Maïſtre Iacques Brault, qui eſtoit Conſeiller du Roy en Parlement. Le Preuoſt ne dort pas, & alla à la dicté maiſon, & là les trouua, & feurent tous prins, & menez en Chaſtellet. Et au ſurplus on meit guet ſur la porte, & y eut des arbaleſtriers de Paris, qui auoient de bien fortes arbaleſtres. Les gens du Duc de Bourgongne veindrent, & des premiers veint Meſſire Hector de Saueuſe, & ſes gens, leſquels feurent bien ſeruis de trait, & y feut nauré le dict Meſſire Hector, ſi ſ'en retournerent. Et de ceux qui feurent prins & mis en Chaſtellet, en y eut pluſieurs, qui eurent les teſtes coupées. Et à celui qui auoit reuelé la choſe, feut tenu ce qu'on luy auoit promis, & luy dōna on largement argent. Et par Paris pource qu'il auoit ſalué la ville, on l'appelloit le Sauueur.

Le Duc de Bourgongne és villes qui ſ'eſtoient miſes en ſon obeïſſance ſeit cheoir les aides, & ne payoit on quelques ſubſides, & croit on fort Viue Bourgongne. Et viuoient ſes gens ſur les champs, & des biens de ceux des bonnes villes qu'on appelloit Armaignacs, qui eſtoient communément les plus riches, & mieux meublez. Et ceux de la ville & Cité de Roüen, ſe reduiſirēt derechef en l'obeïſſance du Duc de Bourgongne, & pillerent & robberent tous les officiars du Roy ſur le ſaiſt des Aydes, & auſſi les fermiers. Et en y eut de prins des

plus riches de la ville, lesquels feurent mis à finance, & paye- 1417.
rent argent, & demurerent. Et aucuns autres feurent iectez
en la riuere, ou tuez. Et estoit grande & excessiue pitié des vil-
les où les cas aduenoient.

Le Roy d'Angleterre en Normendie ne trouuoit aucune re-
sistance, & en peu de temps conquesta presques toute la Du-
ché d'Alençon, & eut Lisieux, & Eureux. Il meit le siege deuant
Falaise, dôt estoit Capitaine Messire Oliuier de Mauny, lequel
estoit au chastel. Et en la ville, estoit le Mareschal de la Fayette,
lequel ne teint guieres la place, & fut rendüe au Roy d'An-
gleterre. Mais le chastel ne feut pas si tost rendu. Car Messire
Oliuier estoit vn vaillant cheualier, & luy & ses gens fort se de-
fendoier. Et y proceda le Roy d'Angleterre par iecter bôbar-
des, & canons, & faire mines. Et veu qu'il ne se pouuoit guieres
renir, & si scauoit bien qu'il n'auroit aucun secours, rendit la
place par certaine composition. Et mesmement s'obligea le
dict de Mauny de remettre la place en l'estat qu'elle estoit au
temps que le Roy d'Angleterre y meit le siege. Et de ce, fallut
qu'il baillast bonne seureté. Et eut le Roy d'Angleterre toute
la basse Normendie en sa main, excepté le mont Saint Mi-
chel.

Le Duc de Bretagne s'en reuint deuers le Roy d'Angleter-
re. Et disoit-on qu'il s'estoit aucunement allié avec luy. Et quoy
qu'il en feust, luy auoit promis de non luy nuire à la conqueste
qu'il faisoit. Plusieurs places se rendoient, & mectoient plusieurs
sieges. Aussi n'y auoit-il personne qui resistast, sinon vn qui se
nommoit le bastart Mixoudin, lequel faisoit plusieurs courses
sur les Anglois, & leur portoit de grands dommaiges. Il meit le
siege au pont del' Arche, & le print. Et cependant France par
ses gens mesmes se destruisoit. Le Roy d'Angleterre veint de-
uant Dreux. Et dedans estoit vn Capitaine nommé Messire
Raimonnet de la Guerre, qui auoit assez bonne compaignée
de gens de guerre, & faisoit plusieurs faillies, & fort se defen-
doit. Et estoit merueilles des belles & vaillâtes armes qu'il fai-
soit. Et s'en esbahissoier le Roy d'Angleterre, & tous les Prin-
ces, & gens de guerre de son Ost.

En ce temps, Pape Martin feut esleu Pape à Rome.

Barbasan, & Messire Tanneguy du Chastel, estoient vers
Estampes, & meirent en l'obeïssance du Roy plusieurs places.

1417. lesquelles s'estoient rendües en l'obeïſſance du Duc de Bourgongne. Et veindrēt deuant Cheureuse, où auoit de vaillāts gēs de par le Duc de Bourgongne, lesquels fort se defendoient. Et enuoierent les dits Barbaſan, & Tāneguy à Paris, querir des gens, & de l'artillerie. Et y feurent enuoiez aucuns, ainſi qu'ils le requeroient. Et fut apres que la ville eut eſté batüe, aſſaillie, & prinſe d'aſſault. Et y eut des aſſaillans qui ſe porterēt vaillamment, & auſſi ceux de dedans, ſe defendoient merueilleuſement, & y eut des aſſaillans bleſſez. Au regard de ceux de dedans, peu y en eut de mis à fināce, & ſ'en retournerēt les gens du Roy à Paris,

A Senlis, auoit vn Capitaine nommé le baſtard de Thien, que on nommoit & reputoit vaillant homme, & auſſi eſtoit-il. Luy & ſes gens, faiſoient beaucoup de maux autour de Paris, en pluſieurs manieres. Et pour ce feut deliberé & conclud au Conſeil du Roy, que nonobſtant l'occupation, & la grand peine, & travail qu'on auoit de reſiſter d'un coſté aux Anglois, & d'autre part aux entreprinſes du Duc de Bourgogne, & aux maux que ſes gens faiſoient, qu'on mettroit le ſiege à Senlis. Et ſe partirent pour ceſte cauſe de Paris, le Comte d'Armaignac, Conneſtable de France, le Seigneur de Barbaſan, & le Preuoſt de Paris. Et le Roy alla à Creil, & là ſe renoit. Le baſtard de Thié faiſoit des ſaillies, & ſouuent à la perte de ſes gens, & aucunes fois faiſoit du dommaige. Ceux de la ville ne demandoient que traité, & eulx mettre en l'obeïſſance du Roy. Mais les gens de guerre eſtans avec le baſtard eſtoient maiſtres. Toutesſois maniere de traité feut ouuerte, & y entendit le Roy, & ceux qui eſtoient avec luy, car on auoit trop à faire en pluſieurs lieux. Et y eut accord fait, que les gens de guerre ſaulues leurs vies & biens ſ'en iroient, & abolition faiſte à eux, & à ceux de la ville. Et pour entretenir le dict traité, baillèrent ceux de la ville oſtaiges gens notables, c'eſt à ſçauoir, l'Abbé de Saint Vincent, l'Aduocat du Roy, & ſix autres. Et ſoubz ombre de la dicte promeſſe qu'auoient fait ceux de la ville, le ſiege ſe leua, & ſ'en vint le Roy à Paris. Et quand le baſtard de Thien veid que le ſiege ſe leuoit, & qu'on cuidoit, que au iour il deuſt rendre la ville, Il dit plainement qu'il ne la renderoit point. Et que ſi on couppoit les teſtes aux oſtaiges, qu'il auoit auſſi des priſonniers, auxquels il les feroit couper. Et ainſi adueint. Car les gens du Roy, veu qu'on leur auoit failli des promeſſes que

on leur auoit fait, feirent couper les testes aux ostaiges, excepté à l'Abbé de Saint Vincent, & à l'Aduocat du Roy. Et pareillement le bastard de Thien, feit mourir bien vingt prisonniers qu'il auoit. Les autres aussi auoient plusieurs prisonniers, que semblablement ils feirent mourir. Et parce c'estoit destruction des François les vns contre les autres, qui deussent auoir trouué maniere de resister aux anciens ennemis. Et estoit grand pitié, car le pere contre le fils, le frere contre le frere estoient bandez, faisans guerre les vns cōtre les autres en ceste maudicte querelle, qu'on disoit de Bourgongne & Armagnacs. Les religieux laissoient leurs habits de Religion, & prenoient harnois, & cheuaux, & s'exerçoient aux armes. Et se faisoient aucuns Capitaines, & prenoient gens soubz eulx, non mie seulement pour eulx garder, & defendre leurs personnes, & terres, mais faisoient & exerçoient courses & faicts de guerre, pilloient, & robboient comme les autres. Et faisoit-on de toutes parts maux innumerables.

Le Roy d'Angleterre tousiours conqueroit & prenoit places, tant en la Duché de Normandie, qu'en la Comté du Maine, & ne trouuoit aucune resistance, sinon d'aucuns gentils-hommes de bonne volonté. Et entre les autres, y auoit vn gentil escuier nommé Ambroise de Lore, qui estoit au chastel de Courseries, & mettoit peine de trouuer les Anglois. Et vne iournée, rencontra vn Capitaine Anglois, nommé Guillaume de Bours, & ses gens. Et se rencontrerent, & battirent tresbien les vns les autres, & demeura la victoire aux François.

Entre les autres villes qui se rendirent au Duc de Bourgongne, la Cité de Rouen en feut vne. Monseigneur le Dauphin Charles y alla, & se tenoit le chastel pour luy, où il y auoit de vaillants gens, & y eut plusieurs grandes escarmouches entre ceux de la ville, & du chastel. Et apres trois ou quatre iours, congneurent leur faulte, & y entra le dict Seigneur par traicté, comme dit est, & y laissa pour garder la ville, le Comte d'Aumalle, Pierre de Rochefort, & plusieurs autres nobles Seigneurs, qui garderent la ville par sept ou huit mois. Et notwithstanding ce, auoient tousiours les habitans le couraige à Bourgongne, & à la fin, le monstrent de faict, & fallut que les dictz Seigneurs s'en partissent. Et se disoient tousiours au Roy: mais c'estoit soubz le Duc de Bourgongne.

1417. Au di& an mille quatre cents & dix-sept, les Anglois en la Comté du Maine prind& plusieurs places, comme Beaumont le Vicomte, Balan, Tonnerre, Loue, Roussai, Nouans, Dan, & plusieurs autres. Et n'y auoit aucune resistance, sinon d'aucuns pasteurs compaignons, qui se tenoient és bois. Et en prenoient, & les amenoient és forteresses, & les autres iestoient en la riuere. Et puis meit le Roi d'Angleterre le siege au pont de l'Arche, & luy feut rendue ville & chastel. Et si preint plusieurs places au dessoubs, & au dessus de Rouen.

Enuiron ce temps, le bastard d'Alençon, avec plusieurs autres iusques au nombre de cinq à six cents cheuaux, se meit sur les champs. Et trouua vn Anglois nommé Haimon Hacquet, accompagné de quatre vingts Anglois, ou enuiron. Quand il veid les François, luy & ses gens descendirent à pied au long d'une haye. Les François frapperent sur les Anglois, & aux Anglois demeura le champ, & la victoire, & y eut des François tuez, & prins.

Les François du pays du Maine assemblerent gens, pour cuidoier leuer le siege que le Comte de Vuaruic tenoit deuant Danfront, & en estoit chef le di& bastard d'Alençon, & ne feurent pas conseillez de y frapper. Et veindrent deuant Fresnay, & leur feut rendue. Et apres deuant Beaumont le Vicomte, & s'en aller& sans rien faire. Et ce iour mesme, Ambroise de Lore, & Pierre de Fontenai, y meirent le siege, & y feurent huit iours. Et leur feut rendue, & si recouurerent bien douze ou quinze forteresses.

1418. L'an mille quatre cents & dixhuit, nostre Sain& Pere le Pape, auoit bien oui parler des grandes tribulations qui estoient au Royaume, tant par les diuisions que les Seigneurs auoient les vns contre les autres, comme aussi par les Anglois. Et pour trouuer par tout maniere de paix, il enuoia le Cardinal des Vrsins, & celuy de Sain& Marc en France. Lesquels y veindrent, & feurent receus grandement, & honnorablement en diuers lieux. Et feut ouuerte matiere de paix, & articles faicts & accordez d'un costé & d'autre, le iour du sain& Sacrement, & feurent publiées à Paris le Sabmedy vingt-septiesme iour de Mai.

Et est à croire, que Dieu vouloit encores chastier ce Royaume. Car le Dimanche vingt-huictiesme iour du di& mois, les Bourguignons

Bourguignons entrèrent à Paris. Et pour sçauoir la maniere, Il est vrai, comme dessus ha esté touché, que le Duc de Bourgongne auoit de grands faueurs à Paris. Et faisoit-on plusieurs & diuerses exactions indeües par maniere d'emprunts, & en autres manieres sur les bourgeois, & specialement sur ceux qu'on sçauoit auoir de quoy, sans nul espargner. Et y auoit des enuies les vns sur les autres. Et taschoient fort les amis de ceux qui estoient boutez dehors, de meütre leurs amis dedans la ville, & queroient pour ceste cause de meütre le Duc de Bourgongne dedans. Et si auoit des gens de guerre, & leurs varlets & seruiteurs, qui faisoient des desplaisirs à aucuns des bourgeois de Paris, & à leurs seruiteurs. Et specialement vn nommé Perrinet le Clerc, fils de Pierre le Clerc, l'aîné, demeurant sur le petit pont, qui estoit vn bon marchand de fer, & de choses touchant le fer, riche homme, & bon preud'homme, & bien renommé. Lequel estoit quartenier, & auoit la garde de la porte de Saint Germain des prez. Et le plus souuent enuoioit son diët fils asseoir le guet, lequel vne fois en s'en retournant feut vilenné, & iniurié, voire battu & frappé par aucuns seruiteurs de ceux qui estoient principaux du Conseil du Roy. Et de ce, feut plaincte faicte au Preuost de Paris, & à son Lieutenant, afin que Iustice s'en feist. Mais on n'en teint compte. Dont le diët Perrinet feut mal content, en disant que vne fois il s'en vengeroit. Et comme, diët est, à Paris auoit plusieurs, qui secretement tenoient le parti du Duc de Bourgongne. Et mesmement des parens, amis, & aliez du Seigneur de Lisle-adam. Et en y eut qui sçeurent que le diët Perrinet le Clerc estoit mal content. Et veint-on parler à luy, pour sçauoir, & trouuer maniere, comment on pourroit bouter le Seigneur de Lisle-adam, & ses gens dedans. Lequel diët, qu'il embleroit ou fineroit bien les clefs de la porte de Saint Germain, que son pere auoit en garde. Et feit tant, qu'il induisit tous ceux de la dixaine avec luy, & enuoia-on vers le Seigneur de Lisle-adam, qui auoit pres de luy en aucunes places deux Capiraines Bourguignons. C'est à sçauoir, le Seigneur de Chastelus, & le Veau de Bar. Et y eut iour prins au Dimanche vingt-huiëtiefme iour de Mai, dont le Sabmedy de deuant, la paix auoit esté publiée. Et veindrent à la diët porte de Saint Germain. Et feirent aussi le diët Perrinet le

K K K

1418. Clerc, & ses alliez grande diligence de venir à la porte, laquelle ils ouurirent. Et entrèrent les dictz Capitaines dedans, crians *La paix, la paix, Bourgogne*. Et le peuple n'osoit faillir hors de leurs maisons, iusques à ce qu'ils veindrent à la rüe de Saint Denys, & de Saint Honnoré, tirans vers l'Hostel du Comte d'Armaignac. Et là de toutes parts failloit le peuple, prenans la croix de Saint André, & crians, *Vive Bourgogne*. Et assaillirent l'Hostel du dict Comte, lequel en habit dissimulé pour lors s'eschappa, & mussa en l'hostel d'un maçon, qui depuis l'accusa. Si feut prins, & mené au Palais. Et si feut-on en l'Hostel du Chancelier de France, & le print-on, & pareillement feut mené au Palais. Messire Tanneguy du Chastel, ouit le bruit, & s'en veint hastiement en l'Hostel de Monseigneur le Dauphin, lequel dormoit en son liect. Et ainsi que Dieu le voulut, le print entre ses bras, & l'enueloppa de sa robe à releuer, & le porta à la bastille de Saint Antoine. Et là le feit habiller, & le mena iusques à Melun. Le Veau de Bar enuoia en l'Hostel du Seigneur de Traignel, luy faire dire qu'il se sauuaist. Et que nonobstant qu'il luy eust fait grand plaisir en la Chappelle en Tierache, en estant cause de luy sauuer la vie, qu'il ne le sçauroit sauuer. Et s'en alla par la riuieire en nacelle iusques à Saint Victor, & de là à pied iusques à Corbeil. Et le Preuost de la ville luy aida de cheuaux. Et ne feut pas un quart de lieüe outre Corbeil, que le commun ne s'esmeust. Et le lendemain on couppa la teste au dict Preuost. De declarer les meurtres, pilleries, & robberies, & tyrannies qui se faisoient à Paris, ce seroit chose trop longue, & pitteuse à reciter. On prenoit gens. Les uns estoient mis en prisons priuées en maisons, en intention de les garder pour auoir argent, les autres estoient menez au grand & petit Chastellet, au Louure, au Temple, à Saint Martin des champs, à Saint Magloire, & en autres lieux. Les autres mesmes cuidans estre asseurez de mort, s'alloient mettre es prisons ordinaires. Et s'en allerent en grand tumulte au College de Nauarre, & là pillerent, & robberent ce qu'ils trouuerent, excepté la librairie, & en plusieurs autres lieux & maisons, tant de Conseillers du Roy en Parlement, que gens d'Eglise, & marchands. Puis s'en allerent iusques en la ville de Saint Denys, & là pillerent, & robberent, & y fait-on maux in-

numérables.

Les nouuelles de la dicte entrée, feurent enuoiées hastiement au Duc de Bourgongne, qui estoit vers Troyes avec la Royne, qui en firent moult grand ioye. Et ceux de la ville mesmes en firent aucunes solemnitez.

Le Mercredy ensuiuant la dicte entrée, le Seigneur de Barbasan, & Messire Tanneguy du Chastel, veindrent à tout bien quatre cents hommes d'armes à la bastille de Saint Antoine, & entrèrent par icelle au long de la rue Saint Antoine, & cuidoient bien leurs gens que tout feust leur, & qu'ils eussent recouuert la ville. Et veindrent iusques à la porte baudeloier, autrement nommée la porte baudes. Et les aucuns des-ja s'en entroient és maisons pour piller & robber, & fils eussent esté tout droict en Chastellet, sans entendre à pillerie, & deliurer les prisonniers, qui leur eussent aidé, on disoit que les Bourguignons s'en feussent fuis, & issus. Et prenoient aucuns des-ja la croix droicte. Mais quand le peuple apperceut, que on entendoit à piller, ils se meirent & alierent avec les Bourguignons, & rebouterent les autres iusques à la bastille. Et y en eut de morts d'un costé & d'autre, spécialement y feut tué vn vaillant homme Breton, nommé Alain, qui auoit espousé la Dame de Lacy, lequel feit merueilles d'armes auant qu'il peut estre abbatu. Si s'en retournerent tous à Melun vers Monseigneur le Dauphin.

La Royne, & le Duc de Bourgongne, enuoierent à Paris vn Aduocat de Parlement, nommé Maistre Philippes de Moruillier, & vn cheualier, nommé Messire Iean de Neufchastel, Seigneur de Montaigu, dont plusieurs à Paris estoient bien ioyeux. Car on auoit esperance, qu'ils estoient venus pour mestre Iustice fus, & que meurtres, pilleries, & robberies cesseroient. Mais la chose feut bien autrement. Car le douziesme de Iuin, aucuns feirent vne commotion à Paris. Et estoit vn des Capitaines, vn nommé Lambert. Et si estoient retournez à Paris des bouchers, & autres du temps passé. Et estoit ce dict Lambert, vn potier, destain, demeurant en la Cité. Et allerent aux prisons du Palais, & entreurent dedans. Et en icelles preindrent le Comte d'Armagnac, Conestable de France, Messire Henry de Marle, Chancelier de France, & vn nommé Maurignon, qui estoit au dict

K k k ij

1418. Comte. Et les tirerent hors de la Conciergerie du Palais emmy la court, & là les tuerent bien inhumainement, & trop horriblement, & les despouillerent tous nuds, excepté des chemises. Et y en eut qui ne feurent pas contents de les veoir morts & tuez. Mais leur ostioient des courroies du dos, comme s'ils les eussent voulu escorcher. Et de là s'en vindrent au grand Chastellet, au bout du pont des changeurs, où auoit grand foison de prisonniers. Les vns monterent en hault aux prisonniers, les autres demeurèrent en bas, tendans leurs bastons, jaelines, espieux, & espées, avec autres bastons poinctus, les poinctes contremont. Et ceulx d'en hault, faisoient saillir les dicts prisonniers par les fenestres, sur iceux bastons tréenchans, & poinctus, & les detrenchoient encorés depuis qu'ils estoient morts. De là s'en allerent au petit Chastelet, où estoient l'Euesque de Constances, l'Euesque de Senlis, & plusieurs autres notables gens, tant d'Eglise, que autres, lesquels pareillement feurent tous tuez & detrenchez. Et auoit le dict Euesque de Constances foison d'or sur luy, lequel il offroit, cuidant pour ce eschapper. Mais rien n'y vallut, & perdit sa vie, & son or. Semblablement feirent-ils à Saint Martin des champs, à Saint Magloire, & au Loure. Et y en eut bien de seize cents à deux mille ainsi inhumainement meurtris & tuez. Et par la ville mesmes, en tuoit-on beaucoup. Et feut grand pitié des pauvres Geneuois, qui n'estoient que souldoiers, qu'on bautoit hors des maisons où ils estoient emmy les rues, & là les tuoit-on. Quand il eurent fait les dicts meurtres, on print des charrettes, & tombereaux, & les mettoient dedans, & les menoiēt ou faisoient mener aux chāps. Et les aucuns on les attāchoit par les pieds à vne corde, & les trainoit-on par la ville, iusques hors des portes, & là on les laissoit. Et y feut trainé en ceste maniere vn notable Docteur en Theologie, Euesque de Senlis. Et quiconque auoit vn bon benefice ou Office, il estoit tenu Armaignac, & mis à mort incontinent. Et le faisoient faire mesmes, ceux qui vouloient auoir les benefices, ou Offices. Et ne tuoit-on pas seulement les hommes, mais les femmes & enfans. Et y eut vne femme grosse qui feut tuée, & veoit on bien bouger, ou remuer son enfant en son ventre, dont disoient aucuns inhumains, Regardez ce petit chien, qui se remue. Et si aucune femme

grosse se deliuroit de son enfant, à peine trouuoit on femme, 1418. qui l'osast accôpaigner, ne aider, ainsi qu'il est accoustumé en tel cas de ce faire. Et quâd la pauure petite creature estoit née, & hors du ventre de la mere, il la falloit secretement porter aux fonds, ou baptiser par vne femme en l'hostel, ce qui est appelé ondoyer. Et y auoit des prebstres, ou Curez, si affectez à mauldicté inclination, que aucuns les refusoient à baptiser. Et aduenoit aussi aucunesfois que par faulte de secours, & aide, la femme seule se deliuroit, & baptisoit mesmes son enfant, & que tous deux apres mouroient. Et les morts qu'ils tenoient Armaignacs, reputoient indignes de sepulture. Et des dessus tuez ainsi que dict est, la plus part feut iectée aux champs, & la feurent mengez des chiens, & oiseaux. Et aucuns leur faisoient de leur cousteaux de leurs peaux vne ben-de, pour monstrier qu'ils estoient Armaignacs. Et en eut plusieurs, qui estoient prisonniers pour debtes, ou pour excès par eulx faicts, qui estoient bien ioyeux de l'entrée, afin qu'ils feussent deliurez par ce moyen. Et si y en eut, qui par haine d'aucuns feurent mis en prison, comme Armaignacs, qui estoient aidans & fauorisans la partie du Duc de Bourgongne, lesquels feurent tous tuez. Et n'y auoit consideration à personne quelconque. Plusieurs en y eut de prisonniers des dicts de Lisle-adam, Chastelus, & Veau de Bar, des plus grands & riches, lesquels feurēt sauluez, en payant grosses finances. Et n'y eut celuy des dicts trois Capitaines, qui de pilleries, robberies, & rançons, n'amendast de cent mille escus, & mieux. Et mesmemēt le Seigneur de Lisle-adam feit merueilles d'y profiter, & faire profiter ses gens, dont plusieurs auoient esté bons laboureurs en l'Isle de France. Parquoy plusieurs s'armerent & monterent des profits qu'ils auoient eu en la ville de Paris, & contrefaisoient les gentilshommes, & portoient leurs femmes estat de Damoiselles, & estoient les hommes & les femmes vestus de belles robes. Et faisoit on beaucoup de choses illusoires & derisoires, tant enuers Dieu, que le monde.

La vigile de Saint Iean, les chaînes feurent remises par les rües, ainsi qu'elles souloient estre.

Le Cardinal des Vrsins, en executant de son pouuoir ce que le Pape luy auoit chargé, alla en Ambassade deuers les Anglois, pour sçauoir s'ils vouloient entendre au faict de la paix.

Kkk iij

1417. Lesquels il trouua bien hautains, & orgueilleux, & se glorifioient en leurs conquestes, ioyeux des diuisions si grandes qui estoient en ce Royaume. Et dit le Roy d'Angleterre que le benoist Dieu l'auoit inspiré, & donné volonté de venir en ce Royaume, pour chastier les subiets, & pour en auoit la Seigneurie comme vrai Roy. Et que toutes les causes pour lesquelles vn Royaume se debuoit transférer en autre main, ou personne, y regnoient, & sy faisoient. Et que c'estoit le plaisir du benoist Dieu, que en sa personne la translation se feist, & d'auoir possession du Royaume, & qu'il y auoit droit. Et s'en retourna, sans rien faire. Et s'en alla vers nostre saint Pere le Pape qui l'auoit enuoié, bien desplaisant de ce qu'il n'auoit peu rien faire.

La Royne, & le Duc de Bourgogne, delibererent de venir à Paris. Et deuers elle, & deuers le Duc de Bourgogne, auoit esté le Cardinal de Castres, pour cuider ouurir matiere de traité avec M^{seigneur} le Daulphin. Lequel Cardinal apres feut vers mon dict Seigneur le Daulphin, pour la dicte cause & matiere. Et luy dit que la Royne auoit intention d'aller à Paris, & qu'elle luy mandoit & requeroit, qu'il la veinst accompagner iusques en la dicte ville, & que par ce moyen la paix seroit faicte. Lequel Seigneur respōdit, qu'il luy vouloit obeir, & la seruir en toutes manieres, que bon fils doit faire à sa mere. Mais d'entrer en vne cité où maux si merueilleux & tiranniques auoient esté faicts, ce seroit trop à sa grande desplaisance, & non sans cause. Et autre responce n'y eut faicte.

Et le quatorziesme iour de Iuillet, la Royne, & le Duc de Bourgogne entrerent à Paris, à bien grande pompe, & si grande, que à peine pourroit on plus, tant en listieres, que chariots, hacquenées, & autres choses. Et feurent receus à grand ioye. Et sonnoient menestriers, & trompetes. Et de ceux de la ville grand foison, estoient vestus de robbes perses. Et crioient les vns Noel, & les autres Viue Bourgogne.

En ce temps, les Seigneurs de Gamaches, & de Bloqueaux, aians sceu que le Duc de Bourgogne, auoit eu paroles & collocation au Roy d'Angleterre, doubtons que de ce ne veint aucun inconuenient, ils delibererent d'auoir la ville de Compiengne, dont estoit la garde Messire Hector de Saueuse. Et trouuerent les moyens d'y entrer, & de bouter hors le dict de

Sauueuse. Ce qu'ils feirent, & meirent à execution. Et apres 1417.
feurent aduertis que combien qu'il y eust eu aucunes paroles
entre le Roy d'Angleterre, & le Duc de Bourgongne, ce n'est-
oit pas qu'il voulust faire preiudice à la Couronne de France.
Mais vne maniere d'abstinence de guerre entre eulx, Afin que
le dict Duc plus aisémēt peust subiuguer ceux du Royaume de
France, qu'il tenoit ses ennemis, & nommoit. Et toutesfois
teindrent ils la dicte ville.

Le Seigneur de Grauille estoit lors au pont de l'Arche, sou-
uent assailli, & comme assiegé d'Anglois, & leur portoit le plus
de dommaige qu'il pouuoit. Et voioit bien que veu leur puis-
sance, il n'y pouuoit longuement durer, qu'il ne fallust que la
place se perdist, si il n'auoit aide & secours. Pour laquelle cause,
diuerfes fois il enuoia à Paris deuers le Roy, & le Duc de Bour-
gongne, en les requerant qu'ils luy voulussent enuoier aide &
secours. Mais rien n'en feut fait, ne semblant de faire. Et pour-
ce feut contrainct d'abandonner la place, & de soy sauuer le
mieux qu'il peut, & y entrerent les Anglois.

Monseigneur le Daulphin meit grosses garnisons à Meaulx,
& à Melun, lesquelles faisoient plusieurs courses, & des maux
largement sur le pays.

Le vingt & vniemesme iour d'Aoust, le Roy, la Royne, & le
Duc de Bourgongne estans à Paris, il y eut vne grande com-
motion de peuple. Et disoit on que Capeluche le bourreau,
en estoit le Capitaine, & tuerent plus de deux cents person-
nes, qu'ils nommoient Armaignacs, dont il y en auoit plu-
sieurs gens de bien. Et par haines particulieres, tuerent plu-
sieurs des gens du Duc de Bourgongne, & qui demouroient
en son Hostel, soubz le gouuernement des dicts de Lille-a-
dam, Chastelus, & Veau de Bar. Et plusieurs fois venoit le dict
Capeluche parler au Duc de Bourgongne, accôpaigné de mes-
chants gens, aussi hardiment, que si c'eust esté vn Seigneur. Et
de ceux qui donnoient auctorité, confort, & aide, estoient les
Gois, Saintyôs, & Caboche. Et de ceux de l'Vniuersité, faux ser-
môneurs & prescheurs. Et entre les autres, preindrēt vne Da-
moiselle de bien, & qui auoit bōne renommée. Et pource que
aucuns disoient qu'elle estoit Armaignacque, luy couperent
la teste, & la laisserent emmy la rüe. Puis s'en allerēt à l'Hostel
du Roy, & de la Royne, & prindrent deux cheualiers, Maistres

1418. d'Hostel du Roy. Dont l'un estoit nommé Messire Hector de Chartres, Seigneur de Lyons en Beauuoisis, pere de Messire Regnault de Chartres, Archeuesque de Rheims, & Messire Louys de Mauçonnet, vieils & anciens cheualiers, & preud'hommes, & les menerent emmy les rues, & là les tuerent tres-inhumainement. Et quand la dicte commotion feut cessée, & appaisée, on donna à entendre à ceux qui auoient fait la dicte comotion, que les Armaignacs venoient par la porte de Saint Jacques, lesquels tous vnanimes y fuirent. Et cependant feut prins le dict Capeluche bourreau, qui beuuoit en la rappée es halles, & incontinct on luy couppa la teste. Et disoit on qu'on luy auoit fait coupper, pource qu'il auoit touché au Duc de Bourgogne, lequel luy auoit baillé sa main, non cuidant qu'il feust bourreau, parquoy comme dict est luy fait coupper la teste. Et feut couppée la teste à vn bon marchand de Paris, nommé Guillaume d'Auxerre, drappier, demeurant en la Cité, à vn notable Aduocat en Parlement, nommé Maistre Pierre la Gode, & à vn Maistre des Requestes de l'Hostel du Roy, qu'on nommoit Maistre Philippes de Corbie, pource qu'on disoit qu'ils estoient Armaignacs. Plusieurs grandes inhumanitez & comme innumerables, feurent en ce temps faictes en la dicte ville & Cité, dont adueint vne bien grande punition de Dieu, & bien appaite. Car depuis le mois de Iuin iusques en Octobre, y eut si grande mortalité que merueilles. Et non mie seulement à Paris: mais es villaiges d'environ, & à Senlis, & à peine le nombre est incroiable. Et spécialement moururent presques tous ces brigans, & autres gens de commune, & aucuns comme soubdainement, sans contrition, confession, & repentance. Et sceut on par aucunes Dames de l'Hostel Dieu de Paris, où il en trespassa moult grand nombre, qu'il y en eut bien de sept à huit cents de morts, lesquels on exhortoit de eulx confesser, & repêtir des maux qu'ils auoient fait. Mais ils respondoient que ia n'en requerroient mercy à Dieu. Car ils scauoient bien que Dieu ne leur pardonneroit point. Et quand on leur môstroit ou preschoit la misericorde de Dieu, ils n'en tenoient compte. Et moururent comme gés tous desesperéz, qui estoit grand pitié. Il y eut vn notable homme de Senlis, qui feut aux dicts meurtres, & s'en retourna à Senlis. Et vn iour quand il eut pensé à ce qu'il auoit fait, ou esté consentant de faire

faire, soudainement il se partit de son hostel, criant par les rues, ie suis damné. Et se iecta en vn puis la teste deuant, & se tua. Et és villaiges vers les forests de Bondis, & vers Montmorency, on en trouuoit plusieurs tous morts. Et fault croire que leurs ames estoient en grand danger. C'estoit moult grand pitié à Paris, de veoir tant de mesnaiges destruits de plusieurs gens de bien, nobles, bourgeois, & marchands. Les femmes & enfans boutez hors de leurs maisons côme tous nuds, qui souloient auoir grandes cheuances. Et ne sçauoient comme partir de Paris. Et s'en alloient les vnes en guise de vendengeresses, les autres comme femmes de villaige. Et se soutiuoit on de trouuer maniere de faillir hors de la ville.

Monseigneur le Daulphin alla en Touraine, & passa par empres vne place nommée Azay. Ceux qui estoient dedans estoient Bourguignons, ou tenans le parti du Duc de Bourgogne, qui cōmençerēt à crier, C'est le demeurāt des petits pasteurs de Paris, & disoient paroles iniurieuses à mon diēt Seigneur le Daulphin, & à ceux de sa cōpagnée, lequel dit, qu'il falloit qu'il eust la place. Les gens de guerre, & leurs Capitaines descendirent, & aduiserent comment on la pourroit auoir. Et sçeut on que dedant n'estoient que brigands, avec vn gētil-homme qui en estoit Capitaine. Et moult soudainement feut la diēte place assaillie bien chauldement, courageusement, & tresuaillemēt. Et aussi ceux de dedās, sçaichans & congnoissans, que s'ils estoient prins, ils seroient mis à mort, fort se defendoient de pierres, & de trait. Mais nonobstant leurs defenses, feut la place prinse d'assault, & le Capitaine, & tous ceux qui estoient avec luy, prins. Et couppa on la teste au diēt Capitaine, & si en y eut de deux à trois cents de pendus.

Aucun temps apres, mon diēt Seigneur le Daulphin veint meētre le siege à Tours, où estoit vn gentilhomme nommé Charles Labbé, lequel tout son temps auoit serui le Duc de Bourgogne. Et apres ce que par aucun temps la diēte place eut esté bien batüe, & les approches faictes, Il se rēdit du parti de Monseigneur le Daulphin, & feit le serment, & rēdit la ville. Et par ce moyen, il eut vne bien belle, & bōne Chastellenie en la Comté de Poictou, nommée Mōstreau bouuin, & seruit depuis loyaulment.

L'Euesque de Clermont, nommé Maistre Martin Gouge,

1418. le quel f'estoit parti de Paris en habit dissimulé. Et en sen venant vers les marches de la riuere de Loire, feut rencontré d'aucuns des gens du Seigneur de la Trimouille, qui le congneurent, & le preindrent, & le menerent à Suilly. Et auoit intention le dict Seigneur de la Trimouille de non le deliurer, sinon qu'il paiaist vne grande finance. Car durant les brouillis, il auoit eu le gouuernement, & du temps de Monseigneur de Berry, auoit esté en effect tout ordonneur, & distributeur de ses finances, & esté son executeur, où il auoit moult profité. Or estoit en la compaignée de Monseigneur le Daulphin, vn vaillant cheualier, nommé Messire Iean de Torfay, Seigneur de la Motte sainte Eraye, empres Saint Maixent, Maistre des arbalestriers de France, qui auoit grand charge de gens de guerre, le quel estoit singulier ami du dict Euesque de Clairmont, & s'entraimoient comme freres. Et si estoient au plus pres de mon dit Seigneur le Daulphin, Messire Tāneguy du Chastel, & le President de Prouence, ausquels le dict Euesque auoit fait beaucoup de plaisirs, qui supplierent au dict Seigneur, qu'il voulust aller deuant Sully à force d'armes, pour rauoir le dict de Clairmont. Et delibera le dict Seigneur d'y aller. Et nō mie seulement pour la cause dessus dicte: mais pour scauoir si le dict Seigneur de la Trimouille, tiendrait son parti seurement, ou non. Et vint iusques à Iargeau, en intentiō d'assieger Sully, s'il ne trouuoit obeissance. Et auoit belle & grande compaignée de gens de guerre. Et le dict Seigneur de la Trimouille, quand il veid qu'on l'approchoit, enuoia vers mon dict Seigneur le Daulphin, & deliura le dict Euesque de Clairmont. Et luy fait plaine obeissance, & promet de le seruir loyaument, & ainsi fait il.

Le Duc de Bretaigne, vint à Paris parler à la Royne, & au Duc de Bourgongne, pour traicter de la paix. Et y eut articles faicts, & comme accordez.

Le dix-sepiésme iour de Septembre, firent grand ioye à Paris. Et tenoit on communément qu'il y auoit paix. Et la plus grand crainte qui y feust, c'estoit qu'on ne f'osist fier les vns aux autres. Et tousiours, quelques paroles qu'il y eust, guerre inhumaine & mortelle se faisoit tant d'un costé, que d'autre. Et y auoit Guascōs, & Bretōs, spécialement à Meaulx, où estoit Messire Tanneguy du Chastel, & à Melun, où estoit.

le Seigneur de Barbasan, qui souuent couroient, & nuls prisonniers ne prenoient à finance, mais tuoient & pendoiēt tous ceux qu'ils prenoient. Et pareillement ainsi faisoit on d'eulx. 1418.

Le Duc de Bretagne, cependant qu'il besongnoit pour la paix, feut cause de beaucoup de bien. Car il y eut trefues de trois sepmaines, durant lesquelles plusieurs prisonniers, & autres, qui estoient mussiez à Paris, se sauluerent, & issirēt. Et plusieurs biens meubles, feurent soubz ombre des dictes trefues sauluez, & menez iusques sur la riuere de Loire. Le dict Duc tira hors de Paris Madame la Daulphine, & avec elle plusieurs Dames, & Damoiselles, & autres personnes. Et diuerfes fois, l'Euesque de Sain& Brieu, qui depuis feut Euesque de Nantes, Chancellier du dict Duc, venoit à Paris. Et à chascun voyage qu'il retournoit, tousiours sauuoit ou emmenoit des gēs, spécialement femmes, & petits enfans. Et feit moult grand plaisir à plusieurs personnes.

Quand le Roy d'Angleterre eut conquesté plusieurs villes, citez, & chasteaux en la Duché de Normendie, au dessus, & au dessoubz de la Cité de Roüen, il y meit le siege, & luy teint lo-guement. Et estoient dedans les gens du Duc de Bourgogne. Et enuoierēt ceux de la ville vers Monseigneur le Daulphin, pour auoir aide & secours. Et apparoit bien que ce n'estoit qu'une fiction. Car ceux de dedans faisoient guerre mortelle à ceux du dict Seigneur. Et l'eust volōtiers faict. Mais il auoit assez à faire, à soy garder des Anglois, d'un costé, & d'autre, des gens du Duc de Bourgogne. Toutesfois il veint à sa cōgnoissance que le Roy d'Angleterre auroit plus volōtiers traicté à lui, que au Duc de Bourgogne, & y eut Ambassadeurs enuoiez d'un costé & d'autre. Et y enuoia Mōseigneur le Daulphin biē notable Ambassade, & y eut aucunes formes d'accord ouuer-tes, & traictées. Mais sur toutes choses le Roy d'Angleterre vouloit, que le dict Seigneur luy promeist de luy aider à conquerter la Comté de Flandres, à la tenir sans hōmaige, ressort, ne souueraineté. Et combien que le dict Seigneur feust ieune d'aage, Il respondit que iamais ne se voudroit allier à faire paix avec les anciēs ennemis du Royaume de France, pour destruire son vassal. Et qu'il auoit esperance que le Duc de Bourgogne se raduiseroit, & n'y eut rien faict.

La guerre en Poictou aussi estoit tresforte. Car le Seigneur

1418. de Partenai auoit de belles places & fortes. Et le Seigneur de Montberon tenoit le parti du Duc de Bourgongne. Le Seigneur de Montberon print les ville & chafstel de Montberon.

Le siege feut longuement deuant Roüen, ne iamais ne l'eussent eu sinon par famine. Car il y auoit de vaillants gens tenäs le parti du Duc de Bourgongne. Mais la famine feut si merueilleuse, & si grande, qu'ils feurent contraincts à eulx meſtre en l'obeissance du Roy d'Angleterre. Ne d'un costé ne d'autre, n'eurent aucun secours.

Le dixneufiesme iour de Ianuier, le Roy d'Angleterre entra en Roüen. Et dient aucuns qu'ils payerent deux cents mille escus. Les autres dient qu'il y entra à sa volenté, & feurent pillez, & robbez bien piteusement. Et fait oster les chaisnes des rües, & les harnois aux gens de la ville. Et en tant qu'il touchoit les gens d'Eglise, voulut que ceux qui voudroient demeurer en la ville, eussent leurs benefices comme ils auoient parauant. Et les autres non, & les donnoit à qui bon luy sembloit. Il eut Mante, & Vernon, qui se rendirēt en son obeissance. Peu de nobles s'y meirent. Vn nommé Messire Guy le Bouteiller, luy fait le serment.

Il y auoit vne ieune Dame, fille du Seigneur de la Riuiere, veufue de feu Messire Guy, Seigneur de la Rocheguyon, lequel mourut en la bataille d'Agincourt. Et auoit deux beaux fils, & vne fille du dict Seigneur. Laquelle estoit dedäs le chafstel de la Rocheguyon, bien garnie de biens meubles, autät que Dame de ce Royaume. Et si auoit tant à cause d'elle, que de ses enfäs, plusieurs belles terres & Seigneuries. Deuers laquelle le Roy d'Angleterre enuoia lui faire ſçauoir, que si elle vouloit faire le serment pour elle, & ses enfans, qui estoient ieunes, qu'il estoit content que ses meubles, terres, & Seigneuries luy demeurassent, & à ses dicts enfans. Sinon, il auroit la place, & tous ses biens. Laquelle meüe d'un noble couraige, aima mieux perdre tout, & s'en aller desnüee de tous biens, & ses enfans, que soy meſtre, ne ses enfans, es mains des anciens ennemis de ce Royaume, & delaisser son souuerain Seigneur. Et s'en parut, & ses enfans, desnüee de tous biens.

Les gens de Monseigneur le Daulphin, reprindrēt Beaumört sur Oise sur les gens du Duc de Bourgongne. On y enuoia le bastard de Thien accompagné de gens de guerre, lequel feut

rechassé, & y eut la plus part de ses gens morts & prins.

Les gens aussi du dict Seigneur, preindrent Soissons. Et estoit grand pitié de la fortune, qu'auoit eu la pauvre Cité de Soissons.

Vers le pays du Maine auoit forte & aspre guerre. Vn iour le bastard d'Alençon se partit de Fresnai le Vicomte, accompagné de cinq à six cents cheuaux, cuidant trouuer les Anglois, & aussi les trouua-il. Car sur les chāps estoit vn Capitaine Anglois, nommé Haymon Hacquet, qui auoit enuiron quatre vingts cheuaux. Et se rencontrèrent si bien, que le bastard d'Alençon feut desconfit, & se retrahit, & y eut de ses gens morts & prins. Et feut parce qu'ils cheuaucherent en desfarroi, & sans ordre. Et les vns s'enfuirent de plain bout, & ceux qui demeurèrent, n'auoient guieres veu du faict de guerre.

Le Seigneur de Fontaines, & Messire Ambroise de Lore, se ioingnirent ensemble, & assemblerēt ce qu'ils peurent de gens. Et repreindrent Beaumont le Vicomte, & plusieurs autres places, qui auoient esté occuppées par les Anglois. Les dicts Messieurs de Fontaines, & Lore, portoient & faisoient de grands dommaiges aux Anglois. Et vn iour adueint que le Comte de la Marche d'Angleterre, accompagné de six à sept mille Anglois, estoit es marches de Fresnai le Vicomte, dont estoit Capitaine le dict de Lore. Et au pays du Maine fait maux innombrables de bouter feux, & prendre gens, & bestail. Ne par les François ne luy feut porté aucun dommaige. Sinon que en soy retournant en Normendie, vne partie de ses gens, se logea en vn villaige nommé Hayes. Sur lequel logis frappa le dit de Lore, accompagné de ses gens. Et y eut de deux à trois cents Anglois morts, & plusieurs prins.

En ce temps veindrent deux cheualiers d'Escoffe, pour seruir Mōseigneur le Dauphin. L'un, nommé Messire Thomas Quel-fatty, & l'autre, Messire Guillaume de Glas. Et de trois à quatre cents combatans se meirent dedans Fresnai le Vicomte, dont estoit Capitaine le dict de Lore. Et firent grande resistance aux Anglois, & leur porterent du dōmaige largement.

Les Anglois meirent le siege deuant Saint Martin le gail-lard. Et veint la chose à la congnoissance du Seigneur de Gamaches, lequel assembla des gēs le plus qu'il peut, & le leua. Et feurēt les Anglois descōfits, & y en eut plusieurs morts & prins.

1418. A Sées en Normandie, y eut des Anglois logez, & le sceut le dict Messire Ambroise de Lore. Et luy auoit-on rapporté qu'ils n'estoient que quatre vingts. Mais le soir de deuant, il en estoit bien suruenu huit vingts. Et à vn point du iour veint frapper sur eulx, descendit à pied, & les assaillit, lesquels vaillamment & longuement se defendirent. Et feurent les dits Anglois desconfits, & plusieurs morts, & prins. Et entre les autres, vn Capitaine, nommé Thomas de Gournai. Et s'en retourna le dict de Lore à toute sa puissance à Fresnai. Assez tost apres se partit le dict Seigneur de Lore, cuidant trouuer les Anglois d'Alençon, & les trouua pres d'un villaige nommé Mieuxe. Et se retrahirent en vn villaige nommé les Nouës, fermé d'caïes, & de fossez. Et les assaillit le dict de Lore, & feurent les Anglois desconfits, & enuiron soixante de morts, & moult grand nombre de prisonniers.

En ce temps, se combatirent à outrance le bastard d'Orenge, François, & Richard Hautely, Anglois. Et feirent vn gaigne de bataille deuant le dict de Lore. Et le vaincu deuoit payer seulement vn diamant. Et feut le François desconfit. Et ce iour mesme, feirent armes à cheual Huet de Saint Barthelemy, François, & Iuon, Anglois. Lequel Anglois feut frappé d'une lance parmy le vifage, tant qu'elle passoit outre de deux pieds. Et ce fait, les Anglois s'en retournerent à Alençon.

Enuiron trois semaines apres, le Baillif d'Eureux, nommé Messire Gilbert de Hillefale, veint au pays du Maine. Le dict Seigneur de Lore, le fit sçauoir au Seigneur de Beauuau, Gouverneur d'Anjou, & du Maine. Lequel assembla gens, & feut ordonné le dict de Lore à frapper le premier par maniere de auant-garde. Et estoient les Anglois à Vienne la Iuhes. Et ainsi le feit, & combatirent longuement, sans ce que Beauuau, ne ses gens veïssent. Et estoient les Anglois quatre contre vn François. Et feut le dict de Lore prins, & plusieurs de ses gens morts, & prins. Les autres veindrent depuis, mais ce feut trop tard. Et fallut que le dict de Lore rendist la place de Fresnai, qu'il auoit regaigné sur les Anglois, & tenu an & demy. Et quelques trefues que feit le Roy d'Angleterre, tousiours exceptoit Fresnai, pource qu'il auoit esté prins sur luy.

Les Anglois vers les marches de France meirent le siege à Montpillouet. Le Seigneur d'Auffemont le sceut, & assembla

des gës, & frappa sur le siege. Et y eut plusieurs Anglois morts, 1418.
& prins, & feut le siege leué.

Au dict an, les Anglois, & le dict Messire Ambroise de Lore, se cerchoient & queroient les vns les autres, desirans eulx rencontrer. Et adueint que sur la riuere de Sarte se rencontrerent. Et d'un costé & d'autre, se meirent à pied vne partie, & l'autre à cheual. Et combattirent fort, & feurent les Anglois desconfits, & y en eut plusieurs morts, & prins. Et là feut fait le dit Messire Ambroise, cheualier, lequel grandement & vaillamment se porta.

Dedans le Mans, estoit le Marechal de Rieux, & le Seigneur de Mailly, & plusieurs nobles du pays d'Anjou, & du Maine. Le Seigneur de Cornouaille Anglois, accompagné de plusieurs Anglois, meit vne embusche pres de la Cité du Mans, & fait courir aucuns de ses gens, iusques pres des barrieres. Le Marechal faillit hors de la ville bien indiscrètement, & passa l'embusche, dont les dicts Anglois faillirent, & le preindrent. Et ce donna exemple aux autres François, lesquels n'estoient pas encores bien experts en la guerre, de non faillir à l'entreprise de ses ennemis.

Comme dessus ha esté touché, l'entrée de Paris faite par les gens du Duc de Bourgogne, feut bien piteuse & cruelle, & plusieurs morts & tuez. Toutesfois en y eut-il beaucoup de sauuez de notables gens, tant de Parlement, de Chastellet, de l'Vniuersité, que des bourgeois, qui issirent de Paris, & perdirent tout. Et depuis leurs femmes, & enfans, par diuers moyens trouuerent maniere d'aller apres. Quelle pitié estoit-ce du dict Messire Jean Iuuenal des Vrsins, Seigneur de Traignel, qui tenoit bien deux mille liures de reuenue, & belles places & maisons en France, Brie, & Châpaigne, & son Hostel garni de meubles, qui pouuoient valoir de quinze à seize mille escus, en toutes choses. Ayant Dame de bien, & d'honneur à femme, & onze enfans, sept fils, quatre filles, & trois gendres, auoir tout perdu, & ses dictes femmes & enfans mis nuds pieds, avec pauvres robbes, comme plusieurs autres. Et toutesfois tous vesquirent bien & honorablement. Et pour le fait de la Iustice souueraine du Royaume, on ordonna vn Parlement à Poictiers, Presidens, & Conseillers, C'est'à sçauoir, de ceux qui estoient issus de Paris,

1418. des plus notables & anciens de la Court de Parlement, & de Chastelet. Et feut ordonné pour commencement, que les causes des grands Iours de Berry, d'Auuergne, & de Poictou, feussent les premieres expedies. Et gardoit-on la forme, & maniere, & Stile, qu'on gardoit en la Court de Parlement à Paris, pour lors qu'elle y estoit. Et y auoit foison de causes des dictz grands Iours. Et si euocqua-on les causes qui estoient à Paris, celles qui estoient des pays obeissans à mon dict Seigneur le Daulphin, & des causes d'appel, lesquelles de nouveau on releuoit à la Chancellerie en Parlement. Et y en auoit tres-grande quantité. Et y faisoit-on bonne & briefue expedition. Et là se retrahirent plusieurs, qui estoient partis de Paris. Et tous par la grace de Dieu, viuoient bien, & honnorablement.

1419. L'an mille quatre cents & dix-neuf, Monseigneur le Daulphin l'appella & nomma Regent du Royaume de France. Les guerres & diuisions estoient moult merueilleuses, & congnoissoient euidemment les parties, qu'il failloit que tout se destruisist, & que le Royaume feust en la main des ennemis, ou qu'il y eust paix. Et à ce faire, les parties se disposerent par aucun temps.

Le Seigneur de Partenai, qui auoit tousiours tenu, & tenoit le parti du Duc de Bourgogne, se reduisit en l'obeissance de Monseigneur le Regent. Et y eut traicté fait apres que le siege eut esté deuant Partenai, qui estoit tres-forte place, & reputée comme imprenable. Car il y auoit trois paires de fossez, & deux paires de murs en la ville. Et si y auoit fort chastel, garni de seigle pour dix ans, ne par famine on ne l'eust point eu. Et si y auoit dedans de vaillants gens, deffoubz deux vaillants cheualiers. L'un, nommé Guichard de Peluoisin, & l'autre, Messire Gilles. Au siege estoit pour Chef le Comte de Vertus, frere du Duc d'Orleans, qui estoit prisonnier en Angleterre, comme Lieutenant du Roy, accompagné du Seigneur de Torlay, Maistre des arbalestriers, & autres Capitaines de guerre. Et pource que de ceux de dedans, auoit plusieurs gentils-hommes du pays de Poictou, qui auoient leurs maisons hors de la ville au dict pays, feut ordonné qu'on declareroit leurs terres confisquées, & qu'on abbatroit les granges & maisons, dont il y en auoit de moult belles. Et feut procedé à l'execution, tellement

lemēt qu'il y en eut plusieurs abbatiēs. Et en partie feut ce qui les meut à trouuer traicté & moyen, d'eulx reduire en la grace de Monseigneur le Regent. Messire Gilles dessus dict, tous les iours sailloit dehors bien armé & môté, pour sçauoir si personne vouloit rōpre lances. Et souuent en trouuoit. Mais oncques ne feut abbatu, & en abbatit aucuns. Et iamais n'en print sinon le cheual, & vn marc d'argent de celuy qu'il abbatoit. Vn Capitaine de brigands y auoit nommé Leuesque, qui se tenoit es bois, & portoit luy & ses gens de grands dommaiges à ceux de l'ost, specialement à empeschier la venüe des viures, & souuent perdoit de ses gens & compagnons, & quand on les prenoit, on les pendoit aux arbres.

Après la reduction du dict Seigneur de Partenai, toute la Comté de Poictou, de Berry, & d'Aulnis, feurent en l'obeissance de Monseigneur le Regent, lequel de tout son pouuoir ne demandoit que trouuer moyens de paix. Auec lequel estoient le Duc d'Anjou, & le Comte de Vertus, lesquels de tout leur pouuoir, à ce trouuer trauailloient, & grand peine mettoient. Et d'autre costé, si faisoient la Royne, & le Duc de Bourgongne, congnoissans tous les grands dommaiges, & pertes irreparables, qui estoient aduenües, & estoient à aduenir de plus en plus, à la destruction & desolation totale de tout ce Royaume. Et pour paruenir à paix, feut aduisé qu'il estoit expedient de faire vnes bonnes & seures trefues, durant lesquelles on peust cōuerfer les vns auec les autres seuremēt, & amiablement. Mais il y auoit des difficultez du temps. Et feurent enuoiez Ambassadeurs de par le Roy deuers Monseigneur le Regent à Melun, & depuis à Orleans. Et demandoient les deputes de par Monseigneur le Regent, trefues de trois ans. Et cependant tous vnis & alliez ensemble, pourroient faire & porter grand dommaige aux Anglois, & les debouter du tout du Royaume de France. Ce que ceux du Roy ne vouloient accorder, & demandoient brief terme. Et la raison si estoit, Car il leur sembloit que plustost on pouuoit entendre à paix finale. Veu que au temps passé plusieurs fois on auoit assemblé, & esté d'accord. Et le plus fort estoit comme on trouueroit seureté, que ce qui seroit accordé, seroit gardé, & bien entreteñu, veu les manieres de proceder du Duc de Bourgongne, de la part duquel tousiours ont esté rompus les accords qui se

M m m

1419. faisoient. Toutesfois apres plusieurs difficultez faictes d'un costé & d'autre, le quatorziesme iour de May, trefues feurent faictes & accordées de trois mois seulement. Ne plus ne voulut faire le Duc de Bourgongne. Car le Roy, & luy, auoiēt trefues avec le Roy d'Angleterre, iusques au quatorziesme iour de May, inclus, qui estoit le iour que le Roy de France, & le Roy d'Angleterre debuoiēt conuenir ensemble pour eulx accorder entre Mante & Pontoise, c'est à sçauoir à Meulant. Et si au iour le Regent n'y enuoioit, & qu'il ne teint l'accord que son pere feroit, & on pouuoit traicter avec les Anglois, par le moyen du mariage de Madame Catherine, les deux ensemble pourroient subiuguer & destruire Monseigneur le Regent. Et si le Roy & le dict Seigneur son fils, & le Duc de Bourgongne estoient d'accord, & feussent tous ensemble, on ne traicteroit point avec les Anglois. Les dictes trefues feurent faictes, seellées, passées, accordées, & publiées en plusieurs lieux, & conseruateurs baillez & ordonnez. Et estoient tresbien compilées & dictées, combien que guieres elles ne durerent.

Et feut deliberé & cōclud par le Roy accōpaigné du Duc de Bourgongne, qu'il estoit expedient de essaier à auoir accord avec les Anglois, en leur laissant plusieurs terres & Seigneuries du Royaume, & alliance par mariage. Et d'autre part aussi cependāt on essaieroit d'auoir paix avec Mōseigneur le Regent. Et n'est doubte que si le Duc de Bourgongne eust voulu soy retraire d'auoir tout le gouuernemēt, & se disposer & les siens à resister aux ennemis anciēs, & laisser le fils avec le pere & mere à faire aussi le mieux qu'ils pourroient, la paix estoit bien aïlée à faire. Mais il vouloit tout faire, & auoir entierement le gouuernemēt du Royaume, & des finances. Et sembloit par ses manieres, comme aucuns disoient, qu'il se voulust faire Roy. Et de faict, enuoierent vne Ambassade vers le Roy d'Angleterre à Roüen, Messire René Pot, & Raillart de Chauffour, & autres, pour auoir abstinēce de guerre, ou trefues avec les Anglois. Et estoit le moien pour le Roy, & le Duc de Bourgongne, le Duc de Bretaigne, & pour la partie des Anglois, le Côte de Salbery. Et trouuerēt le Roy d'Angleterre fier & orgueilleux cōme vn lyon, & s'en reueindrent sans rien faire. Et depuis encores on y enuoia vne autre Ambassade, le Roi estāt à Prouins, C'est à sçauoir, Messire Regnier Pot, Messire Ieā le Clerc, & Guy le Geli-

mer, & autres à Mante, & à Vernon, esquelles marches le Roy d'Angleterre estoit. Et selon leurs instructiōs, exhiberēt lettres patētes, par lesquelles ils auoient puissance, d'exposer l'intētion & volōté du Roy, & puissance d'accorder & pacifier pour paix finale entre les Roys, & de faire offres au Roy d'Angleterre. Et de fait, offrirent le traité qui feut fait à Bretigny au temps du Roy Iean, prisonnier pour lors en Angleterre, & avec les terres, Seigneuries, & places qu'il auoit cōquesté en la Duché de Normandie. Et qu'il eust Madame Catherine de Frāce en mariage, en certaines cōditiōs qu'on declareroit en tēps, & en lieu, & que pour la conuētion mutuelle qui se deuoit faire, le terme estoit prolōgé. Ceux qui estoient ordonnez de la partie des Anglois, à cōmuniquer avec les dessus dits Ambassadeurs, monstrerēt sēblant d'y vouloir entēdre. Et feirēt aucunes protestations, que auant qu'ils entēdissent à aucun traité, on leur baillast & deliurast la Duché de Guyenne, & la terre de Pōthieu, avec les terres, appartenances, & appendences. Et apres ce fait, ils traicteroient volōtiers sur les residus du droit de la Courōne de Frāce. Et feroient tant de leur part, qu'ils y auroient honneur, & qu'il ne tiendrait pas à eux, qu'il n'y eust bonne paix, & accord. Et si protestoiēt que par quelque chose qu'ils dissēt, ou feissent, leur intention n'estoit pas de leur preiudicier au droit & tiltre qu'ils pretendoient à la Courōne de France. Et pareillement les dits Ambassadeurs du Roy protesterēt, que par chose qu'ils dissēt, ou offrisset, ils n'entendoient en riē preiudicier au droit de la Courōne, & appartenances d'icelle, ne à delaisser les choses offertes, sinon la paix & concorde finale faite entre les deux Roys, & fermée. Et pource que par la puissance des Ambassadeurs du Roy, ils n'auoient puissance ou faculté que d'offrir, Il feut aduisé que le Roy d'Angleterre enuoiroit vers le Roy de France son cousin & aduersaire, ses solempnels Ambassadeurs. Et enuoia les Comtes de Vuaruic, & de Kent, & autres, pour la matiere. Mais ils ne peurēt obtenir prolongation du terme, que les conuentions se debuoient faire. Et veindrent les Ambassadeurs à Prouins. Et ouurirent, que pour esperance d'auoir paix ferme entre les deux Roys, ils demādoiēt à la Roine, & au Duc de Bourgogne, en mariage pour le Roy d'Angleterre Madame Catherine, dont la Roine les remercia. Et traicterēt du lieu de la conuētion, & de la forme, & tēps. Et fur

M m m ij

1419. dict, que ce seroit à Meulât, le vingt-troiesme iour de Mai, où seroient les deux Roys. Et confirmerent les trefues ou abstinenances de guerre, qui estoient entre eulx iusques au dict iour. Excepté contre les gens de Monseigneur le Regēt, qu'ils nommoient Armaignacs. Le dict Seigneur Regent, desirant seruir le Roy son pere.

Le Vendredy lendemain de l'Ascension, Messire Tanneguy du Chastel, & les Seigneurs de Môténai, & de Treues, nommé Maître Robert le Masson, Chancelier de mon dict Seigneur le Regent, enuoierent vers le Roy, & le Duc de Bourgongne certains heraults, qui leur porterent les lectres des trefues dessus dictes. Et plusieurs en auoient pour les aller faire publier es villes & places, qui luy obeïssioient. Mais ils trouuerent que la Royne, & le Duc de Bourgongne, estoient partis pour venir traicter avec les Anglois. Et ne faisoient aucun semblant d'entendre à aucun traicté avec Monseigneur le Regent, pour laquelle cause, les dessus nommez estoient à Melun.

Et veint le Sabmedy le Roy au giste au bois de Vincennes. Et le Dimanche, à toute sa compaignée s'en veint à Pontoise. Et le Lundy, veindrent à Pontoise de par le Roy d'Angleterre, l'Archeuesque de Cantorbie, esleu de Excest, & le Comte de Vuaruic, avec autres, pour traicter & aduiser du lieu de la conuention, & de la maniere, & du temps, & heure. Et feut ordonné qu'il y auroit vne tente au milieu d'un champ, où ils conuiendroient ensemble. Et offrirent les Anglois que, ou que la tente feust faict mettre par le Roy d'Angleterre, & ainsi telle qu'elle seroit, la dōneroit à la Royne, ou que la Royne en feist mettre vne, qu'elle dōneroit au Roy d'Angleterre. Et fut cōclud, que la Royne la feroit. Et fut requis par les Ambassadeurs Anglois, qu'ils feissent sermēs de tenir & accōplir les seuretez & promesses, lesquelles auoient esté ordōnées estre faites. Et ainsi le feirent. Et pareillement le Roy enuoia le Comte de Saint Paul, Messire Regnier Pot, & plusieurs autres, lesquels feirent semblables promesses, que auoient faict ceux du Roy d'Angleterre à Pontoise. Et feut ordonné pour garder le champ de chascun costé, auoir mille & cinq cents hommes armez. Et que entre les lices seroient de chascun costé soixāte Nobles, & seize Conseillers. Et ainsi feut faict & accompli.

Et le Mardy ensuiuant, qui feut le trentiesme iour de Mai,

le Roy feut malade, & demeura à Pontoise. Et la Roïne, & 1419.
 Madame Catherine en vne liètiere bien richement ordonnée,
 & Dames, & Damoiselles, & le Duc de Bourgongne en leur
 compaignée, arriuerent aux tentes empres Meulant, enuiron
 deux heures apres midy. Et y auoit largement trompetes, &
 menestriers, iouians de leurs instruments. Et par auât pres d'v-
 ne heure, estoit arriuée en ses tentes le Roy d'Angleterre. Car
 combiè qu'il ne deust auoir qu'vne tente au milieu du champ,
 où la conuention se debuoit faire, toutesfois de chascune par-
 tie auoit têtes pour eulx retraire. Et vn peu apres que la Roïne
 feut retraicte en sa tente, veindrent le Comte de Vuaruic,
 & d'autres nobles d'Angleterre, visiter de par le Roy d'An-
 gleterre la Roïne. Et feut ordonné que la Roïne, & le Roy
 d'Angleterre, istroient de leurs tentes l'un comme l'autre, &
 marcheroient lentement iusques au milieu du champ, où il y
 auoit vn pal fiché, distant de leurs tentes & barrieres du cháp,
 autant & egalemeñt l'un comme l'autre, & que de chascune
 partie entreroient seulement soixante personnes nobles, &
 seize Conseillers; & qu'on les appelleroit singulierement par
 leurs noms. De la partie de la Roïne, feurent elleus trête che-
 ualiers, & trente escuiers, & seize Conseillers, C'est à sçauoir
 des Conseillers, le Chancelier, Maistre Pierre de Moruillier,
 premier President, Maistre Iean Rapiot, tiers President, Mai-
 stre Henry de Sauoisi, Archeuesque de Sens, Maistre Iean de
 Mailly, Doyen de Sain& Germain l'Auxerrois, Iean le Clerc,
 Guiot Geuiller, Philippes de Rully, Hùe de Dicy, Guillaume
 Cotin, Nicolas Sautereau, Jacques Braulart, Guillaume le Bre-
 ton, & autres, iusques à seize, & Secretaires, Maistre Iean Ra-
 mel, Guillaume Barraud, & Rosay.

Et enuiron trois heures apres midy, la Roïne issit hors des
 rentes, & auoit deuant elle les Cōseillers deux à deux. Et quād
 elle & le Roy d'Angleterre arriuerent au pal dessus dict, l'un
 cōme l'autre, le Roy d'Angleterre print la Roïne par la main,
 & la baisa, & apres Madame Catherine. Et pareillement les
 deux freres du Roy les baisèrēt, & en les baisant, lès dits freres
 baisserent les genouils iusques pres de terre. Et ce faiēt, le Roy
 d'Angleterre preint la Roïne par la main, & ensemble par pa-
 reils pas, veindrent en la tente, où ils se debuoient assembler.
 Et se assèrēt la Roïne, & le Roy, chascun en son siege, lesquels

1419. estoient ordōnez & parez, pareillemēt l'un cōme l'autre de drap d'or, ayans ciel dessus, distans pres de deux toises l'un de l'autre. Tellement, que aisément ils pouuoient ouir l'un l'autre, quand ils parleroient. Et lors s'agenouilla le Comte de Vuaruic, & commēça à parler à la Royne en François, en exposant en brieſ la cause de leur assemblée. Sans ce que rien feust conclud, sinon la prolongation des trefues iusques à huit iours, & que chascune des parties se retrahiroient és villes, dont elles estoient parties. Et se tiendrait le Roy & sa compaignée à Pôtoise, & le Roy d'Angleterre à Mante. Et si l'une des parties ne vouloit entendre à traitté, elle le feroit sçauoir à l'autre dedās les dictz huit iours, & que encores les trefues dureroyent huit iours apres. Et feut appoincté que le leudy apres, les parties compareroient en la forme & maniere qu'ils estoient, & aux lieux, & places. Et feurent au dict lieu depuis trois heures iusques à sept heures apres midy. Et la chose cōclue, le Roy d'Angleterre print la Royne par la main, & baisèrent l'un l'autre comme deuant, & s'en allerent en leurs tentes. Et estoit le lieu ordonné en la maniere qui s'ensuit. C'est à sçauoir, empres la porte de Meulant du costé de Pôtoise, y auoit vn pré, du costé de la riuere de Seine d'une part, & de l'autre part, auoit vn escrang, & au milieu, comme vn chemin publicque. Et feut diuisé ce pré en trois parties. En la premiere vers la ville, estoient les tentes du Roy, de la Royne, & du Duc de Bourgogne, en grande abondance. Et d'autre costé aual la riuere, estoient les tentes du Roy d'Angleterre. Et en la tierce partie & moyēne, entre les tentes des Roys de France, & d'Angleterre, auoit vn champ moyen clos, & fortifié de fossez, & pallis, tellemēt fait qu'on n'y pouuoit entrer, que par trois lieux. Et à chascune entrée auoit bones barrieres, lesquelles se gardoient chascune de cinquante hommes biē armez & habillez. Et la partie du Roy & de la Royne, qui estoit droit regardant vers les Anglois, estoit enuironnée de palis ioinctes comme vne ville fermée. Tellement, que nul n'en pouuoit approcher de lance, ne de traitté. Et alloient les paux iusques à la riuere de Seine. Et au trauers de la riuere, en ce regard auoit paulx fichez, tellemēt que les bateaux n'eussent peu monter contremont. Et ne pouuoit l'une partie, ne l'autre, approcher ensemble que par le milieu du champ. Et aussi le lieu des Anglois estoit fossoié, & pal-

liffé: mais non mie si fort. Et au milieu du champ, en la partie 1419. ayant regard aux barrieres, qui estoient aux tentes tât du Roy de France, que d'Angleterre, & par lesquelles entroiët au châp la Roynes, & la compaignée, & le Roy d'Angleterre, & les siens, estoit le pal, du hault seulement d'un pied, où la Roynes, & le Roy d'Angleterre, se rencontrerent, & estoit distant de six toises de chascune tente. Et estoit dressé le pavillon commun où ils debuoient parler, que la Roynes auoit donné au Roy d'Angleterre. Et auquel pavillon, ou tente, auoit deux autres pavillons, à chascun bout vn, esquels separément la Roynes, & le Roy d'Angleterre se retrahioient, quand bon leur sembloit. Et feurent faicts cris publicquement par les Mareschaux de chascune partie, sur peine de perdre la teste, qu'ils ne dissent, ou proferassent aucunes paroles iniurieuses les vns aux autres. Et que soubz ombre de promesse de foy, ou debte, ou pour autre cause quelconque, on n'arrestast, ou emprisonnast personne. Qu'on ne iouast à iecter la pierre, ou luidast, ou qu'on ne feist chose, dont la compaignée se peust troubler. Et qu'on n'entrast en aucune maniere au champ, sinon ceux qui feroient ordonnez, ou appelez. Et y eut vn Anglois, qui cuida faire l'habile, & passa par dessus la barriere, & entra au champ. Mais le Mareschal du Roy d'Angleterre le feit prendre, & ordonna qu'il feust pendu & estranglé, & ainsi feut il.

A plusieurs iournées se rassemblerent les parties. Et y eut aucunes difficultez sur les offres autresfois faictes par les Ambassadeurs du Roy. Lesquels disoient, qu'ils ne les auoient pas faict si amples, que les Anglois disoient. Et feut requis que le Roy d'Angleterre declarast ce qu'il demandoit, & requeroit. Lequel de sa propre bouche le dit, & requit, & depuis le bailla par escript. C'est à sçauoir, qu'on luy baillast & deliurast ce qui feut accordé par le traité de Bretigny aupres de Chartres, lequel traité feut promis & iuré. Et avec ce toute la Duché de Normendie, tant ce qu'il auoit conquesté, que tout le demeurant de la dicte Duché, en effect sans hommaige, ressort, & souueraineté, & à les tenir comme voisin seulement. Et il prendroit à femme Madame Catherine. Et sur ce feut faict dire par la Roynes, qu'on luy renderoit responce. Sur laquelle responce qu'on luy debuoit faire, y eut plu-

1419. sieurs difficultez. Car il y auoit plusieurs villes & Seigneuries contenües au traité de Bretigny, qu'ils n'eussent pas aisément peu bailler: parce que Monseigneur le Regent Daulphin les tenoit, & d'autres Seigneurs. Et pource qu'en la dicté Cedula baillée par le Roy d'Angleterre, auoit plusieurs obscuritez, & ambiguïtez, la Roïne, & le Duc de Bourgogne, enuoierent Ambassadeurs vers le Roy d'Angleterre, pour auoir plus amplement son intention & declaration par escript des ambiguïtez.

Et cependant feut aduisé par aucuns que encores valloit il mieux auoir traité avec Monseigneur le Daulphin Regent, que accomplir & octroier ce que le Roy d'Angleterre demandoit & requeroit. Et le feirēt sçauoir aux gens dudit Seigneur. Et pour ceste cause, veindrēt à Pontoise Messire Tanneguy du Chastel, le Seigneur de Barbasan, & autres, pour traiter de la forme & maniere de paix. Lesquels y auoient grâde volonté, & disoient & affermoient que aussi auoit Mōseigneur le Regent Daulphin leur maistre, & tous ceux de son Conseil. Et nonobstant leur venüe, feut ordonné que la matiere seroit debatüe, A sçauoir, lequel valloit mieux, ou traiter à auoir paix avec les Anglois, & leur accorder ce qu'ils demandoient & requeroient, ou non. Et pour ce faire, feurent ordonnez deux notables clercs. L'un, nommé Maistre Nicolas Raulin, & l'autre, Maistre Iean Rapiot. Et teint Raulin, qu'il valloit mieux traiter avec les Anglois, & que le Roy donnast largement de son domaine. Et foustēint que le Roy pouuoit alïener de son domaine, & donner partie de son Royaume, pour si grand bié, comme pour paix. Et ce fait, monstra bien grandement & notablement, que accorder & auoir paix avec le Roy d'Angleterre, estoit chose necessaire, veu la puissance des Anglois, la non puissance pour resister, du Roy, & du Duc de Bourgogne, & la diuision entre le Roy, & son fils, laquelle n'estoit pas taillée de finir. Et que autrement, le Royaume estoit taillé de changer de Seigneur. Et que aussi le Daulphin tendoit à accorder avec les Anglois. Et que si le Roy y auoit accord, le Daulphin plus volontiers seroit accord avec son pere. Et que la Cité de Paris, & autres du Royaume, voians qu'ils n'auroient aucune esperance de secours, feroient comme Roüen. Et que supposé qu'on feust vni avec Monseigneur le Daulphin, & qu'il

qu'il y eust bonne paix, seroit traicter avec le Roy d'Angleterre chose necessaire. Et que autresfois les Anglois auoient tenu ce qu'ils demandoient, & estoient lors le Royaume, & les subiets riches, & en bonne paix, & tranquillité, avec plusieurs autres raisons. Maistre Jean Rapiot au contraire voulut môstrer que selon le contenu de la Cedula, on ne debuoit ou pouuoit traicter avec les Anglois. Car c'estoit alienation apparente, ce que le Roy ne pouuoit, ou debuoit faire, & qu'il auoit iuré à son Sacre de non rien alieher. Et si n'estoit pas en disposition, veu sa maladie, de rien alieher, non mie d'auoir administration d'aucune chose. Par plus forte raison, ne de faire alienatiô. Ne aussi le Roy d'Angleterre de l'autre part. Car il n'a droit au Royaume de France, ne d'Angleterre, ne en chose qu'il se die auoir, veu le meurtre fait par son pere en la personne du Roy Richard. Et si autre ayant droit au Royaume d'Angleterre l'eust, & possedast, on diroit que tout ce qui auroit esté fait, seroit de nulle valeur, & effect. Et si on pouuoit traicter valablement, si faudroit il auoir le consentement de ceux qui y auroient interest, comme des vassaux, & des detenteurs d'une partie des terres qu'on veult bailler. Et si y ha plusieurs terres, que les predecesseurs du Roy ont promis de non alieher, & mettre hors de la Courône. Et que le traicté de Bretigny feut trouué nul, & qu'il ne se pouuoit soustenir, avec plusieurs autres raisons. Nonobstant lesquelles, feut conclud & deliberé, qu'on debuoit entendre à traicter. Et y eut plusieurs allées & venües des vns vers les autres, & plusieurs Ambassades enuoiées. Et voulut parler le Roy d'Angleterre à part au Duc de Bourgogne. Lequel y alla, & feurent longuement ensemble, & puis s'en retourna. Et leur feit sçauoir le Roy d'Angleterre qu'il estoit tresmal content, & qu'on monstroie euidemment, qu'on ne le vouloit tenir qu'en paroles. Et qu'il sçauoit qu'on vouloit traicter avec le Dauphin, & qu'il auoit bien sceu que les Ambassadeurs auoient esté, ou estoient à Pôtoise, & qu'on luy feist finale réponse. Et feut aduisé, qu'on luy accorderoit ce qu'il demandoit. Mais aussi on luy feroit plusieurs demandes, & requêtes, tant au regard des choses contenües au traicté de Bretigny, que autres. Et de toutes ces choses, n'y eue rien parfait, & pource on s'en passe en brief. Et feut deliberé par le Conseil du Roy, de la Roïne, & du Duc de Bourgon-

N n n

1419. gne, qu'on entendroit à paix avec Monseigneur le Daulphin Regent. Et y eut articles faicts, par le conseil des deux parties, & feut iurée, & promise. Et y eut moult grande ioye faicte à Paris, & tenoit on la paix toute faicte. Mais elle ne dura guieres. Car ils s'esmeurent à Paris. Et faisoit on pilleries & robberies comme deuant. Et tenoit on pour Armaignacs, tous ceux presque qu'on disoit auoir faict grand feste & ioye de la dicte paix.

En ce temps, feurent les villes d'Auranches, & Pontorson, prinſes par les gens de Mōseigneur le Regent sur les Anglois, dont leur Roy feut fort desplaisant. Et si estoit venu à sa congnouissance, que aucunes gens de guerre du Duc de Bourgogne, estoient dedans les ville & chastel de Gisors, dont le Roy d'Angleterre feut mal content, disant que ce n'estoit pas signe qu'ils vouussent auoir paix. Et pource feut assieger le dict chastel de Gisors, & la ville, lesquels se defendoient vaillamment. Mais iceux voians & considerans, que du Duc de Bourgogne n'auroient aucun secours, ne d'autres aussi, ils delibererent de prendre composition. Et moyennant certaine somme d'argēt, qu'ils eurent du Roy d'Angleterre, rendirent la place, & s'en allerent.

Le vingt huiſtiesme iour de Iuillet, que les iours estoient grands, par faulte de bon guet, & garde, les Anglois eschellerent Pontoise, & entrerent dedans assez grande quantité. Et en la ville auoit garnison soubz le Seigneur de Lisle-adam, lequel estoit dedans la ville. Et quand il ouit le bruit, il assembla de ses gens, & y alla, & cuida bouter les Anglois dehors. A quoy il meit peine & diligence, & de sa personne feut de belles armes. Mais à la fin il ne peut resister, & pource trouua moyen de soy sauuer, & s'en alla à Lisle-adam. Ceux de la ville aussi, & les gens de guerre, se porterent vaillamment, & se sauua chascun le mieux qu'il peut. Et est vne chose à peine incroyable, de la richesse que les Anglois trouuerent dedans la ville, qu'on disoit monter à deux millions, qui sont vingt fois cent mille escus. Et dient aucuns, que les Anglois y entrerent, par le moyen d'aucuns de ceux de dedans.

Le Duc de Clārce, enuoia prier qu'il eust sauf cōduict, pour aller visiter les corps saincts de Saint Denys. Ce qu'on luy re-

fusa, dont il feut tresmal content. Et vsa de grandes menaces, 1419. par lesquelles on pouuoit sçauoir que sa volôté estoit, de trouuer moyen d'auoir la ville de Saint Denys. Et pour ceste cause, on y enuoia vn vaillât cheualier, nommé Messire Ponce de Chastillon, qui estoit Guascon, accompagné de gens de guerre. Toutesfois pource qu'il estoit pres de Bordeaux, on doubta aucunement, & y en eut qui eurent soupçon sur luy, qu'il n'y feust pas bié féat. Et l'ê fait on venir, & y enuoia on le Seigneur de Chastellus, qu'on disoit Mareschal de France, & avec luy plusieurs gens, qui pillerent & robberent tout le pays, & ceux de la ville mesmes, & si feirent ils les pauvres religieux, & en leurs chambres mectoient leurs fillertes, & en faisoient comme bordeaux publiques.

Les gens de Monseigneur le Regent Daulphin, & du Duc de Bourgongne, pilloient & robboient tout le pays, & faisoient guerre les vns aux autres, sans nuire aucunement aux Anglois, ne leur faire guerre, ou dommaige aucun. Toutesfois vn nommé Messire Iean Bigot, le vingtiesme iour d'Aoust, estant sur les champs, enuiron la ville de Mortaing, & pareillement les Anglois, se rencontrèrent & combattirent les vns contre les autres, bien asprement. Et par la vaillance du dict Bigot, combien qu'il n'eust guieres de gens, feurent les Anglois desconfits, & y en eut de morts plus de quatre cêts, & plusieurs prins. Et si eurent les François les biés & cheuaux des dicts Anglois. Et feut moult grande renommée de la dicte desconfiture, ainsi vaillamment faicte.

On traitoit tousiours la paix en effect d'entre Monseigneur le Regent Daulphin, & le Duc de Bourgogne. Car il n'y eust eu que le pere, & le fils, elle eust esté tantost faicte, comme c'estoit tout notoire. Et comme dict est, les articles feurent faicts, iurez, & promis, & ne failloit que conuention à estre ensemble, pour parfaire la chose, & auoir bonne amour, & vnion ensemble. Et pour ce faire, feut esleu le lieu de Monstereau, où fault Yonne, comme la place plus conuenable pour les parties. Et feut ordonné, que le Duc de Bourgongne auroit le chastel, qui est bel, grand, & bien fort, pour son retraict, & mestre ses gens, & Monseigneur le Daulphin, auroit la ville. Et que sur le pont d'entre le chastel & la ville, se feroient barrieres. Et au milieu vne maniere d'un parc

N n n ij

1419. bien fermant, où auroit vne entrée du costé du chastel, & aussi vne autre du costé de la ville. Où auroit à chascune vn huis, qui se fermeroient & garderoient par leurs gens. Et ainsi feut conclud qu'il se feroit. Et y eut iour assigné, que les parties y debuoient estre. Et y eut beaucoup de diuers langaiges, & paroles merueilleuses d'un costé & d'autre. Et disoit on au Duc de Bourgongne, qu'il ne sy debuoit fier, s'il n'estoit mieux asseuré. Car combien que d'un costé & d'autre, chascun deust auoir douze personnes, telles qu'ils esliroient : toutesfois il debuoit considerer, que le Daulphin n'en pouuoit auoir nuls, sinon gens qui auoient esté grandement dommaigez par luy, & ceux de Paris, & ses gens, & seruiteurs, qui pouuoient auoir volonté de eulx venger de la mort de leurs amis, meurtris bié inhumainement. Et mesmement ceux qui auoient esté seruiteurs du feu Duc d'Orléans. Et auoit vn Iuif en sa compaignée, nommé Maistre Mousque, lequel fort luy conseilloit qu'il n'y allast point, & que s'il y alloit, iamaïs n'en retourneroit, & si faisoient plusieurs autres. Et si y en auoit autres aussi, qui luy conseilloit qu'il y allast. Et il respondit plainement qu'il iroit, & qu'il debuoit aduenturer sa personne pour si grand bien comme pour paix, & que comme que ce feust, qu'il vouloit paix. Et que son intention estoit, la paix faicte, de prendre les gens de Monseigneur le Daulphin, lequel auoit de vaillants, & saiges Capitaines, & gens de guerre, & combattoit le Roy d'Angleterre. En disant, que Hennotin de Flandres, combatteroit Henry de Lanclastre. De l'autre part aussi, plusieurs faisoient grande difficulté de conseiller à Monseigneur le Daulphin qu'il y allast, & que sa personne, & tout le Royaume, ne feust à l'adventure. Et par toutes les manieres que le Duc de Bourgongne tenoit, c'estoit en effect en intention de vouloir vsurper ou occuper le Royaume. Et que en ses promesses foy aucune ne debuoit estre adioustée, n'y debuoit on auoir fiance. Et qu'on scauoit les alliances qu'il auoit au Roy d'Angleterre, dés l'an mille quatre cents & seize. Et encores n'y auoit guieres, auoiet parlé eulx deux tous seuls ensemble vers Mante. Et quelque armée qu'il eust faicte, il n'auoit faict desplaisir au Roy d'Angleterre, ne à ses gens. Mais leur auoit donné plusieurs faueurs, & en effect leur auoit baillé, ou laissé perdre Pontoise. Et que au Duc d'Orléans

mort, peu de temps auant qu'il le feist tuer en la maniere dessus dicté, feit le serment sur le corps de nostre Seigneur sacré, d'estre son vrai, & loyal parét, & promet d'estre son frere d'armes, portoit son Ordre, & luy faisoit bonne chere, & disnerent ensemble, & ce nonobstant le feit tuer en la maniere dessus dicté. Et depuis la dicté mort, il y auoit eu plusieurs traictez de paix iurez & promis, mais oncques n'en auoit tenu aucun. Et mesmement le dernier de l'an mille quatre cents & dix-huict, qui estoit fait, conclud, & promis. Et soubz ombre de ce, & qu'on auoit esperance que bonne paix feust faicte, ses gens entrerent à Paris, & feurent faicts les meurtres des Connestable, & Chancelier de France, & autres dessus declarez. Toutesfois Monseigneur le Daulphin delibera & conclud, nonobstant les choses dessus dictes d'y aller.

Et feut iournée prinse au vingt-sixiesme iour d'Aoust d'estre à Monstereau. Et ordonna Monseigneur le Daulphin, que le chastel du dict lieu feust baillé & deliuré au Duc de Bourgogne, & à ses gens. Et feut le dict seigneur & Regēt, au dict iour à Monstereau. Et le Duc de Bourgogne, non. Mais auoit fait partir le Roy, la Royne, & Madame Catherine, & aller à Troyes, où ils estoient. Et apres veint au dit chastel de Monstereau, le dixiesme iour de Septembre. Et feit sçauoir sa venue à Monseigneur le Daulphin. Et s'en veindrent chascun d'eux accompaignez de dix Seigneurs, au lieu où la conuention se deuoit faire. Et auoit mon dict Seigneur le Daulphin avec luy, Messire Tanneguy du Chastel, les Seigneurs de Barbasan, & de Couuillon, le Vicomte de Narbonne, Bataille, & autres iusques au dict nombre. Pareillement le dit Duc de Bourgogne, auoit le Seigneur de Saint George, Thoulangeon, le Seigneur de Montaigu, de Nouailles, frere du Captal de Buch, qu'on tenoit Anglois Guascon, & autres, iusques au dict nombre. Et feurent d'un costé & d'autre visitez, & n'auoient plus l'un que l'autre de harnois, ou armeures, ç'est à sçauoir, seulement haubergeons, & espées. Et quand ils feurent entrez, meurent gardes aux deux huis, chascun, de ses gens. Monseigneur le Daulphin, à celuy qu'il entra du costé de la ville, & le Duc de Bourgogne, à celuy qui estoit du costé du chastel. Et quand tous feurent entrez, on dit de plusieurs manieres de paroles & de langaiges. Car ceux qui estoient affectez à la partie du Duc

1419. de Bourgongne, dient que quand le Duc de Bourgongne veid Monseigneur le Daulphin, il s'agenouilla, & luy feit la reuerce & hôneur qu'il appartenoit, en disant, Mōseigneur, le suis venu à vostre mandemēt, vous sçauiez la desolation de ce Royaume, & de vostre Domaine aduenir, Entendez à la reparation d'iceluy. Et quant à moy, ie suis prest & appareillé d'y exposer le corps, & les biens de moy, & de mes vassaux, subiets, & aliez. Et que lors Monseigneur le Daulphin osta son chapeau, & le remercia, & luy dit qu'il se leuast. Et qu'en se leuant, feit vn signe à ceux qui estoient avec luy. Et lors que Messire Tanneguy du Chastel veint pres de luy, & le poussa par les espaules, & luy dict, passez outre, en frappant d'une hache sur la teste, & le tua. Si y en eut vn autre nommé le Seigneur de Nouailles, qui feut frappé à mort, tellement que au bout de trois iours il alla de vie à trespassemēt. Mais les autres dient bien autrement, C'est à sçauoir, que Monseigneur le Daulphin, quand ils feurēt arriuez au parc, parla le premier, & dit au Duc de Bourgongne, Beau Cousin, vous sçauiez que au traicté de la paix naguieres faicte à Melun entre nous, feusmes d'accord que au dedans d'un mois, nous nous assemblerions en quelque lieu, pour traiter des besongnes de ce Royaume. Et pour trouuer maniere de resister aux Anglois, anciens ennemis de ce Royaume. Et ce iurastes, & promistes. Et feut esleu ce lieu, où nous sommes venus au iour diligemment, & vous auons attendu quinze iours entiers. Pendant lequel temps, nos gens, & les vostres, font au peuple du mal beaucoup, & nos ennemis tousiours cōquestent pays. Si vous prie, que nous aduisiōs, que on pourra faire. le tiēs la paix de nous toute faicte, ainsi que l'auons ja iuré & promis. Si trouuons moyen de resister aux Anglois. Et lors le Duc respondit, qu'on ne pourroit rien aduiser, ou faire, sinon en la presence du Roy son pere, & qu'il falloir qu'il y veinst. Et le dict Seigneur tresdoucelement luy dit, qu'il iroit vers Monseigneur son pere, quand bon luy sembleroit, & non mie à la volonté du Duc de Bourgongne. Et qu'on sçauoit bien que ce qu'ils feroiēt eux deux, que le Roy en seroit content. Et y eut aucunes paroles, & s'approcha le dict de Nouailles du dict Duc, qui rougissoit, & dit, Monseigneur, quiconque le vueille veoir, vous viendrez à present à vostre pere, en luy cuidant meētre la main gauche sur luy, & de l'autre, tira son espée comme à moitié. Et

lors le dict Messire Tanneguy, print Monseigneur le Daulphin 1419.
 entre ses bras, & le meit hors de l'huis de l'entrée du parc. Et y
 en eut qui frapperent sur le Duc de Bourgogne, & sur le dict
 Seigneur de Nouailles, & allerent tous deux de vie à trespasse-
 ment. Et ceux du chastel, qui estoient au plus pres de l'huis du
 pare, oncques ne s'en esmeurent, cuidans que ce feust Monsei-
 gneur le Daulphin qu'on eust tué. Et là estoit Charles de Bour-
 bon avec le Duc de Bourgogne, qui feut bien ioyeux de s'en
 venir avec Mōseigneur le Daulphin. Mais que le dict Seigneur
 en sceust rien, ne qu'il y eust entreprise de ce faire, on dit que ja
 ne sera sçeu, ne trouué que Messire Tāneguy du Chastel y meit
 oncques la main, & ne tascha que à sauluer son maistre. De la-
 quelle mort soubdaine, mon dit Seigneur le Daulphin fut tres-
 desplaisant, & si feurent plusieurs autres gens tenans son parti.
 Ceux toutesfois qui estoient extremes de la partie d'Orleans,
 disoient que c'estoit punition diuine, & plusieurs autres choses
 qui guieres ne valloient, & qu'il ne fault ja reciter. Les autres
 donnoient blasme à ceux, qui estoient avec le Duc de Bour-
 gogne. Car il n'y eut oncques celuy, qui se meist en peine de
 defendre son maistre, sinon le dict Seigneur de Nouailles, qui
 feut tellement blessé qu'il en mourut. Et estoient dix, & ceux
 qui demeurerent des gens de Monseigneur le Daulphin, n'es-
 toient que quatre. Car les autres se retrahirent, & allerēt apres
 leur maistre, & Messire Tāneguy, qui l'emportoit. Et feut nou-
 uelles en la ville, & au chastel mesmes, que c'estoit Mōseigneur
 le Daulphin qui estoit mort. Et pour ceste cause monta à che-
 ual, & se monstra à ses gens. Et feurent prins par aucuns com-
 paignons, les Seigneurs de Saint George, Thoulangeon, &
 autres. Ceux qui estoient au chastel, s'en allerent. Toutesfois
 vn nommé Philippes Iossequin, qui estoit au Duc de Bour-
 gogne des plus prochains, s'en vint avec Monseigneur le
 Daulphin. Par lequel on sçeut plusieurs choses de la volonté
 qu'auoit le Duc de Bourgogne.

Après le trespassemēt du dict Duc de Bourgogne, fait en la
 maniere dessusdicte, plusieurs qui estoient là venus de Paris, s'en
 retournerēt. Et Mōseigneur le Daulphin print son chemin vers
 le Berry. Et parauāt escriuit à la ville de Paris, les causes & ma-
 nieres cōme le Duc de Bourgogne fut tué. Et que ce nonobstāt
 on ne deuoit pas laisser à entēdre à paix, & qu'il estoit prest de

1419. faire. Mais ils n'en teindrent compte, & feurent en plus grande rigueur que deuant, & continuerent de faire les maux en la ville, qu'ils auoient accoustumé. Et cōbien que en tant qu'il touche la mort du diēt Duc de Bourgongne, plusieurs ayent escript en diuerses manieres, lesquels n'en sçauoient que par ouir dire, & les presens mesmes n'en eussent bien sceu deposer, car la chose feut trop soubdainement faicte. Toutesfois il n'y eut oncques personne qui chargeast Mōseigneur le Daulphin qui il en feust consentant, ne que auant l'entrée au parc, y eust eu aucune deliberation, ne que aucuns de ceux qui entrerēt avec luy, eussent volōté de faire ce qui feut fait. Et pource qu'on chargea fort Messire Tāneguy du Chastel, d'auoir fait le coup, il s'en fait excuser deuers le Duc de Bourgongne, Philippes, en affirmant comme preud'homme cheualier doit faire, que oncques ne le feit, ne feut consentant de faire. Et que s'il y auoit deux gētils-hommes qui le voulussent maintenir, il estoit prest de s'en defendre, & de les combattre l'un apres l'autre. Et sur ce, n'y eust personne qui respondist. Et ceux qui entrerent au parc tant d'un costé que d'autre, auoient pareil harnois, c'est à sçauoir, espées, & haubergeons. Et tous ceux du costé du Duc de Bourgongne, estoient vaillants cheualiers, & escuiers. Aussi ceux du costé de Mōseigneur le Daulphin: excepté son Chācellier, Maistre Robert le Maçon, & le President de Prouence, qui n'auoient piece de harnois. Et le diēt Messire Tanneguy, & autres, excepté quatre, ne tendirēt que à fauluer Monseigneur le Daulphin. Et ceux de Mōseigneur de Bourgongne estoient dix, qui deussent auoir reuenché leur maistre, ou végé sa mort sur les diēts quatre, Lesquels quatre, estoient Bataille, Messire Robert de Loire, le Vicomte de Narbone, & Frottier. Et confessoient bien les trois premiers, qu'ils auoient mis la main à feu Monseigneur de Bourgongne. Et quand on leur demanda, pourquoy ils auoient fait le coup, Ils respondirent qu'en leurs consciences, ils veirent que le Duc de Bourgongne approchoit de Monseigneur le Daulphin, & aussi le Seigneur de Noailles, en tirant à moitié son espée, que lors Loire, & Narbonne frapperent, & que Bataille dit, Tu couppas le poing à mon maistre, & ie te couperai le tien. Au regard du Seigneur de Noailles, frere du Captal de Buch, Frottier le frappa, & naura. Les aucuns dient, que les trois dessus nommez, auoient esté à feu
Monseigneur

Mōseigneur d'Orleans, & qu'ils auoient ensemble precogité & 1419.
 delibéré de le tuer s'ils veioient leur aduantage, pource qu'il auoit fait mourir leur maistre. Et du cas aduenü, ainsi que dict est, en fut Mōseigneur le Daulphin tres-desplaisant, & ceux qui estoient en sa compaignée gens de bien, cognoissans qu'il n'en pouuoit venir que tout mal. Et feut demandé à Frottier, pourquoy il s'adressa plustost au Seigneur de Nouailles, que à vn des autres. Il respondit, qu'il luy veid tirer l'espée, en disant Saint George, qui estoit le cry des Anglois. Et estoit frere du Capal de Buch, Anglois, ainsi que dict est, combien qu'il eust deux freres François, c'est à sçauoir, le Comte de Foix, & le Comte de Comminge. Et celuy qui ha redigé par escrit ce que dict est, au vrai le mieux qu'il ha peu, parla à vn des plus notables hōmes du Conseil, qu'eust Monseigneur de Bourgongne, Iean, en luy demandant comment son maistre alla à la dictē assemblée, qu'il ne feust mieux accompagné, & pourueu à euitter aucun inconuenient. Et il respondit en parlant plainement, que plusieurs de son Conseil le induisoient, à ce qu'il n'y allast point. Et mesmement y auoit vn Iuif qui luy dict, que comme que ce feust, qu'il n'y allast point, & luy affermoit que s'il y alloit, qu'il y mourroit. Et auoit avec luy vn nommé Philippes Iossequin, lequel il croioit fort, qui le induisoit à y aller. Et vne Dame, nommée la Dame de Giac, avec le dict Iossequin pareillement luy donna mouuement de ce faire. Et quand il eut ouy d'un costé & d'autre, tout ce qu'on luy voulut dire, il conclud qu'il iroit. Et ce d'un bien grand couraige, & desir d'auoir paix. Parquoy il ne craingnoit point à exposer sa personne, pour vn si grand biē. Et qu'il disoit que quād Monseigneur le Daulphin, & luy seroient d'accord, que Hennotin de Flandres, oseroit bien combattre Henry de Lenclastre. Et auroit en sa compaignée ces deux vaillants Capitaines, le Seigneur de Barbasan, & Messire Tanneguy du Chastel, & les autres tenans le parti du dict Monseigneur le Daulphin. Et que si on le tuoit à aller à la dictē assemblée, qu'il se tiendrait pour martir. Et de fait y alla, & feut tué en la maniere dessus dictē. Et disoient aucuns, que veu aussi le meurtre qu'il feit en la personne du Duc d'Orleans, & les meurtres faits à Paris, que c'estoit vn iugement de Dieu.

Quand le nouuel Duc de Bourgongne, nommé Philippes,

Ooo

1419. ſçeut la mort de ſon pere, il feut moult dolent, & deſplaiſant, & non ſans cauſe. Et aſſembla ſon Conſeil, pour ſçauoir qu'il auoit à faire. Et enuoia vers le Roy d'Angleterre, pour traicter de paix, voires plus ample que ſon pere ne luy auoit offert. Et en ceſte eſperance, feurent faiçtes trefues entre le Roy, & le Roy d'Angleterre, & ſe teindrent leurs gens comme tous d'un parti, Anglois, & Bourguignons, pour faire guerre mortelle à Monſieur le Daulphin, & à ceux qui tenoient ſon parti, pour & afin de ſoy venger de la diçte mort. Et eſtoient ou feurent les diçtes trefues iuſques à Paſques enſuiuant. Et en faiſant les diçtes trefues, leur feut baillé par les gens du diçt Duc de Bourgongne, le pont de Beaumont.

Les places de Dampmartin, & de Tréblai, feurent delaiffées par les François, & y entrèrent les Anglois, & Bourguignons.

Et apres, le Duc de Bourgongne, eut Crefpy en Valois.

Et faiſoient le pis qu'ils pouuoient, és terres du Duc d'Orleans, qui eſtoit priſonnier en Angleterre, & ne pouuoit bonnement pourueoir à les defendre & garder.

Nonobſtant les trefues prinſes avec les Anglois, les viures eſtoient ſi chers à Paris, que le ſextier de fourment valoit onze francs d'or, & eſtoient en tres-grande neceſſité.

En ce temps, Meſſire Robinet de Braquemont, Admiral d'Eſpaigne, ſe meit ſur la mer. Et auoir aſſez grand nauire, garni de vaillants gens de guerre ſur la mer, & y eſtoit le baſtard d'Alençon. Et rencontrèrent les Anglois, & combattirent les vns contre les autres, aſſez aſprement, & longuement. Et finalement les Eſpaignols & François eurent la victoire, & y moururent bien ſept cents Anglois, & y eut pluſieurs de prins, & leurs vaiſſeaux amenez vers la Rochelle. Et ſpecialement fait grande occiſion d'Anglois, le baſtard d'Alençon. Auquel pour ceſte cauſe le Roy d'Angleterre manda, qu'il eſtoit bien eſbahi, pourquoy il prenoit plaiſir à ainſi tuer ſes gens, quand il les prenoit. Et il luy fait reſponſe, que c'eſtoit pour venger la mort de ſon frere, lequel auoit eſté par eulx occis.

Les trefues comme diçt eſt, eſtoient entre les deux Roys, ſans y comprendre Monſieur le Regent, ne ſes gens, leſquels faiſoient le mieux qu'ils pouuoient, de porter dommage aux Anglois & Bourguignons. Et vne iournée, le Comte de Vuilly, feut enuoie à Paris, pour ſçauoir quel traicté on vouloit

faire, en grāde compaignée de gens, & pompe en habillemens 1419.
de gens, & cheuaux. Et d'aduenture y auoit des gens de Mon-
seigneur le Daulphin sur les champs, qui le rencontrerent, &
preindrent luy, ses gens, & ses cheuaux, & biens. Et veint la
chose à la congnoissance du Roy d'Angleterre, qui en feut
molt desplaisant, & tresimpatiemment le porta.

Le dixiesme iour de Feburier, le Duc de Bretaigne s'en alloit
côme on disoit, par aucunes places de sa Duché. Et estoit com-
mune renommée, qu'il s'en alloit disner à Chanteceaux, & veoir
la Comtesse de Pointieure. Et en allant, le rencontrerent le
Comte de Pointieure, & son frere, le Seigneur d'Auanguour,
& le preindrent, & le menerent à Coudrai Salbart en Poictou.
Et estoit commune renommée, que la cause de la prinse estoit,
pource qu'ils le tenoient pour tenant le parti du Roy d'Angle-
leterre. Car il luy auoit fait hommaige, & serment. Mais de-
puis auoit enuoié vers Monseigneur le Daulphin Regent, le-
quel feut aucunement content de luy. Les Bretons tantost se
meirent sus, & comme bons, vrais, & loyaux subiets, abbatirent
les places, qu'on disoit appartenir au dict Comte de Pointie-
ure. Et preindrēt & emprisonnerēt le ieune frere du dict Com-
te, & le meirent en bien dure prison, combien qu'il n'en scauoit
rien, & en estoit pur, & innoçent Et combien qu'on vueille di-
re, que la place de Chanteceaux estoit en Poictou, & non mie
en Bretaigne, les Bretons y meirent le siege, & la preindrent,
& abbatirent.

Le Seigneur de Legle, qui estoit second fils de Pointieure,
estoit en Limosin, où ils y auoient plusieurs belles terres, &
Seigneuries, Auquel la dicte prinse du Duc despleut fort, &
trouua maniere par certains moyens, que le Duc feust deliuré,
& retourna en son pays. Et neantmoins reteint-on en Bre-
taigne leur dict frere, tellement qu'il en deueint comme aueu-
gle. Des choses promises par le Duc de Bretaigne au Seigneur
de Legle, rien, ou peu, il en teint. Et disoit le Duc que au temps
des promesses, il estoit prisonnier, & que toutes les promesses
qu'il auoit fait, debuoiē estre reputées nulles. Et disoient
aucuns qu'il estoit bien employé, veu qu'on l'auoit deliuré si
legerement.

En ce temps, feut prins par ceux de la garnison de Dreux,
le chastel de Croisi, où estoit prisonnier Messire Ambroise de

1419. Lore. Et y auoit esté detenu bien onze mois. Et s'en alla au pays du Maine, & feut Capitaine de Sainte Susanne, qui estoit le plus prochain des frontieres des Anglois.

Le feu Duc de Bourgogne, auoit de par le Roy enuoïé au pays de Languedoc le Prince d'Orenge. Et quand M^{seigneur} le Daulphin feut parti de Monstereau où fault Yonne, & v^{ou}és marches de Berry, Il enuoia prier au Comte de Foix, qu'il preint le gouuernement du dict pais de Languedoc, & qu'il luy commestoit. Ce que le dict Côte feit volontiers, & se meit sus, & en bouta hors le dict Prince d'Orége. Et gouuerna tellemēt le dict Comte le pays, que M^{seigneur} le Daulphin n'en auoit rien, ou peu de profit. Et pource le dict Seigneur, delibera d'y aller en personne, & de faict y feut, & preint le gouuernement à luy, en l'ostant au dict Comte de Foix. Et trouua resistēce en deux places. L'une, Nismes, & l'autre, le pont Saint Esprit. Il meit le siege à Nismes, & fort se defendirent au cōmencement. Mais eulx congnoissans qu'ils n'estoient pas puissants d'y resister, voulurent traicter, & essayerent plusieurs moyens, & finalement se rendirent à la volōté de M^{seigneur} le Daulphin. Et pour la grande rebellion qu'il trouua, feurent vne grande partie des murs abbatus. Et combien que durant le siege, y en eut de morts, & de prins, toutesfois on en print encores des plus rebelles, qui feurent executez, & morts. Et pareillement au pont Saint Esprit. Et feut tout le pays reduict en l'obeissance de M^{seigneur} le Daulphin.

1420. L'an mille quatre cents & vingt, le Duc Philippes de Bourgogne par mauuais conseil delibera d'auoir paix avec le Roy d'Angleterre, ennemi ancien de la Couronne de France, & du Royaume, bien merueilleuse, & de nulle valeur. Et disoient aucuns, que celuy qui ha escrit en ces matieres, & dōt on ha extrait les choses dessus dictes, & cy apres declarées, estoit Armagnac. Il ha mis à son pouuoir la vraye verité, & tout son temps auoit esté seruiteur du feu Duc de Bourgogne. Mais quand il ha veu que son fils, vouloit mētre les Royaume, & Couronne és mains des dessus dictes, il delassa le seruice commenal de son fils, & se retrahit en son pays, dont il estoit natif, au Diocese de Chaalon, & là ha continué ha escrire le moins mal qu'il ha peu, selon ce qu'on luy ha rapporté. Et de faict le dict Roy d'Angleterre, & le dict Duc de Bourgogne,

feirent paix ferme ensemble. Et luy bailla le Duc de Bourgogne la ville de Paris, & bien seize Citez. Et comme tout estoit en l'obeissance d'iceluy Duc de Bourgogne. Et souueint à celuy qui escripuoit, de ce qu'il ha cy dessus escript des visions veües par bones creatures, recitées en la chābre de Maistre Eustache de Paully, des trois Soleils. Car en effect, il y eut trois Roys en France, C'est à sçauoir, France, Angleterre, & Monseigneur le Daulphin. Et si portoit bien le Roy d'Angleterre le Roy de France, de vouloir oster à son seul fils le Royaume. Et si estoit tout le pays de deça la riuiere de Loire, tout noir, & obscur. Car ils se meirent tous en l'obeissance des Anglois. Et celuy de delà, demeura pur & net en l'obeissance de Monseigneur le Daulphin. Et est bien à cōsiderer, que le dict Seigneur ne feut oncques en volonté, que d'auoir paix, & estoit tout son desir que de l'auoir. Et aussi l'auoit il iuré dès le septiesme iour de Iuillet, l'anné passée, & confirmé le dernier iour, & feut publiée à Paris. Et apres le dict cas aduenu de la diète mort, escripuit à Paris au vrai la maniere & occasion de la diète mort. En leur faisant sçauoir qu'il estoit content de tenir le traité, & accord, ce qu'ils ne voulurent faire. Mais feirent le dict Duc Philippes de Bourgogne, & le Roy d'Angleterre paix, comme dict est. Et enuoia le dict Roy d'Angleterre à Troyes, les Comtes de Kent, & de Vuaruic, le Seigneur de Roberfort, & Maistre Jean Dole, pour traicter le mariage de luy, & de Madame Catherine. Et feut l'accord fait, & le mariage accordé, le vingt & troisieme iour de Mars, l'an mille quatre cents & dix neuf. Et le vingtiesme iour de Mai, entra & arriva le dict Roy d'Angleterre à Troyes, armé & grandement accompagné. Et feut fait, & parfait le traité, que apres la mort du Roy, il debuoir auoir le Royaume de France. Et que doresnauant il s'appellerait Regent, & heritier de France. Et y eut plusieurs promesses faites, qu'il ne fault ia reciter, pour l'iniquité & mauuaisié d'icelles. Et toutes gens d'entendement, doibuent le tout reputer de nulle valeur, ou effect.

Le deuxiesme iour de Iuin, le dict Roy d'Angleterre espousa madame Catherine, & voulut que la solemnité se feist entierement selon la coustume de France. Et allerēt en la paroisse, c'est à sçauoir à Saint Jean de Troyes. Et les espousa Maistre Henry de Sauois, soy disant Archeuesque de Sens.

1420. Et pour treize deniers, meit sur le liure treize nobles. Et à l'offrande, avec le cierge offrirent chascun trois nobles. Et donna à la dicte Eglise de Saint Iean deux cêts nobles. Et feurent les soupes au vin faictes en la maniere accoustumée, & le liêt benit.

Et feit on crier publicquement que tous feussent prests, armez, & habillez le lendemain, qui feut le troisieme iour de Iuin. Auquel iour partirent de Troyes, les Roys de France, d'Angleterre, & d'Escoffe, & le Duc de Bourgongne, & plusieurs Ducs & Comtes. Et veindrent à Heruy le Chastel, & à Saint Florentin, lesquelles villes, assez aisément se meirent en leur obeissance, c'est à sçauoir, des Anglois. Et puis deuant Sës. Et auant qu'ils y arriuaissent, ceux de la ville enuoierent vers le Roy de France, & le Roy d'Angleterre, leur dire qu'ils estoient prests de eulx meïtre en leur obeissance, combien que les gens de guerre se feussent volontiers par aucun temps tenu. Toutesfois feut accordé qu'ils s'en iroient saulues leurs vies, & biens, & ainsi feut faict. Et se meirent en l'obeissance l'onzieme iour de Iuin. Et y entrerent les Roys. Et appella le Roy d'Angleterre Maistre Henry de Sauoisi, & luy dit, vous m'avez espousé, & baillé vne femme, & ie vous rends la vostre, c'est à sçauoir l'Archeuesché de Sens. Et apres veint à Môstereau, où estoit le Seigneur de Guithery. Et feit semblant de la tenir, & y eut des armes faictes. Mais quand il veid qu'on vouloit assortir les engins, non ayant esperance d'auoir secours, bailla la place, & s'en alla, & les gens de guerre, saulues leurs vies, & biens.

De là s'en allerent les diëts Roys meïtre le siege deuant Melun, où estoit dedans le Seigneur de Barbasan, avec plusieurs cheualiers, & escuiers, qui auoient grande volenté de eulx tenir. Et feut le siege clos & fermé. Et du costé de Gastinois, estoit le Roy d'Angleterre, & ses freres, & les Anglois en grande compaignée. Et du costé de la Brie, le Roy de France, & le Duc de Bourgongne. Les gens de dedans se disoient bons & loyaux François, & au Roy de France. Et se preparerent le mieux qu'ils peurent pour eulx defendre, & mestier leur en estoit. Et avec le diëct Seigneur de Barbasan, estoient de vaillâts gens, tant du pays, que d'autres. C'est à sçauoir, Messire Nicole de Giresme, vn vaillant cheualier de Rhodes, Messire Denys

de Chailly, Arnault Guillon, de Bourgongne, Louys Iuuenal 1420.
des Vrsins, fils du Seigneur de Traignel, dont dessus est fait
mention, Gilles d'Escheuiller, Baillif de Chartres, & plusieurs
autres vaillants gens. Le siege estoit bien à priser, là où il y a-
uoit trois Roys, & tant de Princes, Ducs, Comtes, Barons, &
nobles. Les Anglois, & Bourguignons, fortifioient leurs sieges
de pallis & fossez par dehors. Ceux de dedans feirent plu-
sieurs faillies à leur aduantage, & porterent de grands dom-
maiges à leurs ennemis. Et aussi estoient ils assez grosse & puis-
sante compaignée, combien que de plain bout, ils n'en mon-
trèrent pas le semblant. Et estoit aduis à ceux de dehors, qu'il
n'y auoit comme personne. Quand le Roy d'Angleterre veid
comme ceux de dedans se maintenoient, lequel on tenoit fai-
ge & vaillant en armes, il apperceut bien, qu'il failloit dire que
c'estoient vaillants gens, & que aisément on ne les auroit pas.
Si feurent d'un costé & d'autre, les bombardes, canons, & vu-
glaires assis, & ordonnez, qui commencerent fort à iecter con-
tre les murs, & dedans la ville. Les compaignons aussi de de-
dans d'autre costé, tiroient aussi de grand courage de canons,
& d'arbalestres, & plusieurs en tuoient. Et entre les autres, y
auoit vn compaignon, qu'on disoit estre religieux de l'Ordre
Saint Augustin, tresbõ arbalestrier, auquel on feit bailler vne
tresbonne & bien forte arbalestre. Et quand les Anglois, ou
Bourguignons venoient pres des fossez, & il les pouuoit ap-
perceuoir, il ne failloit point à les tuer. Et dict on que seule-
ment il tua bien soixante hommes d'armes, sans les autres. Mõ-
seigneur le Dauphin Regent faisoit grande diligence d'as-
sembler gens pour leuer le siege des Anglois. Et enuoia on en
toutes les parties de son obeissance diuers Cõmissaires, pour
faire assembler gens, tant du plat pays, que autres. Et de fait,
se meirent sus bien de quinze à seize mille hommes armez.
Et y eut Capitaines ordonnez pour les conduire. Et auoient
tres-grand desir & volenté de eulx trouuer en besongne con-
tre leurs ennemis. Et veindrent iusques vers les marches de
Yeure, & Chasteau-regnart. Et trouua on maniere d'en-
uoier espies en l'Ost des Anglois, pour considerer le siege,
& aduiser comme on y pourroit entrer, & sur eulx frap-
per. Mais ils rapportèrent, qu'ils estoient tellement fortifiez,
que impossible chose seroit d'y rien faire, qui peust profiter.

1420. Et pource s'en retournerent sans rien faire. Il y auoit grosses garnisons à Meaulx, & autres lieux en Brie & en Champaigne, qui faisoient forte guerre aux Anglois, & Bourguignons, tant à ceux qui estoient au siege, que autre part. Et pareillement les faisoient ceux qui estoient dedans Yeure, & Chasteau regnart, & leur portöient de grands dommaiges, & ne s'osoient bonnement escarter les Anglois, & les Bourguignons. D'un costé & d'autre, faisoient fort battre la ville, de gros engins. Et tellement, que en plusieurs lieux, les murs feurent tellement battus, qu'ils estoient rasez comme iusques au hault des fossez. Et plusieurs fois on meit en deliberation si on les assailliroit, Mais le Roy d'Angleterre iamais ne le conseilloit, veu les vaillances qu'il y auoit congneu à ceux de dedans, qui presques tous les iours failloient, & comme gens de bien se maintenoient, & resvaillants estoient.

Au dict siege, veint vn grand Seigneur d'Allemagne, nommé le Duc rouge de Bauiere, qui amena foison de gens, bien ordonnez, & habillez, lequel se meit du costé du Duc de Bourgongne, & aduifa la ville. Et quand il eut bien consideré comme elle estoit batüe, s'esmerucilloit fort qu'on ne l'assaillit. Et en parla au Duc de Bourgongne, lequel luy respondit, que autresfois il en auoit fait mention: mais que le Roy d'Angleterre n'en estoit pas d'opinion. Et le Duc rouge respödit, qu'il luy en parleroit. Et de fait, luy en parla. Et l'ouit le Roy d'Angleterre patiemment, & doucement, & apperceut son affection & volonté, & luy demonstra la chose estre perilleuse, & non sans doubte. Mais puis qu'il y auoit son imagination, dit qu'ils preparassent leurs habillemens, & feissent diligence d'auoir eschelles à assaillir, & bourrées & fagots, pour emplir partie des fossez. Et quand du costé dont il estoit, on feroit faire l'assault, de son costé il feroit son debuoir. Dont le dict Duc rouge feut bien ioyeux. Et auoit intention de faire merueilles, & d'auoir l'honneur de l'assault. Et feirent les dicts deux Ducs, rouge, & Bourgongne, diligence d'auoir habillemens propres & necessaires, pour assaillir. Et de toute l'entreprinse, le Seigneur de Barbasan, ne s'en donnoit de garde. Bien est vrai, que ceux qui auoient la garde du costé de la ville, où estoit le siege du Roy de France dessus dict, vn iour apperceurent qu'on faisoit foison d'eschelles, & autres choses. Et le vindrent

drent dire au dict Seigneur de Barbasan, lequel apperceut, & veid leur maniere de faire, & appercent par les circonstances, que c'estoit pour assaillir la ville de ce costé seulement. Et ne auoit apparence du costé de l'ost du Roy d'Angleterre, qu'ils feussent aucunement disposez à faire assault. Et pource ordonna quarante ou cinquante arbalestriers à fortes arbalestres, & des meilleurs de la ville, à estre sur les murs du costé des Bourguignons, & des gens de guerre, tels que bon luy sembla. Dôt il auoit ordonné avec les gens de la ville vne partie, à iecter grosses pierres, caües, & gresses bouillans. Et l'autre partie, des mieux armez, & plus vaillants, à istre par vne faulx poterne, qui entroit de la ville deuers les fossez. Et si defendit qu'on ne tirast ou entraist dedans les fossez, iusques à ce qu'on ouit sonner les trompetes estans dedans la ville. Et vn iour adueint, que du costé des dicts Ducs de Bourgongne, & ronge, on commença à crier: A l'assault, & trompetes à merueilles de sonner. Et veindrent tout baudement sur le bord des fossez, iecterent leurs échelles dedans, & diligemment en descendirent plusieurs. Et quand il sembla au dict Seigneur de Barbasan, que assez en y auoit, Il ordonna aux trompetes de la ville, qu'ils sonnassent bien fort. Ce qu'ils feirent, & desia en y auoit, qui montoient iusques aux murs. Mais ceux de dedans vaillamment se defendoient, & iectoient grosses pierres, & plusieurs de leurs ennemis cheoient dedans les fossez, & les autres descendoient tousiours es dicts fossez, qui estoient moult soigneusement seruis de grosses arbalestres de trait. Et soudainement les François saillirent par la dicte poterne bien armez & habillez, pour combattre ceux qui estoient au fonds des fossez. Et quand les Bourguignons & Allemands veirent la façon de ceux de dedans, ils congneurent leur folle entreprinse, & feirent sonner la retraite, & se commencerent à retraire, & à monter contre le mont des dicts fossez. Et en remoyant, les arbalestriers de la ville les seruoient de viretons par le dos, qui entrerent iusques aux pennôs, & tellement, qu'ils se retrahirent à leur grande honte, & en demeura dedans les fossez plusieurs morts & naitrez. Et requirèrent qu'on souffrist les tirer dehors. Ce qu'on leur octoia volontiers, & aussi le feirent ils. Quand la chose veint à la congnoissance du Roy d'Angleterre, & de ceux de son siege, il ne leur en despleut guieres. Et

Ppp

1420. disoient les aucuns, que ce auoit esté vne folle entreprinse, & fil en estoit mescheu, qu'il estoit bié employé. Et le Roy d'Angleterre dit, que supposé que leur intention ne feust pas accomplie, toutesfois si auoit ce esté vaillammēt fait, & entrepris. Et que en fait de guerre, faultes valioient exploits.

Ils estoient dedās en grande nécessité de viures. Et pour leurs cheuaux n'auoit rien pour leur dōner, & hachoiēt le feurre bié menu, & le donnoient à leurs cheuaux. Et long temps ne mangerent que chair de cheual. Et tousiours vaillamment se defendoient, & tenoient. Ne à traité entendre ne vouloient pour lors. Quand les Anglois & Bourguignons veirent & cōgneurent que d'assault on ne les auroit pas, ils feirent miner en diuers lieux, & s'en doubtoient bien ceux de dedans. Pour laquelle cause, ils feirent diligence d'escouter és caues, s'ils orroient rien, que on frappast en pierres, ou qu'ils entendissent aucun son. Et vers la garde où estoit Louys Iuuenal des Vrsins, & autres, feut oui en vne caue apparence, que pres de là on besongnoit. Pour laquelle cause, Louys dessus dict se arma tresbien, & prit vne hache en son poing, en intention d'aller au lieu, où il luy sembloit, que l'ouuerture de la mine estoit preste à perçer, pour resister que les ennemis n'y entraissent. Et en y allant, rencontra le Seigneur de Barbasan, lequel luy demanda, Louys où vas tu? Qui luy respondit pour la cause dessus dicte. Et lors le dict Seigneur luy dit, Frere, tu ne sçais pas bien que c'est que de mine, ne que d'y combatre, baille moy ta hache, & luy feit coupper le manche assez court. Car les mines se tournent souuent en biaisant, & sont estroictes, & courtes bastōs y sont necessaires. Luy mesmes y veint avec autres cheualiers, & escuiers, & apperceurent que les mines de leurs ennemis estoient pres. Et pource on feit hastiement faire manieres de barrieres, & autres habillemens, pour resister à l'entrée. Et pource que le dict Seigneur veid la volonté du dict Louys, il voulut qu'il feust le premier à faire armes en la dicte mine. Ceux de dedans mesmes enuoierēt querir ménouuriers pour contreminer, & auoient torches & lanternes, & aussi auoient les autres. Et quand ceux de dedans eurent cōtreminé enuiron deux toises, il leur sembla qu'ils estoient pres des autres. Si feurent faites barrieres bones & fortes, & les attachèrent. Et pareillement les autres apperceurent qu'on cōtremini-

noit, & tant qu'ils se trouuerent l'un l'autre. Et se retrahirēt les 1420.
compaignons mennouuriers d'un costé & d'autre. Et y auoit
des ennemis, qui auoient grand desir d'entrer les premiers, & se
rencontrerent, & y eut aucuns coups frappez, mais non guie-
res. Et se retrahit on d'un costé, & d'autre. Et ceux de dedans
meirent la chose en telle dispositiō, qu'on ne leur pouuoit nui-
re. Et pource qu'on disoit, qu'en mines se faisoient de vaillan-
tes armes, on feit sçauoir que s'il y auoit personne qui voulust
faire armes, qu'il veinst. Dont le dict Louys requit au dict Sei-
gneur de Barbasan, qu'il luy donnast congé d'en faire. Ce qui
luy feut oſtroié: mais qu'il trouuaſt partie. Laquelle il trouua
assez aisément. Et estoit un bien gentilhomme Anglois d'An-
gleterre. Heure feut assignée, à laquelle ils comparurent, & y
auoit torches & lumiere. Et cōbatirent l'un contre l'autre vne
grosse demie heure, & n'y eut celuy qui ne perdist de son sang,
& de ceux qui auoient les gardes, feurēt retraictz. Et n'y auoit
guieres heure au iour, qu'il n'y eust en la mine des faictz d'ar-
mes. Entre les autres Remond de Lore, qui estoit un vaillant
escuier, entreprint armes deux contre deux, & print pour deu-
xiesme le dict Louys. Et cōbatirent contre deux Anglois, biē,
& vaillamment, & en eurent l'honneur. Et ne pouuoit on pré-
dre l'un l'autre. Car il y auoit un gros cheuron au trauers de la
mine, hault iusques à la poitrine. Et estoit defendu que nul ne
passast par dessus, ne par dessous.

Le Roy d'Angleterre, & le Duc de Bourgōgne, feirent plu-
sieurs cheualiers, & de grāds Seigneurs, lesquels vaillamment
festoient portez au faict des armes, qui auoient esté faictes en la
mine. Et sonnoient trōpetes, & menestriers en leurs sieges, &
faisoient vne grād ioye. Le Seigneur de Barbasan, dit aussi qu'il
en vouloit faire, & enuoia querir le dict Louys, & Gilles d'Es-
cheuiller, & les feit cheualiers, & feit aussi sonner, ce qu'il y a-
uoit de trōpetes, qui n'estoient pas à cōparaiger, à celles de l'oſt
des ennemis. Et pource feit sonner les cloches de la ville, dont
les ennemis feurent tous esbahis, & cuidoient qu'ils eussent
esperance d'auoir aucun secours. Et apres sçeurent que c'es-
toit pour la cause dessus dictē. Et qui voudroit mettre au
long les vaillances tant d'un costé, que d'autre, la chose se-
roit trop longue. Et le Roy d'Angleterre approuoit fort,
& louoit la vaillance de ceux de dedans. Et fils eusse-

ppp

1420. eu viures, iamaïs on ne les eust eu, n'y ne se feussent rendus.

Le Prince d'Orenge, veint au siege du Duc de Bourgogne, pour soy employer en son seruice, contre ceux qu'ils nommoient Armaignacs. Et quand le Roy d'Angleterre le sceut, il luy enuoia dire, qu'il feist le serment de garder le traitté de Troyes, dessus déclaré. Lequel respondit qu'il estoit prest de seruir le Duc de Bourgogne. Mais qu'il feist le serment, de mettre le Royaume es mains de l'ennemi ancien & capital du Royaume de France, iamaïs ne le feroit. Et pource assez soudainement s'en partit, & s'en alla en son pays, doubtant aucunement que le Roy d'Angleterre ne luy feist aucun desplaisir.

Ceux de dedans Melun, estoient en grandes destresses de viures, & cuidoient tousiours auoir secours, ou qu'il suruincist es Osts qui estoient deuant eulx aucune chose, par quoy ils se deussent leuer. Et auoient esté bien vn mois sans pain, & ne mengeoient seulement que chair de cheual, qui est vne chose peu ou neât nourrissant. Et falloir que ceux qui en mengeoient, allassent deux ou trois heures apres à la selle, & comme rien ne pouuoit arrester au corps d'vne personne. Ces choses scauoient leurs ennemis. Car aucunes pauvres personnes, qui n'auoient que menger, s'en issirent, spécialement par la riuere. Et si prenoient aucunes fois es escarmouches des prisonniers. Et ceux de dedans volontiers eussent trouué moyen de saillir, & eulx en aller, s'ils eussent peu. Mais le siege estoit si fort fortifié contre la ville, qu'il estoit impossible qu'ils se peussent sauuer, sinon par aucun traitté, lequel feut ouuert, & parlementerent. Et combien qu'il y eust diuerses manieres ouuertes, toutesfois feurent contraincts ceux de dedans faire tel traitté, que leurs ennemis vouloient. Et feut ordonné & traitté qu'ils s'en iroient, saulues leurs vies, & sans estre mis à aucune raison ou finance. Du dict traitté feurent exceptez ceux qui auoient esté cōsentans de la mort du feu Duc de Bourgogne, Jean. Et pour ostages feurent baillez, le Seigneur de Barbasan mesmes, & douze desquels qu'ils voudroient. Et y auoit aucuns Seigneurs de Bourgogne, & de France, qui eussent volontiers saillué Messire Louys Iuuenal des Ursins. Mais expressement les Anglois le demanderent en ostage. La ville feut rendue, & deliurée, laquelle feut trouuée bien desgarnie de viures, & y auoit pas vne bourse de deniers en list, ne autrement.

Car tout auoit esté donné aux cheuaux. Plusieurs se sauuerent, & à aucuns on faisoit voye, les autres auoient amis & accoinctances du costé des Bourguignons, & les autres par donner argent. Et combien qu'ils s'attendoient eulx en aller simplement, vn baston en leur poing. Toutesfois les Anglois, & leurs alliez autremēt le interpreterent, C'est à sçauoir, qu'ils s'en iroient saulues leurs vies, non mie où ils voudroient, mais aux prisons du Roy à Paris. Et pource plusieurs trouuerent moyen d'eulx sauluer. Laquelle interpretation feut orde & des-honneste, pour vn si vaillant Roy, que on disoit estre le Roy d'Angleterre. Et la pourroit-on comparer à la volonté d'un vrai tiran, comme il pourra apparoir par ce qui sera dict cy apres, & fort desplaisoit à aucuns Anglois mesmes. Et entre les autres, de ceux qui estoient dedās la dicte ville de Melun, y auoit trois vaillants escuiers, lesquels auoient serui Monseigneur d'Orleans en ses guerres, & ausquels aucuns du parti du Duc de Bourgongne, auoient grande volonté de faire desplaisir, C'est à sçauoir Raimond de Lore, le bastart de Ducey, & le bastart de Seine. Et leur vouloient imposer qu'ils auoient esté à la mort du Duc de Bourgongne, qui estoit chose faulse. Qui supplierent à vn qui estoit assez prochain, & bien-aimé du Roy d'Angleterre, qu'il les voulust sauluer. Lequel cuidant bien faire, & qu'ils s'en deussent aller liberatement, quand bon leur sembleroit, les mena hors, & s'en allerent. Et ce veint à la congnissance du Duc de Bourgongne, qui s'en plaignit au Roy d'Angleterre. Et promptement sans autres proces luy feit couper la teste, qui feut prié, mais il estoit Anglois. Les ostaiges & aussi les autres qu'on peut apprehender, feurent menez en bareaux à Paris, les vns mis en la bastille de Saint Antoine, & les autres au Palais, Chastellet, le tēple, & en diuerses prisons. Et ce feut la maniere comme ils s'en allerent saulues leurs vies, & sans les mettre à aucune finance. Mais la maniere de sauluer leurs vies, feut d'en mettre plusieurs en fosses, spécialement en Chastellet, & les laisser mourir de faim. Et quand ils demandoient à manger, & criaient à la faim, on leur bailloit du foin, & les appelloit on chiens, qui estoit grand deshonneur au Roy d'Angleterre. Plusieurs en y eut, spécialement au Palais, qui se eschapperent, & passerent la riuere en nageant. Et combien que d'eux on n'exigeoit apparemment aucune finance: toutes-

1420. fois le Roy d'Angleterre les donnoit à prisonniers de son parti, qui les mettoient à finance, pour eulx racquiescer, & rachep-
 ter. Et au Seigneur de Chastillon, qui estoit prisonnier de guer-
 re d'un vaillant escuier, nommé Poton de Sainte Treille, il
 donna, bailla, & deliura le Seigneur de Preaux, Messire Nicole
 Gemme, Arnault Guillon de Barbasan, & Messire Louys Iu-
 uenal, lesquels payerent bien grosses finances. Et toutesfois le
 dict Seigneur de Chastillon, estoit ja deliuré, & hors des mains
 du dict Poton. Et de plusieurs autres, ainsi feut fait.

Les Roys, ce fait s'en veindrent à Paris, le premier Diman-
 che de l'Aduent, en grandes pompes. Et crioit on Noel fort &
 hault à Paris, en monstrant grand signe de ioye. Et le lende-
 main, les Roynes y entrèrent.

Grandes plainctes veindrent à Paris de ceux de Meaulx au
 Roy d'Angleterre, en luy disant, qu'ils faisoient guerre mortel-
 le, & bouroient feux. Lequel respondit qu'il y pourueiroit,
 & mettroit le siege, & les auroit. Et quant aux feux qu'on di-
 soit, qu'il bouroient au plat pays, Il respondit que ce n'estoit
 que vñce de guerre, & que guerre sans feu ne valloit rien,
 non plus que andouilles sans moustarde.

Le sixiesme iour de Decembre, feurent mandez les trois Es-
 tats à Paris, & feurent assemblez à Saint Paul, en la basse salle.
 Et proposa Maistre Iean le Clerc, & print son theme, *Audita est*
vox lamentationis, & planctus Syon. Et narra les diuerses guerres qui
 auoient esté, la mort du Duc de Bourgogne, & la paix faicte
 à Troyes, & les places conquestées. En requerant aide, pour
 conduire le fait de la guerre. Et aussi que la monnoie, estoit
 foible, qui estoit au grād dommaige de la chose publique. Auf-
 quelles choses failloit prouision, & qu'ils y voulussent aduiser.
 Et apres, ceux qui estoient enuoiez comme par les trois Estats,
 se retrahirent à part. Et par la bouche de l'un d'eulx feut dict,
 Que ils estoient prests & appareillez, de faire tout ce qu'il plai-
 roit au Roy, & à son Conseil ordonner. Et feut ordonné, qu'on
 feroit vne maniere d'emprunt de marcs d'argent, qu'on mette-
 roit à la monnoye. Et ceux qui les metteroient, auroient la mon-
 noye au pris que l'on diroit. Et de ce qui valloit huit francs le
 marc d'argent, & qui seroit mis en la monnoye, ils en auoient
 sept francs, & non plus, qui estoit bien grosse taille. Et feut la
 dicte conclusion executée, & feit-on l'impost des marcs d'ar-

gent, non mie seulement sur les bourgeois, & marchands: 1420.
 mais sur les gens d'Eglise. Ceux de l'Vniuersité feirent vne
 proposition deuant le Roy d'Angleterre, pour en estre exēpts.
 Mais ils feurent bien reboutez par le dict Roy d'Angleterre, &
 parla trop bien à eulx. Et cūderent replicquer: mais à la fin ils
 se teurent, & deporterent, car autrement on en eust logé en
 prison. Et lors aussi failloit-il dissimuler par toutes personnes;
 & accorder ce qu'on demandoit, ou autrement, assez legiere-
 ment on les eust tenu pour Armaignacs.

Le vingt troisieme iour du dict mois de Decembre, deuant
 le Roy d'Angleterre Henry, soy disant Regent du Royaume
 de France, feit faire le Duc de Bourgongne vne proposition
 par Maistre Nicolas Raulin, Aduocat en la Court de Parle-
 ment, son Conseiller. En disant & alleguant la mort du feu
 Duc de Bourgongne, son pere, & declaroit la maniere comme
 elle auoit esté faicte, ainsi que bon luy sembloit. Et prenoit
 conclusions contre Monseigneur le Regent, Daulphin, seul &
 vnicque fils du Roy, telles que bon luy sembla. Et aussi contre
 les François, qui l'auoient serui, & seruoient, & portoient la
 croix droicte blanche. Et apres parla Maistre Pierre de Mari-
 gny, soy disant Aduocat du Roy, & Maistre Jean Hacquenin,
 Procureur du Roy, & preindrent grandes conclusions. Et le
 iour mesme donnerent leur Sentence telle quelle, inique, &
 desraisonnable, & nulle de toute nullité.

Le Roy d'Angleterre, apres ces choses delibera de mestre le
 siege deuant la Cité de Meaulx, & le marché. En laquelle estoient
 de vaillāts gens pour Mōseigneur le Daulphin, Regēt le Roy-
 aume, comme Messire Louys Gas, Baillif, Guichart de Chissar,
 Capitaine, Perron de Luppe, le bastard de Vuaurru, & Messire
 Philippes de Gamaches, Abbé de Saint Pharon de Meaulx, &
 depuis Abbé de S. Denys en France. Et de faict, le Roy d'An-
 gleterre enuoia fermer le siege deuant les places de là Cité &
 du marché. Et issirent les compaignons de guerre de la ville;
 & vaillamment rebouterent les Anglois, & y en eut de morts,
 & de prins plusieurs. Mais la grande puissance des ennemis
 qui furuint, les feit retraire. Et se porterent si vaillamment
 ceux de dedans, qu'ils reindrent la dicte Cité, & le dict mar-
 ché sept mois. Et y eut foison d'Anglois, & Bourguignons
 morts, tant de traict, & par faillies, que par maladie. Et en-

1420. tre les autres, vn iour ceux de dedans estoient gros canons, & vulgaires. Et adueint que Messire Iean de Cornouaille, vaillant cheualier Anglois, feut frappé & blessé d'un canon. Et assez pres de luy auoit son seul fils, & vnicque enfant, qui estoit vn bel escuier, & vaillant selon l'age, sur lequel vne fortune adueint, que vn canon issant de la ville, luy osta la teste iusques aux espaulles tout netement. Si le dict de Cornouaille feut desplaisant, ce ne feut pas de merueilles. Et considerant leur querelle estre damnée & des-raisonnable, comme tout hault il disoit. Et que en Angleterre feut seulement conclüe la conqueste de Normendie, & que contre Dieu, & raison, on vouloit priuer Monseigneur le Daulphin du Royaume, qui luy debuoit appartenir. Doubtant, s'il persistoit, d'estre en danger, & peril de corps, & d'ame, & de mort soubdaine, iura, & promet que iamais contre les Chrestiens ne porteroit armes. Et de fait s'en partit, & s'en alla en Angleterre, ne oncques puis n'en partit.

Monseigneur le Daulphin, & Regent, voiant ses gens affiegez par toutes manieres, queroit moyens de leur donner secours. De laquelle chose, vn vaillant cheualier, noble, & de grãde maison, nommé le Seigneur d'Auffemont, feut aduertí. Et considerant que dedans la dicte Cité & marché, ne auoit pas gens suffisans, à resister à la grande puissance des Anglois & Bourguignons, delibera s'il pouuoit d'y entrer, & se bouter dedans. Et assemblea ce qu'il peut de gens, & se mit à chemin. Et de fait, veindrent luy & ses gens pres du siege, & à l'endroit d'une des portes. Et vaillamment & hardiment frapperent sur les Anglois, lesquels tantost s'assemblerent pour resister. Et auoient les Anglois tellement fortifié entre eux & la porte, que il n'estoit pas possible d'y entrer, ne à ceux de dedans de iſtre. Et se trouuerent les dicts Seigneurs d'Auffemont, & ses gens, environnez de toutes parts de leurs ennemis. Et comme gens de grand couraige, se defendoient vaillamment, & plusieurs Anglois tuerent, & nauèrent. Et finablement feut prins, & aucuns de ses gens, & y en eut aussi qui se sauuerent.

Quand les François veirent, qu'ils n'auoient point de secours, & que le dict Seigneur d'Auffemont auoit failli d'y entrer, ils se retrahirent dedans le marché de Meaulx. Et disoit-on que ce feut Petron de Luppe, sans le ſecours du baſtrad de Vuauru

Vuaurru. Et tellement, que le dict bastard, & son Lieutenant, 1420. feurent prins dedans la place. Iceluy bastard, cuidant venger la mort du feu Comte d'Armaignac son maistre, souuent courroit par les champs, & tous ceux qu'il trouuoit vers les marches de Paris, feussent laboureurs, ou autres, tres-inhumainement les traictoit, & en vn grand arbre vers la ville les pendoit, ou faisoit pendre, dont plusieurs François estoient tres-mal cōtents, & non sans cause. Et quand le Roy d'Angleterre sceut qu'il estoit prins, & aussi son Lieutenant, ils les fait pendre au dit arbre mesmes. Toutesfois les aucuns dient qu'il fait couper la teste au bastard, & la mettre au plus hault de l'arbre sur vne perche. Et combiē qu'il feust vaillant hōme d'armes, & que aucuns disoient que ce n'estoit pas bien honnorablement fait à vn si vaillant Roy, comme le Roy d'Angleterre, d'auoir fait mourir vn si vaillant homme d'armes, & gentil-homme, pour cause d'auoir si loyalement serui son souuerain Seigneur. On disoit aussi que le dict bastard sans cause & sans raison, auoit fait mourir plusieurs gens, & pendre tant pauures laboureurs, que autres. Et que c'estoit vne punition diuine, sil estoit puni de pareille mort, comme il faisoit mourir les autres.

Après que les Anglois feurent entresz en la ville, ils se bouterent es moulins, ioingnans de la dicte ville pres du marché. Et en les cuidant gagner, comme ils feirēt, ceux du marché, D'vn coup de pierre. Et disoit en que c'estoit d'vn vuglaire, tuerēt le Comte de Ouercetre, lequel feut moult plaint de tous ses gens, & de tous les Anglois.

En ce temps, vn iour les Anglois, & François en vn champ se rencontrerent, & estoient assez grand gent d'vn costé & d'autre, & y eut fort & longuement combatu, tant deça que delà. Et finalement les Anglois feurent tous morts, ou prins, excepté vn qui s'enfuit, pour euitier la mort. Laquelle chose feut signifiée au Roy d'Angleterre, qui en feut moult desplaisant, & fait prendre celuy qui s'en estoit fui, & le fait planter en terre, & tres-inhumainement tyranniser, & mourir.

Après ce que les François, de dedans le marché assez longuement se feurent tenuz, congnoissans & voians qu'ils n'auroient aucun secours, & que viures leur failloient, ils feurent contrains d'eulx rendre, & mettre à mercy, & à la misericorde du Roy d'Angleterre, la vie sauue d'aucuns. Et entreterent les en-

1420.

nemis dedans. Et les gens de guerre feurent tous prins, & les vns mis à mort, & les autres enuoiez en diuerses prisons, tant en Angleterre, que à Paris, où plusieurs piteusement finirent leurs iours, & les autres feurent mis à excessiues finances. Et en tant qu'il touchoit Messire Louys Gas, cheualier, Baillif de Meaulx, & Maistre Iean de Rennes, Aduocat en Court laye, bien notable homme, ils feurent par eäie amenez à Paris, & aux halles eurent les testes couppees publiquement.

C'estoit grand pitié des prisonniers, qui estoient en diuerses prisons à Paris. Car on les laissoit mourir de faim es prisons où ils estoiet. Et l'un mort, les autres arrachoiēt aux dents la chair de leurs compaignons morts. Et vouloient faire mourir Messire Philippes de Gamaches, pour lors Abbé comme dict est, de Saint Pharon, & depuis de Saint Denys, noble hōme, & qui vaillamment à la defense de la ville, & de son corps, s'estoit porté, lequel auoit son frere à Compiègne, Capitaine pour Monseigneur le Regent. Auquel on feist sçauoir, qu'on iecteroit son frere en la riuere, s'il ne rendoit la place de Compiègne, & qu'on le feroit mourir. Lequel Seigneur de Gamaches, nommé Messire Guillaume, voiant, & considerant que si on venoit deuant luy, il faudroit vouldr, ou non, apres ce qu'il se seroit tenu, qu'il rendist la place, qui estoit mal garnie de viures, & de gens. Et pour eüier la mort de son frere, rendit la place, & la meit es mains des ennemis. Et s'en alla tous ses biens faulues, exceptez les habillēmés de guerre, seruās à la fortresse. Et par ce moyē, le dict Messire Philippes Abbé, feut deliuré. En la compaignée duquel, auoit trois religieux de l'Abbaye de Saint Denys, lesquels auoient aidé de leur pouuoir à defendre eulx, & la ville, ainsi qu'ils debuoiēt & pouuoient faire selon raison, & feurent prins. Et l'Euesque de Beauuais, nommé Maistre Pierre Cauchon, fils d'un laboureur de vignes empres Rheims, faisoit diligence de les faire mourir. Et les mestre en bien fortes & dures prisons, & estroitement garder, & tenir. Non considerant, qu'ils n'auoient en riē failli. Car la defense leur estoit permise de droit naturel, ciuil, & canonique. Et disoit qu'ils estoiet crimineux de lese Majesté, & qu'on les deuoit degrader. Et le faisoit, afin de mōstrer qu'il estoit bon Anglois. Et quand la chose veint à la cognoissance de l'Abbé de Saint Denys, il feist diligence de les auoir, & les requit. Et apres plu-

fieurs delais, luy feurent baillez, & deliurez, pour en faire ce 1421. que bon luy sembleroit. Et les feit mener à Saint Denys.

Le Roy d'Angleterre, apres ses conquestes faictes, pour pourueoir aux necessitez du Royaume d'Angleterre, delibera d'y retourner. Et de faict y retourna. Et ordonna & meit provisions en France, tant pour la guerre, que autrement. Et en Normendie vers Anjou, & le Maine, laissa le Duc de Clarence, son frere.

Monseigneur le Daulphin, Regent, auoit enuoyé en Escosse, requerrir aide & secours contre les Anglois, lesquels delibererent d'y venir. Et arriuerent en France vers la Rochelle, les Comtes de Bouquan, & Viston, & plusieurs de la nation d'Escosse, de quatre à cinq mille combatans, pour eulx employer au seruice du dict Monseigneur le Daulphin.

L'an mille quatre cents vingt & vn, Apres aucun temps, le 1421. Duc de Clarence, frere du Roy d'Angleterre, accompagné des Comtes de Hontinton, de Sombreffet, & de Kent, du Seigneur de Ros, & de plusieurs grands Seigneurs, & Barons du Royaume d'Angleterre, & d'archers, iusques au nombre de six à sept mille combatans, se partit de Normendie, en intention d'aller vers Angers, & au pays d'Anjou. Et de faict, y allerent, & tant qu'ils arriuerent vers vne place nommée Baugé en vallée, en Anjou, & passerent aucunes riuieres. Et la chose venue à la congnoissance des Seigneurs de France, & d'Escosse, c'est à sçauoir des Comtes de Bouquan, & de Viston, d'Escosse, du bastard d'Alençon, des Seigneurs de la Fayette, Marechal de France, Fontaines, Belloy, & de Croix, avec plusieurs autres François, & Escossois, iusques au nombre de cinq à six mille combatans, ils se veindrent loger assez pres de Baugé en plusieurs villaiges. Car tous ensemble n'eussent-ils peu loger. Et enuoierent les Anglois vers les Escossois, sçauoir s'ils voudroient point prendre iournée, à auoir bataille. Et respondirent les François, & les Escossois, qu'ils en estoient contents. Et d'un costé & d'autre, en feurent bien ioyeux, & esleurent place pour combattre, & leur iour assigné.

Et le Sabmedy, vigile de Pasques, le Marechal de la Fayette, & aucuns Capitaines d'Escosse, delibererent d'aller voir la place où ils pourroient combattre. Et ainsi qu'ils y aduisoient, Il y eut de leurs gens, qui veindrent dire, qu'ils auoient veu des

1421. Anglois, qui s'estoiēt assemblez pour venir combattre. Et comme on sceut depuis, ils cuidèrent prendre les François & Escossois destouuerts, & frapper sur leur logis. Et chevaucherent tant les dicts Anglois, qu'ils feurent apperceus. Et feit-on diligence d'enuoier par les logis, assembler gens, lesquels vindrent de toutes pars. Et arriuerent les Anglois à vn passaige, où ils cuidoiēt aisément passer, où il y auoit logez de six à sept vingts archers Escossois, qui commencerēt à tirer. Et longuement teindrēt & empeschèrent le passaige, tellement que ils n'y peurent passer. Et tousiours François s'assembloient, & tellemēt, que aisēmēt ils se pouuoient assembler pour combattre. Et dit on, que quand le Duc de Clarence apperceut que les François n'estoient guieres, & non encores bien serrez, Il ordonna que luy, & les nobles d'Angleterre, qui estoient de mille à douze cents cottes d'armes, frapperoient les premiers, & meirent leurs archers aux ailles, par maniere d'arriere-garde. Quand les François & Escossois veirent leur maniere, ils ne firent que comme vne bataille à pied, & aucuns meirent à cheval. Et s'assemblerent les vns contre les autres, vaillamment, & hardiment. Et se fourrerent les archers d'Escoce dedans les Anglois. Et y eut de belles armes. Et en peu d'heures, d'un costé & d'autre, plusieurs bantieres & estendards feurent abbatuz, & redressez, & mesmement des François, & Escossois. Et feurent les Anglois assez soubdainement desconfits, & y moururent le Duc de Clarence, & le Comte de Kent. Et le Seigneur de Ros, & Messire Emond de Beaufort, feurent prins, avec grande quantité d'autres. Et des François en mourut enuiron de vingt-cinq à trête. Et entre les autres, deux chevaliers du Maine. L'un, nommé Messire Jean Euruin, & l'autre, Messire Floques de Cottereau, & vn escuier, nommé Garin de Fontaines. Les François, & Escossois, avec leur proye retournèrent en leurs logis. Et aussi les Anglois, qui estoient encores plus de quatre mille combatans, dès le point du iour, se meirent à chemin, & non mie par le droit chemin, doubans les François. Et s'en allerent vers le Mans, & passerent le Loir près de la Flesche. Et pour passer la riuiere de Sarre, preindrent les croix blanches, & assemblerent les bonnes gens du pays, & leur firent faire vn pont, par où ils passèrent. Et quand ils feurent passez, rompirent le pont, & tuèrent les pauvres gens, & les mei-

rent à mort. Et les François qui les suiuioint, apperçurent bien qu'ils ne les osoient attêdre, & pource s'en retournerent. 1421.

Le Lundy de Pasques au matin, Messire Louys Boyau, vn cheualier de Soulongne, feut deuers Monseigneur le Daulphin, Regent, lequel auoit esté à la besongne, enuoié par les Seigneurs de France, & d'Escoffe, & luy dit les nouuelles de la desconfiture. Quand le dict Seigneur, eut ouy le dict cheualier, il se vint du chastel de Poitiers, iusques à nostre Dame, pour remercier & regracier Dieu, & tout à pied. Et y eut vne belle & notable messe chantée, & Sermon faict par vn Docteur en Theologie, nommé Maistre Pierre de Versailles. Et ce faict, s'en retourna au chastel, pour prendre sa refection, remerciant Dieu, & ioyeux de la victoire qu'il luy auoit donné.

Fortes guerres & merueilleuses regnoient par tout. Et en diuers pays auoit Capitaines, qui tenoient le parti de Monseigneur le Daulphin Regent. Et entre les autres, en Champagne, & Picardie, auoit vn vaillant homme d'armes, hardy, saige, prudent, & subtil en faict de guerre, nommé Estienne de Vignolles, dict la Hire, lequel plusieurs grandes diligences faisoit de greuer les Anglois, & Bourguignons, & fouuent cheuauchoit. Et vn iour luy estant sur les champs, trouua ou rencontra le Comte de Vaudemont, accompagné de plusieurs gens de guerre, & frappa dessus, & se meirent en grande defense. Mais à la fin la Hire eut la victoire, & feut prins le dict Comte, & plusieurs autres, & si en y eut vne grande partie de tuez. Et qui voudroit escrire les vaillances, entreprises, & executions du dict la Hire, ce seroit longue chose.

Au dict pays aussi de Champagne, y auoit vn autre vaillant homme d'armes, escuyer, & noble du pays de Bretagne, nommé Regent de Conluy, qui estoit comme Lieutenant de Monseigneur le Daulphin Regent, & avec luy vn autre vaillant homme du dict pays mesmes, nommé Bourgeois, lesquels greuoient fort les Anglois, & Bourguignons, & se retrahoiient en vne place, nommée Montagnillon. Le Comte de Salbery, vaillant Prince d'Angleterre, delibera de les assieger. Et de faict y mena le siege, & alloua canons, vulgaires, & autres habillemets de guerre, pour auoir la dicte place. Ceux de dedans non esbahis, aians bonne volonté de eulx defendre, souuent faillioient à leurs ennemis, & fort les greuoient, tant de trait, que au-

1421. tremement, & plusieurs en tuoient. Et se teindrent tellement, que le Comte delibera de les auoir par miner les tours, & les faire cheoir. Ceux de dedans s'en doubterent, & contremirent, & y eut és diêtes mines de beaux faicts d'armes faicts. Et à la fin, y eut grande foison de ceux de dedans, morts, & malades, & si viures leur failloient. Et partant feurent contraincts à rendre la place. Et y eut composition faicte, par laquelle ils se rendirent, saulues leurs vies, mais pour prisonniers demeurèrent. Et prisoit fort lediê Comte la vaillance de ceux de dedans.

Monseigneur le Daulphin Regent, se meit sur les champs, & auoit en sa compaignée le Duc d'Alençon, les Comtes de Bouccan, & de Victon, & plusieurs vaillants gens. Et vindrent és marches vers le Perche, où auoit en plusieurs garnisons Bourguignons, faisans guerre. Et entre les autres, en vne place nommée Mont-mirail, laquelle feut assiegée, & y assortit on des engins, par lesquels feut fort batüe, & vne partie des murs abbatus. Finablement, ceux de dedans, voyans que à la puissance qui estoit dedans, ils n'eussent peu resister, & que la puissance du diê Regent estoit trop forte pour eulx, rendirent la place à mon diê Seigneur le Regent, & si luy feirent serment de le bien & loyaulment seruir. Des deux Capitaines, l'un, auoit nom Fourquet Pefas, & l'autre, Iannequin, & se tindrent de son parti. De là se partit le diê Regent, & son armée, & s'en vindrent vers Chartres, iusques à Gaillardô, que les gens du Duc de Bourgongne tenoient, & occupoient, & guerre en faisoient. Et en passant pays, plusieurs places se rendoient en son obeïssance. Et enuoia on jusques à Gaillardon, les sommer qu'ils feissent obeïssance, lesquels mal conseillez faire ne le voulurêt. Et pource le siege y feut mis, & les engins assortis, & environnée de toutes parts. Et ietterent les bôbardes & canons tellement, que la plus grande partie des murs, feurêt abbatus. Et ce faict, huit jours apres que le Siege y feut mis, la ville fut assaillie bien asprement. Et ceux de dedans fort se defendoient. Et finablement les Frâcois & Escossois y entreurent: & y feirent vne piteuse occision. Car il y auoit vn Capitaine Breton de Monseigneur le Regent, nommé Charles de Montfort, qui auoit grande compaignée de gens de guerre soubz luy, lequel feut tué deuant la place. Et pource ils

tuerent tous ceux qui estoient dedans la ville, tant armez, ^{1421.} que non armez. Dedans auoit vn compaignon, nommé le Rouffelet, qui estoit Baillif, & Capitaine de la place, lequel se cuidant sauuer, & resister à la puissance qui y estoit, se bouta en vne tour, qu'il tenoit pour forte, laquelle par force feut prinse, & le dict Rouffelet aussi, auquel feut la teste trenchée. Et faict ce que dict est, mon dict Seigneur le Regent se retira vers les marches d'Anjou, & de Tourraine.

Quand le Roy Henry d'Angleterre, eut besongné au dict pays, il s'en retourna en France. Et luy rapporta om comment Monseigneur le Regent auoit esté vers Chartres, & jusques à Gaillardon. Et pour ceste cause s'en vint à Chartres à tout bien grande compaignée, qu'on estimoit à bien quinze mille combattans. Et de là se partit, & s'en vint par pres de Chasteaudun, où il y auoit bonne garnison, prests de eulx defendre, & monstrans signes de vaillamment resister. Et pource le Roy d'Angleterre passa outre, & s'en vint loger aux fauxbourgs d'Orleans. Et les habirans de la ville non esbahis, luy feirent guerre la plus aspre qu'ils peurent. Et pource luy voyant, que peu y feroit, se partit de là, & print son chemin vers Baugency. Et se bouta en son Ost, vne merueilleuse pestilence de flux de ventre, & les trouuoit on morts emmy les chemins, en diuers lieux, & tellement, qu'on dit qu'il en mourut bien de la dicté maladie, de trois à quatre mille. Et es bois d'Orleans, par gens des villaiges, qui sy estoient boutez & retraits, en y eut foison de ruez. Quand Monseigneur le Regent sceut ces nouuelles, il assemblea ses gens qui estoient en diuerses garnisons, & d'un vaillât couraige s'en vint à Vendosme, distant de douze à quinze lieues de ses ennemis, qui n'estoit pas grande distance. Et se faisoient plusieurs & diuerses courses, tant d'un costé, que d'autre, & aucunes fois se rencontroient. Toutesfois les armées n'approcherent point l'une de l'autre, ne il n'y eut aucun faict d'armes, dignes de memoire. Et se partit le Roy d'Angleterre, sans autre chose faire, & print son chemin vers Dreux, où il y auoit ville & chastei, dont estoit Capitaine, vn vaillant cheualier, nommé Messire Maurignon, lequel n'y estoit pas, & estoit absent, & son Lieutenant. Et aussi les compaignons, voyans que autour d'eulx n'y

1421. auoit place Françoisse, & doubtrant de non auoir secours, sans coup ferir preindrent composition, & s'en allerent à tout leurs biens, harnois, & cheuaux. Et ce fait, le Roy d'Angleterre s'en retourna à Paris, & se logea au bois de Vincennes, qui est vn moult bel chastel, à vne lieüe de Paris.

Enuiron la natiuité de nostre Dame, l'an mille quatre cents vingt & vn, le Roy d'Angleterre delibera d'enuoier Madame Catherine sa femme, fille du Roy, en Angleterre, laquelle estoit grosse, & feut menée à Saint Denys, bien grandement ornée, & parée. Et de là se partit, pour prendre son chemin vers la mer, & passa parmy plusieurs villes, tant de France, que de Normendie, où elle feut grandement & honnorablement receüe, & luy feit on plusieurs dons & presens, grands & notables. Et pour l'accompagner, auoit les Ducs de Bethfort, de Excestre, & autres grands Seigneurs, Dames, & Damoiselles. Et entre les autres, la Dame de Bauiere, sœur du Duc d'Alençon, qui auoit esté mariée à feu Messire Pierre de Nauarre, & depuis au Duc de Bauiere, frere de la Roïne Isabeau. Et quād elle feut au riuage de la mer, trouua trois grands vaisseaux, dont les deux estoient garnis de gens de guerre, grandement & notablement habillez. L'autre, estoit grand à deux masts, & par dedans estoit tout tendu de drap d'or, & paré bien grandement. Auquel vaisseau elle entra. Et vne partie des Princes, & Seigneurs, & aussi des Dames & Damoiselles la conduirent, & l'autre partie s'en retourna en France. Et assez aisément arriua en Angleterre. Car il y auoit bon vent. Et veindrent au port, où ia estoient venus grands Seigneurs, Princes, Barons, cheualiers, & escuiers, qui l'attendoient, & aussi Dames, & Damoiselles, avec tous instruments de musique, qu'on eust peu souhaiter. Et en passant par les villaiges, & pays, tout le peuple affluoit, & faisoit on ieux & esbatemens. Et à Londres, quand elle y entra, feirent grand ioye, & feut hōnorablement receüe en la forme & maniere, qu'ō auoit accoustumé faire les autres Roynes d'Angleterre. Et enuiron le mois de Novembre, accoucha la dicte Roïne d'un fils, lequel teint fut fons le Cardinal d'Angleterre, dict de Excestre, nommé Henry, & porta son nom, & feut baptisé à bien grande solemnité.

1422. L'an mille quatre cents vingt & deux, Au commencement du mois d'Aoust, le Comte d'Aumalle, vaillant homme, & le
Vicomte

Vicomte de Narbonne, feirent vne armée au pays du Maine, 1422. & entrèrent au pays de Normendie, & estoient enuiron deux mille combatans. Et cheuaucherent par le dict pays, en cuidans loger à Bernai. Et auoient l'auantgarde, Messire Iean de la Haye, Baron de Coulonges, & Messire Ambroise, Seigneur de Lore, entre les autres, renommez de vaillants couraiges & hardis. Et trouuerent que à Bernai auoit enuiron de quatre à cinq cents Anglois, lesquels se meirent aux champs. Et les aperceurent les dicts de Coulonges, & de Lore, & les suiuirent le plus diligemment qu'ils peurent. Et enuoierent diligemment vers les dicts Seigneurs d'Aumalle, & de Narbonne, qu'ils se aduancassent, & passassent hastiuement outre la dicte ville de Bernai, pour combattre les dicts Anglois, lesquels ainsi le feirent, Et tousiours les dicts de Coulonges, de Lore, & leurs gens, suiuiuoient les Anglois de pres, en escarmouchant. Et passerent, & approcherent les dicts d'Aumalle, & Narbonne, tant qu'ils veirent les dicts Anglois en plain champ. Et lors feit cheualier le Vicomte de Narbonne, le dict Comte d'Aumalle. Et tousiours les Anglois cheuauchoiert, & se tenoient ferrez. Et eulx cuidans retraire sans rien perdre, finalement les dicts d'Aumalle, & Narbonne, tres-diligemment les chassoient. Et auant qu'ils feussent arriuez, les dicts de Coulonges, & de Lore, frapperent sur les dicts Anglois à cheual, & les meirent en desarray, & feurent là desconfits, & vne partie de morts, & les autres prins. Et apres ceste victoire, s'en allerent les dicts Seigneurs François, & leurs gens, loger au dict lieu de Bernai, où ils trouuerent plusieurs biens meubles, appartenans aux dicts Anglois, qu'ils feirent emporter. Et le lendenain, se meirent en chemin, pour eux en retourner au pays du Maine.

Au dict an, le Ludy dernier jour d'Aoust, Henry Roy d'Angleterre, alla de vie à trespassement au bois de Vincennes pres de Paris. Et mourut d'une maladie, qu'on nôme de Saint Fiacre, & estoit vn flux de ventre merueilleux. Et disoit on communément qu'il auoit esté à l'Eglise, & chappelle de ce glorieux Saint, Monseigneur Saint Fiacre. Et que son intention estoit, de transporter le dict corps du lieu où il estoit, en autre lieu. Et estoit voix & commune renommée, que c'estoit en son pays d'Angleterre. Et en tel cas, souuent quant à Dieu la volonté est reputée pour le faict. Et à ceste cause disoit on que

Rrr

1422. Dieu l'auoit osté de ce monde, qu'il ne meist sa mauuaise volunté à execution. Le dict Roy en son temps, au moins depuis qu'il estoit descendu en France, auoit esté de hault & grand couraige, vaillant en armes, prudent, saige, & grand Iusticier, qui sans acception des personnes, faisoit aussi bonne Iustice au grand, que au petit, selon l'exigence du cas. Et estoit en crainte, & reuerence de tous ses parens, sujets, & voisins. Ne oncques Prince ne feut plus suffisant, pour conquerir, & acquerir, & aussi garder ce qu'il auoit conquis, comme il estoit. Et ce il ha bien monstré es conquestes, que sa vie durant il ha fait au Royaume de France. Combien que la haulte entreprinse qu'il ha fait, ha esté seulement à l'occasion des diuisions, qui estoient entre les Seigneurs de France, toutes notoires. Et comme on disoit, auoit en volonté de faire de plus grandes choses, s'il eust vescu. Mais Dieu en disposa bien autrement. Et n'auoit que enuiron quarante ans, quand il alla de vie à trespassement. Son corps feut mis par pieces, & bouilli en vne paille, tellement que la chair se separa des os, & l'eau feut jetée en vn cimetiere. Et les os & la chair mis en vn coffre de plomb, avec plusieurs especes d'espices, & de choses odoriferantes, & sentans bon. Et apres, le dict coffre feut mis en vn chariot, couuert de drap noir, & mené à Saint Denis. Et deuant le chariot, & aussi derriere, auoit deux lampes ardans, qui durerent jusques à Saint Denys, & deux cents cinquante torches ardans continuellement. Et faisoient le dueil le Duc de Bethfort son frere, & autres Princes d'Angleterre, vestus de robbes & manteaux de dueil. Au deuant veindrent l'Abbé de Saint Denys, & les religieux, en habits bien solempnels, jusques au lieu où on auoit accoustumé de tenir le Lendit. Et allerent en cest estat, jusques à l'Eglise de Saint Denys, où on auoit fait vn habillement de bois quarré, lequel estoit tout enuironné de draps noirs, & là demeura le corps toute nuit. Et durant icelle nuit, les religieux dirent plusieurs commendaces & offices de morts. Et le lendemain, l'Euesque de Paris, du consentement de l'Abbé expres, (Car autrement ne l'eussent ils pas souffert, veu leur exemption,) celebra la messe de *Requiem*, principale. Et les executeurs donnerent à l'Eglise vne chappelle vermeille, semée de roses d'or, & garnie de deux pieces de drap d'or moultriches, pour parer l'autel au dessus.

& au deffoubs, & vne croix d'argent, pesant quatre vingts 1422.
marcs d'argent, & à la charité des religieux, cent escus. Et prin-
drent ceux qui conduisoient le corps, leur refection au dîner.
Et feut remis le corps au dict chariot, & feut conduict jusques
à la mer, & de la mer porté en Angleterre en vne Abbaye, nô-
mée Vuestmonstier. Et par tout où il passoit tant en France,
Normendie, que Angleterre, grands honneurs selon le cas luy
furent faicts. Dieu en ait l'ame, & de tous autres trespassez aus-
si. Et quand le Duc de Bethfort eut conduict le dict corps en
Angleterre, il retourna en France, & se porta Regent du Roy-
aume de France pour son nepueu Henry, qui n'auoit que vn
an, & print le gouuernement des pays obeïssans au Roy d'An-
gleterre.

Au dict an mille quatre cents vingt & deux, le vingtiesme 1422.
jour d'Octobre, alla de vie à trespassement, trefnoble, & tref-
chrestien Prince, Charles Roy de France, sixiesme de ce nom,
qui regna quarante trois ans. Durant lequel temps, feut moult
troublé de maladie au cerueau. & auoit mestier de bien gran-
de garde. Et trespassa en l'Hostel de Sainct Paul. Et en son
temps, feut piteux, doux, & benin à son peuple, seruant & ai-
mant Dieu, & grand aumosnier. Et combien que on dict que
au temps passé, on laissoit les Rois, trois jours morts en leur
liet, le visage descouuert, toutesfois on ne le laissa que vn jour
entier, & le veoit on qui vouloit. Et auoit le visage aucune-
ment coulouré, & les yeux clos, & sembloit qu'il dormist. Le
dict jour apres midy, les chanoines & gens d'Eglise, du Palais,
veindrent à Sainct Paul, & en la presence du corps dirent vigi-
les de morts. Et le lendemain, vne messe, le plus solemnelle-
ment qu'ils peurent. Et apres feut mis en vn coffre de plomb,
garni de plusieurs choses odoriferantes. Et y feut jusques au
neufiesme jour de Nouembre. Pendant lequel temps, les col-
leges des Eglises de Paris, tant seculiers, que reguliers, & ceux
de l'Vniuersité, disoient sans cesser messes tant haultes, que
basses, & autres prieres, pour le salut de son ame. Le neufiesme
jour, feut porté de son Hostel de Sainct Paul jusques à nostre
Dame de Paris, Et en la compaignée estoiet tous les gens d'E-
glise de Paris, tant mendiens, que autres, le College de Nauar-
re, & les autres Colleges de l'Vniuersité de Paris avec peuple
infini, faisans dueil, lamentations, & pleurs, & non sans cause:

1422. Et ce jour ne feut rien ouuert, merceries, ne autres marchandises, non plus qu'à vn jour de grande feste. Et estoit grande pitié d'oïr les douleureuses complainctes du peuple. Ceux de l'escuirie le porterent. Et dessus auoit vn paille noir, en forme de ciel, que portoient les Escheuins de par la ville de Paris. Autour deuant & derriere auoit deux cents torches, pesans de cinq à six liures chascune. Le Duc de Bethfort, vestu d'un manteau noir, & vn chapperon à courte cornette, l'accompaignoit. Helas, son fils, & ses parens, n'y pouuoient estre à l'accompaigner, & estoient legitiment excusés. Et vous Duc de Bourgongne, qui en sa vie l'avez mis és mains de ses ennemis, vous auez sceu la maladie telle qu'il n'en pouuoit eschapper, & sceu la mort. Et delaia on, en intention que y feussiez. Et encores eust on plus attendu, si l'eussiez mandé. Et n'y veinistes aucunement. Et ainsi en sa vie, & en sa mort l'abandonnastes. Ce que plusieurs gens entre leurs dents disoient, & aucuns assez haultement, tellement qu'on le pouuoit entendre. Par les Colleges de Paris, en la dicte Eglise de nostre Dame, feurent dictes vigilles solemnelles, & y veindrent, & feurent en procession. Et le lendemain, à la messe. Et y auoit bien en luminaire douze mille liures de cire en torches, & en cierges. Et autour de la Chapelle, y auoit du drap noir aux armes du Roy, & aussi tout autour de l'Eglise. Et sur la porte de l'Eglise, deux grandes bannieres aux armes du Roy. Et après la messe, & le seruice faicts, on print le corps, & le porta on jusques à Saint Ladre. Et le porterent jusques là ceux de l'escuirie. Et au dict lieu, autres prindrent le dict corps, & le porterent jusques à la croix pres du Lendict, nommée la croix aux fiens. Et à le couoier, estoit le dict Duc de Bethfort, come dessus vestu, & à cheual. Plus, ceux que on disoit de la Court de Parlement, de la Chambre des comptes, les Escheuins de Paris, & la plus grand partie des gens d'Eglise de Paris, avec foison de peuple. Et là, de l'Abbaye de Saint Denys veint l'Abbé, & les religieux, vestus de tresbeaux, & riches vestemens, la plus part semez de fleurs de lys, & auoient vn paille en maniere de ciel, soustenu sur six lances à mestre sur le corps. Et à la dicte croix, y eut aucunes difficultez, touchant l'exemption de ceux de Saint Denys. Et à la fin feurēt d'accord, & allerent jusques à l'Hostel Dieu. Et lors huit religieux prindrent le

corps, & le porterent jusques dedans le chœur de l'Eglise, en 1422.
chantant, *Libera me Domine &c.* Et estoit chose merueilleuse du
luminaire, qui estoit depuis la porte Saint Denys, jusques à
l'Eglise. Et y eut nouveau luminaire, qui montoit jusques à
quatre mille liures de cire, & paremens faicts comme à l'Eglise
de Paris, aux armes du Roy, & bānieres mises. Et feurent dictes
vigiles bien & solemnellement. Et le matin, feut dict & cele-
brée la messe, que chanta de la permission de l'Abbé, l'Euesque
de Paris. A laquelle messe, l'Euesque de Chartres, feit Office
de Diacre, & l'Abbé du dict lieu, Office de soubf-diacre. Et n'y
eut personne qui allast à l'offrande, sinon le Duc de Bethfort,
qui faisoit le dueil. Et la messe chantée, ceux de l'escuirie prin-
drent le corps, & le porterent au lieu où il debuoit estre ense-
pulturé, en la chapelle du feu Roy Charles cinquieme son
pere. Et tousiours le peuple lamentoit la petite compaignée
qu'il auoit, comme dessus est dict. Et feut ensepulturé par l'E-
uesque de Paris. Et ce faict, les François Anglois commence-
rent à crier, Viue le Roy Henry de France, & d'Angleterre, &
crioient Noel, comme si Dieu feust descendu du ciel. Toutes-
fois plus en y auoit faisans dueil & lamentations, que autres.
Maistre Philippes de Ruilly, & Michel de Laillier, executeurs
du Roy mort, donnerent à l'Eglise de Saint Denys, chasuble,
tunique, dalmatique, & deux draps de soye perse, semez de
fleurs de lys d'or. Et pour la charité des religieux, cent francs,
& grandes sommes de deniers aux pauvres, à tous venans. Et
combien qu'il y eust eu grand debat touchant le paille, qui
estoit sur le corps, disans plusieurs à eulx appartenir, toutes-
fois le grand Maistre d'Hostel du Roy le print, & le bailla aux
dicts religieux, comme à eulx appartenant.

Quand le Roy Charles septiesme de ce nom, son vrai fils, &
heritier le sceut, il en feut moult courroucé & desplaisant, &
non sans cause. Et à peine le pouuoit on appaiser, & estoit pi-
tié des regrets qu'il faisoit, & pareillement ceux de son sang.
Et feit faire seruices, prieres, & Oraisons, le plus solemnelle-
ment qu'il peut. Et deslors comme il appartenoit, se nomma
& porta Roy de France. Et aussi estoit il, sans nulle doubte.

R R R. iij.



EXTRAICT D'VNE CHRONIQUE
manuscrite, qui commence l'An mille quatre cents deux, & finit l'An mille quatre cents cinquante & huit.

1402.



N l'honneur de nostre Sauueur Iesus Christ, & de la glorieuse vierge Marie, Au seiziesme an de mon aage, qui feut en l'an mille quatre cents & deux, le eus en volonté, & fermai ma pensée, ainsi que Dieu, & nature me conseillèrent, & ordonnerent. Et que en jeune aage vn chascū s'applique à faire chose en labeur, où sa plaissance s'encline. J'ai prins ma plaissance & lection à vouloir veoir le monde, ainsi que ma volonté, & ma complexion y estoient enclines. Et pource qu'en celuy an, le noble & tres-chrestien Royaume de France, & la bonne Cité de Paris, estoient en plus hault honneur, auctorité, & renommée de tous les Royaumes Chrestiens, & où abondoient plus de noblesse, de honneur, & de biens, tant en largesses de Princes, Prelats, cheualiers, clerics, marchands, & commun, que pour les haultes honneurs, richesses, & noblesses, qui en ce Royaume de France, estoient. Je me appensai, & fermai ma pensée, que à mon petit pouuoir, & selon ce que je pourroie comprendre en mon entendement, Je voudroie veoir les honneurs & haults faicts, qui pourroient aduenir en ce dict Royaume doresnauant, à mon pouuoir, & moy trouuer par tout où je scauroie les haultes assemblées & besongnes d'iceluy, & d'autres. Et avec la veüe les mettroie, ou feroie mettre par escript, ainsi que je le scauroie comprendre, tant les biens, que les maux. Si me doint Dieu grace que ce que j'escripai, soit plaissant à ceux qui le liront, & voudront veoir. Car toutes choses qui s'escripuent, ne peuuent pas estre plaissantes à vn

chascun. Si ne peuuent justement estre escriptes, qui n'escri- 1402.
roit la verité des choses cy apres aduenües. Lesquelles sans
nulle faueur, & en ma conscience, j'ai intention d'escrire à
mon pouuoir à la verité, sans donner loüenge à l'un parti, ne à
l'autre, des diuisions qui cy apres ont esté au dict Royaume.

En l'an dessus dict, feut né Monseigneur Charles, quatries-
me fils du Roy, le vingthuitiesme jour du mois de Feburier.
Et feut baptisé en l'Eglise de Saint Paul à Paris. Et le teint sur
les fonds Messire Charles Seigneur de Lebrét, cousin germain
du Roy Charles bien aimé, sixiesme de ce nom. Lequel Mon-
seigneur Charles, fils du Roy, feut depuis Roy de Frâce, apres
la mort de ses trois freres, qui depuis eut moult d'aduersitez
en son jeune aage, & puis apres feut Roy paisible, & bien obei
en son Royaume, & par tout iceluy Royaume, par le plaisir &
vouloir de nostre Sauueur Iesus-Christ, & des nobles & vail-
lants cheualiers, & escuiers, & gens de guerre, qui bien &
loyaument le seruient.

Au dict an mille quatre cents & deux, trespassa Messire 1402.
Louys de Sancerre, Connestable de France, frere du Comte
de Sancerre, du pays de Berry, qui en son temps feut Maref-
chal de France. Et feut moult vaillant cheualier, & feit plu-
sieurs haultes besongnes sur les Anglois, en plusieurs parties
du Royaume, tant avec Messire Bertrand du Glesquin, son
predecesseur, comme depuis luy estant Connestable. Et pour
la vaillance de luy, feut enterré à Saint Denys, à la fenestre
du Roy Charles le saige.

Après le trespas du dict Connestable de Sancerre, par la de-
liberation du Roy Charles bien aimé, & des Princes de son
sang, & Seigneurs de son grand Conseil, feut esleu Messire
Charles de Lebrét, Comte de Dreux, & Seigneur de Sully, &
de Craon, pour estre Connestable de France. Et feut mandé
le dict Seigneur de Lebrét venir deuers le Roy, au jardin de
l'Hostel de Saint Paul à Paris. Et là veindrent deuers le Roy
Louys Duc d'Orleans, frere du Roy, le Duc de Bourgongne
Philippes, oncle du Roy, Monseigneur le Duc de Bourbon,
Louys, oncle du Roy, frere de la mere, & plusieurs Prelats, &
Barons, & Maistre Regnault de Corbie, Chancelier de Fran-
ce. Là feut le dict Messire Charles, Seigneur de Lebrét, auquel
feut présentée l'espee, & il la refusa, par plusieurs & diuerses

1402. fois. Mais par le plaisir du Roy, & des Princes dessus dictz, luy feut enjoinct & commandé la prendre, & luy feut baillée publicquement, & par grand mystere. Et luy ceignirent l'espée, (apres ce que le Roy la luy eut baillé de sa main,) Mōseigneur le Duc d'Orleans, & Monseigneur le Duc de Berry, & Messeigneurs les Ducs de Bourgogne, & de Bourbon, les vns à dextre, & les autres à senestre. Et là print le serment de luy, de Cōnestable, Maistre Regnault de Corbie, Chancelier de France.

1403. L'an mille quatre cents & trois, partit le di& Seigneur de Lebret, Connestable de France, par le cōmandement du Roy Charles bien aimé, sixiesme de ce nom, pour aller en Guyenne, pour faire guerre aux Anglois. Et y mena moult noble cōpagnée, & estoient payez & nombrez mille & cinq cents cheualiers, & escuiers, avec les gens de trait&. Et meit le di& Connestable le siege deuant le chastel de Corbassin, qui est moult fort chastel, & est au pays de Limosin, lequel il print, & plusieurs autres places, tant és pays de Limosin, que és pays de Guascongne, tât par force, que par composition, sans trouuer Anglois, qui feissent aucune assemblée, ou armée alencontre de luy, pour luy porter dommaige. Car en ce temps, les Anglois auoient grande diuision l'vn contre l'autre, pour la mort du Roy Richard. Auec le di& Connestable, estoient les Comtes de Tonnerre, de Brenne, & de Rouffy, le Seigneur de Belleuille, nommé Harpedenne, & le Seigneur de la Rochefoucault, Messire Pierre de Villennes, Gouverneur de la Rochelle, Messire Iean de Torsay, Seneschal de Poitou, Messire Guillaume le Bouteiller, Seneschal de Limosin, les Seigneurs de Perusse, & de Pierre Buffiere, Messire Iean de Grauille, Seigneur de Montagu, le Sire de Mont-bason, Messire Regnier Pot, Messire Aubert Foucquault, & plusieurs autres grands Seigneurs, cheualiers, & escuiers. Et apres ce voyage, s'en retourna le di& Monseigneur le Connestable par deuers le Roy, en sa bonne ville de Paris.

1404. L'an mille quatre cents & quatre, feut la bataille des sept François aux sept Anglois deuant la place de Montandré en Guyenne. Et feurent les sept François, Messire Guillaume du Chastel, Messire Arnault Guillaume de Barbazen, Messire Guillaume Bataille, Messire Clinet de Brebant, le Sire de Châpaigne, Archambault de Villers, & Robert de Querois. Et les sep

sept Anglois feurent, Robert Descalles, Richard Herry, Fleury d'Angleterre, Thomas Salles, & trois autres gentils-hommes, Lesquels sept Anglois feurent desconfits par les dessus dicts François, le jour de S. Yues, au mois de May. Et estoient tous les sept François, seruiteurs de Monseigneur le Duc d'Orleans, frere du Roy dessus dict. Et feurent chefs de l'entreprise, Messire Guillaume Bataille, & Messire Arnould Guillaume de Barbazon. Lequel Duc d'Orleans, quand ils feurent à Paris, les festoia moult grandement pour la victoire qu'ils auoient eu alencontre des dicts Anglois. Et à l'entrée de Paris, feurent vestus les dicts François tous de blanc. Et feurent les Iuges, le Sire de Harpedenne, & le Sire de Duras.

1404.

L'an mille quatre cents & cinq, y eut grand debat & dissension entre Monseigneur le Duc d'Orleans, frere du Roy, & le Duc Philippes de Bourgongne, son Oncle. Lequel Monseigneur le Duc d'Orleans, vouloit auoir le gouuernement du Royaume, disant, qu'il estoit frere du Roy, & que à luy appartenoit le gouuernement deuant son Oncle, le Duc Philippes de Bourgongne. Et pource, & à ceste cause, manderent chascun leurs amis, & alliez, de venir à puissance d'armes. Et se trouuerent à ceste assemblée des deux costez, dix mille cheualiers, & escuiers, tant du Royaume de France, que des pays voisins. Et à la bonne aide des Seigneurs du sang du Roy, & d'autres preud'hommes, feurent d'accord les deux parties. Et accordé, que tout le gouuernement du Royaume, seroit fait, & tenu, par les Seigneurs du sang du Roy, & aussi de la Royné. Et demeureroit le gouuernement en ce point. Et ne dura leur debat que quinze jours, à la bonne diligence, qui y feut mise par les preud-hommes. Et ainsi s'en retournerent les gens d'armes, tant d'une partie, que d'autre, chascun en leur pays. Et feirent, en faisant le dict accord, le mariage du fils de Monseigneur le Duc d'Orleans, nommé Charles, & de l'aînée fille du Roy, nommée Isabeau, sa cousine germaine, laquelle auoit esté mariée au Roy Richard d'Angleterre. Et feut fait le mariage de l'aîné fils du Roy, nommé Louys, Duc de Guyenne, à la fille du Comte de Neuers, fils du Duc Philippes de Bourgongne, nommée Marguerite. Et feut fait le mariage du second fils du Roy, nommé Iean, & de la fille seule du Duc de Bauiere, Comte de Hainault. Et feut fait le mariage du Duc

1405.

S s s

1405. Jean de Bretagne, à la seconde fille du Roy, nommée Jeanne. Lequel Duc estoit bien jeune, & l'alla querre en Bretagne, le Duc Philippes de Bourgongne, par le consentement des Barons de Bretagne. Et le amena à Paris luy, & ses freres, par deuers le Roy, pource que leur mere, sœur du Roy de Nauarre, s'estoit mariée au Roy Henry de Lenclastre, Roy d'Angleterre, contre la volonté des Barons de Bretagne, Et ainsi le dict Duc de Bourgongne, amena le dict Duc de Bretagne à Paris, deuers le Roy. Et s'estoit fait le dict Henry, nouvellement Roy d'Angleterre, par la mort du Roy Richard, lequel il auoit fait mourir.

En ce temps, ou peu apres, mourut le Duc Philippes de Bourgongne. Et feut enterré à nostre Dame de Hault en Brabant, & son cœur, aux chartreux de Dijon, qu'il fonda en son viuant. Et lors, vint bien tost apres son fils aîné Comte de Neuers, à Paris deuers le Roy, pour luy faire hommaige de la Duché de Bourgongne. Et si feut il. Et luy estant à Paris, par mauuais conseil se engendra la haine entre Monseigneur le Duc d'Orleans, & luy, dont il est depuis aduenu moult de mal en France.

Et en cest an, feut deliuré Cherebourg, que tenoit le Roy de Nauarre, par appoinctement, que on luy debuioit liurer certaines terres, en recompensément de la Comté d'Eureux, & du pays de Constantin, où il disoit qu'il auoit droit.

En celuy an, feut Monseigneur le Duc d'Orleans en la Duché de Luxembourg, & y acquit, & print certaines places, comme la ville de Mommedy, Yuoy, Danuilliers, & Orchimont, en intention de acquerir terres en Allemagne, pour paruenir à estre Empereur. Si s'en retourna à Paris. Et de là s'en alla deuers le Pape de Lune, en Auignon, pour luy estre en aide a lencontre de l'Vniuersité de Paris. Laquelle Vniuersité, vouloit deposer le dict Pape. Et vouloient ceux de la dicte Vniuersité, pour ce temps eulx de tout mesler.

Et en ce temps, vn cheualier nommé Messire Charles de Sauoisi, par vn de ses paiges, qui cheuauchoit vn cheual, en venant de le mener boire en la riuiere, le cheual esclabouta vn escholier, lequel avec les autres alloit en procession à Sainte Catherine, & tant que l'escholier frappa le dict paige. Et lors les gens du dict cheualier, saillirent de son Hostel embastou-

nez, pourſuiuant les diſ escholiers juſques à Sainte Catharine. Et vn des gens dudiſ cheualier, tira vne fleſche dedans l'Egliſe juſques au grand autel, où le prebſtre chantoit meſſe. Dont pour ce faiſt, l'Vniuerſité feit telle pourſuite alencontre du diſt cheualier, que la maiſon d'iceluy cheualier feut abbatiſſe, & feut le diſt cheualier banni hors du Royaume de France, & excommunié. Et ſ'en alla deuers le Pape, lequel le abſolut, & arma quatre gallées, & ſ'en alla par mer faire guerre aux Sarraſins, & là gaigna moult d'auoir. Puis retourna, & feut faiſte ſa paix, Et reſeit ſon Hoſtel à Paris, tel comme il eſtoit parauant. Mais il ne feut pas paracheué. Et feit faire ſon Hoſtel de Signelay, en Auxerrois, moult bel, par les Sarraſins qu'il auoit amené d'outre mer, lequel chaſtel eſt à trois lieues d'Auxerre.

L'an mille quatre cents & ſix, la Royne Iſabel de Bauiere, & Monſieur le Duc d'Orleans, eſtoient allez à Melun veoir la chaſſe des cerfs. Si ordonna la Royne, qu'on luy amenast Monſieur le Daulphin, ſon fils; Duc de Guyēne, qui auoit la fille du diſt Duc de Bourgongne, nommé Iean, pour femme. Et auoit baillé la charge la diſte Royne, de amener mon diſt Seigneur de Guyenne, & ſa femme, au Duc Louys de Bauiere, ſon frere, & au grād Maistre d'Hoſtel de France, nommé Montagu. Or feut ainſi que aucuns ſeditieux de la ville de Paris, manderent au diſt Duc de Bourgongne, que la diſte Royne, & le diſt Duc d'Orleans, auoient intention de eux en aller en Allemagne, & emmener le diſt fils. Et lors ſe partit d'Arras le diſt Duc de Bourgongne, ces nouuelles ouïes, & manda à tous ſes amis qu'ils veinſſent à luy haſtiuement en armes, luy aider à ce beſoing. Et cheuaucha jour & nuit, cuidant eſtre à Paris, auant le partement de mon diſt Seigneur le Daulphin, lequel eſtoit ja parti, & ſa femme avec luy. Si ſceut qu'il eſtoit parti, & cheuaucha tant, qu'il les acconſuiuit entre Paris, & Corbeil, pres d'un villaige nommé Geuifi. Et là eut de groſſes paroles entre luy, & le Duc de Bauiere, pource que le diſt Duc de Bauiere, ne vouloit qu'il ramenast mon diſt Seigneur le Daulphin à Paris. Mais le Duc de Bourgongne, le y ramena, vouluſt, ou non. Car ſes gens venoiēt apres luy, tous à la file. Si arriua à Paris, & meit mon diſt Seigneur le Daulphin, au chaſtel du Louure. Et en paſſant par la ville de Paris, y eut moult grād

1046. peuple, à regarder ceste nouuelle, Et de ceste chose, sourdit grand murmure, pour les partialitez qu'auoit le peuple de Paris aux deux Princes. Ces nouuelles veindrent à la Royne, & au Duc d'Orleans, en vne petite forteresse, nommée Pouilly le fort, dõt la diète Royne feut moult courroucée, & non sans cause. Car elle ne sçauoit, où l'on vouloit mener son dictz fils. Lors le Duc d'Orleans, manda de toutes parts à tous les Princes, & Seigneurs ses allies, & amis, qu'ils veinssent le seruir alencontre de son cousin le Duc de Bourgongne, lequel auoit prins de fait le fils aîné du Roy, son nepueu, par force & violence des mains de la Royne, qui en auoit le gouuernement, & ne sçauoit où il le vouloit mener. Et incontinent veindrent à son seruice le Duc de Lorraine, le Marquis du Pont, fils du Duc de Bar, le Comte d'Armaignac, le Sire de Beaumanoir, le Comte du Perche, le Vicomte de Chasteau le-herault, frere du Comte de Harecourt, qui depuis feut Archeuesque de Roüen, le Comte de Clermont, fils aîné du Duc de Bourbon, & plusieurs autres nobles grands Seigneurs, jusques au nombre de cinq à six mille cheualiers, & escuiers. Et le Duc de Bourgongne, en auoit bien autant, & en sa compaignée estoient l'Euesque du Liege, le Comte de Cleues, le Comte de Saint Paul, le Prince d'Orenge, le Sire de Vergy, Mareschal de Bourgongne, & plusieurs autres. Et estoient logez en l'Isle de France, & dedans la ville de Paris. Et le Duc d'Orleans, à tout ses gens, estoit entre Melun, & le pont de Charenton. Et se tenoit le Duc d'Orleans au bois de Vincennes, & là amena la Royne. Et se meirent en armes les deux puïssances, pource qu'ils estoient logez pres l'un de l'autre, cuidans vn chascun d'eulx combattre. Mais le Duc de Bourgongne, auoit Paris, & le peuple de la ville à son commandemēt, lesquels le aimoient fort, pensans qu'il les deust tenir en paix, & les garder de payer nulles males toultes, & le aimoient moult, comme il apperra plus à plain cy apres. Et pour appaiser le debat des deux Princes, trauailla moult le grand Maistre d'Hostel de France, nommé Montaigu, & à la fin les mit d'accord. Et vint la Royne à Paris, & le Duc d'Orleans, à la dextre de sa liiere, & le Duc de Bourgongne, à la fenestre. Et seurent à moult grād estat, eulx, & leurs prochains Seigneurs. Et leurs cheuaux auoient riches harnois, & estoient ferrez d'argent. Et eux habillez de moult

riches & diuerſes robbes, Comtes, Barons, cheualiers, & escuyers, Dames, & Damoiſelles. Et chaſcun le mieux, & le plus grandement, que faire peurent, pour faire honneur à leurs Dames, ou Seigneurs. Et ainſi allerent accôpaigner la diſte Roynne, juſques à noſtre Dame de Paris, & de là au Louure, où elle alla veoir Monſeigneur le Daulphin ſon fils.

Et feut ordonné en faiſant leur paix, que le Duc d'Orleans, iroit ſur les Anglois en Guyenne, & le Duc de Bourgongne, en Picardie à Calais, & feroient chaſcun leur debuoir. Et pour auoir argent, pour leur armée ſouſtenir, feroit faiſte vne taille par le Royaume de France de deux cents mille vieux eſcus, & en eurent chaſcun cent mille. Et alla le Duc d'Orleâs en Guyenne, & meit le ſiege deuant vne ville, nommée Bourg. Et paſſe au pied d'icelle ville, la riuere de la Gironde. Et feut au mois d'Octobre. Et là pleut tant, qu'il fallut qu'il ſe leuaſt, tant pour la pluie, comme pour le ſecours qui leur venoit d'Angleterre, & de Bourdeaux, tous les jours par la riuere, & de la mer. Et pour lors ne ſçauoient les François guieres de la guerre. Et le Duc de Bourgongne, feut à Saint Omer, cuidant aller deuant Calais. Et là feit faire vne ville de bois allant ſur rouës, moult grâde, pour mener deuant Calais, qui eſtoit merueilleuſe choſe. Et la deuifa vn cheualier d'Auuergne, nommé le Sire de Mont-gagnier, laquelle eſtoit moult ſubtillement faiſte. Et le diſt Duc de Bourgongne auoit intention de prendre la diſte ville de Calais, par le moyen d'icelle ville de bois. Et quand le Roy, & ſon Conſeil, ſçurent que Monſeigneur d'Orleans ſ'eſtoit leué de deuant la ville de Bourg, il enuoia par deuers le Duc de Bourgongne en Ambaſſade Meſſire Guichard Daulphin, l'Archeueſque de Bourges, & le Galois d'Aunoy, luy mander qu'il ſ'en retournaſt. Et ſi feit il, & en feut moult courroucé. Et ainſi ſ'en retournerēt les deux Ducs de Paris, & feirent grâd chere enſemble, voire en diſſimulatiō.

En celuy an, enuiron huit heures de nuit, batit Meſſire Iean de Grauille, Meſſire Gieuffroy le Maingre, diſt Boucicault, la veille du jour de l'an, en la rue Saint Merry, à Paris. Pour ce que le diſt Boucicault auoit donné vne buſſe au diſt Grauille, par jaloſie d'une Damoiſelle de l'Hoſtel de la Roynne, nommé Charlote la Cochete, dont ils eſtoient tous deux amoureux. Et luy promet le diſt Grauille, qu'il ſ'en vengeroit.

auant qu'il feust vn an. Et si feit il.

- 1407. L'an mille quatre cents & sept, la veille de Saint Clement, partit le Duc d'Orleans de son Hostel, pres de Saint Paul, environ huiet heures de nuit, pour aller veoir la Royne, qui estoit accouchée d'un fils, qui estoit trespasé. Et en s'en retournant pres de la porte barbeta, deuant l'Hostel du Marechal d'Eureux, faillirent certaines gens embastonnées d'une maison, dont estoit chef d'eulx, un nommé Raoulet d'Actrouille. Lesquels feirent sur le dict Duc d'Orleans, & le tuerent, & jetterent à terre de dessus sa mulle, & luy coupperent le poing, dont il tenoit l'arçon de sa selle. Et quand il feut tombé à terre, un sien seruiteur faillit sur luy, pour le cuider sauuer, lequel feut occis comme luy. Et lors s'enfuirent les dicts malfaieteurs en l'Hostel d'Artois, & en fuiant, jectoient chausse-trappes apres eulx, afin qu'on ne les peust poursuiuir. Et ainsi le peuple de la rue s'assembla, quand ils ouïrent le bruit, & leuerent le Prince, & le porterent en une maison. Et là veindrent le Roy Louys de Sicile, & les Ducs de Berry, & de Bourbon, lesquels feurent moult esbahis, de veoir le Duc d'Orleans ainsi meurtri. Puis s'en allerent en leurs maisons, reposer la nuit. Et au plus matin, feut apporté son corps aux blancs manteaulx, en un cercueil couuert de noir. Et là veindrent ses Oncles les Ducs de Berry, & de Bourbon, son cousin germain le Duc de Bourgongne, & le Roy de Sicile, aussi son cousin germain. Et estoient vestus de noir, portans le dueil, & plusieurs autres Seigneurs ses parens, & seruiteurs. Lors le dict Prince mort, feut apporté en sepulture, & son corps mis en l'Eglise des Celestins à Paris, à grande multitude de cheualiers, & escuiers, vestus de noir, portans chascun une torche deuant le corps. Et apres alloient les Princes dessus dicts, & autres ses parens. Et apres, grande multitude de peuple, tous faisans & demenans grand dueil. Apres feut ordonné par les Princes dessus dicts, que pour sçauoir qui auoit ainsi meurtri, & tué leur dict parent, frere du Roy, que on esliroit Commissaires, qui iroient en la maison, dõt estoient faillis ceux qui l'auoient meurtri, & aussi pour examiner les voisins, & ataindre le cas, & sçauoir la verité. Et pour ce faire, feurent ordonnez Commissaires Maistre Pierre l'Orfeure, Conseiller du Duc d'Orleans, trespasé, & Maistre Robert de Tuillieres, Conseiller du Roy. Or feut ainsi qu'ils vein-

drent en la vieille rue du temple, au lieu où le delict auoit esté ^{1407.} fait. Et trouuerent par information coupable vn porteur d'eau, qui alloit & venoit au dict Hostel, durant le temps que le cas auoit esté fait. Et que le dict porteur d'eau se tenoit en l'Hostel d'Artois, où demouroit le dict Duc de Bourgongne. Si estoit l'ordonnance telle, que en l'Hostel des Seigneurs de France, l'on ne pouuoit prendre vn malfaieteur, sans le congé du Seigneur, à qui estoit l'Hostel. Si allerent les Commissaires par deuers le Duc de Bourgongne, pour auoir congé d'auoir le dict porteur d'eau, pour sçauoir la verité du cas. Si veindrēt les dicts Commissaires en l'Hostel de Neelle, où estoient au Conseil, le Roy de Sicile, les Ducs de Berry, & de Bourgongne, & heurterent à l'huis les dicts commissaires. Si leur feut demandé qu'ils demandoient, & ils dirēt qu'ils vouloient auoir congé de prendre vn homme, qui estoit en l'Hostel du Duc de Bourgongne, qui ces paroles ouit. Si feut esbahi, & mua couleur. Le Roy Louys, son cousin germain, s'en apperceut, & le tira à part, en luy disant, Beau Cousin, sçaez vous rien de ce fait, Dites le moy, car il le fault. Car l'homme de vostre maison sera prins. Lors se print à plourer le dict Duc de Bourgongne, & dict, qu'il estoit cause d'auoir fait tuer le dict Duc d'Orléans, son cousin. Le Duc de Berry, apperceut qu'ils plouroient, & demanda qu'ils auoient. Si respondit le Roy Louys, que son cousin le Duc de Bourgongne, auoit fait mourir son cousin le Duc d'Orléans. Et lors Monseigneur de Berry, se preint à plourer, disant, Je perds aujourd'huy mes deux nepueux. En disant ces paroles, le Duc de Bourgongne se partit, sans dire A Dieu. Et en descendant les degrez de l'Hostel, rencontra le Duc de Bourbon, Louys, qui venoit au Conseil, lequel luy demanda, où il alloit. Et il luy dict, qu'il alloit pisser. Et quand le dict Duc de Bourbon, feut en la chambre, il trouua le Roy de Sicile, & le Duc de Berry, plorans. Et lors, luy dit le Duc de Berry, que le Duc de Bourgongne auoit fait mourir son nepueu le Duc d'Orléans. Lors dit le Duc de Bourbon, Pourquoi ne l'avez vous retenu, Il le fault aller dire au Roy, afin qu'il en soit ordonné comme raison le veut. Si monterent les dicts Roy Louys, & Ducs à cheual, pour aller deuers le Roy. Et le dict Duc de Bourgongne, monta sur vn bon cheual, & se partit de Paris hastiuemēt, de peur qu'il ne feust prins.

1407. & veint au pont Saint Maiffance, & feit rompre le pont apres luy. Et alla ce jour à Arras, où il y ha de Paris jusques là quarante deux lieües. Les diëts Seigneurs feurent deuers le Roy, & luy remonstrent le cas, comme il l'auoit confessé. Et incontinent les seruiteurs du diëtc Duc d'Orleans, monterent à cheual, pour pourfuiuir le diëtc Duc de Bourgongne, & trouuerent le diëtc pont rompu, & pource s'en retournerēt. Et feut deliberé que puis qu'il estoit eschappé, qu'il seroit besoing que Monseigneur le Duc de Berry, qui estoit son Oncle, & son parrain, allast par deuers luy, afin qu'il ne se feist Anglois. Et ainsi feut fait. Et feit tant qu'il le rappaisa, & destourna de faire guerre, & feut toute celle saison d'hyuer en ses pays de Flandres, & d'Artois.

Celuy an, feut moult grand hyuer de glâces, qui dura depuis le jour de Saint Clement, jusques à la veille de chandeleur, sans desgeler. Et feurent toutes les riuieres glâcées, & prinſes, & tellement, que au desgeler, les glâces rompirēt tous les ponts de Paris, & ceux des autres grosses riuieres du Royaume, ou la plus part. Et feirent moult grand dommaige, & emporterent les maisons du pays bas, au long des riuieres, & tous les moulins. Et y eut moult de gens, femmes, & enfans noiez, qui estoient és diëtes maisons, & moulins.

1408. L'an mille quatre cents & huit, le Duc Guillaume de Bauiere, Seigneur de Hollande, & Comte de Hainault, manda au Duc de Bourgongne, qui auoit sa sœur à femme, que les Liegeois s'estoient rebellez contre son frere, Iean de Bauiere, qui estoit leur Euesque, pource qu'il ne vouloit chanter messe. Si luy prioit, qu'il luy voulust venir aider. Et si feut il, & luy mena moult belle compaignée de Bourguignons, de Picards, de Flamends, de Champenois, & de François, jusques au nombre de six mille cheualiers, & escuiers. Et estoient conduiseurs des Bourguignons, le Prince d'Orenge, nommé Messire Iean de Chalon, Messire Iean de Vergy, Mareſchal de Bourgongne, Monseigneur de Saint George, cheualier, Monseigneur de Paigny, Monseigneur d'Autré, & autres. Des Picards, le Sire Crouy, le Sire de Renty, & le Sire de Himbercourt. Des Seigneurs de Flandres, les enfans de Guistelle, le Sire de Fauquembergue, Messire Roland de Duinquerque, le Sire de Rambures, & autres. De ceux de Champaigne, le Sire de Chasteau

steauvillain, le Sire de Dampierre, & autres. Des François, 1408. Messire Guichard, Daulphin, le Comte de Marne, d'Escoffe, le Sire de Gaucourt, & generalmente toute la puissance & noblesse de Hollande, de Hainault, de Brabant, de Namur, & de Osteruent, qui seroit trop longue chose à escrire. Conclusiō, se assemblerent, & entrerent dedans le pays des Liegeois, bouterent les feux par les maisons, & par les bleds, qui estoient prests de cueillir. Et conduisoit iceux bouteux, le Sire de Iumont. Et ce faisoient, pour faire leuer les dicts Liegeois, qui tenoient le siege deuant la ville du Traict, où ils auoient assiegé le dict Iean de Bauiere, leur Euesque. Et pour les feux, & maux que faisoient les dicts Seigneurs és pays de Liege, se partirent les dicts Liegeois de leur siege. Et tant approcherēt des dicts Seigneurs, que bataille s'en ensuiuit, & les Liegeois la perdirent, & feurent desconfits. La maniere de l'ordonnance feut, que les gens des Ducs, & les Liegeois, en vn plain pays se trouuerent, qui s'appelle le pays de Hasbain. Et ordonnerent leur bataille à pied d'une part & d'autre, reserué quatre cents lances que les Ducs ordonnerent estre à cheual, pour frapper sur la bataille par derriere, & qui n'espargnoient ne leurs corps, ne leurs cheuaux. Les Liegeois feurent desconfits, & y moururent seize mille homes en la place. Et les chefs d'iceux de cheual, estoient le Sire de Crouy, le Sire de Rase, Enguetrand de Bournouille, & Robert le Roux. Incontinent arriua sur le champ le dict Euesque Iean de Bauiere, & Antoine de Bourgogne, Duc de Brabant, lesquels feurent moult courroucez, qu'ils n'auoient esté à la journée. A ceste bataille, il y mourut des Seigneurs Liegeois, le Sire de Pernes, & son fils, que les Liegeois auoient fait Euesque, en deboutant Iean de Bauiere. Apres ce fait, veindrent les Ducs en la Cité de Liege, & meirent leurs bannieres sur les portes de la ville, & feurent condamnez les Liegeois à obeir à leur premier Euesque, & payer la somme de cent mille escus d'or. Et feirent les dicts Ducs couper les testes à plusieurs grands Seigneurs, lesquels feurent prins à la bataille, seruans les dicts Liegeois.

Et en ce temps, se partirent le Roy, & la Roynie, & leurs enfans de Paris. Et les estoient allez accompagner les Ducs de Berry, de Bretagne, & de Bourbon, & plusieurs autres grands Seigneurs, lesquels les cōduisirent jusques en la Cité de Tours.

T t t

Le Duc de Bourgongne sceut ces nouuelles. Si pria au Duc Guillaume de Bauiere, son frere, qu'il luy voulust aider à ramener le Roy, & Monseigneur de Guyenne, qui auoit sa fille à femme, du pays où ils estoient, afin qu'ils veinssent à Paris. Et à la verité le Roy, & les Seigneurs dessus dictz, s'estoient partis de Paris, pource qu'ils auoient ouï dire, cōment les dictz Ducs auoient desconfit les Liegeois. Et pource qu'ils scauoient que le peuple de Paris estoit fauorable au dict Duc de Bourgongne, & craignoient la fureur du peuple, s'il aduenoit que le dict Duc de Bourgongne feust venu à la ville, pour ceste cause menerent le Roy à Tours. Le Duc de Bauiere, qui estoit vn faige Seigneur, octroia au dict Duc de Bourgongne venir avec luy, considerant le seruice qu'il luy auoit fait en Liege, & conclud venir à Paris, & luy tenir compaignée, & veindrent à Paris ensemble à tout leur puissance. Le Duc Guillaume de Bauiere, regarda que la guerre n'estoit pas licite, ne la diuision. Considerant qu'ils estoient tous d'un sang, & que c'estoit la destruction du Royaume, & qu'il valloit mieux traité auoir que la guerre. Et aussi il luy touchoit en deux manieres, l'une, pource qu'il estoit cousin germain à la Roïne, & que ses enfans estoient ses parens. L'autre, que le second enfant du Roy, auoit sa fille seule & heritiere pour femme. Si ambassada tant le dict Duc Guillaume, d'une partie, & d'autre, que il feut conclud, que les deux parties, c'est à sçauoir, le Roy, les Ducs de Berry, de Bretagne, d'Orleans, & de Bourbon, les Comtes d'Alençon, de Clermont, de Lebre, & plusieurs autres, tenans la querelle de Monseigneur le Duc d'Orleans, seroient à Chartres à vn jour dict. Et pareillement y seroient les Ducs de Bourgongne, & de Brabant, le Comte de Nevers, leur frere, le Comte de Saint Paul, & le Prince d'Orange, & plusieurs autres grands Seigneurs. Et reindrent les deux parties leurs promesses, & veindrent tous à Chartres. Et feut fait vn traité entre les deux parties d'Orleans, & de Bourgongne, & jugerent, & promirent solennellement tous les Princes, de jamais ne porter noise, ne debat, l'un à l'autre, & d'estre bons & vrais parens & amis. Et feut le Duc Guillaume, conseruateur des deux parties pour celle journée, tenant en sa main sa banniere. Et ainsi feut fait l'accord, qui guieres ne dura, & s'en retournerent le Roy, la Roïne, & leurs enfans à Paris.

En ce temps, le Preuost de Paris, nommé Messire Guillaume de Tignonuille, feit pendre deux clerks estudiâs, qui auoient tué vn homme de mauuais faict. Et par hastiueté, que remede ne feust mis à leur faict, les feit pendre à torches au gibet de Paris. Et pource l'Vniuersité pourchassa tant, qu'il fallut que au bout de trois, ou quatre mois, qu'ils feussent dependus. Et que le Preuost y feust en personne, & les baïsa en bouche, & les conuoia luy, & ses gens, & sergens, depuis le gibet jusques au monstier, où ils feurent enterrez. Et feurent amenez en vne bierre sur vne charrete. Et estoit le bourreau sur le cheual deuant, vestu d'un surpelis comme vn prestre. La dicte Vniuersité auoit grande puïssance pour ce temps à Paris, tellement, que quand ils mettoient la main en vne besongne, il falloit qu'ils en veinssent à bout. Et se vouloient mesler du gouuernement du Roy, & d'autres choses.

L'an mille quatre cents & neuf, le Comte de Sauoye, com-
mença guerre au Duc Louys de Bourbon, oncle du Roy, en ses pays de Bresse, & de Beaujolois, disât, que le dict Duc estoit son homme, à cause de certaines places qu'il tenoit en Bresse. Et feit passer le dict Comte de Sauoye, la riuiere de la Sonne, à plusieurs grands nombres de gens d'armes, & de traict. Et en estoit conduiseur vn gentil-homme de son pays, nommé Amé de Viry. Le Duc Louys le sceut, si feit son armée pour resister contre luy. Et y veindrent à son aide les Ducs de Bauiere, frere de la Roïne, & de Bar, le Seigneur de Lebrer, Connestable de France, le grand Maistre d'Hostel du Roy, nommé Montaignu, le Sire de Gaucourt, & plusieurs autres grâds Seigneurs, jusques au nombre de trois mille combatans. Lesquels preindrent sur les gens du Comte de Sauoye deux villes, que les gés du dict Comte auoient prins sur le dict Duc au pays de Beaujolois, dont l'une, se nomme Ance, & l'autre, Belleuille. La riuiere de la Sonne feut grosse, apres ce que les gens du Duc de Sauoye, l'eurent passé, pour eulx en retourner. Et eussent passé les gens du Duc de Bourbon apres, si n'eust esté la riuiere, qui estoit trop grosse, pour entrer au pays de Sauoye. Si traicterent, & parlerenterent tant d'un costé, que d'autre, que paix se feit entre eulx, parmy ce que le Comte de Clermont, aîné fils du Duc de Bourbon, feroit hommaige de la terre qu'il tenoit au pays de Bresse, au Comte de Sauoye. Et par ainsi fen

1409. retournerent les gens d'armes hors des dicts pays.

En ce temps, enuoia Messire Iean Boucicault, Marechal de France, & Gouverneur de Gennes, ses Ambassadeurs deuers le Roy, à ce qu'il luy pleust, luy enuoier mille hommes d'armes, avec gens de traict, pour garder le pays des Geneuois, auquel le Marquis de Mont-ferrat, & le Duc de Milan, & Francisque, faisoient guerre. Et iceux gens d'armes souldoieroit tres-bien des deniers du pays des Geneuois. Et feut donné la charge de mener les dicts gens d'armes au Sire de Gaucourt. Et cheuaucherent par le Daulphiné, tant qu'ils veindrent au pays de Piedmont, où le Prince du dict pays les reçeut, & donna passaige. Et de là passerent par les terres du Marquis de Montferrat, & du Quaret, & entrèrent en la terre de Gennes. En ceste compaignée, estoient avec le dict de Gaucourt, les enfans de Roye, le Sire de Blainville, Messire Hüe de Boesse, Monseigneur de Ionuelle, Messire Guy de Bar, le Sire des Barres, Messire Gadifer de la Salle, Messire Iean de Bonnai, Messire Robert de Milly, Messire Guillaume de Sauignes, Mōseigneur de Soule, Messire Antoine Belle, Messire Louys de Loigny, Enguerrand de Bourmonuille, le bastard de Bourbon, Louys Bourdon, & plusieurs autres Seigneurs, & Capitaines. Et vint deuers eulx le dict Marechal Boucicault, lequel les mena par le pays de Lombardie, droit en la Cité de Plaissance, laquelle il meit en l'obeissance du Roy de France. Et là passa le fleuve du Pau, qui est vne moult grosse riuere. Et alla à Pauie, cuidant leuer vn siege que Francisque, & le Duc de Milan, nommé Iean Marie, tenoient deuant son frere Comte de Pauie, nommé Philippes Marie. Et quand ils sceurent la venue du dict Boucicault, leuerent leur siege. Si vint le dict Boucicault droit à Milan, & vint le Duc au deuant de luy, & luy feit hommaige au nom du Roy de France, & entra dedans Milan à toute sa puissance. Lequel Duc de Milan, estoit frere de la femme du Duc d'Orleans Louys, trespassé, & mere du Duc Charles d'Orleans de present. Et le dict Boucicault faisoit crier en la dicte ville de Milan en tous ses cris, De par le dict Boucicault, Marechal de France, & Gouverneur de Gennes, & de Milan. Cependant qu'il estoit à celle conquête, le Marquis de Mont-ferrat, & Francisque, par le moyen d'aucuns Geneuois, qui estoient venus de Gennes, entrèrent dedans la

Cité, & tuierent tous les François qu'ils trouuerent en la dicte Cité, & vn cheualier nommé Messire Choleton, lequel estoit Capitaine du Chastelet de Gennes. Quand Boucicault sceut ces nouuelles, il feut moult troublé. Et si tost que ceux de Milan le sceurent, cuiderent rüer de nuit tous les François, chacun en leurs maisons. Si le sceurent les François, & incontinent se assemblerent ensemble, & toute la nuit cheuauchèrent parmy la ville. Et le lendemain, partit le dict Mareschal, & laissa la ville au gouuernement du Duc, en luy faisant serment qu'il la tiendroît & garderoit pour le Roy, & cōme vrai obeissant & parent du Roy. Et incontinent que le dict Mareschal feut parti, le Duc de Milan, & ceux de la ville, se rebellerent contre le Roy. Or y estoient demeurez aucuns François, pour eulx esbatre en icelle ville. Et incontinent le Duc de Milan les feit prendre, & menger à ses chiens. Le dict Boucicault passa la riuere du Pau en bateaux, & cheuaucha par les plaines de Lombardie, tāt qu'il veint à vn chasteau du pays des Geneuois, que tenoit le Sire de la Fayette, nommé Gauy. Et là feut luy & son Ost, par l'espace d'un mois, cuidant recouurer la Cité, & le pays de Gennes. Cependant Frâcisque auoit mis le siege deuant vn chastel, nommé Noues, où estoient plusieurs François en garnison. Et en estoit Capitaine Messire Guillaume de Saignes, du pays de Daulphiné. Si delibera Boucicault d'aller leuer le siege, & y feut, & y eut de grandes armes faictes. Et y feurēt faicts cheualiers le Sire de Grimouille, le Sire de Chaumont, & Hector bastard de Bourbon. Conclusion, ne peurent leuer le siege pour certaines bastilles, & fossez, que le dict Frâcisque auoit fait faire. Et lors les dicts Boucicault, & Gaucourt, à tout leur puïssance s'en retournerent par les plaines de Lombardie, jusques en Piedmont. Et lors le Prince les receut, & souldoia. Et preindrent pour le dict Prince les dicts François plusieurs places, au pays du Marquis de Montferrat, & puis s'en partirent, quand le dict Prince eut acheué sa guerre, & s'en retournerent en France. Et apres ce, plusieurs forts chasteaux, cōme Gauy, Porte, Vaudres, & certains autres, demurerent en l'obeissance du Roy, lesquels estoient garnis de François, & bien aduitaillez, Dont les Capitaines peu de tēps apres vendirent les dictes places aux Geneuois, & s'en retournerent en France. Ce feut grand dommaige pour le Roy de la

1409. perdition de Gennes. Car à ceste occasion de la Seigneurie de Gennes, le Roy tenoit iceluy pays, & villes, & ports de mer, jusques dedans le pays de Turquie, de Tartarie, de Cypre, & de Grece, qui tous se rebellerent comme Gennes.

En ce temps, arriua le Roy de Nauarre à Paris, & feit hommaige au Roy de la Duché de Nemours. Et feut festoié grandement du Roy, & des Seigneurs de France. Et se allierent luy, & le Duc de Bourgogne. Et feirent couper la teste au grand Maistre d'Hostel de France, nommé Montaigu, pour auoir son thresor, & aussi le gouuernement de France. Et en feit le jugement Messire Pierre des Essars, Preuost de Paris, lequel lors preint le gouuernement des finances du Royaume de France, du congé du Roy de Nauarre, & du Duc de Bourgogne. Et melt ses freres & parens en l'Hostel du Roy, en deboutant ceux qui y estoient du grand Maistre.

1410. L'an mille quatre cents & dix, les aucuns des Conseillers du Roy s'enfurent de Paris, & veindrent à Orleans, où estoit Monseigneur le Duc d'Orleans, en eulx complaignant de la mort du grand Maistre, & comment ils s'en estoient fuis, pour peur d'estre morts, & occis, & auoient esté leurs maisons pillées, & leurs biës & heritaiges mis en la main du Roy, de quoy les Bourguignons se aidoyent, pource que le Roy n'estoit pas bien sensible, mais estoit blessé de son entendement. Et pource que les dessus dictz, auoient esté seruiteurs de Monseigneur le Duc d'Orleans trespasé, le Roy de Nauarre, & le Duc de Bourgogne, leur auoient faict donner ce destourbier, peril, dommaige, interests, peur, & honte. Et disoient que c'estoit contre le serment que le Duc de Bourgogne auoit faict à Chartres. Car il auoit promis, que à nul qui eust tenu la querelle du Duc d'Orleans, ne feroit jamais destourbier. Si feut moult courroucé Mōseigneur le Duc d'Orleans, quād il sceut, & ouit ces nouuelles, & delibera de mander tous les Seigneurs de son alliance, & veindrent deuant Paris à Vicestre. Et là estoient le Duc de Berry, le Duc d'Orleans, le Duc de Bourbon, le Comte d'Alençon, le Comte de Richemont, le Sire de Lebre, Connestable de France, & le Comte d'Armagnac, & plusieurs autres, jusques au nombre de trois à quatre mille cheualiers, & escuiers, pour vouloir estre vengez du dommaige & crime de leurs amis & alliez, qui ainsi auoient

esté chassé de la ville de Paris. Et le Duc de Bourgongne, luy 1410.
 estant bien acertené que les Seigneurs dessus dictz faisoient
 ceste armée alencontre de luy, veint à Paris, & amena grosse
 puissance de ses pays de Bourgongne, de Flandres, d'Artois,
 & d'autres ses alliez, jusques au nombre de quatre mille che-
 ualiers, & escuiers. Et estoient conduiseurs des Bourguignós,
 Messire Louys de Chalon, Prince d'Orenge, Messire Jean de
 Vergy, Marechal de Bourgogne, le Seigneur de Saint George,
 & le Sire de Paigny, & plusieurs autres: Des Picards estoient
 conduiseurs, le Sire de Crouy, le Sire de Renti, le Sire d'Au-
 bercourt, & le Sire de Hely. Des Flamends estoient condui-
 seurs le Sire de Guistelle, le Sire de Robois, Messire Roland
 de Duinquerque, le Sire de Boiuetu, & Messire Dauid de
 Rambures, Maître des Arbalestriers. Et feurent logées leurs
 puissances durant ce debat entre Senlis & Paris. Et n'y eut
 Dieu mercy durât ce debat homme mort, ne blessé, au moins
 si peu que neant. Le Duc de Brabant veint à Paris, qui estoit
 frere du Duc de Bourgongne, lequel estoit tres-agreable aux
 Ducs de Berry, d'Orleans, d'Alençon, & de Bourbon. Et feit
 tant le dict Duc de Brabant, que les deux parties demeure-
 rent amis, qui guieres ne dura. Et s'appella de aucuns le traité
 de Vicestre, pource que les dictz Seigneurs du parti du Duc
 d'Orleans, se tenoient à Vicestre. Et ainsi s'en retournerent
 les dictz Seigneurs chascun en leur pays.

L'an mille quatre cents & onze, s'en alla le Roy de Navarre 1411.
 en son pays de Navarre, & le Duc de Bourgongne en son pays
 d'Artois. Et demurerent le Roy, Monseigneur le Duc de
 Guyenne, & Monseigneur de Ponthieu, qui estoient ses deux
 enfans, en la ville de Paris. Et auoit laissé le Duc de Bour-
 gongne, pour gouverner Paris, le Roy, & la Roynne, vn cheualier
 d'empres Paris, nommé Messire Pierre des Essars, lequel estoit
 Preuost de Paris. Iceluy Messire Pierre meit sus plusieurs bou-
 chers, & gens de basse condition, pour estre ses coplices, aidans à
 tenir ceux de la ville de Paris. Et l'auoit laissé le Duc de Bour-
 gongne, pour les tenir en crainte, & en special ceux qui tenoient
 le parti de Monseigneur le Duc d'Orleans. Et de fait, feit pren-
 dre le dict Preuost vn cheualier, nommé Messire Vinet d'Espie-
 neuse, & luy feit couper la teste és halles de Paris, & mener le
 corps au gibet. Lors estoit le Duc de Bourgogne en son Hostel.

1411. de Neelle à Paris, lequel eut moult grand peur, & frayeur d'iceux bouchers, qui faisoient moult de cruaultez à ceux qui tenoient le parti de Monseigneur le Duc d'Orléans, en la ville de Paris, dont mon dict Seigneur d'Orléans, feut moult mal cōtent. Et mādā les Ducs de Bourbon, & d'Alençon, & les Comtes d'Armaignac, & de Richemōt, & le Cōestable de Frāce, Seigneur de Lebrete, accompagnez de six mille ou sept mille cheualiers, & escuiers. Et se partit de Paris le Duc de Berry, pour peur qu'il auoit diceux bouchers, & alla à Melun demeurer. Et lors la puissance du Duc d'Orléans veint passer la riuere de Seine à Fondizague pres de la ville de Moret, & cheuaucherent tāt, qu'ils veindrent au pays de Valois, & de Soissonnois, & en la terre de Coussi. Et de là enuoia en la ville de Han en Vermandois son auant-garde, que cōduisoient Messire Clinet de Brabant, Admiral de France, le Sire de Beaurain, Messire Thomas de Lertzis, & autres, jusques au nombre de mille combatans, pour garder la ville de Han, & pour faire guerre au Duc de Bourgongne. Quand le Duc de Bourgongne sceut ces nouuelles, il feit son mandement par tous les pays. Et veint deuant la ville de Han mētre le siege, & amena de son pays de Flandres seize mille combatans, & par force de canons abbatirent la porte de ladicte ville, du costé de deuers Sainct Quentin en Vermandois, dont ceux qui estoient dedās la dicte ville eurent moult grand peur. Et se partirent de la ville, & l'abandonnerent, & s'en allerent en la ville, de Chaulny, où estoit Monseigneur le Duc d'Orléans, lequel feut moult courroucé de ces nouuelles. Et apres la prinse de la dicte ville, les Flamends la pillerent. Et le lendemain au matin, se partirent pour eulx retourner en Flādres, dont le dict Duc feut moult courroucé, qu'il ne pouoit mētre remede de les entretenir. Et pour se vouloir venger, enuoia son Ambassade à Calais par deuers les Anglois, afin qu'ils le voulussent secourir & aider, & si feirent ils. Car le Comte d'Arondel, & le Comte de Kent, & les Sires de Ros, & de Gray, veindrent à son aide, & en sa compaignée. Et estoient nombrez les dicts Anglois trois cents lances, & les archers, qui estoient mille. Le Duc d'Orléans sceut ces nouuelles, & partit du pays de Valois, & veint à Mont-didier, pour faire guerre és pays d'environ, qui fauorisoient le Duc de Bourgongne. Et là estant, eut conseil de venir
deuant

deuant Paris, & feit faire vn pont à Verberie. Et passa luy & sa puissance pour ce Compiengne, le pont Saint Maiffance, & tous les autres passaiges de dessus la riuere d'Oise, qui estoit en l'obeissance & faueur du Duc de Bourgogne. Et ainsi veint le Duc d'Orleans, & les Seigneurs de son aliance, deuant Saint Denis, & là meirent le siege. Et dedans la ville estoit le Prince d'Orenge, nommé Messire Iean de Chalon, & en sa cōpaignée six cents cheualiers, & escuiers. Et pource que la place estoit foible, ledict Prince la rendit, pourueu que jamais luy, ne nul de sa cōpaignée, ne se armeroient contre ledict Duc d'Orleans. Et se partit de la ville, luy, & ses gens, & s'en retourna en Bourgongne. Et lors le Duc d'Orleans, se bouta dedans Saint Denys, & meit son auantgarde à Mont-martre, à la villette, Saint Ladre, & à la chappelle Saint Denys. Et là eust de grandes escarmouches tant d'un costé que d'autre. Et estoient dedans Paris le Roy, Monseigneur de Guyenne, son fils aîné, & Messire Pierre des Essars, Preuost de Paris, qui auoit lagarde & charge de la Cité de Paris. Et cependant print le Sire de Gaucourt le pont de Saint Cloud, d'eschelle par la riuere, & de nuit. Et incontinent se veindrent loger au villaige du dict Saint Cloud, partie de ceux de l'auant-garde du Duc d'Orleans, lesquels estoient ou la plus grand partie Bretons, de la cōpaignée du Comte de Richemont. Cependant veint à Paris le Duc de Bourgongne, & passa la riuere de Seine au pont de Meullent, luy, & sa puissance. Et estoient avec luy le Comte de Neuers, son frere, & le Comte de Saint Paul, nommé Vualeran de Luxembourg, qui estoit fait Connestable de France, en deboutant le Sire de Lebre, qui estoit fait parauant Connestable. Et si auoit avec luy les Anglois dessus dicts, & plusieurs Seigneurs de Flandres, de Bourgongne, & de Picardie. Et tost apres se partit de nuit de la ville de Paris, acompagné des Anglois, des Comtes de Neuers, & de Mortaing, frere du Roy de Nauarre, du Duc de Bauiere, frere de la Royne de France, lequel estoit pour l'heure allié du Duc de Bourgongne. Si veint au point du jour, luy & sa cōpaignée au villaige du pont de Saint Cloud, & assaillit les gés du Duc d'Orleans, & les descōfit, & y en eut de morts de neuf cents à mille, & estoient la plus part Bretons, & là feurent prins le Sire.

V u u

1411. de Combour, Messire Guillaume Bataille, & Messire Maufart du Bois, Auquel le Duc de Bourgogne, feit coupper la teste à Paris. Et quand le Duc d'Orleans ouit dire que les gens se combatoyent, si se partit hastiuement de Saint Denys, pour les cuider secourir par le pont qu'il tenoit. Mais il ne peut venir à temps. Car ils feurent desconfits, & lors abandonnerent le pont. Et s'en retourna le Duc d'Orleans, à Saint Denys, & le Duc de Bourgogne s'en retourna à tout les prisonniers, & la proye à Paris. Et la nuit, le Duc d'Orleans feit faire vn pont sur la riuere de Seine, où il passa celle nuit au droict de Saint Denys, luy, & sa puissance, & cheuaucherent tant qu'ils veindrent à Chasteaudun, & ainsi feut leur entreprinse rompuë. Et lors le Duc de Bourgogne partit de Paris, & emmena le Roy, & Monseigneur de Guyenne, son fils aîné, deuant le chasteil d'Estampes, où il meit le siege, & le print. Et estoit dedans Capitaine, vn nommé Messire Louys Bourdon, lequel se rendit prisonnier, & feut mené en Flandres sans mora. Et lors enuoia le Duc de Bourgogne son auâtgarde en Beausse, en vn villai-ge appellé le Puiset, dont estoient chefs, Jacques Comte de la Marche, & Messire Iean le Maingre, diët Boucicault, Marechal de France, le Sire de Hambre & plusieurs autres, jusques au nombre de deux mille cheualiers, & escuiers. Si se partirent d'Orleans, le Sire de Barbasan, & le Sire de Gaucourt. Et veindrent au point du jour à tout quatre cents lances, & ferirent sur le logis du Comte de la Marche, & le preindrent, & feut mené en la grosse tour de Bourges, où il demeura longuemēt. Le Sire de Hambre, & plusieurs autres de l'auantgarde du Duc de Bourgogne, quand ils sceurent celle desconfiture, se retra- hirent, & veindrent à Estampes, où estoient le Roy, & le Duc de Bourgogne. Et ainsi feut pour celle saison son armée rom- pue, & s'en retournerent le Roy, & iceluy Duc à Paris. Et de- puis grand temps apres feut deliuré Messire Louys Bourdon. Si preint congé le Comte d'Arondel, & les autres Seigneurs d'Angleterre, & s'en retournerent en leurs pays.
1412. L'an mille quatre cents & douze, feut le Sire de Lebrer, Cō- nestable de France, de par les Ducs de Berry, & d'Orleans, en- uoïé en Ambassade deuers le Roy Henry d'Angleterre. Et feir tant, que le Roy Henry luy bailla son second fils, Thomas Duc

de Clarence, & son frere le Duc d'Iorck, & Messire Iean Cornouaille, accompagnez de huit cents lances, & de quatre mille archers, pour secourir & aider les Ducs de Berry, & d'Orléans, & descendirent en Normendie, en la haugue de Saint Vast, au mois de Iuin.

En ce temps, feut logé en Linieres en Berry, le Sire de Hely, qui estoit à grande puissance de gens au dict pays, & Capitaine pour le Duc de Bourgongne. Et lors le Duc de Bourbon se partit de Bourges, & veint au point du jour frapper sur le Seigneur de Hely, & le destroussa, & perdit moult de ses gens, & ne feut point prins. Car il se retrahit au chastel.

Et celle saison, se partit le Roy de Paris, & Monseigneur de Guyenne, son aîné fils, & les Ducs de Bourgongne, de Bauiere, de Bar, & de Lorraine, & plusieurs autres grands Seigneurs, & Comtes de ce Royaume, pour venir mettre le siege à Bourges. Et veindrent assieger Dunle Roy, que tenoit vn cheualier Guascon pour le Duc de Berry, qui se nommoit Messire Aurias de Souignac. Si rendit la ville, son corps, & ses biens saufs. Et de là se partit l'Ost, & veindrent mettre le siege deuant vne des portes de la ville de Bourges, & y feurent par l'espace de cinq ou six semaines. Puis se leuerent, & allerent mettre le siege deuant la porte de Saulongne, nommée la porte Saint Priué, où ils demurerent grand temps. Et là veint le Roy de Sicile Louys, qui amena à l'aide du Roy, & de ceux qui tenoient le siege, six cents hommes d'armes. Le dict Roy de Sicile, estoit lors allié au Duc de Bourgongne, nommé Iean. Si sceut le Duc de Guyenne, aîné fils du Roy de France, que les Anglois venoient à grand puissance, pour secourir les Ducs de Berry, & de Bourbon, qui estoient dedans Bourges. Et conduisoit les Anglois le Sire de Lebret, & ja estoient au pays du Perche. Et pource que la mortalité estoit au siege, & aussi que le dict Duc de Guyenne veoit que par la bataille se pouoit perdre ce Royaume, pource trouua-il maniere de faire paix entre eulx, & parlerent deuant la Cité aux champs les Ducs de Berry, & de Bourgongne, qui estoient oncle, & nepueu. Si conclurent ensemble de venir aux Roches pres la Charité sur Loire, parler ensemble, & conclurét, & veindrét au dict lieu des Roches, & preindrent jour.

1412. née pour aller à Auxerre, par deuers le Roy, qui là debuoit tenir journée. Dôt ils n'y veindrēt point, pource qu'ils debuoiēt estre tuez en la ville d'Auxerre. Si cheuaucherent les Anglois, & passerēt la riuere de Loire, & veindrent pour loger à Beaulieu pres de la ville de Loches, lequel ils bruslerent, l'Abbaye, & la ville, & emmenerent l'Abbé prisonnier, & destruirent Burençois. Et feirent ces excès, par despit qu'ils eurent de la dictē paix faicte entre les Ducs de Berry, & de Bourgongne. Et pour estre paieez, & sur leurs gaiges, emmenerent le Comte d'Engoulesme, frere du Duc d'Orleans, prisonnier en Angleterre, pour la somme de cent mille escus d'or.

En ce temps, le Comte de Saint Paul, qui estoit Connestable de France, pour la partie des Bourguignons, feut à Saint Remy du plain es parties de Normendie, & du Perche. Et là desconfit le Sire de Gaucourt, & le Sire de Charpaigne, qui estoient trois ou quatre cents combatans, & feurent desconfits par les archers, que le dict Comte de Saint Paul, auoit, & s'en allerent les Anglois à Bordeaux.

En ce temps, feut prins vn cheualier, nommé Messire Lourdin de Saligny, Gouverneur, & chambellan du Duc de Bourgongne, en la ville de Paris, & le feit mener le dict Duc en Flandres. Pource que vn cheualier de Gastinois, nommé le Sire de Iacqueuille, luy meit sus qu'il vouloit tuer son maistre le Duc de Bourgongne, par l'enhorrement de la femme du feu grand Maistre d'Hostel de France, nommé Montaigu. Lequel Iacqueuille disoit au dict Duc, que le dict Messire Lourdin la maintenoit, pour auoir le gouuernement du dict Duc, ainsi que auoit le dict Messire Lourdin.

En ce temps, debuoiēt venir les dicts Ducs de Berry, d'Orleans, & de Bourbon, & autres Seigneurs de leur alliance, à Auxerre, pour ordonner & conclurre du gouuernement du dict Royaume. Et feut ordonné en vn Cōseil secret, où estoient le Duc de Bourgongne, & le Sire de Iacqueuille, & Messire Pierre des Essars, Preuost de Paris, & conclurent au dict Conseil, que si les dicts Seigneurs venoient au dict lieu d'Auxerre, l'ô les feroit mourir. Le dict Messire Pierre des Essars, ne voulut oncques consentir ce mal fait. Et dit que c'estoit outrage, d'auoir fait mourir le Duc d'Orleā, le pere, puis faire mourir

le fils, & les autres Ducs & Comtes, qui debuoiert venir au ^{1412.} traitté. Si le feit sçauoir le dict Messire Pierre des Essars aux dicts Seigneurs secretement, & parce ne veindrent point à Auxerre. Mais depuis en la saison d'hyuer, veindrent les dicts Seigneurs en la ville de Melun, deuers Monseigneur le Duc de Guyenne, aîné fils du Roy, lequel auoit prins le gouuernement du Royaume, qui leur feit grand chiere, & les reçut grandement. Et reteint le dict Duc de Guyenne, ses Officiers deux des seruiteurs de Monseigneur le Duc d'Orléans, lesquels il reteint pour le seruir, dont l'un estoit cheualier, nommé Messire Jacques de la Riuere, Sieur d'Aunel pres Chartres, & l'autre estoit escuier, nommé le petit Mesnil, d'enuiron Dreux. Et feut l'un, chambellan, & l'autre, varlet trenchant, lesquels n'y demurerent guieres. Car on les feit mourir, pource qu'ils auoient tenu le parti d'Orléans, & estoient bien nobles gens.

L'an mille quatre cents treize, au mois de May, par le com- ^{1413.} mandement du Duc de Bourgogne, se meirent sus vn tas de bouchers, & d'escorcheurs de bestes, & feirent Capitaine vn de leur compaignée, nommé Simonnet Caboche, & meirēt sus le commun de Paris, & feirent leur Capitaine general le Sire de Iacqueuille, & leur Conseiller vn mire, nommé Maistre Iean de Troyes, & plusieurs autres gens de basse condition, & partirent de l'Hostel de la ville, & veindrent en la rue Saint Antoine, à tout grande multitude de peuple, armé, & embastonné, deuant l'Hostel où demouroit Monseigneur de Guyenne, & au dict Hostel, estoit le Duc de Bourgogne. Et là en la dicte rue, les dicts Iacqueuille, & Maistre Iea de Troyes, demanderent qu'on leur baillast la plus part des Officiers & seruiteurs du Duc de Guyenne, ou sinon ils tailleroient tout en pieces. Et en la fin les fallut bailler, ainsi comme ils les auoient par escript en vn roolle, & les preindrent, & menerent prisonniers en l'Hostel d'Artois. Et estoit le Duc de Bourgogne present à les conduire & mener. Là feut prins le Duc Edouard de Bar, & plusieurs nobles, cheualiers, & escuiers, & notables gens de Conseil. Et quand le Duc de Guyenne veid, que c'estoit force que ses gens & officiers feussent prins, si feit promestre au Duc de Bourgogne par son serment, sur vne croix de fin or, qui là feut apportée, presente, Madame de Guy-

1413. enne fille du Duc de Bourgongne, & plusieurs autres, que les dictz prisonniers, qui là estoient, n'auroient nul mal, mais les renuoieroit avec leur maistre, Monseigneur le Duc de Guyenne, quand le peuple seroit appaisé. Et pource les feit mener en sa maison. Ce jour deuers le soir, feut prins Messire Pierre des Essars, qui estoit dedans la bastille, & luy promet le Duc de Bourgongne, qu'il n'auroit nul mal. Si rendit la bastille où il estoit, & feut prins, & mené en la grosse tour, nommée le chasteau de bois, au droict de l'Hostel de Neelle, de l'autre part de la riuere. Et incontinent qu'il feut parti de la bastille, le Sire de la Trimouille, & vn Capitaine nommé Enguerrand de Bournouille, entrerent dedans icelle bastille, & preindrent, & pillerent tous les biens, gens, & cheuaux du dict des Essars. Et peu de temps apres, preindrent Louys Duc de Bauiere, frere de la Roynes; & le menerent prisonnier en vne grosse tour sur la riuere au droict du Louure. Et lors feirent publier parmy la ville de Paris, que le dict des Essars, auoit prins moult d'Offices, & de Capitaineries, dont il auoit eu moult de profits, qui estoit contre les statuts Royaulx, & que le dict des Essars auoit affoibli & appetissé la monnoie du Roy, de deux deniers sur piece, qui pouuoient monter à son profit trois ou quatre cents mille escus, qu'il auoit emblez du Roy, & de son peuple. Et toutes ces choses faisoient publier contre luy, pour le mettre en la male grace du peuple, & pour le faire mourir. Et principalement le conseilloit au Duc de Bourgongne, le Sire de Iacqueuille, qui desiroit à auoir le gouuernement de ce Royaume, & autres ses complices, pour auoir les offices de ceux que le dict des Essars auoit fait & mis en estat, tant de ses parens, comme autres. Et pource luy feirent couper la teste, & aussi la feirent couper à Messire Jacques de la Riuere, depuis qu'il feut mort. Car il mourut en la prison, & dient les aucuns, qu'il se tua luy mesmes par desconfort, & les autres dient qu'on le tua d'une hache, pource qu'on ne luy scauoit que mestre sus, & n'en scait l'on nulle autre chose sinon Dieu. Car il estoit seul en sa prison. Et là feut prins à tout vne robe noire, fourrée de martres, & vn tissu dont il estoit ceint, qui estoit ferré d'or, & estoit chauffé, & attaché, & feut apporté tout mort de la prison aux degrez du Palais. Et feut attaché à vne charrete, & mené es halles de Paris, & veoit le vif le mort

empres luy. Si feut mis hors de la dicte charrete le cheualier trespasſé, & feut apporté en l'eſchaffault, & là on luy couppa la reſte tout mort, & puis y feut mené le dict petit Meſnil, qui auſſi eut la reſte couppée. Les deſſus dictſ bouchers par le commandement des deſſus dictſ preindrent les Dames & Damoifelles de l'Hoſtel de la Royné, & de Madame de Guyenne, à qui on feit maintes peurs. Iceux bouchers, & autres de leurs alliances, feirent moult de maux, & robberent, & occirent moult de gens, ſans eſgard de Juſtice, & meirent ſus tailles & emprunts ſur Officiers, & gens d'Egliſe, & ſur tous autres gens. Leſquelles tailles eſtoient impoſſibles de pouoir payer, & de quoy les notables de Paris, feurent moult mal contents. Vn jour le premier Preſident de Parlement, nommé Maître Henry de Marle, & Meſſire Ieā Iuuenal, Aduocat du Roy au dict Parlement, leſquels eſtoient grandement enlignaigez, & auctorifez en la dicte ville de Paris, eulx, & leurs amis, ſe meirent ſus à tout grande multitude de peuple, & veindrent en l'Hoſtel de Saint Paul, où ſe tenoient le Roy, & Monſieur de Guyenne, ſon fils ainſné. Et remonſtrèrent au Roy, & à ſon fils, que le Duc d'Orleans auoit grāde multitude de gens d'armes ſur les champs, & auſſi les autres Seigneurs de leurs alliances, leſquels ſe tenoient à Vernon ſur Seine. Et ſommoient le Duc de Bourgongne, & ceux de ſon alliante, faire paix, & eſtoient mal contents des maux que faiſoient ceux qui gouuernoient la ville de Paris aux ſeruiteurs du Roy, & de Monſieur d'Orleans, & auſſi des autres hommes, marchands, & bourgeois de la dicte ville, de la mort du Seigneur de la Riviere, & de Meſſire Pierre des Effars, & autres, leſquels ils auoient faiſt mourir, & encores ils vouloient continuer. Si le remonſtrèrent preſents le Roy, & Monſieur de Guyenne, & l'Vniuerſité de Paris. Et lors Monſieur de Guyenne, feut moult courroucé, & dolent de ſes ſeruiteurs qui auoient eſté prins, & eſtoient en peril de mort. Si monta incontinent à cheual avec le peuple, & eſtoient avec luy les Ducs de Berry, & de Bourbon. Et meit hors de la priſon les Ducs de Bar, & de Bauiere, & les autres priſonniers, Dames, & Damoifelles. Le Duc de Bourgongne cuida deſmouuoir mort dict Seigneur de Guyenne, de ce faire: mais il n'en feit rien pour luy. Et lors les bouchers, & leurs complices, eſtoient

1413. assemblez en greue en l'Hostel de la ville, & quand ils virent que le dict Duc de Guyenne estoit plus fort, ils s'enfuirent, & se meirent chascun, où il peut trouuer seurété. Et tost apres s'enfuirent hors de la ville & Cité de Paris, & se retrahirent assez tost apres és pays du Duc de Bourgongne, & les nomma on les bannis, & les Caboches. Et bien peu de temps apres, Monseigneur de Guyenne manda Monseigneur d'Orleans, & ses alliez, venir deuers luy. Et pource eut peur le dict Duc de Bourgongne que le dict Duc d'Orleans, quand il seroit venu, ne demandast iustice de la mort de son pere, qu'il auoit fait mourir. Et pour & afin que le dict Duc de Bourgongne s'en peust aller hors de Paris, feist tant à vn cheualier qui gouernoit le Roy, nommé Messire Charles de Sauoisi, qu'il conseillast au Roy qu'il allast à la chasse. Et ce faisoit, afin que iceluy Duc de Bourgongne, peust saillir de la ville avec le Roy. Et ainsi le feit. Et alla à Bondis chasser, & cuidoit le dict Duc de Bourgongne emmener le Roy en Picardie avec luy. Mais ceux de Paris conuoierent le Roy si forts, qu'il n'eut pas la puissance de l'emmener, Et s'en alla, & le conduisit Enguerrand de Bournouille, qui estoit Capitaine de la garde du corps de mondict Seigneur de Guyenne. Si meir le dict Duc de Bourgongne garnison à Compiengne, & à Soissons.

Et en ce temps, veindrent à Paris les Ducs d'Orleans, de Bourbon, & d'Alençon, & les autres Seigneurs de leurs alliances, & feurent tout l'hyuer à Paris. Et se allia lors le Roy Louys de Sicile, & Duc d'Anjou, au Duc d'Orleans, & aux autres Seigneurs. Et pource renuoia la fille au Duc de Bourgongne, laquelle estoit enconuenançee au fils aîné du dict Roy de Sicile. Et pour ce feut rompuë leur alliance, dôt le Duc de Bourgongne feut moult courroucé, & mal content. Lors le Roy donna à Monseigneur Charles, son quatriesme fils, la fille du Roy de Sicile en mariage, nommée Marie d'Anjou.

1414. L'an mille quatre cents & quatorze, se partit le Roy de Paris au mois d'April, & Monseigneur de Guyenne, son aîné fils, & les Ducs d'Orleans, de Bourbon, de Berry, d'Alençon, & de Bar, & les Comtes de la Marche, de Richemont, d'Armagnac, de Vendosme, le Connestable de France, Seigneur de Le Bret, Messire Amé de Saueufes, Seigneur de Commercy, & plusieurs autres grands Seigneurs, cheualiers, & escuiers, & en leur

en leur compaignée de six à sept mille hommes d'armes. Et 1414.
meirent le siege à Compiengne, que le Duc de Bourgongne
tenoit, & le preindrent par composition. Et estoient dedans
Messire Hue de Lannoy, & le Seigneur de Soret, & laisserent
la ville, & s'en allerent leurs corps, & leurs biens saufs. Et y
teindrent le siege le Duc de Bar, le Comte d'Armaignac, & le
Sire de Le Bret, Connestable de Frâce. Puis alla le Roy en per-
sonne, & sa puissance, mestre le siege à Soissons, laquelle ville
en la fin feut prinse d'assault. Et tenoient la dicte ville Enguer-
rand de Bournouille, & vn cheualier de Touraine, nommé
Messire Pierre de Menou. Lesquels pource qu'ils auoient te-
nu la ville contre le Roy, & en especial le dict Enguerrand,
pource que vn de ses archers auoit tué en vne escarmouche
d'un traict le bastard de Bourbon par la gorge, la ville feut pil-
lée, & vne partie des Eglises, dont feut dommage. Vn cheua-
lier feut enuoié à Paris, qui feut prins en la dicte ville, & feut
decapité és halles, & s'appelloit Messire Guionnet du Pleffis, &
feurent decapitez à Soissons, les dicts Enguerrand, & Messire
Pierre de Menou, pour les choses dessus dictes. Le Roy se par-
tit de Soissons, & s'en alla à Laon. Et là veint deuers luy le Cō-
te de Neuers, frere du Duc de Bourgongne, lequel feut fermēt
au Roy, de non se armer contre luy, en aidant, ne confortant
son frere. Et se partit le Roy de là, & s'en alla à Saint Quentin
en Vermandois. Et là eut le Roy nouuelles, que les Bourgui-
gnons venoient à Arras, pour secourir leur Seigneur. Si se par-
tirent les Ducs de Bar, de Bourbon, & d'Alençon, le Comte
d'Armaignac, & le Connestable de France. Et chasserent les
Bourguignons depuis la chappelle haulteresse, jusques à no-
stre Dame de hault en Brabant, & y feut prins vn cheualier de
Bourgongne, nommé Messire Guy de Bar, & plusieurs autres
Bourguignons. Et se retrahit toute celle puissance; qui venoit
de Bourgongne, à Arras, & feut mis le siege deuant la ville
d'Arras, apres ce que Bapaulmes feut prins. Mais en la fin fei-
rent la paix par le moyen de la Duchesse de Hollande, sœur du
Duc de Bourgongne, & s'en retourna le Roy à Paris.

En ce temps, feut ordonné le Concile à Constance, & ceda
Pape Iean, & feut mis en prison en vn fort chastel dedans le
lac de Constance, par le commandement de l'Empereur, & des
clercs de la Chrestienté.

Xxx

1414. En ce temps, le Comte d'Armaignac, print le chastel de Murat par composition, & plusieurs autres places, qui estoient au Vicomte de Murat. Et preint le dict Vicomte, par le moyé que ses seruiteurs, & gens, s'en peussent aller des places qu'ils tenoient, leurs vies sauues. Si le meit en prison, & en la fin eschappa, & s'en alla deuers le Duc de Bourgongne.

Celuy an, veindrent à Paris par sauscóduist le Duc d'Iorck, l'Archeuesque de Vincestre, & le Comte d'Orset, oncles du Roy Henry d'Angleterre, le Sire de Cornuaille, & autres cheualiers Anglois, & gens de Conseil, pour demander à auoir en mariage pour le dict Roy d'Angleterre, Madame Catherine, fille du Roy. Lesquels Ambassadeurs, feurent moult grandement festoiez du Roy en son chastel du Louure à Paris, & aussi de Monseigneur de Berry, en son Hostel de Neelle à Paris. Et feut donné responce aux dicts Ambassadeurs, que l'on ne pouuoit entendre à ceste matiere, pour le present, & ainsi s'en retournerent. Et pource qu'ils scauoient que l'intention de leur Roy estoit, de venir descendre en grande armée en Normandie, requirent qu'on les menast monter en mer à Harfieu, pour aller en Angleterre. Mais le principal point estoit, pour regarder la ville, & comment elle estoit fortifiée.

1415. L'an mille quatre cents & quinze, le Roy d'Angleterre descendit à bouche de Seine, & à la fosse de Loire, deuant la ville de Harfieu, & veint meestre le siege deuant la dicte ville. Et se bouterent dedás le Sire d'Estouteuille, le Chastellain de Beauuais, le Sire de Hacqueuille, & Messire Lionnet de Bracquemont, qui auoient en leur compaignée cent cheualiers, & escuiers. Puis y veindrét apres le Sire de Gaucourt, & le Sire de Guistray, lequel se bouta dedans. Dont les Seigneurs, qui estoient dedans en la dicte ville, & le peuple, en feurent moult resjouis, & garderent & teindrent grandement & longuement la dicte ville. Et estoit à Caudebec, Messire Jean Boucicault, durant le siege, qui estoit Marechal de France, à tout mille & cinq cents hommes d'armes, & le Sire de Lebret, Connestable de France, à tout mille & cinq cents hommes d'armes à Honnefleu, lesquels se tenoient là, & es places d'environ, pour cuider porter dommaige aux Anglois. Mais le Roy d'Angleterre estoit venu si grandement accompagné, & pourueu de trait, de bombardes, de toute artillerie, & de viures, & en venoit tous les

jours d'Angleterre par mer tant & si largement, que pour chercher viures, ne falloit ja que les Anglois allassent hors de leurs sieges. Et à la fin, fallut que ceux qui tenoient Harfieu, la rendissent au Roy d'Angleterre, parmy ce que si le Roy d'Angleterre n'estoit combattu deuant qu'il feust à Calais, que ceux qui auoient tenu Harfieu contre luy, rendroient leurs corps prisonniers. Si laissa le Roy d'Angleterre, son oncle le Comte d'Orset dedans Harfieu, & se partit pour aller droit à Calais. Et quand le Connestable de France le sceut, il feit sçauoir au Roy, & par tout le Royaume de France, que le Roy d'Angleterre, s'en alloit à Calais. Et pource l'on feit sçauoir à tous les Seigneurs de France, & du Royaume, que vn chascun qui aimoit honneur veint en Picardie, pour combatre les Anglois. Et cependant les Connestable & Mareschal de France, iroient au deuant d'eulx à Abbeuille, pour les garder de passaige sur la riuere de Somme. Et si feirent ils, car ils teindrent bien quinze jours, auant qu'ils peussent passer la dicte riuere. Mais en la fin, ils trouuerent passaige entre Corbie, & Peronne, par où ils passerent. Et feut par aucuns François, qui estoient logez sur le passaige, cuidans que les Anglois feussent passez la riuere plus hault. Lesquels François s'enfuirent dès minuiet. Et en fuyant par les villaiges où ils passerent, semoient, & disoient que les Anglois estoient passez, & ainsi en feirent fuyr tous ceux qui estoient au tour du passaige. Et quād il feut jour, veindrent aucuns Anglois sur le bord de la riuere, du costé où ils estoient logez, lesquels queroient à menger, pource qu'ils ne trouuoient que menger, sinon à grand peine. Si se bouterēt en vn moulin, & eulx là estans, veirent de l'autre part de la riuere, qu'il n'y auoit nuls François. Si se hardierent de passer outre par dessus la chaussée du moulin, & trouuerent vn villaige au bout de la dicte chaussée, où ils trouuerent grand foison de chair cuiste, bouillie, & rostie, & pain, & vin, que les François auoient laissé de haste de partir. Si se chargerent les dicts Anglois de ces viures, qui estoient à pied, & s'en allerent deuers leurs Capitaines, & leur compterent ce qu'ils auoient trouué. Si se partirent les Capitaines, & l'allerent dire au Roy d'Angleterre. Et incontinent qu'il le sceut, feit ordonner ses batailles, & enuoia gens pour sçauoir quels passaiges il y auoit, & s'il y auoit nuls François de l'autre costé de la riuere.

1415. Si trouuerent qu'il n'y auoit rien. Et incontinent le Roy d'Angleterre, & toute sa puissance, passa celle riuiere. Et quand le Conestable le sceut, & les Ducs de Bourbon, & de Bar, & le Comte de Neuers, qui ja estoient arriuez à Corbie, si feurent moult courroucez de ces nouuelles, & conclurent qu'ils manderoient la bataille au Roy d'Angleterre, au leudy ensuiuant, en vn lieu nommé Aubigny en Artois. Si y enuoierent leurs heraults, ausquels le Roy d'Angleterre fait grâds dons, & accepta, & promet de venir au champ, & combattre à ce jour sans nulle faulte, dont il ne fait rien. Car il s'en alla passer en vn lieu qui s'appelle Beauquesne, afin que le plustost qu'il pourroit, il peust recouurer à estre à Calais. Et quād les Seigneurs de France sceurent ces nouuelles, ils cheuaucherent au deuant de luy, pour luy couper chemin. Et enuoierent les dicts Seigneurs de France deuers le Roy, qui estoit à Rouën, qu'il voulust venir à la bataille. Mais le Duc de Berry, son Oncle, ne le voulut consentir, & feut moult courrougé de ce qu'ils auoient accepté la dicte bataille, & pource ne voulut que le Roy y alast. Car il faisoit grād doubte de la bataille, pource qu'il auoit esté à la bataille de Poitiers, où son pere le Roy feut prins. Et disoit que mieux valloit perdre la bataille, que le Roy, & la bataille. Et pource ne voulut consentir que le Roy y alast, lequel Roy y feust volontiers allé. Car il estoit hardi cheualier, fort, & puissant. Et lors le Conestable, & les Seigneurs, qui tousiours croissoient de gens, veindrent au deuant des Anglois, sur le passaige d'une riuiere, en vn villaige nommé Blangy, & les cuiderent combattre ce leudy. Mais les Anglois demanderent trefues jusques au lendemain, lesquelles leur feurent baillées. Et le lendemain au matin, ordonna le Roy d'Angleterre ses batailles. Et à celle heure arriuerent les deux Ducs d'Orleans, & de Brabant, dont toute la compaignée des François, feut moult resjouye, jaçoit ce qu'ils veindrent comme tous seuls. Tout ce matin, arriuerent Barons, cheualiers, & escuiers, à l'aide des François de toutes parts. Et enuoierent les Seigneurs de France, Messire Guichard Dauphin, le Sire de Trasse, le Sire de Hely, & autres, parler au Roy d'Angleterre. Quelle offre le Roy d'Angleterre leur feit, nul ne sçait, sinon le Duc d'Orleans. Car tous les autres feurent morts en la bataille, & luy mesme si tost qu'il arriua en la bataille, feut prins. Or feut ainsi.

que enuiron onze heures, ce Vendredy en la fin du mois d'Octobre, marcherent les Anglois en ordonnance, en jectant grands cris, & veindrent assembler sur les batailles, & sur les ailes des Seigneurs de France. Et estoit à l'aisle dextre, le Comte de Richemont, & estoient soubz luy le Vicomte de Belliere, & le Sire de Combourc. Et auoit à son aisse, six cents hommes d'armes. L'aisle senestre, faisoit le Comte de Vendosme, grand Maistre d'Hostel du Roy. Et estoient avec luy le Sire de Bacqueuille, le Sire Daumont, le Sire de la Rocheguyon, & tous les chambellans, escuiers descuierie, eschançons, pannetiers, & autres Officiers du Roy. Et auoit en son aisse, six cets hommes d'armes. A l'auant-garde, estoient le Sire de Lebrer, Connestable de France, & Boucicault, Mareschal, qui auoient en leur compaignée trois mille hommes d'armes. Et y estoit le Duc de Bourbon, qui auoit douze cents hommes d'armes. Et y estoit le Duc d'Orleans, qui auoit en sa compaignée six cents homes d'armes, que gouuernoit le Sire de Gaules pour luy en bataille. Et y estoit le Duc Edouard de Bar, qui auoit en sa compaignée six cents hommes d'armes. Et y estoit le Comte de Neuers, qui auoit en sa compaignée douze cets hommes d'armes. Et y estoient Messire Robert de Bar, & le Comte d'Aumalle, qui auoit en sa compaignée quatre cents hommes d'armes. Et y estoit le Comte d'Eu, qui auoit en sa compaignée, trois cents hommes d'armes. Et y estoit le Comte de Vaudemont, frere du Duc de Lorraine, à tout trois cents hommes d'armes. Et y estoit le Comte de Rouffi, & de Brenne, à tout deux cents homes d'armes. Et y estoit Iean Moseigneur de Bar, frere du Duc de Bar, à tout deux cents hommes d'armes. Et y estoit le Duc de Brabant, frere du Duc de Bourgongne, lequet amena peu de gens: mais tous les Barons de Hainault, se meirent soubz sa banniere. En ceste compaignée des François, estoient dix mille hommes d'armes, dont la plus part estoient cheualiers & escuiers. Le Connestable auoit ordonné certain nombre de gens à cheual, pour frapper sur les Anglois, qui se porterent petitement. Et en estoient chefs Messire Gieuffroy Boucicault, le Sire de Grauille, le Sire de la Trimouille, Messire Hequinet de Brebant, Messire Iean d'Engennes, Messire Aleaume de Châpenaus, Messire Robert de Chaalus, & Pichon de la Tour. Ces deux y moururent, & ne feirent pas bien leur debuoir trestous

les autres. Car ils fuirent honteusement, & oncques ne frapperent coup sur les Anglois. Le Roy d'Angleterre auoit en sa compaignée, avec ceux de son sang, & lignaige, mille & cinq cents cheualiers & escuiers, & de seize à dixhuiſt mille archers. Il trouua les François à petite ordonnance, & en petit nombre. Car les vns s'en alloient chauffer, & les autres se alloient eulx pourmenans & repaistre leurs cheuaux, & ne cuidoient point que les Anglois euſſent hardement de les venir combattre. Et pource que les Anglois les veirent en ce defarroy, les veindrēt assaillir, & les desconfirent. Dont ce feut pitié & dommaige pour le Royaume. Et là moururent trestous les Seigneurs dessus dictz. Reſerué les Ducs d'Orleans, & de Bourbō, & les Côtes d'Eu, de Vendosme, & de Richemont, & le Mareschal Boucicault, lesquels feurent prisonniers du Roy d'Angleterre, & menez en Angleterre. Et mourut de la part du dict Roy d'Angleterre, le Duc d'Iorck, son oncle, & bien trois ou quatre cēt Anglois. Et moururent au champ quatre mille cheualiers, & escuiers. Le Roy estoit à Roüen, qui sceut ces nouuelles, & cōment le Duc de Bretagne, n'auoit point esté à la besongne, lequel auoit eu du Roy, pour le payement de ses gens d'armes, cent mille francs. Et luy auoit donné le Roy, la ville & Cité de Sainſt Malo, afin qu'il feust plus curieux de le venir seruir. Et feut principalement cause, de luy faire auoir le dict Sainſt Malo, vn cheualier, nommé Messire Bertrand de Montauben, qui estoit du pays de Bretagne, & l'Euesque de Clermont, nommé Maistre Martin Gouge, qui estoient eulx deux pour Mōseigneur le Duc de Guyēne, gouuerneurs de tout le Royaume. Et feut doné au dict Duc de Bretagne par leur conseil vn cheual d'or, esmaillé de blāc, lequel auoit la selle, la bride, & le harnois, tout couuert de pierrerie, qui valloit cinquante mille escus d'or.

En ce temps, enuoia le Roy deuers le Comte d'Armaignac, Messire Enguerrand de Marcongnēt, & Maistre Guillaume de Champeaulx, en Ambassade, en luy faisant ſçauoir, que pour la puissance, prudence, & vaillāce qu'il auoit, le Roy vouloit qu'il feust son Connestable, & qu'il luy pleuſt recepuoir l'espée, & accepter le dict Office. Et ſi feut il. Et tost apres veint à Paris à grand compaignée de gens d'armes, pour reſiſter, & mener guerre comme Connestable aux Anglois, qui tenoient Harſieu.

En celuy an, le Duc de Bourgongne, feut moult grāde armée, & veint en la ville de Troyes en Chāpaigne. Et estoit courrou-

cé de ses deux freres , que les Anglois auoiet occis en bataille. 1413.
 Et pource que le Roy s'emerveilla , de ce qu'il faisoit si grosse armée, luy enuoia de Roüen Messire Regnault d'Engennes, & Messire Ieā de Malestroit, Euesque de S. Brieu , pour luy faire sçauoir de par le Roy, que s'il vouloit aller sur les Anglois, que le Roy estoit content de luy bailler le gouuernemēt de Picardie. Et il respondit aux Ambassadeurs , qu'il vouloit parler au Roy, & à Mōseigneur de Guyēne, son fils, lequel auoit espousé sa fille. Dōt le Roy, & Mōseigneur le Duc de Guyēne, ne feurēt pas contēts, pource qu'il venoit à main armée deuers Paris. Et manderent le Roy, & son aîné fils par lētres, aux bōnes villes, & passaiges d'étour Paris, que nul ne feist ouuerture. Et ce nonobstant ceux de Laigny , le meirent dedans leur ville. Et là feut sa personne en Brie, & en France, depuis la Saint Martin d'hyuer, iusques à Careme prenant.

Et enuiron Noël, alla de vie à trespas Mōseigneur de Guyēne, & feut enterré à nostre Dame de Paris, deuāt le maistre autel à dextre. Et demurerent le Côte d'Armaignac, & Messire Tanneguy du Chastel, Preuost de Paris, à la garde de la ville de Paris. Et feut fait Capitaine d'icelle, le fils du Roy, nommé Charles, Comte de Pōthieu. Et lors feut enuoie Ambassade deuers le Côte de Hainault , qu'il voulust faire venir Monseigneur le Dauphin Iean à Paris, pour aider à gouuerner le Royaume, & possession de la Seigneurie, comme aîné fils du Roy, & l'on le receuroit benignement & volōtiers. Pourueu que le Duc de Bourgogne, ne feust en sa compaignée , pource qu'il tendoit tousiours à auoir le gouuernement du Royaume.

L'an mille quatre cents & seize, veint l'Empereur Sigismōd 1416. à Paris, & le festoia moult grandement le Duc de Berry, qui estoit son oncle. Et de là alla en Angleterre le diēt Empereur, pour cuider trouuer aucun bon appointement de paix entre le Roy de France, & le Roy d'Angleterre.

En ce temps mourut le Duc Iean de Berry, en l'aage de septante six ans, & feut enterré en la chappelle de son Palais, à Bourges. Laquelle chappelle il feut faire en son viuant. Iceluy Duc feut vn noble Prince, & large, & habandonné, & saige à tout le monde, & en especial aux estrangers.

En ce temps, le Côte d'Armaignac, Connestable de France, Messire Louys de Loingny, Mareschal de France, & le Vicōte de Narbonne, combattirent le Comte d'Orset, oncle du Roy.

1416. d'Angleterre à Vallemont en Caux, Mais à la fin le Comte d'Orset se sauua, & se meit en vn jardin, luy, & ses gens, lequel jardin estoit fermé de pals. Et feurent morts enuiron quatre cents Anglois, au commencement de la besongne. Le Comte d'Orset, & ses gens, s'en allerēt la nuit, par derriere le dict jardin. Et quand les François les apperceurent au matin, qui toute nuit auoient veillé deuant eulx, monterent à cheual, & les poursuuiurent à la file, sans attendre l'un l'autre, de peur que les dicts Anglois ne recourassent la ville. Et les François attendirent les Anglois, sur le bord de la mer pres de Harfieu. Si descendit le Mareschal de Loigny à pied, & les Anglois le attendirent en ordonnance, & y eut deux cents François morts par leur outraige. Le Conestable venoit après en grande ordonnance. Et quand les dicts Anglois le apperceurent, se retrahirent en la dicte ville de Harfieu. Le dict Mareschal se sauua, qui rencōtra le Conestable, lequel Conestable feut moult courroucé du dict oultraige, & du desfarroy, en quoy les dicts François s'estoient mis.

En ce temps, feut le Duc Guillaume de Bauiere en Angleterre, avec l'Empereur dessus nommé, qui estoit son parent, pour cuider faire paix. Si feurent en grand peril, pour les nouvelles que le Roy d'Angleterre eut de Vallemont. Et ne firent rien de bien deuers iceluy Roy d'Angleterre. Et feut le Duc de Bourgongne deuers luy, pour faire alliance: pource qu'il veoit que le Duc de Bauiere, son frere en loy, ne luy vouloit bailler le gouuernement de Monseigneur le Dauphin, & doubtoit qu'il ne voulust tenir le parti du Duc d'Orleans, alement contre de luy.

En ce temps, les François feurent desconfits à bouche de Seine deuant Honnefleu, & estoient dedans neuf carraques de Geneuois. Et estoient les chefs des François, le Vicomte de Narbonne, le Sire de Montenay, le Sire de Beauuau, & le bastard de Bourbon. Et estoient chefs des Anglois, le Duc de Bethfort, & le Duc de Clocestre, freres du Roy d'Angleterre. Les dicts Anglois gaignerent deux carraques, & en perit deux autres, & les cinq s'en allerent en Bretagne, & se sauuerēt dedans, trois des chefs des François. Et feut prins en vne des carraques le bastard de Bourbon. Et eurent grand blasme de celle perte Picquet de la Haye, general de France, & Maistre Regnier

gnier de Baullegny, qui estoient commis à payer les gens d'armes, & adaitailler l'armée. Car elles n'estoient pas chargées de gens d'armes à moitié. Et estoient encores, quand les Anglois veindrent, grande foison de gens d'armes sur la terre, par default de souldoyer, & de payement, & pource feut perdue l'armée.

En celuy an, au tēps de Carefme, mourut le Daulphin Iean, en la ville de Compiengne, qui feut vn tref-grand dommaige pour le Royaume de France. Car il estoit saige, & bien allié es Allemaignes, à cause de sa femme.

Et en celuy an, mourut au mois d'Aoust, le Roy de Sicile, en la ville d'Angers, & feut enterré en la grande Eglise du dict lieu.

L'an mille quatre cents & dixsept, Monseigneur le Daulphin Charles, qui parauant estoit nommé Comte de Ponthieu, se partit de Paris, & veint en la ville d'Angers, pour estre à l'obsequie du pere de sa femme, le Roy de Sicile, lequel estoit trespasé vn peu deuât. Et luy estant à Angers, eut nouuelles que ceux de la Cité de Roüen, festoient rebellez, & auoient mis le siege deuânt le chastel de la dicte Cité, & tué le Baillif, nommé Raoul de Gaucourt, en la dicte ville, où estoit dedans le chastel, Capitaine, Messire Iean de Bourbon, Seigneur de Preaux. Et ces nouuelles sçeües, partit d'Angers, mon dict Seigneur le Daulphin, & veint en la Cité de Chartres. Et là eut nouuelles que le Sire de Chastellus, Maistre Guy de Bar, le Comte de Ioinigny & plusieurs autres grāds Seigneurs du pays de Bourgongne, avec eulx grand nombre de gens d'armes, estoient venus mestre le siege deuânt le chastel de Saint Florentin. Si enuoia mon dict Seigneur le Daulphin, Messire Guy de Torsfay, Maistre des arbalestriers de France, & Seneschal de Poictou, & le Sire de Gaulles, Marechal du Duc d'Orleans, Messire Guillaume Bataille, Guillaume d'Auaugour, & plusieurs autres, accompagnez de sept cents hommes d'armes, & de mille arbalestriers, lesquels veindrent à Saint Florentin, & trouuerēt que les bourgeois de la dicte ville, auoient bouté dedans les Bourguignons. Si tirerent leurs gens dehors du chastel, & se retrahit la puissance des dicts Bourguignōs dedans la ville, parquoy ils ne les peurent auoir. Si laisserent homme agreable aux deux parties, vn nommé Pierre le Varat dedans le chastel. Et quand

Y y y

1417. ceux de Roüen, veirent la puissance, que mon dict Seigneur le Daulphin, auoit amené deuant la dicté Cité, ils se mirent en son obeissance, & s'excuserent, en disant, que pour les grandes extortions que leur auoient faict les gens d'armes du Roy, qui estoient és garnisons au pays de Caux, ils festoient rebellez. Et en estoit principalement cause vn nommé Iean Raoulet, Capitaine, tenât le parti du Roy, pour les extortions qu'ils faisoient au peuple. Le Roy leur pardonna, & leur feut baillé pour Capitaine, & gouuerneur de la ville & chastel, le Comte d'Aumalle, avec plusieurs grands Seigneurs du pays de Normandie.

Et lors mon dict Seigneur le Daulphin, ouit nouuelles que le Roy d'Angleterre estoit descendu à Touque, & auoiet desja mis les Anglois le siege deuant le chastel de Touque, lequel chastel feut rendu tresmeschamment. Car il estoit l'un des plus forts chasteaux du pays de Normandie.

Et eut mon dict Seigneur le Daulphin pareillement nouuelles, que le Duc de Bourgongne venoit à grand puissance deuant Paris. Si eut conseil mon dict Seigneur le Daulphin, sçauoir s'il demeureroit à Roüen, pour resister au Roy d'Angleterre, ou s'il iroit garder Paris contre le Duc de Bourgongne. Et feut deliberé que pour le mieux s'en iroit à Paris, & si feut il. Et tost apres que Monseigneur le Daulphin feut entré à Paris, veint le Duc de Bourgongne deuant, & feut logé à Vanues, & au bourg la Roynie du costé deuers Môtlehery, à tout grande quantité de gēs d'armes, & de traict, & y feut trois semaines sans en partir. Et estoient en la ville de Paris, le Comte d'Armaignac, le Vicomte de Narbonne, Táneguy du Chastel, Preuost de Paris, le Sire de Harpajon, le Sire de Seuerac, Raymonnet de la Guerre, & grand compaignée de gens d'armes, qui faisoient tous les jours grandes faillies, & grandes escarmouches, les vns sur les autres. Et de là se partit le Duc de Bourgongne, & alla mestre le siege à Montlehery, & le preint par composition. Puis s'en alla du costé de Gastinois, mestre le siege deuant vne ville, nommée le Puiset. Et estoient dedans icelle ville, le Sire de Barbazen, & Bertrand de la Tour, fils du Seigneur de la Tour d'Auuergne, accompagnez de belle compaignée de gens d'armes, lesquels se gouvernerent saagement à la garde de la dicté ville. Et tellement que le dict Duc

de Bourgongne, se leua de deuant la dicte ville, & s'en alla à Chartres, qui s'estoit rebellé contre le Roy. Et là feut tué le Sire de Iacqueuille, d'un Capitaine nommé Hector de Saueuses, & tiré hors du monstier de nostre Dame de Chartres.

En ceste saison, le Roy d'Angleterre preint d'affault la ville de Caen, sur le Sire de Montenay. Et meit le siege à Falaise, où estoit dedans vn cheualier de Bretagne, nommé Messire Oliuier de Maigny, & en la fin la preint. Et preint Saint Lo, Bayeux, & plusieurs autres villes & chasteaux.

En celuy an, le second jour de Nouembre, arriua le Duc de Bourgongne, à l'Abbaye de Meremonstier, pres de Tours, lequel estoit venu jour & nuict de Chartres. Et dedans le monstier trouua la Roynie, laquelle l'auoit mandé, pource qu'elle s'en vouloit aller avec luy, pour le desplaisir qu'elle disoit que le Comte d'Armaignac, & autres Officiers du Roy, & de Monseigneur le Daulphin, luy auoient fait. Et feut prins des gens du dict Duc, le Châcellier de la Roynie, nommé Maistre Guillaume Tauceau dedans la dicte Eglise, & Maistre Jean le Picart, son Secretaire. Et feurent mis à moult grande finance, laquelle ils payerent en la fin. Et feut moult contête la Roynie, qu'ils feussent prins, pource qu'ils auoient decelé ses thresors, si comme elle disoit, lesquels le Comte d'Armaignac, le President de Prouence, nommé Messire Jean Louuet, & autres, auoient prins en certains monstiers, où les dicts thresors estoient. Et par le vouloir de ceux de la Cité de Tours, baillerent obeissance au dict Duc de Bourgongne de la ville de Tours, en laquelle il meit en garnison, vn Capitaine Breton, nommé Labbé. Le chastel se teint vn jour seulement pour le Roy, que tenoit, & en estoit Capitaine, Messire Jean de Viuonne, Seigneur de Mortemain, lequel estant dedans le chastel, le rendit honteusement, dont il feut moult blasmé. Le Duc de Bourgongne laissa grosse garnison à Tours, à Rochecorbon, à Bois, à Cormery, à Precigny, & à Asay sur Indre, & emmena la Roynie à Chartres. Et peu de temps après, se partit de Chartres, & preint son chemin droict à Ioinigny, & emmena la Roynie avec luy, & Madame Catherine, fille du Roy, & de la Roynie. Le Comte d'Armaignac sceut son partement, & le poursuiuit à tout quinze cents lances, jusques à Ioinigny.

Y y ij

1417. Mais il ne peut passer outre, pour la riuere d'Yonne, qui est oir grosse, & ainsi s'en retourna sans luy porter dommaige.

Et incontinent le Preuost de Paris, nommé Tanneguy du Chastel, & ceux de la ville de Paris, allèrent mestre le siege deuant la Cité de Sens, qui se tenoit pour le Duc de Bourgongne. Et estoit chef des gens d'armes de la ville, le bastard de Tient. Si preindrent ceux de la ville composition, de rendre la dicte ville, & de ce baillerent ostaiges. Et le jour qu'ils la debuoient rendre, veindrent nouuelles à ceux de la dicte ville, que leur secours venoit. Et pource que ce jour, ne rendirent la dicte ville, feurent couppées les testes à leurs ostaiges, & ainsi s'en vindrent le Roy & son Ost à Paris. Et lors partit le Preuost de Paris, nommé Tanneguy du Chastel, & alla à Cheureuse, & luy, & ses gens, preindrent la ville, & la pillerent ses gens d'armes. Mais ils ne peurent prendre le chastel, & s'en retournerent à Paris.

En ce temps, feut Pape Martin, qui estoit du lignaige de ceux de la Coulombe de Rome, & du propre nom. Et feut fait à Constance en Allemagne celuy qui feut appellé Pape Jean, Cardinal, & s'en alla à Florence, où il mourut peu de temps apres. Et là elleut sa sepulture, & sy feut mestre en la fin de ses jours, laquelle sepulture est toute de fin or.

En celuy an, conquist Languedoc le Prince d'Orenge pour le Duc de Bourgongne. Si se partit de Bourgongne le dict Prince à grande compaignée de gens d'armes, & vint passer par le pays de Lyonnois, & preint son chemin par le pays de Viennois, au long du Rhosne, & descendit jusques au pont S. Esprit, & le preint du gré de ceux de la ville. Et cependât Messire Regnauld de Chartres, Archeuesque de Rheims, & Messire Jean de Louis, Seigneur de la Roche, & de Vauuert, firent leur assemblée pour Monseigneur le Daulphin, des gentils hommes d'Auuergne, & de Viurets, pour resister alencontre du Prince d'Orenge. Mais auant qu'ils fussent prests, ne tous assemblez, le dict Prince eut conquis presque tout le pays de Languedoc, où la plus part. Et vint deuant la tour du pont de la Villeneuve les Auignon, & deuant le chastel de Beaucaire, laquelle tour, & chastel il ne peut auoir. Car ils se reindrent bien grandement & honnorablement pour mon dict Seigneur le Daulphin. Mais les villes & citez de tout le pays, se meirent.

en obeïſſance du dict Prince, pour le dict Duc de Bourgongne.

L'an mille quatre cents dixhuiſt, au mois de May, Meſſire 1418. Jean de Villiers, Seigneur de Liſle-adam, entra dedans Paris, en la faueur du Duc de Bourgongne. Et luy ouurit la porte vn nommé Perrinet le Clerc, vendeur de fer, qui demouroit au petit pont, lequel Clerc, auoit emblé les clefs de la diſte porte à ſon pere, par où ils entrerent. Et feut le Sire de Liſle-adam au milieu de la ville, auant que nul en ſçeust rien. Et en cheuauchant parmy la diſte ville, crioient les Bourguignons, & gens du dict Sire de Liſle-adam, la paix, la paix, bonnes gens, la paix, & Viue Bourgongne. Et ceux qui ſe tenoient du parti du Duc de Bourgongne, qui eſtoient de la ville, prenoient la croix de Sainſt André blanche, qu'ils portoient. Et plus alloient auant dedans la ville, & plus croiſſoient. Et ceux qui tenoient le parti du Duc d'Orleans, & de tous les autres Seigneurs du parti du Roy, ſ'enſuioient, & muſſoient par tout où ils pouuoient. Si ſçurent Monſeigneur le Daulphin, le Proueſt de Paris, & autres de ſa Maiſon, ces nouuelles, & ſe retrahirent dedans la baſtille Sainſt Antoine. Et lors iceluy Seigneur de Liſle-adam, veint en l'Hoſtel de Sainſt Paul, où eſtoït le Roy, & pluſieurs Officiers, qui eſtoient reuenus avec le Sire de Liſle-adam, leſquels auoient eſté Officiers du Roy, pendant le temps, que le Duc de Bourgongne l'auoit gouuerné, preindrent congnoiſſance au Roy, & le feirent monter à cheual, & le menerent parmy la ville de Paris. Car à celle heure, il n'eſtoit pas bien ſenſible, & eurent tout le cōmun pour eulx. Et preindrent és maiſons les Seigneurs & bourgeois qui demouroient en la ville, & en eſpecial ceux qui aimoient le Roy, & ſon fils, & Monſeigneur d'Orleans, & en tuerent moult, c'eſt à ſçauoir, le Comte d'Armaignac, Maïſtre Henry de Marle, Chancellier de France, le Comte de Grand pré, & pluſieurs autres Prelats, Barons, cheualiers, & eſcuiers, bourgeois, & marchands, qu'ils pillerēt, & les tuerent parmy les priſons de Paris, où ils les auoient mis neuf jours auant qu'ils feiſſent le meurtre, & le Duc de Bourgongne eſtant à Paris. Et eſtoient conduiſeurs de ceſte beſongne, & mal faiſt, le Sire de Liſle-adam, Meſſire Jean de Luxembourg, Meſſire Charles de Lás, Meſſire Claude de Chaſtellus, & Meſſire Guy de Bar. Et les faiſoiēt ſaillir par les fenestres, &

1418. par dessus les murs, par le bourreau de Paris, & vn tas de portefaiz, & de brigands des villaiges d'enuiron Paris. Et en firent bien noiez & tuez, jusques au nombre de trois mille. Car si vn homme eust esté hay, pour parler du sien ou d'or, ou d'argent, que on luy eust deu, son ennemi le faisoit tuer en ce tēps, soubz ombre d'estre de la partie du Roy, & du Comte d'Armagnac. Incontinent qu'ils feurent entrez dedans la dicte ville, Monseigneur le Daulphin se partit d'icelle ville, & s'en alla à Melun. Et manda tous ses gens d'armes, de ceux qu'il peut trouuer entour luy. Si veindrent deuers luy Messire Pierre de Rieux, Marechal de France, le Sire de Barbazen, & plusieurs autres Capitaines, & retournerent à Paris, & entrèrent par la bastille, cuidans recouurer la ville, & entrèrent les gens de mon dict Seigneur le Daulphin, par la grand rue de Saint Antoine, jusques à la porte baudoyer, & se boulerent par les maisons, cuidans les piller, & à ceste occasion perdirent à recouurer la dicte ville. Et pource s'en retourna mon dict Seigneur le Daulphin à Melun, & de là à Bourges. Et la femme de Monseigneur le Daulphin, fille du Roy de Sicile, se meit en l'Hostel de Bourbon, ayant grand peur des maux qui se faisoient parmy icelle ville. Mon dict Seigneur le Daulphin laissa ses gens d'armes à Meaux, à Melun, à Coussi, & à Guise, & en plusieurs lieux, & fortes places. Et en feut Capitaine Messire Tanneguy du Chastel, & Lieutenant de par Monseigneur le Daulphin de tous les pays de France, de Champagne, de Brie, & de outre la riuere de Seine.

En ce temps, enuoia mon dict Seigneur le Daulphin au Comte de Foix, le gouuernement du pays de Languedoc, que tenoit pour le Duc de Bourgongne, le Prince d'Orenge. Si le accepta le dict Comte de Foix, & incontinent fit son armée, & assembla gens d'armes. Et fit à sçauoir à ses bons amis, qui demeuroient parmy les bonnes villes du pays de Languedoc, qu'il vouloit prendre leur gouuernement, & qu'il sceust leur volonté, & qu'ils luy aidassent à ce besoing. Et entra dedans le dict pays de Languedoc, à tout grande puissance de gens d'armes. Et mesmement ceux qui estoient au dict pays, & qui estoient avec le Prince d'Orenge, & qui en prenoient gaiges, se meirent avec le dict Comte. Et chassa le dict Comte le dict Prince jusques à la Cité de Nismes, où il laissa garnison, & au

pont Saint Esprit, & de là s'en alla en Bourgongne, en son pays. En ce temps, le Vicomte de Loumeigne en Languedoc, Lieutenant pour son pere le Comte d'Armaignac, incontinent qu'il sceut les nouuelles de la mort de son pere, & de la venue du Prince d'Orenge, desempara le dict pays de Languedoc, reserué le chastel de Pefenas, & celuy de Cabrieres, qui estoient deux fortes places, & la ville de Busel, que teint vn cheualier de Berry, nommé Messire Iean de Bonnay, lequel teint tousiours les dictes trois places pour mon dict Seigneur le Daulphin.

Auant que le Sire de Lisle-adam entraist à Paris, Messire Tanneguy du Chastel, auoit quatre cents hommes d'armes pour la garde d'icelle ville, toutesfois l'argent faillit pour les souldoier. Si feut fait vn Conseil des grands de Paris, riches, bourgeois, & marchands, que l'on feist vn prest d'un payement d'un mois, pour souldoier les dictes gens d'armes. Si feut dict, qu'ils n'en feroient rien. Et par ainsi partirent les dictes gens d'armes de Paris, & allerent viure au pays de Brye. Et à ceste occasion, le dict Sire de Lisle-adam, preint hardement d'entrer dedans Paris.

En ce temps, veint mon dict Seigneur le Daulphin mestre le siege à Sully sur Loire, pource que le Sire de la Trimouille, auoit prins l'Euesque de Clermont, qui s'estoit eschappé de Paris. Lequel Euesque feut deliuré, & ainsi se leua le siege de Sully. Et de là veint mon dict Seigneur le Daulphin à Tours, que tenoit le Duc de Bourgongne, & y meit le siege. Et en estoit Capitaine, & tenoit la ville vn Breton, nommé Charles Labbé, à grands gens d'armes. Et estoient avec mon dict Seigneur le Daulphin au siege le Comte de Vertus, le Sire de Laigle, Messire Pierre de Rieux, Marechal de France, Monseigneur de Barbazen, Messire Iean de Torssay, Maître des arbalestriers de France, & Messire Iean des Croix.

En ceste saison, le Duc de Bourgongne, emmena le Roy, & la Roynne, & Madame leur fille Catherine, à Troyes en Champagne.

En ce temps, le Duc de Bretagne vint à Paris par deuers le Duc de Bourgongne, qui estoit fort son ami. Et feit tant enuers luy, qu'il deliura Madame la Daulphine, & la

1418. amena par deuers son mari à Saumur.

Monseigneur le Daulphin, print la ville de Tours. Et s'en alla le Capitaine en Bretagne, luy, & ses gens, & ceux de la dicte ville demurerent en leurs hostels, sans rien perdre.

En ce temps, vn escuier de Gascongne, nommé Pierre de Xaintrailles, tenoit la ville & chastel de Couffi pour le Roy, & pour Monseigneur d'Orleans. Et auoit en sa compaignée cent lances pour la garde de la place, & pour faire guerre és pays d'enuiron, contraires & rebelles au Roy. Ce dict Capitaine, feut trahi par vne chambriere qu'il auoit, qui estoit du pays, laquelle s'accointa d'un prisonnier, qui estoit en la grosse tour du chastel de Couffi, lequel elle congnoissoit, pource qu'ils estoient d'un pays, & d'une ville. Et promet le dict prisonnier de espouser la dicte chambriere, si elle le pouuoit jecter hors. Et à vn soir, que le Capitaine son maistre feut couché, la dicte chambriere preint les clefs au cheuet de son liêt, & veint ouvrir la porte de la grosse tour, pour mestre hors seulement le dict prisonnier. Et avec luy faillirent, & veindrent beaucoup d'autres, & coupperent la gorge au dict Capitaine, & tuerent tous ses seruiteurs, qui estoient leans. Et ainsi feurent seigneurs & maistres du dict chastel de Couffi, & de la dicte grosse tour. Et incontinent iceux prisonniers, qui auoient conquesté la dicte grosse tour & place, par les moyens dessus dicts, enuoierent deuers Messire Jean de Luxembourg, qui tenoit leur parti, querir leur secours, lequel estoit au pays de Vermandois. Les dicts prisonniers gaignerent en argent monnoié dedans la dicte tour, en la chambre du Capitaine, de son argent, & des gentilshommes de sa compaignée, cent mille escus d'or. Et quand veint au matin, si apperceurent les gens d'armes, que la place estoit perduë. Si monterent tous à cheual, & se retrahirent à Montaigu, & à Guise. Et feirent deux Capitaines de deux gentilshommes, l'un, nommé Estienne de Vignolles, dict la Hire, & l'autre Poton de Xaintrailles. Lesquels Capitaines ont fait depuis grands exercites de gens d'armes par le Royaume de France, tant que la guerre y ha duré.

Peu de temps apres, deuant la porte du dict lieu de Couffi, les dicts la Hire, & Poton de Xaintrailles, veindrent avec leurs gens d'armes, jusques pres de Soissons, & desconfirent le Sire de Longueual, & quatre cents hommes d'armes, qu'il auoit en
sa com

sa compaignée. Et les François n'estoient que quarante lances, 1418. lesquels ne espargnoient ne leurs corps, ne leurs cheuaux. Et estoient la plus part Gascons, qui sont bons cheuaucheurs, & hardis.

En celuy an, les dicts Poton, & la Hire, se partirent de Guise, & de Montagu en Laonnois, pres de nostre Dame de liesse, où ils trouuerent Hector de Saeuses, & frapperent sur luy, & le destroufferent, & desconfirent, & auoit en sa compaignée mille combatans. Les François Gascons, estoient montez sur bons, & forts cheuaux vistes, & bons à la main. Et pource abbatoyent & tomboient tout ce qu'ils trouuoient à eulx contraire. Et doibt l'on sçauoir, que le mestier des armes se doibt apprendre. Car quand les Anglois veindrent en France, les François ne sçauoient rien de la guerre. Mais par longuement apprendre, ils sont deuenus maîtres, & en la fin ont deffaict les Anglois, & chassé hors de France.

L'an mille quatre cents dixneuf, les Anglois preindrent la ville de Pontoise, dont estoit Capitaine le Sire de Lisle-adam, & la preindrent d'eschelle. Et y estoit à la prendre en personne, le Duc de Clarence, frere du Roy d'Angleterre.

Et peu de temps apres, se assemblerent Monseigneur le Daulphin, & le Duc de Bourgongne, à moult grand peine. Pource que les vns des Conseillers du Duc de Bourgongne, estoient d'opinion, & conseilloyent de mettre le Roy de France, & la Roynes, en la main du Roy d'Angleterre, & qu'il se aliaist avec luy. Les autres estoient d'opinion, qu'il se aliaist avec Monseigneur le Daulphin, & luy remeist en ses mains le Roy son pere, & la Roynes sa mere, lesquels estoient à Troyes, & sa sœur Madame Catherine. Toutesfois par le conseil de Madame de Giac, & du Seigneur de Giac, son fils, de Philippes Iosequin, & de Messire Jean de Tholégeon, Mareschal de Bourgongne, vint le Duc de Bourgongne, de Pontoise, où il estoit allé parlementer au Roy d'Angleterre, à Corbeil. Et preindrēt journée de venir à la fontaine du Pinot, à vne lieüe de Melun. Monseigneur le Daulphin, & ceux de sa compaignée feurent à la dictē fontaine, & parlerent & preindrent iournée ensemble à Monstereau, à vn iour qui estoit dict, pour traicter plus amplement ensemble des besongnes du Royaume.

Celuy an, preint & assiegea le Roy d'Angleterre Roien, en

Z z z

1419. la saison nouuelle. Et y demeura par l'espace de six ou sept mois deuant la ville. Et sy gouuernerent moult grandement ceux de la dicte ville, gens d'armes, & commun, & tellement qu'il y en eut, qui mangerent les rats, auant que eulx rendre, de ceux d'icelle ville. Et les dictz gens d'armes, feurent tres-grandement deceus. Car ils cuidoiēt, pource qu'ils tenoiēt le parti du Duc de Bourgogne, qu'il les deust secourir, dont il ne fait rien. Et Monseigneur le Daulphin, ne les pouuoit secourir, pource qu'il auoit assez à faire de tenir ses gens d'armes es garnisons, contre le Duc de Bourgogne, & ses gens. Et aussi que les Anglois tenoiēt tous les passaiges de dessus Seine, depuis Paris en bas. Et aussi ceux de la dicte ville, auoiēt fait vne grand faulte. Car ils auoiēt bouté hors leur Capitaine & gouuerneur, qui estoit au chastel du dict Roien, nommé le Comte d'Aumalle, & aussi grand partie des grands Seigneurs de Normendie, lesquels feurent mis hors de la dicte Cité, en faueur du Duc de Bourgogne. Si meirent hors les dessus dictz, pour y bouter vn pauvre cheualier, nommé Messire Guy le Bouteiller. Parquoy la noble Cité, & le peuple qui dedas estoit, feut petitement soustenüe, confortée, & aidée. Et ainsi feut la dicte Cité perdue & conquisse au Roy d'Angleterre.

Puis apres se asssemblerent mon dict Seigneur le Daulphin, & le dict Duc de Bourgogne, à Monstereau, où fault Yonne, à vn Dimanche. Et parauant par la deliberation du Conseil feut ordonné, que mon dict Seigneur le Daulphin, laisseroit le chastel du dict Mōstereau, & le bailleroit au dict Duc de Bourgogne, pour la seureté de sa personne, & il bailleroit en ce lieu à mon dict Seigneur le Daulphin, les chastel, & ville de Moret. Et la dicte ville de Monstereau, demeureroit à mon dict Seigneur le Daulphin. Parmy ce qu'il y demeureroit le pont leué de dessus le bout du pont, afin que si aucun debat fourdoit entre aucuns des gens des dictes parties, que l'un ne peust nuire à l'autre. Et sur le pont, à l'aduantage d'un chascun des dictes parties, seroit fait vn parquet de bois, où entreroiēt de chascun costé avec les dictz Seigneurs, dix personnes notables. Et ainsi feut conclud, & ordonné par les dictz Seigneurs, & leur Conseil, & feut ainsi fait. Neantmōings quād ils feurēt tous dedans, ainsi que conclud auoit esté, par la deliberation dessus dicte, Ils eurent debat entre eulx, & là feut tué le Duc

de Bourgongne. L'effroy feut grand, & y eut vne partie des Seigneurs qui estoient avec eulx, prins, & aucuns autres s'enfuirent & eschapperent. Les vns s'enfuirēt à Bray, & les autres à Troyes, & les autres se retrahirent dedans le chastel du dict Monstereau, & tost apres, rendirent le dict chastel, leurs corps, & biēs saufs. La Dame de Giac, son fils, & Philippes Iossequin, quand ils veirent ceste hideuse besongne, se bouterent avec mon dict Seigneur le Daulphin. Doubtans que fils se feussent retraits avec les gens du Duc de Bourgongne, que l'on les eust occis, pource qu'ils auoient conseillé le dict Duc, & requirerent de faire paix & alliance avec mon dict Seigneur le Daulphin, en rompant l'opinion de ceux qui conseilloyent que le dict Duc se alliait aux Anglois. Lesquels Dame de Giac, sō fils, & le dict Philippes, n'eussent jamais consenti à la mort de leur dict maistre, & en feurent deceus. Et quand le fils du Duc de Bourgongne, sceut la mort de son pere, & ceux de Paris, qui vendrent deuers luy, & qui tenoient les Offices du Royāme, de peur qu'ils ne les perdissent, regardans & craignans la fureur de mon dict Seigneur le Daulphin, conseillèrent au ieune Duc, qu'il se alliait au Roy d'Angleterre, & si feit il. Car il luy meit en ses mains le Roy Charles, la Royne, & sa fillē. Et preint le Roy d'Angleterre la fille du Roy, sœur de mon dict Seigneur le Daulphin à femme. Et outre meit en son obeissance, & luy bailla Paris, & toutes les autres Citez, villes, pays, & chasteaux, qui estoient nüement au Roy, es pays de Frāce, Champagne, Brie, Vermandois, & Bourgongne. Dont il auoit seize Citez, lesquelles Citez, & pays, son pere le Duc de Bourgongne, auoit osté des mains de l'aisné fils du Roy, durant les diuisions deuant dictes, soubz ombre de faire entendre au peuple, qu'il les tiēdroit francs de payer impositiōs, gabelles, & autres subides. Et à ceste occasion se tournerent de sa part, & feirent par ce moyen leurs alliances. Et feurent les nopces à Troyes en Champagne, du Roy d'Angleterre, & de la fille de France.

En ce temps, alla Monseigneur le Daulphin en Languedoc, & meit le pays en son obeissance, & meit hors le Côte de Foix, lequel estoit gouuerneur du dict pays de par luy. Mais il ne vouloit bailler ou faire bailler nuls deniers du dit pays au dict Monseigneur le Daulphin. Si y alla accompagné du Comté d'Armaignac, & de plusieurs grands Seigneurs du Royaume,

1419. & aussi des Escossois, qui estoient nouuellement venus en France. Et pource desappointa le Comte de Foix, & vint par au long du pays de Languedoc, & meit le siege à Nismes, & au pont Saint Esprit, que tenoient certains gens d'armes, qui estoient au Prince d'Orenge, lequel auoit esté Gouverneur en l'an mille quatre cents & dixsept du dict pays de Languedoc, pour le Duc de Bourgongne. Si preint mon dict Seigneur le Daulphin ces deux villes, & y feurent morts & perdus partie des gens d'armes, qui tenoient les dictes villes pour le dict Prince. Et fen retourna mon dict Seigneur le Daulphin, en ses pays de Berry, & de Touraine. Et laissa le gouuernement du dict Languedoc, à Charles de Bourbon, Comte de Clermont, qui assiegea, & preint la Cité de Besiers, que tenoient les gens du Comte de Foix.

1420. L'an mille quatre cents & vingt, partit le Roy d'Angleterre de la ville de Troyes, & le Duc de Bourgongne avec luy. Et emmenerent avec eulx le Roy d'Escoffe, lequel estoit lors prisonnier du Roy d'Angleterre, & en intencion que les Escossois, qui estoient avec Monseigneur le Daulphin, se retournassent avec leur Roy, ou au moins qu'ils ne se armassent contre luy. Mais pour leur Roy ils ne firent rien: ains seruirent tousiours Monseigneur le Daulphin.

Le Roy d'Angleterre, & le Duc de Bourgongne, veindrent mettre le siege deuant la Cité de Sens. Et la preindrent sur vn cheualier, nommé le Sire de Guitry, qui en auoit le gouuernement pour mon dict Seigneur le Daulphin.

Et de là veindrent deuant Moret, & la preindrent, & ny trouuerent personne, que vn escuier nommé Denys de Chailly, qui estoit du pays, & en estoit Capitaine, lequel la laissa, & fen vint à Melun, dont il feut fort blasmé. Car s'il l'eust tant soit peu tenu, la ville de Melun eust esté mieux aduitaillée, qu'elle ne feut.

Puis veindrent mettre le siege deuant Monstereau, où estoit le Sire de Guitry. Et à la fin le preindrent, & fen vint luy, & ses gens, son corps, & ses biens saufs.

Et de là fen veindrent les dicts Anglois, & Bourguignons deuant Melu, du costé de la forest de bieuze. Et le Duc de Bourgongne, feut logé du costé de la Brie, au mont Saint Pere. Et estoit dedans la ville le Sire de Barbazen, lequel estoit accom-

paigné de plusieurs Capitaines. Luy, & eulx, se gouvernerent si grandement, & honnorablement à la garde de la dicte ville, que l'on ne pourroit mieulx. A l'aide des Anglois, veint le Duc rouge de Bauiere, qui auoit espousé la sœur du Roy d'Angleterre, & enuoia deffier Monseigneur le Daulphin, lequel estoit son parent, de par la Royne sa mere. Et aussi veint à l'aide du Duc de Bourgongne, le Prince d'Orenge, lequel Prince s'en retourna durant le siege: pource que le Roy d'Angleterre, luy voulut faire faire hommaige & serment. Et pource que le dict Prince, n'estoit pas homme du Roy de France, dont le dict Roy d'Angleterre, se disoit Roy indeüement en plusieurs manieres, disoit le dict Prince, qu'il n'estoit pas homme du Roy de France, ne du Roy d'Angleterre. Et s'en alla en son pays, pour ceste cause. A la fin, fallut qu'ils eussent la dicte ville de Melun, & l'eurent par composition, pource que ceux du dict Melun n'auoient que mager. Par maniere telle, que tous ceux qui auoient esté consentans de la mort du Duc de Bourgongne Iean trespasé, seroient prins & reseruez du traicté de la dicte ville. Qui feut vne merueilleuse chose, & cautelement faite aux Anglois, & Bourguignons, & simplement & innocemment à ceux de dedans la ville. Neantmoins ils rendirent la ville, cuidans vn chascun estre deliuré de la mort, du Duc de Bourgongne. Si en preindrent, & reseruerēt les dictz Anglois, & Bourguignons, ceux qu'ils voulurent, & mesmement le dict Sieur de Barbazen, & autres Capitaines, bourgeois, & autres gens de la dicte ville. Et les menerent à Paris, & condamnerent ceux d'icelle ville de Melun, à payer vne grande somme de deniers au Roy d'Angleterre, & à refaire à leurs despens la muraille du dict lieu. Et pource Emenyon de Loyer, le bastard de Bar, & le bastard Senetaire, oyans ces nouuelles, que nul traicté n'estoit tenu, ne à ceux de la ville, ne au dict Barbazen, ne à nul autre des dictz Capitaines, & gens d'armes, si trouuerent maniere de eulx eschapper d'icelle ville, par le moyen d'un escuier Gascon, parent d'aucun d'eulx, lequel estoit mignot du Roy d'Angleterre. Si sceut le dict Roy d'Angleterre, que iceluy mignot auoit sauué iceux Capitaines, & pource luy fait couper la teste.

Celuy an iceluy Roy d'Angleterre, meit le siege à Meaulx. Et estoit dedans Capitaine principal le bastard de Vaurus, avec

1420. plusieurs Capitaines, Et cependant cuida entrer dedans la dict^e ville le Sire d'Offemont, bien, & grandement accompaigné de gens d'armes, Et en eulx cuidant entrer dedans, pour sauuer ceux d'icelle ville, feut prins des Anglois. Les vns de ses gens entrerent, les autres s'en retournerēt par le chemin qu'ils estoient venus. Et quand ceux de la dict^e ville, veirent ceste chose, & que secours ne pouuoient auoir autre, se deuiferent entre eulx. Parquoy la place se meit en composition. Parmy ce que tous les Capitaines, qui estoient dedans la place, s'en iroiet sauement, reserué le bastard de Vaurus, & son Lieutenant, lesquels deux, le Roy d'Angleterre fait pendre à vn arbre, au dessus de la ville de Meaulx, sur le grand chemin de Paris.

Et delà s'en alla le dict Roy en son Royaume d'Angleterre, & emmena sa femme, qui là accoucha d'un fils, nommé Henry.

Et en ce temps, le Comte de Penthieure, preint le Duc de Bretagne.

1421. L'an mille quatre cents vingt & vn, le Duc de Clarence, & plusieurs autres grands Seigneurs d'Angleterre, partirent de Normendie, & veindrent au pays d'Anjou, & porterent la bataille deuant Angers, & de là s'en allerent loger à Beaufort en Vallée. Si se assemblerent les François, & Escossois, en vn villaige nommé Baugé en vallée. Les Anglois preindrent en allant au fourraige quatre Escossois, lesquels ils menerent deuers le Duc de Clarence, frere du Roy d'Angleterre, qui estoit chef de l'armée. Lequel Duc, leur demanda des nouuelles en Anglois. Et ils luy compterent que les Comtes de Boucquam, & de Vuiton, & le Sire d'Eruelle, du pays d'Ecosse, avec grād foison d'Ecossois, estoient logez à Baugé. Et des François y estoient le Vicomte de Narbonne, le Marechal de la Fayette, le Sire de Fontaines, & autres Seigneurs François. Et incontinent ces nouuelles oüies, se leua de table le dict Duc de Clarence, en disant, Allons leur courre sus, ils sont nostres, & qu'il ne vienne avec nous que les hommes d'armes. Et cheuaucherent tant le dict Duc de Clarence, & ses gens d'armes, qu'ils veindrent en vn lieu, que l'où dict le petit Baugé, où ils trouuerent vn cheualier, nommé Messire Jean des Croix. Si monterēt luy & ses gens sur le clocher de l'Eglise du dict lieu, & se defendi-

rent de pierres, & bouterēt leurs cheuaux dedans la dictē Eglise, & fermerent les portes d'icelle, de huches, & de coffres. Et cependant les François & les Escossois, qui estoient au grand Baugé, le sçurent, & se meirent en ordonnance. Et quand les Anglois veirent qu'ils demeueroient trop à prendre ceux du dict monstier, se partirent pour aller combattre les autres, & les trouuerent en bonne ordonnance. Le dict Duc de Clarence vint deuant sa bataille, vn chapeau de fer en sa teste, & dessus vn chapeau d'or, & de pierrerie, moult riche. Lequel Duc de Clarence feut le premier tué, & aussi le Comte de Kent, qui estoit vn vaillant cheualier, & le Sire de Grey, le Sire de Roos, & plusieurs autres grands Seigneurs & gens d'armes Anglois, feurent morts de quatorze à quinze cents en la place. Et y feurent prins les Comtes de Hontinton, & de Sommerset, & son frere, Messire Thomas de Beaufort, & plusieurs autres. Ceux qui peurent eschapper, s'en refuirent à Beaufort, & là trouuerent les archers, qui feurent moult esbahis de ces nouuelles. Et se partirent au point du iour en bonne ordonnance, Et allerent passer la riuere du Ler, pres de la Fleche, & feirent vn pont de charretes, attachées les vnes aux autres, & des huis par dessus, qu'ils auoient prins aux villaiges d'enuiron, & ainsi passerēt la dictē riuere les Comtes de Bouquan, & de Vuidon, & les autres Seigneurs François, qui cuidoient que les dicts Anglois deussent passer la riuere du Ler, vers le Lude. Et cependant les Anglois s'en allerent droict au Mans, pour gagner le passaige de Chartres, & si feirent ils. Car les premiers venus prindrent croix blanches, & veindrent au pont du Mans, dont les planches estoient abbatues, & crierent que l'on leur resist le dict pont, & que les Seigneurs de France venoient au Mans. Les bonnes gens les creurent, pensans qu'ils veinsent au deuant des Anglois, qui s'enfuoient, & leur reseirent le pont trefhastiement, Et ainsi passerent les dicts Anglois, et tuerent bien cent personnes des paaures gens, qui leur auoient fait le dict pont. Les François, qui sont saiges apres le fait, sçurent que les dicts Anglois estoiet passez la dictē riuere du Ler, dont ils feurēt bien courrougez, & cheuaucherent droict au Mans, pour cuider estre au deuant des dicts Anglois qui estoient ia en Normēdie. Et feut celle bataille, la veille de Pasques. Les gens de Monseigneur le Dauphin feurēt à Poitiers,

1421. le Lundy ensuiuant, lequel Monseigneur le Daulphin, feut moult joyeux de ces nouuelles.

1422. L'an mille quatre cents vingt & deux, se partit hastiuement Monseigneur de Daulphin de Poictiers, & veint à Tours. Et là fait le Comte de Bouquam d'Escoffe, Connestable de France. Et alla mon dict Seigneur le Daulphin au Mans, & preindrent les François le chastel de Montmirel, & la ville de Guillardô sur les Bourguignons, qui estoient alliez aux Anglois. Et apres celle prinse, s'en retourna mon dict Seigneur le Daulphin à Amboise sur Loire.

En ce temps, veint le Roy d'Angleterre de la mer, quand il sceut la mort & desconfiture de son frere, & de ceux de son Royaume, & grandement accompaigné veint mestre son siege à Dreux, & le print par composition sur le Sire de Stiffac, puis s'en veint à Vendosme, & de là à Baugency. Et feurent les gens de mon dict Seigneur le Daulphin au gué du Ler, pour resister alencontre des Anglois, qui estoient moult forts. Mais le Roy d'Angleterre ne les osa combattre, pource qu'ils estoier en place aduantageuse, & estoient aduitaillez de la ville de Vendosme, & les dicts Anglois mouroient de faim. Ainsi se partit du pays le dict Roy d'Angleterre, à tout son Ost, & veint au long de la riuere de Loire, & ses gens, mourans de faim, qui ne mangeoient que les herbes qu'ils trouuoient dedans les iardins. Si veint deuant vn chastel en Beausse, qu'on appelle Rougemont, lequel il print, & bouta le feu dedans, & fait pendre le Capitaine qui estoit dedans, lequel estoit Geneuois, & estoit Marquis du Guaret, & aussi fait pendre tous ses gens. Et de là preint son chemin par Beausse, pour tirer tout droict à Villeneuve le Roy sur Yonne, où il meit le siege, & la print. Et en s'en retournant du dict Villeneuve droict à Vendosme, perdit de famine & de mortalité bien quatre mille Anglois, & les trouuoit-on par les chemins, où ils estoient passez, tous morts, sans estre enterrez.

En ce temps, vn Seigneur de Forests, nommé le Sire de Rochebaron, lequel tenoit le parti du Duc de Bourgongne, amena au pays de Velay, le Sire de Saluonne, du pays de Sauoye, lequel auoit en sa compaignée huit cents hommes d'armes, Sauoisins, & Lombards. Les pays d'Auuergne, de Limosin, de Forests, de Velay, & d'enuiron, en feurent moult troublez. Si
se assem

se assemblerent les Seigneurs des dictz quatre pays, & le Comte de Perdrac, de qui ils feirent leur chef, Messire Imbert de Grolée, Baillif de Lyon, le Sire de Beau-chastel, & celui de la Fayette, à grand compaignée de gens d'armes. Le dict de Rochebaron, bouta ses gens d'armes, qu'il auoit amenez, en plusieurs places qu'il auoit és dictz pays. Or feut ainsi que Messire Bernard d'Armaignac, Comte de Perdrac, qui là feut fait Cheualier, & toute la compaignée dessus dicte, se partirent de la Cité du Puy, & se meirent aux champs, là où ils cuidoient trouuer leurs ennemis. Si les apperceurent venir, & se retrahirent tous en vne petite ville, nommée Seruerete. Et quand le dict Comte les veid, si eut conseil de presenter la bataille deuant la dicte ville. Et eux estans là, vn arbalestrier de la compaignee, se bouta en vn moulin pres de ladicte ville, cuidant y trouuer aucune chose. Si se aduifa de y bouter le feu, & le feu du dict moulin faillit dedans la dicte ville, & tellement que les Bourguignons qui estoient dedans, ne peurent faillir à temps. Et vne partie d'eux, & de leurs cheuaux, feurent ars & bruslez, & les autres, qui sauuer se pouuoient, se venoient rendre au Comte, & aux autres Seigneurs, pour auoir leurs vies sauues. Et quand les dictz Seigneurs de Rochebaron, & de Saluonne, veirent celle fortune, & leurs gens bruslez, morts, & peris, ils monterent sur bons cheuaux coursiers, & s'enfuirent par les montaignes droit à Rochebaron, & de là en Bourgongne. Le Comte, & les autres Seigneurs dessus dictz, prindrent le dict chastel de Rochebaron, & toutes les places, dont il auoit assez. Car il estoit grand Seigneur, & ainsi feut destruiet.

Celuy an feut assiegé Cosne des gés de M^oseigneur le Dauphin, & en feut chef le Vicomte de Narbonne, & le Sire de Torssay, Maistre des arbalestriers de France. Et preindrent ceux de la dicte ville, iour de la rendre, & baillèrent ostaiges de la rendre dedans vn iour, au cas qu'ils ne seroient secourus. Si partit le Roy d'Angleterre, pour y venir, & en la ville de Corbeil, accoucha malade de la maladie saint Fiacre, dont il mourut. Le Duc de Bethfort feut au dict Cosne à tout la puissance des Anglois, & le Duc de Bourgongne pareillement à tout sa puissance. Et pource qu'ils estoient trop forts, les François leur rendirent leurs ostaiges. Et quand les Ducs de Bethfort, & de Bourgongne veirent, que les François ne les voulurent com-

A A a a

1422. battre, ils cheuaucherent contremont la riuere de Loire, pour vouloir passer la dicte riuere, & entrer és pays de Berry. Les gens de Monseigneur le Daulphin le sçurent, qui estoient tous logez autour de Sancerre, & cheuaucherent contremont la dicte riuere, pareillement que les dicts Anglois, & Bourguignons, pour leur garder le passaige. Et auoient les dicts François & Escossois deliberé, que si les dicts Anglois & Bourguignons venoient pour passer, de les combattre sur le passaige. Les chefs des François estoient le Comte de Bouquam, d'Escosse, Connestable de France, fils du Duc d'Albanie, & le Comte de Vuieton, le Comte du Glas, Messire Tanneguy du Chastel, Preuost de Paris, le Vicomte de Narbonne, le Marechal de la Fayette, le Sire de la Tour d'Auvergne, le Sire de Torssay, & plusieurs autres grands Seigneurs d'Auvergne, de Berry, & de Bourbonnois.

Cependant eurent nouuelles en l'ost des Anglois, qui estoient logez à une lieue pres de l'ost des François, que le Roy d'Angleterre estoit mort au bois de Vincennes. Et pour ces nouuelles, se partirent Anglois, & Bourguignons, & s'en allerent chascun en leurs pays. Et pareillement l'ost des François en Berry, & en Auvergne.

Celuy an, au mois d'Octobre mourut le Roy de France, & feut porté enterrer à saint Denys.

En ce temps veindrent les Anglois deuant la Cité de Basas en Guyenne. Si se partirent le Sire d'Orual, & le Vicomte de Narbonne, & tous les autres grands Seigneurs de la Duché de Guyenne, pour secourir la dicte Cité. Et quand les dicts Anglois sçurent leur venue, se leuerent, & prindrent place. Et estoit toute la puissance de Bordelois, deuant la dicte place. Si estoient les deux parties fortes, & feirent traité, que icelle Cité se rendroit dedans trois mois ensuyuans, à ceux qui deuant se trouuoient les plus forts. Et ainsi departirent les François, & Anglois, & s'en retournerent chascun en leurs pays. Et au bout des dicts trois mois, icelle Cité feut Angloise, pource que les dicts François ne veindrent point à la dicte iournée.

En celuy an, feut la besongne de saint Riquier, où le Duc de Bourgongne, feut en personne.

1423. L'an mille quatre cents vingts & trois, enuoya le Roy apres la mort du Roy Charles son pere, Pregêt de Coictiuy, nepueu de Messire Tanneguy du Chastel, és pays de Champaigne, &

plusieurs Capitaines en sa compaignée, & gens de guerre. Et quand ils feurent és dicts pays, le Comte Marechal Sallebery, & Messire Iean de Luxembourg, se assemblerent, & meirent en chasse les François, iusques pres de la ville de Mouson, où ils se sauuerent. Et delibera le Roy d'enuoyer és dicts pays deuers eulx pour les reconforter, le Conestable des Escossois, Seigneur de Deruelle, le Sire d'Estissac, & autres, qui partirent du dict pays de Berry, & veindrent les Escossois passer à Gien sur Loire. Et là veindrēt nouuelles au dict Conestable, que aucuns des coueurs du bastard de la Baulme, qui auoit esté Bourguignon, auoient bouté dedans la ville de Creuāt le Sire de Chastellus, Messire Iean de Digonne, Messire Guy de Bar, & plusieurs autres, à vn matin. Et prindrēt les gés d'armes, qui estoient dedans la dicte ville pour le Roy, & les menerēt en ceps és fosses. Ces nouuelles sceües, le Cōestable d'Escoffe, parce qu'on luy donna à entendre, que la tour se tenoit pour les François, en feut deceu. Car des qu'ils preindrēt la dicte ville, icelle tour feut prinse, & gaignée. Et tantost s'en veint de belle tire le dict Conestable, par ce qu'on luy auoit donné à entendre, mettre le siege deuant la ville de Creuant. Et y feut moult longuement, pource qu'il veoit que la dicte ville estoit foible. Et enuoia plusieurs fois deuers le Roy, que on luy enuoiaist des canós, & des bōbardes, dont on ne fait riē, pource que l'on luy auoit cōmandé, qu'il s'en allast en Chāpaigne. Et il partit de la dicte ville de Gien, pour aller mettre le siege à Creuant. Ce que ne luy auoit pas esté commandé. Le Roy ouit nouuelles, que les Anglois, & Bourguignons, venoient pour leuer le siege. Si enuoia pour les recōforter le Seigneur de Seuerac, Marechal de France, à tout quatre cēts hommes d'armes Espaignols, & routiers. Les nouuelles veindrent en l'Hostel du Roy, que és frontieres de deuers le Mans, les Anglois alloient leuer le siege de deuant Creuant. Si vindrent au secours des François, & Escossois, le Comte de Vêradour, le sire de Fontaines, le Sire de Bellay, & le Sire de Gamaches. Ceux de dedās la place mouroient de faim, & mouroient leurs cheuaux. Si veindrēt le Côte de Salbery, & le Côte de Suffolc, Anglois, Messire Iean de Tholōgeon, Marechal de Bourgongne, les Sires de Villeby, & de Scalles, & plusieurs autres Seigneurs des pays de Bourgongne. Et veindrent les dicts Anglois & Bourguignons, deuant la dicte ville du costé de-

1423. Gastinois, & gaignerent la riuere d'Ionne, & frapperent sur les François, & gaignerent la iournée. Et là feurent prins le Connestable d'Escoffe, le Comte de Ventadour, le Sire de Bellay, le Sire de Gamaches, & plusieurs autres. Et y eut de mors le Sire de Fontaines, Messire Guillaume Hamelton, & plusieurs autres, iusques au nombre de huit cents à mille combatans. Le Mareschal de Seuerac, & Messire Richard de Leire, & plusieurs autres Capitaines François, Escoffois, & Espaignols, s'enfuirent, & laisserent les autres.

Assez tost apres, feut le Comte d'Aumalle au pays du Maine, qui sceut que le Sire de la Poulle, frere du Côte de Suffole, Cheualier Anglois, & mille Anglois en sa compaignée, estoient venus courre la Comté du Maine. Si les rencontra en vn lieu, que l'on dict la Grauelle. Et là le dict Comte d'Aumale desconfit les dicts Anglois. Et y feut prins le dict Messire Jean de la Poulle. Et y eut des Anglois morts, iusques à quatorze cents, sans la personne d'un Baron de Normendie, nommé le Baron de Collonches, lequel se y porta vaillamment. Et ferit à cheual par derriere sur les dicts Anglois, & feut cause de gaigner la bataille.

Celuy an, au quatriesme iour de Iuillet, iour de saint Martin, feut né Monseigneur le Daulphin en la Cité de Bourges, & feut baptisé en la grande Eglise metropolitaine, nommée S. Estienne. Et feut nommé Louys, & le teint sur les fonds le Duc Jean d'Alençon, & le baptisa Messire Guillaume de Champagneux, Euesque & Duc de Laon, & Per de France.

En ce temps, feut prins Messire Jean de Tholongeon, Mareschal de Bourgongne, deuant vn chastel en Beaujolois, nommé la Buffiere. Le dict Mareschal cuidoit entrer audit chastel, par le moyen d'aucuns de ceux de la place, qui la luy auoient vendu. Et pour doubte qu'il ne feust trompé, il feut tres-fort accompagné de gens d'armes : mais neantmoins il feut trompé, & prins. Car ceux qui marchaderent à luy, le feirent scauoir à Messire Imbert de Groslée, Baillif de Lyon, & Messire Louys de Cullant, Admiral de France, & à deux Cheualiers Lóbars, l'un nommé Messire Theaulde de Valpergue, & l'autre Messire Bourne Caqueren, lesquels veindrent accompagnez de cinq à six cents hommes d'armes, qui venoient droit de Lombardie, & feurent plus forts que luy, & le preindrent. Et en la

fin feut deliuré, en leur deliurant le Connestable d'Escoffe, 1423.
Seigneur de Deruelle, que le dict Mareschal auoit prins en la
bataille de Creuant.

L'an mille quatre cents vingt & quatre, descendit en Bretai- 1424.
gne, le Comte du Glas, du pais d'Escoffe, & l'Archeuesque de
Rheims, lequel estoit allé en Escoffe querir les Escoffois, & des-
cendirent de celle nation quatre mille combatans.

En ce temps, allerent deuers le Roy, Messire Theaulde de
Valpergue, Messire Bourne Cacqueren, & Messire Lucquin
Rus, lesquels luy amenerent de par le Duc de Milan, six cents
lances, & mille hommes à pied. Si veindrent és pays de Niuernois.
Et alla avec eux le Vicomte de Narbonne, avec grand
compagnée de gës d'armes, le Mareschal de la Fayette, & Mes-
sire Louys de Cullant, Admiral de France. Et preindrent le
Sire de Cuiſsi, & celuy de la Guierche.

En ce temps, meirent les Anglois le ſiege deuant le chasteſt
de Gaillardon, que tenoient les gens de Girault de la Pailliere,
lequel ils prindrent par composition. Et de là veindrēt les dictſ
Anglois, mettre le ſiege deuant le chasteſt & ville d'Iury, que
tenoit le dict Girault. Si enuoia deuers le Roy le dict Girault,
& auſſi y enuoia le Comte du Glas, qu'il les vouluſt ſecourir, &
qu'ils auoient prins composition de rendre la dictē place aux
dictſ Anglois, au cas qu'ils ne ſeroient ſecourus dedans vn iour
dict. Si conclud le dict Comte du Glas de leuer le ſiege. En ce
temps, ou peu deuant, luy donna le Roy la Duchē de Tourai-
ne. Et quand le Roy ſceut, que on ne les pouuoit ſecourir, ne
deſtourber de combattre les Anglois, il manda par tout ſon
Royaume tous ſes gës de guerre. Et partit de la Cité de Tours,
luy, & le Comte de Boucquam, Connestable de France, & al-
lerent à Chasteaudun, & là trouuerent le Vicomte de Narbon-
ne, le Côte d'Aumalle, & le Mareschal de la Fayette. Et là veint
le Duc d'Alençon, & pluſieurs autres grands Seigneurs. Si cō-
clurent de combattre les dictſ Anglois, & cheuaucherent iuf-
ques outre Chartres. Et là ſceurent de vrai que les Anglois
eſtoient fortifiez deuant Iury. Si cheuaucherent tant qu'ils
veindrent deuant Vernueil, & les gës d'icelle ville les meirent
dedans. Et quand les gens du dit chasteſt, veirent celle puissance
deuant eux, cuidans qu'ils euſſent deſconfit leurs gens deuant
Iury, rendirēt le chasteſt. Le Duc de Bethfort, qui eſtoit au ſiege

1424. deuant Iury , apres ce qu'il eut esté deuant le dict Iury, & qu'il eut tenu la iournée que les François debuoienc combattre , ou rendre la diète place d'Iury, sceut que la puissance du Roy de France, estoit deuant Vernueil, & alentour de la ville, si se mit en chemin le dict duc de Bethfort, pour là venir en grâde compaignée d'Anglois, & de Bourguignons. Iasoit ce que quand il partit de deuant le dict Iury, la plus part des Bourguignōs. qui estoient avec luy, s'en estoient retournez à Paris. Si cheuaucha tant luy & ses batailles, qu'il veint iusques à la Iustice du dict Vernueil. Et enuoia vn Herault dire au Duc de Touraine, Côte du Glas, qu'il venoit boire avec luy, & qu'il se voulust arrester, afin qu'ils beussent ensemble. Et le dict Duc de Touraine luy respondit, qu'il feust le tresbien venu, & qu'il estoit venu du Royaume d'Ecosse, pour le trouuer en France, pource qu'il ne le pouuoit trouuer en Anglaterre, & qu'il se voulust haster de venir. Si ordonnerent leurs batailles François & Anglois d'une part & d'autre. Et promptement marcha à pied le Vicomte de Narbonne, à toute sa bataille. Iasoit ce que le dict Duc de Touraine avec tous ses chefs de guerre, auoient conclud non aller combattre les Anglois : mais de les attendre en la place, où les François estoient pres de la ville. Et quand le dict Duc de Touraine, veid que le Vicomte de Narbonne marchoit, si feut moult courroucé. Et neantmoins fit marcher ses batailles comme le dict Vicomte, & ains qu'ils assemblassent aux Anglois, perdirent haleine, place, & ordonnance. Et les Anglois feirent au contraire. Car ils teindrent place, & les attendirent, dont ils eurent haleine, & teindrent bonne ordonnance. Les François ordonnerent deux mille hommes de cheual en deux batailles, pour frapper derriere en la bataille des dicts Anglois. Dont estoient conduiseurs de la bataille fenestre, Messire Bourne Cacqueran, Messire Theaulde de Valpergue, & Messire Lucquin Rus, Lombards. Et à la dextre, le Baron de Collonches, le Sire de Tyonuille, le Sire de Stiffac, Poton de Xaintrailles, & vn nommé le Roufin. Les dicts Anglois eurent peur des dicts Lombards de fenestre, qui veindrent derriere leur bataille, de peur d'estre morts des dicts Lombards, & les dicts Lombards apperceurent bien premier les dicts Anglois. Si s'enfuirent apres eulx, & laisserent leur ordonnance. Et quand les dicts Anglois veirent que pourfuir, ils estoient

morts, & perdus, ils se combatirent vigoureusement, & se teindrent ensemble tellement, qu'ils desconfirent les dicts François. Le dict Baron de Collonches, se partit luy, & ses gens, & s'en allerent de leur place. Car les Anglois auoient ia la victoire, & frapperent, & se meirent en debuoir de frapper. Et si frappa le dict Roufin le premier dedans leur bataille, & là feut tué, & trois de ses compaignons tournerent le dos, & s'en reueindrent. Ainsi feut la dicte bataille perdue, & chasserēt les François iusques à la ville de Vernueil, lesquels se cuiderēt retraire pour sauuer leur vie, & les tüerent, & chasserent iusques sur les fossez. Et y en eut de morts grād foison dedans les dicts fossez, cuidans entrer en la dicte ville par dessus les murs. Le Côte de Touraine, Comte du Glas, & la plus grand partie des Barōs & Seigneurs d'Escoffe, qui là estoiet, le Vicôte de Narbone, le Côte d'Aumalle, & plusieurs autres grāds Seigneurs François feurent morts en la place. Le Duc d'Alēcon, & le Mareschal de la raiette feurēt prins, & amenez deuāt la dicte ville, cuidās qu'el le se rendist: mais ils n'en feirent rien. Le Seigneur de Rābures, en estoit Capitaine, & estoient avec luy trois mille personnes, dont la plus part estoiet seruiteurs, & gens de petit faict. Si feit composition que les biēs, qui estoient aux chariots, & aux coffres des grands Seigneurs morts, & prins, demeureroient aux Anglois. Et luy, & tous ceux qui dedās estoient, s'en iroiēt chacun avec vn cheual, & leurs biēs, Les dicts Anglois entrerēt par la poterne du chastel du dict lieu, & monterent dedans la dicte ville de Vernueil, & leur osterent des meilleurs cheuaux de la cōpaignée. En disant, que les Lōbards auoiēt leurs cheuaux, & tuē leurs paiges, & n'estoiēt pas si vaillāts d'estre venus ferir sur eulx. Ainsi les François s'en faillirēt en ce desarroy. Et veint le Côte de Sallebery à la porte, qui sceut ce debat. Et ferit sur les Anglois qui desmontoiet les dicts François, & en tua vn ou deux, & ainsi feurēt desmeus. Et s'en retournerēt le Sire de Rābures, & les autres François, à tout leur saufconduit en Berry, & en Touraine. La dicte ville, s'estoit tenue deux iours apres la bataille. Et tost apres la desconfiture, retournerent les dicts Lōbards dedās le chāp, cuidās que les dicts François eussent gaigné la dicte bataille. Et trouuerēt les François morts tous nuds. Si les aperçeurēt les Anglois qui estoiet pres de la ville, lors se meirēt en sēble, & vein drēt courre sur les Lōbards qui estoiet à cheual,

1424. & ne peurent les dictz Lombards faillir du dit champ, pour vne petite riuere qui là estoit, sinon par vn petit passaige, où il ne pouuoit passer, que vn cheual à la fois. Si se meirent à passer ce petit passage, & laisserent leur estandart deuant les dictz Anglois, pour receuoir les coups, iusques à ce que tous leurs gens feussent passez. Et les Anglois qui estoient à pied, chargerent si fort sur eux, qu'ils gaignerent sur eux leur estadart, & tuerent seize ou vingt hommes d'armes des plus vaillants des dictz Lombards. Et entre les autres y feut tué vn Escuier du Daulphiné, nommé Guillaume de Martel, qui feut vn tres-grand dommaige, car il estoit vaillant homme. Les Anglois preindrent le Vicomte de Narbonne sur les fossez de la ville, que on vouloit mettre en terre, avec les autres Seigneurs. Si le portèrent pendre à vn gibet, disans qu'il auoit esté à la mort du feu Duc de Bourgogne. Et ainsi s'en allerent les dictz Lombards. Et mourut au dict champ enuiron quatre mille & cinq cents hommes François, Daulphinois, Gascons, Bretôs, & Escossois.

Au mois de Nouembre ensuiuant, feut fait le Comte de Richemont, frere du Duc de Bretagne, Connestable de France, au chastel de Chinon, par le Roy, presens plusieurs grands Seigneurs de son Royaume.

En celuy an, alla Messire Tanneguy du Chastel, deuers le Duc de Bretagne, pour auoir secours de gens, à resister contre les Anglois. Si respôdit le dict Duc de Bretagne, qu'il ne pourroit aider, ne donner secours au Roy, si ceux qui auoient conseillé au Comte de Penthieure le prédre, qui estoient du Conseil du Roy, & en son Hostel, ne s'en alloient. Car ils auoient conseillé au Comte de Penthieure le prendre. Et pareillement par Monseigneur le Connestable de Frâce, l'Euesque de Clermont, & autres Seigneurs, feut enuoiée Ambassade à Montlueil au pays de Bresse, deuers le Duc de Sauoye, pour trouuer aucun traicté de paix entre le Roy, & le Duc de Bourgogne. Mais l'excusation estoit, que le Duc de Bourgogne, ne vouloit faire paix, sinon que ceux qui auoient côleillé, & fait mourir son pere, s'en allassent. Si estoit d'accord le dict Messire Tanneguy de s'en aller, & que pour luy ne demeurast la dicte paix à faire. Mais le President de Prouence estoit d'opinion contraire. Car il vouloit resister alencontre des Ducs de Bretagne, & de Bourgogne, pource qu'il luy sembloit qu'il gouuernoit, & gouuer-

gouverneroit le Roy seul, & pour le tout, & par ce moyen gouverneroit le Royaume, & demeureroit gouverneur en l'Hôtel du Roy, maulgré tous les Seigneurs. Et le dict Messire Tāneguy du Chastel, & l'Euesque de Clermont, quand ils veirent l'opinion du dict President, qui estoient eulx trois vne mesme chose au gouvernement du Royaume, en regardant que son opinion ne pouuoient comprendre, qu'il peust ainsi demeurer, le laisserent seul au gouvernement du Roy. Et quand il se trouua seul, feut esbahi, regardant que Monseigneur le Connestable, & les dessus dicts ses compaignons estoient cōtre luy, & auoient sedniēt toutes les bonnes villes du Royaume alencontre du Roy, qui estoit jeune, & n'eut place qui luy obeist, sinon Selles, & Vierron. Mais il se trouua fort de gens d'armes. Et estoient avec le Roy durant ceste diuision, le Mareschal de Bouffac, Messire Theaulde de Valpergue, le Sire de Pouilly, & tous les Escossois. Et quand le dict President veid que la Roynne de Sicile, mere de la Roynne de France, n'estoit pas contente, que le dict President gouvernast, ne vollast de si haulte aïlle, voyant aussi qu'il ne pouuoit resister, & que toutes les bonnes villes du Royaume estoient contre luy, si feut content de s'en aller, & que le bastard d'Orleans, qui auoit sa fille pour femme, le voulust conduire iusques en Auignon. Et estoit le dict bastard de l'alliance des autres. Mais le dict President se fioit plus en luy, qu'en nul autre. Ainsi se partit iceluy President de Prouence de la Court, ne oncques puis n'y entra. Et se feit l'accord du Roy, du Cōnestable, & de la Roynne de Sicile, pourueu que le Sire de Giac, demurerait au gouvernement du Roy, en la place du dict President. Et par ce debat, & diuision, se perdit le Mans, & feut prins par le siege des Anglois, sans estre secouru, qui feut moult grand dommaige au pays, & au Royaume.

L'an mille quatre cents vingt cinq, enuoia le Roy deuers le Duc de Bretagne, les Sires de Treues, de la Sufe, & autres Seigneurs, luy faire sçauoir qu'il auoit mis, & fait mettre hors de sa maison, ceux qu'il sçauoit qui auoient esté cause de sa prinse. Et pource il luy requeroit, qu'il veint faire son debuoir enuers luy. Si manda le Duc tous ses Barons, gens de son Cōseil, & autres notables gens de sa Duché en la Cité de Nâtes, pour auoir conseil qu'il auoit à faire, touchant ceste matiere. Lesquels venus deuers le dict Duc luy conseillerent de aider, conseiller, &

B B bb

1425. conforter le Roy, lequel estoit son souuerain Seigneur. Et y estoit present, car le dict Conseil estoit publique. Lequel Duc escripuit au Roy, toute sa deliberation. Et que si c'estoit qu'il pleust au Roy, se tirer sur la riniere de Loire entre Angers & Tours, au lieu où il luy seroit plus plaissant, que là il viendrait deuers luy. Si se tira le Roy à Saumur, & là vint le dict Duc de Bretagne. Et feurent avec le Roy le Connestable, les Comtes de Foix, de Comminge, de Vendosme, & d'Estrac, & le Sire de Lebret. Le Duc de Bretagne vint au deuant du Roy, à demie lieüe loing de la ville, entre le dict Saumur & Lodun. Et le lendemain, le Duc de Bretagne en la presence des Seigneurs dessus dictz, & de ceux de son pays, fait le sermēt au Roy de sa Duché, en luy promettant, qu'il luy seroit vrai & loyal subiet, & le seruiroit de corps, & de cheuance. Et pour plus grand seureté bailla ses lettres sceillées de luy, & de tous les grands Seigneurs de son pays.

Au mois de Ianuier ensuiuant, à vn point du iour, Monseigneur le Connestable, les Sires de Lebret, & de la Trimouille, veindrēt en la ville d'Yffouldun, en l'Hostel où le Sire de Giac estoit logé, & dormoit avec sa femme. Si heurterent à l'huis, & entrerent dedans la chambre, & le preindrent, & emmenerent sans estre chaussé, ne vestu sinon d'un mantel, & d'vnes botes, qu'il auoit chaussées. Et le meirent hors de la dicte ville, auant que nul s'en apperceust, sinon sa femme qui estoit en son lit toute nue. Si l'emmenèrent à Bourges, & auoient avec eux au dehors de la ville Alain Giron, Capitaine de gens d'armes, qui les attendoit à tout cent hommes d'armes. Si s'en allèrent tous ensemble à Bourges, & de là à Dun le Roy, que tenoit le dict Connestable, & tost apres le feirent noier. Et apres sa mort, le Sire de la Trimouille, qui auoit esté cause de le faire noier, espousa sa femme, nommée Dame Catherine, Dame de Lillebouchard.

En ce temps, vint Monseigneur le Connestable à Pontorson, & le preint, & fait abbatre, & mestre à desolation.

1426. L'an mille quatre cents vingt six, le Comte de Suffolc, & le Sire de la Poulle son frere, veindrent mettre le siege deuāt les ville & chastel de Montargis. Et peu apres y vint le Comte de Vuaruic, & y teindrent le siege par l'espace de trois mois.

En ce temps, fūt tué pres du chastel de Poictiers, vn escuier

nommé le Camus de Beaulieu, du pays d'Auvergne, lequel auoit grand gouuernement deuers le Roy, plus qu'il ne luy appartenoit, & pource feut tué. Et lors preint le Sire de la Trimouille le gouuernement du Roy, apres la mort d'iceluy Camus. 1426.

Le Sire d'Orual, frere de Monseigneur de Lebret, le bastard d'Orleans, le Sire de Gaucourt, le Sire de Guistray, le Sire de Grauille, & vn Capitaine, nommé la Hire, accompagnez de grand compaignée de François, & d'Escossois, veindrent sur le siege des Anglois, qui estoient deuant Montargis, du costé deuers le chastel. Et ferirent si roidement sur les Anglois, qui là tenoient le siege, qu'ils les desconfirent. Et tenoient le siege du costé deuers Chastillon sur Louoin, les Comtes de Vuaruic, & de Suffolc, qui feurent esbahis, quand ils veirent le siege deuers le chastel, leué, & leurs gens morts, ausquels ils ne peurent faire aide, ne secours, pource que ceux de la ville auoient fait escluses, qui faisoient redonder leaüe de la riuiera, iusques à vne lieüe plus hault. Quand ce siege feut leué, les François ne pouuoient entrer en la dicte ville, pource que les bouleuarts estoient fermez, & les portes alencontre des canons de ceux de dehors. Et auant que ceux de la ville les peussent ouurir, feut nuit. Parquoy iceux François ne peurent porter dommaige ce iour aux dicts Comtes, & autres Anglois, qui estoient entre deux riuieres du costé deuers le dict Chastillon. Les François entrerent ce soir en la ville, pour eulx refraschir. Et celle nuit, s'en allerent les dicts Anglois à Nemours, & de là à Paris. Les Seigneurs François dessus dicts s'en retournerent, & emmenerent leurs prisonniers, canons, & bombardes, & s'en veindrēt sur la riuiera de Loire, & de là où bon leur sembla. Les Connestables de France, & d'Escosse, quand les autres Seigneurs se partirent, pour aller leuer le dict siege de Montargis, demurerent eulx deux à Iargueau, & ne feurēt point à leuer le dict siege. Et quand ils sceurent qu'il estoit leué, feurent moult courroucez, qu'ils n'y auoient esté.

Et en ceste saison, veindrent le Comte de Clermōt, le Comte de la Marche, & le Sire de Bouffac, en la ville de Bourges, & les y bouterent aucuns de la dicte ville, qui estoient à la porte. Et estoit allié avec eux Monseigneur le Connestable de France, Comte de Richemont. Et si tost qu'ils feurent en la dicte ville,

B B b b ij

1426. meirent le siege deuât la grosse tour de la dictë ville, où estoier dedans les Sires de Prie, & de la Borde. Et estoit le dict siege deuant la dictë tour, par dedans la dictë ville, & par dehors. Le Roy sceut ceste entreprinse, & le Sire de la Trimouille, qui estoit en gouuernement. Si assemblerent grand foison de gens d'armes, & veindrent deuant la dictë ville, où estoit le Roy en personne, & leuerent le siege, qui estoit deuant la grosse tour du costé de Bourbonnois. Et deuant que le Roy arriuaist, feut tué le Sire de Prie, qui estoit dedans la grosse tour, d'un trait de ceux qui tenoient le dict siege. Et quand le Duc de Bourbon, & les autres Seigneurs, veirent que le Roy estoit le plus fort, & maistre de la dictë ville par le moyen d'icelle tour, si feirent leur traité, & s'en allerent eulx, & leurs gens, en leur pays.

1427. L'an mille quatre cëts vingt sept, feut prins le Mäs des François, & feut chef de l'entreprinse le Sire d'Orual. Mais le chastel ne feut pas prins, & deux iours apres y entra le Sire de Talbot Anglois, à tout trois cents combatans. Et entra dedans la dictë ville par le dict chastel, & chassa les François hors d'icelle ville, & y en eut de morts & de prins grand foison. Et feut par eulx, car ils n'auoient faict nulle fortification entre la ville & chastel, & aussi qu'ils ne faisoient nul guet. Mais quand les Anglois entrerent en la dictë ville, trouuerent les dicts François couchez en leurs lits, & dormoient comme beaux pourceaux.

Peu apres, veint le Sire de Talbot à la ville de Lual, & la preint d'eschesles, qui estoit moult riche ville. Et y feut prins au chasteau par composition, vn des enfans de Lual, nommé Messire André de Lual, qui feut rançonné de la somme de vingt mille escus, & depuis feut Mareschal de Frâce. Et y trouuerent & preindrent les Anglois qui estoient avec luy, moult de richesses, & d'auoir.

Celuy an, se reduisit la Cité de Tournay au Roy, en disant qu'ils ne vouloient estre à nul, sinon au Roy Charles, fils du Roy Charles sixiesme, leur souuerain Seigneur. Iacoit ce que les Anglois, & le Duc de Bourgogne, auoient mis grand peine de la reduire, & mettre en leur obeissance. Mais ceux de la ville, ne voulurent auoir autre Seigneur, que le Roy, comme bons, & loyaux subjets.

Celuy an, feut assiegé le chastel du Crottoy par les Anglois, & le reint bien & longuemēt Messire Iacques de Harecourt, qui en estoit Capitaine. Mais à la fin, il le rendit aux dicts Anglois, par default de secours, & s'en veint au pays de Poictou, où le Roy estoit lors. Et de là s'en alla à Partenay, veoir le Seigneur d'illec, qui estoit son oncle, & duquel il estoit vrai heritier. Son dict oncle, n'estoit pas trop saige, & doubta, ou l'on luy feit entendre, que le dict Messire Iacques son nepueu, venoit leans, pour estre maistre & seigneur de la place. Et le Sire du dict lieu par chaulde colle, & sans aucune deliberatiō, feit armer ses gēs, & incontinent feit prendre & tuer son dict nepueu, dont feut dommaige. Car il estoit bel Cheualier, & vaillant.

L'an millo quatre cents vingt & huit, feut mis le siege à Orleans par le Comte de Sallebery. Et y meit les bastilles du costé de la Beausse, & du costé de Saulongne. Et feut mis le dict siege le douziesme iour d'Octobre, au dict an. Et preint le dict Comte Yenuille par cōposition, dont estoit Capitaine Pregēt de Coectiuy, lequel feut prisonnier par le traité d'Yenuille. Et preint le dict Sallebery, la ville & chastel de Mehun, les villes de Baugency, & de Iargueau, & la Ferté de Gaulles, & la tour de Pluuiers. Et feit faire le serment à ceux de la ville de Sully, qu'il bailla à vn Cheualier de Niuernois, nommé Messire Guillaume de Rochefort, lequel tenoit le parti des Anglois, & estoit parent du Seigneur de la Trimouille, Seigneur du dict Sully. Et le siege d'Orleans durant, ceux du dict Sully aduitailloient les dicts Anglois, de ce qui leur estoit possible. Et cependant le Comte de Clermont, fils du Duc de Bourbon, le Sire d'Orual, le fils d'un Comte d'Escosse, Connestable d'Escosse, lequel Connestable estoit nouvellement venu du voyage du saint Sepulchre, & plusieurs autres Cheualiers, & Escuiers, & gens de guerre, sceurent que grand nombre d'Anglois venoient de Paris, & amenoient avec eulx grand quantité de viures pour aduirailleur leur siege. Si les rencōtrèrent en Beausse, pres d'un village, nommé Estrée Saint Denys. Et là leur coururēt sus iceux François, & les dicts Anglois se fermerēt de leur charroy. Et lors descendirent à pied le Sire d'Orual, & le Connestable d'Escosse, Messire Iean de Lessègo, le Sire de Barbazen, & plusieurs autres, iusques au nombre de sept à six vingts Cheualiers, & escuiers François, Escossois, & Gascons. Et lors

1428. se meïrent les François en grand defarroy. Et s'en retourna le
 fils de Bourbon à Orleãs, avec partie de ceux de la dicte armée,
 dont ceux de la dicte ville feurent moult esbahis, & non sans
 cause. Et tost apres, le dict Comte de Clermont, avec ses gens
 d'armes s'en alla en son pays de Bourbonnois. Et demurerent
 en la dicte ville d'Orleans, les Sires de Boufflac, de Grauille, de
 Guitry, de Courraze, le Sire de Villars, messire Denys de Chail-
 ly, le Commandeur de Giresme, Estienne de Vignolles, dict la
 Hire, Poton de Xaintrailles, & plusieurs autres Capitaines, &
 gens de guerre, pour resister contre les dicts Anglois, qui te-
 noient le dict siege deuât la dicte ville, lesquels Seigneurs des-
 sus dicts se gouvernerent grandement & vaillamment, pour la
 garde d'icelle Cité, & feirent de grandes escarmouches & fail-
 lies sur les dicts Anglois, & aussi feit M^{seigneur} de Gaucourt
 de grands vaillances, lequel alloit du dict Orleans bien souuēt
 deuers le Roy, pour reconforter ceux qui estoient dedans la
 dicte ville, & apporter or, & argent, & ce qui leur estoit neces-
 saire. Les dicts Anglois qui tenoient le dict siege, appelloient la
 besongne deuât dicte par mocquerie la bataille des harens,
 qui feut en la fin du mois de Feburier au dict an, pource que
 iceux Anglois menerent en charroy des harens pour eulx vi-
 ure au dict siege, pource que c'estoit pres de Carefme. Parauât
 feut tué le Comte de Sallebery d'un canon perrier à vne fene-
 stre à la tour du pont, en regardant l'escarmouche, qui se faisoit
 sur la greue. Et feut tiré le dict canō de la ville: mais on ne sçait
 qui le tira, dont les gens se esmerueillerent, & en feurent les
 dicts François ioyeux, & les Anglois moult courroucez & trou-
 blez, & auoient cause. Car c'estoit le plus vaillant, & hardi che-
 ualier de leur pays, & celuy du Royaume d'Angleterre, qui en
 son temps auoit porté plus de dommaige au Roy de France.

Celuy an, en ce mesme temps de Carefme, arriua vne ieune
 fille de l'aage de dixhuiât à vingt ans, par deuers le Roy au cha-
 stel de Chinon, icelle fille nommée Ieanne du Liz, la pucelle,
 laquelle estoit née, & nourrie de aupres de Vaucouleur, d'un
 villaige assis dessus la riuiere de Meuse. Et auoit esté toute sa
 ieunesse, iusques à celle heure à garder les brebis. Et veint de-
 uant le Roy en le saluant, & luy dit ces paroles, que nostre Sei-
 gneur l'euoioit deuers luy, pour le mener courōner à Rheims,
 & pour leuer le siege que les Anglois tenoient deuant la bon-

ne Cité d'Orleans. Et que Dieu à la priere des Saints, ne vou-
loit point, que la dicté Cité feust prinse, ne perie. Et à ces pa-
rolles, le Roy la feit examiner par plusieurs saiges Docteurs de
son Royaume, ausquels elle respondit saigement, & par bonne
maniere. Et tellement que tous les Docteurs estoient d'opinion,
que son fait, son dict, & ses paroles, estoient dictes & faictes par
miracle de Dieu. Et pource feut dict & ordonné en grand de-
liberation de Conseil, que pour faire, & accomplir les choses
qu'elle auoit dict, en intention de commencer & acheuer au
plaisir de Dieu, On luy bailleroit cheuaux, harnois, & gēs pour
l'accompagner, & veoir son fait, & que ce seroit. Et feut tout
fait, conseillé, & ordonné au dict chastel de Chinon, durant le
dict temps de Careme, que vn chascun estoit en deuotion. Et
la conduisoient le Mareschal de Rays, & le Sire de Cullât, l'un
Mareschal, & l'autre Admiral de France.

L'an mille quatre centz vingt & neuf, feut leué le siege d'Or-
leans, le douziesme iour de May. Et en ce temps, se partit la
dicté pucelle du chastel de Chinon, & print congé du Roy, &
cheuaucha tant par ses journées, qu'elle arriua dedans la bon-
ne Cité d'Orleans, maulgré les Anglois. Et leur enuoya lettres
par vn Herault publiquement deuant tout le monde, qu'ils s'en
allassent, & que Dieu le vouloit. Ou sinon qu'il leur mescher-
roit, & que Dieu se courrouçeroit à eulx, s'ils faisoient le con-
traire. Les dicts Anglois preindrent le dict herault, & iugerent
qu'il seroit ars, & feirēt faire l'attache pour le ardoir. Et toutes-
fois auant qu'ils eussent l'opinion & conseil de l'Vniuersité de
Paris, de ce faire. Ils feurent leuez, morts, & desconfits, & par-
tirent si hastiuement, qu'ils laisserent en leurs logis le dict He-
rault enferré, & s'enfuirent. La dicté pucelle, visita les bastilles
qu'ils auoient emparées. Et estoient avec elle, le Sire de Rays,
Mareschal de France, le bastart d'Orleās, & Messire Louys de
Cullât, Admiral, & plusieurs autres Cheualiers & escuiers des-
sus nommez. Et le lendemain, se partit la dicté pucelle d'Orleās,
& vint à Blois pour auoir gens & viures. Et ce fait, vint au
dict Orleans, à tout vne grosse armée, & puissance de gens d'ar-
mes. Et si tost qu'elle feut entrée en la dicté ville, le peuple se
partit d'Orleans de grād vouloir qu'ils auoient d'estre hors de
la seruitude des dicts Anglois, & assaillirent la Bastille de saint
Lo, que les François auoient prins. Mais quand ils feurent mye-

1429. voye, ils apperceurent que le feu estoit dedàs, & que elle estoit perduë pour eulx. Et estoïent allez Mōseigneur le bastard d'Orleans, le Sire de Rais, & plusieurs autres, quand ils sçurent que le peuple estoit esmeu d'y aller. Et feut le commencement du siege leué, & là feurēt morts, & ars soixāte Anglois, & vingt deux prisonniers, qui feurent à Monseigneur le bastard d'Orleans. Et tenoit ceste dicte bastille, vn Capitaine Anglois nommé Thomas Guerart, lequel estoit à Monstereau, dont il estoit Capitaine pour les diēs Anglois. Et ce soir, passerent les François en bateaux la riuere de Loire, & allerent assaillir les bastilles du costé de Beauſſe, & puis celle des Augustins deuant la porte du pōt, & les preindrēt. Et ce soir, se retrahirent les diēs François en la dicte ville, & la dicte pucelle avec eulx, & vne partie des gens d'armes, demurerent au champ toute nuiēt. Et le lendemain au matin, qui estoit iour de Sabmedy, les diēs François passerent derechef la dicte riuere, pour assaillir la bastille du pont. Et là feurēt le Sire de Rais, le bastard d'Orleans, le Sire de Gaucourt, le Sire de Grauille, le Sire de Guित्रy, le Sire de Courraze, le Sire de Villars, Messire Denys de Chailly, l'Admiral Messire Louys de Cullant, la Hire, Poton, le Commandeur de Giresme, Messire Florēt d'Illiers, le Bourg de Masquaren, Thibault de Tarmes, & plusieurs autres. Et donnerent l'assault de toutes parts à la dicte bastille du pont, depuis le midy iusques au Soleil couchant, & tant que par force d'armes la dicte bastille feut prinſe, & y moururent les Seigneurs de Pongnis, & de Molins, & vn Capitaine, nommé Clacidas, Anglois, lequel estoit Capitaine d'icelle bastille. En se cuidant retraire dedans la tour du bouleuart, le pont fondit, & luy, & tous ceux qui estoient sur le dict pont, fondirēt en la riuere de Loire. Et là dedans feurent que morts, que prins, de quatre à cinq cents Anglois. Et le lendemain au matin, qui feut le Dimanche, se leuerent les Anglois de deuant Orleans, & s'en allerent à Mehū sur Loire, la plus part à pied, & laisserent leurs bastilles, viures, & artillerie. dont ceux de la dicte ville d'Orleās, feurent moult refaicts, & eurent assez grand confort des viures, qu'ils trouuerent es diēs bastilles.

Lors le Comte de Suffolc, preint la charge de cinq cents Anglois, pour mener à l'argueau, par l'ordonnance du Sire de Talbot, lequel estoit Lieutenant pour le Roy d'Angleterre. Et demeura

demeura le Sire de Tallebot à Mehun, & à Baugency, iusques 1429. à ce qu'ils eussent nouvelles du Duc de Bethfort, & grand secours. Lequel Duc leur enuoia Messire Iean Fascot, à tout ce qu'il peut finer de gens. Et lors les chefs de guerre, qui auoient esté dedans Orleans, le siege durant, & Monseigneur le Connestable de France, Comte de Richemont, Monseigneur d'Alençon, & Monseigneur de Lebret, veindrent, & meirent le siege à Iargueau, & le preindrent d'assault. Et là feurent que prins que morts de quatre à cinq cents Anglois. Et feut prins sur le pont de la ville, par dessus lequel passe la riuere de Loire, le Comte de Suffolc, qui s'estoit retraict sur le dict pont apres la prinse de la dicté ville. Et se rendit à vn escuier d'Auuergne, nommé Guillaume Regnault, lequel Comte feit là Cheualier le dict Guillaume Regnault, afin que l'on dist qu'il estoit prins d'un Cheualier. Et à la prinse qui feut faicte sur le dict pont par les François, des Anglois se noia Alexandre de la Poulle, frere du dict Comte.

Et de là veindrent les François, & la pucelle, mettre le siege à Baugency. Et veu la peur que les dicts Anglois auoient de la fortune, qu'ils veoient venir sur eulx, se rendirent, & deliurerent Baugency par composition, & dedans estoient de six à sept cents Anglois, & en estoit Capitaine Messire Guichart Guetin.

Et quand le Sire de Tallebot, & Messire Iean Fascot, sceurent que ledit Baugency estoit rendu, & que les Anglois s'en estoient allez en Normendie, vn baston en leur poing, si se partirent le dict Seigneur de Tallebot, & Messire Iean Fascot, pour tirer à Yenuille. Et lors les Seigneurs de France les poursuiuirēt bien six lieües, & les attaingnirent au droit du fort monstier, nommé Patay. Et là feurent cōbatus & desconfits les dicts Anglois, & là feut prins le Sire de Tallebot, & autres, iusques au nōbre de quatre ou cinq cents Anglois prisonniers, & de morts deux mille deux cents. Et s'enfuit Messire Iean Fascot, & plusieurs autres. Et par celle iournée, laisserent Mehun, Yenuille, la Ferté, & plusieurs autres forteresses au pays de Beauffe.

Et lors sceut le Roy les nouvelles, & s'en alla le Roy à Gient, & de là à Auxerre à tout son Ost. Et veint deuant la Cité de Troyes, & renuoia le Connestable, & aussi contremanda le Comte de Perdrac, pource que le Sire de la Trimouille craignoit qu'ils ne voulussent entreprendre à auoir le gouuerne-

C C c

1429. ment du Roy, ou luy faire desplaisir de sa personne, ou le bouter hors. La diète Cité de Troyes, feit obeissance au Roy, lequel se partit de là, & veint à Chaalons, qui luy feit pareillement obeissance. Et de là à Rheims, où il feut grandement accompagné des Seigneurs de son sang, & Barons de son Royaume, comme le Duc d'Alençon, le Comte de Vendosme, le Sire de Le Bret, le bastard d'Orleans, le Comte de Clermont, les Mareschaux, l'Admiral, le Maistre des Arbalestriers, le Sire de Laual, & moult d'autres Barons. Et feut le Roy sacré, & couronné à Rheims en moult grand solemnité.





ANNOTATIONS SVR L'HISTOIRE du Roy Charles VI.

DAige 87. Le dict Maistre Jean Iuuenal des Vrsins, institué au dict Office de Garde de la Preuosté des marchands de Paris, trouua que les affaires, droicts, & priuileges de la ville, auoient esté delaissez, & delibera de trouuer les moyens d'ales remettre sus.) l'Auteur, Euesque de Laon, au Discours de l'Office de Chancelier de France, qui commēce, *Ha, Ha, Ha, nescio loqui, quia puer ego sum*, qu'il adresse à son frere, le Baron de Traignel, Chancelier de France.

Nous auons eu vn Pere, dont Dieu ait l'ame, qui estoit vn tresmauais dis-
simulateur, & si ne auoit comme point de attrémpance, ou patiēce, quand il reoit
vne chose, qui estoit contre le Roy, & le bien publicque, & au preiudice d'iceux,
supposé qu'il n'y eust peu ou sceu mettre remede. Et quand on le aduertissoit en
disant, qu'il y auoit grand dommaige, & ses enfans, & que il valloit mieux, qu'il
laisst passer le temps, tel cōme il estoit, il respondoit qu'il le faudroit refondre,
& que sa complexion, & condition estoit telle. Et que il n'auoit point de doubte,
que luy, & ses enfans, n'eussent assez, en alleguant ce vers du Pseume, *Iuue-
nis fui, etiam senui, & non vidi iustum derelictum, nec semen
eius quærens panem*. Et en verité c'estoit vn vaillant couraige de homme,
& qui eut de grands assauls, & patiemment les portoit. Son pere Pierre Iue-
nal des Vrsins, le laissa ieune estudiant à Orleās. Et s'en alla apres que les guer-
res seurent faillies, à Naples vers la Roynie de Naples, pour sçauoir s'il pour-
roit recouurer des terres de Iuuenal des Vrsins, son ayeul, & en porta les lettres
& tiltres qu'il auoit de ça. Et au pays auoit guerre, & y feut quatre ans au ser-
uice de la dicte Dame en armes, & depuis y eut accords. Et feut en vn voyage
dessus les Sarrafins, & là mourut. Et demeura nostre Seigneur, & Pere, ieune.
Et feut Licencié. Et apres s'en vint à Paris. Et luy ai oui dire, que s'il eust sen-
ville au monde, où il enst peu apprendre plus de bien & de honneur que à Paris,
il y feust allé: Et feut par aucun tēps en Droit Canon, & fort estudioit. Et pource

CC cc ij

qu'il estoit bien enlignaigé, & auoit du sien de par sa mere, Monseigneur de Nonjant, qui estoit grand Maistre d'Hostel du Roy, desira à l'auoir pour sa niepce, qui de present est Madame nostre mere. Et combien qu'il eust volonté d'estre homme d'Eglise, toutesfois il se maria. Et lors le Preuost de Paris, auoit la garde de la Preuosté des marchands, car depuis les mailles n'en auoit point eu. Et auoit le dict Preuost de Paris, trop à faire à gouverner les deux. Et pource feut aduisé qu'on y commeeteroit quelque homme de bien, qui auroit la garde de la Preuosté des marchands. Et feut esleu par le Conseil nostre dict feu pere, lequel meit les choses en tresnoble police.

¶ P. 124. Et dit au dict Iuuenal, allez vous en mon ami, & vous mes bons bourgeois. Si s'en retournerent.) l'Autheur, au Discours de l'Office de Chancelier de France. Et resistoit à la volonté des Princes, qui lors estoient, qui vouloient faire beaucoup de choses, veüe la maladie du Roy. Et depuis en y eut vn entre les autres, qui voulut auoir vne grosse somme de l'argent du Roy, comme de trente mille escus, ou plus. Et reuint au Seigneur de la Riviere. Et Madame nostre mere estoit niepce du dict Seigneur de Nonjant. Et deslors commencerent les bons gouvernement & police du Roy & Royaume à decliner. Et Dieu sçait les haines, & malueillances, que le dict Seigneur, & autres conceuoient contre nostre dict feu pere, disant que à luy ne à ceux de Paris, ne appartenoit point à faire ce qu'ils faisoient, & delibererent de destruire nostre dict feu Seigneur, & pere. Car le Roy nonobstant sa maladie, & par auant auoit tresgrande fiance en luy, & ceux de Paris. Et tresuolontiers les oyoit & veoit. Et s'il eust voulu voler avec le vent, qui ventoit, il eust eu & fait ce qu'il eust voulu. Et luy disoit on, & faisoit on dire par ses amis, que il dissimulast, & il auroit des profits largement, mais iamais ne l'eust fait. Et pource induisirent bien de trente à quarante tesmoins, deposer faulx contre luy, pour le faire mourir. Et feut information faite par deux Commissaires de Chastelet. Et les cas baillez par declaration à Maistre Jean Andriguet, Aduocat en Parlement, à proposer contre luy. Car les Aduocats du Roy tant de Parlement, que de Chastelet, ne s'en voulurent charger. Sçachans que les choses estoient faulces & controuuées, Et feut affirmé au dict Andriguet, que les cas estoient prouuez par information. Et vn soir les deux Commissaires allerent soupper à l'Eschiquier en la Cité, & meirent leur information sur le bout de la table, laquelle cheut à terre. Et y eut vn chien qui l'emporta en la riuelle du liét de la chambre, où ils estoient. Apres soupper ils s'en allerent, & cuidoit chascun des dicts Commissaires, que son compaignon l'eust. Le seigneur de l'Hostel se coucha. Sa femme en entrant en la riuelle du liét, trouua la dicte information à ses pieds, & la bailla à son mari, lequel demanda de la chandelle, & veid dedans, que c'estoit contre nostre dict pere. Et se leua, & preint vne torche, & s'en veint en l'Hostel de la ville, & le

feit esueillier, & luy bailla la dicte information, & la leut, & seut bien esbabi, toutesfois confortauit cor suum. Car c'estoit chose faulse, & controuu'e. Et le matin, voycy vn Huissier d'armes, qui vient, & l'adiourne à comparoir en performe, au bois de Vincenne, où le Roy estoit, à dix heures, lequel y alla accompagné de bien deux cents bourgeois de Paris. Et proposa Andriquet. Et nostre pere qui sçauoit qu'on debuioit dire contre luy, respondit sur le champ. Ce que on cuida empescher, mais le Roy le voulut ouyr. Et quand il eut proposé ses defences, le Roy mesmes se leua, & dit, que son Preuost des marchands estoit preudhomme. Et l'en enuoia. Toutesfois le grand Seigneur, que il ne fault ia nommer, & ses aliez, auoient delibéré de le faire mourir le lèdemain aux halles.

¶ P. 130. Et leur dit, vous estes tel, & tel, puis bien doucement leur pardonna.) l'Autheur, au Discours de l'Office de Chancelier de France. Et en adueint que les faux tesmoings, seurent à confesse au Penitencier de Paris, qui ne les voulut absouldre, & les enuoia à l'Euesque. Et l'Euesque les enuoia au Legat du Pape, qui estoit à Paris, lequel leur bailla certaine penitence, & entre les autres, que le iour du Vendredy saint, ils fessent nads seulement enuolopez d'un drap, & luy veinsent crier mercy. Et le dict iour les trouua à l'entree de l'Hostel de la ville, & luy prièrent à genouils, que il leur voulust pardonner le dict cas, & leur demanda leurs noms, & qui ils estoient. Et ils respondirent que par leur penitence, ils n'estoient point tenus de eulx nommer. Et lors il dit, qu'il sçauoit bien leurs noms, & aussi faisoit il, car il les auoit sçeu par l'information qui luy sent portée, & les nomma, & leur pardonna. Et eut plusieurs fois autres assauls. Et le voulut on plusieurs fois desappointer: mais sa preudhomie & loyauté, le faisoient mettre hors des perils.

¶ P. 149. Et seut offerte par plusieurs & diuerses fois au Roy d'Angleterre, la chaire à dextre. Ce qu'il ne voulut accepter, & tant plus luy offroit-on, tant plus la refusoit. Et finalement se assit à fenestre, & le Roy en la dextre. Cecy se trouue confirmé en la Chronicque manuscrite Latine, qui commence l'an 1380. & finit l'an 1415. laquelle ha esté faicte du commandement de Guy de Monceaux, & Philippes de Villette, Abbez de Saint Denys, és Chronicques de France manuscrites, continuées iusques en l'an 1458. & celles imprimées à Paris l'an 1476. 1493. & 1514. qui sont extraictes des Chronicques de l'Abbaye de Saint Denys.

Ainsi le iour suiuant, au mesme lieu, lors qu'ils mangèrent ensemble, le Roy d'Angleterre seut assis au dessous, & nostre Roy au dessus, assez loing l'un de l'autre. Froissart, Historien du pais de Hainaut, Thresorier & Chanoine de Cimay, & de Lille, lequel vint du temps de

574 ANNOTATIONS SVR L'HISTOIRE
 nos Roys Iean, Charles V. & Charles VI. au 4. volume de son
 Histoire, chap. 78. & Iean de Vuaurin, Cheualier du pays d'Ar-
 tois, qui viuoit du temps de Iean, Philippes le bon, & Charles,
 derniers Ducs de Bourgōne, au 4. volume de ses Chronicques
 d'Angleterre manuscrites, lib. 3. chap. 19. *Quand ce veint le Sabme-
 dy iour Saint Simon, Saint Iude, sur le point d'onze heures, le Roy d'Angleter-
 re, ses Oncles, & tous les hommes d'honneur d'Angleterre, qui avec le Roy passē
 la mer auoient, reindrent deuers le Roy de France en sa tente, & là feurent re-
 cueillis solemnellement du Roy, de son frere, de ses Oncles, & des Seigneurs, &
 là feurent les tables ordonnēes, & se firent les deux Roys tant seulement à vne
 table, LE ROY DE FRANCE AV DESSVS, ET LE ROY
 D'ANGLETERRE AV DESSOVS, assez loing l'un de l'autre.*

De mesme l'an mille quatre cēts vingt, Henry V. Roy d'An-
 gleterre entra à Paris à main gauche de nostre Roy, & si baïsa
 les reliques le dernier. Enguerrant de Monstrelet, Preuost de
 la Cité de Cambray, qui viuoit du temps de nos Roys Charles
 VII. & Louys XI. au 1. volume de sa Chronicque, chap. 232. &
 Iean de Vuaurin, au 5. volume de ses Chronicques d'Angleter-
 re manuscrites, lib. 2. chap. 6. *Et chenauchoit les deux Roys moult no-
 blement de front l'un d'empres l'autre, LE ROY DE FRANCE AV
 DEXTRE COSTE', & apres eulx estoient les Ducs de Clarence, & de
 Bethfort, freres du Roy d'Angleterre. Et à l'autre costé de la rue à la main sene-
 stre, chenauchoit Philippes le bon, Duc de Bourgongne, & apres luy estoient les
 cheualiers & Escuyers de son Hostel, & les autres Princes, & cheualiers sui-
 uoient les deux Roys assez pres. Et aussi chenauchant parmy les dictes rues, ren-
 contrerēt les gens d'Eglise à pied en procession, arrestez par les carrefours, où ils
 debuioient passer: & adonc feut presenté aux deux Roys à baisser les saintes reli-
 ques, que portioient iceux gens d'Eglise, & premier au Roy de France, lequel se
 retourna deuers le Roy d'Angleterre, en luy faisant signe qu'il baïst premier, &
 le Roy d'Angleterre en mettant la main à son chapperon, faisant reuerence au
 Roy de France, luy dit qu'il baïst, & ce faisant, BAISA LE ROY DE
 FRANCE, ET APRES LUY LE ROY D'ANGLETERRE.
 Et feut celle maniere tenue par eux tout du long de la ville iusques à l'Eglise no-
 stre Dame, en laquelle les deux Roys & les Printes dessus dictz entrerent, & sei-
 rent leur Oraïson.*

¶ P. 163. *Et feut Messire Hutin d'Omout, ordōné à porter l'Oriflambe. p. 301.
 Et print le Roy l'Oriflambe, & le bailla à vn vaillant cheuailier, nommé Messi-
 re Hutin, Seigneur d'Aumont. p. 346. le Seigneur d'Aumont, bien vaillant che-
 ualier, & qui auoit eu la charge de porter l'Oriflambe, alla de vie à trespassemēt.*

& p. 348. Et pource que le Seigneur d'Aumont, qui auoit accoustumé de porter l'Oriflambe, estoit mort, le Roy auoit assemblé son Conseil, pour sçauoir à qui on la bailleroit. Car on auoit de tout temps accoustumé, la bailler à un cheualier loyal, preud'homme, & vaillant. Ce Hutin d'Aumôt, feut pere de Iacques d'Aumont, pere de Iean d'Aumont, qui feut pere de Pierre d'Aumont, pere de Iean d'Aumont, Marechal de France, Céluy duquel la valeur & fidelité enuers les Roys Henry III. & Henry le Grand, seront à iamais recommandables.

¶ P. 228. Et monstra la puissance du Roy de France, qui est le bras dextre de l'Eglise, & qu'il luy loist, & doibt assembler les personnes Ecclesiastiques de son Royaume, touchant le fait de l'Eglise; pour auoir conseil, & en iceluy presider comme chef, quand il en est requis, & sans aucune requeste de personne, si bon luy sembloit, & en iceluy conelurre, & faire executer ce qui seroit conclud, & aduisé en iceluy Conseil. l'Autheur, Archeuesque de Rheims, en la Remonstrance au Roy Charles VII. sur les Desordres de la France, qui commence, *Verba mea auribus percipe Domine.*

Au regard de vous, mon souuerain Seigneur, vous n'estes pas simplement personne laye, mais Prelat Ecclesiastique, le premier en vostre Royaume, qui soit apres le Pape, le bras dextre de l'Eglise.

Et quelques fucillets apres.

En tant qu'il touche la Loy, ou Ordonnance par vous faicte, touchant l'Eglise, que on appelle Pragmaticque Sanction, sur le fait des eslections, collations de benefices, Iurisdiccions, & les exactions de finâces, pour occasion d'auoir Archeueschez, Abbayes, Dignitez, & Benefices, laquelle est iuste, & sainte, si elle estoit bien gardée & obseruée, C'est consentir que les Statuts, Ordonnances, Constitutions, & Loix des saints Conciles generaux des saints Peres, & de vos predecesseurs, soient gardez, & obseruez. Et combien que es soient les Decrets du Concile de Basle, toutesfois ceux qui estoient à Basle, ne les ont pas fait de nouveau, ce sont les anciens, qu'ils ont ordonné estre gardez, & obseruez. Et si aucune chose y ha esté miée, ce ha esté plus les adoucir, que autrement. Et ce qui par eulx feut fait, feut ratifié & esmologué par nostre saint Pere Eugene. Et si dit on que nostre saint Pere Nicolas, qui aujourd'huy est, ha dit plainement, qu'il ne luy en chault. Et tout ce qu'il fait faire ses diligences de la muer, ou changer, ce sont aucuns Cardinaux, & autres de Court de Rome, qui n'ont regard, qu'à leur singulier profit, pour mener les grands estats & bombans desplaisans à Dieu, & au monde. Et n'estes pas le premier Roy qui ha fait telles choses. Car qui bien veoid l'Histoire de Philippes le conquerant, il ordonna le même. Si feit Saint Louys, qui est Saint & canonisé. Et faut dire, qu'il feit tres bien. Vostre pere, & autres, les ont approuué.

Et encores,

Je suis Prelat, comme indigne, & ne voudroie pas dire chose, qui feust au deshonneur de nostre saint Pere. De toutes les personnes Ecclesiastiques, que il n'y ait abus, il en y ha largement. Et comme chef, & la premiere personne Ecclesiastique, appelez vos Prelats, & ceux de vostre sang, & y pouuez pourvoir. Et pource que à Chartres aucuns en voulurent faire doubte, ie me leuai, & dis, Que l'an mille trois cents quatre vingts & dixhuiet, la matiere feut haultemēt traitée, & conclud, que vous pouuez presider au Conseil de vostre Eglise de France, & par leur aduis, & de ceux de vostre sang, & Conseil, conclurre au fait des libertez, & franchises de vostre Eglise, & en faire Loy, Ordonnance, & Pragmatique Sanctiō, & icelle faire garder, & observer par toutes voyes deues, & raisonnables. Et pareillement l'an mille quatre cents & six, où il y auoit encores de deux cents, à douze vingts Archeuesques, Euesques, que Abbez, & Chappitres, ou Procureurs pour eux, & de vostre sang, Roys, Ducs, Comtes, & Barons, & encores de deux à trois cents notables clercs. Et y eut ordōné plusieurs clercs à debatre la matiere. Et entre autres, y estoit Maistre Estienne Fillastre, Doyen de Rheims, bien notable clerc, qui allegua le chapitre aliud, & voulut maintenir le contraire de ce que dist est. Mais Monsieur mon Pere, dont Dieu ait l'ame, par l'Ordonnance du Roy luy respondit, & monstra clairement, que il auoit tort. Et le dist Doyen, congnoissant sa faulte, se reuouqua, & print son theme, Locutus sum in lingua mea, notum fac mihi Domine, finem meum. Et le desdūt bien & grandement, comme il le sçauoit bien faire, & finablement feut la conclusion telle, comme dessus est dist. Et feut faicte subtraction à Benedict. Et y eut aduis, & Ordonnances faictes, qui furent gardées, & executées. Et ne feut oncques, qu'il n'y eust des abus en l'Eglise. Et plus de Court de Rome, que de ailleurs.

¶ P. 253. Du saint siege de Rome, & de toutes Nations, & Royaumes Chrestiens, vous estes tenu, & appellé Roy Treschrestien.) l'Autheur, en la Remonstrance au Roy Charles VII. sur les Desordres de la France, qui commence, Verba mea auribus percipe Domine.

Vous auez le plus hault tiltre en la Foy & Chrestienté qui soit. Et autre ne le doit porter, & auoir, que vous. C'est à sçauoir le bras dextre de l'Eglise, & Roy tres-chrestien.

Et Emanuel Roy de Portugal, 'en la Lettre au Roy Louys XII. donnée à Almerim, le premier d'Octobre, mille cinq cēts dix, qui commence, Christianissimo, ac Potentissimo Principi, Ludouico Dei gratia Frācorum Regi, &c. Meminerit Maiestas vestra, se Christianissimum vbi-que gentium, sicut nomine, ita & re ipsa verissimē iudicari, quae gloria huc usque tam à vestris maioribus, quā à vestra Celsitudine conseruata, &c. le re-
presen-

présenterai le reste de ceste Lettre en l'Histoire du Roy Louys XII.

¶ P. 267. *Du Roy de France. qui est le plus grand Roy des Chrestiens.*) Les Roys de France sont les premiers & plus grands Roys de la Chrestienté, voire du monde. Et comme à tels, leur appartient la preeminence d'honneur, & preesance sur les autres Roys.

Thomas Campeggio, Euesque de Feltro, en la Marque Treuifane, au Patriarchat d'Aquilée, Traët. de auctor. sacror. Concilior. cap. 16. *OMNIVM CONSENSV RECEPTVM EST, Christianissimum Regem PRIMVM ESSE INTER REGES, ET PRIMVM EI DEBERI LOCVM POST IMPERATOREM.* Et ideò si Romanorū Regi data solū sit Imperij successio, apertissimū est Regem Christianissimum prius nominandum, eiusque Oratores preferendos Oratoribus Regis Romanorum. Et ita in Concilio Tridentino, dum illic essem, die 29. Ianuarij, anno 1546. prius recitata fuerunt literæ sacri Concilij mittendæ Christianissimo Regi, quàm aliæ ad Romanorum Regem.

Balde, grand Iurisconsulte Italien, qui viuoit l'an mille trois cents nonante, in commentar. ad libr. de feud. tit. de prohibita feudi alienat. per Frideric. circa fin. *Querò, virum sicut debet in iuramento fidelitatis excipi Imperator, ita debeat excipi Rex, puta Dominus Rex Francorum, qui SVPER OMNES REGES EST? Respondeo sic, cum sit Dominus iurantis, & eius cui iuratur, & quò ad suos subditos, ipse sit in Regno suo tanquàm quidam corporalis Deus.* Le mesme Balde, consilior. 3. parte, conf. petita venia, 218. *SVPER OMNES REGES CHRISTIANORVM, Rex Francorum, OBTINET CORONAM LIBERTATIS ET GLORIÆ.*

Froissart, au 4. volume de son Histoire, chap. 52. *Le Pape Boniface IX. & ses Cardinaux, soustenoient, & maintenoient, que le Roy de France estoit le SOUVERAIN ROY DE TOVTE CHRESTIENTE, par lequel sainte Eglise debuioit estre enluminee, plus que par nul autre.* Et au chap. 67. *Le Roy Charles, comme Roy de France, & CHEF DE TOVS LES ROYS CHRESTIENS DE CE MONDE, y vouloit adrefser & pourueoir.*

Michel Suriano, Ambassadeur de la Republique de Venise, en Espagne, deuers le Roy Philippes II. & depuis en France, deuers le Roy Charles IX. en sa Relation de France, faicte l'an mille cinq cents soixante & deux. *Il Regno di Francia, per vn'uersale consenso del mondo, fu sempre riputato il principale Regno de Christiani. Per che*

fu sempre libero fin dal suo principio, & non ha mai riconosciuto altra superiorità da altri, che da Dio. Oltre di questo, è Regno più antico d'ogni altro, che sia in essere al presente. Fu anco il primo ad accettare la fede Christiana nel tempo del Re Clodoveo, d'onde meritamente ha nome di figliuolo primogenito della santa Chiesa. A questa prerogativa s'aggiunge vn'altra, che crescendo sempre quel Regno di forza, & di fortuna, fu il primo che per li meriti del Re Carlo, (il quale per la grandezza delle cose fatte si chiamò Magno:) fu honorato del grado & dignità dell' Imperio, (il quale durò nella posterità sua longo tempo,) & del nome & del titolo di Christianissimo, che dura nelli Rè di Francia, fin hora. Per tutti questi rispetti, il Re di Francia, HA HAVUTO SEMPRE FIN A QUESTI TEMPI PER VNIVERSAL CONSENSO DEL MONDO, IL PRIMO LUOGO DI DIGNITÀ FRATUTTI LIRE CHRISTIANI SENZA CONTRASTO. Et se bene il Re di Spagna pensa di hauere adesso ragione di contendere, però non è alcuno de suoi Regni, che ne per splendore di nobiltà, ne per fama di antichità, ne per gloria di titoli, si possa comparare col Regno di Francia.

Giouanbatista Adriani, (Historiographie de Cosme premier & François grands Ducs de Toscane,) au 17. lib. de l'Histoire de son temps, PER LI ORDINI ANTICHI, il Christianissimo DOPO L'IMPERADORE HA SEMPRE TENUTO PER TUTTO IL LUOGO PIÙ DEGNO, come Re di più antico Reame di Cristianità, e come molto nelle memorie antiche bene merito della Chiesa Cattolica, e che perciò ha molti priuilegi.

Et Matthieu Paris, Historiographie de Henry III. Roy d'Angleterre, qui viuoit du temps du Roy Saint Louys, in Histor. Anglor. Anno 1257. Rex Francorum, REGVM censetur DIGNISSIMVS. Le mesme Matthieu Paris, lors qu'il parle du bāquet au viel Tēple à Paris, auquel se trouuerēt le Roy Saint Louys, Henry III. Roy d'Angleterre, & Thiebaut II. Roy de Nauarre. Anno Domini 1254. in maiori Regia Templi comederunt sis ordinati. Dominus Rex Francorum, qui TERRESTRIVM REX REGVM est, in medio sedebat: & Dominus Rex Angliæ à dextris, & Dominus Rex Nauarra, à sinistris. Et cum miteretur Dominus Rex Francorum aliter ordinare, ut videlicet Dominus Rex Anglorum, in medio & eminentiori loco sederet, ait Dominus Rex Angliæ, Non Domine mi Rex, decentius sedetis modò, scilicet in medio, & dignius. Dominus enim meus es & eris, & super est causa.

D'où vient que les Papes Leon X. & Paul III. nomment en.

leurs Bulles l'Empereur, & le Roy de France, premier & auant que de faire mention des autres Roys.

Leon X. en sa Bulle de Rome du moys de Mars, mille cinq cents seize, confirmatiue du dernier Concile de Latran, *Charissimus in Christo filius noster, MAXIMILIANVS IN IMPERATOREM ELECTVS, Iulij Papæ II. prædecessoris nostri, nostro verò tempore, clarissimæ memoriæ LVDOVICVS FRANCORVM, ET CAETERI REGES, & Principes Christiani, summo cum omnium gaudio, Lateranensi Concilio in Spiritu Sancto legitimè congregato adhaerunt.* Le mesme en la Bulle *Ite & vos*, de Rome au mois de Mai, mille cinq cents dixsept, *Nec minus continuis Principum Christianorum, Maximiliani, IN IMPERATOREM ELECTI, & Francisci Christianissimi FRANCORVM, ac Caroli Catholici HISPANIARVM &c. Regum illustrium.*

Et Paul III. en ses Bulles de Rome de l'an mille cinq cents quarante deux, & quarante trois, pour l'indiction & suspension du Concile de Trente, *Charissimos in Christo filios nostros, Carolum ROMANORVM IMPERATOREM semper Augustum, & CHRISTIANISSIMVM Regem Franciscum, DVO PRÆCIPVA CHRISTIANI NOMINIS FIRMAMENTA, ATQVE SVBSIDIA, NEC NON CAETEROS REGES, Duces, Principes rogantes, atque obsecrantes, ipsimet ad sacri Concilij celebrationem veniant.*

Et cela, non seulement à cause que le Royaume de France, est le plus ancien de tous les Royaumes qui soient, & celui qui ha receu la Foy Chrestienne, plustost qu'aucun autre, & mieux meritè de la Chrestienté: mais aussi d'autant que les Roys sont de toute ancienneté en possession de preceder, & auoir la prerogatiue d'honneur sur tous autres Roys Chrestiens. Et telle possession doit seruir de tiltre & droit legitime.

Marzarius, Auditeur de la Rote à Gennes, & depuis à Boulongne, & à Florence, conf. 25. nu. 33. *Conclusio est iuridica & indubia, præcedentiam Oratorum Florentinorum, cuius origo hominum memoriam excesscrit, iure constituti loco habendam esse. Nouissimè legitur, apud Historicos Venetos iudicium Veneti Senatus, in controuersia inter Henrici Gallia, & Philippi Hispania Regum Oratores, fundatum potissimè, quod omnium memoria semper obseruatum, vt Gallus Orator Hispanum apud Principē publice præcederet.*

Les Auditeurs de la Rote à Boulongne, post vicesimū quintum Consilium Marzarij. Si non tantum Oratores. Reipublica Florentina ante Principatum suorum Ducum, sed etiam post vsque ad tempora hodierna, semper altiore locum illis Ferraria tenuerūt, merito in hac sua possessione molestari non debent. Satis superque satis est Duci Reipublica Florentinae, quod in sua quasi possessione, non vi, clam, nec precario, etiam à multis annis, & citrà sit.

Antoine de Queta, Conseiller, & Ambassadeur au Concile de Trente de Ferdinand Roy des Romains, depuis Empereur, conf. 1. nu. 12. Cum de Præcedentijs personarum agitur, maximè est inspicienda Præctica, & consuetudo in his solita obseruari. Et pour ce dit le mesme Queta d. conf. 1. nu. 8. & 13. Rex Franciæ non potest contendere cum Imperatore de Præcedentia, quia sufficit sic esse consuetum fieri, vt Imperator primus post Pontificem, etiam Regi Franciæ præponatur.

Vuamesius, premier Interprete en droit Canon en l'Vniuersité de Louuain en Brabant, responzor. de iure Pontificio, tom. 1. conf. 10. & Pierre Enriquez, Iuriscônulte Espagnol, Conseiller au Royaume de Naples, de Philippes II. Roy d'Espagne, conf. 71. nu. 2. Antiqua consuetudo & observatio in omnibus, & potissimum in dabo retinenda & seruanda est, in constituendo & seruando ordine vel paritate graduum inter homines, ita vt priorem locum deferre debeat, is qui antea deferre solebat.

Elbertus Leoninus, premier Interprete du droit Romain à Louuain, & depuis Chancelier du Duché de Gueldres, conf. 1. nu. 8. 9. & 20. In Aula Vaticana, Cesarea, Francorum, & Hispanorum Regum, inconcussè, longæua consuetudine, atque vsu obtentum, semperque post hominum memoriam obseruatum dicitur, Rempublicam Florentinam, eiusque Oratores, Ferrariensibus ac Mutinensibus Ducibus & Oratoribus antecessisse: quæ antiquissimi temporis vetustas & consuetudo, magnarum est virium, & constituit ac priuilegij loco habetur, & intentionem Florentini Principis fundat in petitorio & possessorio, perinde ac si possidente Republica Florentina, nominatim Pontifices, Imperatores, & Reges, lege & priuilegio constituisset, vt Florentina Respublica, eiusque Principes & Oratores Ferrarienses. & Mutinenses Duces præcederent. Nam, vt Baldus notat, Consuetudo assignat loca sedendi & standi, & non debet inuerti, seu, vt ipse ait, præposeri. Aded, quod superior possit agere vigore consuetudinis de præcedentia honoris actione iniuriarum, aut officium Iudicis implorare, aliaque similia remedia proponere, si inferior non cedat.

Castillo de Bouadilla, Procureur general en la Châcellerie,

& Court Souueraine pour la Iustice à Vailladolid, lib. 2. de la Politica, cap. 10. nu. 49. & lib. 3. cap. 2. nu. 23. *En los asientos y precedencias, deve se guardar la costumbre, que puede mutho.*

Bursatus, Iurifconsulte de Mantoüe, conf. 343. nu. 74. *Ex unico actu antecedendi, quis constituitur possessor. & nu. 75. & 76. Pro quasi possessore, in materia precedentie semper est pronuntiandum.*

Peregrinus, Iurifconsulte de Padoüe, conf. 3. nu. 1. 2. & 3. lib. 2. *Aduerto, quod in questione precedentie, quæ sæpe occurrit inter Principes, Principum Oratores, Prelatos, Inferiores, & Vniuersitates, in primis exploranda est consuetudo præterita, eaque obseruanda. Et in istis, consuetudo per obseruantiam, & usum annorum decem præscribitur, & induitur. Et ubi non extaret consuetudo præscripta, per vnum, vel ad plus per duos actus acquireretur possessio & status possessorius, pro vt in Iurisdictionibus & iuribus incorporabilibus seruitutum, decimandi, & his similibus.*

Portius, premier Interprete en droit Canon à Padoüe, & depuis premier Interprete du droit Romain à Rome, conf. 164. nu. 48, *Singularis congregationis potiore causam probat huius amplissima Sedis usus in viridi obseruantia existens, & in processionibus ipsis pralationis locum Canonicorum regularium congregationi assignans, quo quidem iure quasi possessionis, Canonicos huiusmodi repellere, à iuris & Canonum ratione, prorsus alienum censei debet.*

Pancirolius, Interprete du droit Romain à Padoüe, cõf. 162. nu. 15. 16. & 17. *Ius præcedendi, spatium triginta annorum contra quem libet præscribitur. Nec obstat, quod liber homo præscribi non possit, quia hic non præscribitur libertas, vt in totum amittatur, vel etiam diminuatur.*

Decianus, autre Interprete du droit Romain aussi à Padoüe, resposor. volum. 5. resp. 84. nu. 30. *Si quis ius habuit præcedendi, illud ius amisit, si quem patiatur præcedere plures. & nu. 27. Possessio præcedentie, potest dici acquisita per vnicum actum.*

Et Menochius, Interprete du droit Canon, ou du droit Romain, en diuerfes Vniuersitez d'Italie, durant trête sept années, & depuis President en la Court des Reuenus extraordinaires du Duché de Milã, cõf. 257. nu. 36. 37. 38. 39. 40. 41. 42. 54. 55. & 56. & conf. 784. nu. 1. *Is iudicandus est maior & dignior, atque ita ceteris anteponendus, qui pro veteri more, & consuetudine ita habitus est. ET VERE NÆC EST OMNIUM PENSESENTENTIA.* Le mesme conf. 51. nu. 40. 41. 42. 49. 50. & 51. conf. 126. nu. 3. 4. & 5. & conf. 902. nu. 76. 77. & 78. *Ille qui est in quasi possessione præcedendi & sedi nã in loco superiore, potest manu etiam armata resistere illi, qui vult eum amouere.*

D D. d. d. nji

Et hæc quidem quasi possessio, acquiritur unico actu possessorio. Audio Serenissimum Dominum Venetorum, aliquando declarasse, observandam fuisse consuetudinem præeminentiæ sedendi & ambulandi inter Regis Christianissimi, & Regis Catholici legatos: ac etiam inter legatos Ducum Ferrariæ & Florentiæ, quo sanè prudentissimo iudicio factum est, ut nemo eorum conqueri potuerit, C V M I D P L A C V E R I T D O M I N I O S E R E N I S S I M O, Q V O D O L I M I L L I S P L A C V I T.

Et suiuant ceste maxime, l'Archeuesque de Treues, donne sa voix en l'eslection du Roy des Romains, auparauint l'Archeuesque de Colongne: pource que les Archeuesques de Treues l'ont ainsi fait de tout tēps. l'Empereur Charles IV. en la Bulle d'or, ou Ordonnāce touchant l'eslectiō du Roy des Romains, faite à Nuremberg, l'an mille trois cents cinquante six. *Archiepiscopus Moguntinensis, PRIMO quidem INTERROGABIT à Treuirensē Archiepiscopo, cui primam vocem competere declaramus, SICUT INVENIMVS HACTENVS COMPETISSE. Secundo à Coloniensē Archiepiscopo. Tertio à Rege Bohemiæ. Quarto à Comite Palatino Rhēni. Quinto à Duce Saxonie. Sexto à Marchione Brandenburgensi & ca.*

Et n'est à considérer ce que quelques vns veulēt dire, que les Roys doibuent precéder, qui possedēt plus grāde estēdue de pays, ou qui ont plus grād nōbre de subiets. Car la preeminence d'un Roy deuāt vn autre Roy, ne se cōsidere & cōserue que par l'ātiquité du Royaume, par les merites, & par la possessiō de precéder, & non par l'estēdue de pays, ou par le nōbre de subiets.

Decianus, resp. 19. nu. 207. 208. & 209. voi 3. & resp. 58. nu. 4. vol. 5. Portius, conf. 167. nu. 51. 52. & 53. & Meochius, conf. 51. nu. 55. & 56. & conf. 257. nu. 59. *Amplitudo iurisdictionis non arguit maiorem dignitatem. Nam si nunc Rex aliquis crearetur, qui ampliorem haberet iurisdictionem, quàm Rex Gallia, sequeretur quod ex hoc solo, iste nouus Rex deberet præferri Regi Gallia. Quod est absurdum, Nam nouus ille Rex nō præferretur Regi Gallia: quia Rex Gallia longo tempore transacto creatus, præcederet nouum Regem, ratione temporis, Nam qui præcedit tempore, præcedit etiam in bonoribus & dignitatibus, alijs posterioribus. Et ista qualitas temporis, in præferendis dignitatibus, vincit omnes alias qualitates. Maioritas iurisdictionis, solū arguit præeminentiam in ipso actu iurisdictionis, non autem in omnibus.*

Adriani, au dixseptiesme liure de l'Histoire de son temps, *Hauena piu volte il Re Cattolico fatto istanza al Pontefice, di essere dichiarato piu degno del Cristianissimo, & ora in queste disgrazie de' Franzesi, ne facena lo sforzo maggiore, ALLEGANDO I SVOI LA MOLTA PO-*

TENZA, IL NUMERO DE REGNI, E LA STRAO R-
DINARIA GRANDEZZA, & in vltimo la protezione, che teneua
della Chiesa, la quale senza quel sostegno si vedea mal volta: ma questo era con-
tro alli ordini antichi, per li quali il Cristianissimo dopo l'Imperadore, ha sempre
tenuto per tutto il luogo piu degno, come Re di piu antico Rèame di Christianità, e
come molto nelle memorie antiche bene merito della Chiesa Cattolica, & che per-
ciò ha molti priuilegi. E già alcun tempo innanzi, ne haueua fatto forza con la Si-
gnoria di Vinegia, ma quel buon Senato, lasciato ogni rispetto, mantenne il luogo
suo all' Ambasciador Franzese, onde il Re Cattolico sdegnando, ne hauea richia-
mato lo Ambasciadore, e molto tempo stette poi à rimandarloni.

Cautellius, Gentilhomme Cremónois, in Annalib. Cremo-
nenf. Anno Do. 1564. Orta controuersia inter legatos Regum Hispanie &
Gallie Romæ penes summum Pontificem, cum alter alterum vellet præcedere
in pompis & alijs, quibus contingeret ibi adesse, summus Pontifex declarauit de-
bere præcedere legatum Regis Gallie, sub fundamento, vt creditur, quòd præde-
cessores Regis Gallie statum Romanæ Ecclesiæ, ac Religionis Christianæ valdè
auxerint, & pro eo conseruando & ampliando multa bella obierint, & præclara
facinora egerint aduersus infideles & alios, qui ipsum opprimere voluerint, &
Gallie Regnū sit antiquius Regno Hispaniæ, & Galli prius Hispanis fidē Christi
receperint, QVAMVIS REX HISPANIÆ PLVR A HA-
BEAT REGNA, ET SIT POTENTIOR REGE GAL-
LORVM Et ob id per Hispanos concepto odio in summum Pontificem ac Gal-
los, reuocatus fuit legatus Hispanus cum alijs ministris.

Et de fait, cōbien que le Royaume de Polongne, compris la
Lithuanie, Liuonie, Prusse, Podolie, & autres Prouinces, con-
tiēne du moins quatre fois autāt de pays, que ce que la Maison
d'Austriche possede à present en Hōgrie, si est ce que pour cela
les Roys de Polōgne ne laissent de ceder aux Roys de Hōgrie,
selon que d'ancienneté il s'est tousiours obserué. Et feut assis
l'Ambassadeur de Hongrie au Concile de Trente, au dessus de
celuy de Polongne. Catalogus Legatorum, Patrum, Oratorū,
& Theologorū, quoad Conciliū Tridentinū conuenerūt, ibi,
Oratores quorum nomina hic describuntur iuxta eorum loca, quæ in eadē sacro
sācta Synodo habuerūt. Oratores Ecclesiastici sedebāt à manu dextra Legatorū,
videlicet Archiepiscopus Pragēsis, Orator CAESAREVS, Episcopus Quinque
Ecclesiensfis, Orator Cæsareus pro Regno HUNGARIÆ, Episcopus Pre-
missiliensis, Orator Serenissimi Regis POLONIAE.

De mesme en est il être les ducs, & Princes. Car ceux là prece-
dēt q̄ sōt en possessiō de preceder, & nā les nouueaux, desquels

584 ANNOTATIONS SVR L'HISTOIRE
les Duchez & Principautez ont plus d'estendüe, ou plus de
subiets.

Scotus, Jurisconsulte de la ville de Plaïfance en Italie, respõ-
for. tom. 1. lib. 6. resp. 28. nu. 120. *Imperij latitudo, nullius est ponderis,*
quod ad praelationem inter pares dignitate, cum impar tempus est, eius adeptæ.
nu. 124. *Non à latiore ditione, maior Principi conciliatur auctoritas, & nu.*
162. *Non à dominatione paritur auctoritas, sed à titulo dignitatis nomine suo*
denotata, nec inspicitur subiectarum ciuitatum copia, seu latitudo ditionis.

Cephalus, Interprete du droit à Pauie au Duché de Milan,
conf. 615. nu. 122. & 123. *Qualitas illa, quod vnus Dux plures sub imperio*
suo habeat ciuitates, quam alius Dux, nihil operatur, subsistente prioritate tem-
poris.

Decianus, responfor. volum. 3. resp. 19. nu. 207. *Non numerus*
subditorum, sed dignitates sunt attendendæ.

Chassanée, in Catologo gloriæ Mundi, 12. parte, confid. 58.
Ducem Mediolani plures alij Duces precedere debent, ratione antiquitatis, etsi
Dux Mediolani multos Comitatus nunc teneat, & Archiepiscopus Mediolanen-
sis habeat oñodecim Episcopos suffraganeos, quorum decem sunt in ipso Du-
catu.

Choppin, de Domanio, lib. 3. tit. 7. nu. 12. *Maior ampliorque patri-*
tialis Comitatus, non precedit vetustiore alterum re tenuiorem, finibusue angu-
stiozem. Finium enim amplitudo non efficit digniorem Comitatum, nec eò illustrior
Pontificatus altero existimatur, quod locupletior, vel diocesens spatijs latior.

Et Bernhard Zieritz, Cõseiller de l'Electeur de Brädebourg,
de Principum inter ipsos Dignitatis prærogatiua. *Cosmus Floren-*
tinorum Dux, sola potetia, aut territorij & Ducatus amplitudine, dignitatis præ-
rogatiuam nequaquam obtinuit contra Ducem Ferrariæ, sed potius actuum pos-
sefferiorũ observantia. Qua factum est, vt inde decidit rationem Imperator Fer-
dinandus arripens, Florétinos legatos in iure possefforio confirmaret. Vera enim
& realis posseffio, actibus sessione roborata, fortior est. præsumptiua quasi pos-
seffione, quæ potentie respectu conciliatur.

Il en est aussi de mesme des Republiques, où l'on ne conside-
re pas leur puissance, & le nôbre de subiets que elles ont, mais
leur antiquité, & leur ancienne possession de preceder. Bodin,
de Republica, lib. 1. cap. 9. *Dignitatis prærogatiua antiquioribus Rebus-*
publicis deberi videtur, tametsi opibus ac potentia inferiores sint. Vt quidem vi-
demus inter Heluetiorum ciuitates, Tigurinos dignitate cæteris priores esse, quo-
ties conuentus habentur. Horum enim legatus, quasi Princeps, legatos Regum
ac Rerumpublicarũ admittit ac dimittit, sententiasque in comitio rogat, ciuitates
etiam ad

etiam ad conuentus vocare consuevit, tametsi Bernates opibus, & imperij singulis, potentiores habeantur. Et Simler. lib. 2. de Rep. Heluetior. ibi, Conuocandi & consulendi Senatus summa auctoritas, more maiorum est penes Tigurinum pagum, qui veteri priuilegio primum locum & ordinem inter omnes pagos tenet. Et quelque peu apres, Confident legati in Senatu iuxta pagorum ordinem & numerum, ita vt primum locum teneat Tigurini pagi legatus, editiore subsellio mensa assidens, proximum locum Bernas habet, post hunc Lucernas, & deinceps reliqui iuxta pagorum ordinem. Et derechef, Praefectus Badensis sententias ex ordine rogat, primus sententiam dicit Tigurini pagi legatus, & post hunc reliqui, singuli suo loco, & ordine.

Et encores entre les Villes cecy s'observe. Car bien que petites, & de peu d'estendüe, & non ayans beaucoup de peuple, elles ont la preeminence, & gardent leur rang par dessus les plus puissantes. Comme en Espagne, les villes de Burgos, & de Leon, par dessus celles de Toledé, de Grenade, de Seuille, & autres.

Garibay, lib. 14. d'el Compendio historial d'Esppanna, cap. 23. & Jean de Mariana, de l'Ordre des Iesuites, en l'Histoire d'Espagne, composée en Latin, & depuis en langue Espagnolle, & imprimée à Toledé, & à Madrid, és années 1595. & 1598. lib. 16. cap. 15.

En el anno de mil y trezientos, y quatroçenta y nueue, publicaronse Cortes, para la villa de Alcala de Henares. Entre las Ciudades, que se juntaron en estas Cortes, los Procuradores de la Ciudad de Toledo alegauan, que deuián tener el primer lugar, y voto. Los de Burgos, si bien la causa era dudosa, COMO ESTAVAN EN POSSESSION, RESISTIAN VALIENTEMENTE, y pretendian ser en ella amparados.

Alegauan en favor de Toledo, LA GRANDEZA DE LA CIUDAD, su antigüedad, su nobleza, la santidad de su famosissima yglesia, la magestad, y autoridad de su Arçobispo, que tiene primicia sobre todos los Prelados de Esppanna, y los hechos valerosos de sus antepassados. Demas que en tiempo de los Godos, era la cabeça del Reyno, y silla de los Reyes, y modernamente se le dió un titulo de Imperial.

Los de Burgos, SE DEFENDIAN CON LA PREEMINENCIA QUE TENIAN EN CASTILLA, EN QUE POSSEYAN EL PRIMER LVGAR DE TIEMPO MUY ANTIGVO. Dezian, que contra esta possession, no era de importancia alegar actos ya olvidados, y desusados, y que si la competencia se lleuaua por via de de honra, de donde se dio principio para restaurar la Fé, y abinar las esperanças

EEcc

de échar los Moros de España? Por esto con mucha razón, era Burgos la silla y domicilio de los primeros Reyes de Castilla. No era iusto quitalles en la paz aquel lugar, que ellos en la guerra ganaron, con mucha sangre que sus antepassados derramaron. Demas, que sin suficiente causa, no se le podian derogar los privilegios, que los Reyes passados le concedieran. Los grandes en esta competencia estauan diuididos, segun que tenian el parentesco y amistades en alguna de las dos Ciudades. Nombradamente fauorecia à Toledo, Don Iuan Manuel, y à Burgos Don Iuan Nunez de Lara. Los vnos no querian conceder ventaa à los otros. Despues que se uuo bien debatido esta causa, se acordo, y tomo por medio, **QUE BURGOS TVVIESSE EL PRIMER ASSIENTO, Y EL PRIMER VOTO:** Y que a los Procuradores de Toledo, se les diese vn lugar apartado de los demas, enfrente del Rey, y que Toledo fuesse nombrado primero por el Rey, desta manera. Yo hablo por Toledo, y hara lo que le mandare; **HABLE BURGOS.** Lo qual hasta nuestros tiempos continuadamente se ha vsado y guardado. Diez y ocho Ciudades, y villas, son las que suelen tener voto en las Cortes, Burgos, Soria, Segouia, Auila, y Valladolid. Estas en Castilla la vieia. Del Reyno de Leon, es la primera la Ciudad de Leon, despues Salamanca, Zamora, y Toro. De Castilla la nueva, Toledo, Cuenga, Guadalaiara, Madrid Del Andaluzia, y de los Contestanos, Senilla, Granada, Cordona, Murcia, Iuen. Entre todas estas Ciudades, **BURGOS, LEON, Granada, Senilla, Cordona, Murcia, Iuen, y TOLEDO,** por ser cabeças de Reynos, tienen senalados sus assientos, y sus lugares para votar, **CONFORME AL ORDEN QUE ESTAN REFERIDAS:**

Antoine de Herrera, grand Historiographie des Indes, & Historiographie de Castille, en la segunda parte de la Historia general, lib. 14. cap. 19.

En el anno 1584. en la Iglesia del Monesterio de San Geronimo de Madrid, tenia el Rey aiuntadas Cortes de los Procuradores del Reyno, llamados entre otras cosas, para iurar al Principe hijo solo varon al presente, y sucessor de su Magestad, y de la Reyna Doña Anna, siendo su Alteza de edad de seys annos. Y en entrando las personas Reales en las cortinas, los Grandes se sentaron sin orden de presidencia en su lugar, que estaua al lado de las cortinas. Y los Perlados se fueron à sentar en el banco, que estaua a la parte del Euangelio, frontero del de los Grandes. Y los Señores de titulo, y Caualleros que auian de iurar, se sentarõ sin orden ni precedencia entresi, en los bancos de la vna parte y de la otra, mas abaxo algo desuiados del de los Perlados, y del de los Grandes, y en los otros bancos, desuiado de los Señores de titulo, y Caualleros, se sentarõ los Procuradores de las Ciudades y villas destos Reynos, que tienen boto en Cortes, **PRESIDIENDO LOS DE LAS CIUDADES DE BURGOS.**

LEON, Granada, Senilla, Cordoua, Murcia, y Iaen, que son los que como cabeças de Reynos, tienen lugares senalados en la forma y presidècia de sus asientos, que aqui van nombrados. Y los demas, en los lugares, que auiedo echado fuertes entresí, para asentarse aquel dia, y por aquella vez, les auia cabido, excetos los Procuradores de la Ciudad de Toledo, que **SE SENTARON AL FIN DE LOS BANCOS, FRONTERO DEL ALTAREN VN BANQVILLO PEQVENO**, que en igual de los otros bancos, para ellos estaua puesto, como se asienta en las Cortes.

Et cap. 20. Los Procuradores de las Ciudades de Burgos, y Toledo, pretendiendo los vnos iurar y hazer pleyto omenage, primero que los otros, su Magestad los mando parar, y dixo, Toledo iurara quando yo mandare, **IVRE BVRGOS**. Y los dichos Procuradores de Toledo, pidieron por testimonio el mandamiento de su Magestad, y los de Burgos pidieron a si mismo se les diese por sè, como conseruando su derecho y possession, iurauan primero. Y auiedo mandado el Rey, que se les diese à los vnos, y à los otros, los dichos Procuradores primero, luego los otros fueron à iurar por su orden, que son Burgos, Leõ, Granada, Senilla, Cordoua, Murcia, y Iaen, en la orden que aqui van dichos, y los demas en la orden que para aquel dia les cupo por suerte iurar. Los Mayordomos cada vno por sí hizieron por la orden y forma que los demas, el mismo iuramento y pleyto omenage. Subieron luego Don Garcia de Ayala Manrique, Regidor de la Ciudad de **TOLEDO**, y Albaro de Madrid, Iurado y Procurador de Cortes d'ella, y hizieron el iuramento y pleyto omenage.

Ambrosio de Morales, Historiographe de Philippes II. Roy d'Espaigne, lib. 15. de la Coronica de España, cap. 17. El año ochocientos y ochenta y quatro, Don Diego Portelos, Conde de Castilla, poblo por mandado del Rey Don Alonso el Magno la Ciudad de Burgos, que siempre desde ay adelante fue, como agora tambien ES, **LA CABECA DE TODO EL REYNO DE CASTILLA**.

et le Roy Alphonse en son Ordonnance de Leon, era 1387. pet. 5. y 52. inserée dans le Recueil des Ordonnâces d'Espaigne, intitulé la Recopilacion de las Leyes de España, auctorizé & confirmé par le Roy Philippes II. à Madrid l'an 1567. lib. 4. tit. de las Prouisiones que se dan contra derecho, Ley XI.

Mandamos que en las Cartas que emanaren de nos y de la nuestra Chancilleria, o de los nuestros Alcaldes, que fueren a las Ciudades, villas, y lugares de nuestros Reynos, y Semorios, **QUE SE PONGA PRIMERO LEON, QUE TOLEDO**: pero que en las Cartas que fueren à Toledo, y à las villas y lugares que son de la Notaria de Toledo, que se ponga primero Toledo, que Leon.

Et aux Conciles, lors que l'ordre de priorité ou postériorité

est gardé entre les Nations, celle des Nations est preferée, & opine la premiere, qui ha plustost receu la Foy Chrestienne, & non celle qui tient plus de pays.

Aeneas Syluius, depuis Pape Pie second, de gest. Basil. Concilij, lib. 2. *Ego nequaquam timebo Nationum seruare ordinem, qui Constantie fuit seruatus, nec mihi inuidiam timeo, quia nec praepositis gratiam, nec postpositis iniuriam faciam. Ordinem namque istum, neque nobilitas, NEQUE MAIORITAS, SED TEMPVS PEPERIT: QVIA VT QVAEQVE NATIO VERBUM DEI PRIVS SVSCEPIT, SIC PRIOR HABETVR.*

Ex natione Italica, recepti sunt Episcopi Gulielmus Verceilensis, Georgius Augustensis, &c.

Ex natione Gallica, QVAE ET IPSA SECVNDA EST, cuiusque in Ecclesiam Dei per maxima extant beneficia, nominati sunt ex Archiepiscopicali dignitate Iohannes Tarantasiensis, &c.

Ex natione Germanica, (QVAE OMNIUM EST AMPLISSIMA, pource qu'elle comprend la Boheme, Polongne, Hongrie, Danemarck, Suede, & autres Royaumes, & Prouinces,) recepti sunt ex Episcopali praecinentia Fredericus Basiliensis, &c.

Ex natione Hispanica, (que & ipsa vastissimos habet ac pernobiles campos, quatuor Christianis Regibus, & vno infideli regnata,) hi sunt ad electionem magni Pastoris accersiti Pontifices octo, &c.

Qui est le mesme ordre que garde Alphonse Ciaccó, Espaignol, de l'Ordre des freres Prescheurs, & Penitentier Apostolique, libr. de gest. summorum Pontificum & Cardinalium, in Martino III. (qui dictus V. Pontifex,) p. 870. & 871.

In Concilio Constantiensi anno Do. 1417. Electores sex fuere Nationis Italicae, sex nationis Gallicae, Archiepiscopus Bituricensis, Archiepiscopus Turonensis, Episcopus Gebennensis &c. sex nationis Germanicae, & sex nationis Hispanicae, Episcopus Conchenensis, Episcopus Pacensis, Archidiaconus Barcinonensis, &c. à quibus Martinus V. Romanus Pontifex est creatus.

Et derechef, in Amadeo de Sabaudia, (qui Felix V. vulgò dictus.) p. 911. & 912.

In Concilio Basiliensi anno Do. 1439. Octo nationis Italicae, Octo nationis Gallicae, Archiepiscopus Tarantasiensis, Episcopus Gebennensis, Episcopus Massiliensis &c. Octo nationis Germanicae, & Octo nationis Hispanicae, elegerunt Papam, Felicem V. Vulgò dictum.

N'est non plus à receuoir, ce qu'on met en auant, que les Roys qui cōmandent à vne plus grande estendue de pays, & ouy ha multitude de peuple, ont plus de peine, & profitent à plus.

de personnes. Et que c'est la moindre recompense qui leur soit due, que d'auoir la prerogatiue d'honneur par dessus ceux, qui n'ont vn si grand peuple à gouverner.

D'autant que les Roys de France, prennent autant de peine, & n'ont moins de soin à gouverner leurs subiets, que fils estoient maistres d'vn plus grand pays.

Outre ce que quand diuers Royaumes & païs, se rencontrent soubz la domination d'vn seul, il ne peut estre, que les vns estans eslongnez de la presence de leur Prince, n'en sentent beaucoup d'incommodité, & de dommaige.

Et telle estoit l'opinion de Louys Roy de Hongrie, & de Polõgne, issu de la Maison de France, & venu de pere à fils de Charles I. Roy de Sicile, & de Naples, frere du Roy Saint Louys, lors qu'il disoit, que *Sicuti duobus gregibus non expedit vnum pastorem habere, ita diu Respublica vix vlla ratione, sine alterius incommodum administrari possunt.* Sarnicius, Annal. Polonior. lib. 7.

Et encores des Arragonnois, quand on leur parloit d'vnir Arragon avec Castille. Surita, Historiographe du Royaume d'Arragon, lib. 3. de la Historia del Rey Don Hernando el Catholico, cap. 3. *Quanto a la vnion de los Reynos, confessauan los Aragonenses, que assi como para la gloria de la Corona de Arragon, parecio ser muy conueniente, que estos Reynos se iuntassen con Castilla, por la paz general, que de alli resultana, tambien todo lo que mas se augmentasse, y fuesse estendiendo este Senorio, pensauan que podria ser a los subditos de mayor graueza, y sugacion: porque de grande Imperio, y muy estendido, no se puede esperar, sino ausencia del Principe, de donde nacen infinitos danos, y por causa della mayores inconuenientes.*

Ioinct qu'il ne fensuit pas, qu'un Roy doibue acquerir la Preseance sur d'autres Roys, pource qu'il prend plus de peine à gouverner ses subiets, (a) ou bien pource qu'il profite à plusieurs. (b)

(a) Menochius, cons. 902. nu. 61. *Tertio accedit, quod Senatoris munus, sine controuersia est longè maioris laboris, quàm illud Consiliarij, sicuti notissimum est. Porro ille qui maiores sustinet labores, dignior est illo, qui minores obit. Est ergo dicendum Senatorem praeferrì Consiliario. Respondetur vno verbo, argumentum istud procedere ceteris paribus: secus verò quando aliquando extat causa & qualitas, quæ reddit digniorẽ eum, qui minus laboris sustinet. Alioqui sequeretur absurdum, quod Cardinalis esset Episcopo postponendus, ob id quod maiores obit labores Episcopus ipso Cardinali.*

Scotus, responsor. tom. 1. lib. 6. resp. 28. nu. 134. *Maiores labores*

E E e e. iij.

qualitatem, non animaduertit Lex inter agendum de Principe Principi præferendo, sed inter agendum de præferendo Officialium altero alteri. Cùm ergò restrictè consideretur hæc qualitas, & in certo genere personarum, ne consideranda quidem est, ubi tempore pares sunt Duces. Huc accedit, quòd apud Imperatores agitur non de maiore, sed de prolixiore labore, sicque de longiore ac diuturniore.

(b) Scotus, responfor. tom. i. lib. 6. resp. 28. nu. 134. *Hæc qualitas, ut Dux potentior alteri præferatur, idèd quia pluribus pròdest, non est à legibus animaduersa, neque valet, ubi subest imparitas temporis.*

Moings encores sert de dire, que les Roys qui ont plus de reuenus, doibuent estre censez & reputez auoir vne Dignité plus illustre & eminente, que ceux qui n'ont pas tant de reuenus.

Car tel Roy fera plus avec cent mille escus de reuenue, qu'un autre avec deux cents mille: soit pource qu'il n'a tant de debtes & de charges, ou que ses subiets luy sont plus affectionnez à le seruir à moindres fraiz, ou que ses finances sont mieux administrées, ou pour quelcòque cause que cela aduienne. Avec ce que les richesses n'adioustent rien à la Dignité d'un Roy, ou d'un Royaume, ains est vne qualité du tout separée de la Dignité.

Chassanée, in Catal. glor. Mundi, par. 12. conf. 58. *Est Ducatus Mediolani, maior sit in redditu, quàm alius Ducatus, tamen Ducem Mediolanensem plures alij Duces præcedere debent, ratione antiquitatis.*

Et encores vn peu apres, *Quàmuis Ducatus Britannie, & Normannia, quasi in centuplo excedant redditum Ducatus Burgundie, tamen Ducatus Burgundie, dignior & excellentior iudicatur. Et in conuocatione trium Statuum Francie, semper Burgundiones & Hédui sunt primi post Parisenses, qui representant principalem ciuitatem totius Gallie.*

Bossius, Aduocat fiscal de François Sforce dernier Duc de Milan, & depuis Sénateur à Milan du temps de l'Empereur Charles quint, in Traët. de Principe. nu. 314. Lanfranchin, in Traët. Vtrum præferendus sit Doctor, an miles, nu. 54. & 55. & Cephalus, conf. 615. nu. 136. & 137. *Diuitiarum qualitas non respicit dignitatem, nec illam auget, sed est qualitas à dignitate separata, idèd non tollit prærogatiuam temporis.*

Zieritz, de Principum inter ipsos Dignitatis prærogatiua. *Cosmus Florentinorù Dux, uberiorum opù copijs, dignitatis prærogatiuā nequàm obtinuit contra Ducem Ferrariæ, sed potius actiui possessoriorù obseruatiua.*

Scotus, respōsor. tom. i. lib. 6. resp. 28. nu. 146. 148. & 149. Dignitatū, ceterarumque rerum cuiusque generis comparationes, ineunda sunt inspecta ipsarum substantia, non autem accidentibus. Atqui diuitias, accidens esse non dubitatur. Si perpendere diuitia, quæ perpetuo motu agitantur, nūc augmentum, nunc diminutionem sentientes, sequeretur ipsam quoque dignitatē, ex æquo augmentum diminutionemue sentire, pro augmento diminutione diuitiarum. Quod adde absurdum falsumque est, ut nihil supra. Cum enim diuitia sint accidens, utique sicut accidens quodlibet adesse abesseque possunt, citra subiectæ rei corruptionem.

¶ P. 310. La terre de Neufchastel en Lorraine, & bien trois cents villes que villaiges à clocher, sont tenues en foy & hōmaige du Roy.) La ville & Chastellenie de Neufchastel en Lorraine, est d'ancienneté tenue soubz la souueraineté des Roys de France. Et ce, à cause du Comté de Champagne, comme il appert de l'Acte de recongnōissance qu'en fait l'an mille deux-cents vingt Matthieu II. Duc de Lorraine. Lequel Acte est tel qu'il ensuyt.

Ego Mathæus Dux Lotharingæ & Marchio. Notum facio vniuersis presentibus & futuris, quod nouū castrum in Lotharingia, quod de allodio meo erat, & totam Castellaniā eiusdem castri, cum omnibus appenditijs quæ de allodio meo erant, recepi in feudum & homagium de charissima Domina mea Blanca, Comitissa Trecenti, & de charissimo Domino meo Theobaldo Comite Campaniæ nato eius, in augmentum feodi quod de ipsis tenebam, & eis iuravi bona fide, & sine malo ingenio, quod quodocunque, & quotiescunque fuero requisitus ab ipsis, vel ex parte ipsorum, tradam eis, vel eorum mandato dictum castrum, fortitiam videlicet & burgum, ut ibi ponant de suis gentibus ad voluntatem suā. Ipsi autem infra quadraginta dies, postquam de essonio vel de guerra sua liberati erunt, tenentur mihi reddere per iuramentum suum castrum illud ita munitum, & in eo puncto in quo eis traditum fuerit bona fide. Præterea faciam milites & homines vniuersos de dicto castro, & de tota Castellania iurare super Sanctos, quod si ego, quod absit, castrum illud nollē tradere Comitissæ, vel Comiti, vel ipsorum mandato, ipsi milites & homines castrum illud eis vel eorum mandato traderent, & ipsos bona fide iuuarent tanquam Dominos suos. Hæc eadem iuramenta, & easdem conuentiones tenentur facere & obseruare ad inuicem hæredes prædictorū Comitissæ & Comitis, qui erunt Comites Campaniæ, & hæredes mei, qui nouum castrum tenebunt. Quæ ut nota permaneant, & firma teneantur, literis annotata, sigilli mei munimine roborauī. Actum anno ab incarnatione Domini M^o. CC^o. XX^o. mense Iulio, tertio Calend. Augusti.

¶ P. 320. Fallut qu'il baillast partie de ce qu'on luy demandoit, & ca.) L'Auteur au Discours de l'Office de Chancelier de France. et

le feut on Aduocat du Roy. Auquel Office, & pour acquiescer sa loyauté, & faire le deu de son Office, il eut beaucoup à souffrir. Es du temps de ceux que on appelloit Cabochiens, feut mis à Paris en prison, & luy feut en trop de extortions. Sed viriliter agebat, & confortabatur cor suum, sustinendo iura Domini.

¶ P. 324. Nous auons onze enfans, & p. 455. *Ayant Dame de bien, & d'honneur à femme, & onze enfans, sept filles, & quatre gendres.*) Ces onze enfans sont representez en vn tableau en l'Eglise nostre Dame de Paris, en la Chappelle dicte des Vrsins. A sçauoir,

IEAN IUVVENAL des Vrsins, né à Paris l'an mille trois cents quatre-vingts & huit, qui feut l'an mille quatre-cēts seize, Conseiller, & Maistre des Requestes de l'Hostel de Charles Daulphin, depuis septiesme du nom Roy de Frâce, & l'an mille quatre cents vingt & neuf, & trente, son Aduocat au Parlement de Paris transferé à Poitiers, Depuis en l'an mille quatre cents trente. deux, Euesque de Beauuais, apres en l'an mille quatre cents quarante cinq, Euesque de Laon, & finalement, dés l'an mille quatre cents quarante neuf, iusques en l'an mille quatre cents soixante & treize, Archeuesque de Rheims. Celuy qui sacra le Roy Louys XI. & duquel l'Histoire du Roy Charles VI. est à present mise en lumiere.

ISABEAV IUVVENAL des Vrsins qui feut conioincte par mariage avec Nicole Brulart, Conseiller du Roy.

LOVYS IUVVENAL des Vrsins, Cheualier, Chambellan du Roy, & Baillif de Troyes.

IEANNE IUVVENAL des Vrsins, conioincte par mariage avec Pierre de Chailly, Escuyer, & depuis à Guichart, Seigneur de Peluoisin, Cheualier.

EVDE IUVVENAL des Vrsins, qui feut conioincte par mariage à Denys des Marez, Escuyer, Seigneur de Doue.

DENYS IUVVENAL des Vrsins, Escuyer, Eschançon de Louys, Dauphin de Vienne, & Duc de Guyenne.

MARIE IUVVENAL des Vrsins, religieuse à Poissy.

GVILLAVME IUVVENAL des Vrsins, né à Paris l'an mille quatre cents, Cheualier, Seigneur & Baron de Traignel, lequel feut Conseiller du Roy Charles VII. au Parlemēt de Paris, transferé à Poitiers, depuis Cheualier au voyage de son Sacre, & Capitaine de gens d'armes, puis Lieutenant du Daulphin, & apres Baillif de Sens, & finalement son Chancelier de France

de France dès l'an mille quatre cents quarante cinq, iusques en l'an mille quatre cents soixante & vn, qu'il feut desappointé par le Roy Louys onzième, puis remis par le mesme Louys au dict Estar en l'an mille quatre cés soixante & cinq. Et est ce-
luy qui se trouua aux Entrées solempnelles de Rouen, & de
Bordeaux, és années mille quatre cents quarante neuf, & cin-
quante & vn, & encores aux Estats tenus à Tours, l'an mille
quatre cents soixante & huit. Et deceda l'an mille quatre cents
soixante & douze.

PIERRE IUVENAL des Vrsins, Escuyer.

MICHEL IUVENAL des Vrsins, Seigneur de la
Chappelle Gaultier en Brie, & Baillif de Troyes, pere de Jean,
qui feut pere de François, Baron de Trainel, pere de Chresto-
phle, Marquis de Trainel, duquel est fils François, aujourd'huy
Marquis de Trainel.

et IACQUES IUVENAL des Vrsins, l'an mille
quatre cents quarante & trois, President en la Chambre des
comptes à Paris, l'an mille quatre cents quarante quatre, Ar-
cheuesque de Rheims, & l'an mille quatre cents quarante neuf,
Patriarche d'Antioche, & Euesque de Poitiers.

¶ P. 332. Et feut esleu Chancelier de France, Maistre Henry de Marle,
premier President de Parlement.) La forme de ceste eslection, ensem-
ble le serment que faict le Chancelier de France au Roy, se
trouuent és Registres de la Court, Dont voycy la teneur.

Du Mardy, huitiesme Aoust, mille quatre cents treize.

Ce iour, toute la Court alla à Saint Paul, pour eslire vn Chancelier, au lieu
de Messire Eustache de Laitre, qui auoit esté par enuiron vn mois Chancelier,
au lieu de Messire Arnould de Corbie. Ha esté tenue ceste forme à la dicte esle-
ction. Le Roy nostre Sire, entra apres sa messe finie, en sa Chambre de Conseil,
entre neuf & dix heures. Surueindrent Messseigneurs les Ducs de Berry, & de
Bourgonne. Et iceux venus, par le commandement du Roy se departirent, &
allerent hors de la chabre tous, hors le Roy, les dicts Ducs, & moy N. de Baye,
Greffier de ceste Court, & l'un des Secretaires du Roy, qui feut appelé. Et me-
seurent bailler le Messel, & la vraye Croix, richement enuaillee, pour faire
iurer au seruaice ceux qui esliroient. Et les huis clos, seurent appelez par Messi-
re Antoine de Craon, qui gardoit l'huis, premierement le dessus dict Messire Ar-
nould de Corbie, naguieres Chancelier, lequel, & tous les autres Seigneurs qui
surueindrent, c'est à sçauoir le grand Maistre de Rhodes, l'Archeuesque de Bour-
ges, l'Euesque de Beauuais, & autres Easons, Cheualiers, & Conseillers, tant de

E.F.F.F.

Parlement, que des Comptes, iusques au nombre de nonante ou enuiron, ie feis iurer par le comandement du Roy, moy estant à ses pieds, vn chascun successiue-ment appellé, selon son ordre, par le dict de Craon, par la maniere qui s'ensuyt, les dictz saintz Euangiles, & Croix touchées, Vous iurez aux saintz Euangiles, & sur la vraye Croix, qui icy sont, Que bien & loyaument conseillerez le Roy, nostre Sire, au cas present de ceste eslection, & nommerez à vostre loyal pouuoir, sans faueur desordonnée, & sans haine, bonne personne, & conuenable, pour exercer l'Office de Chancelier. Et le dict scrutin commencé, & fait pour la sixiesme partie, ou enuiron, surueindrent Messieurs le Daulphin, le Duc de Bar, & Messire Louys Duc en Bawiere, frere de la Roynie, qui feurent au dict scrutin faire. Et tous les dessus dictz estans dehors, appelez, scrutinez, & ouis, l'un apres l'autre, feirent les dictz Ducs successiuelement pareil serment, & nommerent chascun tel que bon leur sembla. Et apres tous aussi nomma le Roy, & donna sa voix à celuy qu'il voulut. Et tellement que tout par moy enregistré, & aussi par le dict Secretaire, & les voix comptées, feut trouué, que Messire Henry de Marle, premier President ceans, auoit trop plus de voix, que nul. Si me commanda le Roy, que les huis du dict Conseil ouuerts, & tous ceux qui voudroient entrer, entrez, le publiasse le dict scrutin. Si le publiay, en disant tout hault, Il plaist au Roy nostre Sire, que ce scrutin par luy fait, soit publié, auquel Messire Henry de Marle dessus dict, ha eu quarante quatre voix. Maistre Simon de Nanterre, President au Parlement, vingt. Maistre Iean de Saux, Chancelier de Bourgongne, six. Et le dict Messire Arnould de Corbie, dixhuit. Vrai est, dis-je, que s'il peut encores exercer le dict Office, mes dictz Seigneurs les eslisans, se feussent arrestez à luy, plus qu'à nul autre, toutesfois nonobstant sa foiblesse, encores s'y arrestent les dictz dixhuit. Ce fait, conclud le Roy, & s'arresta au dict de Marle, & le chargea du dict Office. Le dict de Marle respondit, qu'il estoit peu suffisant pour le dict Office, & mieux le cõnoissoient autres, que soy mesme. Et cõbien que aucuns grãds homes au temps iadis, eussent refusé Offices publiques, les autres les eussent receus, Cõme Ieremie, qui les refusa, pour vaquer à contẽplation, & Isaie les receut, pour labourer au biẽ public, luy, qui auoit tousiours labouré en son tẽps au fait de Iustice, & qui auoit bone volõte, de biẽ & loyaumẽt seruir le Roy, acceptoit le dict Office. Ensuppliant au dict Seigneur, qu'il luy pleust l'auoir pour recõmandé, & le benignemẽt supporter à ce cõmencement.

Si le fait approcher le Roy, & fait le sermẽt qui s'ensuyt, & le quel ie leus tout haut au dict premier President, en ceste maniere, Sire, vous iurez au Roy nostre Sire, Que vous le seruirez bien, & loyaument, à l'hõneur, & au profit de luy, & de son Royaume, enuers tous, & contre tous. Que vous luy garderez son Patrimoine, & le profit de la chose publique de son Royaume, à vostre pouuoir. Que vous ne seruirez à autre maistre, ou Seigneur, qu'à luy. Ne robes, ne pẽsions, ou

profit de quelconque Seigneur, ou Dame, que ce soit, ne prendrez dorenavant, sans congé, ou licence du Roy. Et que de luy vous n'impetrez par vous, ou ferez impetrez par autres, licence sur ce. Et si d'aucuns Seigneurs, ou Dames, auez en au temps passé, ou auez presentement robes, ou pensions, vous y renoncerez du tout. Et aussi que vous ne prendrez quelconques dons corrompables. Et ainsi le iurez vous, par ces saints Euangiles de Dieu, que vous touchez. Lequel Messire Henry de Marle respondit, Ainsi le iures-je, mon tres-redoubté Seigneur. Et ce fait, se leva le Roy, & les autres Seigneurs, & se partirent du Conseil.

¶ P. 360. Et ainsi le dict Seigneur de Traignel, pour auoir loyaulmēt serui son maistre, feut desappointé.)l' Autheur au discours de l'Office de Chancelier de France. Et l'an quatre cents & treize, feut Chancelier de Monseigneur de Guyenne. Et pource qu'il veoit trop clair, & mostroit que en se gouuernant, comme on se maintenoit, tout estoit taillé de perdre, & ne se vouloit pas consommer à ceux qui administroient mal, il en feut mis hors. Quia erat cōtrarius operibus eorū. Et si feut-il pareillement de la Presiderie de Languedoc: Et declareroie bien les causes, mais ce seroit à la charge d'aucuns trespassez.

¶ P. 445. Et y auoit des Prebsters, si affectez à mauldite inclination, que aucuns les refusoient à baptiser. Et les morts qu'ils tenoient Armaignacs, reputoient indignes de sepulture.)l' Autheur, Euesque de Beauuais, au Traicté contre les Pretentions des Roys d'Angleterre sur la Frâce, qui commence, Audite cœli quæ loquor.

France, considère le tēps passé, & la racine de ceux qui sont alliez avec Angleterre. Je qui suis Seditiō nommée, la sçai biē. Car ma sœur Diuision, celuy viuāt, qui feut tué à Mostrean, & moy en sa cōpaignée, luy feismes tuer le feu Duc d'Orleās, apres ce qu'il eut receu le corps de nostre Seigneur avec luy, & fait plusieurs grāds sermēs. Et depuis luy, & ses alliez, feirent mourir plusieurs de ceux quā te seruoient loyaulmēt, & dōt les aucuns mourrēt de faim en Chastellet. Et quād ils demādoient à mēger, on leur dōnoit du foīn. Et quād ils estoient morts, sepulture leur estoit desniée plus que à chiens, & refusoit en à leurs enfās, le baptême. Et denōsoit on excomuniēz ceux de tō noble sang, qui soustenoient ta cause. Et boutoit on hors des villes leurs seruiteurs & alliez. Et depuis trouuerēt moy d'ētrē en Paris, apres ce que par aucun tēps ils en eurent esté hors, auquel tēps on traistoit de bone paix. Et crierēt la paix en ētrāt. Mais la paix feut telle, qu'ils pillerēt, preindrēt & robberēt tout le vaillāt de tss bōs & loyaux seruitours. Et les personnes preindrēt, & meirēt en prisō sous sainte Iustice. Et depuis les tuerent, meurtrirēt, & faisoient saillir du hault des prisons en bas, tres-inhumainmēt. Et qui voudroit reciter le tout de lōg en long, oncques choses depuis que le monde feut fait, ne feut trouuée en escript, ne autremēt, si tirānique ne inhumaine. Là feurent tuez Cōnestable, Chācellier, Euesques, Abbez, Prelats, Prebsters, clercs, & toutes gēs, sās dif-

EEff.ij.

inction des personnes. Et y eut vn Euesque traîné à la queue d'un cheual par la ville. Le reciter est chose abominable. Et faisoient crier que tes bons subiects faisoient mettre les Anglois dedans la ville de Paris, & bailler le Roy en leurs mains. Et toutesfois ce ont ils fait, & ceste volonté auoit leur maistre. Car il feut pour ceste cause à Calais, parler au feu Roy d'Angleterre. Et laissa perdre Roüen, Pontoise, & toute Normendie. Et depuis le fils & ses alliez ont acheué ce que le pere auoit commencé. Et se sont alliez avec les Anglois, & te ont fait guerre mortelle. Et qui voudroit dire tous les maux qui ont esté par eux faits, & en sont venus, on en feroit vne Bible, & tu le sçais assez.

¶ P. 477. Et arriua le Roy d'Angleterre à Troyes, & feut parfait le Traicté, que apres la mort du Roy, il debuioit auoir le Royaume de France. Et toutes gens d'entendement, doibuent le tout repüter de nulle valeur, ou effect.) De ce Traicté fait à Troyes, voycy comme l'Auteur en parle, au Traicté contre les Pretentions des Roys d'Angleterre sur la France, qui commence *Audite cæli que loquor*, et en vn autre aussi sur le mesme subiect, qui commence Tref-chrestien, tref-hault, tref-puissant Roy, & mon tref-redoubté & souuerain Seigneur, & cæ.

On dit que de present, les Anglois se veulent aider d'un accord, que on dit auoir esté fait à Troyes l'an mille quatre cents & vingt, entre le Roy Charles sixiesme, pere du Roy, & feu Henry, soy disant Roy d'Angleterre, pere de Henry, qui à present est. Qui est de soy sans responce aucune trefincivil, & lequel en nulle maniere ne se peut soustenir. Et l'ont cuidé ceux qui le firent, faire confirmer par le Pape & Concile de Basle. Mais quand on en ha parlé, on s'est moqué d'eulx, combien qu'ils eussent enuoyé messaiges propres, ce requerans, & poursuïuans. Et vous ont tenu vray Roy de France, comme si estes vous. Et baillé à vos Procureurs & Ambassadeurs les vrais sieges de Roy de France, & les prerogatiues, & preeminences, & non mie aux parties aduerses. Et est vn esbabillement, veu que en Angleterre y ha clerks solennels, comment ils s'y arrestent. Car si le Roy de France Charles sixiesme, eust esté de bon & sain entendement, & en sa pure, franche, & liberale volonté, si ne eust il peu transporter son Royaume, ne faire que son fils en eust esté exheredé, & que il ne eust esté son heritier. Et au regard de la Couronne, & du Royaume, les heritiers masles du sang sont necessaires, & ne peut le Roy preiudicier à son heritier descendant de sa chair, ne alïener ou bailler le Royaume en autre main, que à celle auquel il doit venir par succession hereditable. Et tellement, que s'il auoit fils, comme au cas present, il ne pourroit faire, qu'il ne feust Roy apres luy. Et à proprement parler, le Roy n'y ha seulement que vne maniere de administration, & vsaige, pour en iourir sa vie durant tant seulement. Et quand il ha fils, le fils durant la vie du pere, en est reputé

Et censé comme Seigneur. Et ne luy peut le Roy son pere, ne autre, abdiquer, ou oster ce droit, voire encores s'il vouloit, ou consentoit, & quoy que ce soit, ne feroit preiudice que à luy, & non mie aux autres du sang, pouuans venir à la succession. Et seroit chose trop merueilleuse, que le Roy ne peust aliener partie de l'heritage de sa Couronne, & son Royaume, & de le non faire, iure à son Sacre, & il peut aliener sa Couronne, & son Royaume. Et si ce n'estoit que vn simple Duc, Per de France, que le Roy voulust pruer, si faudroit il que la chose se feist par proces, les causes congneues, & les Pers de France, presens, ou appelez, & plusieurs sollempnitez faictes, & gardées. Et si estoit le Roy, dont Dieu ait l'ame, & mains de ses ennemis, & quoy que ce soit, & mains des ennemis mortels & capitaux du Roy, qui à present est. Et lesquels seulement ne l'eussent pas voulu exhereder du Royaume, mais l'eussent fait mourir mauuaisement, s'ils eussent peu, sans quelconque cause & raison. Et ce est tout notoire. Mais il y ha plus. Car le Roy n'estoit pas en estat, qu'il en peust rien faire. Et ce, appert assez par le contenu du septiesme article du dict Traicté, qu'ils dient accord, où Henry d'Angleterre dit ce qui s'ensuyt, Item pro eo, quod dictus præcarissimus pater noster tenetur, quod dolenter referimus, & præpeditur aduersa valetudine, & per eum modum, quod commodè non poterat in persona sua, intendere seu vacare disponendis Regni negotijs. Et ainsi il appert, qu'il ne pouuoit entendre au gouvernement du Royaume, & durant sa vie, Henry y estoit commis. Par plus forte raison, ne le debuioit-on pas tenir habile à delaisser son Royaume à son ennemy ancien, & à exhereder son seul & vniue filz. Et n'ha pas Dieu voulu que chose si inique & deraisonnable, ait sorti son effect. Et est à aduertir que les principaux mesmes qui feurent au dict Traicté, comme Monseigneur de Bourgongne, & presques tous ceux de ce Royaume, & les villes lors à eux obeissans, ont congneu que tout ce qui auoit esté fait, n'estoit que vne mocquerie, & derision. Et se sont reduits à leur vrai chef, c'est à sçauoir à vous, nostre souverain Seigneur. Sçachans que par le moyen des choses pourparlées à Troyes, Henry ne pouuoit auoir aucun droit acquis, & que tout debuioit estre reputé nul, & de nulle valeur & effect. Et qui voudroit considerer le contenu de ce qu'ils appellent accord fait à Troyes, touchant les promesses faictes par le dict Henry, de gouverner & tenir l'estat du Roy, & de la Royne, dont Dieu ait les ames, & que il ne feroit que par le conseil de ceux de France. On trouuera qu'il n'ha tenu chose, qu'il ait promis : mais fait, & ha fait son filz aussi, tout le contraire.

¶ P. 566. & 567. En ce mesme temps arriva vne ieune fille, par deuers le Roy, nommée Ieanne la pucelle. Tous les Docteurs estoient d'opinion, que son fait, son dict, & ses paroles, estoient dictes & faictes par miracle de Dieu. N'est à oublier ce que le Pape Pie II. escript de ceste Ieanne la

598 . ANNOTATIONS SVR L'HISTOIRE
pucelle, Commentar. Pij papæ II. lib. 6, soubz le nom de Gobe-
lin, son Secretaire, Oû il en parle en ceste sorte,


*Desperatis penè Francorum rebus, puella nomine Ioanna, pauperis agricolæ filia, in agro Tullensi, cum porcos custodiret, diuino afflata spiritu, sicut res eius gestæ demonstrant, relicto grege, ac parentibus posthabitis, ad Præfectum proximi oppidi, quod solum eius regionis in fide Francorum remanserat, sese confert, ductoresque petit, qui sibi ad Delphinum iter demonstrarent. Querit Præfectus iu-
neris causam: habere se inquit diuina mandata, quæ ad illum perferat, sibi, & Regno salutaria. Ridet Præfectus, amentemque putans spernit. Instantem multis prætenat modis, sit mora plurium dierum, si fortè mutaret puella propositum, aut in ea aliquid reperiretur indignum. At ubi constans, & immutabilis, nul-
liusque conscia turpitudinis inuenta est: Quid scio, inquit Præfectus, an hæc Dei voluntas sit? sepe Regnum Francia diuina seruauere præsidia: forsitan & nostris diebus aliquid in cælo, pro nostra salute ordinatum est, quod per feminam pate-
fiat. Selectisque tribus spectata fidei seruus, puellam ducendam ad Delphinum commendat. Decem ferme dierum iter faciendum erat, & agros mædicos, aut ho-
stis tenebat, aut amicus hosti. Transiit cunctas difficultates inoffensa virgo, vesti-
bus induta virilibus, Delphinumque conuenit, & restitutis Præfecti literis, au-
diri petijt. Delphinus rei nouitate permotus, diluisionemque veritus, Castrensi Episcopo, confessori suo, inter Theologos apprime docto, puellam examinandam committit, nobilibusque matronis seruandam tradit. Interrogata de fide, ea re-
pondit, quæ Christianæ religioni conueniant: examinata de moribus, pudica, &
honestissima reperitur: sit pluribus diebus examen, nihil in ea fictum, nihil dolo-
rum, nihil arte maligna excogitatum inuenitur, in habitu sola difficultas manet. Rogata cur vestes viriles mulieri prohibitas induisset, virginem sese ait, virgini
utrumque habitum conuenire, sibi à Deo mandatum esse vestibus, ut virilibus
uteretur, cui & arma tractanda essent virilia. Sic probata; rursus in conspectu
Delphini reddita: Ego ad te, inquit, veni, Regum sanguis, Dei iussu, non meo consi-
lio. Is mandat ut mo sequaris; si parueris, restituam tibi tuum solum, Rhemisque
propediem tuo capiti coronam imponam. Delphinus rem difficillimam, quæ pro-
mitteretur, ait: Remorum ciuitatem, in qua Reges coronari solent, remotissimâ
esse, & ab hostibus obtineri, nec usquam iter patere tutum; Aurelianum, quæ
media ciuitas esset, ab Anglicis obsideri, nec vires Francos habere, quibus mi-
seris obseſis subueniretur, multò minus coronationi nauare operam posse. Nihil
his mota virgo: Non vana, inquit, promitto, si Deo credis, & mihi crede: eius
nuncia veni, arma tibi ministrabo diuinitus, & inuisibili ferro aperiam iter: pare-
bunt quocunque ieris populi, & vltro tua signa sequentur nobiles. Nec tu mihi
obsidionem Aurelianensem obieceris, hanc ego ante omnia dissoluam, & ciuita-
tem liberam dabo, tantum mihi hos equites, qui te penes adſunt, concedito. Res:*

aliquandiu in consilio diuersis sententijs agitata est, alij captam mente puellam, alij demonio illusam, alij Spiritu sancto plenam putabant. Et ij Bettuliam, atque alias olim ciuitates per foeminas fuisse saluatas referebant, Regnumque Francia sepe diuinitus adiutum, nunc quoque per virginem, quam Deus mitteret, posse defendi, nec resanam puellam quoquo modo putandum, cuius consilia sensu plena essent: vicit hæc sententia, & Aurelianensem prouinciam puella crediderunt. Dux foemina belli facta est: allata sunt arma: adducti equi: puella ferociores ascendit, & ardens in armis, hastam vibrans, saltare, currere, atque in gremium se vertere, haud aliter coegit equum, quam de Camilla fabula tradunt. Quod cum procures aduertissent, nemo inuentus est, qui ducatum femina contempserit. Nobilissimus quisque assumptis armis percupide sectatus est virginem, quæ paratis omnibus, itinere se commisit.

Et derechef, apres auoir parlé de sa mort, Sic Iohanna obiit mirabilis, & stupenda virgo, quæ collapsam, ac penè dissipatum Francorum Regnum restituit, quæ tot tantasque clades intulit Anglicis. Quæ Dux virorum facta, inter militum turmas, pudicitiam seruauit illasam, de qua nihil unquam indecorum auditum est; diuinum opus an humanum inuentum fuerit, difficile affirmauerim. Nonnulli existimant, cum Franciæ Procures, prosperè succedentibus Anglorum rebus inter se dissiderent, nec alter alterius ducatum ferre dignaretur, ab aliquo qui plus saperet, hoc rastramentum excogitatum, vt virginem diuinitus missam assererent, ducatumque petenti admitterent: neque enim hominem esse, qui Deum Ducem recuset: atque in hunc modum rem bellicam puella creditam, & armorum imperium datum. Illud exploratissimum est, puellam fuisse, cuius ductu Aureliani soluta est obsidio, cuius armis omnis terra subiecta est inter Bituriges, ac Parisios, cuius consilio Rhemeneses in potestatem recepti sunt, & coronatio apud eos celebrata, cuius impetu Talbotus fugatus, & eius casus est exercitus, cuius solertia, atque industria, res Francorum in tuto repositæ sunt.



Österreichische Nationalbibliothek



+Z166981006

